

Esuquidistu Chuiquin
Tantiamete



New Testament in Matsés (PE:mcf:Matsés)

Esuquidistu Chuiquin Tantiemete

New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
446da786-5bd1-5ffa-85e2-9eff4052cf8b

Contents

Mateyon Dada uaid	1
Madcosën Dada uaid	80
Ducasën Dada uaid	126
Uanën Dada uaid	202
Esus Chuibenequidon Naid	261
Doma yacnocquidon Iste	330
Codinto yacnocquidon Iste 1	366
Codinto yacnocquidon Iste 2	398
Cadasia yacnocquidon Iste	417
Epeso yacnocquidon Iste	430
Pidipos yacnocquidon Iste	441
Codosas yacnocquidon Iste	449
Tesadonica yacnocquidon Iste 1	457
Tesadonica yacnocquidon Iste 2	464
Timoteyon Iste 1	468
Timoteyon Iste 2	478
Titon Iste	485
Pidemonën Iste	490
Ebedeyon Isadaidbon Iste	492
Santiacon Dada uaid	515
Petedon Dada uaid 1	524
Petedon Dada uaid 2	534
Uanën Dada uaidëmpi 1	540
Uanën Dada uaidëmpi 2	548
Uanën Dada uaidëmpi 3	549
Udasën Dada uaid	551
Esusën Uan Ismiaid	554

MATEYON DADA UAID

Esuquidistun tsusedpabotedi chiaid (Duc 3.23-38)

¹ Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

² Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic.

³ Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid.

⁴ Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic.

⁵ Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obëd tishmepampic. Obëdën mado Isai cuëmëdquid icpampic.

⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udiäs caid cuesunetanquin aton chido bedshun aton mado Sadomon tishmepampic.

⁷ Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid.

⁸ Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid.

⁹ Usiasën madobic Otan cuëmëdquid. Otanën madobic Acas cuëmëdquid. Acasën madobic Esequias cuëmëdquid.

¹⁰ Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid.

¹¹ Osiasën madobic Econias cuëmëdquid. Aid Econias caid aton masesadobëdtabi yuanuen Babidonia yacnocquidon aton nidaidën buampic.

¹² Buanac shubu dadpen icquid Babidonia caid yacnoshon Econiasën aton mado Sadatied tishmepampic. Sadatiedën mado Sodobabed cuëmëdpampic.

¹³ Sodobabedën madobic Abiud cuëmëdquid. Abiudën madobic Ediaquin cuëmëdquid. Ediaquinën madobic Asod cuëmëdquid.

¹⁴ Asodën madobic Sadoc cuëmëdquid. Sadoquën madobic Aquin cuëmëdquid. Aquinën madobic Ediud cuëmëdquid.

¹⁵ Ediudën madobic Ediasad cuëmëdquid. Ediasadën madobic Matan cuëmëdquid. Matanën madobic Acobo cuëmëdquid.

¹⁶ Acobon madobic Ose cuëmëdpac caondash. Aidquio Madian bënë nepac caondash. Aidën inabi Madian Esus usundoshon fishpac caondash. Esus Nuquin Papan chomiaid yec matses bëdambo icmequidquio nec. Isadaidbon cainaidquio nec.

¹⁷ Aidedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuioaquin padpiden bedanquin aidën matses 14tedbidi chuiquin Econias aton matsesbëdta buanaid ënquin chiombi. Adoshombic Econias

ënquin chuiboed chuioaquin padpiden bedanquin aton matses 14tedbidi chuiquin Esusquiobi ënquin chiombi.

Esuquidistu tishaid
(Duc 2.1-7)

¹⁸ Nëbi aid tishaidquoio chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash.

¹⁹ Usundoacsho isun abi inuequidën Osen dada utsin chudaïd danec: — “Nëbi mibi bedtiapimbo iquebi,” quequin bedenquoio icnuen dada uashun Madia menenu —queuidpac caondash. Nuquin Papan chiacpadquoio bédambo icquid icquin naden chiambo icpac caondash. —Bedabi bacuë usundoaque. Cuidquimbien ictiad —quequin aton matses chienquoio yequi: —Bedenquoio icnuen dada uaid menenu —queuidpac caondash.

²⁰ Adnubien Nuquin Papan abi yacnoshon uaidën mayan bédan Ose ushquin ismepac caondash. —Dabid yampidën tsyuecquid icsho mibi chuinu, Ose. Tantia. Chudenquoio icquin Nuquin Papan Mayanën Madia bacuë usundomiaye. Dacuëdenda. Dacuëdenquoio icquin Madia min shubuno buanta.

²¹ Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquoio iquendac,” quequin Esus cuënta —quequin mayan bédan Ose ushquin ismepac caondash.

²² Aden mayan bédan Esus tishte chiacpadomboen Nuquin Papan ambi chiaïd naden dada uamepampic.

²³ “Dadan inacmaidëmbi bacuë usundoshon dada bacuë tishendac. Aïdi Imanued cuënendac.

‘Nuquin Papapadquidquibidi matsesbéd tabadnuec choash nec,’ quequin Imanued cuënendac;” quequin Esus tishte Nuquin Papan dada uamepampic.

²⁴ Aden mayan bédan chiac isucunshumbien aidën chiacpadomboen Osen aton shubuno Madia buampac caondash.

²⁵ Buanshun Osen chudenquoio icnubi dada bacuë tishpac caondash. Tishacsho Esus cuëmpac caondash.

2

Uispa isquido Esus isec choaid

¹ Nidaïd Udeya caïd yacno tabadquin shubu daëdpactsëcquid Beden caïd yacnoshon Esus tishpac caondash. Adnubien shubu dadpen icquid Edu-saden caïd yacno isadaïdbo matses ancaquid Edodes cuëmëdquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin

² anocquido chuituidpac caondash. —Min matses isadaïdbo chuiquid dapa ictequidquoio nëbi tishtsaidëmpi ¿midambo ictseque? Isnu. Aid tishaid tantiamete uispa isombique. ¿Mitsimbo ictseque? Isnu. “Chuiquid dapa bédamboshë ictequid nec,” quiash aid isnuec chopobi —quetuidpac caondash.

³ Adsho tantias dacuëdcuededpac caondash abitedimbo. —Padtec. ¿Mïdapaquid bacuë nependabac? —quecuededpac caondash Edodes isadaïdbo ancaquid ambi ancaïdobëdi.

⁴ Adshumbien Edodesën abi yacno tsusiobo cho-chomepac caondash. — ¿Mitsicquid caique? Tiantianu —qeshun abi yacno Moisesën dada uampid

chuiبانquido abi chuiquid dapabobēdta cho-chomepac caondash. Cho-chomeshumbic: —¿Mitsishunquid Nuquin Papan chomiaid min matses chuiquid dapa ictequid tishpash? ¿Ada Nuquin Papan chiaid isbanquin tantio? —caquien:

⁵ —Ai, tantiembi. “Nidaid Udeya caid yacno tabadquin shubu daēdpactsēcquid Beden caid yacnoshon aid bacuē tishendac,” quiampicpadembi tantiembi. Nuquin Papan ambi chiaid nuquin tsusedpa dada uamepampic naden.

⁶ Shubu daēdpactsēcquid Beden caid yacnocquido chiec: “Beden yacno tabadec nidaid Udeya caidēn tabadquido mibi nec. ‘Chuiquid dapa nibēdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidēmbi isadaidbo matses chuiquid dapa icquin bēdamboen tabadmendac,” —quequin Nuquin Papan Esus tishte chiaid chuipac caondash tsusiobon Edodes caid chuiquin.

⁷ Adoaquien Edodesēn ambi ancaido isadaidbo ismenquio icquin matses utsibo uispa isquido chomeshun chuimepac caondash. —¿Nēbida tishaid tantiamete uispa isquin tauao? ¿Nēid inchēshēn ushēmbida isbeno? ¿Ēndenda isbenonda? En chui. Tiantianu —cac chuisho

⁸ tantiashun: —Beden yacno istan. Ano nidshun mimbi chiacpadquid bacuē istan. Aid bacuē istanec cuenquin ēbi chuibenta. Ēmbitsen istanu. “Nuquin Papan chomiaid chuiquid dapa ictequid bēdambo iquec,” quequin ēmbitsen istanu —capac caondash Edodesēn maequimbi. —Cuesunenu —quequimbi adopac caondash.

⁹ Adoaquien ushē choacmiuēsh bed-bedquesho ambi isbēquin tsibambēboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: —Bacuē ictsaid shubu nēid iquec —quec.

¹⁰ Adsho isashien cuishonquepac caondash uispa isquido.

¹¹ Adash shubun puduedshun isquien aton tita Madiabēd bacuē ictsec. Aid isashic: —Matses chuiquid dapa ictequid nec. Matses bēdambo icmetequid nec —quequin aton matsesēn nacpadomboen ismequin danēshēn seabudpac caondash. Adshumbic ambi bēboed aton na bēdambo icquid chicshun menepac caondash nēidtedi. Nēidic shocosh piu. Nēidic bēdambo nuadnuc tauitequid. Nēidic bēdambo noadec danoshquete. Aidedi menepac caondash. Adoash ushtopac caondash.

¹² Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedēn nidenquio yec podqued utsin nidpac caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidēn mayan bēdan Ose ushquin ismepac caondash. —Isucunanec cuenta. Bacuēmpi aton titabēdta buanec nidaid utsi Equipito caid yacno cuenta. Ēmbi chiabi choenda. Anobi tabadta. Edodesēn: “Bacuēmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bēdan.

¹⁴ Aden ushquin ismiac isucuntantsequi inchēshēmbi puduanec aton bacuē anibēdta buanec nidaid utsi Equipito caid yacno Ose nidpac caondash.

¹⁵ Equipito yacno nidash ambobi tabadpac caondash. Isadaidbo ancaquid Edodes unēsabi icnuc Equipito yacno tabadpac caondash. Esus tishabi icnubi ēndenquimboshē Nuquin Papan tantiamiac ambi chiaid chuibanquidēn Esus

Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio cho, Mado, caindami,’ quiosh Nuquin Papa,” quequin Nuquin Papan chiaid dada uapampic.

Bacuëbo dadpen cuesun siatanaid

16 Adnubien isadaidbo ancaquid Edodes: –Uispa isquidon cacuidposhi –quiash comapenec nëishun aton yuabo sondado chuipac caondash. –Uispa isquidon chuibocpadtsëccquid comapenec onquecuenabi ictsëccquidotedi dada bacuëmpibotedi cuesun siatan. Beden yacnocquidon bacuëbôbêdtabi uano pauequidon bacuëbôtsen cuesun siatan –cac cuesun siatampac caondash.

17 Aden cuesun siatanambo icnubi Nuquin Papan adote chiaid êndenquimboshê Edemias cuëmêdquidên dada uapampic naden chuiquin.

18 “Abi yacnuësh aton bacuëbo nibêdansho isash isadaidbon chidobo sedenqueuedendac.

Unësaid tantiec baded ênêdenquo yec sedenquebudnendac,” quequin chiampicpadomboen aton bacuëbo nibêdamepac caondash.

19 Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidên mayan bédan Ose ushquin ismepac caondash.

20 –“Bacuëbo cuesun siatan,” quiondaid unësaccoshe. Min chido min bacuëbêdta buanec min nidaid Isadaid caidên nidoata –caquien

21 isucunanec aidên chuibocno buanec nidpac caondash.

22 Aton nidaidên nidshun aton matsesên chiaid tantiapac caondash. –¿Ada tantio? Udeya yacnocquido ancadened unësaidên mado Adquedayo caid ancanquidquibidien nechitec –quesho tantiashien dacuêdtampac caondash Ose. Adshobien Nuquin Papan Ose ushquin ismeopac caondash. –Cuesunenushê. Min nidaid Udeya caidên nidenda –quequin ushquin ismiac isucunanec aid nidaid Isadaid caidêmbidi nidec aid nidaid cuëshê utsi Cadidia caidên nidpac caondash. Udeya caidên nidenquo yec uquëmbo nidpac caondash.

23 Uquëmbo nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,” quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

3

Uan acten mentoanquidên chuibeniaid

(Mad 1.1-8; Duc 3.1-9, 15-17; Uan 1.19-28)

1 Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibêdacno capucuenequin Nuquin Papan chiaid chuibenequid nepac caondash.

2 Adquid icquin Esus chote chuibampac caondash naden. –Mibi icsaid ênash bédamboec tabadta. Nuquin Icbombo choeque –quequin chuipac caondash.

3 Aden Uanên chuite chuiquin Nuquin Papan isadaidbo tsusedpa Isayas cuëmêdquid dada uamepampic naden.

“Masiuidpambo yacno shubu nibêdacno capuquin êcac matses chosho chuibenendac.

‘Chuiquid dapa choeque. Podqued andêdbanshunta,’ quiachimboen:

‘Nuquin Icbombo choeque.

Icsaid ênash bédamboec tabadta,’ quequin chuibenendac,”

quequin Isayasên Uanên chuite chuipampic.

⁴ Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tsipantebic nidaidën capuquid yua bitsi nacenaid tsiupondash. Aton pete bacumbëd shioshbimboecquid icpondash.

⁵ Aidën Nuquin Papan chiaid chuibenesho tantianuec nëidtedi matses chopac caondash. Nëidic shubu dadpen icquid Edusaden caid yacnocquido. Nëidic nidaid Udeya caid yacnocquido. Nëidic acte Odan caid cuëman tabadquido. Aidtedi cho-chopac caondash.

⁶ Cho-choshon Uanën chuisho tantiasht: —Nuquin Papan chiaid niacniaquec icsapobi. Icsaboedi aid tantiec bëdamboec tabadtiadquio iquebi —quesho: —“Nëid Nuquin Papa tantianu,” quequid nec —quequin acte Odan caidën mentopac caondash Uanën.

⁷ Adnubien padiseyobobëd saduseyobo Uan isec cho-chopac caondash. Padiseyobo isadaidbo tsusedpabon chiaid namequido nec. Saduseyobobic: —Matses unësaid uincuenenquio iquendac —quequido nec. Aido cho-choso isun Uanën: —Nisibimboecquido mibi nec. Adquidën icsa uachimboen matses icsa uaquido mibi nec. Bëdambo icquid damianquiec mibi iquec. “Nuquin Papan mibi cuidnushe. Tantiatan,” quequin çtsuntsin chiac cho?

⁸ Mentomete bunec Nuquin Papan chiaid niac-niacboedi ënash bëdamboec tabadta.

⁹ “Ëbipadquid Abadauanën tsyuecquidouditsëqui Nuquin Papan bëdamboen isec,” quequin tantienda. çAdquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mímibi bëdamboen tantiatipimbo icsho isun nëid cuënotebi matses uashun Nuquin Papan Abadauampadquid abi tantiaquidombo icmetsiash icnushe. Nuquin Papambo tantiatia.

¹⁰ “Icsambo icquid nec,” qeshun ambi nitsinaid cuëte bacuëesa dëdshun nëdëncacimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chiec.

¹¹ Adshumbic padpiden chuiquin Esusën nate chuipac caondash. —Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Èbi bëdiactsëc tantiaquid ictsëcnuc aidquien comapenen tantiaquidquio yec bëdamboshë iquendac. “Aidquio bëdamboshë icquid icnuc çatotsieshun icsaquidquibi: ‘Aid choec,’ quequin chuiquidquio Nuquin Papan ëbi icmeposh?” quec tsadebi. Èmbi chuiboed choshon: “Èbi tantiaquid nec,” qeshun aton Mayan menequin bëdamboec tabadte mibi tantiamendac. Abi tantiesaboen cuidendac.

¹² Piacbo choeshashun putu bushcaquin secacimboen abi tantiesabochian anëdënquiacno nësecaindac. Adshumbic abi tantiaquido abëdi tabadmendac —quepac caondash Uan acten mentoanquid.

Uanën Esus mentoaid

(Mad 1.9-11; Duc 3.21-22; Uan 1.32-34)

¹³ Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: —Èbitsen mento —quetuidpac caondash.

¹⁴ Adshobien Uanën: —Padenquio iquembi. Nuquin Papan chomiaid icquin mimbibi ëbi naquien bëdambo ictsiash. çAtotsieshun ëbi aden chie? Padi —qeshobien:

¹⁵ —En na. Bëdambo iquec. Èbi mentoquin mímibi Nuquin Papan chiacpadomboen natsiaque. Èbi acten mento —quesho tantiashtun Esus acten mentopac caondash Uanën.

¹⁶ Adoac Esus pudundonobien canchedacimboec abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec.

¹⁷ Adnubien abucuëshquio Nuquin Papa onquiampac caondash. —Nëid ëmbi tantiaidquio con Mado nec. Èmbi chiacpadomboen nasho isash bëdambo iquebi —quepac caondash Esus caic.

4

Satanasën Esus icsamenuequin tanuidaid (*Mad 1.12-13; Duc 4.1-13*)

¹ Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënquid Satanasën Esus icsamenuequin ma tanu —quequin ambo nidmepac caondash.

² Adoaquien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntsëcncuc 40tedec ushqin penquio yec comapenec bumpac caondash.

³ Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata —caquien

⁴ Esus: —Padi. Nuquin Papan chiaid dada uapampid nad iquec. “¿Peteuidi tantiecta matses bëdamboec tabadpec? Nuquin Papan chiacpadomboenuidi naiquien matses bëdamboec tabadtsiash,” quequin dada uapampid iquec —quepac caondash Esus.

⁵ Adsho tantiaishumbien shubu dadpen icquid Edusaden caid yacno buan-shun Nuquin Papa tabadte shubu uashunaid macano Satanasën Esus manid-tomepac caondash abucquio.

⁶ Adotanguimbien padpiden chuioaquin: —¿Nuquin Papa caidën Madombobida mibi neque? Aidën Mado yec nëuëshquio pudunta. Nuquin Papan mibi paëdmenquio ictsiashe. Nadentsen Nuquin Papan chiaid dada uapampic.

“ ‘Uidën uata,’ quequin ambi abi yacnoshon uaido mayan bëdabo Nuquin Papan chiac mibi uidën uaindac paëdenquio icnuc.

‘Cuënoten tadquëdnushe,’ queshun adoendac,” quequin Nuquin Papan chiaid dada uapampique. Pudunta —caquien

⁷ Esus: —Padi. Nuquin Papan chiaid dada uapampid nad iquec. “ ‘¿Icsamboen tantiaquin ëmbëmbi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

⁸ Adoaquien Satanasën padpiden buanquin macuësh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash.

⁹ Adoshombic: —Nëidtedi mibi menetsiambique. Èbi con icbo cata. Èbi aden chuiquin ismenuen danëshën sebudta. Adsho isun ëmbi ismiactedi mibi menëmbi. Aidën icbo mibi icmëmbi —caquien

¹⁰ Esusën: —Padi. Baded cuenta. Nuquin Papan chiaidquio chuiquin naden dada uapampique. “Nuquin Papa abentsëcquiobi mimbi tanti-aiduidtsëqui min Icbombo neque. Aidën namiaidquio icta,” quequin dada uapampique. Cuenta —capac caondash Esusën.

¹¹ Adoaquien Satanas cumpac caondash. Cuenubien Nuquin Papan abi yacnoshon uaido mayan bëdabo choshon abëdi tabadquin Esus bëdambo icmepac caondash.

*Cadidia yacnoshon Esusën chuibeniaid**(Mad 1.14-15; Duc 4.14-15)*

¹² Adashic aton nidaid Cadidia caidën Esus nidpac caondash. —Mibi acten mentondaid Uan bedshun quënën nauedac caosh —quesho tantiash nidpac caondash.

¹³ Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash antsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic.

¹⁴ Esus ambo tabadte chuiquin Nuquin Papan con tsusedpa Isayas cuëmëdquid dada uamiampicpadec ambo tabadpac caondash Esus. Naden dada uapampic.

¹⁵ “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpemo dadpen tabadacno Cadidia caidën tabadquidon.

¹⁶ Aidtedishun Nuquin Papan chomiaid tantiendac.

Pabiate cuënëdaccimboec ìcsamboec tabadquin Nuquin Papa tantienquo icboedombi tantiabenendac.

Nuquin Papa tantiamenuen chuibansho tantiashun matsesën paposhquiacimboen Nuquin Papa tantiabenendac.

Abi tantienquo icsho Nuquin Papan cuidtsenaidombi Nuquin Papa tantiabenendac ushash isucunacimboen.”

quequin Isayas Esus choash tabadte dada uamepampic Nuquin Papan.

¹⁷ Ashunquiobi Nuquin Papan chiaid chuiquin tauamboen Esusën matses abitedimbo chuibenepac caondash. —Icsaid ënash Nuquin Papa tantiec ambi chiapadec bëdamboec tabadta. Nëbi Nuquin Papan abëd tabadtequido icmequin matses bëdamboen tabadmendac —quepac caondash Esus ambibi naid chiequi.

*Nuëcquid bedquido Esusën: Cho, caid**(Mad 1.16-20; Duc 5.1-11)*

¹⁸ Aden chuibenec chian dapa Cadidia caid cuëman nidquin isquien dadan aton utsibëdtambi nëshaid dapambo acte nënepec. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nëshaid acte nënesho istuidpac caondash Esusën.

¹⁹ Adshumbien Esusën: —Nuquibi icnu. Cho. Nuëcquid bedquid icboedi nëbi ëbi chuibanquid mibi icmenu

²⁰ —caquien aton nëshaid nianec nidquimbi Esus tsibanampac caondash.

²¹ Udictsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bednun aton nëshaid dapa nacnempac caondash. Adsho istuidshun Esusën: —Nuquibi icnu. Cho —caquien

²² aton papabëdta cano nianec Esusbëd icnuec nidpac caondash.

*Matses dadpen Esusën chuibeniaid**(Duc 6.17-19)*

²³ Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec puduedcuenequin Esusën Nuquin Papan chiaid chuibenepac caondash. Abí yacno tabadmenun Nuquin Papan bëdamboen iste matses chuibeniac caondash. Adshumbic daicsaidotedi bëdamebampac caondash.

24 Adosho istanquin: —Bédamequidquio nec —quequin isboedon Esusën naid chuibenepac caondash. Ēnapen nidec nidaid utsi Sidia caidën nidshun chuibeniac caondash. Aden chiac daicsaidotedi bē-bēpac caondash. Dada paēmbošhē icquido yec podobitsi icsa dapuduedaido yec unēsanequido yec dada shēquēnenquio icquido yec quenuc bē-bēacsho aidtedi bédamepac caondash Esusën.

25 Aden: —Bēdamiosh —quequin chiac isec cho-choash dadpenquio tsucus-tsucustsēcquio yec tsidadash niqianquin Esus tsibanampac caondash. Nēidtedshun tsibananac caondash. Nēidic nidaid Cadidia caidën tabadquidon. Nēidic shubu dadpen icquid Decapodis caid yacno tabadquidon. Nēidic shubu dadpen icquid Edusaden caid yacnocquidon. Nēidic nidaid Udeya caidën tabadquidon. Nēidic acte Odan caid uquē cuēma utsiuc tabadquidon. Aidtedshun Esus tsibanampac caondash.

5

Nadquido bēdambo iquendac, quequin Esusën chiaid (Duc 6.20-23)

1 Matses dadpenshun tsibananac macuēsh dapa cuēte nibēdpamboecquid pudundoec poctsebi Esus tsadtuidpondash. Abi tsibananash matses dadpen abi datsidadnubien abēd icquido Esusën dayunquio tabadpondash.

2 Adshobien Nuquin Papan matses bēdamboen isquin bēdambo icmete Esusën matses abitedi chuibampondash.

3 —¿Mitsipadquid Nuquin Papan bēdambo icmepec? Nadquid caimbique. Tantia. Mibitedi chuinu. “Ēbemi bēdamboec tabadtiapimbo iquebi. Bēdapenquio iquebi. Nuquin Papan bēdamboen tabadmiaquini bēdamboec tabadtsiac,” quequid Nuquin Papan: “Ēbēd tabadtequid nec,” quequin bēdambo icmendac.

4 “Matses abitedi icsamboec tabadnuc ēbitsen icsamboec tabadquid nebi,” quec shubiquimbi abi tantiašo Nuquin Papan bēdamboen isquin bēdambo icmendac.

5 Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bēdambo icmendac. Yuecshun ambi nidaid chuca uaidën tabadmendac.

6 Pete bunacimboec ambi chiacpadece bēdamboec tabadte bunquid Nuquin Papan bēdamboen tabadmendac.

7 Abi chieshēnquidi chieshēnenquio icquin bēdamboen isquid Nuquin Papan bēdamboen isendac.

8 Ambi chiacpadomboenuidi nate bunquid Nuquin Papan bēdambo icmequin abibi bēismendac.

9 Aton matses chieshēnansho isash: “Padi. Chēn. Bēdamboequien tabadtiad,” quequid Nuquin Papan bēdambo icmequin con mado caindac. Adquidbidi adembidi con champi caindac.

10 Nuquin Papa tantiece bēdamboec tabadsho utsin chieshēnaid Nuquin Papan bēdambo icmequin unēsacsho abēdi tabadmendac.

11 “Esus tantiaquid nec,” qeshun utsin mibi chieshēnquin chiacsho Nuquin Papan abēd tabadmenuen mibi bēdambo icmendac. Mibi cueso adembidi mibi bēdambo icmendac. Adembidi mibi muauasho Nuquin Papan mibi bēdambo icmendac.

12 Aden utsibon: “Esus tantiaquid nec,” qeshun chieshēnaqui cuishonqueta. “Ēnden tsusedpabon Nuquin Papan chiaid chuisho chieshēnquin

cuesunepampic. Adoacsho Nuquin Papan bēdamboen isquin abēdi tabad-mec. Adembidi utsibon chieshēnacsho ēbi bēdamboen isquin unēsacsho abēdi tabadmendac,” quiash cuishonqueta —quequin chuipondash Esusēn.

Abi tantiaquido bēdamboec tabadte chiaid
(Mad 9.50; Duc 14.34-35)

13 Abi macuēsh dapa poctse tsadquin Esusēn chuibampondash. —“Ma utsibontsen Nuquin Papa tantianu,” quec sa pambid casecac batambo yec petiadquio yachimboec icta. Aden Nuquin Papan chiacpadec bēdamboec tabadquin mimbis utsibo bēdamboec tabadte bumetsiac. Sa batambo icquid bēdambo iquec. Sa batambo ichoedi batapenquio yec icsasho ŷmitsipadentsi batambo icmeoapec? Adotiapimbo iquec. Sa icsambo yanacsho penquio icquin secatequid nec. Adembidi matses bēdamboec tabadenquio yec icsambo icsho Nuquin Papan chian anēdēnquiacno nēsacatequid nendac —quepondash Esus.

14 Adashic padpidec onquec: —Nuquin Papan chiacpadec bēdamboec tabadte utsibo tantiamequido mibi neque. Aden tantiamenuec bēdamboec tabadta. ŷNuntanshunda ēapadic? Padenquio. Umanuschumbien ma tantianueshun ēaquid. Adembidi: “Ma Nuquin Papan chiacpadec tabadte tantianu,” quiash ēnēdenquio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo.

15 ŷUtsibo chuinuecta abentsēqui uano icpadic? Padenquio. “Ma nēidēn tantianu,” quec aibdēdi bēdamboec tabadquin chuibanquid.

16 Adembidi ēbi tantiesabobēd tabadquin: “Ma Nuquin Papa tantianu,” quequin ēnenquio icquin Nuquin Papan chiacpadomboen nata. “‘Nuquin Papa bēdambo iquec,’ ma utsibotsen quenu,” qeshun adota —quequin Esusēn chuipondash.

Nuquin Papan Moises chuimiaid chiaid

17 Nadentsen Esusēn chuipondash. —Ēmbi chuibansho tantiashun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbēdta con tsusedpabo utsibo dada uamiampid chienquio icquin utsi uapec,” mimbis ēbi capec. Mambi utsi uainquio yoc. Nuquin Papan chiaid utsi uainquio icquin ambi chiactedimbo namenuc nebiqec.

18 Abimbo chuinu. Tantia. Abubēdta nidaid nibēdamiabi icnuc Nuquin Papan chiaid bēnudiapimbo iquendac. Ambi chiactedimbo naquin Nuquin Papan nainendac.

19 Padnubic Nuquin Papan: “Nadomboen nata,” quequin chiaid abentsēqui niacquin aid chiaidbidi adomboembidi niacmequid Nuquin Papan: “Bēdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdamboshē icquid nec,” caindac.

20 Moisesēn dada uampid chuibanquido padiseyobobēd Nuquin Papa yacno puduedtequidoen mimbis dampec. Aido bēdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash —quequin chuipondash Esusēn.

Chieshēmēnquido nēish bēdante chiaid
(Duc 12.57-59)

²¹ Adshumbic Esusën padpiden chuiopondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidën cuesunemequin cuidquid,” quequin chuipampic mimbi tantiec.

²² “Nadquidotsen cuidtequido nec,” quequin chuinu. Tantia. Aton matses nëishënash aton nëish bēdanenquo icsho Nuquin Papan cuidtequido nendac. Utsibic chieshēmēnec icsamboec cuēmēnquido isadaidbo tsusiobon cuidachsho isun: “Bēdamboen naic,” catsiambi. Nēidic aton matses chieshēnquin shēpiaquid Nuquin Papan icsano nēsecaquin cuidtequido nendac.

²³ “Chieshēmēnquid Nuquin Papan cuidtequid nendac,” quequin ěmbi chuisho tantiashun bēdamboen nata. Nuquin Papa tabadte shubu uashunaidën puduedash: “Ambi chiacpadomboen musuc menenu,” mibi quepec. Aden musuc menenumbi mimbi naid tantiata. “¿Ada ěbi chieshēnquid icpec? ¿Ěmbi chieshēmeboedta icpec?” quequin tantiata.

²⁴ Adshun: “Ai, ěmbi chieshēmeboed iquec,” qeshun Nuquin Papa tantiaguin mimbi bēboed meniabi mibēd chieshēnamboed yacno nidash aibbēd bēdamboec onqueta. Adec bēdamboec onquiash padpidec choashun Nuquin Papa tantiaguin meneta. Adec mibēd chieshēnamboedbēdi bēdamboec onqueta.

²⁵ Mibēd chieshēnamboed utsimbic: “Nēid cuidmenuen cuidte chuiquid yacno buanchitembimbi iquec,” qeshun: “Baded nid,” cac podquedën nidec aibbēd bēdamboec onquenidta: “Ma nëish bēdanu,” quiaish. “Matses cuidte chuiquidën cuidchitoshe,” quiaish badedquo mibēd chieshēnamboedbēd bēdamboec isnanta. Abi yacno buanacsho cuidte chuiquidën: “Icsambo iqueque. Quēnēn nauedta. Ěmbi chiacsted piucquid ěmbi bedabi icnuc ma tsadpanu,” mibi catsiash. Quēnēn nauedshun

²⁶ ambi chiacsted piucquid nibēdnuc mibi cuemenquo ictsiashe. Mibēd chieshēnamboedbēdi bēdamboec onqueta. “Nuquin Papan adembidi cuidnushē,” quiaish adta —quequin Esusën chuipondash.

Icsaquin chudaid chiaid

²⁷ Adshumbic naden Esusën chuipondash. —Chiaid utsitsen mimbi tantiec. “Min chidopenquo chudenda. Min bēnēpenquo chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic.

²⁸ Aden chiaid niac-niaquec icsambo icquid icnubi nadquid icsambo icoaic. Aton chidopenquo isec: “Aidquo chudtiadquo icchitebi,” quequin otacquo tantiequi matses icsapec.

²⁹ Ěshēn isec mibi min chidopenquo bunec icsaic. Ěshē chichshuniacimboc icsainquo yec ěnēdash mibi bēdambo ictsiaic. Icsaid ěnenquo icquid Nuquin Papan chian anēdēnquiaco nēsecaquin cuidendac.

³⁰ Min chidopenquo chudte bunquin mēismec mibi icsaic. Mēteshuniac bedtiapimbo yacimboben mibi icsaid ěnta. Ěnenquo icquid Nuquin Papan cuidendac —quequin Esusën chuipondash.

Aton chidobēd cuēshēdte chiaid (*Mat 19.3-9; Mad 10.11-12; Duc 16.18*)

³¹ Nadentsen Esusën chuipondash. —Nuquin Papan Moises chuimiaid utsitsen mimbi tantiec. “Aton chido bunenquo icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic.

³² Utsitsen chuinu. Aton chidon bēnēpenquo chudmesho istuidshun Moisesën chiacpadomboen nac bēdambo ictsiashe. Aton chido dada utsi

chudmesa icshobi dadan ambembi dada uaid menequin nidmiac icsambo ictsiash. Aden nidmequin chido icsametsiash. Chido nidmiacsho bedquidt-sen icsatsiash –quepondash Esus.

Abimbo chiacimboen chienda, quequin Esusën chiaid

³³ Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “‘Nuquin Papa utsi uatiapimbo yacimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesën chuiampic.

³⁴⁻³⁶ Aidën chiacpadec muainquo ictiadquidi mimbi abimbo chiacimboen utsi uain icsamboen chiec. “Abi cuëmédquid cuënenquo yec muasho Nuquin Papan ëbi cuidenquo ictsiash,” qeshun mimbi utsi chiec. “Abu utsi uatiapimbo yacimboen ëmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yacimboen ëmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiacimboen chienda. “Nuquin Papa cuëmédquid cuënenquo iccombi,” mibi quenubi abu abi tabadaid icnuc ashunquo Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomaidën bédamboen namendac yuecshun. ¿Min mapin icboda mibi nedi? Padenquo. ¿Mimbida min mapi masedcamed? Padenquo. Aton Icbombien Nuquin Papan naique. Abimbo chiacimboen icsamboen chienda.

³⁷ Adec muainquo icquin abimbo chuita. “Ai, adembi naimbi,” quequin mimbi chiacpadomboen nata muainquo icquin. Adecbidi: “Padi. Natiapimbo iquebi,” qeshun mimbi chiacpadomboen nanda. Utsi uaic matses icsamequidën Satanasën tantiamiacpadec mibi muapeque. Adenda –quepondash Esus.

Chieshë nec cuidnanenda, quiaid

(Duc 6.29-30)

³⁸ Adashic padpidec Esus onquec: —Nuquin Papan Moises chuiquin dada uamiampid mimbi tantiaboed nad iquec. “Chieshë nquin ëshë ansiac adecbidi cuidnanec ëshë ansenanquid. Chieshë nquin sëcsiac adecbidi cuidnanec sëcsenanquid,” quequin chiaid icnuc

³⁹ utsitsen chuinu. Tanta. Mibi cuesquid cuidenda. Chieshënaqui cuidnanenquo icquin adembi bédamboen ista.

⁴⁰ Min matses: “Ëbi cuidquin mimbi ëbi meniampo iqueque. Min dashcute beccho,” qesho mimbi menenquo icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bédamboec tabadta.

⁴¹ Utsibic: “Nëbi nidtuidquin con na buanec nid,” quequin ancabudac nëbi nidtuidenquo icquin udimbo buanshunta.

⁴² Aton na nibédquid: “Mitsana beccho,” qesho meneta. Utsibic: “Mitsana buanshun bëuaindami,” qesho: “Padi,” cainda. Meneta. Aden bédamboen nata –quepondash Esus.

Chieshë nquidobi bédamboen iste chiaid

(Duc 6.27-28, 32-36)

⁴³ Adshumbic abi macuësh dapa poctse tsadquin bédamboec tabadte Esusën chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshë nquido chieshënta,” quequin chuiampic.

⁴⁴ Utsi mibi chuinu. Tantia. Mibi chieshënquidobi bédamboen isquin tantiata. Chieshënaqui: “Èbi chieshënquid bédamboen ista, Papa,” quequin Nuquin Papa chianeta.

⁴⁵ Aden chianec Nuquin Papabimboec mibi ictsiac. Mibi utsibo bédamboen nashunquid ictsiac. ¿Bédambo icquido yacnoudida Nuquin Papan ushë chëncamepadic? Padenquio. Icsaido yacnotsen ushë chëncamec. ¿Bédambo icquido yacnoudida ue chomepadic? Padenquio. Icsaido yacnotsen ue chomec. Bédambo icquidobëdtabi icsambo icquido Nuquin Papan bédamboen nashunec.

⁴⁶ ¿Mibëd tantiananquido min shubun icquidoudi mimbi bédamboen nashunsho isunda Nuquin Papan mibi: “Bédambo iquec,” capec? Padenquio. Mimbi icsambo iquec caidontsen ambi tantiaido nashuntsiash. Aidombien piucquid bedshumënquido icquimbi aton shubun icquidoudi nashuntsiashe. Aden nainda. Utsibotsen bédamboen nashunta.

⁴⁷ ¿Min shubun icquidobëduida mibi onquec tabadpe? Nuquin Papa tantiesaboen adpec. Utsibotsen bédamboen ista.

⁴⁸ Nuquin Papabimboec icta. Bédambo icquid icta. Bédambo icquidobëdta icsambo icquidobi Nuquin Papan bédamboen tantiacpadomboen utsibotsen bédamboen tantiata —quepondash Esus.

6

Utsibo bédamboen nashunte chiaid

¹ Adshumbic abi macuësh dapa poctse tsadquin Esusën chuipondash. — Nadquid icsambo iquec. Nuquin Papa tantienquio icquimbi aton matses ismenuenuidi naic icsambo iquec. Adquid Nuquin Papan bédamboen istiapimbo iqueque. “Utsibo nashunu,” quequin utsibo ismenquio icquin nata.

² “Aton na nibëdquido menenu,” queshun utsibo ismequin menenda. Ismenquio icquin meniac bédambo ictsiash. “Nuquin Papa tantiaquid nebi,” quec muaquidën nacpaden nainda. Nuquin Papa tantiaquid damenuem-bien muaquidën matses dadpen yacnoshonuidi menedenepec. Adosho isun aton matsesënuidi bédamboen isnubi Nuquin Papan bédamboen istiapimbo iquec.

³ Aton na nibëdquido menequin utsibo ismenda. Meneshun: “Menebanombi,” quequin utsibo chienda.

⁴ Adsho isun mimbi utsibo ismenquio icquin naid tantiaquid icquin Nuquin Papan bédamboen isquin abëdi mibi tabadmendac —quequin Esusën chuipondash.

Nuquin Papa chianete Esusën chiaid (Duc 11.2-4)

⁵ Adshumbic Nuquin Papa chianetetsen Esusën chuipondash naden. — Bédambo icquid damianquidën nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidtoshon comapenec onquequin Nuquin Papa chianepec. Adash umanuc puduenshun matses dadpen ismenuenuidi padpiden adembidi chianec. Adquid aton matsesën: “Bédambo iquec,” canubi Nuquin Papan padenquio iquec. Bédamboen istiapimbo iquendac.

⁶ Mibi adenda. Utsibo ismenuenuidi nainquio icquin matsesën isacmaidquio Nuquin Papambo tantiaquioquin chianeta. Aden chianequid mibi icsho Nuquin Papan mimbi utsibo ismenquio icquin naidtedi tantiaquid icquin mibi bédamboen isquin abëdi tabadmendac.

⁷ Nuquin Papa chuiquin bédamboen chianeta. Nuquin Papa tantiesabon ambi tantiaid chuibudacimboen Nuquin Papa chuibudenda. “Yuenquio

chuibudac nuqui tantiaboedën nuqui nashuntsiash. Padenquoio icac nuqui nashunenquoio ictsiash,” queshun Nuquin Papa tantiesabon yuen chuibudac bimboen nainda.

⁸ Adoenquoio icquin Nuquin Papa chianeta. Mimbi chiabi: “Adopashuni. Aid nibëdnuc unësebi. Utsi icnuc bëdambo ictsiabi,” quequin mimbi otacquoio tantiaid Nuquin Papan tantieque.

⁹ Naden Nuquin Papa chuita.

“Bëdambohë icquid icsho matses abitedishunquoio mibi tantiapashun, Papa.

¹⁰ Matses abitedishunquoio mibi con Icho capashun. Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi mimbi chiacpadomboen matses abitedishunquoio napashun.

¹¹ Bumianenda, Papa. Badiadquidën badiadquidënquien con pete icmeta.

¹² Utsibon chieshënaqui ëbi cuidnanenquoio icsho isun ëbi icsashobi cuidenquoio icquin ëbi bëdamboen ista, Papa.

¹³ Mimbi chiaid ëbi niacmenda, Papa.

‘Icsamenushe,’ queshun Satanas ëbi yuamenda, Papa.

Abitedishun Icbombo yec abitedimbo namequidquoio mibi nec, Papa.

Ëmbi mibi chuisho tantiata, Papa.

Ënenquoio icquin abitedishunquoio: ‘Bëdambo iquec,’ mibi capashun. Padi,” queshun Nuquin Papa chianeta —quequin Esusën chuipondash.

¹⁴ Adashic nadpondash: —Utsibo bëdamboen ista. Cuidnanec chieshënanenda. Cuidnanec chieshënanenquoio icsho isun Nuquin Papan mibi cuidenquoio icquin bëdamboen istsiash.

¹⁵ Cuidnanec chieshënansho isun Nuquin Papan mibi bëdamboen istiapimbo ictsiash —uequin Esusën chuipondash.

Buna mëmunte chiaid

¹⁶ Adshumbic utsibo ismenquoio icte utsi Esusën naden chuipondash. —Tantia. Nuquin Papauidi tantianuequin buna mëmunquid chuinu. Muaquidën nac bimboen ismenda. Muaquido: “Buna mëmunquid nec,” aton matses camenuc abibi maniumëdash nënquidbitsëcquiec mamënenquoio iquec. Adec buna mëmunquid tanec muaic. Adsho isun matsesën bëdambo icquid danubi Nuquin Papan: “Icsambo icquid nec,” queshun bëdamboen istiapimbo iquec.

¹⁷ “Nuquin Papauidi tantiaquin nëidtedec ushquin buna mëmunu,” queshun Nuquin Papambo tantiaquin nata. “Utsibon tantianushe,” queshun bëdamboen min manëdaid shueshcata. Adash bëdamboec mamënta. Aden utsibo ismenuenuidi nainda.

¹⁸ Aden bëdamboen manëdaid shueshcaid isun: “Buna mëmunec nec,” cainquoio ictsiash utsibon mibi chuiquin. Nuquin Papambien: “Ëbiuidtsëqui tantianuen naic,” quequin tantiatsiash. Adshun mimbi utsibo ismenquoio icquin naidtedi tantiaquid icquin abëdi mibi tabadmendac —quequin chuipondash Esusën.

Nuquin Papa yacno tabadte bunta, quiaid (Duc 12.34)

¹⁹ Adshumbic padpiden Esusën chuipondash. —Ëmbi chuiboedquoio tantiaquin mimbi dayun uatequiduidi tantienda. Dayun uatequid nadquoio iquec. Chodquetequid yec shocosh chiuidtequid yec matsesën ampeshuntequid yec quec icsabudtequid nec. Adquiduidi tantienda.

²⁰ Icsabudesambo tantiata. Nuquin Papambo tantiec aibdëd tabadte bunquin ambi chiacpadomboen nata. Chodquetiapimbo icquid yec

shë nibudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquio tantiata.

²¹ Mibi bunaidquio ènenquo icquin tantiec mibi tabadtsiac. Nuquin Papabèd tabadte bunquin aid tantiata –quepondash Esus.

Pabiate shëcuë cuembo icquid chiaid

(Duc 11.34-36)

²² Adshumbic abi macuësh dapa poctse tsadquin utsitsen Esusën chuipondash. –Pabiate shëcuë cuembo icquin Nuquin Papa tantiaquiec mitsanauidi tantienquo yec mibi bédamboec tabadtsiac.

²³ Pabiate cuënëdabimboec yec Nuquin Papa tantienquo yec mitsanauidi tantiec ¿bédamboecta tabadtsia? Padenquo. Adec mibi icamboec tabadtsiaque. Adenda –quequin chuipondash Esusën.

Bedteuidi tantienda, quiaid

(Duc 16.13)

²⁴ Adshumbic naden Esusën chuipondash. –Mitsanauidi tantiec mibi icamboec tabadtsiac. ¿“Naic cho,” quequin daédshun chiacta aid daëdi mimbi nashumpatsia? Padenquo mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidtsëqui tantiata –quequin Esusën chuipondash.

Nuquin Papan abi tantiaquido dayun uaid

(Duc 12.22-31)

²⁵ Adshumbic Esusën padpiden chuipondash. –Èmbi aden chuisho tantias dacuëndenda. ¿“Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. Nuquin Papan nac unësabi mibi tabadeque. Aidëmbien petebèdta dasiuidte icmeque. “Con na nibèdtsiash,” quiasch dacuënd tabadenda.

²⁶ ¿Uicchunënda ambibi cuëte èshë siac bacuëacsho chepadic? Padenquo. Adecbidi ambi pete dayun uatequid shubumpi nibèdec. Adquid icsho Nuquin Papan aton pete bedmec. Uicchun abipadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuëndenda.

²⁷ ¿“Unëstiapimbo iquebi. Dacuëdebi,” quequidta unësenuio icpadic? Adequi dacuëdquid unëstiashe. Unësteuidi dacuëndënenda.

²⁸ ¿“Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte bacuëec bédamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bédamboshë isadpadic? Padenquo. Nuquin Papan uacpadquiobi iquec.

²⁹ ¿Cuëte bacuëec bédamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquo. Adpenquien icpampic.

³⁰ Cuëte bacuëec bédamboshë isadboed abadiadtsëcshumbi isac ènden chodquiaic. Aid badedquio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquo. Mibi dasiuidte icmeque. Dacuëndenda. Mitsana nibèdquio icte dacuëndënquimbi mimbi Nuquin Papa bēdiadtsëc tantiatseque.

³¹ Dacuëdec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda.

³² Nuquin Papa tantiesaboen adquid bedteuidi bunquieque. Adenda. Mitsana nibèdsho isun Nuquin Papan mitsana icmetsiashe. Abi tantiaquido yec dacuëdec tabadenda.

³³ Adenquoio yec: “Con Icho mibi nec, Papa,” quequin ambi tantiacpadec bēdamboec tabadte bunta. Adec tabadec: “Aid nibēdnuc unēsebi,” quequin mimbi tantiaidtedi Nuquin Papan mitsana icmetsiashe.

³⁴ Ēbi adsho tantiashe badiad utsi caic: “Aid badiadēn ŷatotsimbi nape?” quec dacuēdenda. Aid badiadēn Nuquin Papan ambi tantiacpadomboen mibi nametsiashe. Nēid ushēmbi: “Naden naimbi,” quequin tantiec tabadnuna dacuēdenquoio yec —quequin chuipondash Esusēn.

7

Utsibo icsaid chienda, quiaid (Duc 6.37-38, 41-42)

¹ Naden Esusēn Nuquin Papan chiapadec tabadte chuipondash. —Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe.

² “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo ic-saiduidi chienda.

³⁻⁴ ŷAbi bētsiadaid bēchish nua bēuequid bēbedadabi icquidēnda: “Mibi bētsiadaque. Bēbednu,” capatsiashe utsi chuiquin? Padenquoio.

⁵ Abi bētsiadaid abia bēbedadashien: “Mibitsen bēbednu,” quetsiashe. Adembidi mimbia mibi icsaid ēnshun: “Icsaid ēnash bēdamboequien tabadtiad,” quequin utsibo bēdamboen chuita. Bēdambo icquid damianquidēn abi icsaid ēnabi: “Aid icsambo iquec,” quequin utsibo icsaid chuibanec. Adquid tanenda.

⁶ Mimbi bēdamboen chiaqui tantienquoio icsho chuidonenda. Nuquin Papan chiaid chuibudaqui tantiatipimbo icquin niac-niacsho isun adenuidi chuidonenda. Opa icsan abi pemequid piācbimboen mibi chieshēntiashe. Chanchon ichon dashcute nebudshun bēchish uaguin tin-tincacimboen Nuquin Papan chiaid niac-niacshiashe. Adquid chuidonenda —quepondash Esus.

Ēnenquoio icquin Nuquin Papa chianete chiaid (Duc 11.9-13)

⁷⁻⁸ Nadembidi Esusēn chuipondash. —Nuquin Papa ēnenquoio icquin chuidoneta. Bacuēbon: “En na,” cadoniācbimboen chuidoniāc Nuquin Papan mibi tantiasiashe. Adembidi: “Ēbi bēdamboen name, Papa,” mimbi cacpadomboen bēdamboen mibi nametsiashe. Adembidi: “Ēbi nashunquin ēbi bēdambo icmeta, Papa,” quequin chuidoniāc Nuquin Papan mibi bēdambo icmendac.

⁹ ŷIcsambo icquidta Nuquin Papa icpadic? Padenquoio. Bēdambo icquidquoio nec. Bacuēmpi: “Bundobique. Penu. Beccho, papa,” ŷqueshoda amēn cudasēnquin cuēnotebi menepadic? Padenquoio.

¹⁰ ŷAdembidi aton bacuēn: “Nuēcquid chenu. Beccho, papa,” cacta cud-asquin nisimbo menepadic? Padenquoio.

¹¹ Matses yec icsaquido icquimbi min bacuēbo abimbo mimbi menubien Nuquin Papan ambi uaido matses: “Ēbi nashunta, Papa,” quesho tantiashun bēdamboen nashuntsiashe. Nuquin Papa chianeta.

(Duc 6.31)

¹² Nuquin Papan tantiaido icquin utsibo bēdamboen isquin bēdamboen nashunta. Utsibo caic: “Aidon nashumpashuni,” quequin mimbi otacquoio tantiacpadomboembidi utsibotsen nashunta. Aden Nuquin Papan chiaid

Moisesbēdtan nuquin tsusedpabo utsibon dada uaquin chiampicpadom-boen mimbi natsiaque. Aden utsibo nashunta –quequin chuipondash Esusēn.

Daēdpactsēcshun Esus tantiabente chiaid
(Duc 13.24)

¹³⁻¹⁴ Adshumbic Esusēn naden chuipondash. –Nuquin Papabēd tabadnuec aid tantiec bēdamboec tabadta. Shēcūē aniambo icquidēn matses abentse-abentsec puduedacimboec abentse-abentsec Nuquin Papa yacno puduednuec aid tantiec bēdamboec tabadec. Padnuen antied dapan abi maisi nidacimboec matses dadpenquo abi tantiesabo yec Nuquin Papan icsaido nēsecacno nidendac –quepondash Esus.

Icsambo icquid nec, quequin tantiate chiaid
(Duc 6.43-44)

¹⁵ Abi macuēsh dapa poctse tsadquin naden Esusēn chuipondash. –Utsibo: “Nuquin Papan chiaidquo chuiquid nebi,” quec bēdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bēdi dapa nēish yua pete bunquiacimboec mibi icsamete bunquieque. Adquidēn chuisho tantienda.

¹⁶ “¿Mitsipadembimi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icsho tantiashun: “Utsi uain chiec,” mimbi catsiac. Chetequid isun cuēte dada matsesēn tantiec. Aden tantiec nisanquidēn bacuē bēsho isash: “Dadainēn bacuē nec,” quesa matses nec. Adechidi echo bacuē bēsho isash: “Bata nec,” quesa matses neoaic.

¹⁷ Cuēte bēdan bacuē adquiobidi bacuēec. Cuēte icsan bacuē adquiobidi bacuēoaic.

¹⁸ ¿Cuēte bēdan bacuē chetemaidta nepec? Padenquo. ¿Cuēte icsan bacuē chetequidta ipcec? Padenquo.

¹⁹⁻²⁰ Chetemaiddimboec muaquid bēdambo ictiapimbo iquec. Nuquin Papan chiaid niac-niacme icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquo chienquo icsho: “Muaquid nec,” quequimbidi mimbi tantiatsiaque. Adquidēn chuisho tantienda. Cuēte bacuēesa dēdshun nēdēncacimboen: “Nuquin Papan chiaid chiemi,” quec muaquid Nuquin Papan icsaido cuidacno nēsecaindac –quepondash Esus.

Nuquin Papa yacno puduednu, queuidte chiaid
(Duc 13.25-27)

²¹ Utsitsen Esusēn chuipondash. –Ēbi caic: “Con Icho mibi nec. Mibi tantiembique. Mibi yacno ēbi puduedme,” ¿quequidtedida Nuquin Papa yacno puduedpatsiash? Padenquo. Nuquin Papan chiacpadomboen naquidquien abi yacno puduedtsiash.

²² Nuquin Papa yacno ēmbi yuedte ushēn matses dadpenshun ēbi chuiuidendac. “Con Icho mibi nec. Mibi caic: ‘Aidēn namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ēbi puduedme,”

²³ qesho ēbimbo tantiec Nuquin Papan chiacpadec bēdamboec tabadabi icsho: “Ēmbi tantiacmaidquo mibi neque. Baded cuenta. Icsamboec tabadquid mibi neque,” caindambi. Ēbi adsho tantiash muainquo yec bēdamboec tabadta –quepondash Esus.

*Shubu uaquidbimboecquid chiaid**(Duc 6.47-49)*

²⁴ Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bēdamboen natsiaque. Shubu uaquin bēdamboen tantiaquidbimboec mibi ictsiaque. Tanta. Chuinu. Bēdamboen tantiaquidēn mananēnquoio shubu uaquin buintad nitsinquad.

²⁵ Aden shubu uan ue dapa conquequidbēdi chonoc shubu chimeshadenquoio icquid. Shubu nuntan anchiuidenquoio icquid.

²⁶ Aden ëmbi chiacpadomboen naquid icnubi utsibo ëbi tantiesa iquendac. Aido shubu uaquin tantienquoio icquidbimboec iquec. Tantienuoio icquidēn nadoquid. Acte cuidi cuēmanquiobi shubu uaquin badedi unēstsēcquidquoio cueste nitsinquad.

²⁷ Adquid nitsinaid ue dapabēd conquequid choquin shubu chimeshquid. Adecbidi acte cubudtoquidēn shubu nuntan mauanquid. Aden tantesa uatsēcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata —quequin chuipondash Esusën.

(Mad 1.22)

²⁸⁻²⁹ Adsho tantiash: —Ma comapenen tantiaquidquoio Esus neyoc. Nuquin matses tsusiobon Moisesën chiampid bēdiactsec tantiatsēcquin chuistsēcosh. Padnuen Esusēnquoio comapenen tantiaquin chuiposh —quecuededpondash matses dadpenquoio.

8*Esusën daicsaid bēdamiaid**(Mad 1.40-45; Duc 5.12-16)*

¹ Ambobi macuësh poctse tsadquin ēnquin chuitanequien Esus macuësh budpondash. Adec budanec nidsho isumbien matses dadpenshun tsi-banampondash.

² Adnubien dada ushumbo yec daicsaidquoio choshon Esus ismenuen danēshēn sebudpondash. —Ëbi bēdamete bunquin mimbi ëbi bēdametsiaque. Ëbi bēdame, Icho —caquien Esus:

³ —Ai, mibi bēdamete bunebi. Mibi bēdanendac —quequin mishtemaid-quiobi mishnubi badedquoio bēdampondash daicsaid nibēdquiec.

⁴ Adsho Esusën: —Utsibo chienquoio yec nēish yua abided unēs uaquido ismenuec nidta. Mibi isash: “Bēdamiaid nec,” quequin ma aidon tantianu. Moisesën chuiampicpadomboen nanuen: “Nuquin Papan bēdamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

*Sondado chuiquid dapan yua Esusën bēdamiaid**(Duc 7.1-10)*

⁵ Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash.

⁶ —Tantia. Chuinu, Icho. Con shubun icquid con yua shēquēquenquoio iccosh. Natiambo yec unēstiadtsecquoio iccoshe. Bēdameta

⁷ —quesho tantiashun: —Ai, bēdamec nidnu. Nid —caquien:

⁸ —Padi. Mibi bēdamboshē icquidquoio nec. Ëbibi icsactsēcquid icquin mibi con shubun puduedmetiapimbo iquebique. Nēshunquiobi bēdameta. Nidenquoio icquin nēshunquiobi mimbi: “Bēdanta,” cac con yua bēdantsiashe. Mimbi tantiacpadomboen namequidquoio mibi nec.

9 Ĕbibic chuiquid dapan namiac sondado utsibo namequid nebi. Ĕmbi: “Nid,” cac badedi nidec. Ĕmbi: “Baded cho,” cac badedquio choec. Con yuan Ĕmbi: “Nata,” cac Ĕmbi chiacpadomboen naic. Mibi adquidquibidi neque. Con yua bĕdameta —quepondash sondado chuiquid dapa.

10 Adsho tantiashun Esusĕn abi tsibambĕquido chuipondash. —Bĕdamboen nĕidĕn chuipec. “Comapenec tantiaquin chuiquinuidi con yua bĕdametsiash,” quequin ĕbi bĕdamboen tantiaquid nec. Isadaidbo adquid nibĕdec. Isadaidbon ĕbi bĕdiactsec tantiabededtsec.

11 Tantia. Chuinu. Matses utsi icquimbi sondado chuiquid dapan ĕbi bĕdamboen tantiec. Adec nidaid utsi-utsiec yacnoquido isadaidpembo ĕbi tantiaquido yanash Nuquin Papa yacno puduedendac. Ambo puduedash isadaidbo tsusedpabobĕd tabadendac. Abadauan caid yec Acoĕo caid yec Isac caid yec quequidobĕd tabadendac.

12 Padnen Nuquin Papan con matses caido isadaidbo dadpenquio Nuquin Papa yacno puduedenquio iquendac. Abi tantiesabo icsho Nuquin Papan cacumequin icsaido nĕsecacno mibi nidmendac. Adoac mibi tĕnquebudquiendac —quequin abi tsibambĕquido isadaidbo chuipondash Esusĕn.

13 Adshumbic sondado chuiquid dapa chuiquin: —Nidec nid. Mimbi tantiacpadece min yua bĕdaneque —cac nidshun isquien bĕdanac Esusĕn chui-
bocpadequi.

Petedon nachi Esusĕn bĕdamiaid
(Mad 1.29-31; Duc 4.38-39)

14 Adash yuec-yuecpectsĕc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec.

15 Uesho istuidshun mĕdinquin Esusĕn bĕdamepondash. Aden bĕdamiac Esus pemepondash.

Esusĕn matses dadpen bĕdamiaid
(Mad 1.32-34; Duc 4.40-41)

16 Petedon nachi bĕdamiaid inchĕshbudtsĕqui Esus ismenuequin matses daicsaido dadpen bĕ-bĕpondash. Bĕ-bĕshobien podobitsi icsa dapuduedaido comapenec cuĕdquin cuemeshumbic daicsaidotsen Esusĕn bĕdamebampondash.

17 “Nuqi icsaid ucquin nuqi daicsaidobi bĕdamiac,” quequin ĕndenquio Nuquin Papan Esusĕn nate Isayas dada uamepampicpadomboen nanuen adopondash Esusĕn.

Abĕd icte bunquido Esusĕn chiaid
(Duc 9.57-62)

18 Adashic abi isnuec matses dadpenquio datsidadsho isash abĕd icquido chiec: —Chian potec nidnu. Nid —quia nec chian yacno nidec puduampondash Esus.

19 Puduanece nidaneshobien Moisesĕn dada uampid chuibanquidĕn Esus chinuntuidpondash. —Con Icho mibi caindambi. Mibĕd nidendabi —caquien:

20 —ĕĔbĕdta nide? Tantia. Mibi chuinu. Bĕdi chĕshĕ shĕcuĕn ushquid. Uicchun shubu uash abuc ushquid. Padnueni con shubu nibĕdnuc Nuquin Papan matsesmiaid yec quenĕnenquio yec capucuenendac. ĕAda mibi adpatsia? —capondash Esusĕn Moisesĕn chiampid chuibanquid chuiquin.

21 Adnubien abĕd capucuenoĕd utsin: —Chiata, Icho. Con pa unĕsoshe. Chococatambono —caquien:

22 –Padi. Cho. Ma unēsaidēn tantienquo yacbimboen ēbi tantienquo icquidon ma papa chococanu. Ēbēdtan bēdamboen naic cho –capondash Esusēn amē unēsaid chuiquin. Adobidanec nidanepondash chian yacno.

Natiambo cunquenuc acte tēccuasquiaid Esusēn ēnēdmiaid
(Mad 4.35-41; Duc 8.22-25)

23 Chian budash Esus chedo cano antabēdtopondash. Adashic potenuec puduampondash.

24 Aden potenubi nēnantanquo icnuc cunquetuidpondash. Adnubien acte comapenec tēccuasquiampondash. Adec acte tēccuasquenuc cano acte ancushad-ancushadquiec yampondash cano mentoadtiadtsēcquo yec. Adsho isun abēd icquidon: –Dacuēdampambo iquec –quetanquin isquien Esus ushpec.

25 Adshobien tinquin: –Nuqui mentoadeque. Isucun, Icbo. Baded ēbi nashun –caquien:

26 –¿Atotsi quiash dacuēde? Ēbi bēdiactsēc tantiatsec dacuēdquidquid mibi neque. Istac –quetanec nidtoshon actebēdtabi cunquequid chuipondash. –Padi. Ēnēdta –caquien natiambo cunqueboedi badedquo ēnēdpondash cano mentoadtsenquionobi. Actetsen tēccuasquenquo yampondash.

27 Adsho isashien: –¿Mitsipadquidēnquo actebēdta cunquequid ēnēdmepashba? –quecuededpondash Esusbēd icquido.

Dada daēd dapuduedaido podobitsi icsabo Esusēn cuemiaid
(Mad 5.1-20; Duc 8.26-39)

28 Aden chian potiash pudundonobien Cadada yacnocquid podobitsi icsa dadpen dapuduedaid dada daēd choshon Esus chuituidpondash. Aid daēd unēsaido chococaid shēcūēmbi tabadpondash. Matses cuesunete bunquiec dacuēdampambo icsho isash aid yacno matses nidenquo icpondash.

29 Aidon podobitsi icsabon oncamiacpadomboen comapenec cuēdquin Esus chuituidpondash. –¿Nuquin Papa caidēn Madombo icquin ēbi natiamequin cuidnuecta cho? ¿Nuquin Papan cuidte ushē choabi icnubida ēbi cuide? –capondash dada daēdshun abi oncamequidēn chiaid chuiquin.

30 Uano chancho dadpenshun natiacquin udquin pebededpondash.

31 Adnubien podobitsi icsabon aid dada daēd oncameoac: –Ēbitedi cuemiac chancho icbo-icboec dapuduedtsiabi –quecuededpondash podobitsi icsabo.

32 Adsho tantiashun Esusēn: –Ai, mimbi tantiacpader nid –cac nidash chancho icbo-icboec dapuduednubi chancho abitedi macuēsh budec acte nēsebudec mentoadbudnepondash nibēdquiec yec. Adec podobitsi icsabo dapuduenanec nidnubi dada daēd bēdambo yampondash.

33 Adsho istanequien chancho pemequido aton matses chiec niqūianec shubu dadpen yacno nidanepondash. Chancho mentoadbudneboēdbēdta podobitsi icsabo dapuduemeboed uesquin chuituidpac caondash. –Nuqui dacuēdēmbodobi bēdambo yanosh –quequin

34 chuituidaquien anocquido abitedi Esus isec cho-chopondash. Adec cho-choshombien: –Dacuēdampambo mibi iqueque. Ēbi yacno choenda. Nidec nid –cabededpondash. Adoac Esus nidpondash.

Shēquēquenquo icquid Esusēn bēdamiaid
(Mad 2.1-12; Duc 5.17-26)

1 —Nid —cac nidanec chian budash cano antabëdtoshon chian potiash abi iccondacnobidi Esus choapondash.

2 Adnubien utsibon dada shëquëquenquo icquid Esus ismenuen aton uetechobi bëpondash. Bësho isumbien Esusën: —Ëbi caic: “Aidën bëdametsiash,” qeshun bëac —quequin daicsaid chuipondash naden. —Dacuëdenda, mado-sio. Ambi chiaid niac-niaquec icsaboedi cuidmenquo icquin Nuquin Papa mibi bëdamboen ismembique —capondash Esusën.

3 Adsho tantiash aid datsidadash tabadquido Moisesën dada uampid chuibanquido: —¿Adpecta matses icquid? “Nuquin Papapadquidquiobini nec,” quepequien iquec. Icsamboen chiech —quecuededpac caondash Esus caic.

4 Uanuësh adsho ambembi tantiashumbien Esusën aido chuipondash. — ¿Atotsi quequin mimbi ëbi chieshëmpe?

5 Ambi namiaid icquin ëmbi: “Nuquin Papa cuidmenquo icquin mibi bëdamboen ismembique” cac Nuquin Papan nëid cuidenquo iqendac. Adem-bidi ambi namiaid icquin ëmbi: “Caputa,” cac nëid capuendac.

6 Istac. Mibi ismembique. “ ‘Nuquin Papan chomiaid nec. Icsaidobi Nuquin Papa bëdamboen ismequid nec,’ mabi canu,” qeshun naimbique. Istac —quetanquin dada shëquëquenquo icquid chuiquin: —Caputa —capondash Esusën.

7 Adoac bëdanash aton shubuno nidpondash.

8 Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bëdambo iquec —quecuededpondash isquido.

*Ëbëd iquec cho, quequin Esusën Mateyo chiaid
(Mad 2.13-17; Duc 5.27-32)*

9 Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na ëmbi chiactedi piucquid bedshun ëbi meneta —cac niøndabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibananec

10 nidequi con shubun Esusbëd puduedpondabi.

Adec puduedsho isashien matses dadpen pudued-puduedpondash. Esusbëd pec tabadnuec ëbëdtan piucquid bedshunquidobëdi con matsesën: “Icsaido nec,” caidombo pudued-puduedpondash.

11 Adsho isumbien Esus chieshënquido Padiseyobo caidon Esusbëd icquido chuituidpondash. —¿Atotsi quiaish mibi chuiquid Esus caid icsaquidobëdi pec tabadpec? Icsambo iquec —capondash Esus chieshënquidon.

12 Adsho tantiash Esus nadpondash. —¿Bëdambo icquidta dauëchoquidën dauë menepadic? Padenquo. Ma daicsaidi dauëchoquidën menepaid yoc. Adembidi icsaidobi abi icsaid ucquin bëdambo icmenuec nebi.

13 Nuquin Papan naden dada uamiampid pausudshun bëdamboen naic nid. “Ëmbi chiapadomboen abentse-abentsen mimbi naic. Adoquimbi ëmbi chiaid utsi niaquec mimbi icsaido caido mimbi bëdamboen istiapi-mbo iquec. Adsho isun: ‘Mibi bëdambo iquec,’ catiapimbo iquebi” quequin Nuquin Papan dada uamiampid pausudta. Ëbibi matses bëdamboen ismequid nebi. Muaquido: “Bëdambo icquid nebi,” qesho bëdambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquo yec ënëdta,” canuec nebi —quepondash Esus abi chieshënquido chiech.

*Esusën buna mëmunquido chiaid**(Mad 2.18-22; Duc 5.33-39)*

¹⁴ Adnubien Uan acten mentoanquidbëd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mëmunquidquio nebi. Padiseyobo adembidi naquidquio nec. ¿Atotsieshun mibëd icquidon aden nainquio icpec? ¿Natiapimboda iquec? —caquien

¹⁵ Esus nadpondash. —¿Icbon: “Pec cho,” cacta aid tantiec sedenquecuedeqdin buna mëmumpadic? Padenquio. Adquidbëd tan pec cuishonquec tabadquid. Icho nibëdanan sedenquecuedeqdin buna mëmunquid. Èbi nibëdanan ëbëd icquidon ëbiuidi tantianuen buna mëmunendac —quepondash Esus.

¹⁶ Adshumbic Esusën naden chuipondash. —Dashcute chuca cuëshun dashcute shëni nedesquiaidbëdta tuscaisa. Aden tuscashun panac shëni badedquio nedesquequid.

¹⁷ —¿“Machi sandono,” queshun tsitsan shënimbida sandopadic? Padenquio. “Machi sebudnushë,” queshun tsitsan shënin sandoenquio icquid. Tsitsan chuca daëdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquio icquin ambi bëdamboen iste chuiquin Nuquin Papän chiaid utsi chiec nebi —quequin tantiec adpondash Esus Uan acten mentoanquidbëd icquido chiec.

*Champi uincuemiaidbëdta chido bëdamiaid**(Mad 5.21-43; Duc 8.40-56)*

¹⁸ Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unëstiadtsëcquio iccoshe. Mishec cho. Mimbi mishac bëdantsiashe —capondash. —Mibi con Icho canu —quequin danëshën sebudquin ismepondash.

¹⁹ Adoaquien Esus aidbëdi nidpondash.

²⁰⁻²¹ Nidnubien chido intac budted-budtedec seta 12tedi matamec bëdanenquio yec nacchoadbudquidën Esusën cachoctsëqui choquin: —Bëdamanquidën dashcute mishec bëdampatsiashe icmanendac —queshun ismenquio icquin dashcute cuëmano mishtsac caondash.

²² Adoaquien bidiadquin isun Esusën chuipondash. —Dacuëdenda. Mibi: “Aidën nac bëdantsiabi,” quiacpadec mibi bëdanendac —Esus quenubi bëdampondash.

²³ Aid bëdamebidanec nidequi chuibante shubun tabadsho isquidën shubun puduedshun isquien matses dadpen tabadec. Champi unësascho isash sedenquecuededec tabadec. Nëdic matses unësan con matsesën nacpadomboen shoncate shoncaquido. Nëdic comapenec sedenquecuededquido dadpen. Aidtedi icpondash.

²⁴ Adshobien Esusën abitedi chuiquin: —Baded umanuc niecun. Champi unëسابi iqueque —capondash. Adoac: —“Champi unëسابi iquec,” quepequien iquec —queshun Esus mamëshumbededpondash.

²⁵ Niecunan Esusën champi uiacno quënëñ puduedtanquin mëdinac champi uincuenash bëdambo yec capupondash.

²⁶ Adsho isun champi unësaid uincuemiaid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniac caondash.

*Bëshuaid daëd Esusën bëdamiaid**(Duc 18.35-43)*

²⁷ Auëshquio puduanec nidshobien bëshuaid daëdshun chinunshun comapenec cuëdquin Esus chuituidpondash. —Dabidën tsyuecquid

Nuquin Papan chomiaid icquin bēdamboen isquin ēbi bēdame —quebud-quebudpondash.

²⁸ Shubu utsin puduedash abēdi tabadshobien Esusēn: —“Ēbi bēdametsiash,” ĉcaindabi ique? —caquien: —Ai, adebi —quepondash.

²⁹ Adshobien aid daēdi bēmishquin: —Mimbi tantiacpadec bēdanta —cac

³⁰ bēdampondash. Adsho isun Esusēn: —“Bēdamiosi,” quequin utsibo chienda —capondash.

³¹ Adoboqui anocquidotedi chuiben-chuibempac caondash.

Esusēn onquesa bēdamiaid

³² Bēshuaid bēdamiaid puduenubien podobitsi icsa dapuduedaid onquesa dada Esus ismenuen bēpondash.

³³ Bēacsho isun Esusēn podobitsi icsa dapuduemiad bēdanash onquiampondash. Aden bēdamesho isash: —Nuquin nidaid Isadaid caidēshun adoen ictenec —quecuededpondash isquido.

³⁴ Adnubien Esus chieshēnquido Padiseyobo: —Podobitsi icsan icbon nami-aid icquin podobitsi icsa cuemequidien nechitec —quecuededpondash Esus caic.

Esusēn matses tantiaquiaid

³⁵ Aden onquesa bēdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bēdamboen iste chuipondash. Adshumbic anocquido daicsaidotedi bēdamebampondash. Adenuidi shubu dadpen yacno-yacnomboen chuibanquimbi matses bēdamebampondash.

³⁶ Abi tantienquo icquido dadpen cho-chosho isash unēsquo icnuc shubiantiadquo icpondash Esus. —Abi isquid nibēdnuc bacuēbo icsamboec tabadacbimboec icsambo iquec. Nuquin Papa bēdamboen ismete chiabi yac tantienquo yec natia chieshēmēnec bēdamboec tabadtiapimbo iquec —quiash shubiantiadquo icpondash Esus.

³⁷ Adshumbic abēd icquido chuipondash. —Pete dadpen nitsinaid caniacsho bedtanenquo icnuc sinash chodquebudnequid. Adecbidi Nuquin Papan chiaid chuibanquid nibēdnuc matses icsamboec tabadec. Aden chuibanquid nuquipadquid daēdpactsēcquo iqueque.

³⁸ Nuquin Papa chianeta. “Matses dadpenhunquo mimbi bēdamboen iste tantia iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusēn abēd icquido chuiquin.

10

Esusbēd icquido 12tedi chiaid (Mad 3.13-19; Duc 6.12-16)

¹ Adshumbic Esusēn abēd icquido 12tedi chuipondash. —Ēmbi naid chuibeneta. Ēmbi namiaid icquin ēmbi nabocpadomboen podobitsi icsa matses dapuduedaid mimbi cuemendac. Adembidi daicsaido abitedi mimbi bēdamendac —quequin chuipondashi nēidtedi.

² Nēidic Petedo caidbidi Simon cuēmēdquid. Nēidic abēda tishaid Andedes cuēmēdquid. Nēidic Sebedeyon mado abi daēdi. Abentsēc Acobo icnuc utsi Uan icpondash.

³ Nēidic Uedipe. Nēidic Badtodome cuēmēdquid. Nēidic Tomas. Nēidic ēbibi Mateyo con matses piucquid bedshundenedi. Nēidic Acobo cuēmēdquid utsi Adpeon mado. Nēidic Debeyo caidbidi Tadeyo cuēmēdquid.

⁴ Nēidic Simon cuēmēdquid utsi con matses yuaquido cuemete bunquid. Nēidic Iscadiote caidbidi Udas cuēmēdquid abī chieshēnquido Esus bedmequid. Aidtedi abēd icquido icsho chuipondashi.

Abēd icquido: Chuibeneta, caid
(Mad 6.7-13; Duc 9.1-6)

⁵ Adshumbic: —Ĕmbi chiacpadomboen chuibenenuc nidshun isadaid-pembo chienda. Aido yacno nidenda. Nidaid cuēshē Samadia caid yacnocquidon shubu datambidanta.

⁶ Nuquin matses isadaidboudi chuibeneta. Bēnudshun podqued tantienquio yacimboen nuquin matsesēn Nuquin Papambo tantienquio iqueque.

⁷ “Mibi icsaid ēnash bēdamboec tabadta. Nēbi abēd tabadtequido icmequin Nuquin Papan matses bēdamboen tabadmendac,” quequin chuibeneta.

⁸ Adembidi daicsaido bēdamequinc unēsaido uincumequinc dada ushumbo yec daicsaido bēdamequinc podobitsi icsa dapuduedaido cuemeshunquinc cabeneta. Adoshon: “Piuquid beccho,” cainda. Ĕmbi nabocpadomboembidi mibi namembique. “Piuquid beccho,” quequin nainquio iccombique. Adembidi nashumbanta.

⁹ Aden chuibenec nidquin min piucquid buanenda.

¹⁰ Adembidi pete sandoaid buanenda. Dashcute utsibēdta tapucudte utsi sandoshon buanenda. Mibi tidinquete cuate abentsēqui buanta. Adec mēdadauidquio chosho isun mimbi bēdamiaidon: “Mibi bēdambo iquec. Ĕbi yacno ushec cho,” mibi cac bēdambo ictsiash. Adembidi: “Mitsana nibēdsho isun mibi menenu,” mibi cac bēdambo ictsiash.

¹¹ Aden chuibenec shubu dadpen icquid yacno nidshun bēdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidēn shubun ushta. Auēshquio nidabi yec aidēn shubunuidi ushta.

¹² Aidēn shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bēdambo icmepashun,” quequin aido bēdamboen ista.

¹³ Adoac anocquidon mibi bēdamboen iso: “Nuquin Papan bēdambo icmepashun,” mimbi canubi Nuquin Papan aido bēdambo icmendac. Anocquidon mibi chieshēnsho Nuquin Papan aido bēdamboen istiapimbo iquec.

¹⁴ Shubu dadpen icquid utsi yacno mibi nidacsho anocquidon cuemiac naden ismeta. Auēshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta.

¹⁵ Mimbi adosho isun matses cuidte ushēmbi Nuquin Papan aido comapenen cuidendac. Ĕndenquimbo shubu dadpen yacnocquidotedi cuidquin Nuquin Papan uesquin unēs uapampic. Aid shubu dadpen icquid abentsēc Sodoma canubi shubu dadpen icquid utsi Comoda capampic. Aid daēd yacnocquido bēdiactsēc cuidshun mimbi chiaid tantienquio icquido comapenen cuidendac —quepondash Esus abēd icquido chiec.

Esus tantiaquido chieshēnte chiaid

¹⁶ Adashic padpiden chuioaic: —Ĕmbi naid chuibenequido icsho utsin-utsinquien mibi chieshēnendac. Bēdi nēish yua acte bunacimboec chieshēmēnquido mibi cuate bunendac. Aidobēd chieshēnanenda. “¿Mitsipadomboen chiac Nuquin Papan chiaid tantiabempatsiash?” qeshun bēdamboen tantiaquin bēdamboen chuita.

¹⁷ Mibi chieshēnquin cuesunetiadquio iguendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid

chuibante shubuno mibi buanendac. Ashunquio mibi cueshcaten cueshcaindac.

¹⁸ Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ëbi chuiquidon chuiquid dapabëdta isadaidpembo ëmbi naid chuibanu,” ëbi quenuc mibi aden buanendac.

¹⁹ Adoac dacuëdenda. “Chuiquid dapa yacnoshon ¿atotsimbi chuiatsiaba? ¿Adambi bëdamboen chuiatsiaba?” quec dacuëdenda. Chuiquid dapa mimbi bëisnubi Nuquin Papan ambi tantiacpadomboen mibi oncamendac.

²⁰ Aden aton Mayanën ambi tantiacpadomboen mibi oncamendac — quepondash Esus.

²¹ Adashic padpidec onquec: —Ëbi chieshënquidon ëbi tantiaquidotsen comapenen chieshënendac. “Esus tantiaquid nec,” gueshun aton buchimbi aton utsi cuesunemendac. Amëmbi ambi tishmiaid cuesunemendac. Aton bacuëbombi chieshtoshon anibëdta amë cuesunemendac.

²² “Esus tantiaquid nec,” gueshun matses dadpeshun aden chieshënaqui chieshtoenquio icquin ëbi tantiasho Nuquin Papan abi yacno mibi puduedmendac.

²³ Shubu dadpen yacno nidacsho chieshënac shubu dadpen icquid utsi yacno cuenta. Anoshontsen ëmbi naid chuisho chieshënoac shubu dadpen icquid utsi yacnotsen cuenoata. Adecuidi cuendeneta. Nëid nidaid isadaid caidën shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuësh choaindabi.

²⁴ Mibi tantiamequid nebi. Ëmbi tantiamiaido icsho ëbi icbocpadomboembidi mibi chieshënendac. Abi chuiquid dapa chieshënacpadembidi ambi namiaidotsen chieshënquid. Icho chieshënquimbi yuabotsen chieshënquid.

²⁵ Adembidi ëmbi chiacpadomboen natiadquio icsho mibitsen chieshënendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshënendac —quequin chuipondash Esusën abëd icquido chuiquin.

*Dacuëdenquio icquin chui, quequin chiaid
(Duc 12.2-7)*

²⁶ Adshumbic padpiden chuiquin: —Mibi chieshënquido dacuëdënenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsëcquin chiaid Nuquin Papan utsibo tantiamendac. Adembidi mimbi bëdamboen naidtedi Nuquin Papan utsibo tantiamendac.

²⁷ Nëbi ëmbi mibitedictsëqui chuiboed dacuëdenquio icquin utsibo chuibeneta.

²⁸ Chuibenesho min dadauidsëqui cuesunetequid dacuëdënenda. Min tantiate unëstiapimbo icquid icsho nibëdametiapimbo iquec. Min dada unësan min tantiate abi icsho cuidnuequin chian anëdënquequid nësecanquid tantiate. Adquid Nuquin Papa icsho dacuëdënta.

²⁹ Utsibon chieshënaqui dacuëdenda. Nuquin Papan mibi tantieque. ¿Padichucu cuesaid isashta unësquio icti? Padenquio. Padnuen ambi tantiacpadomboembi padichucu dadpen icquid abentsëc cuesac paëdsho Nuquin Papan tantiec.

³⁰ Adembidi min manëdaid Nuquin Papan tambanaidquio nec. Aden min manëdaid abentsëc paëdsho aidën tantiec.

³¹ Aden min manëdaid tambanquid icquin padichucu bëdiactsëc tantiatseccquin mibien comapenen tantieque. Mibi chieshënquido dacuëdënenda —quequin chuipondash Esusën.

*Esus con Icho nec, quequido chiaid**(Duc 12.8-9)*

³² Adshumbic padpiden chuiquin: —Utsibo chuiquin: “Con Icho Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi.

³³ Padnuen utsibo chieshec: “Con icho Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” qesho: “Padi. Ëbi tantiaquidpenquo neque. Puduedmenda,” quequin Nuquin Papa chiendambi —quequin Esusën chuipondashi.

*Esus tantiaquidobëdi cuëshëdte chiaid**(Duc 12.51-53; 14.26-27)*

³⁴ Adshumbic padpiden chuiquin: —Ëmbi chuiboed tantiashun: “Nuquin Papa yacnuësh choquid icquin abitedimbo bëdamboen tabadmetsiash,” çcaquindabi ique? Padenquo ictsiambi. Ëbi tantiaquidobëd ëbi tantiesabo cuëshëdenquo icte danenda. Ëbi tantiaquidobëdi ëbi tantiesabo cuëshëdendac.

³⁵ Amëbëd aton mado cuëshëdendac. Adecbidi anibëd aton champi cuëshëdendac. Adecbidi aton chayabëd aton babanën cuëshëdendac.

³⁶ Aden aton shubun icquidombi ëbi tantiaquid chieshënendac.

³⁷ Padnubic aton matesuidi tantiaquidën ëbi bëdiactsëc tantiatsëctsiash. Aton tita tantiaquinc aton papa tantiaquinc cain aidën chiacpadomboenuidsëqui naquidën ëbi bëdiactsëc tantiatsëcquin ëmbi chiacpadomboen natiapimbo ictsiash. Adembidi aton mado tantiaquinc aton champi tantiaquinc cain aid bëdambo icmeteuidtsëqui bunquïn ëbi bëdiactsëc tantiatsëcquin ëmbi chiacpadomboen natiapimbo ictsiash. Adquido bëdamboen istiapimbo iquebi. Ëbi tantiesabo nec.

³⁸ Utsibon chieshënac ëbi tantiatsëcboedi badedi chieshtoshon ëmbi chiacpadomboen natiapimbo yantsiash. Adquidotsen ëbi tantiaquidpenquo iquendac.

³⁹ Matses ambi naiduidi naquid Nuquin Papa yacno puduedtiapimbo iquendac. Padnuen ëbi tantiaquïn ëmbi chiacpadomboen naquid Nuquin Papa yacno puduedendac. Adquid chieshënaqui chieshtoenquo ictsiash —quequin Esusën chuipondashi.

*Nuquin Papan bëdambo icmete chiaid**(Mad 9.41)*

⁴⁰ Adshumbic Esusën ëbi chedo padpiden chuipondash. —Mibi chieshënquido icnubi mibi bëdamboen isquid iquendac. Ëmbi naid mimbi chuisho tantiash: “Ai, abimbo caic,” qeshun ëbi tantiabenquin ëbi chomequidtsen tantiabenendac.

⁴¹ “Naden naindambi,” quequin ambi chiaid chuibenequid Nuquin Papan bëdamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bëdamboen chuisho tantianü,” quequid icsho Nuquin Papan bëdamboen isendac. Adembidi abi tantiec ambi chiacpadec bëdamboec tabadquid Nuquin Papan bëdamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” qeshun bëdamboen isquidotsen Nuquin Papan bëdamboen isendac.

⁴² Adembidi ëbi tantiaquid yec acte bundoacsho acte menequid Nuquin Papan cuidnanquin bëdambo icmendac. Adembidi utsibon Esus tantiaquido bëdamboen nashunsho Nuquin Papan bëdambo icmendac —quequin Esusën

chuipondashi. Adshun: —Chuibenetan —cac nidshumbimbi chuibenepon-dac.

11

Uan acten mentoanquidën chuimiai

(Duc 7.18-23)

¹ Esusën: —Chuibenetan —cac abëd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniác caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ictanec Esusbëd icoaic cho-chopondac.

² Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abëd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambëd icquidon Esus chuituidpondash.

³ —Uanën: “Chuitan,” cac chobi. ¿Ëmbi cainaid Nuquin Papan chomiaidquoda mibi nepe? Mibi adquidpenquo icnuc ¿ada utsi chopatsiash? —caquien

⁴ Esusën: —Ëmbi nadatiambo icquin nabamboedbëdta ëmbi chuiboe Uan chiec nid.

⁵ “Bëshuacboedën isbenosh. Canite icsaidi capucuenosh. Daushumbo icquid nami mishadenquo icquid bëdanosh. Pashuacboedën tantiabenosh. Adoshombic unësaiddi uincuemiash. Adoshombic Nuquin Papa tantienquo icquido Nuquin Papan bëdamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquo nec,” quequin ëbi tantiendac.

⁶ Adshumbic nadentens chuita. “‘Muambo nec, ëbi cainquo icquin: Ambi chiacpadquid Nuquin Papan chomiaidien nec, quequin ëbi tanti-aquid Nuquin Papan bëdambo icmendac,’ quiosh,” quequin chiec nid —cac nidanepondash Uambëd icquido.

Uan acten mentoanquid chiaid

(Duc 7.24-35)

⁷ Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibëdacno ¿atotsi quenuc nidonda? ¿Cunquequidën ishacunaid isnuecta nidtionda? Padenquo.

⁸ ¿Dashcute bëdaidquo dasiuidaid isnuecta nidtionda? Padenquo. Icsactsëcquid Uan dasiuidpondash. Dashcute bëdamboshë icquid dasiuidquido ancanquidën shubu dapan tabadquido nec.

⁹ Ad icnuc ¿atotsi quenuc nidonda? “Naden naindambi,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiaidquido Uan nec.

¹⁰ Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bëdambo icquid choeque. Icsainquo yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic.

¹¹ “Nuquin Papan chomiaidquo choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboeën ëmbi nabansho isabi yequi bëdapabi Uan ictsec. Padnuen ëmbi Nuquin Papan chiacpadomben nabansho isash ëbi tantiaquido bëdamboshë iquendac.

¹² Uanën chuisho Nuquin Papa tantiabenacpadomboen ëmbitsen Nuquin Papan bédamboen iste chuisho tantiashun adembidi abi icsaid ënshun icsaboedon dadpeshun Nuquin Papa tantiendac.

¹³ Nēbi Uanën: “Nuquin Papan abi yacnoshon bédambo icquid chomendac,” quequin chuipondash. ¿Ambiada adopondash? Padenquo. Èdenquimboshë tauamboen nuquin tsusedpa Moisesën chuibempampic. Adshumbic utsintsen. Adshumbic utsintsen. Aden Nuquin Papan ambi bédambo icquid chomete chuiquin dada uamianepampic.

¹⁴ Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquo Edias cuëmëdquid choendac,” quequin Ediasbimboecquid Uan chote chuipampic. Bédamboen tantiaquin: “Nuquin tsusedpa Ediasbimboecquid Uan nec,” mimbic catsiac.

¹⁵ Bédamboen tantiaquidën adembidi tantiatsiash –quepondash Esus abi datsadquido chiec.

¹⁶ Aden chuisho tantiash chieshtoshobien Esusën chuipondash naden. –Nuquin Papan chiaid tantienquo icquido yec nēmo icquido ¿midapadquidoen nec? Bacuëbo nēishnanacbiçsëcquieç mibi iquec. Bacuëbo: “Èmbi chiacpadomboen nanuna,” queuidash ambi chiacpadomboen aton utsibon nainquo icsho isash nēishash chushcananquid.

¹⁷ “Cuëdënuna,” queuidbosh ëbi cuëdënubi ma mibi cuëdënenquo icboc. ‘Sedenquenuna,’ queuidbosh ëbi sedenquenubi ma mibi sedenquenquo icboc,” quetsash bacuëbo nēishnanacbiçsëcquieç ma mibi iqueyoc. Adec nēishëmënenquido yec icsambo ma mibi iqueyoc.

¹⁸ Uan pete utsi-utsien pesa iccosh. Adecbidi acte paëmbo icquid aque-sambo niosh. Adquid icsho isash nēishash: “Èmbi nacpadomboen naisa nec. Podobitsi icsa dapuduedashien nechitec,” mibi quepondac.

¹⁹ Èbien nuquin matsesën piacsimboen pequid nec. Adembidi actequid acquid nebi. Adsho isash nēishun ëbitsen icsamboen chuishunquin: “Peteuidi tantiaquin nua pequid nec. Tantiadenuen acte paëmbo icquid acquid nec. Adecbidi nuquin matses piucquid bedshunquidobëd onquec icsambo icquid caidobëd onquec quequid ma aidobëdi icsambo icquid nepayoc,” mimbic ëbi capec. Padnuen bédamboen tantiaquidën Nuquin Papan chiacpadomboen nasho isun Uambëdta ëbi: “Bédambo iquec,” caindac –quepondash Esus abi chieshënenquido chiec.

Shubu dadpen icquidën tabadquido cuidte chiaid (Duc 10.13-15)

²⁰ Adshumbic Esusën padpiden chuipondash. –Nēbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bédamboec tabadtiadquo iquebi,” quetiadquidi chieshec adenquo iquec –queshun Esusën naden chushcapondash.

²¹ –Shubu dadpen icquid Codasin caid yacnocquidobëdi shubu dadpen icquid utsi Betsaida caid yacnocquido Nuquin Papan cuidtequido nec. Èmbi aido ismebocpadomboen ismiac isadaidpembo cuidadenquo icsempampic. Aden ismiaqui: “Ai, icsapobi,” quiash shubibudequid icsainquo yec ënëdtsempampic. Shubu dadpen icquid Tido caid yacnocquidobëdi shubu dadpen icquid utsi Sidon caid yacnocquido adtsempampic.

²² Nuquin Papan matses abitedi cuidte ushën: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobëdta bëdiactëc cuidendac. Adoshombic: “Comapenen tantiaquin ismiacqui tantienquo icquido nec,” qeshun Codasin caid yacnocquidobëdta Betsaida caid yacnocquido comapenec sidquenec cuidendac.

²³ Adembidi nēmo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshēnquido cuidacno nidmetequido ma mibi nepayoc. Ēndenquimboshē yampido shubu dadpen icquid Sodoma caid yacnocquido cuidquin Nuquin Papan nibēdamepampic. Ēmbi mibi ismebocpadomboen ismiac aidon abi icsaid ĕntsempampic. Abi icsaid ĕnsho Nuquin Papan cuidenquo ictsempampic. Cuidenquo yac nēbi aton matses abi ictsiash.

²⁴ Nuquin Papan matses abitedi cuidte ushēn: “Comapenen tantiaquin ismiacmaido nec,” qeshun Sodoma caid yacnocquido bēdiactšec cuidendac. Nuquin Papan chomiaid icquin ĕmbi ismeboedo Capednaun caid yacnocquidoen comapenec sidquenec cuidendac –quequin abi tantiesabo Esusēn chushcapondash.

Esusēn dayacquiobimboecnuc icmete chiaid

(Duc 10.21-22)

²⁵ Adshumbic Esusēn Nuquin Papa chuipondash. –Mibi bēdamboshē iquec, Papa. Mibi yacnocquidotedishun Icbombo yec nidaidēn tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi ĕbi tantiabi iquec. Mimbi tantiamiac nēidon ĕbi tantiec. Aden mimbi bēdamboen naic.

²⁶ Mimbi tantiacpadomboen mimbi bēdamboen naic. Mibi bēdamboshē iquec, Papa –quequin Esusēn Nuquin Papa chuipondash.

²⁷ Adshumbic abi datsidadquido chuipondash. –Nuquin Papan ambi tantiaidtedi ĕbi chuimec. Ēmbi naboebēdta ĕmbi nate abitedi con Pan ambentsēqui tantiec utsibon tantienquo icnuc. Adembidi Nuquin Papan natebēdta ambi naboed abitedi ĕmbentsēqui tantiembi. Aden Nuquin Papa tantiaquin: “Nēidtedi matses bēdamboen tantiamembi,” qeshun: “Nuquin Papa nadquo iquec,” quequin tantiamembi.

²⁸ Ēbi tantiata. Dayacquo yacimboecnuc mibi bēdambo icmembique. “¿Mitsipadequibi Nuquin Papa yacno puduedpe?” quec ¿uimambo yacimboecta mibi icpe? Adquidēn ĕbi tantiasho Nuquin Papa yacno puduedtequid mibi icmembique. Ēbi tantiata.

²⁹ Con Icho ĕbi cata. Con yuambo icquin ĕmbi chiacpadomboen nasho mibi bēdamboen isquin dayacquo yacimboecnuc mibi bēdambo icmembique. Ancanesambo yec bēdambo icquidini neque. Con Icho ĕbi cata. Adsho mibi bēdambo icmembique.

³⁰ Mibi ancainquo icquin dayacquo yacimboecnuc bēdamboen mibi tabadmembique. Con Icho ĕbi cata –quequin chuipondash Esusēn.

12

Esusbēd icquidon petsēcsho istuidshun chushcaid

(Mad 2.23-28; Duc 6.1-5)

¹ Adshumbic chonoadtemaid ushēn Esusbēd capucuenequin tied matanquin bundotsēcshun tiedēn caniquid ĕshchicshun petempi petsēcondambi.

² Pesho istuidshumbini con tsusedpabon chiampid namequido padiseyobon: –Is. Mibēd icquido chonoadtemaid ushēmbi chonoadeque –capondash Esus chuiquin.

³ Adoquien Esus: –Ma icsapenquo icpayoc. ¿Nuquin tsusedpa Dabidēn bundoshon ambi petemaidquio pepampid chuiquin dada uapampid isamboda ictio?

⁴ Aidēn Nuquin Papa tabadte shubu uashunaid abi puduedtemaidēn puduedshun ambi petemaid pan sanaid istuidpampic. Aid panēmpi nēish

yua abided unēs uaquidon petequid nepampic. Aid panēmpi bedshun abēd icquidobēdtan Dabidēn pepampic. Aden nuqui bēdambo icquid caidēn ambi natemaidi napampic.

⁵ Adembidi chonoadtemaid ushēn natemaid chiaid niacquimbi nēish yua abided unēs uaquidon aid ushēmbi Nuquin Papa tabadte shubu uashunaidēn puduedshun nācnendenepec. Nuquin Papan chiacpadomboen naiqui ic-sainquio icpec.

⁶ Nuquin Papa tabadte shubu uashunaid tantiaquin adopec. Aid shubu bēdapabi icnuc bēdamboshē icquid nebi.

⁷ Nuquin Papan naden chiaid mimbi bēdamboen tantienquio iquec.

“Ēmbi chiacpadomboen abentse-abentsen mimbi naic.

Adoquimbi ěmbi chiaid utsi niaquec mimbi icsaido caido mimbi bēdamboen istiapimbo iquec.

Adsho isun: ‘Mibi bēdambo iquec,’ catiapimbo iquebi.”

quequin Nuquin Papan chiaid bēdamboen tantiaquidēn ěbēd icquidon bēdamboen nasho mimbi chushcainquio ictsenoc.

⁸ Tantia. Nuquin Papan chomiaid icquin chonoadtemaid ushē ěmbibi ch-ampid icnuc ěmbi tantiacpadomboen aid ushēmbi ěbi tantiaquido namem-bique —quepondash Esus ěmbi petsēcsho istuidquido chiec.

Mēicsatsaid bēdamiaid

(Mad 3.1-6; Duc 6.6-11)

⁹ Adanec nidec Nuquin Papan chiaid chuibante shubun puduedshun

¹⁰ isaquien mēicsatsaid icpondash. Adnubien padiseyobon: — Chonoadtemaid ushēmbi bēdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —qeshun Esus chuituidpondash. — ěNadquid chonoadtemaid ushēmbi matses bēdamequinda Nuquin Papan chiaid niacpec? —caquien

¹¹ Esusēn: —ěAda min nēish yua obeca caid icpec? Adquid chonoadtemaid ushēn shēcūē uquēduc ampaēdacsho istuidshun ěchiquenquioda mimbi icpat-sia? Ai, mimbi chictsiac. Chonoadtemaid ushēmbi mimbi chonoadquin chicpatsiac.

¹² Aden min obeca bēdiactēc tantiec mibi bēdapabi icnuc matses tantiaquiquin nashunquid bēdamboshē ictsiash. Nadquid chonoadtemaid ushēmbi matses aden bēdamboen nashunquidēn Nuquin Papan chiaid ni-aquenquio ictsiash —quequin Esusēn abi icsamenu caquido chuipondash.

¹³ Adotanquimbien Esusēn mēicsatsaid chuiquin: —Mēcūeta —cac mēcūec bēdampondash aton mēdante abiuc daēdi bēdambo yec.

¹⁴ Adsho isashien abi chieshēnquido padiseyobo nēishquiopac caondash. Adec nēishanec nidash aton matses utsibobēd: —Cuesunequimbien Esus ictiad —quecuededpac caondash.

Esusēn nate ěndenquimboshē chiampid

¹⁵ Adnubien Esus: —Ěbi cuesunetiadquio iquec —quianec auēshquiobi pud-uanec nidpondash. Nidsho isumbien matses dadpenshun tsibanampon-dash. Adshumbic aidon bēaid daicsaidotedi bēdamebampondash.

¹⁶ Adshumbic ambi bēdamiaido chuiquin: —“Bēdamioshi,” quenda —quequin chuipondash Esusēn: —Ěbi abi chuiquid dapa icmenushe —quiash adpondash Esus.

¹⁷ Aden Esusēn nate chuiquin Nuquin Papan isadaidbo tsusedpa Isayas dada uamepampic naden chuiquin.

¹⁸ “Ěmbi chomiaid ěmbi chiacpadomboen naquidquio nec.

Aid tantiaquieci bēdambo iquebi.

Con Mayan bēdambo icquid abēdi tabadmembī.

Adoac ěmbi bēdamboen iste isadaidbobēdta matses utsibo abitedi bēdamboen chiendac.

¹⁹ Chushcanante bunenquio yec ancanenquio iquendac.

Chuiquid dapa ictiapimbo iquendac.

²⁰ Icsambo icquido yec shubiquido yec natiaic tabadquido yec daicsaido yec quequidon abi bēdiactšēc tantiabentsēcsho bēdamboen isquin bēdamboen tantiamendac.

Nuquin Papan chiacpadec cuidte ushē choabi icnuc adoendac.

²¹ ‘Nuquin Papan tantiacpadomboen matses bēdamboen namendac,’ queshun nidaid utsi-utsiec yacnocquidon matses dadpenšhun aidi tantiendac;’

quequin Esusēn bēdamboen nate chuiampic Isayasēn.

Podobitsi icsan namiaidi Esus nec, quiaid

(Mad 3.20-30; Duc 11.14-23; 12.10)

²² Adnubien Esus ismenuen daicsaid bēpondash. Dapuduedšhun podobitsi icsan bēshu uain eme uaidi onquesa nepondash. Isenquio yec onquenquio icshobien Esusēn bēdamepondash. Adoac isbenequi onquiampondash.

²³ Adsho isashien Esus datsidadquido: —Is. Comapenen tantiaquin nabanquidquio nēid neque. ¿Nuquin tsusedpa Dabidēn tsyuecquidta nepec? Adquid yec nuqui cainaidquio Nuquin Papan chomiaidien nechitec — quecuededpondash.

²⁴ Adsho tantiaš Esus chiešhēnquido padiseyobo: —¿Aidta nedic? Ma aidpenquio neyoc. Betsibu caidēn podobitsi icsan icbon namiaid icquimbien Esusēn podobitsi icsa cuemechitec — quequin otacquio tantiapaneđash.

²⁵ Adshobien Esusēn aidon otacquio tantiaid ambembi tantiašhun naden chuipondash. —¿Adquidēnda aton yuabi cuemepatsiaš? Padenquio. Chuiquid dapan aton yuabo nēishtanquin chushcac cuēsh-cuēshēdec aton yuabo uesadec nietsiaš. Aido nibēdnuc chuiquid dapa ictiapimbo ictsiaš. Adecbidi shubu dadpen icquidēn tabadquido chushcananash cuēsh-cuēshēdec niquian shubu dadpen icboedi daēdpactšēc yanec.

²⁶ “Betsibu caidbidi Satanas caidēmbi namiaquien podobitsi icsa cuemechitec,” mimbī ěbi capoc. ¿Ambi naid nashobida Satanasēn aton yuabo podobitsi icsabo cuemepatsiaš? Padenquio ictsiaš. Satanasēn cuemiac aibēdi aton yuabo cuēsh-cuēshēdtsiaš. Adnuc Satanas aton icbopenquio yantiaš.

²⁷ Mibēd icquidon podobitsi icsa dapuduedaid cuemiac caosh. ¿Cuemesho isun mimbī ěbi chiacpadomboen: “Betsibu caidēn namiaquien nachitec,” cainda ictio? Ma mimbī padenquio icpaboc. Mimbī adoac: “Mimbī icsamboen chieci,” quetsenosh podobitsi icsa dapuduedaid cuemequido mibēd icquido.

²⁸ Nuquin Papan Mayanēn namiaquimbi podobitsi icsa cuemioc. ěmbi adoshō isash: “Nēbi matsesbēd icquin Nuquin Papan namiaidēn naosh,” quetiadquidi mibi nec — quepondash Esus.

²⁹ Adashic abi onquec: —Tantia. Mibi chuinu. Ampenuesho icbon istuidac ampeguidēn icbo uidēn uabi ampeshuntiapimbo iquec. Icbo uidēnquio icquid bucun cataneshun ampeshunquid. Adecbidi Satanas bēdiactšēc tantiaquid icnuc ěbien comapenen tantiaquidquido nec. Uidēn uacimbien nadatiambo icquin nabanquin aton yua cuemepombi.

³⁰ Ēbi con icbo cainquo icquido Satanasën yuabo nec. Adquid icquin ěbi chieshënquin ěbi tantiatsęcquido cuëshędmendac. Adquidbidi mibi nec – quequin Esusën abi chieshënquido chuipondash.

³¹ Adshumbic nadentsen chuipondash. –Nuquin Papan chiaid niac-niacboedëmbi ěnacsho Nuquin Papan będamboen isec. Nuquin Papan icsamboen chuishunquidëmbi abi icsaid ěnacsho Nuquin Papan będamboen isec. Aton Mayanën namiacsho isash: “Icsambo iquec,” quequin będamboen tantienquo icsho Nuquin Papan będamboen istiapimbo iquec.

³² Ēbi chieshënquin icsamboen chuishunquidëmbi ěnacsho Nuquin Papan będamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan będamboen istiapimbo iquec. Aden ěnenquo icquin icsamboen tantiasho adembidi ěnenquo icquin będamboen istiapimbo iquendac –quequin abi chieshënquido Esusën chuipondash.

Będambo icquid nec, quequin tantiate chiaid
(Mat 7.15-20; Duc 6.43-45)

³³ Adshumbic naden będamboec tabadte Esusën chuipondash. –Cuęte będan bacuę będambo iquec. Cuęte icsan bacuę icsambo iquec. Chetequid isun cuęte dada matsesën tantiec. Adembidi matses będambo icquid będamboec onquec będamboec tabadsho isun: “Aid będambo icquid nec,” quequin matsesën tantiatsiash.

³⁴ Ma mibi adquidpenquo neyoc. Nisibimboec icsa uanquido mibi nec. ěIcsambo icquinda mimbi będamboen chuidio?. Ma mimbi padenquo icboc. Mimbi icsamboen tantiaid ma mimbi utsibo icsamboen chuiboc.

³⁵ Będambo icquidën ambi będamboen tantiaid będamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimbi icsamboen chuipoc.

³⁶ Ambi cuidte ushën Nuquin Papan: “ěAda będamboen tantiaquin chuide-
nio?” quequin matses abitedi chuimendac.

³⁷ Adoac abimbo chiec: “Ai, będamboen nadeniombi,” qesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” qesho icsano nidmequin cuideque. Icsamboec onqueboedi ěnędta – quequin Esusën abi chieshënquido chuipondash.

Padiseyobon: Ēbi isme, quequin Esus chiaid
(Mad 8.12; Duc 11.29-32)

³⁸ Aden chuisho tantiashumbien abi chieshënquido utsibon Esus chuituidpondash. –“Nuquin Papan chomiaidini nec,” quequin ěbi ismequin nadatiampid icquin nabanta. Isnu –quepondash padiseyobo Moisesën dada uapampid chuibanquidobędi.

³⁹ Adoacuien Esus: –Padi. Nuquin Papan chiaid niac-niaquec mibi icsamboshę iquec. Ēbi tantiate bunenquo icquimbi mimbi: “Ēbi isme,” ěbi capec. Adsho nębi mibi ismenquo iquembi. Yuecshumbimbi mibi ismendac. ěAda nuquin tsusedpa Onas caidën nampid tantie? Aid yampicpaden naindambi.

⁴⁰ Chishcambieccquid dapan chebudac aidën pucun uec daędec ushacsho ucbudac Onas padpidec nidpampic. Adecbidi unęsacsho chococac Onas yampicpadec daędec ushash uincuenendabi. Aden ismendambi.

⁴¹ Ēbi tantienquo yec mibi icsambo iquec. Padnuen Nuquin Papan chiaid Onasën chuibanac shubu dadpenquo icquid Ninibe caid yacnocquido badedi icsainquo yec ěnędpampic. Nuquin Papan chiaid chuibanquid Onas będambo icpampic. Ēbien będamboshę icquidquo nec. Adquid icquin nadatiampid icquin dadpen ismiaqui mimbi ěbi tantienquo iquec. Aden ěbi tantienquo icquido icsho Nuquin Papan matses abitedi cuidte ushën Ninibe caid yacnocquidon: “Icsambo iquec,” mibi caindac.

⁴² Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantiec chopampidënsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuëmëdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamiaidënquo Sadomonën bëdamboen chuipec,” quepampic. Ëmbien abitedi tantiaquid icquin nadatiambo icquin ismeuid-poc. Adoaqui mimbi tantienquo icpec –quepondash Esus abi chieshënquido chiec.

Abi nianaid podobitsi icsa dapuedoaid
(Duc 11.24-26)

⁴³ Adshumbic naden Esusën chuipondash. –Icsaquido mibi nec. Podobitsi icsa dapuedoaidbimboecquid mibi nec. Tantia. Mibi chuinu. Abi dapuedoaid matses nianashi podobitsi icsa abi dapuededtequid nibëdacno yuec capucuen-capucuenec. Adtanequi: “Ëbi icbocnobidi dapuedoaid nidebi,” quianec choec.

⁴⁴ Chonobi ambi niamboed matses: “Ëbi dapuedoaid podobitsi icsa nibëdnuc bëdambo iquebi. Adquid chomeoatiapimbo iquebi. Ëmbimbo naic bëdamboec tabadquidquo nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuededtequidquo nëid nec,” quianec

⁴⁵ abipadquid utsi bedec nidoaic. Nidshumbic 7tedi icsamboshë icquido istuidshun bëash aidobëdi dapuedec. Adnuc podobitsi icsa abentsëc dapuedoaid yec ënden icsambo icboedi aido dadpen dapuedoaid yec buëdanquic aid matses icsamboshë yanec. Adquo mibi iquec. “Bëdambo iquebi,” queboedi nëbi mibi icsamboshë yanec –quequin Esusën chuipondash.

Anibëdi Esusën utsibo choaid
(Mad 3.31-35; Duc 8.19-21)

⁴⁶ Adanec shubun puduedshun Esusën abëd puduedquido dadpen chuinubi aton utsibo aton titabëdi Esus isnuec chopac caondash. Umanuc tabadnubi

⁴⁷ utsin puduedshun Esus chuituidpondash. –Mibi isec tita min utsibobëdi choaccosh. Umanuc tabadec –caquien badedi nidenquo yec

⁴⁸ Esus: –Utsitsen con ta caimbi. Adembidi utsitsen con utsi caimbi –quetanquin

⁴⁹ abëd icquido mëdquin ismepondash. –Nëid ëbëd icquido con utsibo caimbi.

⁵⁰ Nuquin Papan chiacpadomboen naquidquo icsho con matses caimbi. Con utsi caquinc con chibi caquinc con ta caquinc caimbi –quepondash Esus.

13

Piacbo ëshë siaid chiaid
(Mad 4.1-9; Duc 8.4-8)

¹ Adtanec nidec chian budash cuëmano tabadtuidpondash.

² Tabadtuidsho isash matses dadpenquo cho-choash tsucus-tsucusëcquio yec Esus datsidadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

³ Adshumbic abi tantiate chuinen naden ompoacbimboen chuipondash. –Piacbo ëshë siaid utsi-utsiec bëdamboec caniec. Utsi-utsiec padenquo.

4 “Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uicchunën chequid.

5 Èshë utsibic nidaid tsasimbo yacno siac badedi dëyucuidash

6 aton tapun nidaidën puduedenquio icnuc ushë chënquequidën badedi unësquid.

7 Èshë utsibic nisanquid diadacno siaid dëyucash canidouidsëcsho nisanquidën dayunac unësquid.

8 Padnuen èshë utsi-utsiec nidaid bëdanquio siac dëyucash caniasht dadpenquio èshëquid. Utsi-utsiec 100ted èshëquid icnubi utsi-utsiec 60ted èshëquid icnuc utsi-utsiec 30ted èshëquid —quepondash Esus.

9 Adashic: —¿Min pabiate shëcuë nibëdquiecta iquéc? Èmbi chuibod bëdamboec pausudta —quepondash Esus.

Ompoacbimboen chiec nebi, quiaid

(Mad 4.10-12; Duc 8.9-10)

10 Adsho tantianshun abëd icquidon Esus chuipondash. —¿Atotsieshun ompoacbimboen nëid matses dadpen chie? —caquien

11 Esus nadpondash. —Utsibo tantiamenquio icquin Nuquin Papabëd tabadte chuiquin nëbi mibiuidtsëqui tantiamembi.

12 Nuquin Papa tantiatiadquio icquidën ëbi tantiasht bëdamboen tantiamendambi. Nuquin Papa tantiauidtsëcquidën ëbi tantienquio icsho ëmbi ompoacbimboen chiac tantienquio ictsiash.

13 Ompoacbimboen aido dadpen chuibanembi. Èmbi naid isun ëbi tantienquio iquéc. Èmbi chuisho pamumëdacbimboen tantienquio iquéc. Adsho aidon tantiatiapimbo icnuc chiembi.

14 Nëidon tantienquio icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquio iquendac.

Ismiac isquioboshombi: ‘Ai, aidi nec,’ cainquio iquendac.

15 Ai, ëmbi chiaid tantiatiapimbo iquéc.

Ushacbimboen tantienquio yec pamumëdacbimboec chieshëmënquidombo iquéc.

Èbi tantiate bunenquio iquéc.

Èmbi chiaid tantiaquidombien paposhquiacbimboen bëdamboen tantiabentsiash.

Pausunacbimboen tantianshun ëmbi chiacpadomboen natiadquio yansho aton chiesh bëdametsiambi. Aton chiesh bëdamete bunenquio iquéc,” quequin Nuquin Papan dada uamepampic —quepondash Esus abëd icquido chiec.

16 Adashic aidobidi chiec: —Isayasën chiacpadomboen utsibon ëbi tantienquio icnubi mimbien ëbi tantiec. Èbi isec mibi tabadec. Èmbi chuibansho tantiasht: “Ai, abimbo caic,” quec mibi bëdambo iquéc.

17 Èbi chote chuipampidobëdtan bëdamboec tabadquido dadpenshun mimbi ëbi isacpadomboen ëbi iste bunequi ëbi isambobi unëspampic. Mimbì ëmbi chuisho tantiacpadomboen tantiatiadquio yequi tantiambobi unëspampic —quepondash Esus.

Piacbo siaid sebadënquio chiaid

(Mad 4.13-20; Duc 8.11-15)

18 Adashic abi onquéc: —Tantia. Èmbi piacbo èshë siaid quequin chuiboed sebadënquio mibi chuinu.

19 Nuquin Papabéd tabadte chiaid piacbo êshê siaidbimboecquid nec. Nuquin Papan chiaid chiaqui tantiadenquo icscho Satanasên nac badedi bëshumpec. Uicchunên piacbo êshê paëdaid badedi chiacbimboen adopec.

20 Utsibic Nuquin Papan chiaid chiaqui bêdiactsêc tantiauidtsash: “Bëdambo iquec,” quec cuishonqueuidtsec.

21 Adsho: “Nuquin Papan chiaid tantiaquid nec,” qeshun utsibon chieshênac badedi chieshtoshon tantienquo yanendac. Piacbo êshê tapunuidtsash unêsacbimboen adoendac.

22 Utsibic Nuquin Papan chiaid tantiatsashi ambi dacuëdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Ísitodon dayunac unêsacbimboen adoendac.

23 Padnuen utsibon tantiate nidaid bédan siaidbimboecquid nec. Nuquin Papan chiaid chuisho tantiaquioshon ambi tantiaid bènuainquio icquin tantiabudec bëdamboec tabadec. Adshun aidên chiac utsi dadpenquioshê ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpactsêc adquidbidi yanendac —quequin abi tantiate chuipondash Esusên.

Ëshê icsambo icquid seuanaid chiaid

24 Adshumbic Esusên naden chuipondash. —Tantia. Nuquin Papan namiaid tantiamenuen utsi chiacbimboen chuinu. Tiedên caniquid pete adosbiecquid icbon siac caondash.

25 Adanec nidambic inchêshëmbi choshon chieshëmênquidên êshê icsambo icquidtsen daëd uain seuanac caondash.

26 Adoac adosbiecquid canidotsêcnubi abëdi tancandaëdpamboec icsambo icquid canidotsac caondash.

27 Adsho istanquin yuabon aton icbo chuituidpac caondash. “¿Pete êshêda sio?” cac: “Ai,” qesho tantiash: “Icsambo icquidbêd tancandaëdec canidopacoc. ¿Mitsipadên sio?” quequin yuabon icbo chuipac caondash.

28 Adoquien: “Chieshëmênquidëmbien seuanchitash,” cac: “¿Chicshunetanquindambi icpe?” yua qesho:

29 “Padi. Petebëdi chiquidtsiash.

30 Aidbëdi ma canipanuna. Ëshêacsho tacuesquimbi teshun sianun nanuna. Adoshombic icsambo icquid tsindobanshun nêdëncanun nanuna. Icsambo icquid nêdëncatanquimbic pete bedshun sandoshon shubun dectandon nanuna,” quepac caondash tied icbo —quequin Esusên chuipondash.

Esus tantiaquido dadpen yante chiaid

(Mad 4.30-32; Duc 13.18-19)

31 Adshumbic abi tantiaquido dadpen yante tantiamenuen Esusên naden chuipondash. —Cuëte bacuë êshëmpi

32 pistsêccuidi nuamboshê caniec. Aid cuëte cuidin uicchun dadpen tabadtonac. Adecbidi ëbi tantiaquid abentsêcshun bëdamboec tabadquin ismiac ëbi tantiaquid dadpenquo yanendac —quepondash Esus.

Abi bëdamboen tantiate Esusên chiaid

(Mad 4.33-34; Duc 13.20-21)

33 Adshumbic Esusên abi bëdamboen tantiate chuipondash. —¿Mitsipad nami uaid icpec? Aniaactsêc nami uashun utsibêdta daëd uain cabiunac abichobi batambo yanec. Adembidi ëbi bêdiactsêc tantiatsêcboedi ëmbi chiaid tantiash ëbi bëdamboen tantiaquid yanendac

34 —quequin Esusên chuipondash. Sebadênquo chienquo icquin ompoacbimboenuidi Esusên chuipondash.

³⁵ Aden Esusën chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec. “Sebadënquoio chienquoio icquin ompoacbimboenuidi chuibanendambi.

Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

Ëshë icsambo icquid seuanaid sebadënquoio chiaid

³⁶ Adashic matses dadpen tabadacnuësh nidec Esus shubun puduedondash. Puduedshobien abèd icquidon chuipondash. —“Chieshëmëñquidën ëshë icsambo icquid siaid nec,” quequin mimbi chuiboed en sebadënquoio chui, Icbo. Tiantianu. ¿Atotsi chuitiadquoio icquin aden chio?

³⁷ —caquien Esusën chuipondash naden. —Tantia. Mibi chuinu. Pete ëshë bédambo icquid sequidbimboecquid nebi. Nuquin Papan chiaidquoio tantiamequin matses bédambo icmequid nebi.

³⁸ Padnuc tied dapabimboecquid nidaidën tabadquidtedi nec. Padnuc pete ëshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshënquid Satanasën yuaido icsambo icquid siaidbimboecquid nec.

³⁹ Padnuc ëshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobèd tabadquin icsameti-adquoio iquec. Adsho badedi cuidenquoio icquin Nuquin Papan cuidte ushë choabi icnuc matses icsambo icquidobèd bédambo icquido tabadmendambi. Padnucen ambi chiacpadën Nuquin Papan abi yacnoshon uaido mayan bédabon ëmbi chiacpadomboen naïndac.

⁴⁰ Icsambo icquid tsindoshon nédëncacimbomèn Nuquin Papan cuidte ushëmbi icsambo icquido cuidendac.

⁴¹ Ëmbimboen mayan bédabo namendac. “Icsamianquidobèdta icsaidotedi bedshun chian anédënquiacono nëseca,” quequin ëmbi chiac

⁴² bedshun chian anédënquiacono nësecaindac. Adoac natiaic mëyadbudec sidquequindac.

⁴³ Padnucen ëbi tantiec bédamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiaishun ëmbi chiacpadomboen nata —quepondash Esus.

Nuquin Papabéd tabadte bunquiota, quiaid

⁴⁴ Adshumbic padpiden Esusën chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquoio icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nëbi con tied nec,” queshun piucquid ompoampid bedpac caondash. Adomboen matsesën Nuquin Papabéd tabadte bunquin aton nauidi nainquoio icquin Nuquin Papan chiacpadomboenuidi nac bédambo ictsiash.

⁴⁵ Tantia. Casëdu bédaidquoio bunaidtsen mibi chuinu. Dadan casëdu bédaidquoio bunquin bednuc nibënbenepac caondash.

⁴⁶ Adshun bédaidquoio istuidash: “Nadquid utsi nibèdec,” quiaish comapenec bunquiaic caondash. Adshun aton na abitedimbo mënequin piucquid bedshun casëdu icbo menequin aid casëdu bedac caondash. Adomboen

Nuquin Papabéd tabadte bunquin matsesën ëbi tantiaquiac bédambo ictsiash –quepondash Esus.

Nuquin Papan cuidte ushë Esusën chiaid

⁴⁷ Adshumbic Esusën naden chuipondash. –Tantia. Mibi chuinu. Nuëcquid nibedacimboen naindambi. Isadaidbon nuëcquid dadpenquo bedte nëshaid dapa acte nënequin

⁴⁸ nëshaid cubu-cubuctsëcquio icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden Isadaidbon nuëcquid bedquid.

⁴⁹ Adomboembidi namendambi. Nuquin Papan cuidte ushë chonoc ambi abi yacnoshon uaido mayan bédabo namendambi. Adoac choshon nibedacimboen matses bédambo icquido Nuquin Papa yacno nidmequimbi

⁵⁰ icsambo icquido chian anëdënquiacno nësecaindac. Adoac natiaic shubiquiendac –quequin Esusën Nuquin Papan cuidte chuipondash.

⁵¹ Adshumbic: –¿Ada ëmbi chuiboedtedi tantie? –caquini: –Ai, tantiembi –quepondac.

⁵² Adsho tantiashun Esusën chuipondashi. –Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbëdta aton na chuca ismequin chiacimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuiboedquio mimbi chiendac –quepondash Esus.

Nasaded yacno Esus nidad

(Mad 6.1-6; Duc 4.16-30; Uan 4.44)

⁵³ Adanec auëshquiobi nidequi

⁵⁴ abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoacqui: –¿Mitsipaden comapenen tantiabepash neba? ¿Mitsipadec comapenen tantiaquin bédamequid yampash?

⁵⁵ ¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidtedi aton utsibo iccosh.

⁵⁶ Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquo neyoc –quequin

⁵⁷ Esus chieshënquin tantienquo icpondash.

Adsho tantiashun Esusën nadopondash: –Nuquin Papan: “Èmbi tantiamicapaden chuibanta,” caidën chiac utsibon tantiaquid. Adquidën abi caniacnoshon chuibansho tantienquo icquid –quepondash Esus.

⁵⁸ Adshun nadatiambo icquin nabanquin daëdpactsëc ismetsëccondash: –“Nuquin Papan chomiaidquio nec,” quetiapimbo iquec –queshun.

14

Uan acten mentoanquid

unës uaid

(Mad 6.14-29; Duc 9.7-9)

¹ Adnubien ancaquidën Edodes caidën Esusën comapenen tantiaquin nabanaid chuisho tantiapac caondash.

² Adshumbic aton yuabo chuipac caondash. –Uan pado acten mentoanened nepash icnui. Èmbi mapi butemiondaiddi uincuempash icnui. Adquid icquin comapenen tantiaquin nabampash icnui –quepac caondash Edodes.

³⁻⁴ Edodesën Uan cuesuniac caondaid chuinu. Tantia. Uanën: —Mimbi bedaid Edodias caid min chidopenquoio nec. Min utsi Uedipe caidën chido bedshun Nuquin Papan chiaid mimbi niaquec —cadoniaquien Edodesën chieshtoshon uidën uameshun Uan quënën nauedmpac caondash.

⁵ Adshumbic Uan cuesunetiadquoio icquimbi aton matses: —Nuquin Papan chiaid chuibanquidquoio nec —quesho tantishun aido dacuëdënquin Uan badedi cuesunenquoio icpac caondash.

⁶ Adshumbic Edodesën: —Ëbi tishaid ushë nec —queshun matses dadpen aton shubun puduedmeshun pemepac caondash. Adnubien ambi inaidën champin Edodesën pemiaido baidaquin ismepac caondash. Adsho isumbic Edodesën: —Bëdamboenshë mimbi naic —queshun

⁷ naden chuipac caondash. —Tantia, champi. ¿Atotsi buneque? Mibi bunaidquoio mibi menenu. “Nuquin Papan cuidnushe,” quiaish muati-pimbo iquebique. En ëbi chui —capac caondash Edodesën.

⁸ Adoquien champin aton tita chuitampac caondash. Chuitanec choshon anin chiaid chuituidpac caondash. —Uan acten mentoanquidën mapi butetanquin pada-padaid dapan ananshun baded ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemetete bumpac caondash.

⁹ Adoquien Edodesën: —¿Atotsi quepequini ado? ¿Adoenquoio ictiadtsimbi icpoba? —quequin ambi chuiboed nactiadquoio icpac caondash. —Ëbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

¹⁰ Adoac quënën tsadacnobi Uan mapi buteshun

¹¹ mapi pada-padaid ananshun buanshun champi menepac caondash yuabon. Adoquien champin ani menenun buampac caondash.

¹² Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

Comapenen tantiaquin 5000tedi pemiaid (Mad 6.30-44; Duc 9.10-17; Uan 6.1-14)

¹³ Nidshumbic: —Mibi acten mentonaid mapi butiaccosh —catuidpondash. Adsho tantianec cano antabëdtoshon chian potiash pudundoanec matses nibëdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanepac caondash.

¹⁴ Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquoio icquin daicsaidotedi bëdamebampondash.

¹⁵ Ushë budambi Esusbëd icquidon: —Inchësheque. Pete nibëdacno nuqui tabadeque. Nidaneme, Icho. Shubu dadpen icquid utsi-utsiec yacno nidshun ma piucquid menequin ma pete bednu —caquien

¹⁶ Esusën: —Padi. Ma tabadnu. Mimbibi peme —capondashi.

¹⁷ Adoquini: —Ma panëmpi 5tedpactsëc icpayoc. Nuëcquidëmpi daëdquioibi ictsec —quepondac.

¹⁸ Adsho: —Aidtedtsëqui beccho —cac meniondambi.

¹⁹ Adoquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bëdambo iquec, Papa —quetanquin panëmpi cuëshcuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

²⁰ Adoaquien nua cubudcuededquin pebededpondash abitedishumbi. Piacsho isun napi uaid bedtaneguin tsitsan dapan sandotanquin isquien tsitsan dapa 12tedi cubu-cubuctsēcquo iquec pete cuësh-cuëshaid napi uaid.

²¹ Aden mates dadpenquo pemebampondash. Aido dadatedi tambanac 5000tedi icpondash. Aton chido aton bacuēbobēdta tambanambo iccondambi.

Acte bēntse Esus choaid
(Mad 6.45-52; Uan 6.16-21)

²² Adshumbic Esusēn abēd icquido chuiquin: —Chian potec nidta —capondash. Adoac cano antabēdtoanec potec nidnubi Esusēn abi datsidadquidotsen: —Nidanec nid —cac nidanepac caondash.

²³ Adec nidanebon Nuquin Papa chuinec macuësh dectatoash abentsēqui Esus inchēshpac caondash.

²⁴ Adnubien chian dapa potequi abēd icquidotsen inchēshpondash. Chian nēnantanquo yanubi cunquetuidpondash. Adnuc acte comapenec tēcguasquiampondash uncadenquo yec. Comapenec acte ishcnudnuc cano mentoadtiadpambo icpondash.

²⁵ Adnubien badiadte anoentsēqui acte bēntse Esus chopondash.

²⁶ Acte bēntse chosho isashini: —Podobitsi nec —quish dacuēdtanec sidquecuededpondac.

²⁷ Adshobini Esusēn: —Ēbien neque. Dacuēdenda —capondash.

²⁸ Adoaquien Petedon: —¿Con Icbombobida ne? Con Icho icquin: “Acte bēntse cho,” ēbi ca —capondash.

²⁹ Adsho tantiashun Esusēn: —En cho —caquien Petedo canonoësh budanec acte bēntse Esus bēquedbanec niduidtsēccondash.

³⁰ Esusuidi isec bēdamboec niduidtsequi acte comapenec tēcguasquesho isash dacuēdtanec acte bēntse niduidtsēcboedi mentoadtsempondash. —Ēbi bed, Icho. Mentoadebique —caquien

³¹ Esusēn badedquo bedtanquin indopondash. Aden indoequi: —“Con ichon ēbi bēdamboen nametsiash,” queboedi ¿atotsi quish dacuēdtano? Ēbi bēdiactsēc tantiatsēcquid mibi nec —quepondash Esus Petedo caic.

³² Adtanec Petedobēdi cano antsadtonobien cunqueboedi cunquenquo yampondash. Actetsen tēcguasquenquo yanondash.

³³ Adsho isun cano antabēdquidon: —Mibi bēdamboshē iquec. Comapenen tantiaquidquo yec Nuquin Papan Madombo mibi nec —quequin Esus tantiabededpondash.

Quenesaded yacnoshon Esusēn bēdamiaid
(Mad 6.53-56)

³⁴ Adashic chian potiash Quenesaded yacno pudundopondash.

³⁵ Pudundoshon isun anocquidon: —Esus chosh —quequin uanocquido abitedi chuibeniac daicsaido abitedi bē-bēpondash.

³⁶ Bē-bēshumbic: —Dashcuteuidtsēqui mishashi bēdantsiash —queshun Esus chuituidquin: —Min dashcute cuēmano daicsaido mishme —cac mishmiaqui bēdampondash abitedi.

15

Padiseyobo icsaid Esusēn chiaid
(Mad 7.1-13)

¹ Adnubien padiseyobo Moisesēn dada uampid chuibanquidobēdi shubu dadpen icquid Edusaden caid yacnuësh cho-choquin Esus istuidpondash.

² Istuidashic: —¿Atotsieshun mibéd icquidon nuquin tsusedpabon chiaid niac-niacpash? Penush mëpamèdenquo icquin nuquin tsusedpabon chiaid ma niac-niacpaboc —quepondash Esus chieshènquido.

³ Adsho tantiashun Esusèn: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiapadomboen naquin ma mimbi Nuquin Papan chiaidquo niac-niacpayoc.

⁴ Tantia. Mibi chuinu. “Titabèdta papa chieshènenquo icquin bédamboen tantiata,” quequin Nuquin Papan chiampidquo ma mimbi niacpaboc. Adembidi: “‘Con pa unèspashun,’ quec chieshèmènquid icsho unès uaquid. Adembidi ani icsamboen chuishunsho unès uaquid,” quequin Nuquin Papan chiampid utsi mimbi niacpec.

⁵ Aid niacquin nuquin tsusedpabon ambembi chiaidien mimbi chiec. “Anibèdta amè naden cudasènac bédambo ictsias,” mibi quepec. “‘Nuquin Papa menetequid nédted con piucquid iquec. Mitsana nibèdsho meneti-adquidi mibi menenquo iquemi. Nuquin Papa menetequid nec,’ quequidèn

⁶ cudasènac bédambo ictsias,” mibi quepec. Aden nuquin matsesèn chiaid naquin Nuquin Papan chiaidquo ma mimbi niac-niacpayoc.

⁷ “Nuquin Papa tantiaquidquo nebi,” quec muaquid mibi nec. Èndenquimboshè Nuquin Papan chuimiac nuquin tsusedpa Isayas caidèn mimbi icsamboen tantiatae chuiquin dada uapampic naden.

⁸ “Isadaidbo: ‘Nuquin Papambo tantiemi,’ quepec.

Adboedèmbi èmbi chiaid niacquin èbi tantienquo iquec.

⁹ ‘Ma Nuquin Papan èbi bédamboen isnu,’ queboedèmbi èbi bédamboen tantienquo iquec.

Èmbi chiaidquo namenquo icquin aton matsesèn chiaiduidi namepec,” quequin Isayasèn Nuquin Papan chiaid dada uapampic —quequin Esusèn abi chieshènquido chushcapondash.

Ana shècuènuèsh choaid chiaid

(Mad 7.14-23)

¹⁰ Adshumbic abi isec datsidadquido ompoacbimboen chuipondash. —Tantia. Mibitedi chuinu.

¹¹ Ana shècuèn puduedaidèn matses icsaten mimbi dampec. ¿Adquidènda matses icsapec? Padenquo. Ana shècuènuèsh choaidèmbien matses icsatsias —quequin Esusèn chuipondash.

¹² Adnubien abèd icquidon: —Mimbi aden chuibod tantiashun padiseyobon mibi chieshènosh, Icho —caquien:

¹³ —Dacuèdenda. Icsa bescatanquin tsindoshon nédèncacimboen ambi tantiamiabi yaido ambembi chuiquido Nuquin Papan cuideque.

¹⁴ Dacuèdenda. Padiseyobo bèshuaidbimboec icquido neque. Bèshuaidèn aton matses bèshuaid utsi bédamboen buantiapimbo iquec. Buanuec abi shècuè ampaèdtsias. Adembidi Nuquin Papan chiaidpenquo namequin aton matses bédamboen tantiametiapimbo iquec —quepondash Esus abèd icquido chiec.

¹⁵ Adshobien Petedon: —Mimbi ana shècuènuèsh choaid quequin chuibod tantiambo iccombique. Aid sebadènquo chui. Tantanu, Icho —caquien:

¹⁶ —¿Tantiamboda icco?

¹⁷ Chuinu. Tantia. Ana shècuèn puduedaid mimbi peboed min pucun uedoash chimute shècuènuèsh choec. Adquidèn Nuquin Papan chiaid niacmenquo iquec.

¹⁸ Matses onquiaidimbi ana shècuènuèsh choaid caoc. Abibi uquèducuèsh onquec: “Adoembi,” quequin otacquo tantiaquin naic matses icsatsias.

19 Icsambo icquido yec: “Ai, adoembi,” quequin otacquo tantiashun Nuquin Papan chiaid niactsiash nadquidën. Nëidic unës uanquid. Nëidic aton chidopenquo chudquid. Nëidic aton bënëpenquo chudmequid. Nëidic aben uequid. Nëidic ampequid. Nëidic muaquid. Nëidic icsamboec chuishumënquid.

20 Adquidtedi: “Ai, adote bunebi” quequin otacquo tantiash icsaquid nec. Padnuen penush mëpamëdenquo icquin Nuquin Papan chiaid niaquenquo ictsiash —quepondash Esus abëd icquido chiec.

Isadaidpembo chidon Esus tantiaid

(Mad 7.24-30)

21 Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

22 Adnubien anocquid cananeyabo chidon Esus cuëntuidpondash. — Tsusedpa Dabidën tsyuecquid Nuquin Papan namiaid icquin ëbi bëdamboen ista. Con champi podobitsi icsa dapuduedaid yec natiambo iqueque. Con champi bëdameta —caquien

23 Esusën ëcbedenquo icpondash. Ëcbedenquo yaqui chidon tsibanbanquin cuënbampondash. Adsho tantiashun Esusbëd icquidon: —Chieshanquieq cuëdpeque. Cuemepa —caquien

24 Esusën cuemenquo icquimbi aid chuiquin: —Nuquin Papan chiacpaden Isadaidbo matsesba Nuquin Papa bëdamboen ismete tantiamenuec nebi. Bënudac bimboec icquin Nuquin Papa tantienquo icsho aidoba tantiamenuec nebi —quepondash Esus.

25 Adsho tantiash nidenquo yec chido cuëdboed Esus ismequin danëshën sebudtsec: —Ëbi nashunta, Icho. Con champi bëdameta —qeshobien Esusën:

26 —¿Aton bacuëbo pemenquo icquimbi aton opa pemiacta bëdambo icpat-siash? Padenquo. Adembidi Nuquin Papan con matses caidotedi tantamiabi utsibo ëmbi nashunac icsambo ictsiash. Isadaidboba tantiamenuec nebi —quepondash Esus.

27 Adsho tantiashun chidon: —Ai, abimbo mimbi caic. Padnuen bacuëbon pequin paëdmiaid opashëmpin petsëcquid. Adembidi mimbi comapenen tantiaquin nabanaqui isadaidbo dadpen bëdanubi isadaidpembo abentsëc tantiaquid icsho ëbi nashunquin con champi bëdameta

28 —caquien Esusën: —Ai. Ëbi tantiaquidquo mibi nec. Mimbi chiacpader min champi bëdanendac —quesho tantianec aton shubuno nidshun isquien aton champi bëdanac Esusën chuinubi.

Daicsaido dadpen Esusën bëdamiaid

29 Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

30 Tabadtuidsho isun matses dadpenquo cho-choquin daicsaido dadpen Esus ismenuen bë-bëpondash. Tidinguequido yec bëshuaido yec shëquëquenquo icquido yec onquesabo yec daicsaido utsibotedi yec quenuc bë-bëpondash. Adsho Esusën bëdamebampondash.

31 Bëdamiac onquenquo icboedi onquianondash. Bëshuacboedëmbi isbenondash. Capuenquo icboedi capucuenondash. Daicsaido utsibo adecbidi bëdanondash. Adsho isquido nadpondash. —¿Adquidta ictenec? Nuquin matses isadaidbon tantiaidën Nuquin Papan namiaid icquin bëdamepash icnui. Nuquin Papa bëdambo iquec —quepondash Esusën bëdamiaid tantiash.

*Matses 4000tedi pemiaid
(Mad 8.1-10)*

³² Adec tabadsho isashien Esus: —Nëido tantiac unësqiuo iquec. Ĕmbi nansho isnuec choash 3tedec ushquin piac ambi bëboed pete naimëdaccosh. Ĕmbi: “Nid,” cac nidnuequi bunambi padishtiash. Pemiabi nidmetiapimbo iquebi —quepondash.

³³ Adsho tantiashun abëd icquidon: —¿Midambo pete bedtiapimbo iquec? Pemetiapiambo matses dadpen iquec —capondash.

³⁴ Adoapien Esusën: —¿Tedtsi panëmpi iquec? —cac: —Sieteted ictsec. Nuëcquidëmpi daëdpactsëc ictsec —quesho

³⁵ tantiashumbien abi datsidadquido chuiquin: —Nëmbo tabadbud —capondash. Adoac tabadbudpondash abitedi.

³⁶ Adshumbic panëmpibëdta nuëcquidëmpi bedshun Nuquin Papa chuipondash. —Nëid mimbi uaid bëdambo iquec, Papa —queshun pete cuësh-cuëshbantsëcshun abëd icquido menebampondash: —Pemeban —quequin. Adoac abitedimbo pemebampondash.

³⁷ Aden pemiad abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsëcquio icnuc sandobampondambi.

³⁸ Esusën pemiaido dadpenquo icpondash. Tambanac 4000tedi dada icpondash. Chido bacuëbobëdta tambanambo iccondambi.

³⁹ Adashic: —Nidanec nid —quepondash Esus ambi pemeboedo caic. Aido nidanenubi chian budash cano antabëdtoshon Esusën chian potepondash. Chian potiash nidaid Mactada caid yacno pudundopondash.

16

*Saduseyobon: Ĕbi isme, quiaid
(Mad 8.11-13; Duc 12.54-56)*

¹ Pudundoanec nidshobi anocquidon abi chieshënquidon Esus chuituidpondash. —“Nuquin Papan chomiäid nebi,” quequin comapenen tantiaquin nabanquin ëbi isme —cabededpondash padiseyobobëdta saduseyobon.

² Adshobien Esusën: —Nuquin matsesën chiaid mimbi tantiec. “Inchëshbudtsëqui abu piumbo icsho isash: ‘Tanunquo badiadec,’ quequid.

³ Badiadnubi abu inchëshpambo icsho isash: ‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiacimboen bëdamboen tantiatiadquidi Nuquin Papan nëbimbobi naid mimbi tantienquo iquec.

⁴ Icsambo icquid icquimbi mimbi: “Ĕbi isme,” cadednepec. Nëbi mibi ismenquo iquemi. Nuquin Papan nuquin tsusedpa Onas chishcambiequid dapan chebudacsho daëdec ushun ucbudmiacimboec unës uacsho chococac daëdec ushash uincuenendabi. Aden ëbi tantiesabo ismendambi —quianec nidpondash Esus.

*Padiseyobon chiaid tantienda, quiaid
(Mad 8.14-21)*

⁵ Adanec nidec chian budash cano antabëdtoshon chian poteopondash. Chian potequien Esusbëd icquido: —Pete nianchitombi. Bëtiadquidi nepobi —quepondash.

⁶ Adshobien Esusën abëd icquido chuiquin: —Padiseyobëdta saduseyobon naid pan bidiscametebimboecquid iqueque. Ista —caquien

⁷ tantienquo yec abëd icquido nadeconquecuededpondash. —Nuqui niamboed pete chiequi nepanui —quepondash.

⁸ Adsho ambembi tantiash Esus: —Èbi bëdiactsëc tantiatsëcquid mibi nec. ¿Mimbi pete niamboed chiectabi nedi? Padenquoio.

⁹ ¿Bëshunashta mibi nepe? Pete 5tedtsëcboedi ëmbi 5000tedi pemaiadën napi uaid dadpen iccondaid ¿tantienuquioda yano?

¹⁰ ¿Adembidi pete 7tedi ictsëcboedi ëmbi 4000tedi pemaiadën napi uaid dadpen tsitsanën sandoboed tantienuquioda yano?

¹¹ ¿Aden comapenen tantiaquid icquimbidambi pete niamboed chuipadi? Padenquoio. Pan bidiscamete pictsëc cabiunac pan abichobi nua bidisquiacimboecquid padiseyobobëdtañ saduseyobon chiaid iquec — quepondash Esus.

¹² Aden chuisho tantiash abëd icquido nadpondash. —Pan chienquoio icquimbi nuquin matses tsusiobon chiaidshenda capec. Aido caic: “Ic-samenda,” quepecshenda niosh. “Padiseyobon chiaidbëdtañ saduseyobon chiaid tantienda,” quepecshenda niosh —quepondash Esusbëd icquido.

Nuquin Papan Mado mibi nec, quiaid

(Mad 8.27-30; Duc 9.18-21)

¹³ Adash yuectaniash puduanec nidequien Esus nidaid utsi Sesadeya Uedipo caidën nidanepondash. Adshumbic abëd icquido chuimepondash. —Utsibon ¿tsutsi ëbi caosh? —caquien:

¹⁴ —“Uan pado acten mentoanondaidien nec,” mibi caosh. Utsimbic: “Edias cuëmédquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuëmédquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abëd icquidon.

¹⁵ Adsho tantiashun Esusën: —Ma mimbibi. ¿tsutsi ëbi mimbi cao? —caquien

¹⁶ Petedo Simon caidën: —“Quidistu caid Nuquin Papan chomiaidquio nec,” caombi mibi. Aton Madombo mibi nec —capondash.

¹⁷ Adsho tantiashun Esusën: —Nuquin Papan aden tantiamiac mimbi bëdamboen chioc, Petedo. Onasën mado Simon caid yec matsesien mibi nec. Adquid icquimbi matsesën tantiaid chienquoio icquin Nuquin Papan tantiamiaidquio mimbi abimbo chioc.

¹⁸ Tantia. Èmbitsen mibi chuinu. “Cuënotebimboecquid nec,” quequin mibi Petedo cuënondambi. “Cuënote dapa utsi ictiapimbo yacimboc chieshtoenquoio icquid iquendac,” queshun mibia ëbi tantiaquido chuiquid dapambo icmendambi. Adec mimbi namiaido ëbi tantiaquido iquendac. Satanasën aido: “Nëid yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac.

¹⁹ Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidsen mimbi chiendac — quepondash Esus Petedo chiec.

²⁰ Adashic abëd icquido abitedi chuoiaic: —“Nuquin Papan chomiaidquio nec,” quequin utsibo ëbi chienda —quepondash Esus.

Abi unës uate Esusën chiaid

(Mad 8.31-9.1; Duc 9.22-27)

²¹ Adshumbic tauaquin abi unës uate chuidondash. —Shubu dadpen icquid Edusaden caid yacno nidendabi. Anoshon nuquin matsesën ëbi chieshënuquendac nëidtedshun. Nëidic tsusiobon. Nëidic nëish yua abided unës uaquido chuiquid dapobon. Nëidic Moisesën dada uampid chuibanquidon. Aidedishun mëyanquiquin ëbi unës uamendac. Adoacsho chococac daëdec ushash uincuenendabi —quequin chuisho

²² tantiashun Petedon uanotantsëcquin tsadumbudshun Esus chuipondash. —Unësquo icnuc mimbi chieque. Aden chienda. Ma mibi unës uatiapimbo icpayoc —capondash Petedon.

²³ Adoquien Esusën: —Satanasën oncamiac Petedo adec onquec —gushun Petedo isquin Satanas chushcapondash naden. —Cuen, Satanas. Nuquin Papan chiaid mimbi ëbi niacmetiadquo iqueque. Cuen —quetanec Petedobi chiec: —Matesën tantiaid chuiquimbi Nuquin Papan tantiaidquo mimbi chienquo iccoc —capondash.

²⁴ Adashic abëd icquidotedi chuioaic: —Ëbi tantiaquidon aton nauidi nainquo icquin ëmbi chiapadomboen natsiash. Adsho chieshëmëncquidon: “Unës uachitomane,” cac chieshtoenuo icquin ëbi tantiatsiash. Adquid ëbi tantiaquidquo nec.

²⁵ Padnuen ëbi tantiatsëcquid: “Esus tantiasho unës uachitoshe,” quiaish ëbi tantienuo yanec unësash Nuquin Papan cuidaidobëd nidendac. Padnuen chieshtoenuo icquin ëbi tantiaquid Nuquin Papa yacno tabadendac.

²⁶ ¿Nuquin Papa tantienquo yec tabadecta matses bëdambo icpatsiash? Abi bunaidtedi bedquin Nuquin Papa tantienquo yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Pucquid meniashta Nuquin Papa yacno tabadpatsiash? Padenquo. Adotiapimbo iquec. ¿Atoda meniantiapimbo iquec?

²⁷ Ëmbien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bëdamboec tabadquid Nuquin Papabëd tabadmequin Nuquin Papa tantienquo yec icsaquido icsano nidmendambi.

²⁸ Tantia. Chuinu. Utsi-utsiec unësabi icquin ëbi tantiaquido dadpen yansho mimbi isendac —quepondash Esus.

17

Esus bëchamauanqueicsho isaid (Mad 9.2-13; Duc 9.28-36)

¹ Aden chiash 6tedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchi Uan yec quetsëcnc buanash macuësh dapa dectatoash mananënquo tabadtuidpac caondash.

² Tabadtuidshun isquien Esus utsiac bimboec isadpec. Aton dashcutebëdi aton bëtantete ushëbimboec bëchamauanqueic yanac caondash.

³ Esus bëchamauanqueic icnubien dada utsi daëd isadcuenash Esusbëd onquiampac caondash. Abentsëc Moises yampid icnubi utsi Edias Nuquin Papan ambi tantiaid oncamiampid icpac caondash.

⁴ Adsho isashien Petedo: —Mibi adec tabadsho isash bëdambo iquebi. Mibi nëmbobi tabadmenun abentsëc chotsecnuc shubumpi uatsëcnuna, Icbo. Mitsana natsëcquinc Moisesën na natsëcquinc Ediasën na natsëcquinc canuna. ¿Ada bëda icpec? —quenubi

⁵ abu ushu bëchamauanqueic icquidën isadenquo icnuc bëtimpac caondash. Adnubien abu ushu nënantanuëshquo Nuquin Papa onquiampac caondash. —Nëid con Madombo nec. Ëmbi tantiaidquo yec ëmbi bëdamboen isaidquo neque. Nëidquo tantiata —quec dacuëdampamboec onquenubien

⁶ uinte paëdtampamboec dacuëdtanec uebudcuededpac caondash Petedo chedo.

⁷ Adshobien Esusën camishquin: —Dacuëdenda. Nidto —cac

⁸ nidtoquin isquien Esus abentsëqui iquec.

9 Adtanec macuësh budequi Esus; —Mimbi isboed nëbi utsibo chienda. Unës uac ëbi uincuenacsho isun chianta —quepac caondash abëd icquido chiec.

10 Adsho tantiash Petedo chedo: —“Nuquin Papan chomiaidquo nec,” quequin nëbi mibi tantiembi. Mibi adquid icnuc çmitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —queshobien

11 Esusën: —Abimbo chiosh. “Edias yampid bëyuc choshon: ‘Nuquin Papan chomiac bëdambo icquid choeque. Bëdamboec tabadta,’ quequin chiendac,” quequin abimbo chiosh.

12 Adquid Ediasbimboecquid chondash. Choacsho tantienquo icquin matsesën abi bunacpaden unës uapac caondash. Adembidi Nuquin Papan chomiaid icsho ëbitsen chieshënquin unës uaindac —quesho tantiashien:

13 —“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

Madompi dapuedaid podobitsi icsa cuemiaid

(*Mad 9.14-29; Duc 9.37-43*)

14 Bëchamauanquieç ictanec choequi abëd icquido utsibo yacno choquin matses dadpen aido datsidadacsho Esusën istuidpondash. Adec Esus chosho isumbien unës anetsëcquidën papan Esus ismequin danëshën sebudshun chuipondash.

15 —Con mado bëdamboen isquin bëdameta, Icbo. Baded-badedquieç unës anec cuëtën pichiquianec. Adecbidi unës anec acten mentoadtsenaccosh.

16 Mibëd icquidon bëdamete danquin bëuidombi. “Në bëdame,” cac bëdamenuen tanuidosh. Bëdamenquo iccoshe. Mimbimbo bëdameta —caquien

17 Esusën ambo icquidotedi chuipondash. —Ëmbi nadatiambo icquin nabanquin ismiaqui mimbi ëbi tantienquo iquec. Adsho isash chieshtoash cuentiadquo icchitebi. Adtiadquo yequi padenquo iquec nebique. Min mado beccho —cac

18 bësho istanquin Esusën podobitsi icsa chushcapondash. —Padi. Daicsa uainda —cac podobitsi icsa cuenubi madompi bëdampondash.

19 Adsho isun abëd icquidon Esus chuipondash utsibo tantiamenquo icquin. —Ëmbi: “Cuemenu,” cac çatotsi quiash podobitsi icsa cuenenquo icpsh? —caquien:

20 —Nuquin Papa bëdamboen tantiaquin mimbi bëdamboen natsenoc. Mimbi bëdiactsëc tantiatsec. Pete ëshëmpi mostasa caid pistsëcquidi siac nua yec canitsiash. Adecbidi Nuquin Papa tantiatsëcboedi: “Ambi natiapimbo ictequid nibëdec,” quequin abimbo tantiaquidquo yanshun comapen tantiaquidbimboec mibi ictsiac. Adquidën nëid macuëshquiobi cain: “Uquë manëd,” cac manëdtsiash. Aden mimbi: “Ëbi bëdamboen nameta, Papa,” quequin Nuquin Papa chianiac aidëmbi mimbi: “Ëmbi natiapimbo ictequid nec,” caid mibi bëdamboen nametsiash.

21 Nëbi ëmbi cuemeboed abembi cuentiapimbo icquid nec. Nuquin Pa-pauidi tantianuen buna mëmunquin Nuquin Papa chianeshun adquid cuemequid —quequin Esusën chuipondashi.

Abi unëste Esusën chuioid

(*Mad 9.30-32; Duc 9.43-45*)

22 Adanec aton nidaid Cadidia yacnobi capucuenequimbi Esusën abëd icquido chuipondash. —Ëbëd icquid abentsëcshun ëbi chieshënquido ëbi bedmendac.

²³ Bedshun ëbi unës uamendac. Aden unës uamiacsho chococaquini daëdec ushash uincuenendac –quesho tantiatanequien abëd icquido: – Unësquio icnuc chiec –quiash shubiantiadtsëcquio icpondash.

Chuiquid dapa menetequid piucquid Petedon istuidaid

²⁴ Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuequin piucquid bedquidon Petedo chuituidpac caondash. –Nuquin Papa tabadte shubu uashunaid nacnemenuen ¿ada min icbon dos dada uatsaid piucquid shocoshëmpi abentsëc menepatsiash? –cac

²⁵ Petedo: –Ai, menetsiash –quepac caondash. Adanec nidec shubun puduedshobien Esusën ambia Petedo chuipondash. –¿Atotsi mimbi chie, Simon? Aton matsesën na nacnemenuen ¿tsutsi chuiquid dapabon piucquid bedshumpec? ¿Ada aton matses piucquid bedshumpec? Aido bedshunenquio icquin ¿ada ambi bedaido aton yuabo piucquid bedshumpec? –caquien

²⁶ Petedo: –Ma aton yuabo bedshumpaid yoc. Aton matses piucquid bedshunenquio iquec –quesho tantiashien: –Adembidi aton Mado icsho aton shubu nacnemenuen Nuquin Papan ëbi bedshuntiapimbo iquec.

²⁷ Aden tantiaquimbi: “Nëishnushe,” quesshun menenun nanuna. Chianën ansemetan. Taaquïn ansemiaidi ancanshun anisquin 4 dada uatsaid piucquid shocoshëmpi abentsëc mimbi istuidendac. Aid bedshun piucquid bedshumënquido menetanta. “Në con icbon nabëdi con na nec,” quequin menetanta –capondash Esusën. Adoac Petedon Esusën chiacpadomboen menetampac caondash.

18

¿Mitsicquid chuiquid dapa mimbi icmepatsia?

quequin chiaid

(Mad 9.33-37; Duc 9.46-48)

¹ Adshumbic abëd icquidon Esus chuipondash. –Abitedishun Icbo icquin matses mimbi namendac. Ëbi chedo caic ¿mitsicquid mibëdtan chuiquid dapa mimbi icmepatsia? –quesho

² tantiashun abi tabadacno nënantanquio bacuë tsaduntsëcshun Esusën chuipondash.

³ –Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuën amën chiacpadomboen nachimboen ëbi tantiaquiota. Adash ambi namiaid yanash Nuquin Papa yacno mibi puduedendac.

⁴ Aden ëmbi chiacpadomboen naquidquio icsho mibi Nuquin Papan: “Bëdambohë iquec,” caindac.

⁵ Nadquid bacuëbëdta ëbi tantiabentsëcquid bëdamboen tantiaquidën ëbitsen bëdamboen tantiendac –quepondash Esus.

Tantiabentsëcquido icsamete chiaid

(Mad 9.42-48; Duc 17.1-2)

⁶ Adshumbic padpiden chiec: –Ëbi tantiabentsëcquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unësacsho isun: “Bëdambo iquec,” catsiambi. “Cuënote yuëmboshë icquid tēdectanshun acte nënepatecnëdan,” caimbi icsamiant bunquidquio.

⁷ Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

⁸ Aden Nuquin Papan cuidte chuisho tantiequi icsainda. Mëdanten naic mibi icsaic. Mëteshuniac bedtiapimbo yacimboc icsainquo yec ënëdta. Taën capuec mibi icsaic. Tateshuniac caputiapimbo yacimboc icsainquo yec ënëdta. Ënëdenquo icsho Nuquin Papan mibi cuidendac.

⁹ Adecbidi ëshën isec mibi icsate bunquiec. Ëshë chicshuniacimboc icsainquo yec ënëdacsho: “Bëdambo iquec,” catsiambi. Ënëdenquo icsho Nuquin Papan chian anëdenquiacno nësecaindac —quequin Esusën chuipondash.

*Matses ëbi tantiamete Nuquin Papa bunaid
(Duc 15.3-7)*

¹⁰ Adashic padpidec: —Nadquid bacuëmpin ëbi tantiatsëcsho isun: “¿Adtsëcquidëmpinquiobida bëdamboen tantiapec?” cainda. Nuquin Papan abi yacnoshon uaid mayan bëda aid bacuëbo dayun uaquid icquin Nuquin Papa yacno puduedshun mimbi mamënsumboed Nuquin Papa chuinushe. Adtsëcquidëmpi mamënsunenda. Ëbi tantiabentsëcquido con Pan tantiaqueque.

¹¹ Ëmbitsen aido tantiemi. “Bënuaid istuidacimboen ëbi tantienquo icquidobi ëbi tantiaquido icmenu,” quiash matsesondabi —quepondash Esus.

¹² Adashic padpidec: —¿Mitsipadquo nuquin matses icpec? Nëish yua obeca dadpen 100ted dayun uaquidën aton yua tambanac abentsëc nibëdsho istanquin utsitedi nianshon aid abentsëc nibënbenequin istuidquid.

¹³ Aden istuidash comapenec cuishonqueuid: “Con yua nibëdantsenquiac,” quiash. Aton yua utsi yacno bëash abi icboctedi icsho isash bëdambo icquid. Ádecbidi matsesën ëbi tantiabensho isash Nuquin Papabëd cuishonquebi bënëdaid istuidacimboc.

¹⁴ Icsaido cuidacno matses nidmete Nuquin Papa bunenquo iquec. Matses bëdamboen isquin abëd tabadmete Nuquin Papa bunquiec —quepondash Esus.

*Chieshënuquidobëdi onquete chiaid
(Duc 17.3)*

¹⁵ Adashic padpidec: —¿Ada ëbi tantiaquid utsin mibi icsa uaosh? “Ai, icsa uaoshi. Chieshëmiantiadquo icchitosh,” qeshun nadoac bëdambo ictsiash. Aid abentsëqui chuiquin aidbëd bëdamboec onquequin: “Ëbi icsa uaquin Nuquin Papan chiaid mimbi niac-niacoc. Adece icsainquo yec ënëdta,” mimbi cac: “Ai, adebi,” quiash mibëdi bëdamboec tabadtsiash Nuquin Papa tantiesabimboc icuidboedi.

¹⁶ Mimbi: “Icsainquo yec ënëdta,” caqui: “Padi. Adequi icsaibi,” qesho tantiasun ëbi tantiaquid utsi beduanshun aidbëdta chuitanta. “Nuquin Papan chiaid niac-niacsho isun daëdshun chiaid abimbo chiaid nec,” quequin chiaid tantiaquin adota.

¹⁷ Mimbi buanaidëntsen: “Adec icsainda,” caqui: “Adequi icsaibi,” qesho tantiatanec choashun mibëdta ëbi tantiec iccuëdedquido chuiquido chuitidta. “Mimbitsen chuitanta,” cac aidontsen chiaqui tantienquo icsho isun: “Nuquin Papan chiaid niac-niacquid yec Esus tantiesabimbocquid nec,” qeshun ëbi tantiaquido cuëdënacno chomenda.

¹⁸ Aden mimbi: “Esus tantiesabimbocquid neque. Cuëdënacno chome-nquo ictiad,” casho Nuquin Papan: “Bëdamboen naic,” mibi catsiash. Adembidi mimbi: “Adec icsaboedi icsainquo yec ënëdsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

19 Padpiden chuinu. Tantia. Mimbi: “Nuquin Papa chuinuna,” cac: “Ai, adonona,” qesho tantiashun aidbēdan mimbi Nuquin Papa chianiac mimbi chiacpadomboen Nuquin Papan natsiash.

20 Ēbi tantiec daēd tabadnuc aidbēd con Mayan yec ēbēd yacbimboec tantientadac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

Yuan bēdamboen istiapimbo yaid

21 Adec: —Icsa uanec chieshtomiantiadquio iquec —Esus qesho tantiashumbien Petedon Esus chuipondash. —¿Icsa uanec chieshtomianquid tedentsimbi chieshenquio icquin bēdamboen ispe? Chieshēnquin padpiden icsa uac ¿padpidendambi bēdamboen isoape? ¿Médante utsiuc daēd tauadoquin sietetedembi nashun padpiden bēdamboen isenquio icquin ēnacta bēdambo icpatsiash? —caquien

22 Esusēn: —“Médante utsiuc daēd tauadoec sietetedi” quequin daēdpactsēcquio mimbi chuipec. 70 por 7 caid ¿tedtsi icpec? Aideden 490tedembi ēnenquio icquin bēdamboen isoadoniac bēdambo ictsias — quepondash Esus.

23 Adashic abi onquec: —Nuquin Papan chiacpadomboen matses bēdamboen iste mibi chuinu. Tantia. Tsusion yuabo dadpen icpac caondash. “Ma bēnu,” quequin ambi meniactedi piucquid bednuen aton yuabo aton shubuno chomepac caondash.

24 Abia chomiaidēn piucquid dadpenquioshē bedshun aton icbo meni-ambo icpac caondash.

25 Adsho icbon: “Mimbi bedactedi beccho,” cac: “Nibēdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuēbobēdtabi cuēsh-cuēshēdmeshun aidtedi piucquid bednu. Mibi icsambo iqueque,” cac

26 yua abi yuaquid ismequin danēshēn sebudash: “Padi. Ēbi yuamenuen cuēsh-cuēshēdmenda. Chiata. Yuecshun aidtedi bedshun mibi menenun nanu,” capac caondash.

27 Adoquien icbon bēdamboen isquin: “Padi. Ēbi menenda. Mibi utsibo yuamenuo iquembique. Dacuēdenda. Nidec nid,” quequin icbon aton yua bēdamboen nidmepac caondash.

28 Adoac nidquimbien aid yuan icbon bēdamboen isboedēn ambi: “Ma bēnu,” quequin piucquid daēdpactsēc meniaid yua utsi istuidpac caondash. Istuidshumbic bedtanquin tēdēdinquin: “Mimbi bedactedi piucquid beccho. Unēs uachitomane,” caquien

29 aidtsen ambi piucquid bedshunonaid ismenuen danēshēn sebudtsec: “Chiata. Ēbi unēs uinda. Yuecshun bedshun mibi menenun nanu. Chiata,” quepac caondash yua utsi.

30 Adsho tantiashun icbon bēdamboen isboedēmbi chieshēnquin: “Padi. Mibi cuidmembī,” qeshun quēnēn nauedmiac caondash. “Piucquid aidtedi abi menianenquio yacpadequi ma quēnēnuēsh mēyadbudchitono,” qeshun nauedmiac caondash.

31 Aden chieshēnquin quēnēn nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bēdamboen isboedēmbi min yua utsi quēnēn nauedmiac: ‘Piucquid menianenquio iquec,’ qeshun,” quequin icbo chuiac caondash.

32 Adsho tantiashun icbon ambi cuidenquio icquin bēdamboen isboed chomeshun chushcapac caondash. “Icsambo icquidquio mibi nec. ‘Chiata.

Mibi menenun nanu,' mibi qesho: 'Padi. Ĕbi menenda,' quequin mibi bēdamboen isombi.

³³ ĔĔmbi mibi adobocpadomboen utsi bēdamboen istiapimboda icco? 'Ma bēnu,' qeshun mimbi meniactedi bēabi icsho bēdamboen isec mibitsen bēdambo ictsenac. Mibi yacpadec nēishun mibi cuidembi," quepac caondash icbo.

³⁴ Adshun quēnēn nauedmepac caondash. "Ambi bedactedi piucquid dadpenquo meniash ma puduempānu," qeshun quēnēn nauedmiac caondash.

³⁵ Aden matses yuan icbon nacpadomboen Nuquin Papan naindac. Utsibon chieshēnaqui chieshēnansho Nuquin Papan mibi bēdamboen istiapimbo iqueque. Chieshēnanenda. Mibi chieshēnquidobi bēdamboen ista — quepondash Esus.

19

Chidobēd cuēshēdte Esusēn chiaid (Mad 10.1-12; Duc 16.18)

¹ Adanec nidaid cuēshē Cadidia caid yacnuēsh puduanec nidec nidaid cuēshē utsi Udeya caidēn nidquin acte Odan caid potebidanec Esus nidpondash.

² Adec nidshobien matses dadpenshun tsibanampondash. Abi tsibanansho isun nidtuidshun daicsaidtedi Esusēn bēdamepondash.

³ Adnubien tsusedpabon chiampid namequido padiseyobon chieshēnquin: —Nuquin Papan chiaid niacmenu —quequin Esus chuituidpondash. —ĔAtotsi mimbi chuipe? Dada uashun aton chidobi nidmete Ĕmitsipaden mimbi chuipe? En chui. Tiantanu —capondash.

⁴ Adoquien Esus: —ĔNuquin Papan chiaid isamboda ictio? "Nuquin Papan dadaba uashun aton chido uapampic," quequin dada uaid ma mimbi ispaboc.

⁵ Adembidi: "Dadan canite chido uaid icsho dadan aton chido bedquid. Amē chedobēd icboedi aton chido bedash aid nianenquo yec aibdēd tantiananquiec dada aton chidobēd abentsēc yacimboec tabadquid," quequin dada uaid ma mimbi ispaboc.

⁶ Aden Nuquin Papan tantiacpadomboen aton chido nianenquo yec aibdēdi tantiananquiec abentsēc yacimboec tabadac bēdambo ictsiash. Padnuen aton chido nianec aibdēdi cuēshēdquin Nuquin Papan chiaid niactsiash. Adechidi chido aton bēnē nianec icsaquid —Esus qesho

⁷ tantiashumbien abi chieshēnquidon: —ĔAbimboda mimbi capadi? Nuquin Papan chiaid dada uaquin Ĕatotsieshun Moisesēn naden chuiampic? "Aton chido bunenquo yanshun dadan naden dada uashun menequid. 'Mibi intiapimbo yanobi,' quequin dada uashun aton chidobi menequin nidmequid," quequin Moisesēn dada uapampid ma icpayoc —quequin chuipondash Esus chieshēnquidon.

⁸ Adsho tantiashun Esusēn chuipondash. —Ai, Nuquin Papan chiapadec aton chidobēd bēdamboec tabadiapimbo icsho isun Nuquin Papan Moises aden dada uamepampic. Tauamboen matses uaquin Nuquin Papan aden chiamo icpampic.

⁹ Tantia. Mibi chuinu. Aton chidobēd cuēshēdshun chido utsi bedquin Nuquin Papan chiaid niactsiash. Padnuen aton chidon bēnēpenquo chudmesho istuidash aibdēd cuēshēdquin Nuquin Papan chiaid niaquenquo ictsiash —quepondash Esus.

¹⁰ Adnubien abēd icquidon: —Adotiapimbo icte mimbi chuipec. Aton chidobēd cuēshēdenquo icte mimbi chuisho tantiashun: "Aton chido bēdambo dada bēdambo ictsiash," caimbi —quepondash abēd icquido.

11 Adsho tantiash Esus: —Ai, utsi-utsiec pabiate shëcuë nibëdacobimboen ëmbi chiaid tantiatiapimbo iquec. Utsiboen aton chido bedash Nuquin Papan chiacpadec bëdamboec tabadquid nec.

12 Utsibic mimbi chiacpadquid chido bedesa iquec. Nëidtedi chido bedesa iquec. Nëidic aton padibi impadishtsaid. Nëidic matsesën inicsa uaid. Nëidic: “Nuquin Papan yuambo icquin aidën chiacpadomboenuidi naquin chido bedtiapimbo iquebi,” queshun chido bedesa. Adquidtedi chido bedesa nec. Ëmbi chuiboed tantiashun ëmbi chiacpadomboen nac bëdambo ictsiash — quepondash Esus.

*Esusën bacuëbo chiaid
(Mad 10.13-16; Duc 18.15-17)*

13 Adnubien Esus ismenuen bacuëbo bë-bëpondash. —Mamishquin ma Nuquin Papa Esusën chuinu —quequin bë-bësho isumbimbi: —Padi. Bëenda —cauidpondac.

14 Adshobini Esusën: —Chën. Ma bënu. Cuemenda. Bacuëbimboecquid Nuquin Papa yacno puduedtequid nec. Amën chuisho tantiash bacuë badedi: “Abimbo caic,” quiacbimboen ëbi tantiaquid Nuquin Papa yacno puduedtequid nec. Bacuëbo bëdambo iqueque. Beccho —cac bë-bëpondash.

15 Adshobien mamishbanquin Nuquin Papa chuipondash. Adobidanec nidondash Esus.

*Cania aton na dadpenquio dayun uaquid Esusbëd onquiaid
(Mad 10.17-31; Duc 18.18-30)*

16 Adnubien dada caniampinquio Esus chuituidpondash. —Mibi bëdambo iquec. Bëdamboen chuiquidquio mibi neque. Ëbi chui. Padpidec unëstiapimbo icquid icmenun bëdambo icquid Nuquin Papan abi yacno puduedmetsiash. ¿Atotsi nasho Nuquin Papan ëbi bëdambo capatsiash? —caquien

17 Esusën: —¿Mitsipadquid bëdambo icquid cai? Nuquin Papauidtsëqui bëdambo icquid nec. Aidbëd tabadnuen ambi Moises dada uamiampictedi nata —capondash.

18 Adoquien cania: —Nuquin Papan chiaid ¿mitsipadquid cai? —quesho tantiashumbien: —Naden chiaid caimbi. “Cuesunenda. Min chidopenquio chudenda. Min bënëpenquio chudmenda. Ampenda. Muainda.

19 Titabëdta papa chieshënenquio icquin bëdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi —capondash Esusën.

20 Adsho tantiash cania: —Aidtedi niaquenquio icquin nabanquidquio nebi. Bacuëctësëc icquimbi tauaondambi. “Nuquin Papabëd tabadnuen ¿atotsimbi utsi nape?” caimbi —quepondash.

21 Adsho tantiashumbien Esusën: —Nuquin Papan chiaid niaquesambo ictiadquid icquin mimbi dayun uaidtedi uesquin menequin piucquid bedta. Piucquid bedshun piucquid nibëdquido min piucquid uesquin menebanta. Adsho abëd tabadmenun Nuquin Papan mibi bëdamboen istsiashe. Adota. Adotanequic ëbëd iquec cho —caquien

22 cania: —Con na dadpenquio icsho uesquin menetiapimbo iquebi —quiash shubiantiadtsëcquio ictanec nidpondash Esusën chiacpadomboen natiapimbo yec.

23 Adsho isun Esusën abëd icquido chuipondash. —Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidtsëqui tantiec.

²⁴ ¿Ada nëishamën pinchuc chichte ancumpadic? Padenquio. Adecbidi aton na dadpenquio dayun uaquidën aton nauidtsëqui tantiaquin ëmbi chiacpadomboen natiapimbo yec Nuquin Papa yacno tabadtiapimbo iquendac — quequin Esusën chuipondash.

²⁵ Adec: —¿Ada nëishamën pinchuc chichte ancumpadic? —quesho tantiashien abëd icquido nadpondash. —¿Tsudain Nuquin Papa yacno puduedtequid icchitotsiash? Nibëdchitequien iquec —quesho tantiashumbien

²⁶ Esusën abëd icquido bëisquin naden chuipondash. —Matses namiatiapimbo icnu Nuquin Papain namianquidquio nec. Ambi natiapimbo ictequid nibëdec —quepondash.

²⁷ Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibëd icnuec chopondabi. ¿Mitsimbo tabadtequidini nepe? ¿Atotsimbi nape? —caquien

²⁸ Esusën: —Tantia. Mibi chuinu. Nuquin Papan ambi uaid abitedi chuca uabocnoëshquio ëbëdtan chuiquid mibifedi iquendac ëmbi abitedi namiacnuëshquio. Èbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidedi 12tedshun tsyuecquidon shubu 12tedi shubun-shubunquieç chuiquid dapabo mibitedi iquendac.

²⁹ Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadac bimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquio icnu.

³⁰ Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquio iquendac. Utsibic nëuëshquio chuiquidpenquio icboedi Nuquin Papa yacnoshon: “Bëdambo icquid nec,” quequin chuiquid dapa icmendac —quepondash Esus.

20

Chonoadquido chiaid

¹ Adshumbic abëd icquido Esusën ompoachimboen chuipondash. —Tantia. Èbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash.

² Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash.

³ Ushë abucquio yanubi tied icbon pete meniacno nidshun utsibo nainquio yec samëdsho istuidpac caondash.

⁴ Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac

⁵ tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen.

⁶ Inchëshbudtsëqui nidoaquin utsibo nainquio yec samëdsho istuidoashun: “¿Atotsi quiash samëduidequi ique?” cac

⁷ samëdquido: “Chonoa uanquid nibëdosh,” quesho tantiashun tied icbon: “Mimbitsen con tied neshcaic cho. Mibi menenu,” cac tied neshcaic nida-neopac caondash inchëshbudtsëqui neshcaquin tauaic.

⁸ Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushë budambi choboedotsen meneta. Adoshombic ushë cuembo icnuc choboedotsen. Adoshombic ushë abuctoan choboedotsen. Adoshombic badiadnubi abia choboedo ënquimbi meneta,” cac menequin tauapac caondash.

⁹ Inchëshbudtsëqui chonoadec choboedoba menequin badiadnuc chonoadec taëboed tied icbon: “Menenu,” cactedquio piucquid menepac caondash.

¹⁰ Adosho isashien badiadnubi choboedo: “Aido aden meneshun nuqui chonoadquiboed yuapambo nuqui menec,” queshobi aidtedtsëcbidi piucquid menepac caondash.

¹¹ Aidtedtsëcbidi meniaquien tied icbo chushcapac caondash.

¹² “Tsyuec chonoadboed meniactedtsëcbidi menioshi. Icsambo iquec. Inchëshbudtsëqui chotsash daëdpactsëc chonoadtsëcquid meniactedtsëc yuec chonoadquid piucquid meniac icsambo iquec. Chun mëyadec yuecquio chonoadobi. Aidtedtsëc menianec mibi chieshanquieic iquec. Ëbi dadpen meniac bëdambo ictsiash,” quequin chushcapac caondash.

¹³ Adoaquien tied icbon: “¿Chieshanquieictabi ique? Ëmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidtedquio menepaboc.

¹⁴ Mimbi bedboed buanec nid. Ëbi bunacpaden tsyuec choash chonoadquid mibi meniactedquioibi meniombi. ¿Icsamboda iquec?

¹⁵ ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi ëbi nëishëmpe? Aden nëishënac ¿ada bëdambo iquec?” quequin tied icbon chuipac caondash –quequin ompoacimboen chuipondash Esusën.

¹⁶ Adashic: –Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquio icmendac –quequin chuipondash Esusën.

Abi unëste Esusën padpiden chuoiaid

(Mad 10.32-34; Duc 18.31-34)

¹⁷ Adanec: –Edusaden yacno nidnu. Nid –quianec Esus nidpondash. Adec nidquimbi utsibo tantiamenquio icquin abëd icquido 12tedi icquid chuinuen uanotantsëcquin buampondashi.

¹⁸ Buanshun chuipondashi naden: –Edusaden yacno nidacsho Nuquin Papan matsesmiad icsho ëbi chieshënquido ëbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidon ëbi bedshun: “Ma unës uamenu,” queshun

¹⁹ matses utsibo isadaidpembo ëbi bedmendac. Aden bedmiac matses utsibon mamënsnunquin ëbi cueshcaten comapenen cueshcaindac. Adshombic ëbi unës uanuen cuesten dectanendac. Aden unës uaqui daëdec ushash uicuenendabi –quequin Esusën abi unës uate padpiden chuoiaipondashi.

Uanën titan chiaid

(Mad 10.35-45)

²⁰ Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. –Ëmbi chiacpadomboen ëbi nashunta, Icbo –caquien:

²¹ –¿Atotsi cai? –capondash Esusën. Adoaquien: –Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmata. Ipioc utsi tsadunquin abiuc utsi tsadunta –caquien Esusën:

22 –Ĕmbi naid tantienquo icquin mimbi chuipec –quequin ani chuishumbic Uanbēda Acobo Esusēn chuipondash. –¿Ada ēbi mēyadacpadquiecbidi mēyadtsia? ¿Ada chieshtoenquo icpatsia? –caquien Uan: –Ai, chieshtoenquo ictsiabi. Mibēd mēyadtsiabi –quepondash.

23 Adsho tantiashien: –Ai, ēbi tantiaquid yec mibi mēyadendac. Padnuembi ēbēdan chuiquid dapa icmequin mibi ēbi datsadmetiapimbo iquec. Nuquin Papambien ambi tantiacpadomboen ēbēdan chuiquid dapa icmendac –quequin Esusēn chuipondash.

24 Adnubimbi: –Chuiquid dapa ēbi icme –Esus casho tantiashun Uan chedo nēishēmpondac.

25 Adsho Esusēn ēbitedi chuipondash. –¿Mitsipadquid matses utsibo isadaid-pembo chuiquid dapa icpec? Abi chuiquid dapan baded-badedquien ancabudac dacuēdquin aton yuabon badedi naic.

26 Ĕbi tantiaquido icquin mimbi adoēnquo iquendac. “Bēdambo mibi iquec,” Nuquin Papa cametiadquo icquin utsibo tantiaquin mimbi utsibo nashuntsiac.

27 Bēdambo icquid ictiadquo icquin yuan aton icbo nashunacimboen mimbi utsibo nashuntsiac.

28 Adembidi Nuquin Papan matsesmiaid icquin matses nashunquid nebi. Ancainquo icquin matses tantiaquin Nuquin Papa icsaquidobi cuidmenquo icnuec ēbided cuidadec unēsendabi –quequin Esusēn abēd icquido chuipondash.

*Bēshuaid daēd Esusēn bēdamiaid
(Mad 10.46-52; Duc 18.35-43)*

29 Adashic yuecquo ictanec shubu dadpen icquid Edico caid yacno tabadash auēshquiobi Esus nidpondash. Adsho isanec nidquin matses dadpeshun Esus tsibanampondash.

30 Adnubien aid podqued cuēman bēshuaid dada daēd tsadpondash. –Esus cuenec –quesho tantiashien aid daēdi comapenec cuēdpondash. –Tsusedpa Dabidēn tsyuecquid Nuquin Papan namiaidquo icquin ēbi bēdamboen ista, Icbo –quepondash Esus caic.

31 Adsho tantiashun matses dadpeshun chushcapondash. –Padi. Chēn. Adec cuēdec chieshanquiec mibi iqueque –caquien abi niacbidanec buēdanquiec cuēdpondash. –Tsusedpa Dabidēn tsyuecquid Nuquin Papan namiaidquo icquin ēbi bēdamboen ista, Icbo –queopondash.

32 Adoquien Esusēn nidtuidshun ēcbēdpondash. –¿Atotsi chuinuec ne? –caquien:

33 –Isbente bunquiebi, Icbo –quepondash.

34 Adsho tantiash: –Unēsquo iquec –quetanquin Esusēn bēshuaid daēdi bēmishpondash. Adoac abi daēdi bēdampondash. Bēdانشun aidēntsen Esus tsibanampondash bēshuacboedēmbi.

Edusaden yacnoshon chuiquid dapabimboecruc Esus bēdamboen isaid

21

*Edusaden yacnoshon chuiquid dapabimboecruc Esus bēdamboen isaid
(Mad 11.1-11; Duc 19.28-40; Uan 12.12-19)*

¹ Adanec nidequi shubu dadpen icquid Edusaden caid anoentsēqui macuēsh dapa Odibos caid puctse shubu daēdpactsēcquid Bedpaque caid yacno Esus nidpondash. Adshumbic anoentsēqui choshon abēd icquido daēd chuipondash.

2—Nëid podquedën nidquin shubu daëdpactsëc yacno nidshun cabayobitsecquid aton bacuë caniatsebëdta mimbi badedquio istuidendac. Istuidshun tènëshaid tëdiadsho tëchicta.

3 Mimbi tëchicsho isquidën: —¿Atotsi acnun nai? —cac: —Nuquin Icho: “Bedtan, quiosh,” mimbi cac: “Ai, buantan,” quendac —quequin Esusën chuipondash.

4 Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

5 “Shubu dadpen icquid Sion caidën tabadquido chui. Edusaden cain Sion capec.

‘Is. Mibi chuiquid dapa cabayobitsecquidën bacuë caniatsebëc catsadtoash choeque. Ancanenquio yec bëdamboshë icquidquio neque. Is,’ quequin chui.”

quequin dada uapampic.

6 Aden dada uampicpadomboen ambi: —Bedtan —caidon bedtampondash.

7 Adotanquin cabayobitsecquid anibëdta caniatsebëc bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatsebëquën Esus catsadtopondash.

8 Adanec nidsho istanquin matses dadpenshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiequid tetanequin podqued ansambampondash: —Chuiquid dapa Esus nec —qeshun.

9 Matses dadpen bëyuc nidnubi aitedebidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec.

Nuquin Papan chomiaid yec mibi bëdamboshë iquec.

Mibi chomequid Nuquin Papatsen bëdamboshë iquec. Adeduya,”

quec cuëdëncuededpondash.

10 Adec Edusaden yacno matses dadpenquio cuëdënidëc nidsho isashien Edusaden yacnocquido: —¿Tsutsi tantiec cuëdëncuededpec? —quepondash.

11 Adsho tantishun Esusbëd nidquido: —Esusquio tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquio chuiquid Esus tantiec nec —quepondash.

Esusën chushcaquin cuemiaid

(Mad 11.15-19; Duc 19.45-48; Uan 2.13-22)

12 Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquio puduedenquio yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bëdamboen isnu,” qeshun pichicametsiash —quequin aton nëish yua menequin piucquid dadpenquio bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin.

13 —¿Adenda mimbi Nuquin Papan chiaid bëdamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,”

quequin Nuquin Papan chiacpadomboen aton shubun puduedshun aid chianetiadquidi mimbi adoenuo iquec. Mitsana bedteuidi bunec ampec tabadte shubu mimbi icmiaye. Cuen –quequin cuemepondash.

¹⁴ Adnubien Nuquin Papa tabadte shubu uashunaid yacno bëshuaid yec daicsaid yec quenuc bê-bêpondash. Aden bê-bëshobien Esusên bêdamepondash.

¹⁵ Adsho isashien Esus chieshênquido nëshpondash. Adec nësh yua abided unës uaquido chuiquid dapabobêd Moisesên dada uampid chuibanquido nëshpondash. Adec comapenen tantiaquin Esusên nabansho isash nëshboedi bacuêbotsen: –Nuquin tsusedpa Dabidên tsyuecquid Nuquin Papan nami-aid yec mibi bêdamboshê iquec –quec Esus caic cuêdêncuededsho tantiasn nëshquiopondash.

¹⁶ Adshumbic: –Icsambo iquec –qeshun Esus chuituidec: –¿Ada bacuêbo cuêdênsho tantio? –caquien: –Ai, tantiombi. ¿Nuquin Papan chiaid isabida ictio? Naden bacuêbo cuêdênte chuipampic.

“Nuquin Papan oncamiac bacuêmpin aton bacuê utsibêdtan:

‘Nuquin Papa bêdambo iquec,’ caindac.”

quequin chuipampic –quepondash Esus.

¹⁷ Adanec nidec shubu dadpen icquid Betania yacno nidash ushtuidpon-dash.

Esusên cuête unës uaid

(Mad 11.12-14, 20-26)

¹⁸ Badiadnubi ênden aubidi nidoaic Edusaden yacnobidi nidoapondash. Piabi nidec bundoshon

¹⁹ podqued cuêman nidquid cuêtempic icueda caid istuidash: –¿Ada bacuêaye? Chenun isbono –quepondash Esus. Adshun isquien bacuê nibêdec. Podoudiquio icpec. Adsho isumbien Esusên: –Adequi bacuêesambo yec unêsta –capondash. Adoac badedquo unêspondash.

²⁰ Adosho isun abêd icquidon: –¿Atotsi quiasn badedquo unêsposh? –caquien

²¹ Esusên: –Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenuo icquin: “Nuquin Papan ambi chiacpadomboen naquidquo nec,” qeshun mimbi Nuquin Papa chianesho aidêmbi mimbi: “Natiapimbo iquec,” caidi mibi nametsiasn. Aden tantiaquin mimbi nêid macuêsh cain: “Mananuc tabadboedi adquiecbidi acte nantan tabadoata,” mimbi cac nêid macuêsh acte nantan tabadoatsiasn.

²² “Ambi chiacpadomboen naquidquo Nuquin Papa nec,” qeshun mimbi aid chianiac mimbi chiaid Nuquin Papan mibi nashuntsiasn –quequin Esusên abêd icquido chuipondash.

¿Tsuntsin: Naic nid, cac nai? quequin Esus chuimiai

(Mad 11.27-33; Duc 20.1-8)

²³ Adcuidanec Edusaden yacno padpidec nidshun Nuquin Papa tabadte shubu uashunaid daquênê uaidên puduedshun Esusên Nuquin Papan chiaid chuipondash. Adsho tantiasn con matses tsusiobon Esus chieshênquidon chuituidpon-dash. –¿Tsuntsin: “Naic nid,” cac nai? En chui. Tantanu –caquien

²⁴ Esusên: –En mimbia chui. Êmbia tantianu. Mimbi chuisho tantiasn unëbi namequidtsen chuinu.

²⁵ ¿Tsuntsin namiac Uan padon acten mentopadene? ¿Ambembida napadene? –capondash Esusên. Adoquien badedquo chienquo yec uan-otantsec tabadec onquecuededpon-dash Esus chieshênquido. –¿Atotsi nuqui chuipeba? “Nuquin Papan namiaidquido Uan pado nepadene,” cac Esusên:

“¿Atotsieshun aidën chiacpadomboen nainquio ique?” canushe. Aden chienquien ictiad.

²⁶ Nuqui: “Ambembi napondash,” quesho tantiashun nēmbō icquidon nēishēnushe: “Nuquin Papan namiaid Uan pado niondash,” queshun. Aden chienquien ictiad —quepac caondash Esus chieshēnquido. Isadaidbo tsusiobobēdi nēish abided unēs uaquido chuiquid dapabo adpac caondash.

²⁷ Adashien Esus padpiden chuioaic: —Tsauid. ¿Tсандан chiaquien natchitondash? —queshobien: —Mimbi chienquio icsho tantiashun ēmbitsen ēbi namequid chienquio iquembi —capondash Esusēn abi chieshēnquido cuidquin chuiquin.

Mado daēdshun nacbimboecquido chiaid

²⁸ Adshumbic Esusēn padpiden chuipondash. —Tantia. Mibi chuinu. Ēmbi chiaid tantiashun ¿mitsicquid: “Bēdambo iquec,” catsia? Dada aton mado daēdpambo icquid icpac caondash. Abentsēc chuiquin: “Neshcaic nid, mado,” cac:

²⁹ “Padi,” quec chieshuidboedi yuec-yuecpactsēctanec: “Tiedimbi neshcatanchitec,” quiaish neshcaic nidac caondash.

³⁰ Adshumbic amēn aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash.

³¹ ¿Mitsicquidēn aton papan chiacpadomboen napac caondash? En chui. Tantianu —caquien Esus chieshēnquido: —Abia chiac chieshuidboedēn —quesho tantiashumbien Esusēn: —Adquidpenquien mibi nec. Mibi tantia-tiapimbo yec tabadnubi mimbi icsambo caido Nuquin Papa yacno puduedendac. Chieshuidac bimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabēnash abēd tabadtequido yanendac. Mibien padenquio iquec.

³² Uan pado acten mentoandenedēn Nuquin Papan chiaid chuiquin bēdamboec tabadte chuipadenec. Adsho mimbi tantiēnquio icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ēntiadquidi mimbi ēnenquio iccondac. Aton papan chiaid niacquid bimboecquid mibi nec —quepondash Esus abi chieshēnquido chiec.

Abi chieshēnquido icsaid Esusēn chuioaic

(Mad 12.1-12; Duc 20.9-19)

³³ Adshumbic Esusēn abi chieshēnquido ompoacbimboen chuipondash naden. —Tied icbon chetequid nidtsinac caondash. Adoshombic aid tied daquēnē uatanquimbic chetequid chintetsen nacnempac caondash. Adoshombic: “Ampequid chosho isnu,” queshun shubu abucquio icnuc shubu uapac caondash. Adoshombic: “Nēid tiedēn caniquid chetequid iquec. Aid chequin ēbi neshcashunta,” utsibo canec ēnapen nidpac caondash.

³⁴ Adash yuectaneshumbien abēd nidondaido aton yuabo chuiquin: “Nēen chetequid sinashe. Bedtan,” cac aton yuabo nidanepac caondash.

³⁵ Adec aton icbon tiedno nidaniacshobien neshcaquidon cudasēnquin chieshēmpac caondash. Abentsēc cuesunetanquin utsi cuēnoten seshunequiopac caondash. Utsibic cuesquin cuemepac caondash.

³⁶ Aden cuemiaid choshon chuituidaquien icbon nidboedtedpenquio dadpenquio aton yua utsibo chuipac caondash. “Bedtan,” cac nidanec tiedno choacsho isun adembi cuesun siapac caondash.

³⁷ Adoacsho tantiash aton madombo caic: “Bedtan,” quepac caondash. “Con mado cuesunenquio icquin ēmbi chetequid menetsiash,” queshun aton madotsen nidmepac caondash

³⁸ Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiashe,” queshun ³⁹ tied tsitsuno buanshun cuesunepac caondash –quequin Esusën chuipondash.

⁴⁰ Adshumbic ambi chuiboedquio abi datsidadquido chuimenuen chuipondash. –Ëmbi chuiboed tantiash ¿atotsi mibi quepatsia? “Min mado cuesuniacosh,” cac ¿atotsi tied icbon napatsiash? –quesho

⁴¹ tantiash datsidadquido: –Aido icsamboshë icsho comapenen cuidtsiash. Adshumbic ambi chetequid sinacsho abi cudasënesambo utsibo aton tied neshcametsiash –quecuededpondash datsidadquido.

⁴² Adsho tantiashun Esusën: –Ai, abimbo caic. Adembidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bëdambo icquid istuidashi: ‘Nëidquio shubu uanun nitsinembi,’ quetiadquidi isuidacimboen Nuquin Papan namiaid chieshënac. Aden buintad isuidaid utsin bedshun shubu uanun nitsinacimboen Nuquin Papan tantiamicpadomboen utsibon ambi namiaid tantiosh.

Adsho isun: ‘Nuquin Papan namiaid bëdambo iquec,’ caimbi,” quequin dada uapampic.

⁴³ Aden ambi namiaid ëbi chieshënsho isash mibi caic Nuquin Papa nadpec. “Ëmbi con matses caid isadaidbo ëbi bëdamboen tantiametiadquidi chuiquid dapabon namenquio icsho isun utsibotsen: ‘Ëbi chuiquid icta,’ caindambi,” quepec Nuquin Papa. Aden ambi chiacpadquidën bëdamboen chuibanac abi tantiaquido dadpen yanendac.

⁴⁴ Mibien Nuquin Papan cuidtequido nec. Cuëte uebudquin catashac canite uesadec podquëd-podquëdacimboecnuc mibi comapenen cuidendac –quepondash Esus abi chieshënquido chiec.

⁴⁵ Adsho tantiashun padiseyobobëdtan nëish abided unës uaquido chuiquid dapabon: –Nuquien cachitec –quequin tantiabempanëdash.

⁴⁶ Adshumbic Esus cuesunemenuen bedtiadquio icquimbi bedenquio icpanëdash. –Abi datsidadquidon: “Nuquin Papan chiaid chuibanquidquio Esus nec,” queshun Esus bedsho isun nuqui cuesnushe –queshun aton matses dacuëdënquoin bedenquio icpanëdash.

22

Cacuidanaid chiaid (Duc 14.15-24)

¹ Adshumbic Esusën padpiden ompoacimboembidi chuipondash naden. ² –Tantia. Isadaidbon nacpadomboen aton mado chido bednuesho tantiashun amën matses dadpen: “Pec cho,” cauidaid mibi chuinu.

³ Chuiquid dapan aton yuabo chuiquin: “‘Con icbon madon chido bedeqe. Aidbëd cuihonquenuen pec cho,’ quequin ëmbi tantiaidotedi chuitan,” cac yuabon chuitanaqui choenquio icpac caondash.

⁴ Adsho isumbien chuiquid dapan aton yua utsibo chuiquin: “Nëish nua bëchichoquidquido dadpen codoquiaccoshe. Padpiden chuitan,” cac chuitanaoqui

⁵ choenquibidi icpac caondash. Adec cacuidanquie abentsëc aton tied nantan nidnubi utsi piucquid bednuequin ambi aton na menebante shubuno nidpac caondash.

6 Utsimbic abi: “Pec cho,” cashobi yuabo mëyanquin cuesun secapac caondash.

7 Adshobien chuiquid dapan nëishtanquin shëpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nëdëncapac caondash.

8 Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan.

9 Èmbi: ‘Pec cho,’ cacmaidobi chuibenetan. Podquedën nidquin mimbi istuidaidtedi: ‘Pec cho,’ cabenetan,” cac nidshun

10 ambi istuidaidtedi chuibenetanac matses dadpenquo pec cho-chopac caondash. Icsambo icquidobëdi bëdambo icquido cho-choash chuiquid dapan shubun puduedash pec tabadte quënë dapan tabadcuededpac caondash tsucus-tsucustsëcquio yec.

11 Adshun chuiquid dapantsen puduedshun isquien dashcute bëdaidquo dasiuidabi icquid abentsëc tsadtsec.

12 Adshobien chuiquid dapan: “¿Atotsi quiash dashcute bëdaidquo dasiuidambobi cho, buchi?” caqui ëcbedenquo yec tsadec.

13 Adshobien chuiquid dapan: “ ‘Chido bedacno isnuec dashcute bëdaidquo dasiuidquid,’ quepadenec. Mibi icsambo iqueque. Mibi cuidnu,” qeshun aton yuabo chiëc: “Shëbunshun buanshun icsano netan,” capac caondash. Adoac taneshun netanac mëyadquieq natiaic shubiquiopac caondash.

14 Adembidi Nuquin Papan ambi matses bëdamboen iste dadpen tantiamiaqui utsin-utsinquin tantienquo iquendac. “Abi yacno puduednu,” queuidboedi bëdambo icte bunenquo yec abi tantiatiapimbo icsho Nuquin Papan comapenen cuidendac. Utsi daëdpactsëquien Nuquin Papan tantiacpadec abëd tabadtequid iquendac –quequin Esusën chuipondash.

Chuiquid dapa piucquid menete chiaid

(Mad 12.13-17; Duc 20.20-26)

15 Adsho tantianec nidash abi chieshënquido padiseyobo: –Esus icsamboen chuimenuna. Icsamboen chuisho tantianshun bedshun unës uamechitono –qeshun ambi chuibanquin tantiamiaido chuipac caondash.

16 –Icsamboen chuimetan –caquien chuiquid dapa Edodes caid tanti-aidobëdtan icsamboen chuimeñuec cho-choshon chuituidpondash. –Bëdamboen chuiquid mibi neque. En ëbi chui. Tantianu. Muesambo icquin Nuquin Papan chiacpadec bëdamboec tabadte mimbi abimbo chuipoc. Matses dacuëdënenquo icquin Nuquin Papan chiaidquo mimbi chuipoc.

17 Adquid icquin ¿atotsi mimbi chuipe? Tantianu. Chui. Nuquin matses yuaquid chuiquid dapa Sesad caidën: “Piucquid shocoshëmpi dadpen beccho,” cac nuqui meniäc ¿ada bëdambo icpatsiash? –capondash.

18 Adoquien Esusën ambembi tantianshun: –Bëdambo icquid damianquieq mibi muambo nec. ¿Atotsieshun ëbi icsamboen chuimetiadquo ique? –quetanquin:

19 –Chuiquid dapa menetequid piucquid shocoshëmpi beccho –ambi cac

20 bësho bedshun Esusën chuipondash. –¿Në tsutsibimboecnuc dada uaid në iquec? ¿Tsutsi cuëmëdquidbëdta dada uac? En chui. Tantianu –caquien:

21 –Ma nuqui yuaquid chuiquid dapambo Sesad neyoc –quepondash. Adsho tantianshumbien Esusën: –Abibimboecnuc dada uaid abi cuëmëdquid dada uaid bedtequid shocosh icnuc Sesadën na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidën chiacpadomboen nabanta –quequin Esusën bëdamboen chuipondash.

22 Adsho tantiash icsamboen chuimetiadquo ichoedi: —Bëdamboen chupec —quetanec nidanepondash.

Matses uincuemetete chiaid
(Mad 12.18-27; Duc 20.27-40)

23 Adnubien aid ushëmbi Saduseyubo: —Matses unësaid uincuenesambo nec —quequidotsen: —Esus icsamboen chuimenu —quec cho-chopondash.

24 —Bëdamboen chuiquidquo mibi neque. Mimbi chuisho tantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchin bacuëbo nibëdeque. Con buchin madobimboec-nuc tishmenu,’ quequin tishmequid,” quequin Moisesën dada uapampic.

25 Aid tantiakin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash

26 bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash.

27 Adashic bacuë tishambobi aid chidotsen unëspac caondash.

28 Aid abitedi uincuemiatic ¿mitsicquidën chido icpatsiash? —caquien

29 Esusën: —Nuquin Papan chiaidquo tantienquo icquin Nuquin Papan nadatiambo icquin nabanquin uincuemetete mimbi tantienquo iqueque. Chuinu. Tantia.

30 Uincuemiatic dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bëdabobimboec matses uincuemiaido iguendac. Aden uincuemiaidën chido bedesa —quepondash Esus.

31 Adshumbic padpiden chuipondash. —Ambi unësaid uincuemetete chuiquin Nuquin Papan dada uamepampid ¿isbanabida ictio? Ma mimbi aid isbampaboc.

32 Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësash aton dada chodquiambic aton tantiate unësambo icnuc abi Nuquin Papa tantiatsiash —quepondash Esus.

33 Adsho tantiash abi datsidadquido: —¿Mitsipadquid nepec? Bëdamboenshëen chupec —quepondash.

Moisesën dada uampid chiaid
(Mad 12.28-34)

34 Aden unësaid uincuemetete chuisho tantiashumbien Saduseyobon padpiden: —En chui —cainquo icpondash. Adsho isashien Esus chieshënquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash.

35 Cho-choquin abentsëcshun Nuquin Papan Moises dada uamiampid taniaquidquo icquin chuimetuidpondash.

36 —Chuiquidquo mibi neque. En ëbi chui. Tantianu. Nuquin tsusedpa Moisesën dada uaqin dadpen chiampic. ¿Mitsicquid abentsëc ëmbi nasho Nuquin Papan: “Bëdamboshë iquec,” capatsiash? —caquien

37 Esus: —“Nuquin Papa tantiaquieci ambi chiacpadec tabadte bunquiota,” quequin

³⁸ chiampidba naic Nuquin Papan chiacpadec mibi bēdamboec tabadtsian-dac.

³⁹ Adembidi Moisesēn chiampid utsitsen naic matses bēdamboec tabadtsiash. “Min dada mibibi datantiadacbimboen utsibotsen tantiaquiota,” quequin chiampicpadomboen nasho Nuquin Papan bēdambo catsiash.

⁴⁰ Aden matses bēdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic –quequin Esusēn bēdamboen chuipondash abi chieshēnquido chuiquin.

Nuquin Papan chomiaidquo chiaid
(*Mad 12.35-37; Duc 20.41-44*)

⁴¹ Adshumbic Esusēnsen abi icsamboen chuimete bunquido Padiseyobo chuipondash.

⁴² –Ēmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesēn madouidida nepec? –capondash Esusēn abibi cadquimbi. Adoaquien badedi: –Nuquin tsusedpa yampid Dabidēn tsyuecquid icsho Dabidēn mado caimbi –quepondash Padiseyobo.

⁴³ Adsho tantiašumbien Esusēn: –¿Bēdamboenda chuidio? Mimbi chiacpadquid aton mado icsho ¿atotsieshun Nuquin Papan Mayanēn tantiamiacpadomboen Dabidēn con Icho capampic? Naden Dabidēn dada uapampic.

⁴⁴ “Nuquin Papan con Icho naden chiendac.

‘Con abiuc tsadash abitedishun Icbombo icnush nēmo cho.

Mibi chieshēnquidobi con Icho mibi camenu,’ quequin Nuquin Papan con Icho chiendac,”

quequin Dabidēn dada uapampic.

⁴⁵ Con mado cainquio icquin con Icho capampic Dabidēn. ¿Atotsieshun mimbi: “Dabidēn mado nec,” quequin tantiape? –caquien

⁴⁶ ēcbedenquio yec otacquo tabadpondash. Esusēn bēdamboen chuisho tantiaš: –Icsamboen chienquien ichitec. Ēmbi padpiden: “Icsamboen chuimenu,” cac bēdamboembidi chuiotsiash –queshun abi chieshēnquido abitedishun Esus padpiden chuimenquio icquin ēnaccondash.

23

Bēdambo icquid damianquido tanenda, quiaid
(*Mad 12.38-39; Duc 11.43, 46; 20.46*)

¹ Adshumbic Esusēn abēd icquidobēdta abi datsidadquido tantiamequin chuipondash.

² –Tantia. Moisesēn dada uampid chuibanquidobēdta tsusedpabon chiampid namequido Padiseyobon naid mibi chuinu. Aidon: “Moisesēn chiampicpadomboen nata,” quequin nuquin matses isadaidbo chuidenepec.

³ Aden Moisesēn dada uampid abimbo chiac adenuidi mimbi nac bēdambo ictsiash. Aden naquin padiseyobon nacpadomboen nainda. Aidon Moisesēn chiampid chuiquimbi ambibi aidēn chiaid niac-niaquec.

⁴ Chieshēmēnquido nec. Nuquin Papan chiaid nametiadquidēmbi tsusedpabon ambembi chiaid dadpenquio namepec chushcanquin. “Matsesēn aidtedi natiapimbo iquec. Padi icnuna. Nuquin matsesēn chiampidtedi nainda,” catiadquidi adoenuio iquec.

⁵ Aden padiseyobon Nuquin Papa tantiaquidquido damequin matses ismenuenuidi naic. Nuquin Papan chiaid dada uaidēmpi sauedtsash bēdectamēdec abiuc daēdi pēdectamēdec qeshun matses ismenuenuidi naic. Adembidi aton dashcute tēdiadte nacnenuequin: “ ‘Nuquin Papa chianequidquido nec,’ ma ēbi canu,” qeshun sedquid shoyonaid

ēnapenpactsēcnuc cuididicash matses ismenuec matses tabadacno capucuenepēc. Adēc Nuquin Papa chianequid damianquiec.

⁶ “Chuiquid dapa nec,” cameteuīdi bunec. Isedec puduedash: “Chuiquid dapa icsho icbōi abēdi tsadmequid,” quīash icbōēdi tsadte bunquiec. Nuquin Papan chīaid chuībantē shubun puduedash: “Tsusio dapambo nec,” camenuēc utsibobēd tabadenquīo yēc tsusīobobēduīdi tabadquīd nec.

⁷ “Chuiquidquīo yēc mībi bēdambo iquēc,” camete bunquiec matses dadpen tabadacno nidtenepec.

⁸ Mībitsen adēnda. Utsībo: “Mībiuidtsēqui bēdambo iquēc, Icbo,” camenuēc adēnda. Mīn Icbo abentsēcquīobi ēbi iquēc. Ēbi abentsēqui con Icbo cata. Con yuabo yēc con utsībo mībi neque. Bēdamboēc isnānta.

⁹ Adēmbīdi mībi chuībanquīd chuīquīmībi: “Mībiuidtsēqui bēdambo iquēc, Papa,” cāinda. Nuquin Papauīdtsēqui adēn chūita.

¹⁰ Adēmbīdi: “Chuiquid dapa yēc mībiuidtsēqui bēdambo iquēc,” utsībo camenuēnuīdi nāinda. Ēbiuidtsēqui mībi chuīquid dapa nec. Nuquin Papa yacnuēshquīo choquīd ēbīpadquīdquīo utsī nībēdec.

¹¹ Padnuen ambī chīacpadomboen utsībo nashunquīdquīo utsībo dēniacte bunenquīo icquīd Nuquin Papan bēdambošē catsīash.

¹² Utsīen abībī cadēquī: “Ēbiuidtsēqui bēdambo iquēc,” quequīn utsībo ismenuēnuīdi nāquīdo Nuquin Papan icsambo catsīash. Utsībic Nuquin Papan chīacpadomboen nāquīn utsībo nashunquīd yēc utsībo ismetēuīdi bunenquīo icsho Nuquin Papan bēdambo cāindac –quepondash Esus abī datsīdādaīdo chīēc.

*Abī chīeshēnquīdo Esusēn chushcaīd
(Mad 12.40; Duc 11.39-45, 52; 20.47)*

¹³ Adshumbīc abī chīeshēnquīdotsen chuīpondash. –Tantīa. Moīsesēn chīampīd chuībanquīdōbēdta Padīseyobo mībi chuīnu. Nuquin Papan cuīdtequīdombo mībi nec. Bēdambo icquīd damianquīēc mībi icsambo iquēc. Nuquin matsēs: “Nuquin Papabēd tabadte tantīanu,” quēshobī mīmībī bēdamboen chīenquīo iquēc. Ēmbī Nuquin Papabēd tabadte bēdamboen chuīsho mīmībī tantīenquīo iquēc. Adēn tantīenquīo icquīn: “Aīdēn chīaid tantīēnda,” quequīn mīmībī utsībotsen Nuquin Papabēd tabadte tantīamētīapīmbo iquēc.

¹⁴ Nuquin Papan cuīdtequīdo mībi nec. Mūaquīn unēsboedēn nīante piuccquīd bedshunquīdo mībi nec. Nuquin Papa tantīaquīdquīo damēnuen utsībo tantīamequīnuīdi buēdpambo cuēdquīn Nuquin Papa chīacbīmboen mīmībī chīanepec. Aīd abīmbo mīmībī chīenquīo iquēc. Adēc chīeshanquīēcsho isun Nuquin Papan mībi comapēnen cuīdēndac.

¹⁵ Nuquin Papan cuīdtequīdo mībi nec. Mīmībī tantīacpadomboēnuīdi tantīamēnuen mīmībī matsēs utsībo chuīben-chuībenec. Nīdaīd utsī-utsīēc yacno nidshun mīmībī chuībenesho tantīaquīdo mīmībī tantīacpadquīo yanash Satanasēn yuambo yanec Nuquin Papan cuīdtequīdombo iquēndac.

¹⁶ Nuquin Papan cuīdtequīdo mībi nec. Isadaīdbo chuīquīd icquīn bēdamboen tantīamēnquīen mīmībī icchītec. “Nuquin Papa utsī uatīapīmbo yacpadēn abīmbo cāīmībī,’ quequīd muaisa nec. Mūaquīdēn Nuquin Papan chīaid nīacquīd,” quētīadquīdī mībi adēnquīo iccoc. “Nuquin Papa tabadte shubu uashunāīd utsī uatīapīmbo yacpadēn abīmbo chīōmbī,’ quequīd mūesa nec,” quētīadquīdī mībi adēnquīo iccoc. Padēnquīo yēc: “Nuquin Papa tabadte shubu uashunāīd dapan icquīd shocōsh piū nacnēnāīdquīo utsī uatīapīmbo yacpadēn abīmbo chīōmbī,’ quequīd mūesa nec,” quechītequīen mībi iquēc.

17 Aden tantienquoio icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bédapenquioda icpec? “Aid bédamboshē icnubi aid nuntan icquid bēdiactsēc bédambo iquec,” caimbi. Mimbien icsamboen tantiec.

18 Nadentsen mimbi icsamboen chiec. “Nuquin Papa tabadte shubu uashunaid dapa yacnoshon: Mabi Nuquin Papan bédamboen isnu, quequin nēish pichicate nacnenaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquoio iccoc. “Nuquin Papa mabi bédamboen isnuequín pichicatequid nēish utsi uatiapimbo yacpaden abimbo caimbi,’ quequid muesa nec,” mibi quepec.

19 ¿Adenda mimbi bédamboen chuipe? Pashuacximboen mimbi bédamboen tantienquoio iquec. ¿Mitsicquid bédambo iquec? “Mabi Nuquin Papan bédamboen isnu,” quequin nēish pichicate nacnenaid dapa bédambo icnuc aidēn pichicatequidi nēishquoio bédapabi ictsec. Nuquin Papamboen bédamboshē iquec.

20 Nēish pichicate nacnenaid caic: “Aid utsi uatiapimbo yacpaden abimbo caimbi,” quequin aid nantequid nēish abitedi chiaidbidi nec. Adembidi ambi: “Mabi bédamboen isnu,” caid Nuquin Papatsen chuipec.

21 Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiec.

22 Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidēn chiaidquio tantiec: “Abimbo cacximboen chuiquid icsaquid nec,” quetiadquidi mibi adenquoio iccoc.

23 Bédambo icquid damianquid yec Nuquin Papan cuidtequido mibi nec. Nuquin Papan chiaid abentsēqui tantiatsēcquin min tiedēn canitsēcquid musuquēmpi bedshun Nuquin Papa mimbi menepec. Aden menequid icquimbi mimbi Nuquin Papan chiaid utsi dadpen niac-niacpec. Chieshēmianquid icboedi: “Ēbi bédamboen ista,” guesho bédamboen istiapimbo mibi iquec. Adembidi bédambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquoio iquec. Aden mimbi Nuquin Papan chiaid niac-niacpec. Ambi chiacpadamboen Nuquin Papa menequid icquimbi ambi chiaid utsi abitedi natiadquidi ma mimbi nainquoio icpaboc.

24 Tantesa uatsēcquimbi mimbi utsibo icsamboen chiec. Manuampi nibedbantsēcquimbi utsi nuacquid nibedquiabi abi nēsamēdpanumbobi acachimboembin mimbi nachitec. “Nuquin Papa meneta,” quequin chiaiduidtsēqui natsēcshun adenuidtsēqui mimbi utsibo namepec. Adenuidtsēqui namequimbi Nuquin Papan chiaid utsien mimbi niac-niacchitec.

25 Nuquin Papan cuidtequido mibi nec. Padiseyobo yec Moisesēn dada uapampid chuibanquido yec quequimbi mimbi icsamboen naic. Pada-padaidbēda dēshote chieshquin cachocuidtsēqui dapanshun anauc ampanambo icquidi ampanaid damianacximboec mibi bédamboec tabadquid damianquiec. Nuquin Papan chiaid dadpen nainquoio icquin mitsanauidi bednuen mibi bunaiduidi mimbi napec.

26 Pamumēdacximboec tantiatiapimbo mibi iquec. Dēshote abichobi bédamboen ampanacximboec icsaid ucudash bédambo icta. Adec icsainquoio yec ēnēdash Nuquin Papan chiacpadec mibi bédamboec tabadtsiac.

27 Bédamboec tabadquido mimbi damesho isun Nuquin Papan mibi cuidendac. Unēsaid chococacno bédamboen nacnenac bédambo isadec ēnden pisenambi.

²⁸ Adembidi bēdamboec tabadquid mimbi damec. Matses ismec bēdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

*Padiseyobo chedo cuidte chiaid
(Duc 11.47-51)*

²⁹ Nuquin Papan cuidtequidombo mibi nec. Nuquin Papan oncami-aïobēdta bēdamboec tabadquido nuquin tsusedpabon unēs uampido tantiquin aïdo chococampicno shubu uaquin mimbi nacnempec.

³⁰ Adoshombic: “Nēmo con tsusedpabon chieshēnquin unēs uampid chococac. Aïdēd tabadquin ěmbi unēs uainquo icsenēdac. Ěmbien bēdamboen istsenēdac,” queshun mimbi aïdo chococacno nacnempec.

³¹ Adoboedēmbi nuquin tsusedpabon bēdambo icquid unēs uampicpadom-boen adoante bunquin mimbitsen chieshtoshon adoaindac.

³² Ai, nuquin tsusedpabon Nuquin Papan oncamiampid unēs uacpadom-bota –quepondash Esus abi unēs uate chiec.

³³ Adashic abi padiseyobo chiec: –Nisibimboec icsa uanquido mibi nec. Adquido icsho Nuquin Papan icsano nēsecaquin mibi cuidendac.

³⁴ Icsaïdo icsho isun: “Ma Nuquin Papan bēdamboen iste tantiamenu,” queshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unēs uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaïndac. Utsi-utsien cuesnuequin nadancatanequin shubu utsin shubu utsinquin mimbi cuemetanendac.

³⁵ Adosho isun Nuquin Papan mibi cuidendac. Nuquin Papan chiac-padec bēdamboec tabadsho tsusedpan chieshēnquin tauamboen cuesuni-ampid Abed nepampic. Adoshombic adecbidi bēdamboec tabadsho tsusedpa utsibon utsi-utsien unēs uapampic. Adoshombic ěnquin Bedequias caidēn mado Sacadias caid unēs uapampic. Aïdi Nuquin Papa tabadte shubu uashu-naïd dayunshunquo cuesunepampic. Aïdtedi unēs uampido tantiaquin aïdo unēs uaquido cuidacimboen Nuquin Papan mibitsen cuidquiendac.

³⁶ “Yuecshun min tsyuecquido cuidendac,” quec nenquo iquebi. Nēbi caimbi –capondash Esusēn abi chieshēnquido chuiquin.

*Edusaden yacnocquido Esusēn shubi uaid
(Duc 13.34-35)*

³⁷ Adshumbic Esusēn chuioapondash. –Tantia, Edusaden yacnocquido. Mibitsen chuïnu. Mibi tantiac unēsquo iquec. Mibi yacnobïdi tabadquin Nuquin Papan oncamiaidon chuïsho nuquin tsusedpabon unēs uapampic. Adembidi Nuquin Papan: “Isadaïdbo chiec nid,” caïdo chosho utsi-utsien cuēnoten seshunequïopampic. Adembidi mimbi nēbi naïndac. Adquidombo icsho mibi tantiaquiēmbi. ¿Mitsipadec cachina aton bacuē cudaspec? “Penushe,” quiash aton bacuēmpi nua shoccoshon madadec cudasquid. Adecbidi: “Satanasēn yuanushe,” quiash cudasquieci mibi Nuquin Papa bēdamboen ismete tantiametiadquïo iccobi. “Tantiamenu,” cac tantiate bunenquo mibi icchitoc.

³⁸ Ěbi nidambic ěbi tantiatipimbo icsho Nuquin Papan namiac min shububēdtabi mibi nibēdamendac.

³⁹ Nēbi mimbi ěbi isenquo yanendac. Padnuen min matsesēn yuecash chosho ěbi isendac. Aden isash: “Nuquin Papa yacnuēsh choquid bēdambo iquec,” min matses quendac –quequin Edusaden yacnocquido Esusēn chuïpondash.

24

Nuquin Papa tabadte shubu uashunaid nibédante chiaid (Mad 13.1-2; Duc 21.5-6)

¹ Adash Nuquin Papa tabadte shubu uashunaid daquënë uacno tabadanec nidequi Esusbéd icquido Nuquin Papa tabadte shubu uashunaid caic: —En is, Icbo. Nèid shubu bédamboen nacnenaidquio neque —quepondash.

² Adsho tantiashun Esusèn: —Mimbi isboedquio cuënote bédamboen nacne- naid matses utsibon cuënote chic-chiquendac nibédquiecnuc —capondash.

Nuquin Papan cuidte ushë chiaid (Mad 13.3-13; Duc 21.7-19)

³ Adanec nidequi macuësh dapa Odibos caidën pudundoec poctsebi tabad- tuidshun abéd icquidon utsibo tantiamenquio icquin Esus chuipondash. — En mibi chote chuì. Tantiyanu. “Nèbi choec,” quequin mibi chote ¿mitsipadem- bimbi tantiapè? Adecbidi ¿atotsi isashini: “Nuquin Papan cuidte nèbi nec,” quepe? —capondash abéd icquidon.

⁴ Adoquien Esusèn naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda.

⁵ Adquido choshon: “Nuquin Papan chomiaidquio Quidistu caid nebi,” quequin muaquin chiaqui dadpeshun: “Ai, abimboen mimbi caic,” capen- dac.

⁶ Èbi choabi icnuc: “Matses dadpenquio cuesnan-cuesnanac caosh,” que- cuedendac. Adsho tantiash dacuëndenda. Nuquin Papan matses abitedi cuidte ushë choabi icnuc ambi tantiapadec matses adonanendac.

⁷ Adec matses utsi dadpen icquido matses utsibobéd cuesnanendac. Nidaid utsi-utsiec yacno pete nibédquiecnuc icted-ictedendac. Nidaid utsi-utsiec yacno nidaidquio bi comapenec uèdèquedenendac.

⁸ Adsho isash chido bacuë nèncuenacsho isun: “Nèbien tishchitec,” quequin tantiacbimboen tantiata. “Nuquin Papan abitedi cuidte nèbi nec,” quequin tantiata —quepondash Esus.

⁹ Adashic abi onquec: —Èmbi chiapadquio icnuc chieshëmënquidon èbi tantiacquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun èbi tanti- aquido chieshënquendac.

¹⁰ Adoac èbi tantiatsècboedëmbi chieshtoshon èbi tantienquio yanendac. Aidëmbi èbi tantiacquid ompodacsho istuidmeshun mëyamendac. Adashic abipadquid utsibobéd chieshënanendac.

¹¹ Padnuen muaquido: “Nuquin Papan chuiboedquio chuinu. Tantia,” quependac dadpen. Adsho tantiashun dadpeshun: “Ai, abimboen mimbi chiecnuc,” caindac.

¹² Matses dadpenquio icsamboecshë tabadsho isun èbi tantiatsècboedëmbi èbi tantienquio yanendac.

¹³ Padnuembi èbi choabi icshobi ènenquio icquin èbi tantiacquido Nuquin Papa yacno tabadmendac.

¹⁴ Èbi choabi icnuc: “Ma matses abitedishun Nuquin Papabéd tabadte tantiyanu,” queshun èbi tantiacquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

Matses icsamboshë icquid chote chiaid (Mad 13.14-20; Duc 21.20-24; 17.22-24)

15 Adashic abi onquec: —Èbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Èmbi chiacpadomboenuidi nata,” quequin Nuquin Papa chieshënquin chiendac. Èndenquimbo nuquin tsusedpca Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquio nec.

16 Aden: “Nuquin Papa tabadte shubu uashunaid dapa icsa uanuec puduedosh,” qesho tantias h Udeya yacnocquido macuësh dapa yacno ompodec cuenac bédambo ictsiash.

17 Adec cuenec shubu dayun icquido puduedenquio yec: “Con na bednu,” quenquio yec umanucüësh i cuenac bédambo ictsiash.

18 Adecbidi badedquio cuenuen tied nantan icquidon aton dashcute utsi aton shubuno beduanenquio yac bédambo ictsiash.

19 Nidequi bacuë usunquid yec bacuë chishmequid yec quec badedquio cuentiapimbo yec mëyadquiendac.

20 Adec cuente tantiec: “Ue sequenumbo cuemenquio icpashuni,” queta. “Pete bedmianenquio icnushe,” quias h “Chonoadenquio icte ushënquio cuemenquio icpashuni,” queoata.

21 Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquio natiambo chieshëmënquie c tabadendac. Nuquin Papan tauamboen matses uac adec tabadenquio ictenec. Nëbi adec tabadenquio iquec. Aido icsamboecshë tabadquido nibédanambic utsibo adquidpenquio yanoaindac.

22 Adec icsamboecshë tabadte tantiaquin Nuquin Papan: “Èmbi Esus tantiaquid icmiaido uesquin cuesun sianushe. Matses abitedi nibédanushe,” qeshun yuenquio icsamboen tabadmenquio icquin ènëdmendac — quepondash Esus.

23 Nuquin Papan aden ènëdmiabi yac icsamboecshë tabadec utsibo: “Is. Nëid Nuquin Papan chomiaidquio Quidistu neque,” quependac. Utsibic: “Is. Nëidquien Nuquin Papan chomiaidquio Quidistu caid neque,” quequin icsamboen chuoaindac. Adsho tantias h: “Nuquin Icbo Esus choashien nec,” cainda.

24 Adec muaquidoba choendac. “Nuquin Papan chomiaidquio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiaid nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac èbi tantiaquidontsen: “Ai, abimbo caic,” catsempendac. Nuquin Papan bédamboen tantiamiaido yec adtiapimbo iquendac.

25 “Chieshëmënquido iquendac,” quequin tantienquio icquidën èbi tantienquio yanushe,” qeshun: “Aden èbi tantiaquido chieshënquiendac,” quequin chiombi — quepondash Esus.

26 Adashic padpidec onquec: —Èmbi aden chuiboed tantias h: utsibo muasho tantienda. Èbi caic: “Utsibo ismenquio yec matses nibëdacno choac caoshe. Isnu. Nid,” cac istanenda. Adembidi: “Choash nëid shubun puduedac caoshe. Isnu. Nid,” cac adembidi istanenda. Muambo neque.

27 Èbimbo padpidec choquimbimbi abitedimbo ismendac. Abu ushëmbo yec bed-bedquetanesho ¿ada matsesën abitedishunquio isenquio icpadic? Ai, isec. Adembidi èbi choasho matses abitedishunquio isendac.

28 Adec choendabi. ¿Ada edeste pisen chec budenquio icpadic? Ai, budec. Adecbidi Nuquin Papan cuidte ushë chonoc choendabi — quepondash Esus.

*Abi chote Esusën chiaid**(Mad 13.24-37; Duc 21.25-33)*

²⁹ Adashic padpiden chieci: —Aden matses icsamboshë icquidon ëbi tantiaquido natiamenubi ushë chënquenquo yanendac. Inchëshën ushësen chënquenquo yanendac. Uispa chedo paëdbudnendac. Uispabimboecquid abitedimbo uedëquendac.

³⁰ Adnubini abitedishun Icho yec dacuëdampambo yec abucuësh choendac. Ëbi nadatiambo icquin nabanquidquo yec chosho isash cuidadtequido abitedimbo dacuëdec natiac shubiquiendac.

³¹ Adnuc nua shoncanubimbi Nuquin Papan abi yacnoshon uaido mayan bédabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

³² Ëmbi chuibocpadquiec yansho isun: “Esus chote nëbi nec,” quequin tantiata. ¿Mitsipaden: “Seta taëec,” quequin tantiapec? Suc secduduquiaid isun: “Nëbi seta taëec,” quequin tantiaquid.

³³ Adembidi ëmbi chuiboed isun: “Nëbimbobi Esus choec,” quequin tantiata.

³⁴ ¿Muctabi nedi? Ëmbi chuibocpadquo iquendac. Ëmbi chiacpader yanabi matses abitedi nibédantiapimbo iquendac.

³⁵ Abimbo caimbi. Abu nibédanendac. Nidaitsen nibédanendac. Padnuen ëmbi chuiboedquo nibédantiapimbo iquendac. Bënudenquo iquendac. Ucutiapimbo iquendac. Ëmbi chuibocpadquo iquendac —quepondash Esus abéd icquido chieci.

*Esus chote ushë tantienquo icte chiaid**(Mad 13.32-33; Duc 17.26-35)*

³⁶ Adashic abi onquec Esus: —Ëbi chote tantienquo iquembi. “Aid ushënquo choendabi,” quetiapimbo iquebi. Adembidi mayan bédabon tantienquo iquec. Ëmbibi Nuquin Papan Madonquobi tantienquo iquembi. Nuquin Papanuidtséquien tantieci.

³⁷ Matses ëbi caic: “Nëbi choec,” quetiapimbo icnuc choendabi. Noen cano nacnenubi ¿mitsipaden aton matses icsambo icquidon tantiapampic?

³⁸ Nidaid abichobi mauanabi icnuc: “Nuquin Papan nuqui cuidendac,” quequin tantienquo icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash puduedpampic.

³⁹ Aton matses: “Nëbimbobini Nuquin Papan cuidchitec,” quenquo icnubi ue dapambo choec mauanquidën matses abitedimbo unësbudnepampic Noe ambi cano anshubu uaidën nuadtonobi. Adechidi Nuquin Papan cuidtequido ëbi caic: “Choec,” quenquo icnubini choendac.

⁴⁰ Choquin Nuquin Papa yacno tabadmenuen beduamendambi. Ëmbi: “Bedtan,” cac tied nantan dada daëd icsho istuidshun ëbi tantiaquid abentsëc icsho beduanendac. Utsibic ëbi tantiesa icsho nianendac.

⁴¹ Adembidi Nuquin Papa yacno tabadmenuen chido daëdshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesa icsho nianendac.

⁴² Aden ëmbi chuiboed tantiashun: “¿Nëbida con Icho chopeba?” quequin ënenquo icquin tantiata. Ëbi chote mimbi tantienquo iquec.

⁴³ ¿“Nëbi ampequidën ampec,” quequinda tantiapadic? Padenquo. Tantiaquidënquien aid ushënquo aton na bédamboen isquin ampemenquo ictsiash. Aden tantienquo icquin: “Ampesho isnu,” quequin ënenquo icquin isquid.

⁴⁴ Adembidi ëbi chote ushë mimbi tantienquoio ye. ¿“Nëbida nuquin Icho chopeba?” quec Nuquin Papabëd tabadte bunec bédamboec tabadta. Matses dadpen: “Nëbien chochitec,” quenquoio icnubini choendac –quepondash Esus abëd icquido chiech.

Esus bédamboen cainte chiaid
(Duc 12.41-48)

⁴⁵ Adshumbic abi bédamboen cainte Esusën chuipondash. –Tantia. Aton icho tantiaquin yua bédambo icquidën naid mibi chuinu. Icbon: “Ëbi nidan mibëdta yuaido pete sandoaid musucshun ëmbi chiapadën ëmbi chiapadënquien menianeta,” cac yua bédambo icquidën adotsiash.

⁴⁶ Adnubien icbon choshon ambi chiapadomboen yuan nasho isun bédamboen istsiash.

⁴⁷ Adshumbic aton yua chuitsiash. “Bédamboen tantiaquid mibi neque. Con yua utsibo namequin con natedi dayun uata,” catsiash icbon yua bédambo icquid caquin.

⁴⁸ Padnuen yua icsambo icquid: “Ëndenquimbo con icbo nidondash. Choenquien icchitec. Con nauidi nanu,”

⁴⁹ quiampatsiash. Adshumbic chieshtoshon abëdta yuaido cuesanetsiash. Adashic icsambo icquidobëdi icsamboec tabadtsiash.

⁵⁰ Adec: “¿Nëbida con icbo chopeba?” quenquoio icnubien aton icho chotsiash.

⁵¹ Choshon ambi chiapadomboen nainquoio icsho istuidshumbic: “Icsambo iquec,” qeshun comapenen cuesquin cuesunetsiash. Adembidi Nuquin Papan icsambo icquido cuidendac. Bédambo icquid damianquido cuidacno icsamboshë yacno nidmendac. Adoac natiaic shubiquiendac –quequin abi bédamboen cainte Esusën chuipondash.

25

Chido 10tedshun cainaid

chiaid

¹ Adshumbic Esusën ompoachimboen chuiquin abi chote ushë tantienquoio icte chuipondash. –Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuis-honquec aïdbëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icbo-ichoen buanuen sanambededpac caondash.

² Aid chido 5tedi tantienquoio icquido icnubi 5tedbidi bédamboen tantiaquido icpac caondash.

³ Tantienquoio icquidon: “Tabote bëchi naimëdsho cushtonon buanu,” quenquoio icquin bëchi uesadbudtsaid taboteuidtsëqui sananquin caimpac caondash.

⁴ Padnuen bédamboen tantiaquidon naimëdsho cushtonoequin tabotebëdta sedunten cushtoaid bëchi sananquin caimpac caondash.

⁵ Aden cainaqi: “Chido bedtanu,” quianec nidboed choenquoio icsho isash abitedi ushcastoash ushcuededpac caondash.

⁶ Inchësh poctsemboen: “Choeque. Bëquednu. Nid,” cac

⁷ isucunshun chidobon tabonoequin tabote dëbedpac caondash. Adoshon bédamboen tantiaquidon ambi bëboed bëchi cushtonobien

⁸ icsamboen tantiaquidon: “Bëchi beccho. Con na naimëdeque,” caquien bëchi bëboedën

⁹ bēdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchēshtsiac. Piucquid menequin bēchi cushtoquid baded cushtometan,” capac caondash.

¹⁰ Adoac bēchi bedec nidnubien chido bedtanec dada chopac caondash. Chosho bēdamboen tantiaquidon aton tabote taboshon chido bedtanec choquid bēquedtampac caondash. Adtanec abēdi choash puduedshun bētashte puduedtiapimbo icnuc bēdamboen bētashpac caondash.

¹¹ Adnubien bēdamboen tantienquo icquido bēchi bedtanec chopac caondash. Choshon shēcuē bētashacsho isun: “Shēcuē shēcne, buchi. Ēbitsen puduednu,”

¹² caquien chido bedquid: “Padi. Ēmbi tantiacmaido mibi nec,” quepac caondash.

¹³ Ēmbi chuiboed tantiashun chido icsamboen tantiaquido tanenda. Bēdamboen nabi icsho: “Ēmbi tantiacmaid mibi neque. Puduedenda,” aido cacbimboen ěbitsen Nuquin Papa yacno puduedmenquo icquin cacumechitomane. Ēbi chote ushē tantiadenquo icnuc: “¿Nēbida con Icho chopeba?” quequin ěbi bēdamboen tantiec ěmbi chiacpadec bēdamboec tabadta –quepondash Esus abēd icquido chiec.

Icbon piucquid daēd uaid chiaid
(Duc 19.11-27)

¹⁴ Adshumbic abi tantiaquidon ambi chiacpadomboen nate Esusēn ompoacbimboen chuiopondash. Ēnapen nidnun aton piucquid dadpen dayun uaquidēn aton yuabo: “Ēbi piucquid daēd uashunta,” quequin chuipac caondash.

¹⁵ “Nēidēn bēdamboen tantiaquidquo icquin con piucquid ěbi daēd uashuntsiash,” qeshun aton yua piucquid 5tedi meniac caondash. Adshumbic: “Nēidētsen bēdamboen tantiaquin adembidi con piucquid ěbi daēd uashuntsiash,” qeshun utsitsen 2tedi menepac caondash. Adshumbic: “Nēidētsen bēdiactsēc tantiatsēcquin adembidi ěbi con piucquid daēd uashuntsēctsiash,” qeshun utsitsen piucquid abentsēcquiobi menetsac caondash. Adanec nidpac caondash icbo.

¹⁶ Adnubien piucquid 5tedi bedboedēn aton matsesēn nacpadomboen piucquid daēd uanuen utsibo menequin yuecshun ambi meneboed udictsēc dēniacquin bedoapac caondash. Sincoted icboedi 5tedbidi bedoapac caondash 10ted icnuc.

¹⁷ Adembidi piucquid 2ted meneboedēn 2bidi daēd uapac caondash 4tedi icnuc.

¹⁸ Padnuen abentsēc meneboedēn chieshquin aid daēd uainquo icquin ambi uēdēshcaboed shēcuē anantsēcquin piucquid abentsēcqui ompopac caondash.

¹⁹ Yuecquo ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac

²⁰ sincoted meniondaidēn: “Is, icbo. Mimbi ěbi meniondaidtedbidi daēd uaombi. Nēbi mitsana 10tedi iquec,” caquien

²¹ icbon: “Ai, con na daēdpactsēc icboedi daēd uaquin mimbi bēdamboen nac. Nēbi ěbēdtan chuiquid dapa icta. Ēbēd cuishonquec tabadec cho,” capac caondash.

²² Adnubien piucquid 2tedi meniondaidēn: “Is, icbo. Mimbi meniondaid 2ted icboedi daēd uaondambique. Nēbi mitsana 4tedi iquec,” caquien

²³ icbon: “Ai, ěmbi chiacpadomboen mimbi con na daēd uac. Nēbi ěbēdtan chuiquid icta. Mibitsen ěbēd cuishonquec tabadec cho,” capac caondash.

24 Adnubien piucquid abentsēcquiobi meniondaidēn chieshquidēntsen: “Mimbi ancaidon nidtsinaid peteuidi bedquid mibi nec, icbo. Mimbi chiacpadomboen nainquio icsho isash chushcanquidquio mibi nec.

25 Adec dacuēdampambo icquid icsho mibi dacuēdēnquin mimbi meniondaid piucquid ompoquin chococaondambi. Nē mimbi meniondaiduidtsēqui ictsec,” caquien

26 icbon: “Chieshquiec mibi icsac. Ēmibi chiacpadomboen nambo mimbi iquec. Ēbi caic: ‘Ancanquid icquin ēbi chushcanushe,’ qeshun

27 nuquin matsesēn nacpadomboen utsibo meneshun piucquid daēd uaguin mimbi bedtsempac. Adoacsho aid daēd uaguin bedtsenombi. Chieshquin mimbi icsamboen nac,”

28 quepac caondash. Adshun aton yua utsi caic: “Chieshquidēn na bedshunshun piucquid 10ted dayun uatsēcboed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash.

29 Adembidi naindambi. Ēbi tantiaquin ēmibi chiacpadomboen naquid adembidi namequin bēdamboen tantiamendambi. Ēbi tantiesabo ēmibi chiaid niacquid bēdamboen tantiamenquio iquendambi.

30 Aid yua icsambo icquid cuidachimboen Nuquin Papan ēbi tantiesabo cuidquiendac. Ambi icsaido cuidquiacno nēsecac natiaic shubiquiendac — quepondash Esus abēd icquido chiēc.

Matses nashunesa cuidte chiaid

31 Adshumbic Esusēn padpiden chuipondash. —Nuquin Papan abi yacnoshon uaido mayan bēdabobēd choec: “Abitedishun Icbomboeni nec,” quiash bēchamauampamboec dacuēdampamboec choequi chuiquid dapan tsadten tsadtoquin abitedi ismendambi.

32 Adshumbic matses abitedimbo cho-chomequin tsidadmendambi. Adshumbic icbon aton nauidquio tsinacacimboen ēbi tantiaquido naden chiendambi.

33 “Ēbēd tabadtequido mibi neque. Nēmbo con abiuc tabadec cho,” caindambi. Adshumbic ēbi tantiesabo chuiquin: “Ēbi tantiesabo cuidadtequido mibi neque. Con copioc tabadec cho,” caindambi.

34 Adshumbic ēbi tantiaquido padpiden chuiaindambi. “Ēbēdi tabadec cho. Matses uaguin tauabi ēndenquimboshē mibi caic: ‘Aido ēbi tantiaquido icmeshun ēbēdi tabadmendambi,’ quequin Nuquin Papan tantiaidombo yec ēbēdi bēdamboec tabadec cho.

35 Mimbi ēbi nashunenec. Bundoacsho mimbi ēbi pemedenedec. Acte bundoacsho adembidi mimbi ēbi acmedenedec. Mimbi isacmaidquio icsho mimbi ēbi yuedtenec.

36 Con dashcute nibēdsho mimbi ēbi dashcute menedenedec. Daicsabudtsash unēstiadtsēcquio icsho ēbi tantiec mibi datsadtenec. Quēnēn nauedacsho mimbi ēbi isuan-isuandenedec,” caindambi.

37 Adoquien bēdamboec tabadquido: “Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc.

38 ¿Ēmibi isacmaidquio icshodambi mibi yuedtionda? Mambi padambo yoc. ¿Dashcute nibēdshodambi mibi dashcute menepacti? Mambi padambo yoc.

39 Mibi daicsacsho datsadambo iquebi. Quēnēn nauedacsho mibi istaniambo iquembī. Mimbi tantiadenquio icnuc chuipec,” ēbi caindac.

⁴⁰ Adoac naden chiendambi. “Tantia. Mibi chuinu. Ĕmbi chiacpadomboen ěbi tantiaquido utsibo bĕdamboen isquin mimbi nashundenec. Aden ěbibi nashunacimboen mimbi utsibo nashundeneque. Ĕbĕdi tabadec cho,” caindambi.

⁴¹ Adshombic ěbi tantiesabotsen chiendambi. “Nuquin Papan cuidtequido mibi neque. Mibi icsaid ěnte bunenquio icquid mibi neque. Nuquin Papan Satanas aton yuabo podobitsi icsabobĕda ěnenquio icquin cuidacno nid.

⁴² Ĕmbi chiacpadomboen ěbi tantiaquido nashunesambo mibi icteneque. Bundoacsho mimbi ěbi pemenquio ictenec. Acte bundoacsho mimbi ěbi acmenquio ictenec.

⁴³ Mimbi isacmaid icsho mimbi ěbi cacumedenec. Dashcute nibĕdsho mimbi ěbi menenquio ictenec. Daicsacsho isash mibi ěbi datsadenquio ictenec. Quĕnĕn nauedacsho mimbi ěbi istanenquio ictenec,” caindambi.

⁴⁴ Aden chiaquien: “Tantiadenquio icnuc mimbi chiec. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Ĕmbi isacmaid icsho mambi mibi isambo yoc. ĴMin dashcute nibĕdshodambi mibi istionda? Mambi padambo yoc. Mambi mibi daicsacsho isambo yoc. Mibi quĕnĕn nauedaaid tantiambo iccondambi. Tantiadenquio icnuc mimbi chuipec,” caindabi ěmbi chiacpadomboen naisabon.

⁴⁵ Adoac naden chiendambi. “Ĕbi tantiaquido nashunenquio icquin ěbibi nashunenquio yacimboen ěmbi chiacpadomboen naisabo mibi neque. Nuquin Papan cuidacno nid,” caindambi.

⁴⁶ Adoac icsamboec tabadquido ěnenquio icquin cuidacnombo nidnubi bĕdamboec tabadquido Nuquin Papa yacno ěnĕdenquio yec tabadendac – quequin Esusĕn chuipondash.

26

Esus bedshun unĕs uanuequin chiaid

(*Mad 14.1-2; Duc 22.1-2; Uan 11.45-53*)

¹ Aden abi chote ěnquin chuitanquimbic abi unĕs uatetsen abĕd icquido Esusĕn chuipondash.

² –Daĕdec ushun nuquin matsesĕn obeca bacuĕ unĕs uaindac. Tsusedpabon: “Ma con mado unĕs uainquio icnu,” qeshun obeca bacuĕ abided unĕs uampid tantiaquin badiadshun penun obeca bacuĕ unĕs uaindac. Aid ushĕmbi ěbi bedshun cuesten dectamendac –quepondash Esus.

³ Adnubien tsusiobobĕdi con matses chuiquid dapa dadpen abi chuiquid dapambo Caipas cuĕmĕdquidĕn shubun puduedpuduedpac caondash.

⁴ Adashic: –Nĕbien Esus unĕs uametiad utsibo ismenquio icquin bedshun.

⁵ Nuquin matses obeca pec tabadnuc bedenquien ictiad. “Esus bĕdambo icquidi cuesunec,” qeshun obeca penuec cho-choquidon nuqui cuesnushe –quepac caondash.

Chidon Esus machiuinaid

(*Mad 14.3-9; Uan 12.1-8*)

⁶ Adnubien Esus shubu dadpen icquid Betania caid yacno choash ambi daushumbo yec daicsaid bĕdamiondaid Simon caidĕn shubun puduedpondash.

⁷ Puduedshun pec samĕdshobien chidon puduedshun ambi piucquid dadpenquio menequin bedaid tĕchumpin icquid bĕdambo nuadquid Esus machiuipondash: –Esus bĕdamboshĕ icquid nec –qeshun.

⁸ Adsho isumbien Esusbĕd icquidon: –ĴAdenda bĕdamboen nai? Ma ic-sambo yoc.

9 Utsibo menequin dadpen piucquid bedshun piucquid nibëdquido aid piucquid menetiadquidi mibi nec –quequin chido chushcapondash.

10 Adsho tantiashumbien Esusën: –¿Atotsieshun chido chushcai? Èbi bëdamboen tantiaquin èbi ismequin bëdamboen nashunebique. Chushcainda.

11 Mimbi chuiboed piucquid nibëdquido ënëdenquoio yec mibëdi tabadendac. Èbien mibëdi tabadenquoio yanendac.

12 Èbi unës uashun chococate tantiacimboen machiuinoshibique. Chushcainda.

13 Èmbi chiaid chuibeniacnoshon nëid chidon èbi machiuimboed chiendac –quepondash Esus abëd icquido chiec.

Udasën Esus bedmenun piucquid bedaid

(Mad 14.10-11; Duc 22.3-6)

14 Adnubien Udas Iscadiote caid Esusbëd icboedi Esus chieshënquido chuiquid dapabo chiec nidpac caondash.

15 Nidshumbic chuituidpac caondash. –Utsibo ismenquoio icquin mibiuidtsëqui Esus bedmenu. ¿Tedtsi piucquid èbi menetsia? –caquien badedi pudunquin piucquid shocoshëmpi 30ted icnuc tambantanquin menepac caondash: –Baded èbi bedme –quequin.

16 Meniac bedanec nidec: –¿Mitsishunquiembi utsibo ismenquoio icquin Esus bedmepeba? –quepanëdash Udas. Adashic Esusbëdi tabadoaic chopondash.

Unësnush abëd icquidobëd Esus pec tabadaid

(1Cod 11.23-26)

17 Adnubien Esusbëd icquidon: –Equipito yacnuësh cuenun pan bidiscamiabi yampid 7tedec ushquin tantiaquin tauaid ushë nëid nec –queshun Esus chuipondash. –Nuquin Papan nuquin tsusedpabo unës uamenquoio icquin matamiampid inchësh tantiaquin obeca bacuë penuen ¿mitsishunquiembi mibi codocashumpe? –caquien Esusën:

18 –Edusaden yacno nidshun èmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiacpadomboen uesquin nabanembi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid

19 –cac nidquimbi shubu icbo chuituidac caondash. Adoac: –Ai, ma chobono –quesho tantiashumbien abia nidboedon aidën shubun puduedshun penuen nëish yua obeca codocapaccondash. Adnubien Esus chedo puduedpondash.

20 Inchëshëmbi abëd icquido 12tedbëd samëdquin Esusën pepondash.

21 Pec samëdquin Esusën chuipondash. –Tantia. Mibi chuinu. Èbi chieshënquido èbi bedmequid abentsëc nëmbobi iquec –quesho tantiashun

22 unësquoio yanshun abentsëcshun abentsëcshunquien Esus chuipondash abëd icquidon. –¿Èbida cai, Icho? –quequin abi chuishobien

23 Esusën: –Èbëdtan pete codocaid ënë punquid èbi bedmequid nendac.

24 Èbi Nuquin Papan chiaid dada uamepampicpadquid matsesmiad yec unësendabi. Padnuen èbi bedmequid comapenen cuidtequidquoio nec. Anin aid tishenquoio icpatecnëdan. Cuidac natiaquiendac –quepondash Udas caic.

25 Adoacquien Udasën abi bedmequidënquoio: –¿Èbida cai, Icho? –caquien: –Ai, mibibimbi caic –capondash. Adoac Udas puduenanec nidpondash.

26 Adshumbic Esusën pete sananquin: –Mimbi pete uaid nëid nec. Mibi bëdambo iquec, Papa –quequin Nuquin Papa chuitanquin cuësh-cuëshbanshun abëd icquido menezampondash. –Nëid cuësh-cuëshquin

nibëdamiacimboen ëbi mëyanquin unës uaindac. Ëbi unës uate tantiaquin nëid peta —cac pebededtsëccondambi.

²⁷ Adshumbien Esusën dëshoten actequad cushtoshon sananquin: —Mimbi uaid nëid nec. Mibi bëdambo iquec, Papa —quequin Nuquin Papa chuishun: —Nëid abitedishun acbeded —cac dëshoten abentsen cushtoaid pictsë-pictsen acbampondambi.

²⁸ Aid actequad acshobien Esusën: —Nuquin Papan chiaid nuquin tsusedpan dada uapampicpadec ëbided cuidadec unësendabi. Nëid acquin: “Esused Nuquin Papan cuidac aton intac siebudpamboec unësposh. Aton Madoded cuidshun Nuquin Papan ëbi padenquo iquec,” quequin nëid acquin tantiaata —capondashi.

²⁹ Adashic: —Nadquid actequad padpiden aquec cuishonquec mibëd tabadenquo iquendabi. Nuquin Papan abitedishun Icbombo icmiac abi yacnombo mibëdi cuishonquec tabadendabi —quepondash Esus ëbi chedo chiec.

³⁰ Adashic cuëdënten abentsec cuëdëdash macuësh dapa Odibos caid pudundonoec nidanepondash Esus Udas Esus chieshënuquido chiec nidbon.

Petedo chieshuidte Esusën chiaid

(Mad 14.26-31; Duc 22.31-34; Uan 13.36-38)

³¹ Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiaipadec ëbi nianec mibitedi niquendac. Nuquin Papan naden chuipampic. “Icbo cuesnu,’ canubi aton yuabo niquendac,” quequin Nuquin Papan dada uamepampicpadec mibitedi adec niquendac.

³² Padnueni unësash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi —quepondash Esus abëd icquido chiec.

³³ Adoquien Petedo: —Mibi cuesnuec cho-chosho isash utsibo dacuëdec niquenuc ëbimboen cuenenquimbo ictsiandac —queshobien

³⁴ Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Ëmbi isacmaidquo aidi nec,” mimbi ëbi caindac. Cachina bënë cuëdanabi icnuc 3tedec mibi adendac —caquien

³⁵ Petedo: —Pada. Adtiapimboeni iquec. Chieshëmënuquidon: “Esusbëd icquid mibi neque. Mibi cuesunenu,” caqui: “Ëmbi isacmaid neque. Padi,” quenquo iquendabi. Mibëdquiobi unëstsiandabi —Petedo quenubini: —Ai, ëbibic adecbidi ictsiac —quecuededpondabi Esusbëd icquidotedi.

Quetsemani caid yacnoshon Esusën Nuquin Papa chiaid

(Mad 14.32-42; Duc 22.39-46)

³⁶ Adanec nidequi cuëte dadpen nitsinacno Quetsemani yacno nidpondash. Auëshquo Esus nadpondash. —Ambobi tabadta. Udicsëc nidshun Nuquin Papa chuitanu —quepondash.

³⁷ Adashic Petedobëdta Sebedeyon mado daëd buanec nidpondash. Udicsëc nidequi unësquo yanec shubiantiadtsëcquo yampac caondash.

³⁸ Adshumbic Petedo chiec: —“Matsestedi icsaid ëmbi bedshunsho isun Nuquin Papan ëbi istiapimbo yanendac,” quiaish unësquo iquebi. Ëbi yacpadec ushenquo yec nëmbobi isec tabadta —quianec

³⁹ udicsëc nidash nidaidën uebudshun Nuquin Papa chuipac caondash. —¿Ada mimbi ëbi unës uamenquo icpatsia, Papa? Mimbi: “Ai, mibi unës uamenquo iquëmbi,” cac bëdambo ictsiabi. Mimbi: “Nëbi mibi unës uamenu,” cac mimbi tantiacpadequi unësendabi —quepac caondash Esus Nuquin Papa chiec.

40 Adtanec choshon isquien Petedo chedo ushpec: —Ushenquoio yec isequi tabadta —caboqui. —¿Yuec-yuecpactsec ushenquoio icquin istiapimboda icco?

41 “Satanasèn icsamenushe,” qeshun ushenquoio icquin Nuquin Papa chuita. “Ushenquoio iquebi,” queboedobi ushcàs mēmunenquoio yec mibi ushpec —capac caondash Esusèn Petedo chedo chuiquin.

42 Adtanec padpidec nidoashun Nuquin Papa chuioaic: —Èbi unès uame-tiadquoio icquin èbi unès uameta, Papa. Èbi unès uametiapimbo icquin mimbi èbi unès uamenquoio ictsiac. Mimbi tantiacpadomboen nata, Papa —quetanec

43 choaquin isquien Petedo chedo ushoaic ushcàs mēmuntiapimbo yec.

44 Adsho istanec nidoashun ambi chuibocpadomboembidi Esusèn Nuquin Papa chuitanepac caondash tedesteden.

45 Adtanec choaquin ushash uesho istuidoashun: —¿Ushecta ue? Nèbimbobi èbi unès uamenuen èbèd icboedèmbi icsambo icquido èbi bedmeque.

46 Nidnu nid. Is. Èbi bedmenuec èbi bedmequid choeque —quepondash Esus Udas chosho isash.

Abi chieshènquidon Esus bedaid

(Mad 14.43-50; Duc 22.47-53; Uan 18.2-11)

47 Adnubien Udasèn Esusbèd icboedèn bedtanac matses dadpen cuesan-tiadpambo yec chèshtebèdta cuate sanambededtsècquieac cho-chopondash. Nèish yua abided unès uaquido chuiquid dapabobèdta con matses tsu-siobon: —Bedtan —cac cho-chopondash.

48 Ambi bedtanaidobèd cho-choquimbien Udasèn: —“Nèid Esus nec,” que-quin adoendambi —abi quiacpadembi

49 Esus tansudcatuidpondash: —Chobi, Icho —quequin.

50 Adoaquien Esusèn: —Èmbi tantiaoboedquoio mibi nec. Èmbi adoboedènquiobi mimbi tantiacpadomboen nata —qeshobien cho-choquidon Esus bedtuidpondash. Aden bedshun: —Cuidmenun chuiquid dapà yacno mibi buanu —capondash.

51 Aden Esus bedshobien abèd icquidèn abi tsiusudaid chèshte chictanquin chuiquid dapan yua pateshunepondash.

52 Adoshobien Esusèn: —Padi. Chèn. Min chèshte tsiusudoata. Cuesanquid icsho adembidi cuidnushe.

53 ¿Tantienquioda ique? Èmbi chiac con Pan ambi abi yacnoshon uaido mayan bèdabo dadpenquioshè èbi cudasmenuen chometsiash.

54 Nuquin Papan aden èbi cudasmiac bedadiapimbo icsho ¿mitsipaden Nuquin Papan chuiquin dada uamiampicpadomboen èbi naden bedpatsi-ash? —capondash pateshunianquid chuiquin.

55 Adashic abi bedquido chiec: —¿Atotsi quenuec chèshtebèdta cuate sanambededtsècquieac èbi bednuec cho? ¿Nuqui chuiquid dapan chiaid niac-niacquin matses cuesanquido chuiquid dapadabi nedi? Mabi mimbi is-boedquiobi neyoc. Badiadquidèn badiadquidènquien Nuquin Papa tabadte shubu uashunaid daquènè uaidèn puduedshun chuideneshobi ma mimbi èbi bedenquoio icboc.

56 Padenquoio icboedombi Nuquin Papan tantiacpadènquiobi mimbi èbi bedec. Èbi bedte chuiquin Nuquin Papan nuquin tsusedpa dada uamiampic-padomboen mimbi èbi bedec —quequin Esusèn chuinubini niquepondac: —Cuenenquoio ictsiabi —queboedi.

Caipas caid yacno Esus buanaid

(Mad 14.53-65; Duc 22.54-55, 63-71; Uan 18.12-14, 19-24)

⁵⁷ Adnubien chuiquid dapambo Caipas cuëmédquid yacno Moisesën dada uampid chuibanquidobédi tsusio utsibo cho-chopac caondash. Adnubien ambobi Esus bēpac caondash.

⁵⁸ Adnubien Petedo uanoshon isbēec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuec puduedash chuiquid dapan namiaido sondadobédi tsadtuidpac caondash Petedo.

⁵⁹ Adnubien cho-choboedo tsusio dapabo: —Esus unës uamenuen: “Esus icsasho isombi,” quequin muaquidon chuisho tantianuna —queshun chomiac muaquido dadpeshun: —Esusën icsamboen nasho isombi —quequin chuipac caondash.

⁶⁰ Aden Esusën naid muaquin chuiquin Esus unës uatiadquo icquid chiamo icpac caondash. Adnubien muaquid daëdshun chuituidpac caondash.

⁶¹ —Nuquin Papa tabadete shubu uashunaid caic: “Uesquin chic-chictanquin padpiden nacnenoquin daëdec ushquin nainendambi,” ma Esus quepondac —quepac caondash.

⁶² Adshobien chuiquid dapabo chuiquidën Esus chuiquin: —¿Atotsi quenuc ado? ¿Atotsi nëidën chiec? —caquien

⁶³ Esusën ëcbedenquo icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” quesahun abimbo cata. ¿Nuquin Papan chomiaidquo aton Madombobida mibi nepe? —caquien

⁶⁴ Esusën: —Ai, mibi chiaidquo nebi. Tantia. Mibitedi chuinu. Nuquin Papan abitedishun Icbombo icmiacshobini mibi isendac. Adecbidi Nuquin Papa yacnuësh padpidec choec abu ushu yacnuësh choshobini mibi isendac —quepac caondash Esus.

⁶⁵ Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun

⁶⁶ ¿Atotsi natiadquo ique? —caquien abëdtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

⁶⁷ Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen isti-apimbo icnuc Esus dashcuten bëpuctanquin mëdanten bëcues-bëcuespac caondash.

⁶⁸ Bëcuestanquin: —“Nuquin Papan madombobien nec,” canu. En chui. Tantanu. ¿Tsundan mibi naoshe? —cabededsëcquien mamëshumpac caondash Esus.

*Esus caic: Ëmbi isacmaid nec, quequin Petedon chiaid
(Mad 14.66-72; Duc 22.56-62; Üan 18.15-18, 25-27)*

⁶⁹ Adnubien Petedo tabadacno choshon chido yuan chuituidpac caondash. —Cadidia yacnquid Esus caidbëd ma mibi icpaboc —caquien:

⁷⁰ —Tantiadenquo icnuc mibi chiec. Ëmbi isacmaidquo mibi chiec —quec Petedo muaic taëpac caondash.

⁷¹ Adanec daquënë uaidën puduedte shëcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien

⁷² Petedo: —Ma ëmbi isacmaidquo Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³ Adash yuec-yuecpectsēcshumbien ambo tabadquidontsen Petedo chuipac caondash. —Aidbēd icquidien mibi nec. Cadidia yacnocquid onquiabimboec ma mibi onquepayoc —quesho tantiash

⁷⁴ Petedo: —Comapenen Nuquin Papan cuidchitoshē muasho. Abimbo caimbi. Ma ěmbi isacmaidquio neyoc —queoapac caondash.

Adec 3tedec Petedo muanubien cachina bēnē cuēdampac caondash.

⁷⁵ Adsho tantiashun Petedon Esusēn chuiboedquio tantiactampac caondash. —Cachina bēnē cuēdanabi icnuc mimbi ěbi caic: “Ěmbi isacmaid nec,” capendac tedesteden —quequin Esusēn chuiboedquio tantiactanec umanuc puduenanec nidec Esus muauabosh natiaic shubinidpac caondash.

27

Pidato caid yacno

Esus buanaid

(*Mad 15.1; Duc 23.1-2; Uan 18.28-32*)

¹ Adnubien chuiquid dapabo aton tsusio utsibobēdi Esus isec ushenquio badiadpondash. Badiadshun Esus chieshēnquin: —Nuqui yuaquid ancanquid Esus unēs uamec nidnu. Nid —qeshun

² podo cataneshun ancanquid Pidato cuēmēdquid ismenuen Esus buampac caondash.

Esus bedmequid Udas tētaniadaid

³ Adnubien Udas Esus bedmeboed: —Unēs uamechitembien iquec. Unēs uametiapimbo iquebi. Ěmbi bedboed piucquid shocoshēmpi 30ted meoatanu —quianec abi meneboed tsusiobo menenuc nidpac caondash.

⁴ Nidshun tsusiobo chuituidpac caondash. —Icsachitobi. Unēs uanuequido bēdambo icquidi bedmehitombi. Nēid mimbi meneboed mibi menenuc chobi. Nē bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic.

⁵ Adoquien Nuquin Papa tabadte shubu uashunaid shēcuēn ambi bedboed shocoshēmpi piucquid ansecanec nidash uano cuenash tētaniadpac caondash Udas.

⁶ Aden piucquid shocoshēmpi ansecacsho bedashien tsusio dapabo: —Nuqui dayun uaid shocosh utsibēdta dayun uatiapimbo iquec. Unēs uanuen meniaid shocoshēmpi dayun uatemaidd quedenque.

⁷ Matsu nacnenquidēn tied bedquin nēid menenuna. Nuquin matsespenquio isedquido unēsacsho ambo chococanun aid tied bednuna —qeshun piucquid meniac caondash.

⁸ Aidon bedacsho isun nēbi aid tied cuēnquin nadopec. —Unēs uamequidēn bedaid tied nec —capec.

⁹ Aden Udasēn shocoshēmpi 30ted menete nuquin tsusedpa Edemias caidēn dada uapampicpaden napac caondash. Naden dada uapampic. “‘Aid bednuen Isadaidbon piucquid shocoshēmpi 30ted meneuidaid bedoashun

¹⁰ matsu nacnenquidēn tied bedquin meneoapondash,’ quequin Nuquin Papan chiaid dada uaombi,” quepampic Edemias.

Pidato caidēn Esus chuimiaid

(*Mad 15.2-5; Duc 23.3-5; Uan 18.33-38*)

¹¹ Adnubien isadaidbo yuaquid ancanquid Pidaton Esus bēacsho chuipac caondash. —¿Min matses isadaidbo chuiquid dapamboda mibi nepe? —caquien Esusēn: —Ai, aid nebi —capac caondash.

12 Adnubien abi chieshënquidon muaquin Esusën naid Pidato chuipac caondash. Adsho tantiashun Esusën ëcbedenquio icpac caondash.

13 Adshobien Pidaton Esus padpiden chuioaquin: —Mibi icsaid dadpen chuipec. ¿Tantienquioda ique? ¿Ëcbedantiapimboda ique? —caquien

14 ëcbedenquio icpac caondash Esusën. —Nëidon muauac nebi —quequin chienquio icsho tantiash: —Adquid tantiambo iquembi —quepac caondash Pidato.

Esus unës ua, quequin chiaid
(*Mad 15.6-15; Duc 23.13-25; Uan 18.38-19.16*)

15 Nuquin Papan isadaidbo unës uainquio icquin matamiampid tantiate ushëmbi seta utsin-utsinquin Pidaton quënën nauedaïd isadaidbo abentsëc cuemedeneç. Pidaton: —¿Tsutsi abentsëquimbi cuemepe? —cac isadaidbon chiacpadquid abentsëc cuemedeneç.

16 Esus bëabi icnuc uimanëmënquidquio Badabas cuëmëdquid nauedpac caondash.

17 Adnubien Esus cuidte chuïsho tantianuec cho-choash dadpenquio tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caïdtambi cuemepe? —capondash.

18 —Esus chieshënquidon: “Nuqui padenquio yanuc nuqui dëniaquec Esus chuïquid dapa yanushe,” queshun Esus bëaccosh. Nëmbo fabadquidon: “Esusquio cueme,” capashuni —quequin tantiaquin aden chuïpanëdash Pidaton.

19 Adashic matses icsaido cuidte chuïnuec tsadte dapan abucquio tsadto-pondash Pidato. Adshobien yuan chuituidpondash. —Min chïdon: “Chuitan,” cac chobi. Esus caic: “‘Aïd dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quïosh’ quequin chuitan,” min chïdon cac chobi mibi chïec —quequin aton yuan chuituidpac caondash.

20 Adnubien Esus chieshënquido tsusiobon ambo tabadquido chuïbudpondash. —Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

21 Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash.

22 Adoaquien Pidaton: —Ma Esus Quidistu caïd. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

23 Adoaquien Pidaton: —¿Atotsïeshun mimbi adope? ¿Atotsi icsa uasho mimbi adope? —caquien buëdanquieç cuëdec: —Cuesten dectanquin unës ua —quecuededpondash.

24 Adsho —Padi icnuna —caqui niacbidanquieç adequi unës uate bunquieç cuesantiadpambo yansho isash: —Acte beccho —quepondash Pidato. Bëacsho tasun dapan cushtotanec mëpamëdquin abitedi ismepondash. Adashic Esus caic: —Nëïd unës uametiapimbo iquebi. Nëïd unës uamete bunec mïbien cuidadtequidombo nendac. Ëmbien adotiapimbo iqueç. Mëpamëdec bëchish ucudachimboec mimbi icsamïaid ucudebi —quïash mëpamëdquin ismepondash Pidaton.

25 Adsho tantiashien: —Con nabobëdtsëqui adequi cuidadtequidombo icnuna —quecuededpondash abitedimbo.

26 Adsho tantiashun Badabas caïd cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

Esus mamëshunaid
(*Mad 15.16-20; Uan 19.2-3*)

²⁷ Adoaquien sondadon Pidaton shubun Esus yuedshun: —Isec cho — cac aton sondado utsibo dadpen cho-chopac caondash. Cho-choshon Esus mamëshumbededpac caondash unës uanumbi.

²⁸ Abi dasiuidaid ënapen icquid chicshun: —¿Chuiquid dapada nedi? — quequin dashcute piumbo icquid dasiuintanquin

²⁹ mauete pinchuc-pinchucpambo icnuc nacnenaid mauemepac caondash. Adshumbic aton matses chuiquid dapan sananacimboen sananic abiuçshun cueste sanamepac caondash. Adshumbic aton matses chuiquid dapa ismiacimboen mamëshunquin: —Is. Isadaidbo chuiquid dapambo neque —queshun danëshën sebudquin Esus ismepac caondash.

³⁰ Adshumbic dacuishtucatanquin ambi cueste sanameboed bedshuntanquin aidëmbi matombudnepac caondash.

³¹ Aden mamëshuntanquin ambi dasiumboed chictanquin aton dashcute-bidi dasiunoapac caondash. Adoshon: —Ma unësnequin cuesten dectanec nidnu. Nid —quequin Esus buampac caondash.

Esus cuesten dectanaid
(*Mad 15.21-32; Duc 23.26-43; Uan 19.17-27*)

³² Buanquin Esus abi dectante cueste yuëmemebanquimbi dada nidaid Sidene caid yacnuësh choquid Simon cuëmédquid Esusën yuëmiaid sondadon chiadtoembidampondash.

³³ Adobidanec nidec macuësh dapa yacno matses mapi canitebimboec isadquid Codocota caid yacno chopondash.

³⁴ Choshombien sondadon uba chinaid actequid paëmbo dauë nēcushaid Esus meneuidpondash. —Në. Ac —cac pictšec tantanec: —Padi —quepondash aquenquio yec.

³⁵ Adshobien cueste napotiaid bëboedën dectampondash. Dectanshumbic ambi chicshumboed Esusën dashcute bednequin sondadobon abi cuëmédquidtedi dada uabanshun tēchun sandoshon cadotanequin dada uatempi puduemiaid isbanquin Esusën dashcute bedbampondash.

³⁶ Adash: —Esus unëso isnu —quec sondado tabadcuededpondash.

³⁷ Adshumbic: —“Nadquid icsho cuidquin unës uac,” quequin ma isquidon tantianu —queshun cueste cuëshën naden dada uapaccondash. —Nëidquio Esus nec. Isadaidbo chuiquid dapambo nec —quequin dada uaid Esusën mapino dectampondash.

³⁸ Ampequid daëd cuesten ëquë dectambudcuenquin dectantanquin nënantanquio Esus dectampondash.

³⁹ Adshobien podqued cuëmanquio Esus diadsho isbidanequin chieshënquin chuipondash.

⁴⁰ —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaid yec bud. Nuquin Papan madombo yec unësenquio yec auëshquiobi bud —cabidanepondash.

⁴¹ Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamëshunec nadpondash.

⁴² —Utsibo ismenuembien comapenen tantiaquin matses bēdamechitosh. Ademibidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi.

43 “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unēsenuio icsho isnu –quepondash tsusiobo.

44 Adnubien abēda cuesten dectamboedon ampequidontsen Esus mamēnshumpondash.

Esus unēsaid

(Mad 15.33-41; Duc 23.44-49; Uan 19.28-30)

45 Adnubien ushē cuembo icnuc inchēshbocpadquieic inchēshpondash. Ushē cuembo icnuc inchēshtanec ushē budambi ushēmbo yanoapondash.

46 Ushēmbo yanubien Esus comapenec cuēdec nadpondash. –Eloi, Eloi, lama sabactani –quec con onqueten cuēdpondash. –¿Atotsieshun ēbi bēdamboen isenuio yano, Papa Edoen? –quec adondash.

47 Adec cuēdsho tantiaish isquido nadpondash. –Edias yampid cuēnchitequien nec –quiampondash.

48 Adnubien Esus isec tabadquid abentsēc titinquianec nidshun shapushapupactsēcquid bedtampondash. Bedtanshumbic actequid mucacquid anidtsēcquidēn shapushapupactsēcquid punshun cuate dēdectanshun abuc sananec: –Chishmenu –queuidpondash.

49 Adnubien abi isquido: –Padi. Nuquin tsusedpa Edias yampid choshon budmesho isnu –quepondash.

50 Adnubien padpidec buēdanquieic cuēdtanec Esus unēspondash.

51 Esus unēsnubi Nuquin Papa tabadte shubu uashunaid yacnuēsh: –“Quēnē uquēducquidēn Nuquin Papa tabadtembo nec,” caidēn utsi puduednushe –queshun dashcute ēnapen icquid dectanaid abucueš canchedbudcuenac caondash abitiombi. Nuquin Papan ambi bēdamboen iste tantiamenuen nanēdash. Adnubien nidaid uēdēquequidēn cuēnote dapa dadpen cuēshēdbudnepac caondash.

52 Adec unēsaid nauēdaid shēcuē bētashte cuēnote dapambo cuēshēdnubien Nuquin Papa tantiaquido ēnden unēsaido abentse-abentsec uincuenanec chopac caondash.

53 Esus uincuenanec adec uincuenaidon shubu dadpen icquid Edusaden caid yacno nidshun matses dadpen ismepac caondash.

54 Nidaid uēdēquenec dacuēdampambo icsho isashien: –Esus unēsō isnu –quiash tabadquido sondado chedo abi chuiquidbēdi dacuēdtanec: –Ma Nuquin Papan Madombobi nepayoc –quepac caondash.

55 Adnubien chidobo Cadidia yacnuēsh Esusbēd choquin abi codocashumbo Esus unēsō isnuec ancuenashun isec tabadpac caondash.

56 Nēidted icpac caondash. Nēidic Madia Mactada yacnuēsh choquid. Nēidic Madia utsi Acobon tita. Aid Ose cuēmēdquidēn titabidi niosh. Nēidic Sebedeyon chido Uanēn tita. Aid Acobo cuēmēdquidēn titabidi niosh. Aidtedi uanoshon isbededec tabadpac caondash.

Esus chococaid

(Mad 15.42-47; Duc 23.50-56; Uan 19.38-42)

57 Adnubien inchēshbudtsēcqui aton na dadpen dayun uaquid shubu dadpen icquid Adimateya caid yacnocquid Ose caid: –Esus tantiaquid nebi –quianec Esus bedec chopac caondash.

58 Choshombic chuiquid dapa Pidato caid chuituidpac caondash. –Esus bednuec chobi –cac aton yua chuiquin: –Ma buanu. Bedmetan –capac caondash Pidaton.

59 Aden bedtanshun Osen Esus dashcute bēchish nibēdquidēnquio nuamboshē icnuc datanedonepac caondash.

⁶⁰ Adotanquimbic nidaid cuēnoteuidpambo icquid macuēsh tsimpiduc shēcuē uaboed ambi: —Ēbi unēsacsho nauedte nendac —caidēmbi Esus nauedpac caondash Osen. Adotanquimbic cuēnote dapabidi bētashte uaid bin-cumbēshun bētempac caondash. Adotanec nidpac caondash Ose.

⁶¹ Adnubien Madia utсібѣd Mactada yacnuēsh choquid Osen Esus nauedsho isbosh ambobi tsadpac caondash.

Esus nauedaid isec sondado tabadaid

⁶² Isadaidbon obeca bacuē unēs uacpadēn Esus unēs uamiash abentsec ushahi chonoadtemaid ushēmbi Esus chieshēnquido Pidato caid chiec nidpac caondash. Padiseyobobēdi nidshun chuiquid dapabon Pidato chuituidpac caondash.

⁶³ —Esus nadpadenec. “Unēsash daēdec ushah uincuenendabi,” quec muapadeneque.

⁶⁴ Daēdec ushquin min sondado Esus nauedaid cudasmeta. Esusbēd icboedon chicshun buanushe. Aden buanash: “Uincuenaccosh,” quec muanushe. Unēsabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshē ictsiashē. Min sondado: “Cudasta,” quequin chuita —capac caondash Esus chieshēnquidon.

⁶⁵ Adoaquien Pidaton: —Ai, con sondado buantan. Aden buanshun: “Unēsaid nauedaid cudasec databēdta,” cata —capac caondash.

⁶⁶ Adoaquien isadaidbo tsusiobon sondado buanshun cuēnote dapa bētashaid bucun bēbitaccapac caondash. —Bēbitaccaid isash: “Chuiquid dapan bēbitaccamiaid nec. Cuidnushe. Esus chictiapimbo iquebi,” mā quenu —queshun bucun bēbitaccapac caondash. Adoshon: —Beduanushe. Isquieq tabadta —capac caondash sondado chedo chuiquin.

28

Esus uincuenaid

(Mad 16.1-8; Duc 24.1-12; Uan 20.1-10)

¹ Esus unēsbon abentsec ushah abi chonoadtemaidēntsen abentsebidi ushah dominco badiadnuc chidobo Esus nauedshun bētimboed isec tabadnuc padpidec choapac caondash. Mactada yacnuēsh choquid Madia utсібѣd isec choapac caondash.

² Choash isec tabadnubi nidaid uēdēquiampac caondash. Adnubien Nuquin Papan abi yacnoshon uaid mayan bēda abucuēsh budtanquin cuēnote dapa bētashaid shēcbempac caondash. Adtanec cuēnoten tsadtopac caondash.

³ Mayan bēda yec abu bed-bedquiacbimboec ushēmboshē bēchamauanquieq icpac caondash. Aton dashcute adquiobidi bēchish nibēdquieq ushumboshē icpac caondash.

⁴ Adec dacuēdampambo icsho isashien unēsaid cudasquido sondado dacuēdtanec uēdēquec tantiadempambo yec padishbudnepac caondash abitedi.

⁵ Adnubien mayan bēdan Madia chedo chuipac caondash. —Dacuēdenda. Cuesten dectanquin unēs uaboed Esus isnuec mibi tabadec.

⁶ Nibēdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuioapac caondash.

⁷ —Mimbi isboed Esusbēd icboedo chiec nid. Badedquio nidshun naden chuita. “Unēsboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien

⁸ auëshquiobi chidobo dacuëdboedi cuishonquec titinguanec nidane pac caondash.

⁹ Titinguanec nidanesobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icho nec —quequin ismenuen danëshën sebudquin taë uidën uapac caondash.

¹⁰ Adoquien Esusën: —Dacuëndenda. Con utsibo ëbëd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuensho isun sondadon muuaid

¹¹ Madia nidnubien Esus nauedaid isquido sondado abi chomeboedo isadaidbo chuiquido chiec chopac caondash. Mayan bëda chonoc Esus uincuemboed chuituidpac caondash.

¹² Adoquien isadaidbo chuiquidon aton chuiquid utsibobëd onqeshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —qeshun piucquid dadpenquo menepac caondash.

¹³ —Mimbi isboedquo chienquo icquin naden chuita. “Ëbi chedo ushtoan abëd icboedon Esus ampequin beduanaccosh,” quequin utsibo chuita.

¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —qeshun

¹⁵ piucquid meniac bedanec nidec isadaidbo chuiquidon chiacpadec muapac caondash sondado. Adembidi nëbi isadaidbo dadpenshun: “Esus ampiac,” quequin chuiuoic.

Ëbi chuibeneta, quequin Esusën chiaid

(Mad 16.14-18; Duc 24.36-49; Uan 20.19-23)

¹⁶ Adnubini Esusbëd icboedo 11tedi yec Esusën chiacnombo Cadidia yacno nidec macuësh dapa yacno nidanepondac.

¹⁷ Macuësh dapa yacno nidquimbi Esus istuidpondambi. Istuidshumbic: —Con Icho neque. Ismenu —qeshun danëshën sebudpondambi. Utsibombien: —¿Con Icbombobida nepeba? —capondash.

¹⁸ Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec. Abitedishun Icbombo icquin abitedimbo namequidquo nebique. Mibitsen namenu.

¹⁹ Nidaid utsi-utsiec yacno nidshun ëbi tantiaquido icmenuen matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nëidbëd Nuquin Papan Mayan tabadeque. Utsibo ismenu,” quetanquin aden acten mentobeneta.

²⁰ Mimbi mentoaido chuiban. “Nuquin Ichon chiacpadec bëdamboec tabadnuna,” quequin ëmbi chuiboedtedi chuiban. Mimbi adosho isash mibëd iquendabi. Nidaid abitedi nibëdanabi icnuc mibi chedo nianenquo iquendambi. Adembidi ëbi tantiaquidotedi niantiapimbo iquebi —quepondash Esus ënquimbi chiec.

MADCOSËN DADA UAID

Bëyuc choshon Uanën Esus chote chiaid

(Mat 3.1-12; Duc 3.1-18; Uan 1.19-28)

¹ Madcos nebi. Nuquin Papan tantiampicpadquiec aton madombo Esus abi yacno matses yuedquid chote tauamboen chiaid bëda chuinu. Tantia.

² Abi aton mado Esus chiec onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chome-ndambi. Aidën chuibanac ambi tantiaid icsa ënshun mibi cainquidombo iquendac, mado.

³ Shubu nibëdacnoshon comapenec onquequin mibi chotequid aidën chuibanendac naden:

Nuquin Icho choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

⁴ Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibanpondash. Mibi icsaid ënshun Nuquin Papan chiaid tantiaquin nabanta. Aden tanti-aquidquo icsho mibi cuidenquo yec mibi icsaid Nuquin Papa bëpiscudendac quequin chuibanpondash. Aden chuibanquimbi ambi chiacpadomboen naquid acten mentobampondash Uanën.

⁵ Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chiec utsi-utsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash.

⁶ Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaid tsiuquid niondash. Sh-ioshbimboecquid shuishun pequid niondash. Bacun chequid niondash.

⁷ Aidëmbi naden chuibanpondash: —Con tsyuecquid choendac. Aidi natiamboequin naquidquo nendac. Aidi bëdamboshëcquid icnuc ëbi icsaquid icsho çatotsishun aid choec quequin chuiquidquo Nuquin Papan icmioshi? quec tsadebi.

⁸ Mibi acten mentoquid nebi; aidien abipadquiocquid aton Mayan meni-anquidquo nendac —quepondash Uan.

Esus acten mentoaid

(Mat 3.13-17; Duc 3.21-22)

⁹ Adnubien ambi chian-chianaidquo Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash.

¹⁰ Aden acten mentoac Esus pudundonobi abu bëcadoacnoëshquo dëbimbimboec isadquid abipadquiocquid aton Mayan bede-bedequemboec Esusbëd icnuc budpondash.

¹¹ Aden budmetanec ambi bëcadoacnoëshi: —Mibentsëcquiobi icsho ëmbi tantiaidquo mibi nec, mado. Ëmbi bëdamboen isaidquo mibi nec —quepondash aton Papa Esus chiec.

Esus Nuquin Papan chiaid niacmenuequin Satanasën tanaid
(*Mat 4.1-11; Duc 4.1-13*)

¹² Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi.

¹³ Ambo tsadquimbi ushë abentsëc nidmec utsi choaid abutometsëcquieq tabadpondash. Ambo tabadshobi Nuquin Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon cho-choshon nashumbededpondash.

Cadidia yacnoshon tauamboen chuibanaid
(*Mat 4.12-17; Duc 4.14-15*)

¹⁴ Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmëpondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash.

¹⁵ —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiata —quepondash Esus comapenec onquec.

Ëbëd iquec cho Esusën abia caido
(*Mat 4.18-22; Duc 5.8-11*)

¹⁶ Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash.

¹⁷ Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus.

¹⁸ Adsho tantiash nëshaid abëd icquid menianec abi chuiquidbëd nidanepondash.

¹⁹ Adanec undictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin.

²⁰ Aden nacnensho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemiaid
(*Duc 4.33-37*)

²¹ Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenquo yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash.

²² Aden chuisho tantiashun: —Ambia tantiaquidën chiacpadomboen Esusën chuibanec. Utsiambien adomboen chienquo iccosh —quec onquec tabadcuededpondash.

²³ Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash:

²⁴ —Esus Nasaded yacnoësh choquid mibëd icquidpenquo nebique. Nidec nid. ¿Chian anëdënquiacno ëbitedi nidmenuecta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuduedtsaid onquepondash.

²⁵ Adoaquien: —Otaquio tabad —quetanquin: —Dapuduen —capondash Esusën.

²⁶ Adoac comapenec abi dapuduedaid uëdëquenec sidquianec dapuduempondash.

²⁷ Adsho isash: —¿Abimbodambi ispo? ¿Mitsipadquidquio nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiapadomboen mayan icsan naic —quec onquecuededpondash Esusën naid chiech.

²⁸ Adec onquecuededash auëshquio nidaneshun ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabededpondash.

*Simonën nachi bëdamaiaid
(Mat 8.14-15; Duc 4.38-39)*

²⁹ Ambi chuisho tantiaboedo nidanenubien Petedo Simon caidën shubu yacno Esus Acobo Uan aitedi nidpondash. Aidën shubun icquidbidi aton utsi Andedes icpondash.

³⁰ Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin.

³¹ Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquio bëdampondash. Adec bëdanash nidtoshon codocashun abi choquidtedi pemebampondash Simonën nachin.

*Esusën dadpen bëdamaiaid
(Mat 8.16-17; Duc 4.40-41)*

³² Adnubien inchëshbudtsëqui Capednaun caid yacnocquidën daicsaidtedi bë-bëpondash. Adembidi mayan icsa dapuduedaidtedi bë-bëpondash.

³³ Bë-bëash Simonën shubu shëcucë cuëmano puduedabi tabadcuededpondash.

³⁴ Adsho isun daicsaidtedi Esusën bëdamebampondash. Adembidi mayan icsa dapuduedaid dapuduembampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe qeshun oncamenquiocpondash.

*Shubu nibëdacno Nuquin Papabëd onque Esus onquiaid
(Duc 4.43-44)*

³⁵ Adashic badiadte anoentsëqui yanubi isucunanec puduanec shubu nibëdacno Esus nidpondash. Nidec tabadtuidshun Nuquin Papabëd onquequin chuibampondash.

³⁶ Esus nidacshobi isucunshun Petedo Simombëd icquidën nibënampondash.

³⁷ Aden nibënquin istuidashi: —Mibi isec cho-choquidtedishun mibi nibëmbededec —quepondash Esus caic.

³⁸ Adoaquien Esus: —Capucuenequin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsisec dadpen yacno nidnu. Nid —quepondash.

³⁹ Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuiopondash. Adembidi mayan icsa dapuduemeopondash.

Nami mishac tantiadenquiocquid bēdamiaid

(*Mat 8.2-4; Duc 5.12-13*)

⁴⁰ Aden Esusën chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bēdame —quequin Esus chiec comapenec cuēdpondash.

⁴¹ Adec cuēdshobi nēid isash unēsquo iquebi quequin equēducshun tanti-aquū mishec Esus: —Mibi bēdamembique. Bēdambo icta

⁴² —quenubi daicsaid nibēdquo yec bēdampondash.

⁴³ Aden bēdametanquin nidmepondash: —Nidec nid.

⁴⁴ Nidquimbi, Esusën bēdamioshi quequin chuituida. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bēdambo icquin anocquid, Nuquin Papa matses chiec onquianequid, isme. Adoshon dēbimbiecquid daēd meneta Moisesën chiacpadomboen ma anocquidēn napanuëshun. Aden meniac abentsēc cuesuneshun utsi cuesunenu quenquiocquin cuesuniaidēn intac puntanequin intac mibi daseccashun dēbimbiecquid utsi cuemeshun naden aidēn mibi chuipec. Nuquin Papan mibi bēdamboen istiapimbochoedi nēbi bēdamboen mibi isendac. Aden chuiquin mibi bēdamiaid Nuquin Papan naid nec quequin tantiatsiash —quepondash Esus ambi bēdameboed chiec.

⁴⁵ Adsho tantiaboshombi niacbidanquin Esusën bēdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibēdacno capupondash. Adnubien Esus nibēnec nidaid utsi-utsiec yacnoēsh dadpen cho-chopondash.

2

Cuembo yec uishquiaid Esusën bēdamiaid

(*Mat 9.2-8; Duc 5.18-26*)

¹ Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash.

² Dadpen cho-choash puduedash tsucus-tsucustsēcquo yec tabadnubi adecbidi shēcūē cuēmano tabadpondash. Adec tabadsho isun Esusën Nuquin Papa yacno shubu abentsēquēn tabadte iquec quequin chuibampondash.

³ Adnubien cuembo yec uishquiaid bēec dada daēd-daēdquiec 4ted chopondash.

⁴ Cho-choshon matses tsucus-tsucustsēcquo yec tabadsho isun decatoshon macano nacenaid chic-chictanquin Esusën dayunquo uishquiaid imbudpondash.

⁵ Aton dayunquo imbudsho isun Esusën bēdamec quequin abi imbudboedēn tantiec quequin ambibi tantiapondash Esusën. Adashic: —Mado, mibi cuidenquo yec mibi icsaid bēpiscudobi —quepondash Esus.

⁶ Adnubien isadaidbo tsusedpabon nadomboen nata quequin chiaid tantimequidon ambobi tabadquin naden onquenquiocquin icsamboen tantiapondash.

⁷ ¿Atotsi quiash adec Esus onquepeque? Tantianu. Nuquin Papa icsamboen chuiquidien aid nechitec. Nuquin Papauidi matses cuidenquo yec abi icsaid bēpiscudquid nec, quetsēcquiec tabadpondash.

⁸ Aidon tantiaid tantiec nadpondash Esus: —¿Atotsieshun aden mimbi icsamboen tantiape?

⁹ ¿Mibi cuidenquo yec mibi icsaid bēpiscudobi quequin ëmbi chiaidquo bēdantequidpenda nedic? Adecbidi, ¿Mibi icsambochoedi mibi bēdanoque.

Nidtosyon mibi imbudboed chiadtosyon buanec nid quequin ëmbi chiaid bédantequidpembidida neoadic?

¹⁰ Ai, adquidquiobidi nec. Mibi cuidenquo yec mibi icsaid bēpiscudobi queboed chidon tishac matses yanaid yequi chuiquidmibi Esus nec quequin tantiesabo mibi nepec. Adquid icsho ëbi tantiamenuequin

¹¹ cuembo yec uishquiaid naden chiembique Tantia. Mibi icsambochoedi mibi bēdamiombique. Nidtosyon mibi imbudboed chiadtosyon buanec nid – capondash Esusën.

¹² Adoaquien nidtosyon abi imbudboed chiadtoanguin buampondash. Aden buansho isash: –Nideque. Is. Adomboen nasho isamboccondambi – quetsēcquieq onquiash Nuquin Papan naid nec quec cuëdëncuedepondash.

*Ëbëd iquec cho Esusën Debi caid
(Mat 9.9-13; Duc 5.27-32)*

¹³ Adashic padpidec chian Cadidia caid cuëmano nidoapondash Esus. Ambobi tabadnubien aidën chiaid tantianuec matses dadpen cho-choapondash. Cho-choasho isun Nuquin Papan chiaid chuibanoapondash Esusën.

¹⁴ Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuënondash. Nidaid utsi yacno aton na utsibon buanbuansho isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoaquid Debi nepondash. Isadaipembo ancaquidën, Con matsespembon piucquid bedshunta, cac bedshunoaquid Debi nepondash. Adshobien: –Ëbëd iquec cho –Esusën cac: –Ai, mibëd nidnu. Nid –quianec badedi Esus tsibananec Debi nidpondash.

¹⁵ Adshumbic Debin shubuno nidshun Esusbëd icquidon pepondash. Ashunquiobidi aton na buansho isun piucquid bedshunquid Debipadquidën utsin-utsinquien pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash.

¹⁶ Aden adquidbëdtan Esusën pesho isun isadaidbon nadomboen nata quequin chiaid tantiamequid padiseyobo caid: –¿Atotsieshun piucquid bedshunquidbëdtambi isadaidbon nadomboen nata quequin chiaid naisabëdtambi mibi chuiquidën pepec? Tantianu. Ëbi chui –quepondash padiseyobo Esusbëd icquido chiec.

¹⁷ Adsho tantiasien Esus: –¿Dada bédambocquidta dauëchoquidën bédametequid nedic? Padenquo. Daicsaidien dauëchoquidën bédamec. Adquiecbidi, icsaisa nebi quequin ambibi tantiaquid icsho mibi icsaid ënta. Aden ënash ëbëd icquid mibi iquendac quequin chiesa nebi. Icsaquid nebi queshun mibi icsaid ënta. Aden ënash, ëbëd icquid mibi iquendac quequin chuiquid nebi –quepondash Esus.

*¿Atotsi quiash mibëd icquid buna mëmunesa nec? quiaid
(Mat 9.14-17; Duc 5.33-39)*

¹⁸ Adnubien abi chuiquid quënën nauedan aid tantiec unësquioquin Uan acten mentoanquidbëd icquidën buna mëmunubi padiseyobobëd icquidon unësaid tantiec unësquioquin buna mëmunopondash. Aden buna mëmunsho isanec nidequi Esus yacno nidash Esusbëd icquidon buna mëmunenquo icsho isash utsibo: –¿Atotsieshun Uambëd icquidon adembidi padiseyobobëd icquidon buna mëmunubi mibëd icquidon buna mëmunenquo icpec? Tantianu. Chui –quepondash.

¹⁹⁻²⁰ Adoaquien Esus: –Aton chido bednru pambid meniac chidon codocasho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquioquin isuidenquo iquec. Yucash chido inquid nibëdanan abëd

icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec.

²¹ “Adembidi dashcute shëñibëdta chucambocquid bëtuscaisa matses nec. Shëñibëdta chucambocquid bëtuscatsaid amëec canchedoaic. Adecbidi abi icsaid ënesa tantiaid bëda pausudtiapimbo yec icsabudec.

²² Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bëenquiocquin. Adecbidi Nuquin Papan tantiapadec pausudnu quëshun mibi icsaid ënacsho isun Nuquin Papan pausunendac —quepondash Esus.

Chonoadtemaid ushë icbo nebi quiaid
(Mat 12.1-8; Duc 6.1-5)

²³ Adnubien chonoadtemaid ushë utsi icnuc ënapen capuenquiocquin tied matanquin adosbiecquid trico caid ëshë bedshun Esusbëd icquidon pepondash.

²⁴ Adshobien: —Mibëd icquido is. Chonoadtemaid ushën chonoadeque. Abi chuiquid mibi iquec ¿atotsi quiash, Padi. Chën, quenquio ique? — quepondash padiseyobo Esus caic.

²⁵ Adoacquien Esus: —¿Chuiquid Dabidbëd icquidon natia bunquin ambi petemaid pepondash quequin dada uapampid fantiamboda icconda?

²⁶ Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan meniac sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuiddtsëqui nec quenquiocquin abëd icquido tantiaquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

²⁷ Aden chuishumbic naden padiseyobo Esusën chuioapondash: —Nabanash tiboedte matses bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Chonoadtemaid ushë nec, quepadenebi con pabëdi. Aden chiequi matses tiboedte ushë aton icbo ictiapimbo iquec.

²⁸ Aid ushë icbo icquin ëbëd icquidon bunquin pebededsho isash, Padi. Chonoadtemaid ushë neque. Aden penda, quenquioccobi —quepondash Esus abi chieshëñquido padiseyobo chiec.

3

Mëuesadaid Esusën bëdamaid
(Mat 12.9-14; Duc 6.6-11)

¹ Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi

² Esus chieshëñquid padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bëdamepeque. Nëid badiadën bëdamesho isun bedmeshun quënën nauedmenu quetsëcquiec padiseyobo tabadcuededpondash.

³ Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

⁴ Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nëid ushëndambi matses

bëdamepe? ¿Bëdamenquiocquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

⁵ Adoaquien nëishtanquimbi abi chieshënquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bëdampondash.

⁶ Adosho isash puduenanec nidquin edodesbo padiseyobon badedquio istuidpondash. Aido istuidash: —Esus cuesunete mibi bunacpadquiec bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

Esus yacno matses dadpen choaid

⁷ Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash.

⁸ Adnubien Esusën nabansho isboedon chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantias cho-chopondash.

⁹ Adec cho-choash tsucus-tsucustsëcquio yec tabadquin tsicatiac nënantanquio tsadacnoëshi catashnushe quiash Esus: —Cano bec cho —quiampondash abëd icquidquio caic.

¹⁰ Dadpen bëdamiosh cadoshe. Ëbitsen bëdanu quequin ambibi tantiaquin Esus mishbededpondash.

¹¹ Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash.

¹² Adoaquien: —Padì. Aden ëbi chienda —quepondash Esus.

Abëd 12ted icquid Esusën tantiamenu caid (Mat 10.1-4; Duc 6.12-16)

¹³ Adashic macuësh dapa yacno nidnushi abëd 12ted icquido chomeshun nadopondash:

¹⁴ Ëmbi tantiacpadomboen mibitedi tantiamembi. Adquid icquin ëbëd tabadquin ëmbi chiacpadomboen mimbi tantiabenendac. Aden tantiabenacsho isun ëmbi chiacpadomboen chuimenuen mibitsen nidmembi.

¹⁵ Adembidi mayan icsa dapuduedaid dapuduemequidbidi mibi icmembi quequin abëd icquido Esusën chuipondash.

¹⁶ Ambi tantiamenu caid nëidtedi icpondash: Simon cashumbic Esusën Petedo capondash,

¹⁷ utsibic Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash.

¹⁸ Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash.

¹⁹ Utsibic Udas Iscadiote, aidi abi chieshënquido Esus bedmenush Esusbëd capuquid nepondash. Aidtedi Esusën tantiamequin chuiquin ismiaido niondash.

*Bedtsibu caidën dausunaid Esus nec quiaid
(Mat 12.22-32; Duc 11.14-23; 12.10)*

²⁰ Aidtedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquio icpondash.

²¹ Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²² Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantièmequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënuqid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapudedaid dapuduemec —quepondash.

²³ Adoaquien Esus: —Mimbi icsamboen tantieque. Mibi chuibanu. Tantieci tabadta. ¿Mayan icsan icbo ambi dapudedmiaid dapuduemequidta nepadic? Padenquio.

²⁴ Adquiecbidi shubu icbo abëd icquido cuëshëdmesa nec.

²⁵ Icbon abëd icquido cuëshëdmiaish shubu abentsëquën tabadiapimbo iquendac.

²⁶ Adembidi ambi dapudedmiaid dapuduemiash adquidën icbo ictiapimbo Satanas iquec. Icho icnuequid abëd icquid puduemesa nec.

²⁷ Dadpenshun icbo Satanas nec. Adquid icquin ambi matses dapudedmiaid dëniacanquidënuqidquo nadatiambocquin nabanquin cuemepec. Adquid icquin ëmbi nac mayan icsa dapudedaid Satanasën yua icboedi icbombo tantieci bëdambo yanec ëbëd iquendac.

²⁸ Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho tantiashun Nuquin Papan aid pauquendac.

²⁹ Utsien Nuquin Papan Mayan abipadquidën tantiamiac nasho isun Satanasën naid nec qesho pauquenquio iquendac. Adquid ënëdenquio yec icsaquid nendac —quepondash Esus

³⁰ Satanasën tantiamiac mayan icsa dapudemquid Esus nec abi caquido chieci.

*Esus yacno aton utsibo anibëd choaid
(Mat 12.46-50; Duc 8.19-21)*

³¹ Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chieci.

³² Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash.

³³ Adoaquien Esus: —Adquid utsi chuinu. Tantiata.

³⁴ Në tabadquido ëbëd icquido neque. Is —quepondash Esus abëd iccuedquido chieci.

³⁵ Adashic: —Nuquin Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

4

Tantiamequin pete êshê nësecain chiaid
(Mat 13.1-9, 18-23; Duc 8.4-15)

¹ Adashic padpidec chian cuëmano nidshun Esusën tantiamequin chuibanopondash. Aden chuibanuc cho-choquid dadpen icsho isash cano antabêdtopondash cho-choquid acte cuëmano tabadnubi.

² Adec tabadshobi, matses nadquio iquec quequin tantiaquin tiedën caniq-uid êshê Esusën tantiamequin naden chuibampondash:

³ –Tied icho pete êshê nësecanuec aton tied yacno nidquid.

⁴ Adec nësecanuec nidshun pete êshê nësecac maisec pudun-pudunaid uicchunën chequid.

⁵ Adnubien nidaid cuënote dadpen samëdacno utsi-utsiec paëdash bad-edquio dëyucuidtsash

⁶ tapunenquio iquec ushën shoedec.

⁷ Adnubien pete êshê utsi-utsiec nisanquid dëyucacno paëdash dëyucash canidouditsacsho nisanquidën bëtinac podo sinash bacuëtiapimbo iquec.

⁸ Adnubien nidaid bédambo yacno paëdaid dëyucaid caniaash dadpen pete êshê icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec –quepondash Esus.

⁹ Aden chiaash: –Ëmbi chuiboed tantianu quiash bédamboen tantiec papudedta –quepondash Esus.

¹⁰ Aden chuibanash uidtsëc Esusbëdi nidshun utsibo choenquiocsho isun databêdtuidquin abêd icquidon: –Mimbi chuibamboed tantianu. Ëbi chui –capondash Esus chuiquin.

¹¹ Adoaquien: –Nuquin Papan shubun tabadquid tantiamendambi utsi-boembi, Mibi nadquido iquec, quenquiocquin chuibanoc.

¹² Aden chiac:

“Nuquin Papan nabamboed isto-istoboedi ma padenquio tabadteneyoc. Adembidi tantiado-tantiadoneboedi ma padenquio tabadteneyoc. Aidon abimbo tantiaquin abi icsaid êntsiandac. Aden abi icsaid ênsho isun cuidenquio yec Nuquin Papa abi icsaid bëpiscudtsiandac” –quepondash Esus abêd icquido caic.

¹³ Aden chiaashic: –¿Mimbítsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibanasho mimbi tantiape? Ëmbi chuiboed nad iqueque. Tanta. Chuinu.

¹⁴ Pete êshê sequidbimboecquid Nuquin Papan chiaid chuibanquidquio nec. Êshê ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiate nec.

¹⁵ Nidaidën paëdash pete êshê dëyuctiapimboesho uicchunën chiaidbimboec matses utsi-utsiec iquec. Adquid Nuquin Papan chiaid tantiaash papudednu qesho Satanasën bëpiscudmiac tantienquio yanec Nuquin Papa yacno puduedtiapimbo iquec.

¹⁶⁻¹⁷ Nidaid cuënote dadpen samëdacno pete êshê paëdash badedquio dëyucuidtsash tapunenquio yec ushën shoedaibimboec matses utsi-utsiec iquec. Adquid Nuquin Papan chiaid tantiauidash bédambo iquec queboedi ¿Esus tantiaquid nebi quecta icco? quequin utsibon mamënsnunac badedquio tantiesa nebi quendac.

¹⁸⁻¹⁹ Nisanquid dëyucacno pete êshê paëdash dëyucash canidouditsacsho nisanquidën bëtinac podo sinash bacuëesabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nënaid, abi icsaid aidtedi tantiaquin Nuquin Papan chiaid tantiesa yanshun bédamboec

tabadaid ismesa yanec. Adquidën Nuquin Papan chiaid tantiaquid utsi icmetiapimbo iquec.

²⁰ Èshë utsibic nidaid bédambocquidën paédash dëyucash caniash dadpen bacuë icquidbimboec matses utsi-utsiec iquendac. Adquid Nuquin Papan chiaid tantiadonec bédamboec tabadquin utsi ismequid nec. Aden ismiac Nuquin Papan chiaid tantiaquid daédpactsëc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshë yanendac —quepondash Esus abéd icquido tantiamenuec.

Tabote nënantan nanac chënquiacbimboec ictiad quiaid
(Duc 8.16-18)

²¹ Aden chuishumbic abéd icquido naden Esusën chuipondash: —¿Tabote ichon ambi dayun uaboed taboshon tsadte tédion nanshun isaidta nedic? Adembidi ¿Tabote matsun bëtashun isaidta neoadic? Padenquio. Nënantan tabote nanac chënquiacbimboec ismenu quec ictiad.

²² Adquibidi abi yacno yuedanquid ambi dayun uapampidi nëbi Nuquin Papan dayun uainquiocquin ëbi chomeshun ismec. Adembidi con mado chuiban quenquicochoedëmbi nëbi ëbi ismec ma con mado chuibanu quequid con Pa nec.

²³ Ambi chiaid tantianu qeshun tantiaquiec papuedta —quepondash Esus.

²⁴ Aden chiashe Esus: —Chiaid bëda tantiatequidquo iquec qeshun tantiaquiec papuedquid icta. Aden chiaiduidi tantiec papuedquid abipadquid bédambocquid ambia tantiaquidën Nuquin Papan mibi icmendac.

²⁵ Adquid ambi tantiadoniaidquo iquendac. Aden tantienquioctscquidën tantiaid bëda uesadendac nibëdquiec —quepondash.

Ambi siaboed ichon isenquiocnoc bacuëec quiaid

²⁶ Adec onquequin abéd icquidquo chuishumbic cho-choquidtsen naden Esusën chuipondash: —Nuquin Papan shubu abentsëquën tabadec caidaidquo chuibanu. Tantiata. Nidaid bédan tiedën caniquid pete èshë siash

²⁷ tabadquin cainquidquo icbo nec. Dadpen ushquin ambi seboed isenquo yec icbo tabadnubi

²⁸ ambi seboed dëyucash caniec tautitanec bacuëec.

²⁹ Ambi siaid isenquiocnoc canitanec bacuëacsho badedquo bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidën isenquiocnobi. Papuedquioshon tantiabenece. Adquid isash con shubun puduedquido neque. Bednu quependac Nuquin Papa —quepondash Esus.

Mostasa caid èshë chiaid
(Mat 13.31-35; Duc 13.18-19)

³⁰⁻³² Adec onquequin chuibanashic Esus: —Nadquo Nuquin Papan shubun icquido iqueque. Chuinu. Tanti. Mostasa caid pistsc èshëmpi ictscquid nësecaid dëyucash nuamboshë caniec cuidi-cuidipambo iquec shubu-shubupambo yec podoece. Ambo uicshunën shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

³³ Aden chuibanshumbic adomboembidi Esusën chuibanpondash. Aden chuibanash, aidtedquo tantiapec abibi qeshumbic aden chiaid chuiquin èmpondash Esusën.

³⁴ Aden abited chuibanshumbic abéd icquiduidtsëqui bédamboen tantiamequin chuipondash.

*Acte tëccoasquiaid ënëd cac ënëdaid**(Mat 8.23-27; Duc 8.22-25)*

³⁵ Adashic abi ushëmbi inchëshbudtsëc cano antabëdtoanec Esus: —Chian uquë cuëma utsiuc nuquiuiddtsëqui nidnu. Nid —quiampondash abëd icquido caic.

³⁶ Aden chiac chian cuëman tabadcuededquido niananec badedquio nidquin canon Esus buampondash. Abëd icquidon potenubien cano antabëdtoanquin utsin-utsinquien potepondash.

³⁷ Aden potenubien cunquequid dapan acte tëccoasquequin cano acte uemi-aidën mentoadtsempondash Esus tëotadec ushñubi.

³⁸ Adec uec usho: —Cunquequid dapan acte tëccoascaidën nuqui men-toeque. Isucunta, icbo —quequin Esus timpondash.

³⁹ Aden tinac uëtsëdtoshon Esusën: —Mibi comapenec cunqueque. Ënëd —cac badedquio ënëdpondash. Adembidi: —Mibi comapenec tëccoasqueque. Ënëd —cac badedquio ënëdoapondash acte.

⁴⁰ Aden ënëdmetanec Esus: —¿Atotsi quiash ëbi tantienquio yec dacuëdcuedede? Ëbi tantiesa mibi nepec —quepondash abëd icquido caic.

⁴¹ Adec Esus cuëñubi badedquio cunquequid dapa ënëdposh. Adechidi acte tëccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecuededequi uëdëquianquiopondash abëd icquido.

5*Mayan icsa dadpen dapuduedaid bëdamiaid**(Mat 8.28-34; Duc 8.26-39)*

¹ Adshumbic acte tëccoasquec ënëdmebon nidquimbi cuëma utsiuc potiasnidaid Cadada cashumbic Quedasa caid yacno choapondash.

² Ambobi choash pudundosho mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash.

³ Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid icboedi nadatiambo yanshobi mëtanetiapimbo yampac caondash.

⁴ Abi mëtaniaid shocosh bucu seccuduatanquin tës-tëstenepac caondash. Adosho isac abi tanebocpadquid utsi nibëdpac caondash.

⁵ Aidi inchëshën capucuenequi mëyanacximboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶ Aidi abi yacno Esus canon chosho isanec titinquianec choash: —¿Tsusio, ada cho? —quiashic:

⁷ —¿Mibëd icquidtabi nedi? Mimbi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita —quepondash mayan icsa dapuduedaid Esus chiec.

⁸ Adec mayan icsa dapuduedaid abi onqueshobien Esusën: —Dapuduen —cashic:

⁹ —¿Tsusio cuëmëdquid mibi ne? —quepondash Esus.

Adoquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yacximboec onquec.

¹⁰ Adashic: —Mibi nadatiambocquid cadoque. Ëbitedi chian anëdënquiacno nidmenquiocnuequin ¿nëid nidaidën adabi tabadmetsia? —quepondash mayan icsatedi.

11 Adnubien macuësh potseshun chanco dadpenshun pec tabadpondash.

12 Aden pec tabadsho isashien: —¿Ada mimbi ëbitedi chanco dapuduedmetsia? —quepondash mayan icsa Esus caic.

13 Adoaquien: —Dada dapuduededash chanco dapuduedcuededta —Esusën cac dapuduededash acte dapa quiusudacnombo compapeneq niquec pudun-pudunec mentoadbudnepondash chanco nibëdquieq.

14 Adsho isash chanco pemequin isquido chiec nidanepondash. Adec nidquimbi shubu dadpen icquid uano-uanoec tabadquido chuituidac aidot-sen isec cho-chopondash.

15 Esus yacno cho-choshon mayan icsa dapuduedaid bëdamiosh quequin chuituidac mayan icsa dapuduedaid icboed naden isbededpondash. Dash-cute dasiuidesa icboedi dasiuidash tsadsho abimbo iquec quequin isbeded-pondash. Aidën tantienquicoeodi tantiec tsadsho adembidi isbededoapon-dash. Adec tsadsho compapenen isbededequi nadatiambocquin naid nepc quetsëcquieq tabadcuededpondash.

16 Adec tabadsho isun mayan icsa dapuduedaid bëdamequin chanco dapuduedmesho isboedon cho-choquido tantiamenuen chuibampondash.

17 Aden chuisho tantiahsun cho-choboedon: —Nëmbo tabadenquio yec nidec nid. Mibëd tabadtiapimbo iquebique —capondash compapenen Esus chushcaquin.

18 Adsho tantiahs cano yacno nidequi cano Esus antabëdtonobien mayan icsa dadpen dapuduemoed choash: —Mibëd icte bunebi. ¿Adabi buane? —quepondash.

19 Adoaquien: —Padi. Min shubuno nidtan. Ambo nidshun mibi bëdamequin mayan icsa dadpen dapuduemeboed Nuquin Papa tantiaquin chuiban. Nuquin Papan ëbi ad icsho unësquicoquin dapudueiac quequin chuiban —quepondash Esus.

20 Aden Esusën chiaquin nidpondash. Nidequi shubu dadpen icquid yacno-yacnomboec nidand nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bëdamiash, quec abibi onquec tabadcuededpondash.

Nua intac budaid bëdameshun champi unësaid bëdamiad
(Mat 9.18-26; Duc 8.40-56)

21 Adshumbic canon Esusbëd icquidon padpiden abi chobocmibidi chian poteoapondash. Adec chosho isash matses dadpen chian cuëmano pad-pidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash.

22 Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adec choquimbi Esus istuidash mibi bëdamocquid nec quequin ismenuec Esus tauebudshun:

23 —Con champi unëseque. Aid mishquin bëdamec cho —cac

24 Aidobëdi Esus nidpondash.

Adec nidshobi matses dadpenshun tsibanampondash. Tsucus-tsucustsëcquio yec nidquin Esus tsibanampondash.

25 Esus tsibanquidquio chido utsi icpondash. Aid chido seta 12ted matamec intac budash bëdanenquicquid icpac caondash.

26 Dauë meniaqui bëdanenquio icpac caondash. Dauëchoquid utsi-utsien yuqcquid menequin dauë bedshun chequi bëdanenquio yec intac nuambo yampac caondash aton piucquid naimëdnubi.

27 Adec intac icnubi capuquin Esusën nabanaid chuisho tantianec nidquimbi matses dadpenshun tsibananubi aidëntsen tsibanampondash.

Aden matses dadpeshun tsibananubi ismenquiocquin cachoc choshon Esusën dashcute mishpac caondash.

²⁸ Aden aton dashcuteuidsëqui mishec bédampatsiash icmane qeshun mishtsequi bédampac caondash.

²⁹ Intac bédanenquiocquid Esus mishec bédampac caondash. Ęmbi tantiacpadqueiqui bédanobi quequin ambibi tantiapondash.

³⁰ Adec chido bédanubien Ęmbi nadatiambocquin naoc quequin tantiec amibidi bidiadquin isec Esus: —¿Tsuntsimbini mishposh? —quepondash.

³¹ Aden chuisho tantiashun abëd icquidënquo: —Tsucus-tsucustsëcquio matses dadpen iquec, ¿tsuntsimbini mishosh, quecta ique? —capondash.

³² Adec abëd icquid cuëdnubi onquenquiocquin, ¿Midaquidënquo mishoshibique? Isnu, abibi quequin matses utsi-utsien bëispondash Esusën.

³³ Aden bëisbanubi, Ęmbi mishoc quenquo yec bédamboed uëdëquec choequi mibi nadatiambocquin naquid nec quequin tantiequi Esusën taëno uebudshun abi mishec bédanaid chuibampondash.

³⁴ Adoquien Esusën: —Champi, mimbi tantiacpadqueiqui mibi bédanoc. Dada icsambo ichoedi nëbi dada bédambo mibi iqueque. Bédambo yec nid —capondash chido chuiquin.

³⁵ Aden nidmenubien Aidon shubun icquid cho-choshon: —Min champi unësoshe. Tsusio chomenda —capondash Aido chuiquin.

³⁶ Adnubien Aido Nuquin Papan chiaid chuibante shubun tabadquido isquid caic: —Dacuëdenquiocquin ëbi tantiata —quepondash Esus.

³⁷ Aden Aido chuishun Esusën: —Cho-choenda —capondash abi tsibanuequido chuiquin. Aden chianec Petedobëdta Acobo Uan, Acobon utsimbo aïtedi buanec Esus nidpondash.

³⁸ Adec nidequi Aidon shubuno choquin comapenec shubicuededsho tantiatuidpondash.

³⁹ Aden tantiequi puduedash Esus: —¿Atotsi quec comapenec shubicuedede? Champi unësenquo yec ushachimboec uec nec —quepondash.

⁴⁰ Adshobien tantiesa icquin mamënshumbededpondash. Adoquien aïtedi puduemiasch champin tita aton papa chedo abëd icquidbëd champi yacno Esus puduedpondash.

⁴¹ Ambo choshon mëdante mëdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash.

⁴² Adoac badedquio isucunash nidtoash capupondash. Champi seta 12ted icquid niondash. Aïdi bédansho isun abitedishun, Adopenshenda iquec quequin isbededpondash.

⁴³ Aden champi bédameshun Esusën: —Ęmbi naboed utsi chienda. Abimbo caimbi. Abentsëcquiobi chienda —capondash. Aden chuitanequi: —Champi peme —quepondash Esus.

6

Abi icnëdacnoshon Esus chieshënquido (Mat 13.53-58)

¹ Auëshquo puduanec nidequi abi icnëdacno Nasaded caid yacno Esus choapondash. Abëdi abëd icquido chopondash.

² Ambo tabudashic chonoadtemaid ushën Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden chuibansho tantienguiocquid abentsëc: —¿Mitsishun chuibansho tantiashun adomboen Esusën chuibampec? —quepondash.

Adnubien utsi: —¿Mitsicquidën ismiac Esusën nadatiambocquin nabampec? —queoapondash.

³ Adnubien utsi: —Nëmbocquid, cuëte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nëidtedi nëmbo tabadquid nec. Nëdic Acobo, utsibic Ose, utsibic Udas, utsibic Simon. Nëmbobidi aton chibi chedo tabadoaic —quetsëcquieac tabadec onquecuededec chieshcuededpondash.

⁴ Aden chieshënaqui Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshënquid aton matses iquendac. Aton shubun icquido adecbidi iquendac —quepondash Nasaded yacnoquido chieac.

⁵ Aido abi chieshënquid icsho isun nadatiambocquin nabantiapimbo icpondash. Èbi bédamepec quequin tantiaquidquo daëdpactsëc icsho mishquin bédamepondash.

⁶ ¿Atotsi quiaash ëmbi chiaid tantiatipimbo icpec? Adembidi nadatiambocquin nasho istiapimbo icpec quepondash Esus abibi onquec.

Abëd icquido Esusën nidmiaid

(Mat 10.5-42; Duc 9.1-6)

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash.

⁷ Adec cuenadquin chuibanequi abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshundaëdshunquien chuibanec nid. Chuibanquimbi mayan icsa dapuduedaid dapudemetata.

⁸ Nidquin dadpen mitsana sauedshun buanenda.

⁹ Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuiddec nidaneta.

¹⁰ Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanoata. Adenuidi naquin chuibanta.

¹¹ Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta —capondash Esusën abëd icquido chuiquin.

¹² Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomboen nabanta quequin chuibampondash Esusën nidmiaidon.

¹³ Adembidi mayan icsa dapuduedaid dadpen dapuduemepondash aidëmbidi. Adembidi nënquid dadpen daicsaid chedo cuëte bacuë bëchichoquid ënë dachinquin bédameoapondash Esusën nidmiaidon.

Uan acten mentoanquid mapi butiaid

(Mat 14.1-12; Duc 9.7-9)

¹⁴ Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpenshun Esusën nabanaid tantiapondash. Aden tantiaash: —Uan acten mentoanondaid mapi butemeboed uncuempash icnu. Adec uncuenshun nadatiambocquin nabanec nepanui —quecuededpondash tantiaquido.

¹⁵ Adnubien utsibo: —Ediasien nechitec. Nuquin Papan chiampicpadquieac choashien nec —quecuededpondash.

Adnubien utsibo: —Nuquin Papan chiaid chuipampidien Esus yanchitash —quecuededpondash.

¹⁶ Adnubien Edodes: —Ëmbi mapi butemiondaid, Uan pado, uincuempash icnui —quepac caondash.

¹⁷ Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash:

¹⁸ —Min utsin chido mimbi bedaid natemaïd niosh —qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuïsho dadpeshun tantianushe qeshun Uan bedmeshun quënën nauedmepac caondash Edodesën.

¹⁹ Adoaquien Uan Edodiasën chieshënquin: —Uan cuesunemetiadquidi mibi nec —quepac caondash aton bënë Edodes caic.

²⁰ Uan bëdamboquid Nuquin Papan chomiaïdbidi nec qeshun Edodesën Uan cuesunemetiapimbo iquec cudaspac caondash con chidon cuesunemenushe qiaish. Aden tantiaquin Edodesën abi tsadacno Uan chuïbamenuen chomedenepac caondash. Uanën chuïbansho tantiash: ¿Atotsimbi nëïd napeba? Ambi chuïbanaïd bëdambo iquec. Aidën chuïsho tantiash bëdambo iquebi, abibi qeshumbic Edodesën chomedednepac caondash chuïsho tantianuen.

²¹ Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeopac caondash Edodesën. Cadidia yacnocquido chuïquid dapabobidi chomeopac caondash.

²² Aden aidtedi cho-chomiaish tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bëdamboen mimbi naoc —quecuededpac caondash Edodesën chomiïdo champi caic.

Adec onqesho tantiashien Edodes aton chidon champi caic: —Mibi bunaid mibi menenu. Ëbi chui.

²³ Abimbo caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi —quepondash.

²⁴ Aden Edodesën chuïsho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Ëbi chui,” Edodesën caoshi. ¿Atotsimbi chuïpe, tita? —quepac caondash ani chiec.

Adsho tantiashun anin: —Uanën mapi bunebi quequin chuita —capac caondash aton champi chuïquin.

²⁵ Aden chiaquien badedquïo Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuïbocpadomboen chuituidquin.

²⁶ Adsho tantiash Uan tantiec unësquïo icpac caondash Edodes. Adc unësquïocquin ambi champi chiacpadomboen natiapimbo iquec ëmbi chomiïdo quenushë qeshun adoembi abibi qeshun:

²⁷ —Uanën mapi bec cho —capac caondash Edodesën ambi cuesuneta caid chuïquin. Aden chiac Uan quënën nauedacno nidshun mapi butanquin

²⁸ maspanën nandoshon bëshun champi meniac bedshun champin aton tita menetuidpac caondash.

²⁹ Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chocopac caondash.

*Dada 5000ted Esusën pemiaïd
(Mat 14.13-21; Duc 9.10-17; Uan 6.1-14)*

³⁰ Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash.

³¹ Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquo iccuededpondash Esusbëd icquidon. Adnubien Esus: —Matses nibëdacno tabadec nidnu. Nid — quepondash abëd icquido caic.

³² Aden chiashic cano antabëdtoanec matses nibëdacno nidpondash aidtëdsëqui.

³³ Adec nidsho isash matses dadpen abi nidte yacno tantiec: —U nidanec —quiash titingue choec abia cho-chopondash. Abia titinguequid cuensho isash utsi-utsiëc dadpen titinguec cho-choapondash.

³⁴ Adec aidtedi abia cho-choambien Esusbëd icquido choapondash. Pudundoquimbi matses dadpeshun abi cainec tabadsho isashien Esus, Abi tantiamequin Nuquin Papan chiaid chuiquid nibëdacimboecnuc matses cho-choec quequin tantiec unësqüo iquebi qeshun tauain chuibampondash Esusën. Yuen chuibampondash.

³⁵ Yuen Esusën chuibanubi ushë budpondash. Ushë budsho isun abëd icquidon: —Icho, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme.

³⁶ Nidmiac shubu yacno nidshun piucquid menequin ma aton pete bedpapunna penun —capondash Esus chuiquin.

³⁷ Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquo yoc —quepondash abëd icquido Esus caic.

³⁸ Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid doted iquec —quepondash.

³⁹ Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin.

⁴⁰ Adoac ambi chiacted-tedquiec tabadbudpondash.

⁴¹ Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbibi nadatiambocquin naid ismembu —qeshun cuësh-cuëshun: —Meneban —Esusën cac abëd icquidon menebampondash.

⁴² Menebanac piash: —Padi. Piombi —quecuededpondash pequido.

⁴³ Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash.

⁴⁴ Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenuiocquin dadatedictsëqui tambampondash 5000ted iquec quequin.

Acte bëntse Esus choaid

(Mat 14.22-27, 34-36; Uan 6.16-21)

⁴⁵ Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembu —quepondash Esus abëd icquido caic.

⁴⁶ Adoac canon potenubi matsestedi nidmianec matses nibëdacno macuësh yacno Nuquin Papa chuinuec Esus nidpondash.

⁴⁷ Adnubien inchëshbudtsëqui abëd icquido acte nënantanquo canon noadpondash. Ambobi noadnubi Esus abentsëqui mananuc tsadpondash.

⁴⁸ Ashunquio Esusën isaquien abëd icquido bëdiactsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadiapimboconoc acte bëntse choquin abëd icquido Esusën ismetuidpondash.

⁴⁹ Datantsensho isash, Mayambien nechitec, quequin ambibi tantiec sidquecuededec

⁵⁰ dacuëdcuededpondash.

Adsho isumbien: –Ëbibi nëbique. Dacuëdenquio yec tabadta –capondash Esusën.

⁵¹ Aden chuitanec cano antsadtonobi comapenec cunqueboedi ënëdpondash. Aid ënëdsho isash: –Adquidshenda nepec –quepondash abëd icquido.

⁵² Panëmpi daëdpactsëc ictsëcquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquio icoapondash pamunacimboecquin.

⁵³ Ashunquio chian potiashtic nidaid Quenesaded caid yacno choshon cano nëshpondash.

⁵⁴ Aden nëshash mananuc pudundosho isec anocquido, Aidi bëdamianquid nec, quequin ambibi tantiaquimbi

⁵⁵ daicsaid aton ueten nandoshon Esus yacno bë-bëpondash.

⁵⁶ Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, qeshun daicsaido bë-bëpondash. Adoac –Min dashcute ëbi mishme –capondash bë-bëaidon. Aden ambi tantiacpaden Esusën dashcute mishash bëdancuededpondash.

7

Nuquin Papan paucaid (Mat 15.1-20)

¹ Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon,

² Ëmbi mishboed mishtemaid ictsiasht, qesa iquec tsusedpabon chuinëdacpadquiec mëpanudabi Esusbëd icquidon pesho ispondash.

³ Padiseyobo isadaidbobidi yec tsusedpabon chuinëdacpadquiec penush mëpanudanequid nec.

⁴ Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsi-utsiec dadpen iquec. Ambi chuinëdacpadomboen dëshotetsen cachonouidi dapanquidquibidi nec. Adembidi matsu nacenaid cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinëdacpadomboen naquidquio nec.

⁵ Aden nabanquidquio padiseyobo nec. Adquibidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacpadquiec Esusbëd icquido mëpanudenquiocsho isash padiseyobo: –Atotsieshun mibëd icquidon tsusedpabon chuinëdacpadomboen nainquiocquin mëpanudabi pepec –quepondash Esus caic.

⁶ Adoquien Esus: –Isayasën ëndenquio dada uaquin mibitedi bëdamboen chiampidpadquid mibi nec. Ambi dada uampid nad iqueque. Tantia:

“Nuquin Papa bédambocquid nec quequin chiacpadomboen tantiesa isadaidbo nec.

7 Abia Yampidênquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquio nec.”

8 Aden tsusedpabon chuinëdacpadomboen nabanquin Abia Yampidênquio chiaid niacquid mibi nec –quepondash Esus isadaidbo tsusiobo caic Nuquin Papan Isayas dada uamepampid tantiamenuc.

9 Aden chuishumbic adomboembidi chuoiaic: –Badedquio Nuquin Papan chiaid chieshênquin tsusedpabon nadomboen nata quequin chuinëdacpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape?

10 Nuquin Papan chiacpadomboen Moisesën dada uampid nad iquec: “Titan papabêdtan chiaid chieshenquiocquin naban.” Adquidên chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec.

11 Mibien tsusedpabon chuinëdaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuoiaic. Aden chuiquin papabêdta tita tantiaquin nashunenquiocquin Nuquin Papan chiaid niacquid mibi nec.

12 Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoiaic utsibo. Adecbidi, Tita, mibi nashunquin menetiapimbo iquebi, queoiaic.

13 Aden chuiquimbi titabêdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec –quepondash Esus isadaidbo tsusiobo caic.

14 Aden Nuquin Papan chiacpadomboen niacquido chiashic: –Utsibo, tantiec cho. Mibi bédamboen chuinu. Bédamboec papuedta.

15 Tsusedpabon chuinëdacpadquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic.

16 Embi chiaid tantiaquin utsi chuibanta –quepondash Esus.

17 Aden chiash iccuededquido abi tabadnubi shubun puduedash tabadpondash Esus. Tabadsho isash: –Mimbi chuiboed ëbitedi tantieme –quepondash abêd icquido.

18 Adoaguien: –Utsitedishun tantienquio icbocpadquido mibitedi neque. Tantia. Mimbi piaidên mimbi tantiaid icsabudtiapimbo iquec.

19 ¿Min tantiate yacnoda mimbi piaid nidpec? Padenquio. Mimbi pi-aid min pucu yacno bud-budec auëshquio chimu nëncuenash pudueneç –quepondash abêd icquido caic.

20 Aden chiec onquiashic: –Mimbi tantiacpadquiequi mibi icsabudec.

21 Chido mimbi inacmaid isash chudtiadquio iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquio iquebi quequin mimbi tantiacpadomboen mimbi ampec. Cuesunetiadquio iquebi quequin mimbi tantiacpadomboen mimbi cuesunep. Utsin chido chudtiadquio iquec quequin mimbi tantiacpadomboen aidi mimbi chudpec. Dada utsin ëbi bédaidquiocsho ispec quequin mimbi tantiacpadomboen min bënëpenquio chudmequid mibi nec.

²² Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu queshun isuidesa iquec adomboen bedbanquidquo mibi yampec. Mibibi icsambocquid nec quiaish chieshëmëquid mibi nendac. Adquid abimbo chiacbimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bëdambo icsho isash chieshëmëquid mibi icpec. Utsi icsamboen chuiquid mibi nendac. Utsin chuisho, Èbentsëqui tantiaquidquo nebi, quequin mamënshunquid mibi nendac. Adembidi nasho mamënshunoaquidbidi mibi nendac. Èmbia tantiaquid nebi, quequin mimbibi nabanaid icsa isash bëdambo iquec quec mibi mamënec tsadec.

²³ Èmbi chuiboedtedi icsaquidën naid nec. Aden tantiaquid icsabudte nec –quepondash Esus.

Sidopenisia caid yacnoësh chido ambi tantiacpadquiec bëdanaid (Mat 15.21-28)

²⁴ Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsëqui yacno choash shubun puduedash: –Nëmbo ëbi choaid chienda –quepondash Esus. Ambi chiacpadpenquiocnoc chuisho tantiaquid anocquidon.

²⁵ Adoac: –Esus chosh –quesho tantiaquid mayan icsa dapuduedaidën tita Esus tabadacno nidpondash. Adec nidec puduedequi Esus tauebudpondash chuiquid dapa nec quequin tantiec.

²⁶ Isadaidpembon chido nidaid Sidopenisia caid yacnocquid niondash. Aidi Esus tauebudash: –Con champi mayan icsa dapuduedaid dapudueme, tsusio, –quepondash comapenen chiec.

²⁷ Adoacquien Esus: –Mabi con matses isadaidboba bëdamenuec choboc. ¿Bacuëbo cubudabicnubi opashëmepida pete menequin anin bënëpadic? Padenquo. Adembidi, ¿isadaidbotedi bëdamiabidambi matses utsibo, isadaidpembo, bëdamepadi? –quepondash Esus.

²⁸ Adsho tantiaquid chido: –Icbo, mimbi bëdamboen chiec. Padnuen anin meniac bacuëbon pete sananaid cuëshëmipi paëtsascho opashëmipi ambibi bedshun pec. Adembidi mimbi nadatiambocquin nabanac isadaidbo dadpen bëdanubi isadaidpembo abentsëc tantiaquid yec bëdanoapec –quepondash chido.

²⁹ Aden chidon chuishobien: –Bëdamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid –capondash Esusën isadaidpembon chido chuiquin.

³⁰ Adsho tantianec choec shubun puduedquin isaquien aton champi uebocno ënden mayan icsa niqúan bëdanash abi ushaidëmbi uec.

Pashu buëd onquenquiocquid Esusën bëdamiaid

³¹ Adashien Tido caid anoentsëcuësh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash.

³² Ambo choash tsadnubien dada icsa, pashu buëd onquenquiocquid, Esus yacno bëash tsadquin: –Nëid mishquin bëdame –capondash.

³³ Adsho tantiaquid iccuededquido ismenquiocnuen udictsëc dada icsa buanshun aton mëdante bushbi pashun pabiate pausuntanquin chicpondash Esusën. Adshun, min anatsen mishnu quetanquin ismequin uicchn mëpidadnanquin pashun ana mishpondash.

³⁴ Aden amishec abuc isec: –Epata –quepondash. Paucud, quec adpondash Esus.

³⁵ Adec Esus cuëdnubi pashu buëd onquenquicoeboedi tantiadcuenash onquiampondash.

³⁶ Aden pashuaid bëdamiash: —Esusën naid nec quequin chienda — quepondash Esus. Adoboqui niacbidanquin chuibampondash.

³⁷ Aden chuisho tantiash: —Adquidshenda Esus nepec. Ambi naidtedi bëdambo iquec. Pashu paucquid nec. Adembidi ana onquesa oncamequid nec —quec onquecuededpondash.

8

4000ted matses Esusën pemiaid (Mat 15.32-39)

¹ Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpondash:

² —Matses bunec tabadsho isash unësquio iquebi. Daëdec ushec ëbëd tabadquin aton pete uesquin piac.

³ Aton pete nibëdsho isash, Pec nid, quetiapimbo iquebi padishnushe quiaish. Ënapenuësh dadpen cho-choash nec —quepondash Esus abëd icquido chiec.

⁴ Adoaquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abëd icquido.

⁵ Adsho tantiashien: —¿Tedtsi panëmpi mitsana iquec? —quepondash Esus.

Adoaquien: —Siete iquec —quepondash abëd icquido.

⁶ Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash.

⁷ Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiambi, Papa —queshun: —Nëidtsen meneban —Esusën cac menebanoapondash.

⁸ Aden menebanac piash: —Padi. Piombi —quecuededpondash. Aden piambien napi uaid tsitanën sandoquin abëd icquidon bedaid tsitsan sieteted icpondash.

⁹ Peboedo dada caniaid dadpen 4000ted icpondash. Chidon aton bacuëbobëdtambi pepondash.

¹⁰ Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

Nadatiambocquin nata. Isnu, padiseyobo quiaid (Mat 16.1-4; Duc 12.54-56)

¹¹ Aden potiash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹² Adsho tantiash, Ëbi tantiesa nec, quec unësquio yec tsadequi —Ëmbi naid dadpen mimbi ispaboc. ¿Adosho isboshida, Ëbi isme, queoape? Nadatiambocquin nabanquin ëbi isme caqui ismenquio iquembi. Abimbo caimbi —quepondash Esus.

¹³ Aden chianec nidec cano antabëdtoanquin uquë cuëma utsiuc poteoapondash.

Nuquin Papan chiaidbëdta ambi chiaid daëd uaquin chuiquid padiseyobo (Mat 16.5-12)

14 Badedquoio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc.

15 Aden potequimbi Esusën nadopondash: —Pan uanuequidën trico caid putubëdta bidiscamete acte pistsec cacushaqui nua yec bidisquéc. Adembidi padiseyobon Nuquin Papan chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd icquido nec quequin tantiata. Aden tantiaquin padiseyobopadquid adecbidí Edodesbopadquid icmane qeshun ambi tantiacpadomboen nabanenda —capondash Esusën abëd icquido chuiquin.

16 Adsho Esusën chuiboed icsamboen tantiec abëd icquido: —¿Ëmbi panëmpi bëambo yaidta icbon chuipec? —quéc onquecuededpondash.

17 Aden chiec onquecuedednubien tantiaquidquo icquin Esusën nadopondash: —¿Atotsi quiaish ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquoio yec bëshu tsadacimboecta tsadpo?

18 Adecbidi ¿Ëmbi chuibanaid tantienquoio yec pashuacimboecta tsadoapo?

19 ¿Panëmpi Sted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Doseted iccosh —quepondash abëd icquido.

20 Adoaquien: —Adembidi, ¿nëbi siete panëmpi bedshun matsesën piaid napi uaid fedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abëd icquido.

21 Adoaquien Esus: —¿Nadatiambocquid Esus nec quequin ëbi tantienquioda mimi icpe? —quepondash abëd icquido caic.

Betsaida caid yacnoshon bëshu bëdamiaid

22 Adshumbic Betsaida caid yacno poteoapondash Esusbëdtambidi. Aden potiaish choso isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamaianquidquoio icquin mishquin bëdame —capondash Esus chuiquin.

23 Adsho Esusën bëshu mëdianquin Betsaida caid anoentsëqui buanshun uicchun bëcuishtuatanquin bëmishec: —¿Ada mimi isequé? Ëbi chui —capondash Esusën.

24 Adsho tantiash Esus isquin: —Bëdamboen isenquiocquín cuëte podò inchëshquoio yacimboecnuc mibi isembi —capondash bëshuaidën.

25 Aden chuishobi Esusën bëshuaid padpiden bëmishoquien bëucudquiopondash bëdamboen isec.

26 Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

Quidistu mibimbo neyoc, Petedo quiaid

(Mat 16.13-20; Duc 9.18-21)

27 Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chiec.

28 Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiaicpadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampidpadquidien Esus nechitec, quec —quepondash abëd icquido Esus caic.

29 Adsho tantiashun: —Ma mibitedishun ¿atotsibi cai? —capondash Esusën.

Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abéd icquid utsibo onquiachimboen chuioaic.

³⁰ Adsho: —Mimbi chuiboed utsi chienda. Abentsëcquiobi chienda —capondash Esusën abéd icquido comapenen chuiquin.

Abi unës uate Esusën chiaid
(*Mat 16.21-28; Duc 9.22-27*)

³¹ Aden chuishun abi unës uate tantiamequin abéd icquido Esusën chuipondash. Nuquin Papan chomiaid yec matesacsho isadaidbo tsu-siobon chieshënquin ëbi mëyanendac. Aden mëyanquin unës uaqi daëdec ushash uincuenoaindabi, quequin Esusën chuipondash.

³² Abi unës uatequid chuipecshenda niondash. Aden Esusën chiaquien aidbëdtsëqui uano nidshun Petedon: —Aden tantiaquin chienda —capac caondash.

³³ Aden Petedon chuisho tantiash aubidi bidiadquin abéd icquid utsibo isec Esus nadpondash: —Nidec nid, Satanas. Nuquin Papan tantiacpadpen-quiocnoc ëbi niacmenuequin icsamboen chuiquid mibi neque. Satanasën mua uac matesën tantiacpaden mimbi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

³⁴ Aden Petedo chuibanashic abéd icnuec cho-choquid utsibo caic: —Cho —quepondash Esus. Chosho isash: —Esuspadquid icnu queshun mibi bunaid nainquiocquin ëmbi chiaid tantiaquin nabanta. Ëbi mëyanacpadembidi mibi mëyante icnuc niaquenda.

³⁵ Esus tantiaquin ambi chiacpadomboen nanu queboedi unësmane quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmane quenquiocquin ëbi chuibanec tabadquid Nuquin Papa yacno tabadendac.

³⁶ Aden aton na dadpen bedbanashic Esus tantiesa yec unësash Nuquin Papa yacno puduedtiapimbo iquendac. ¿Adquidta bëdambo icpadic?

³⁷ ¿Nuquin Papa mitsana menecta abi yacno puduedpatsia? Padenquio.

³⁸ Utsi icnubi dacuëdec Esus tantiaquid nebi quesa chido aton bënë bunenquio yec dada utsibéd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesa caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abucshun uaido mayan bëdabobëdi nidaidën choaindabi. Adec aidobëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquido caic.

9

¹ Aden chiashic Esus: —Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

Esus bëdaidquio icmiaid
(*Mat 17.1-13; Duc 9.28-36*)

² Aden chuibanashic 5ted ushash: —Nidnu. Nid —quianec Esusbëd Petedo, Acobo, Uan, aitededi ambi chiactedi macuësh dapa yacno nidpondash. Ambo nidash tabadquimbi abi bëdambo isadaid aidon ispac caondash.

³ Abi dasiuidaid dashcute icboedi nac-nacquio yampac caondash.

⁴ Edias, Moises, aid daëd ënden yampidi Esusbëd onquesho ispac caondash Esusbëd choboedon.

⁵ Aden isequi: —Chuiquid Dapa, nuquibi nëmbo choash tabadquin mibi isec bëdamo iquebi. Min shubumpi 3ted icnu choash shubu uanuna mitsana, Moisesën na, Ediasën na, aidded icnuc —quepac caondash Petedo.

⁶ ¿Atotsimbi chuipe? quetiapimbo yec dacuëdcuededquin aden chuipac caondash Petedon.

⁷ Adec tabadshobien abu ushu choquidën ambo tabadquidtedi bëtimpac caondash. Aden bëtinacnoëshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibansho bëdamboen tantiata —capac caondash Nuquin Papan.

⁸ Adsho isbanquin isaquien Esusbëd choboeduidi icoapac caondash.

⁹ Adanec macuësh yacnoësh budtanequi: —Mimbi isboed nëbi chienda. Èbi Nuquin Papan mado matsesacsho unësmiac ëbi uincuenan mimbi isboed chuita —capac caondash Esusën.

¹⁰ Adsho tantiash utsi chienquo yec abi uincuemete ¿mitsipadquo icpec? quec abibi onquecuededpac caondash Esusbëd choboedo.

¹¹ Adec onquecuededash: —Nuquin Papan chomiaidquo choabicnuc Ediasba choendac quequin tsusedpabon nadomboen nata quequin chiaid tantiaguidon chuibanec. Ma Edias ëndenquimboshë chopampic —quepondash abëd icquido Esus caic.

¹² Adoaquien: —Ai, Ediasën matses bëdamboen tabadmenuen chiampidpadquidba choendac quequin Nuquin Papan chiaid nendac. Adem-bidi Nuquin Papan chomiaidquo yec matsesash nëbi tabadsho matsesën chieshënquin mëyanendac quequin chuipampid nec.

¹³ Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënquidën mëyanac. Èndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash —quepondash Esus abëd icquido chiec.

*Mayan icsan buëd onquetiapimbo icmiaid Esusën bëdamiaid
(Mat 17.14-21; Duc 9.37-43)*

¹⁴ Adec onquetanec choquin isquien matses dadpenschun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bëtimpandash.

¹⁵ Adnubien Esus chosho isash iccuededquido, Bëdamianquid choec. ¿Atotsi aidën napatsiashe? Isnu, quetanec titunque choec: —¿Ada cho? —quepondash.

¹⁶ Adoaquien: —¿Atotsi quec ëbëd icquidbëd comapenec onquecuedede? —quepondash Esus.

¹⁷ Adshobien: —Chuiquid Dapa, mibi ismenuen con mado bëombi. Mayan icsan buëd oncamenquyo yaid nec.

¹⁸ Aid Mayan icsan comapenen nebudteniac ëcbacush-ëcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquo iccosh —quepondash mayan icsan buëd onquetiapimbo icmi-aidën papa.

¹⁹ Aden chuisho tantiash abëd icquido caic: —Esus nadatiambocquid nec quequin ëbi tantiesä mibi nepec. ¿Tedectsi icshun ëmbi chiacpaden mimbi tantiabempe? Mibi tantiesä icsho ¿mitsipadembimbi tantiamepe? —queshumbic: —Madompi bec cho —capondash Esusën.

²⁰ Adsho tantiashun bëpondash. Bëshobi Esus istanquin mayan icsan abi dapudedaid comapenen cuididicamiampndash. Aden nac madompi uebudec ëcbacush-ëcbacushpambo yec cuididiquepondash.

²¹ Adsho isash: —¿Tedtsi seta matamec ad iccondashe? Chui. Tiantianu — quepondash Esus madompin papa chiec.

Adoaquien: —Bacuë ictsequi ad iccondash.

²² Cuëte dëtsiadaoid nënedeniosh abi dapudedaidën. Actetsen nënedeniosh unësmenuequin. Mibi bédamequidquo icquin ëbëdta tantiaquin ëbi con mado bédameshun —quepondash madompin papa Esus caic.

²³ Adoaquien: —¿Mibi bédamequidquo icquin ëbi con mado bédameshun quecta ique? Nuquin Papa nadatiambocquin naquid nec quequin tantiaquidën fantiacpadomboën Nuquin Papan naindac —quepondash Esus.

²⁴ Adsho tantiash: —Tantiambi. Èmbi abimbo tantienquiocsho isun ëbi tantieme, Icho —quepondash madompin papa Esus caic.

²⁵ Adsho tantiashun matses dadpen titinquec chosho isun mayan icsa chuiquin: —Matses buéd oncamenquiocquid mibi nec. Adembidi tantiametiapimbo icmequidbidi mibi neque. Ambo tabadenquo yec dapuduen —capondash Esusën.

²⁶ Aden chiaquien sidquec madompi cuididiquenubi dapuduempondash. Adnubien unësacimboec madompi uesho isash: —Unësosh —quepondash isquido.

²⁷ Adnubien madompi mëdintanquin Esusën uëtsëndopondash. Adoac abembi nidtopondash.

²⁸ Adnubien shubun puduedacsho: —¿Atotsieshumbimbi mayan icsa dapuduemetiapimbo icpo? —quepondash abëd icquido Esus caic utsibon tantienquiocnobi.

²⁹ Adoaquien Esus: —Dapuduen quequinuidi chuibudaqui adquidquo dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac — quepondash.

Abi unës uate chuioid

(Mat 17.22-23; Duc 9.43-45)

³⁰⁻³¹ Aden chianec nidaid Cadidia caid matanec nidpondash. Nidquimbi, Èbëd icquid 12tedtsëqui chuibanu, quec utsibo ismenquo yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuenpendac —quepondash Esus. Abi uincuentequid chiecshenda adec Esus onquepondash.

³² Aden chuisho bédamboen tantienquo yequi dacuëdec ëbi bédamboen tantiamequin chui quetiapimbo icpondash abëd icquido.

¿Mitsicquid chuiquid dapa icpec? quequin chiaid

(Mat 18.1-5; Duc 9.46-48)

³³ Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedën choec atotsi chiec onquecuededo? —capondash Esusën abëd icquido chuiquin.

³⁴ Adsho tantiash cuëdenquiocpondash abëd icquido. ¿Esusbëd icquid mitsicquid chuiquid dapa icpeque? Tiantianu, quec onquequin ambi chiaid chiënquo yec tabadpondash.

³⁵ Adec tabadnubi abi tsadacnoëshi: —Cho —quiampondash Esus abëd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

³⁶ Adec onqueshumbic bacuëmpi abentsëc mëdintanquin abëd icquid tabadacno nënantanquio tsadumbudpondash. Aden tsadumbudshun bacuë icquequi:

³⁷ —Esus tantiaquid nebi quequin ismequin bacuë yuedquin nashunquid ëbi yuedquin nashunacimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoacimboecquid neoaindac —quepondash Esus abëd icquido chiec.

Nuqui chieshënesa nuqui bëdamboen chuibanquid nec quiaid
(Mat 10.42; Duc 9.49-50)

³⁸ Adnubien utsin naid chiec Uan onquedopondash: —Icbo, mimi chiacpadomboen utsin chuisho tantiapombi. Aidën: “Esus nadatiambocquin naquidquo nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbëd icquidpenquo mibi neque. Adenda quequin chuipombi —quepondash Uan.

³⁹ Adoaquien Esus: —Padicnuna. Nadatiambocquin naquidquo Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec.

⁴⁰ Nuqui chieshënesa nuqui bëdamboen chuibanquid adquid nec.

⁴¹ Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bëdamboen naoaindac —quepondash Esus.

Icsa uanquin tantiabenabicquid ismequid cuidendac quiaid
(Mat 18.6-9; Duc 17.1-2)

⁴² Abi Esusën onquequin chuibanec: —Adembidi abi icsacpadomboen bëdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbëdta têtaneshun acte dapa nënepatecnëdan.

⁴³⁻⁴⁴ Adembidi mimi icsamboen tantiaquin mishaid ëntiapimbocquin ismedeniac adomboembidi utsin tantiec. Bednu quenquo yec mëtaniacimboec tsad ënëdenquo yec chian anëdënquiacno nidmane quiaish.

⁴⁵⁻⁴⁶ Adechidi capuquin mibi icsaid mimi ismebeneque. Capunu quequin tantienquo yec tateshuniacimboec tsadta ënëdenquo yec chian anëdënquiacno nidmane quiaish. Adec mibi tsadnuc adquiecbidi mimi ismiaid tantiec tsadendac.

⁴⁷ Adechidi ëshën isec mibi icsaid ëntiapimbocquin mimi ismedoniac adomboembidi utsin tantiec. Ëshë chicshuniacimboec tsad ënëdenquo yec chian anëdënquiacno nidmane quiaish ma mibi tsadacpadece mimi ismiaid tsadoapanu.

⁴⁸ Icsa uadenequin ënenquo yash unësash chian anëdënquiacno nidash unësenquiocshobi chodquiaid pequid macun mibi pendac. Ënëdenquo yec chian anëdënquiacno mibi tabadendac. Icsadenequin ënenquocquid comapenen cuidtequid nendac.

⁴⁹ Sa casecac pambid batambo yacimboec Esuspadquid icnu quiaish mibi icsaid ënëdnuen mëmunec mibi bëdambo yampec.

⁵⁰ Sa batambocquid bëdambo iquec. Sa batambochoedi batapenquo yec icsasho çmitsipadentsi batambo icmeoapec? Sa batambocquid casecac dädash batambo yacpadece utsibëd bëdamboec tabadta —quepondash Esus.

10

Aton chido bedshun nidmequid
(Mat 19.1-12; Duc 16.18)

¹ Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec mates dadpen cho-choapondash. Adec cho-chosho isun Nuquin Papan chiaid chuibanapondash Esusën.

² Adecbidi cho-choquid padiseyobon Esus Nuquin Papan chiaid icsamboen chuinu qeshun: —Aton chido bedash bunenquio yanshun cuemec. ¿Aden naicta bëdambo iqueque? Tantaranu. Chui —capondash Esus chuiquin.

³ Adoaquien: —¿Atotsi quequin Moisesën chuiampic? —queapondash Esus.

⁴ Adoaquien: —Aton chido bedash bunenquio yanshun, Con chido icsambocquid nec, quequin ambi tantiacpaden aton bënënen dada uashun nidmiachsho isash, Padi, quenquiocpampic Moises —quepondash padiseyobo.

⁵ Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic.

⁶ Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic.

⁷ Adomboembidi nanuec dada aton tita aton papabëd tabadenquio yec aton chido bedash abëdi ambi quënë uaidëmbi tabadec.

⁸ Aden aton chido bedash tabadequi mates abentsëc icboedi daëdec. Mates daëd icboedi abentsëc yacbimboec tabadec.

⁹ Aden dada aton chidobëdta Nuquin Papan daëd uacsho ma cuëshëdmenquio icpanuna —quepondash Esus.

¹⁰ Aden chiash shubun puduedacsho: —Mimbi chuiboed ëbitedi tantiam —capondash abëd icquidon.

¹¹ Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec.

¹² Adembidi chido aton bënënen bedac aton bënë nianshun dada utsi bedmequid Nuquin Papan menepampid niacquin tantiesa neoaic —quepondash Esus.

Esus yacno bacuëbo bë-beaid

(Mat 19.13-15; Duc 18.15-17)

¹³ Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon.

¹⁴ Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiaquidquio bacuëbo neque. Adomboembidi badedquio Nuquin Papan chiaid tantiendac. Nuquin Papan shubu abentsëquën tabadquid aido nec.

¹⁵ Abimbo chiembique. Tantia. Nuquin Papan chiaid bacuëbon badedquio tantiacpaden tantiesa Nuquin Papa yacno puduedtiapimbo iquendac —quepondash Esus.

¹⁶ Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuipondash Esusën.

Na dadpen icquid chiaid

(Mat 19.16-30; Duc 18.18-30)

¹⁷ Aden bacuëbo chianec auëshquio pduanec nidshobien dada abentsëc titingec choquin bëquedtanec danëshën sebudash tsadec: —Chuibanquin tantiamianquid, bëdamboquid mibi neque. ¿Nuquin Papan shubu abentsëquën tabadnuequin atotsimbi nepaba? —quepondash choboed Esus chiec.

18 Adoaquien Esus: —¿Nuquin Papabëdtabidabi mibi bëdambocquid nec, ëbi cape mimbi? Nuquin Papauidtsëqui bëdambocquidquo nec

19 —quequin chiec abi onquec: —¿Nuquin Papan nadomboen nata quequin dada uamiampidtedi nabanquidta ne? Aidedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiec muainda; adecbidi, utsin na bedesabimboec muainda; adembidi papabëditan titan chiaid chieshënenda.” ¿Aidedi Nuquin Papan dada uamiampid nabanquidta ne? —quepondash Esus choboed caic.

20 Adoaquien: —Abimbo chiembique. Tantia, Icho. Aidedi nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

21 Adsho tantiash, Aidbëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquio menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquio mibi iquendac. Adec Nuquin Papa tantiaquidquio yec ëbëd iquec cho —quepondash Esus.

22 Adsho tantiash choboed mamënenquio yec unësquio yec nidpondash con na menebantiapimbo iquebi quiaish.

23 Adec nidsho isun abitedi bëisbanec Esus: —Aton na dadpen icquidën, Con na tantiëqui Nuquin Papan shubu abentsëquën tabadnu, quequin tanti-aidtsec. Adquid Nuquin Papan shubun puduedesa nec —quepondash abëd icquido chiec.

24 Aden Esusën chuisho tantiash, ¿Abimboda capec? quequin ambibi tantiec abëd icquido otacquo tabadsho isec Esus: —Abuido, Nuquin Papan shubu abentsëquën matses badedquio puduedtiapimbo iquec.

25 Adembidi shëcuën puduedte nidaidën capuquid dapan badedquio tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquio tantiatiapimbo iquec. Ambi tantiacpadequi puduedte bunec —quepondash Esus.

26 Adsho tantiash abëd icquido, ¿Abimbobida capec? quetsëcquiec onquecuededpondash. Adec tabadegui: —Ambi tantiacpadequi puduedtiapim-bocnoc ¿tsutsi puduedquid icpeba? —quepondash abëd icquido Esus chiec.

27 Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimnoc Nuquin Papambien abi yacno yuedanquid mibi tantiamendac —quepondash Esus.

28 Aden chiaquien Petedo nadpondash: —Chuinu. Tantia, Icho. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

29 Adoaquien: —Abimbo chiembique. Tantia. Esusbëd icnu queshun Nuquin Papan shubu abentsëquën tabadte iquec quequin chiuinequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimboesho

30 daëd uaqin Nuquin Papan menendac. Nëbi shubu utsin-utsinquiec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshënquidbidi iquendac. Yuecash ënëdenquio yec Nuquin Papan shubun mibi tabadendac mibi chieshënquid nibëdacno.

31 Nidaidënshun chuiquid ichoedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid

icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

*Ëbi unës uaindac quequin Esusën chiaid
(Mat 20.17-19; Duc 18.31-34)*

³² Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquiec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquiduidtsëqui padpiden chuioanu —quiash Esus nidtuidshun cho-chosho isquin naden abi mëyante chuiquin tauapondash:

³³ —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac.

³⁴ Aden meniac bedshun aidon ëbi oncain mamëshumbedequimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chiec.

*Ëbi daëdi nashunta Acobo Uambëd quiaid
(Mat 20.20-28)*

³⁵ Aden chiaquien Acobo Uambëd Esusën dayuntsëqui choash: —Mibi chinu. Tantia. ¿Ëbi daëdshun chiapadomboen ëbi daëdi nashunenquioda mimbi icpe? —quepondash.

³⁶ Adoquien: —¿Atotsimbi mibi nashuneque? Ëbi chui. Tantanu —capondash Esusën.

³⁷ Adoquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenin ëbi daëdi tsadunta —capondash Uanën Acobobëdtan Esus chuiquin.

³⁸ Aden aid daëdshun chiaquien: —Tantienquiocquin mimbi chioc. Icsaquid matsestedî nec, quequin Nuquin Papan aidô cuidenquiocquin ëbi aton madombo bëdamboequidded cuidendac. ¿Ada ëbipadquid mibi icpatsia? —capondash Esusën.

³⁹ Adoquien: —Ai, adquid tantiembi —quepondash.

Adoquien: —Ai, adomboembidi mimbitsen tantiendac —quepondash Esus.

⁴⁰ Aden chiec abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chiendac. Ëmbi padenquio iquec —quepondash Esus Uambëdta Acobo chiec.

⁴¹ Aden Esusën chiaqui abëd icquidquio utsitedi Acobobëdtan Uanën chui-boed tantiash nëishcuededpondash.

⁴² Adec nëishash tabadsho isash: —Cho —quepondash Esus. Aden cho-miash: —Utsi namequid isadaidpembo nec quequin mimbi tantiec. Aidon matses utsi yuaquin mëyanquin namebanec.

⁴³ Aden namesa mibi nec. Chuiquid dapa icnu quiash utsi nashunquid icta.

⁴⁴ Adecbidi tsusio icnu quiash yuabimboe yec utsin namiaid icta.

⁴⁵ Adquid icnuec Nuquin Papan madombo matsesash nidaidën tabadobi. Ancanquid iquenquoio yec nashumënquidquoio nebi. Adquid yec matses icsaid bedshunash ëbided cuidadec unësendabi –quepondash Esus.

Bëshuaid, Badtimeyo cuëmëdquid bëdamiaid

(*Mat 20.29-34; Duc 18.35-43*)

⁴⁶ Aden chiasch Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Puduash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Piucquid bednu quequin cainec podqued cuëman tsadpondash.

⁴⁷ Ambo tsadquimbi, Esus Nasaded caid yacnocquid choec, quequin utsin chiac: –Esus, Chuiquid Dapa, Dabidën madon, ëbi tantiaquin nashun –quequin chiec cuëdpondash bëshuaid.

⁴⁸ Adec cuëdsho tantiaquid: –Esus cuënenquoio yec otacquoio tsad –cabedepondash utsibon.

Adnubien: –Chuiquid Dapa, Dabidën madon ëbi nashun –quepondash bëshuaid comapenec cuëdoaic.

⁴⁹ Adoac nidtuidshun Esusën: –Cuënquid chome –capondash.

Adoquien: –“Chome,” queque. Nidtoash nid –capondash utsibon.

⁵⁰ Adsho tantiaquid bëshuaid aton dashcute bëntsecquid chicanec badedquoio nidtoanec Esus yacno chopondash.

⁵¹ Adec chosho isun: –¿Atotsimbi mibi nashumpeba? –capondash Esusën.

Adoquien: –Iste bunebi, Icho –quepondash bëshuaid.

⁵² Adoquien: –Esusën ëbi bëshuaid bëuquec quequin mimbi tantiacpadquiec mibi bëdanoque. Nidec nid –Esus quenubi isbenquopondash bëshuaidën. Adec bëdandshun Esus nidsho isun tsibampondash.

11

Chuiquid dapabimboec yec Edusaden yacno Esus choaid

(*Mat 21.1-11; Duc 19.28-40; Uan 12.12-19*)

¹ Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidedi macuësh Odibos caid potsembo icpondash. Ambo choash ëbëd icquid daëd shubuno nidmenu quequin tantiec nadpondash Esus:

² –Në shubu dadpen yacno nidec nid. Ambo nidshun cabayobiecquidën bacuë caniabictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchichshun sananquin bëta.

³ Aden bedsho isun, ¿Atotsi canun aid bede? cac, Bëoaimbi. Nëid nuquin icho bunaid nec, cata. Mimbi aden chiac, Buanec nid, quendac –quepondash Esus abëd icquid daëd chiec.

⁴ Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tëchicquid.

⁵ Aden tënëshaid tëchichsho isun: –¿Mitsipaden tantiaquin ëmbi tënëshaid mimbi tëchiqueque? Tantuan. Chui –capondash anocquidën.

⁶ Adoquien: –Tënëshaid tëchichshun bëta, con icho quebocpaden naimbi –capondash tëchicquidën.

Adoquien: –Buanec nid –queoapondash.

⁷ Adoac Esus yacno buampondash. Aden bëshun aton dashcute bëntsecquid chicshun cabayobiecquid capupondash ma chuiquid aidën catsadtoneshun. Adoaidën Esus catsadtopondash.

⁸ Adembidi chuiquid Esus nec quequin ismequin utsibontsen aton dashcute bëntsecquid chicbededshun podqued ansambampondash ma chuiquid dapa bédambocquid capunueshun. Adembidi tantiaquin utsibon buëdbiecquid podó tebededshun podqued ansambanoapondash.

⁹ Aden ansambanash matses dadpen bëyucanec nidanenubi Esus nënantanquio nidnuc aitedbidi tsyuec choquin tsibambëpondash. Adeç abitedi nidanec Esus tantiec nadeç cuëdëncuededpondash: —¡Adeduya! Nuquin Papan bédambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapambo choec nec.

¹⁰ Èbi chuiquid dapa Nuquin Papan abuc tabadquidën chomiaid Esus nec. Nuquin Papa bédamboshë iquec. ¡Adeduya! —quec cuëdëncuededpondash Esusbëd nidquido.

¹¹ Adeç cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adeç puduedshun abitedi isbanash ushë budtsambi Betania caid yacno nidaneopondash Esus.

Cuëte bacuëesa chiaid
(Mat 21.18-19)

¹² Abadiatsashi Betania yacnoësh nidanec Esus bundopondash.

¹³ Adeç bundoshombi cuëte icueda caid podó buntac-buntacpambo anquenquio nidsho istuidec Esus: —Icueda podó buntac-buntacpambo podoash nideque. Isbono. ¿Bacuëashida neque? —quianec nidpondash. Adeç nidquimbi icueda podouidquío icsho ispondash. Ushë utsin bacuëtiadquidi bacuëabi podopac.

¹⁴ Ad icsho isun Esusën: —Adequi bacuëesa icsho ma matsesën chenquio icpanuna —capondash. Aden chuisho tantiapondash abëd icquidon.

Nuquin Papa tabadte shubu uashunaid yacnoshon cuemiaid
(Mat 21.12-17; Duc 19.45-48; Uan 2.12-22)

¹⁵ Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adeç puduedshun piucquid bedquin piucquid sanaid cuestetedi bidiancuquin piucquid bednun nidaidën capuquidbëdta podochoquid chedo menabanquidën tsadtetsen nebudquin icbotedi puduemebampondash.

¹⁶ Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adeç nasiadec capuenda —capondash Esusën chushcaquin.

¹⁷ Aden chushcasic: —¿Èbi tabadte shubu uashunaid matsesën èbi on-quianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus.

¹⁸ Aden Esusën chuisho tantias, Icsambocquid Esus neque. Unës uatiad, quequin ambibi tantiabedec isadaidbo tsusiobo tabadcuëdedpondash. Útsiboen: —Chuiquid dapan chiacpadomboen Esusën chiec —quepondash. Adsho tantias, Esus bednu, quetiapimbo yec dacuëdcedec tabadpondash isadaidbo tsusiobo.

¹⁹ Adnubien inchëshbudtsëqui Edusaden yacnoësh nidoapondash Esus.

Cuëte bidiquaid
(Mat 21.20-22)

²⁰ Abadiatsashi Edusaden yacno nidoaquimbi cuëte icueda caid bidiquiacsho istuidpondash.

²¹ Aden istuidash Esusën icueda bacuëesa chiaid tantiec Petedo: —Cuëte bacuëabicsho mimbi chuibod bidiquiaye. Is, Icbo —quepondash.

²² Adoaquien Esus: —Nuquin Papa nadatiambocquin nabanquid nec, quequin tantiaquiota.

²³ Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac.

²⁴ Embi chiacpadomboen Nuquin Papan naindac, quequin abimbo tantiaquin mimbi chuisho tantiasun Nuquin Papan adomboembidi naindac.

²⁵ Aden Nuquin Papa chuinish mibi utsin icsambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac.

²⁶ Adenquo mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatipimbo iquendac —quepondash Esus abëd icquido caic.

¿Mitsicquidën chuibanta caid mibi ne? quiaid

(Mat 21.23-27; Duc 20.1-8)

²⁷ Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo:

²⁸ —¿Mitsicquidën chuibanta cac chuiquid dapabimboecquin mimbi chieque? Tantuanu. Chui —capondash.

²⁹⁻³⁰ Adoaquien: —Adembidi ¿Atotsi tantiaquin mimbi chuipe? Chui. Tantuanu. ¿Matses mentondaidën, Uan padon Nuquin Papan chuimiapadomboen nabanquinda nadiondash? Padenquo, quequin, ¿Ambibi tantiacpadomboen Uan padon naondash, quequina mimbi tantiapeque? En chui. Tantuanu. Aden mimbi chiac ëmbitsen mibi chiembi —capondash Esusën tsusiobo chuiquin.

³¹ Aden Esusën chuisho tantiasho udictsëc nidash isadaidbo tsusiobo onquec nadcuededpondash: —Nuquin Papan tantiamiacpadomboen Uan padon naondash, nuqui qesho tantias, ¿Atotsieshun aidën chiaid tantienquo icconda? quetsias Esus.

³² Naden Uan padon ambi tantiacpadomboen naondash, nuqui qesho tantiasun, ¿atotsi napatsias Uanën chuisho tantiondaidon? Aidon, Nuquin Papan chuimiad Uan pado niondash, quequin tantiabededquin nuqui cuënoten seshunetsias —quecuededpondash.

³³ Aden chiec onquecuededashic —¿Tsuntsin tantiamiacpadomboen Uan padon nabampondash? quequin tantienquo iquembi —quepondash isadaidbo tsusiobo Esus chiec.

Adoaquien: —¿Tsuntsin tantiamiacpadomboen Uan padon nabampondashba? quequin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshënquido isadaidbo tsusiobo chiec.

12

Tied icbo nashunta quequin chiaid

(Mat 21.33-46; Duc 20.9-19)

¹ Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tandia. Icbon aton tiedën uba caiduidquo nitsinshun cueste bënitsinaidën otadnidec cuidiancuidianec dadpen bacuëec. Sinash didiesho icbon bedec. Aid nitsinshun

icbon daquënë uaic. Aden daquënë uashun yuecshun uba ënë chinun tsuc-tsuctë nacnemposh. Aden nacneshun uba ampenuche queshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

²“Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh.

³Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh.

⁴Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoaposh tied icbo nashunquidon.

⁵“Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Ademibidi, tied icbon nidmiad utsi-utsien abi tied nashunquidon cuesosh. Aden nabanquimbi utsi-utsien cuesuneposh.

⁶“Adsho isash tied icbo nadposh: Nëid, con madombo abentsëqui nec. Èbi cudasaid nec. Aidi tsyuec con tied yacno nidmembi. Aidi chosho isun, Tied icbon madombo nec, queshun bëdamboen istsiash, queshun aton madombo nidmeposh.

⁷“Aden nidmiac ancuenquio chosho isash, Tied icbon madombo choeque. Is. Aton papa unësan aton papa yacpadec icbo icoanushe queshun tied icbo nuqui icnun aidi cuesunenuna, quecuededposh tied icbo nashunquido.

⁸“Adec onquetanquin aton icbon madombotsen bedshun cuesuneshun daquënë uaid mabudacquin nebudposh.

⁹Adoacsho tantiashun ¿atotsi tied icbon napec? Naden naindac. Ut-sibëd aton tied yacno nidshun abi nashunuidboed cuesuneshun utsibo abi nashunquido icmendac —quepondash Esus.

¹⁰Aden chuishumbic Esusën: —¿Adomboembidi chuiquin Nuquin Papan dada uamiampid tantienquioda iccö? Nad iqueque. Tantia.

“Shubu uanuequidën buintad isuidaidi utsin abia nitsinaid icoaposh. Adquiobidi Nuquin Papan chuimiad matsesën tantiauidaid iquendac.

¹¹Nuquin Papan naid bëdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidënquio tantiec”

—quepondash Esus Nuquin Papan chiampidquio chiec. Nuquin Papan shubu abentsëquën abi tantiaquido yuedanquid nendac, quequin utsi chiacimboec abibi chiadquin Esusën chuibampondash.

¹²Adsho tantiash, Èbitedishun isuidaidbimboecnu chuibanec quequin tantiec isadaidbo tsusiobo Esus bedtiadquio icpondash. Adnubien Esus onquesho dadpeshun tantiabededpondash. Dadpen icsho isash dacuëdcedec Esus bednu quenquio yec nidanepondash chieshëmënquido isadaidbo tsusiobo.

Bec cho quequin bedshunquid nec, quequin chiaid

(Mat 22.15-22; Duc 20.20-26)

¹³Isadaidbo tsusiobo nidshun padiseyobo edodesbobëdta istuidshun: —Nëidon Esus icsamboen chuimetsiash —queshun aido Esus yacno nidmepondash.

¹⁴Aden nidmiac Esus yacno choshon abentsëcshun Esus nadopondash: —Ambia tantiaquid, matsesën tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantianu. Shocosh piucquid bec cho quequin bedshunquid, isadaidpembo

ancaquid, Sesad cuëmëdquid nec. ¿Aden meniaid bédambo iquec, quequin Nuquin Papan chiaidta nepec?

¹⁵ ¿Adambi menepeba? —quepondash padiseyobobëd edodesbo Esus caic.

Adoaquien, Èbi icsamboen chuimenuc adec onquec, quequin ambibi tantiec: —Shocosh piucquid bec cho ma isnu —quepondash Esus.

¹⁶ Adsho tishantshun bëpondash. Adoaquien: —Sananquin isme. ¿Ttsibim-boecnuc dada uaid iqueque? Chui. Tantianu —capondash Esusën.

Adoaquien: —Isadaidpembo ancaquid, Sesadbimboecnuc dada uaid nec —quepondash.

¹⁷ Adoaquien: —Ai, aidën na nec. Aid bec cho, qesho meneta. Adembidi Nuquin Papa Nuquin Icho icquin, Nata, cacpadomboen naban —capondash Esusën.

Aden bédamboen chuisho tantias, Bédamboenshenda tantiapec, quequin ambibi tantiec Esus chieshënquido tabadcuededpondash.

Abuc tabadequi, ¿mitsicquidën chido neque? chui quiaid

(Mat 22.23-33; Duc 20.27-40)

¹⁸ Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash:

¹⁹ —Moisesën dada uapampid nad iqueque. Tantia. chuinu. Chidochiquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaid-bimboec ma icpanuna, quequin chuipampid nec —quepondash saduseyobo.

²⁰ Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaïd canishun aton chido bedshun bacuë tishmiabi yec unëspondash.

²¹ Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën

²² aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi dadatedi unësbudnepondash. Adecbidi chidot-sen unësoapondash.

²³ Adec unësash abuc tabadequi, ¿Mitsicquidën chido aid icpatsiashe? Chui. Tantianu —capondash saduseyobon Esus chuiquin.

²⁴ Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naïd mimbi icsamboen tantiaoaic.

²⁵ Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaid mayan bëda unësesa yacpadquiec matses uincuenash unësesa iquec caidesa nendac.

²⁶ Adembidi unësash uincuenaid tantianu qeshun ¿Moisesën dada uaid isenquioda ictionda? Aidën cuëtampi abibi nëdënqesho istanec nidtuidquin nadec Nuquin Papa onqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën.

²⁷ Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuinu. Tantia. Unësaidën Papa nebi quesä Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan tantiadac —quepondash Esus matses uincuenta iquec quequin saduseyobo tantiamenuc.

Naden nata quequin chiaid ¿mitsicquid adquidpadquid utsi nibëdpec? quiaid
(Mat 22.34-40)

²⁸ Adec Esusbêd saduseyobo onquecuedednubien tsusedpabon nadomboen nata quequin chiaid tantiamequid abentsêc chopondash. Bêdamboen Esusên saduseyobo chuisho tantiash Esus icsamboen chuimenuec aidtsen: —Ëmbitsen tantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibêdpec? —quepondash.

²⁹ Adoquien Esus nadpondash: —Nêid chiaidpadquid utsi nibêdeque. Chuinu. Tantia. “Nuquin Icbo Nuquin Papa nec. Nuquin Icbo Abentsêcquiobi iquec.

³⁰ Adquid icsho ëbi tantiaquid isash bêdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquio yec Nuquin Papa bunacpadquiec icnu quec bêdamboec tabadta. Adembidi ambi tantiacpaden tantianu quequin adombota. Adembidi aid tantiaquin bêdamboen nabanquiota.

³¹ Aden nabanquin Nuquin Papa bêdambo icmequin utsibo adembidi bêdambo icmequin nabanta. Ëbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibêdec —quepondash Esus.

³² Adoquien Esus icsamboen chuimenuec choboed nadpondash: —Mimbi chûiboed abimbo iquec. Nuquin Papa abentsêcquiobi iquec. Aidpadquid utsi nibêdec.

³³ Adembidi, ëbi tantiaquid isash bêdambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bêdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bêdamboen nabanquiota quequin chuitequidpadquid utsi nibêdec. Aden Nuquin Papa bêdambo icmequimbi utsibo adembidi bêdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibêdec. Aden naqid Nuquin Papan bêdamboen isendac. Aden naisa, Con na Nuquin Papa menenu, qesho Nuquin Papan bêdamboen istiapimbo iquendac —queopondash choboed.

³⁴ Aden choboedên bêdamboen chuioasho tantiash: —Nuquin Papan shubu abentsêquên tabadaid mimbi bêdamboen tantiatsempoc —quepondash Esus.

Adoac Esus icsamboen chuimenu quetiapimbo icpondash utsibo.

*¿Tsuntsin mado Quidistu nepec? quiaid
(Mat 22.42-46; Duc 20.41-44)*

³⁵ Abi icsamboen chuimenuequid utsi nibêdnuc Nuquin Papa tabadte shubu uashunaidên tabadquimbi Esusên Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidên mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu.

³⁶ Naden Nuquin Papan Mayanên Dabid chuimiampic:

“Icbo utsi icsho mibi chiembique. Tantia, mado, quequin chiec Icbo Dapa nadpampic:

Ëquê con dayun abiucquio cainec tsadec cho ma mibi chieshênquidtedi mimbi namiaid ma icpanu,”

quequin chuipampic.

³⁷ Aden Nuquin Papa icbo dapanquio aton dayunquio chomiaid chiec Dabid pado, Con icbo nec, quiashic, ¿mitsipadquiec, Con mado nec, queopampic? Nuquin Papan chometequid, aton mado, Dabidên icbo yec ¿mitsipadectsi Dabidên tsyuecquid icoapec? —quepondash Esus abibi chiadequi.

Aden chiec onquesho tantiash badedquoio tantiatiadquoio yampondash utsibo. Bëdamboen chiec, quequin comapenen tantiapondash.

Nuquin Papan chiaid tantiamequidon chuisho tantienda quiaid
(*Mat 23.1-36; Duc 11.37-54; 20.45-47*)

³⁸ Aden tantiamequimbi Esusën nadopondash: –Tsusedpabon nadomboen nata quequin chiaid tantiamequidën chuibansho tantienda. Aido nadquid iqueque. Tantia. Tsusiobimboec isadnu quiaish abi dasiuidaid ënapen icquid dasiuidtenequid aido nec. Adecbidi tantiaquidquoio yec tsusiobimboec isadnu quiaish aton matses dadpen yacno capuquid nec.

³⁹ Adomboembidi ëbi isoanu quiaish Nuquin Papan chiaid chuibante shubun puduedash tsusiobëd tsadec. Adomboembidi ismenu quiaish isedquido dadpen yacno choash shubu icbon dayunquoio tsadoaic.

⁴⁰ Aido bëdamboen nashumbimboen nianten na ampequid nec. Adembidi bëdambocquid nec camenuen yuen Nuquin Papa chiec. Adquid comapenen cuidtequid nendac –quepondash Esus.

Nuquin Papa tantiaquin nianten meniaid
(*Duc 21.1-4*)

⁴¹ Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacnentsiash quequin aton na bedtequid bë-bëquin sandobansho isec tsadpondash. Adeç tsadquin isquimbi aton na dadpen icquidën aton na bedtequid sando-sandonobi

⁴² aton na daëdpactsëcquidquoio niantè choquimbi aton shocosh piucquid daëdquibictsëcquid sandopondash aton na utsi nibëdquiocnoc.

⁴³ Adosho isun abëd icquido chomeshun Esusën nadopondash: –Abimbo chiembique. Tantia. Niantè aton na bedtequid dayun uanu quenquioctscquin Nuquin Papa tantiaquioquin sandoquidquoio nec utsibon aden sandoenquiocnobi.

⁴⁴ Utsibon aton na bedtequid dadpen uesenquiocquin sandobededposh. Aido daëdpactsëc icquid sandoac bimboen sandoquido nec quequin tantiembi. Adquidpenquoio niantè nec. ¿Bednun tedtsimbi dayunoape? quenquiocquin aton na daëdquibictsëcquidi nibëdquiocnoc sandoposh nianten. Dadpen icquid sandoac bimboen sandosho aid isembi –quepondash Esus.

13

Nuquin Papa tabadte shubu uashunaid chic-chicte chiaid
(*Mat 24.1-2; Duc 21.5-6*)

¹ Aden chianec Nuquin Papa tabadte shubu uashunaidën puduenubien: –Nuquin Papan shubu cuënote nacnenaid bëdaidquoio iqueque. Is, Icbo –quepondash abëd icquid abentsëc Esus caic.

² Adoquien: –¿Nëid shubu dapa isecta ne? Shubu uaquin cuënote dapa tsindonëdaid mimbi nëbi isaid chic-chicac nibëdquierendac –quepondash Esus.

Abitedi naimbudte tauanun ismete chiaid
(*Mat 24.3-28; Duc 21.7-24; 17.22-24*)

³ Aden chiashic auëshquoio nidanec macuësh Odibos caid yacno tabadtu idpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aidedt icpondash. Utsibon tantienquiocnoc aidon:

⁴ –Cuënote nacnenaid nebudte mimbi chuiboed ¿mitsipadën nebudte icpeque? Tantianu. Èbi chui. Adembidi aidi tauanun ismete ¿atotsi icopeque? Tantianu. Aid chuioa –capondash.

5 Adoaquien Esusën nadopondash: —Muaquin chiaid tantiamane queshun Nuquin Papan chiaid isban-isbanquiota.

6 Nuquin Papan chomiaid nebi quec muaquid cho-choendac. Aid chosh, quequin chiac utsin-utsinuien, Abimbo caic, quequin tantiabedendac.

7 Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëndenda. Ad icnuc abitedi naimbudte ushë choabi iquendac.

8 Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuedoaindac. Adecbidi utsi-utsiec yacno nidaid ishcredendac canchednuec. Adecbidi bunquiotte iquendac. Aidtedi icsamboshëcquid taëyendac.

9 “Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac.

10 Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec.

11 Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

12 “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesa icquin aton papan chiaid niacquin adembidi aton titan chiaid niacoaquin cuesunemendac.

13 Esus tantiaquid chieshënuquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaid mibi iquendac.

14 “Adnubien Nuquin Papa chieshënte ushë choendac. Aid chonoc Edu-saden yacno abi chieshënuquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushë quiash anoentsëqui icquido cuenenguiocboedi ma cuempanuna. Abimbo chiëmbique. Bëdamboen tantiata caimbi.

15 Adecbidi shubu macano pada-padapambo yacno tabadquido yec unanuc dectatote uaid dectandoaidën budanec con na bednu quenquio yec cuenta.

16 Adecbidi aton tied nantan tabadquid yec aton dashcute bëntsecquid chicshun dectanaid bednuec bidiadenquio yec badedquio cuenta.

17 Bacuë usunquid adecbidi bacuë chishmequin buanquid badedquio cuentiapimbochsho mëyampec. Adquid tantiec utsibo unësquio icchitec. Nuquin Papa chieshënte ushë icsamboshë iquendac. Adnuc badedquio cuenta.

18 Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuidedchuideda. Adoac ma badedquio cuempanuna.

19 Comapenen Nuquin Papa chieshënuquin abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac.

20 Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedî nibëdtsiandac. Ëbi tantiaquid ambi cuënaido tantiec, Chën, quequin Nuquin Papan ëmendac.

21 Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquio icta.

22 Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshënnquidombidi nadatiambocquin nabanendac. Adosho isun ëbi tantiaquidëmbi utsin-utsinquien tantiauidtsendac adquid. Nuquin Papanquio aid nec, quequin Nuquin Papambo tantiaata.

23 Ad iquendac quequin chiombique. Ad icnuc chieshenquiocquin Nuquin Papan chiaid tantiaquiota –capondash Esusën.

Nuquin Papan madombo choaid

(Mat 24.29-35, 42-44; Duc 21.25-36)

24 Aden chiash abi onquec: –Adnubien Nuquin Papa chieshënte ushë nidan inchëshquio yanendac. Badiadën ushëbëdtabi inchëshën chënquequid nibëdquiocnoc unës uaindac.

25 Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Safanasbëd icquido ¿mitsimbo nuqui cuempeba? quendac.

26 “Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquio iquequi ëbi choasho isendac matsesën.

27 Adnubien Nuquin Papan uaido mayan bëdabo, Ëmbi nidtan, cac nidanendac. Nuquin Papan cuënaido bednuc nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido – quepondash Esus.

28 Aden chiashic: –Abi chiembique. Tantia. Suc seccuduquiac nëbi cunquecueneq, quequin matsesën tantiec.

29 Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta.

30 Abimbo chiembique. Tantiata. Ëmbi chuibamboed naimbudabicnuc ëmbi chuibamboed tantiaquidën tsyuecquido naimëdbudenquio iquendac.

31 Aden matsesën isnubien nidaidbëdi abu ënëdendac. Ëmbi chiaidtedi abimbo yec adquiouidi iquendac.

Nëid ushënquio tauadoendac, quetiapimbo matses iquec quiaid

32 “Adnuc nëid ushënquio Nuquin Papa chieshënnquin tauaindac quetiapimbo matses iquec. Ambî uaido mayan bëdabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsëcquobien adquid tantiaquid nec.

33 Aid tauadote ushë choaid tantiatiapimbocquin Nuquin Papan chiaid niacmane qeshun isbanquin nabanta.

34 Nad iqueque. Tantia. Chuinu. Utsibo yacno nidnun abëd tabadquido naden chuiposh. Mîn utsibo chieshënenquiocquin shubu isquid icta quequin chianec nidposh.

35 Adec icbo nidan abi choate ushë mimbi tantienquio iqueque. Bëshunenquiocquin tantiaquiota. Inchëshbudtsëqui choapatsiash, quequin tantiata. Adembidi inchëshpotsembo chopatsiash qeshun adembidi tantiaquiota. Adembidi, cachina cuëdanubi chopatsiash, qeshun isucunshun tantiadenequiota

36 ëmbi tantienquiocnoc con icbo chochitondac, qeshun.

³⁷ Adquiecbidi bēdamboec tabadquin Nuquin Papan chiaid isted-istedta Nuquin Papa chieshēnquidēn niacmenushe qeshun —quepondash Esus.

14

Esus cuesunete bunaid chiaid

(*Mat 26.1-5; Duc 22.1-2; Uan 11.45-53*)

¹ Adashic, bēyuc tishaid unēsmenuequid aton shubu datamenuequin Isadaidbo tsusedpabon nidaidēn capuquid yuaded cuesunepampic. Aid tantiaid ushēbēdtabi pan bidisquesa tantiaid ushē Pascuas caid daēdec ushash choendac. Aid chonoshe qeshun isadaidbo tsusiobon Esus nibēmbededpondash.

² Aden nibēnec: —Pascuas ushē tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nēishun comapenen nuqui cuestiashe —quepondash isadaidbo tsusiobo.

Esus unēsec qeshun nacimboen noadte machiuinte chiaid

(*Mat 26.6-13; Uan 12.1-8*)

³ Adnubien Betania caid yacno tabadquin Esusēn Simonēn shubun puduedshun pepondash. Simon daushacimboecquid, nami mishac tantiadenuiocquid icsho Esusēn bēdamiaid nepondash. Adec puduedshun pec tabadnubi comapenec noadquid bēec chido puduedpondash. Piucquid dadpen menequin comapenec noadquid bedquid chido nec. Ambi bedaid sedunte postichoquid dēusunaid dēchictanquin Esus chidon machiuimpondash.

⁴ Aden machiuinsho isash utsibo nēishun: —¿Atotsieshun machiuino?

⁵ Noadte menequin piucquid dadpen bedshun aton na nibēdquid dadpen menetsiandac —quēc onquecuedēpanēdash Esus machiuimboed chido chushcaic.

⁶ Aden chushcasha tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bēdaidquio nec.

⁷ Badiadquidēn-badiadquidēnquieć ēnēdenquio yec aton na nibēdquid ēnabi iquēc. Aidi menenu qeshun mimbi menepec. Ēbien nashuntiapimbo iquendac.

⁸ Ēbi unēsabicnuc nēid chidon tantiaquin chococanuequin nacimboen noadte machiuimpaboc.

⁹ Abimbo chiembique. Tantia. Nuquin Papan shubu abentsēquēn tabadaid chuiquimbi ēbi machiuimboedēn naidtsen tantiaquidon chuibenchuibenendac —quepondash Esus.

Esus bedmembali, Udas quiaid

(*Mat 26.14-16; Duc 22.3-6*)

¹⁰ Adnubien Udas Iscadote, Esusbēd icquid abentsēc, Esus bedmenu, quianec isadaidbo tsusiobo yacno nidpondash.

¹¹ Adec nidequi isadaidbo tsusiobo yacno choshon Esus mibi bedmembali quequin chuituidac bēdambo icpac caondash aido. Adembidi: —Esus ēbi bedmesho isun piucquid mibi menembi —quecuedēdpac caondash. Adsho tantiash nidanec, ¿Mitsipadentsimbi bedmepe? quēc tabadquin caimpac caondash Udasēn.

Nidaidēn capuquidded cuesuniaid abēd icquidobēdtan piaid

(*Mat 26.17-29; Duc 22.7-23; Uan 13.21-30; 1Cod 11.23-26*)

¹² Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiemi nacnempatsia? — quepondash Esusbëd icquido.

¹³ Adsho tantiaash Esus abëd icquid daëd chiec nadpondash: —Edusaden yacno nidquimbi dadan acte bësho istuidash tsibananec aibdëdi nidta.

¹⁴ Aden aid tsibanec puduedash, ¿Ëbi tabadte quënë mitsimbo iquec? ëbëd icquidobëdtan penu, quiosh chuiquid, quequin shubu icho chuita.

¹⁵ Aden chiac buanshun dectatomesun abuc quënë dapa mibi ismen-dac. Ambo pete sante cueste iquendac. Ashunquio penun nacentia — quepondash Esus ambi daëd chuimiad caic.

¹⁶ Aden chiac abëd icquid daëd Edusaden yacno nidquin Esusën chiac-padomboen bëquedshun tsibananash puduedshun penun nacnempondash.

¹⁷ Adnubien inchëshbudtsëqui aid daëdtsëqui yacno Esusbëd icquid utsibo chopondash.

¹⁸ Adec choash pec tabadnubien: —Abimbo chiembique. Tantia. Èbëdtan pequid abentsëcshun isadaidbo tsusiobo ëbi bedmendac —quepondash Esus.

¹⁹ Adsho tantiaash, Icsambo iquec, quequin tantiec: —¿Ëbida chienquio iquec? —quepondash abëd icquidtedi.

²⁰ Adoaquien: —Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun pequidën ëbi chieshënuquido bedmendac.

²¹ Nuquin Papan chuimiapadomboen aton madombo chidon tishac masesaid ëbi unës uate anoentsëqui yanec. Ëbi bedmequid icsamboshë iquendac. Abi cuidite icsamboshë icnushe qeshun aidi tishenquiocpatecnëdan — quepondash Esus.

²² Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menëbanquin: —Nëid pete cuëshë ëmbi piuid con dadabëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiaata —capondash Esusën.

²³ Adembidi dëshote bedshun uba caid actequid icnuc Nuquin Papa padpiden chuishun abëd icquido menëbanac acpondash.

²⁴ —Nëid acquin Esused Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquio iquec quequin nëid acquin tantiaata.

²⁵ Uba caid ënë nidaidëshun padpiden aquenquiocquimbi Nuquin Papan shubunshun actequid chuca mibëdtambi aquendambi —quepondash Esus abëd icquido caic.

²⁶ Aden chiash Nuquin Papan naid chiec cuëdënanec macuësh Odibos caid yacno nidoapondash.

*Esus tantiesa nebi quequin Petedon chuite chiaid
(Mat 26.30-35; Duc 22.31-34; Uan 13.36-38)*

²⁷ Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëdendac,” quequin Nuquin Papan chuipampid nec.

²⁸ Unës uac uincuenash Cadidia yacno ëbia nidoaindabi. Mibitsen ambo nidta —capondash Esusën abëd icquido chuiquin.

²⁹ Adoaquien: —Esus tantiaquid nebi quenquio utsitedi icnuc ëbien padenquio iquec —quepondash Petedo.

³⁰ Aden Petedon chuisho tantiash: —Abimbo chiembique. Tantia. Nèid inchëshëmbi cachina bënë daëdec cuëdanabicnuc Esus tantiesä nebi, quequin mimbi tedesteden chiendac —quepondash Esus Petedo caic.

³¹ Adsho tantiash: —Esus tantiaquid mibi icsho mibi aibdëdta unës uaimbi, cac, Esus tantiesä nebi, quenquo iquendabi —quepondash Petedo comapenec onquec. Adecbidi Esusbëd icquidtedi onquepondash.

Quetsemani caid yacno choash tabadaid chiaid

(Mat 26.36-46; Duc 22.39-46)

³² Adashic cuëte odibo caid dadpen icsho Quetsemani quequin cuënacno choash nidtuidash: —Nuquin Papa chuinuec udi nidebique. Nëmboi tabad —quepac caondash Esus abëd icquido caic.

³³ Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash.

³⁴ Adquo iquec: —Ëbibi unësquioshë yec udictsëc nidebi. Chieshtomane queshun nëmboi tabadquin Nuquin Papa chuiban —quepac caondash Esus ambi nëid 3ted, Cho, caboed chiec.

³⁵ Aden chianec udictsëc nidash Nuquin Papa chuinuec nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec.

³⁶ Aden chuishumbic: —Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquo iquembi queshun mimbi adoenquioctsiandac, Papa. Ëbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

³⁷ Aden chiash choquin abëd choboed 3ted icquid usho istuidec Petedo caic: —Simon, ¿ushecta ne? ¿Ëbibi chieshmane quiash yuecpectsëc iquec ushenquo yec tabadtiapimboda icco?

³⁸ Chieshmane queshun Nuquin Papa chuita Nuquin Papan chiaid niacmenuequidën Satanas caidën chiaid tantiamane queshun. Chieshenquo iquebi quiash dacuëdash badedquo mibi chieshendac —quepac caondash Esus.

³⁹ Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash.

⁴⁰ Adtanec choashumbic abëd chobedo adecbidi ushacsho istuidoapac caondash. Ushcasquiec tabadec, Ushenquioccobi, quequin chuitiapimbo yec otacquo tabadpac caondash.

⁴¹ Adnubien padpidec nidoashun Nuquin Papa chuioatanec choec: —¿Uimabudashta tiboquec ushec ne? Padi. Ushenquo yec isucun. Nuquin Papan madombo chidon tishac matsesaid ëbi icsho nëimbobi ëbi chieshëndidon bedmeque.

⁴² Nidtoash ëbëdi nid. Ënden choaye. Is —quetuidpac caondash Esus abi bednuec choquido isec.

Esus bedshun buante chiaid

(Mat 26.47-56; Duc 22.47-53; Uan 18.2-11)

⁴³ Aden chuinubien Esusbëd icboedquibobi Udashëd matses dadpen chochopondash. Cho-choquid utsi-utsiec chështe sanampamboec choñobi utsi cuesto sanampamboec chopondash. Aidede Udasën chiac isadaidbo tsusibon chomiaido nepondash.

⁴⁴ Esus bednuequid tantiamenuen ambiabi Udasën: —Ëmbi tanchoccaid mimbi bedtequid nendac. Aidquiobi bedshun buanta. Cuenushe qeshun bédamboen ista —capac caondash.

⁴⁵ Aden chiashic aidobëdi choquimbi: —Icho —quequin Udasën Esus tanchoccatuidpondash.

⁴⁶ Aden Udasën tanchoccasho isun Esus bedpondash.

⁴⁷ Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

⁴⁸ Adnubien: —¿Cuesanquid Esus nec, qeshun utsin cueste sananubi utsibon chështe sananec ëbi bedecta cho-choec ne?

⁴⁹ Badiadquidën-badiadquidënquieç Nuquin Papa tabadte shubu uashunaid umanuc daquënë uaidën tabadquin matses tantiamenuen chuibaniami mibitedi tabadnubi. Ambo icshobi ¿atotsieshumbini mimbi bedenquicpo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic.

⁵⁰ Adec onquesho tantiashun cuenquin abëd icquidtedishun Esus ni-ampondash.

⁵¹ Adec cuenubini nëbi caniquid yequi Esus tsibananec nidpondac. Dash-cute isad-isadquid dasiuidanec nidquin Esus tsibampondambi. Aden tsiban-shobi Esus chieshënquidon bedpondashi.

⁵² Aden bedac dasiuidte bëdaidquio nianec dadauidquio cuempondabi.

*Isadaidbo tsusiobo iccuededacno Esus buante chiaid
(Mat 26.57-68; Duc 22.54-55, 63-71; Uan 18.12-14, 19-24)*

⁵³ Adnubien, isadaidbo tsusio dapa, matses tantiec Nuquin Papa chieç onquequido yacno Esus buampondash. Aden buanec puduednu quiacnom-bi isadaidbo tsusiobo utsibo iccuededec tabadpondash.

⁵⁴ Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëc tsadpondash Petedo.

⁵⁵ Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash.

⁵⁶ Abimbo chiacbimboen dadpeshun chuibededpondash. Aden chuiquin abentsëcshun chiacpadomboen chienquiocquin utsin chuioapondash.

⁵⁷ Adnubien, Chuinu. Tantia, qeshun Esusën chiacbimboen utsi uain chuipondash utsibon.

⁵⁸ Aden chuinubien utsi onquec: —Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chicbana-nendambi. Aden chicbanshumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash —quepondash utsi.

⁵⁹ Aden abentsëcshun chuinubi utsin aden chienquiocquin chuipondash.

⁶⁰ Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tiantianu —capondash isadaidbo tsusio dapan Esus chuiquin.

⁶¹ Adsho tantiash ëcbedenquio yec otacquio nidsho isash: —¿Nuquin Papan chomiaidquio, Quidistu caid, Bëdambocquidën mado nebi, quecta mibi ique? —queoapondash isadaidbo tsusio dapa Esus caic.

⁶² Adoaquin Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiucquio tsadash abu ushun ëbi chosho matsesën isendac —quepondash Esus.

⁶³ Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Èsusën icsamboen naosh, quequin chuimenuen utsi nibëmpe nuqui?

⁶⁴ Nuquin Papa icsamboen Èsusën chuisho mimbi tantioc. ¿Midapaden mimbi chieque? Tiantianu. Chui —capondash isadaidbo tsusio dapan tsusio utsibo chuiquin.

Adoaquien: —Icsambo iqueque. Unës uametiad —quecuededpondash.

⁶⁵ Adsho tantiashun Esus dacuishtuaquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquio mibi neque. Èbi chui. Tiantianu —capondash Esus chuiquin.

Adnubiën cuenushe quequin Esus bedshun sondadon comapenen cuesbededpondash.

Esus ëmbi tantiacmaidquio nec quiaid

(Mat 26.69-75; Duc 22.56-62; Uan 18.15-18, 25-29)

⁶⁶ Adnubien Petedo umanuc daquënë uaidën tsadnubi isadaidbo tsusio dapan yua chido chopondash.

⁶⁷ Choshon Petedo cuëte cuëc tsadsho isun: —Nasaded caid yacnocquid Esusbëd icquid mibi nec —capondash.

⁶⁸ Adoaquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuquo yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

⁶⁹ Adec Petedo ambo tsadsho chido yuaidën istuidtanquin padpiden: —Esusbëd icquidquio nëid nec —quequin anocquido chuoapondash.

⁷⁰ Adoaquien: —¿Aidbëd icquidtabi nedi? —quepondash Petedo.

Adnubien yuecpectsëc yash: —Aidbëdi Cadidia yacnocquid mibi nec —quepondash ambobidi tabadquido.

⁷¹ Adoaquien: —Èmbi tantiacmaidquio nec quequin abimbo chiemi. Èmbi abimbo chienquio icsho ma ëbi chian anëdënquiacno Nuquin Papan nënepanuna —quepondash Petedo comapenen chiec.

⁷² Adnubien cachina padpiden cuëdpondash. Adsho tantiashun, “Cachina daëdec cuëdabicnuc ëmbi tantiacmaidquio Esus nec, quequin mimbi chiendac tedestedec onquequin,” quequin Èsusën chioshi quequin tantiec unësquio yanec shubianquopondash Petedo.

15

Pidato yacno nidshun Esus meniaid

(Mat 27.1-2, 15-31; Duc 23.1-5, 13-25; Uan 18.28-19.16)

¹ Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqeshun Esus mëtaneshun buanshun isadaidpembo ancaquid Pidato caid menepondash.

² Aden meniac Pidato: —¿Isadaidbo ancaquidta mibi neque? Èbi chui. Tiantianu —capondash Pidaton Esus chuiquin.

Adoaquien: —Mimbibi aden chuipayoc —quepondash Esus.

³ Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquio yec Esus tsadpondash.

⁴ Adec tsadsho isun: —¿Ècbedanenquio yec otacquioda tsade? Mibi icsaid dadpen nëidon chuibanec —Pidaton caqui

⁵ adquechbidi Esus tsadpondash. Adec tsadsho isash ¿Mitsipadquidquio Esus nepec? Utsimbien, Icsapenquiocquid nebi, quequin chuipéc, Aden chienquio Esusën iquec, quequin ambibi tantiec Pidato tsadpondash.

⁶ Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoaquien ismequin, Nëid nidme, cac nidmedenepadenec.

⁷ Aden chuidenequin ambi quënën nauedmiaid Badabas cuëmédquid nepondash. Aidëmbi utsibobëdtan Domanobo bunenguioequin cuesquin tauasho isun bedmeshun quënën nauedmepac caondash.

⁸ Adnubien Pidaton seta utsin quënën nauedmiaid abentsëc ambi nidmiondacpaden nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: — Quënën nauedmiaid abentsëcta mimbi nidmepatsia —quecuededpondash aido Pidato caic.

⁹ Adec onquesho tantiash Esus nidmetiadquiocquid Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash.

¹⁰ Esusbidi tsusio icpec matses quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash.

¹¹ Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen.

¹² Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

¹³ Adoaquien: —Cueste nitsinshun dectan —quec comapenec cuëdcuededpondash isadaidbo.

¹⁴ Adoaquien: —¿Atotsi icsa uaosh? —quepondash Pidato. Adoaquien: —Cueste nitsinshun dectan —queoaic comapenec cuëdcuededpondash.

¹⁵ Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe queshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

Sondadon Esus mamëshumbededaid chiaid

¹⁶ Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash.

¹⁷ Choshon dashcute abichobicquid bëdaidquio bedshun ancanquid dasiuidachimboecnuc dasiuiinshun pinchuc-pinchucquid mauete uashun Esus matoncashun

¹⁸ ancanquid cuënacpaden cuënec: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado.

¹⁹ Adoquimbi ancanquidën sanante cueste bëdaidquiobimboecnuc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash.

²⁰ Aden mamëshumbededquin mëyanshun dashcute bëdamboquid ambi dasiuiimboed dachicshun aton dashcutebi dasiuiinshun cuesten dectanuequin Esus buampondash.

Esus cuesten dectante chiaid

(*Mat 27.32-44; Duc 23.26-43; Uan 19.17-27*)

²¹ Aden abi dectante cueste Esusèn buantiapimboconid niquimbi abi datanquid cueste chiadtometanquin buamepondash sondadon. Abi datanquid Sidene caid yacnoquid nèbi Edusaden caid dèuequiacnoèsh choquid nepondash. Adecandedo, Dupo chedon papa Simon cuëmèdquid niondash.

²² Aden cueste Simonèn buanubi macuèsh Codocota caid yacno abitedi chopondash. Macuèsh mapi canitebimboecsho Codocota quequin isadaidbon aton onqueten cuëmpondash.

²³ Ambo choshon uba sicaid paëacsho paëmbocquid dauë cacushtanquin meniacle aquenquicopondash Esusèn.

²⁴ Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmèdquidtedi dada uabanshun tēchun sandoshon cadotanequin dada uatsaidēmpi puduemaiad isbanquin Esusèn dashcute bedbampondash.

²⁵ Ushè dectatoec 9 yanuc Esus cuesten dectampondash.

²⁶ Esus dectanaid mapino dada uaid cueste podectanaid diadpondash. Isadaidbo ancaquid nec quequin dada uaid nepondash. Esusèn naden chiosh quequin isadaidbo tsusiobon chiacpaden dada uaid nepondash.

²⁷ Cuesunetanquin ampequid daèd èquè dectambudcuenshun nēnantanquio Esus dectampondash.

²⁸ “Dectanquin icsaquidbèdta dectanendac,” quequin Nuquin Papan chuimiampicpadembi napondash.

²⁹ Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamēnshumbedepondash. Adec cuenquin mamēnshunquin: —Nuquin Papa tabadte shubu uashunaid chichanshun daèdec ushquin chuca uaimbi, quequin chiec mibi onquiondaque.

³⁰ Abimbo chuiquid yec unēstiapimbocquid nebi quianec mibibi budta —cabidanepondash.

³¹ Aden cuenquidēn chuinubi adembidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquedec: —Utsi-utsien bèdamequimbi utsi unēsacsho uincuemboed yec mētoccaid abembi chiquidiapimbocquid nec —quepondash isadaidbo tsusiobo Esus caic.

³² —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidēn mamēnshunubi abèdta dectanaidēn adembidi chuoapondash.

Esus unēs uate chiaid

(*Mat 27.45-56; Duc 23.44-49; Uan 19.28-30*)

³³ Adnubien ushè cuemboconid 12 yanin inchēshquio ichoedi ushè budec 3 yanuc uēshēmbō yanoapondash.

³⁴ Ushè 3 yanuc: —Eloi, Eloi, ¿lama sabactani? —quequin aton papa chiec Esus companec cuèdpondash. Aton onqueten: Papa Edoen, ¿atotsieshumbini bidiadquin isenquio ique? quec adpondash Esus.

³⁵ Aden Nuquin Papa Esusèn chuisho tantiaquido, Nuquin Papa cuènec, quenquio yec: —Edias cuèneque. Tanta —quepondash.

³⁶ Aden tantianubi badedi titinqeshun sicaid mucambocquid nēcushtanquin puntanquin cueste dēdectanshun acmenuequin èccuèscadonequi: —Chiata. Edias Esus bedec chonoshe caimbono —quepondash.

³⁷ Adnubien comapenec cuëdec Esus unësbudpondash.

³⁸ Esus unësbudnubi abi inchëshac bimboecnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec.

³⁹ Adec Esus cuëdbud-cuëdbudec unëso isash: —Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

⁴⁰ Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuctsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash.

⁴¹ Aidon Esus Cadidia caid yacno capusho isun abi nashumboedo nepondash. Aidobëdtan isquido chido utsibo Edusaden yacno choshon Esus buansho isun tsibanquido icpondash.

Esus chococate chiaid

(Mat 27.57-61; Duc 23.50-56; Uan 19.38-42)

⁴² Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus taniaquid utsi nidpondash.

⁴³ Aidi, Ose Adimateya caid yacnoshon tishaid Pidato yacno nidpondash.

⁴⁴ Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unësaccosh? quequin tantiesa icquin sondado chuiquid Pidaton chomeshun: —¿Ada Esus unësosh? —capondash.

⁴⁵ Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

⁴⁶ Adoac nidshun unësaid dabidiate bedshun Esusën dada imbudshun dataneshun macuësh dapa cuënote shëcuë uaquin ambi nacnenaidën nauedshun cuënote dapan bëtashpondash.

⁴⁷ Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

16

Esus uincuenta chiaid

(Mat 28.1-10; Duc 24.1-12; Uan 20.1-10)

¹ Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aitedi nidshun aton na bedtequid menequin comapenec noadte dadpen bedpondash Esus danoshcanuequin.

² Bedtsash badiadtsëcnubi dominco ushë caidën Esus chococacno nidanequi:

³ —¿Tsuntsin cuënote shëcnepeba? —quec onquecuededpac caondash.

⁴ Adec onquequin ancuenquio isquien cuënote ënden shëcniac. Cuënote dapa yuëmbocquid nepondash.

⁵ Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiuquio tsadpondash. Aidi isash dacuëdcedec tabadpac caondash chidobo.

⁶ Adec dacuëdec tabadsho isun: —Dacuëdenquio yec tabad. Esus cuesten dectanaid mimi nibënaid tantiemi. Uincuenash nidac. Nëmbobi nanac ueuidoshe. Is.

⁷ Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusên caoshi. Nëbi ëmbi chiacpaden Petedo Esusbëd icquidquo utsibobëdta chuituidec nid –quepondash nëbi caniquid chidobo chiec.

⁸ Aden chuisho tantiaash uëdëquequi chococaid shëcuënuësh puduenanec titinquec dacuëdec onquenquo yec nidanepac caondash chidobo.

Esus abuc indote chiaid

(Mat 28.16-20; Duc 24.13-53; Uan 20.11-23)

⁹ Adnubien abi nibëmboed uincuenashun Madia Matcada caid yacnocquidba Esusên ismetuidpondash. Ambi mayan icsa 7ted dapuduemiaid Madia Mactada yacnocquid nepondash.

¹⁰ Aden ismiac Esusbëd icboedo yacno nidash puduedshun aido shubisho Esusên abi ismiaid Madian chuituidpondash.

¹¹ Esus uincuenash capusho isombi, Madia qesho tantiaash, Aidquo mimbi isambo iquec, quec tantienquo yec tabadcuëdedpondash.

¹² Adashic, abëd icquidquo yec tabadboed dada daëd Edusaden yacnoësh podquedën nidsho Esusên chinumpundash. Chinunanec aidobëd nidanec puduedshun ismebempac caondash Esusên.

¹³ Aden ismiac aid daëdi aucbidi Edusaden yacno nidshun ambi isboed chuioapondash. Adembidi tantienquo icoapondash utsibon.

¹⁴ Adashic, abëd icquidquo 11ted pete sante cuesten tabadnubi Esus chopondash. Adec choshon: –Uincuenac quequin ëbi isquidon chiaid tantienquo mimbi icpoc. Chobique. Is –capondash Esusên.

¹⁵ Adashic: –Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbitsen chuiban.

¹⁶ Aden chuisho tantiaquid, Ëbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantesain Nuquin Papan cuidendac abi yacno puduedtiapimnoc.

¹⁷ Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquiocboedëmbi tantiaquin ëbi chuibanendac.

¹⁸ Adecbidi, nisingquo piaqui bidisquenquo iquendac. Adecbidi, unësmenuequin acmiaqui unësenquo iquendac. Adembidi, utsi unëstsensho mishac bëdanendac. Nuquin Papan nadatiambocquin namiaidënquo adobanendac –quepondash Esus.

¹⁹ Aden chuiquin ënacsho Esus abuc buanaqui Nuquin Papan dayun abiucquo Esus tsadtuidpondash.

²⁰ Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepundash nadatiambocquin nabanquimbi.

Ëmbi abimbo chuiboedquo mimbi isec aidquo tantianeta. Padi. Aidtedi dada uaombi.

DUCASËN DADA UAID

Mibi ismenuequin dada uaquid Ducas nebi.

¹ Utsin-utsinquier ambi naidbëdtabi Esuquidistu chuibanquin dada uaid dadpen iquec.

² Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec.

³ Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aitedi mibi chuibanquin dada uaimbi, chuiquid dapa, Teyopido.

⁴ Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵ Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash.

⁶ Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash.

⁷ Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸ Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash.

⁹ Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi dada uat-saidëmpi abia puduenacsho isacpadecc Sacadias puduedpanëdash.

¹⁰ Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuedepanëdash.

¹¹ Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash.

¹² Adec tabadsho isash dacuëdampambo iquec, quetanec Sacadias uëdëquiampanëdash.

¹³ Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëdenda, Sacadias. Min chido Edisabedën min mado tishendac. Min mado tishacsho Uan cuënta.

¹⁴ Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiash matses dadpen bëdambo iquendac.

¹⁵ Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëdicmenuequin Nuquin Papan aton Mayan meniaidquio min mado iquendac.

¹⁶ Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaindac.

17 Min mado Nuquin Icho bëyucanec choendac. Tsusedpa Ediasën chiampicpadquiequi dacuëdenquo icquin cuembo chuibanquidquo min mado iquendac. Aden chuibanquid Nuquin Icho bëyucanec choendac. Tsusedpabon tishmaidën tsyuecquid dadpen tantiesabo icboedi min madon chiac tsusedpabopadquid tantiaquidquo nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquo iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

18 Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

19 Adoquien: —Ëbibi, Cabaded nebi. Nuquin Papan abëd tabadquin namiaidquo nebi. Nuquin Papan ambi chiacpadomboen mibi chuimenuen chomoiëd nebiue.

20 Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquo icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

21 Adnubien noadte bëda tauite quënënuësh Sacadias baded puduenenquiocsho isash, Baded puduenenquiopec, quequin cainec tabadpanëdash utsibo.

22 Aden yuen caimbudnubien puduenash onquenequi buëd cuëdenquiocpanëdash Sacadias. Adsho isun: —Ushquin isacbimboen isbenac —cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

23 Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash.

24 Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash.

25 Adec tabadec Nuquin Papan naid chiec nadec Edisabed onquepanëdash: —Bacuë usundoenquiopec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundo-miaid nebi —quepanëdash Edisabed.

Esus tishendac, quequin chiaid

26 Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash.

27 Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash.

28 Adec choshon: —Mibi tantiaquin Nuquin Papan bëdamboen icmiaidquo mibi nec. Nuquin Icho mibëdi tabadendac —capanëdash Cabadedën.

29 Adoquien Madia, ¿Atotsi quepeba? quequin otacquo tantiec tsadpanëdash.

30 Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque.

31 Chuinu. Tantiata. Bacuë usundoshon min mado mimbi tishendac. Tishun, Ëmbi tishaid Nuquin Papa yacno yuedanquidquo nec, quequin Esus cuënta.

32 Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa

Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac.

³³ Adec tsusedpa Acobon tsyuecquido ënenquiocquin chuiquid dapa min mado Esus iquendac –quepanëdash Cabaded Madia chiec.

³⁴ Adoaquien: –¿Mitsipadentsimbi bacuë usundoshon bacuë tishpe? Chudabicquid nebi –quepanëdash Madia.

³⁵ Adoaquien: –Nuquin Papan Mayan mibëdi tabadnuc mimbi tishendac. Aden Nadatiambocquin naidënguio Madia usundomiaid, icsa nibëdquid, Nuquin Papan madombobi nec, utsibon cabededendac.

³⁶ Min utsi Edisabed macho icquin bacuë usundoenquiocboedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac.

³⁷ Utsin natiapimbo yaid Nuquin Papan naidquio nec –quepanëdash Cabaded.

³⁸ Adoaquien Madia: –Ai, con Icbon namiaidquio nebi. Ma mimbi chiacpadquio icpanuna –quepanëdash. Aden chiaquien Cabaded nidpanëdash.

Madia Edisabed isedec nidaid

³⁹ Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash.

⁴⁰ Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: –Mibi isnuec chobi –Madia quepanëdash.

⁴¹ Adsho Edisabedën tantianubi aton bacuë comapenec cuididiquenubi Nuquin Papan Mayanën tantiamiac Edisabed

⁴² Madia chiec nadec comapenec onquepanëdash: –Nuquin Papan bëdamboshë icmiaidquio mibi nec. Mimbi usundoaid adembidi bëdamboshë icmiaidquio nec.

⁴³ Nuquin Icbon tita mibi yec ¿atotsi quiash ëbi isnuec cho?

⁴⁴ Mibi isec chobi, mibi quesho ëmbi tantianubi, Cuishon, quiacbimboec con bacuë cuididiquianosh.

⁴⁵ Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac –quepanëdash Edisabed Madia chiec.

Nuquin Papan naid chiec Madia cuëdënaid

⁴⁶ Adnubien Madia nadec onquec cuëdëmpañdash: “Nuquin Papan naid chuibanu. Tantia.

⁴⁷ Èbi usundomiaid Nuquin Papa yacno Yuedanquid nec, quequin tantiec bëdambo iquebi.

⁴⁸⁻⁴⁹ Èbi ambi namiaid icsho bëdamboen isquin Nuquin Papan naosh. Adoacsho, Nuquin Papan bëdamboshë icmiaid Madia nec, quequin abitedishunguio tantiabededendac.

Adembidi aton tsyuecquidon tantiabededoac. Nuquin Papa icsaisa iquec. Icsatiapimbo iquec.

⁵⁰ Ambi chiaid tantiaquin naquid icsho, Mimbi naid icsa cuidnu, quenquiocquin abëdi shubu abentsëquën tabadac bimboecnuc adquid tabadmendac.

Adenuidi tantiaquin nampidquio abi iquec.

⁵¹ Nadatiambocquin naded-nadedquidquio Nuquin Papa nec.

Èmbibi tantiacpadomboen naimbi, quequid icsho isun Nuquin Papan cacumiac uano tabadendac.

52 Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

53 Ambi chiaid tantiec bēdamboec tabadte comapenec bunquiacpaden naquidquio Nuquin Papan icmendac.

Con na ēmbi bedaiduidi tantiec bēdamboec tabadebi quequid unēsacsho cacumiac uano tabadendac.

54 Chuiquid Dapa Abentsēcquiobi chidon usundoendac, quequin ambi tsusedpabo chuimiampicpadomboen Nuquin Papan ēbi usundomiac.

55 Tsusedpa Abadauambēdta aton tsyuecquidtedi ambi tantiampicpadomboen Nuquin Papan ēbi usundomiac.

Mimbi usundoaid ēbi yacno yuedanquid nec, quequin Nuquin Papan ambi tantiampicpadembi ēbi isec,”

quec comapenec cuēdēnash Madia ēnēdpanēdash.

56 Adec ēnēdash Edisabedēd ushē daēd nidmec tabadashic ushē utsi nidbudtsēcnubi aton shubuno nidoapanēdash.

Uan tishaid

57 Adnubien Edisabedēn bacuē tishte ushē chonoc dada bacuē tishpanēdash.

58 Bacuē tishenquiochoedēmbi nēbi aton bacuē tishosh, qesho tantiashton matses ado shubu utsinquidotedi Edisabedēd bēdambo icpanēdash.

59 Adashic, 8tedec ushtanquin Edisabedēn madon shui dēbid dēteshunu qesho tantiashton utsibo cho-chopanēdash. Choash puduedash bacuēmpi aton papa cuēmēdquid cuēnu quenubi

60 Edisabed: —Padenquio. Abi cuēmēdquid Uan nec —quepanēdash.

61 Adoaquien utsibo: —Min matses utsi Uan cuēmēdquid nibēdec —qeshun

62 Sacadias ismenuequin mēdante uic-uiccaquin: —Abi cuēmēdquid chui. Tiantianu —capanēdash utsibon.

63 Adoaquien dada uate bedshun, Abi cuēmēdquid Uan nec, quequin dada uaquin Sacadiasēn ismepanēdash.

Adoaquien: —¿Abimboda mimbi cape? —quecuededpanēdash utsibo.

64 Adnubien Nuquin Papan oncameoac Nuquin Papan naid Sacadiasēn chuibampanēdash.

65 Aden chuibansho tantiashton: —Dacuēdampambo iquec. ¿Atotsiepashun onquenquiochoedēmbi nēbi onquequin Nuquin Papan naid chuibampec? —quecuededpanēdash utsibo.

Aden tantianec aton shubuno nidaneshun ambi isboedbēdtabi ambi tantiaobod utsibon chuipanēdash.

66 Adoac: —¿Mitsipadquidquio aton mado nepec? —quecuededpanēdash Sacadiasēn mado Nuquin Papan tantiamiaidquio isbededec.

Sacadias oncamiaid

67 Adnubien Uanēn papa Sacadias Nuquin Papan Mayanēn oncamiac naded Esus chiec onquepanēdash:

68 “Nuquin Papa isadaidbon Icho nec, quequin chuibanuna.

Aidēn isadaidbo icsaquid icsho cuidnushe quiash abided cuidadquid chomiac mayan icsan yuaid icboedi aidēn mēnchictequidquio isadaidbo iquendac.

69 Abi mēnchicquid nadatiamboquid nendac.

Tsusedpa Dabidēn tsyuecquidquio aid nendac.

70 Ambi chuimiaidon chiampicpadembi

Nuquin Papan adquidquio icmianac.

71-73 Nuquin tsusedpa Abadauan tantiaquin

Nuquin Papan ambi chiampicpadembi nuquin tsusedpabo aton tsyuecquidbëdtabi abi chëshênquido nidiapimbo yacnombo abi yacno yuedanquid Nuquin Icho Abentsëcquiobi nec.

⁷⁴ Abi cudasquin mënchicaid yec dacuëdenquio yec Nuquin Papan namiaidombo iquendac.

⁷⁵ Adquid yec icsaisa abipadquio hëdamboec tabadquid icsho nuqui aidën isendac ënenquiocquin.”

Adec Esus chiec onquiashic nadec aton mado chiec Sacadias onqueoapanëdash:

⁷⁶ “Adnubien nëbi Nuquin Papan chomiaid chuibanquidquio mibi nec, quequin utsibon mibi cuënenadac, mado. Nuquin Icho choec, quequin utsibon tantiabicnuc bëyuc tantiashun abi chuiquidquio mibi iquendac.

⁷⁷ Adquid icquid mibi icsaquid icsho cuidnushe quiash abided cuidadquid tantiasho isash Nuquin Papa mibi icsaid tantienquio yec bëpiscudëndac, quequin chuibanquid mibi iquendac, mado.

⁷⁸ Nuquin Papan matses tantiaquin naquidquio icquid abipadquidquio icsaisa abi yacnoshon chomiaidquio iquendac.

⁷⁹ Aidën tantiamiac unësash abi iquendac. Adquid shubu abentsëquën tabadacpadec tabadendac, quequin mimbi chiendac, mado,” quec Uanën papa Sacadias Nuquin Papan Mayanën oncamiac onqueapanëdash.

Matses nibëdacno Uan tabadcueniaid

⁸⁰ Adashic, Sacadiasën bacuë Uan caniacsho Nuquin Papan tantiamiaid yequi matses nibëdacno tabadcuenepanëdash ambi Esus chuibante ushë choabicnuc.

2

Esus tishaid (Mat 1.18-25)

¹ Adnubien, Doma yacno tabadquid, isadaidbo ancaquid dapambo, empedadod caid, Aucusto cuëmëdquid icpanëdash. Aucuston, ¿Embi ancaido isadaidbo aton nabëdta tedtsi iqueque? Isquin tantiata, quequin Sidenio cuëmëdquid chuipanëdash.

² Sidenio nidaid Sidia caid yacnocquido chuiquid, cobednadod caid icpanëdash.

³ Min tsusedpa tishampid yacnoshon mibi cuëmëdquid mitsanabëdtabi dada uanuec nidtan, cac abëd icquido buanec isadaidbo nidanepanëdash.

⁴ Adec utsibo nidnubien Ose aton chido Madiabëdi nidaid Cadidia caid shubu dadpen icquid Nasaded caid yacnoësh puduanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanëdash.

⁵ Aton chido Madia bacuë nua usunquidbëdi Ose abi cuëmëdquid aton nabëdtabi dada uanuec Beden yacno chopanëdash.

⁶ Ambo choquin aton bacuë nuambo usumpanëdash.

⁷ Ambo matses dadpen cho-choash shubu abitedi puduedash tsucus-tsucustsëcquio tabadnuc nidaidën capuquid tabadacno puduedshun ambi

bëyuc usundoaid Madian tishpanëdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

Obeca pemebanquin buanquido Nuquin Papan uaidon chiaid

⁸ Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash.

⁹ Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chënquenec obeca pemebanquin buanquido dacuëdcuededpanëdash.

¹⁰ Dacuëdsho isash: —Chiaid bëda chuinec chobique. Dacuëdenquiocquin tantiata. Chuinu. Ëmbi chuitequid bëda mibi, Cuishon, quetequid nendac.

¹¹ Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh.

¹² Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquieci uesho istuidash, Nuquin Papan chomiaid Quidistu nec, mibi quependac.

¹³ Aden chiec Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chiec naded cuëdëncuededpanëdash:

¹⁴ “Nuquin Papa abucquio tabadquid abitedi uaquidquio bédamboshë iquec. Nuquin Papan bédamboen isaido ma abëdi tabadpanuna,” quec cuëdëmpañdash.

¹⁵ Adec cuëdëdash Nuquin Papan uaido mayan bédabo abuc nidoapanëdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiameboed bacuëmpi isnuec Beden yacno nidnu. Nid —quianec nidpanëdash.

¹⁶ Adec nidshun nidaidën capuquidën pete santen bacuë nanacsho istuidpanëdash.

¹⁷ Isanec nidquimbi ambi isboedbëdta ambi tantiaboed chiac

¹⁸ tantiaquidtedi: —¿Midapadquidien capec? —quecuededpanëdash.

¹⁹ Aden obeca pemebanquin buanquidon chiaid tantiash bëpiscudenquio yec Esusën tita, Madiä, ¿Mitsipadquid con bacuë nepec? quequin bëpiscudenquiocquin tantiadenepañdash.

²⁰ Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ëmbi isboed ëmbi tantiaboed Nuquin Papan naidquio nec —quequin chiec onquecuededpanëdash.

Nuquin Papa tabadte shubu uashunaid yacno Esus buanaid

²¹ Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bëdan chiacpadomboen cuënaid Esus nec, quequin Madian aton mado cuëmpañdash.

²² Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdtan Osen Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepañdash.

²³ Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec.

24 Mimbî bëyuc tishaid bedte bunquin ëbi tabadte shubu uashunaid yacno mimbî buanaid min mado cuidtequidoain dëbin daëd cuesunemeta. Dëbin nibëdnuc masën bëdamboquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpanëdash.

25 Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpanëdash. Aidi isadaidbo chuiquid dapa abentsëcquiobi cainquidquio icpanëdash. Aidi Nuquin Papan aton Mayan meniaidquio icpanëdash.

26 Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bëdamboen isaidquio choacsho unësabicquin isendambi, quequin tantiapänëdash.

27 Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio nanuen aton bënëbëdtambi Madian Esus bëpanëdash.

28 Esus bësho isun Simeyonën Esus bedshun icucquin Nuquin Papan naid naden chuibanpanëdash:

29-30 “Abitedishun Icho icquin mimbî ëndenquio chiampid nëbi nëid isembi. Nëid isash unësmane quenquio yec, Cuishon, quec unësebi, Papa.

31 Mibi yacno yuedanquid nëbi isembi.

Nëid mimbî chomiaid icsho ma abitedishunquio ispanuna.

32 Nëidëmbi mimbî tantiacpaden chuibanquin isadaidbo bëdambo icmendac,” quepanëdash Simeyon.

33 Aden chuibanubi, ¿Midapadquidquien con mado capec? quequin Madian aton bënëbëdtambi tantiapänëdash.

34 Esus chuibanquin naimbudshun Osebëdta Madia chiec Simeyon: — Bëdambo icmiaid mibi daëdi nec —quepanëdash. Aden chuishumbic Madiuidtsëqui naden Simeyonën chuiöapanëdash: —Chuinu. Tantiata. Nëid bacuë tantiesia isadaidbo utsi-utsiec icsho Nuquin Papan uquë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bëdambo iquendac. Min bacuë, Esus, Nuquin Papa yacno puduedmianquid nec, qesho tantiashun matses dadpeshun icsamboen chuidedendendac.

35 Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquio yec, Con madon natiambo iquebi, mibi quendac —quepanëdash Simeyon Madia chiec.

36 Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënënen bedac abëdi seta 7ted matamiash tabadnubi

37 aton bënë unëspanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquioçquin Nuquin Papauidi tantiaquin buna mëmumbudnequin Nuquin Papa chuidenepänëdash.

38 Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

39 Adashic, Nuquin Papan naden nata quequin chiacpaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash.

⁴⁰ Ambo tabadnubi aton bacuë Esus dada bédambo yec canicuempanëdash. Aidi comapenen tantiaquidquo Nuquin Papan bédamboen isaidquio icpanëdash.

Canicuenash Nuquin Papa tabadte shubu uashunaidën Esus tabadaid

⁴¹ Adashic, Ęmbi bëyuc tishaid unës uamenushe qeshun intaquën aton shubu shëcuë ěcnoshcacsho isun aidon bëyuc tishaid unësmenquiocquin Nuquin Papan uaid mayan bédan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiacpadequi setansetanquiec nidtenepanëdash.

⁴² Adecbidi, Esus abi tishaid seta 12ted yanash canicuenash anibëd Edusaden yacno nidpanëdash.

⁴³ Adec ambo nidashic nami uabicquid petequid tantiaid ushëtedi tantiec tabadtenepanëdash.

⁴⁴ Adec ambo tabadquin nainash Esus ambobi icnubi tantienquio yec Madia Osebëd auëshquio nidoapanëdash. Adec nidash inchëshbudtsëqui abëd chobedo yacno capuquin Esus nibëmbenepanëdash.

⁴⁵ Aden nibënquin istuidabi yec Edusaden yacno padpidec nidoapanëdash.

⁴⁶ Daëdec ushqun nibënshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiaquidquin chuibanquidbëd onquecuedesho istuidpanëdash.

⁴⁷ Adec onquec tsadsho isquin, Bédamboen tantiaquin chuibanquidquo nëid nec, quequin utsibon tantiabededpanëdash.

⁴⁸ Adnubien, ěMitsipadquid con mado nepec? quequin otacquo Madian tantiapanëdash. Aden tantiequi: —ěAtotsi quiash ëbi daëdi tantienquio yec nëmbo choash tabadquin chuibanquidbëd, mado? Unësquiocquin papabëdtambi mibi nibëmbeniombi —capanëdash anin.

⁴⁹ Adoquien Esus: —ěAtotsieshun ëbi nibëno? Con Pa shubu uashunaidën tabadnuëc chobosh nebi. ěTantienquioda mimbi icpe?

⁵⁰ Aden Esusën chuisho anibëdtan Osen tantienquiocpanëdash.

⁵¹ Adashien: —Nidnu. Nid, mado —anin cac cacuidenquio yec Nasaded yacno anibëdi choash tabadquin Madian chiaidbëdta Osen chiaid tantiaquin Esusën nadenepanëdash. Adec tabadnubi aton titan ambi isboëdbëdta ambi tantienquio yaid bëpiscudenquiocquin tantiadenepanëdash.

⁵² Adnubien comapenen tantiec bédamboec canidopanëdash. Adquid icsho Esus Nuquin Papan bédamboen isacpadomboen adomboembidi matsesën isbededpanëdash.

3

*Esus choec, quequin Uan mentoanquidën chiaid
(Mat 3.1-12; Mad 1.1-8; Uan 1.19-28)*

¹ Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aitedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanëdash. Ancanquid aitedi icnubien Disanias cuëmëdquid nidaid Abidinia caid yacnocquido ancanquid cobednadod caid icpanëdash.

² Ancanquid aitededi icnubien Anasbëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacadiasën mado matses nibëdacnombo tabadshobi Nuquin Papan, Ëmbi chiaid chuibanta, capanëdash.

³ Adoac acte Odan caid cuëmano capuquimbi naden chuibampanëdash. Mimbi tantiaid icsa ënta. Aden ënsho isun mimbi icsambocquin naboed tantienquo yachimboen Nuquin Papan mibi bëdamboen isendac. Ëmbi tantiaid icsa nainquiocquin ënu, mibi qesho tantiashun mibi acten mentono, quequin cho-choquid cho-choquidquien Uanën chuidednepanëdash.

⁴ Ëndenquimbo Nuquin Papan tantiamiac Isayasën Uan chuiquin dada uampicpadequi Uan icpanëdash. Naden Isayasën Uan chuiquin dada uampicp:

“Matses nibëdacnombo tabadquidën ëcauanshun naden chiendac: Nuquin Icbombo choeque. Aid tantianu, quequin mimbi tantiaid icsa ëmbanta.

⁵ Umbo ancuenquo chosho isnu quequin cuembocnoc andëdshun ambescabanacimboen abimbo chuiquidënquo chiaid tantianu, quequin mimbi tantiaid icsa ëmbanta.

⁶ Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,” quequin Isayasën Uan tishabicnuc chuiquin dada uampid nec.

⁷ Aden ënden chiampicpadequi Esus bëyucanequin acten mentomenuec cho-choquid dadpen icsho Uanën nadopanëdash: —Nisin bacuë anipadquid nec. Aidbimboecquid icsambocquid mibi neyoc. Mibi adquid icsho isun çtsuntsin Nuquin Papan cuidnushe qeshun ambi mënchictequid icta, quequin mibi chiosh? çAidën chiaid tantiashta acten mentomenuec cho?

⁸ Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquo icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquo nebi, quequin tantienda. Abadauampadquid ambi chiaid tantiaquid bunquin, Matses icta, Nuquin Papan cac cuënotebi matses iquendac —quepanëdash Uan.

⁹ Adequi onquebudec: —Cuëte icsatedi matenu, quequin cuëte bacuëesa dëdshun mateshun icbon nëdëncaguin tauiec. Adquiecbidi tantiaid icsambocquid cuëshëdmenu, qeshun bëdamboec tabadaid ismesa cuëshëdmeshun chian anëdënquequid Nuquin Papan nënendac —quepanëdash Uan.

¹⁰ Adoaguien: —Chian anëdënquequid Nuquin Papan nësiate ictiapimbocquin çatotsimbi napeba? —quepanëdash iccuededquido.

¹¹ Adoaguien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

¹² Adecbidi ancanquid dapan matses utsin na bedtequid nëidted bedta caidotsen acten mentomenuec cho-chopanëdash. Choshon Uanën chuiban-sho tantiash: —Chian anëdënquequid nësiate ictiapimbocquin çatotsimbi napeba? —quepanëdash.

¹³ Adoaguien: —Ancanquid dapan chiactedtsëqui bedta. Muaquin mitsana daëd uanuequin bedenda —capanëdash Uanën aido chuiquin.

¹⁴ Adashic, adecbidi sondado cho-choash: —çAtotsimbi napeba? —quepanëdash Uan caic.

Adoaguien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

15 Aden Uanën chuibansho tantiash: —¿Tsutsi nepec? ¿Nuquin Papan chomiaidta nepec? —quecuededpanēdash cho-choquido.

16 Adsho tantiash: —Mibi acten mentoquidquio nebi. Padnuen ēbipadquidpenquio nadatiambocquid choendac. Aidi bēdamboshēcquid nendac. Adquid icnuc ēbi icsaquid icsho ¿atotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidēmbi menendac. Aden meniac Esus tantiaquidombo ambi tantiaid icsa ėnte bunquidquio icmendac aton Mayanēn. Adoac ėnsho isun pauquendac —quepanēdash Uan.

17 Aden chuibanec nadpanēdash: —Piacbo ėshē uashun bitsi secatanquin nēdēncashun ėshē ichon dayun uacpadomboen abi tantiesa cuēshēdmeshun chian anēdēnquequid nēsiasahun abi tantiaquidtedi abi yacno puduedmendac aidēn.

18 Aden Nuquin Papan chiaid dadpen chuibanquin: —Adomboen tantiaquin nabanta —capanēdash Uanēn.

19 Adshumbic, ancanquid Edodesēn tantiaid icsatsen Uanēn chuibampanēdash: —Min utsin chido, mimi bedaid, mimi tantiaid icsa neque. Mimi tantiaid icsa ėnta —capanēdash. Aden chuiboshombic adomboembidi padpiden abibidi Edodesēn tantiaid utsibotsen chuiopanēdash.

20 Aden ambi tantiaid icsa chuibansho tantiashun Edodesēn Uan bedmeshun quēnēn nauedmepanēdash abitedishun tantianushe queshun.

Esus acten mentoaid
(*Mat 3.13-17; Mad 1.9-11*)

21 Quēnēn nauedabicquin matses dadpen acten mentobampanēdash Uanēn. Utsiboba mentoshombic Esustsen mentopanēdash. Adoquien mentoacnoēshquiobi Esus Nuquin Papa chiec onquepanēdash. Adeconquenubien abu shēcuē nibēdboedi shēcnianec

22 dēbimbimboec cuemo budec Nuquin Papan Mayan Esusēn mapino tsadtoec budpanēdash. Aid budnubien abucuēsh Esus chiec naded aton Papa onquepanēdash: —Mibentsēquiobi icsho ėmbi tantiaidquio mibi nec, mado. Adēmbidi ėmbi bēdamboen isaidquio mibi nec —quepanēdash aton Papa.

Esuquidistun tsusedpabo chiaidtedi
(*Mat 1.1-17*)

23 Adashic, abi tishaid seta 30ted icquimbi Nuquin Papan chiacpaden naquin tauapanēdash Esusēn. Aden tauaquin chuibansho tantiash aton matses nadpanēdash. Osen mado nec, quiash, Nuquin Papan mado nec, quenquio yec matses onquepanēdash. Esusēn papapenquio Ose icnēdash. Madia aton tita icbo icnuc Esusēn tsusedpabo nēidtedi iquec: aton buchido Edi cuēmēdquid icpanēdash.

24 Aidēn papabic Matic cuēmēdquid, aidēn papabic Debi cuēmēdquid, aidēn papabic Ana cuēmēdquid, aidēn papabic Ose cuēmēdquid,

25 aidēn papabic Matatias cuēmēdquid, aidēn papabic Amos cuēmēdquid, aidēn papabic Naun cuēmēdquid, aidēn papabic Esdi cuēmēdquid, aidēn papabic Nacai cuēmēdquid,

26 aidēn papabic Mac cuēmēdquid, aidēn papabic Matatias cuēmēdquid, aidēn papabic Semei cuēmēdquid, aidēn papabic Ose cuēmēdquid, aidēn papabic Uda cuēmēdquid,

27 aidēn papabic Uana cuēmēdquid, aidēn papabic Desa cuēmēdquid, aidēn papabic Sodobabed cuēmēdquid, aidēn papabic Sadatied cuēmēdquid, aidēn papabic Nedi cuēmēdquid,

28 aidën papabic Medqui cuëmédquid, aidën papabic Adi cuëmédquid, aidën papabic Cosan cuëmédquid, aidën papabic Edmodan cuëmédquid, aidën papabic Ed cuëmédquid,

29 aidën papabic Osue cuëmédquid, aidën papabic Ediesed cuëmédquid, aidën papabic Odin cuëmédquid, aidën papabic Matic cuëmédquid,

30 aidën papabic Debi cuëmédquid, aidën papabic Simeyon cuëmédquid, aidën papabic Uda cuëmédquid, aidën papabic Ose cuëmédquid, aidën papabic Onan cuëmédquid, aidën papabic Ediaquin cuëmédquid,

31 aidën papabic Medeya cuëmédquid, aidën papabic Menan cuëmédquid, aidën papabic Matata cuëmédquid, aidën papabic Natan cuëmédquid,

32 aidën papabic Dabid cuëmédquid, aidën papabic Isai cuëmédquid, aidën papabic Obed cuëmédquid, aidën papabic Bos cuëmédquid, aidën papabic Sadomon cuëmédquid, aidën papabic Nason cuëmédquid,

33 aidën papabic Aminidad cuëmédquid, aidën papabic Adan cuëmédquid, aidën papabic Eston cuëmédquid, aidën papabic Pades cuëmédquid, aidën papabic Uda cuëmédquid,

34 aidën papabic Acobo cuëmédquid, aidën papabic Isac cuëmédquid, aidën papabic Abaduan cuëmédquid, aidën papabic Tade cuëmédquid, aidën papabic Nacod cuëmédquid,

35 aidën papabic Seduc cuëmédquid, aidën papabic Dacau cuëmédquid, aidën papabic Pedec cuëmédquid, aidën papabic Ebed cuëmédquid, aidën papabic Sada cuëmédquid,

36 aidën papabic Cainan cuëmédquid, aidën papabic Adpashad cuëmédquid, aidën papabic Sen cuëmédquid, aidën papabic Noe cuëmédquid, aidën papabic Damec cuëmédquid,

37 aidën papabic Matusaden cuëmédquid, aidën papabic Enoc cuëmédquid, aidën papabic Aded cuëmédquid, aidën papabic Macadaded cuëmédquid, aidën papabic Cainan cuëmédquid,

38 aidën papabic Enos cuëmédquid, aidën papabic Sed cuëmédquid, aidën papa abia uampid Adan cuëmédquid, aidën papambo Nuquin Papa abia yanampidquio nec. Abi tabadec. Aidtedi Esusën tsusedpabo nec.

4

Satanas Esus icsamete bunaid (*Mat 4.1-11; Mad 1.12-13*)

1 Adshumbic, Matses nebi, quequin Nuquin Papan chiacpaden nanuen acten mentomepanédash Esusën. Aden Uanën acten mentoäquien Nuquin Papan Mayanën chiacpadec acte Odan caid yacnoësh puduanec matses nibédacnombo nidash tsadpanédash.

2 Ushë utsi nidash utsi choaid abuctotsëcquiecnuc ambobi tsadpanédash. Aidtedi ushquin penquio yash Esus bundopanédash.

3 Bundoacsho isash Nuquin Papa chieshênquid choash Satanas nadpanédash: —Nuquin Papan madombo icquin penun cuënotebi pete icta cata —capanédash Satanasën Esus chuiquin.

4 Adoäquien: —Padi: “Peteuidi pec bédamboec tabadtemaid nec,” quequin dada uapampic —quepanédash Esus Satanas caic.

5 Adoshombic, macuësh dapa abucquio yacno Esus buanshun Satanasën badedquio nidaidtedi ismebampanédash.

6 Ismiash: —Nidaidën icquidtedishun icbo icmiaidquio nebi. Abitedi con na nec. Embi menenu cac aidtedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibédendac.

⁷ Nidaidën tabadquidtedi chuiquid dapa icnu quequin, Con icbo mibi nec, ëbi casho adquid mibi icmëmbi —quepanëdash Satanas Esus caic.

⁸ Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbï tantiaiduidtsëqui min icbombo neque. Aidën namiaidquio icta” —quepanëdash Esus Satanas caic.

⁹ Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquio tsadumpanëdash. Aden tsadunshun: —Mibi Nuquin Papan madombö yec nëuëshquio dacuëdenquio yec pudunta.

¹⁰ Naden dada uapampid iqueque. Tantiä. Chuinu.

“Mibi pudunsho isun, Tscatequin bëdamboen budmeta, quequin Nuquin Papan ambi uaido mayan bëdabo chiendac.

¹¹ Aidombi min taën tsasimbocquid tincanushe queshun uidën uaquin mibi bëdamboen budmendac.”

Aden min Papan chiaid icnuc dacuëdenquio yec pudunta —capanëdash Satanasën Esus chuiquin.

¹² Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanas caic.

¹³ Aden chiaquien Satanasën Esus icsamboen namenuen tanquin naimbudpanëdash. Aden naimbudequi, Padpidemboen ëmbi chiaid namenuquin Esus tanun nanuna, quequin ambibi tantianec Esus nianec Satanas nidpanëdash.

*Nasaded yacnoquido Esus bunesabo
(Mat 4.12-17; 13.53-58; Mad 1.14-15; 6.1-6)*

¹⁴ Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantipanëdash.

¹⁵ Adnubic, Nuquin Papan chiaid chuibante shubu utsin-utsinquiecu puduedcuenequin Nuquin Papan chiaid Esusën chuibampanëdash. Aden chuisho tantiash, Nuquin Papan chiaid tantiaquidquido Esus nec, quecuëdëncuededpanëdash.

¹⁶ Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanëdash.

¹⁷ Nidtosho isun Nuquin Papan chiaid Isayas cuëmëdquidën dada uapampid anocquidën Esus menepanëdash. Aden aid meniäc sananquin secudoabanquin isbanec nadec Esus onquepanëdash:

¹⁸ “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiäid icsa ëmenuen chuibanta caidquio nebi. Aidëmbidi Satanasën yuaid Nuquin Papan bacuë icmenuequin chuibanta caidquio nebi.

¹⁹ Aidën Nuquin Icbon bëdamboen iste chuibanta caidquio nebi.”

²⁰ Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash.

²¹ Adoac: —Nuquin Papan chiaid mimbï tantiaboed nëbimbobi tauadoec —quepanëdash Esus abibi chiädequi.

22 Adoaquien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ic̄tic? —queoapanëdash.

23 Adoaquien: —Bëdamequid yequi abibi daicsambo yanash bëdamiadacsho isash, Bëdamequidquo nec, quequin matsesën tantiapec, quequin chuipampid nec. Ëmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec.

24 Abimbo chiembique. Tantiata —quiash Esus abi onquec: —Nuquin Papan ëmbi tantiamiacpaden chuibanta caidën abi caniacnoshon chuïbansho tantienquiocquid icpec.

25 Ëndenquimboshë adomboembidi Nuquin Papan ëmbi tantiamiacpaden chuibanta caid Edias cuëmëdquidën chuïbansho tantiesa icpampic. Aidi icnubien isadaidbon bënuua chidobo dadpen icpampic. Aido adquid icnubien seta abentsëc chotsëcnuu matamec aton pete nibëdquieq yanubi isadaidbon bënuabo bunec tabadpampic.

26 Adec bunec tabadsho isun, Isadaidbon bënuua yacno nidta, quenquiocquin isadaidpembon bënuua yacno pemenuc nidta cac Edias nidshun ambi chiacpadomboen isadaidpembon bënuuan nanuc aton pete uesadenquiocpampic. Aid chido shubu dadpen icquid Saeducta caid yacno tabadpampic. Saeducta shubu dadpen icquid Sidon caid anoentsëqui icpampic.

27 Adashic, adecbidi isadaidbo abi daushumbo yacno mishac mishadenquo yachimboecquido dadpen icpampic. Adquido icnubien Nuquin Papan namiaidquo utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembon abentsëc Naman cuëmëdquid Ediseyon bëdamepampic. Ëbi bëdamepec, quequin tantiec aton nidaid Sidia caid yacnoësh choacsho Ediseyon Naman bëdamepampic —quepanëdash Esus.

28 Aden Esusën isadaidpembon nashumpampid chuïsho tantiaish iccuededquido isadaidbo comapenec nëishpanëdash. Isadaidpembobëd isadaidbo ictiapimbo iquec, quec iccuededquido nëishpanëdash.

29 Adec nëishash nidanec nuntanuësh puduenanec shubu ënëdacno nidshun acte dapa quiusudacnombo nebudnuequin Esus buampanëdash.

30 Aden nidmiaquien matses dadpen icquid natsusash Esus nidpanëdash.

Mayan icsa dapuduedaid cuemete (Mad 1.21-28)

31 Adec abi caniacnoësh Nasaded caid yacno nidtanashi nidaid Cadidia yacno nidequi Capednaun caid yacno Esus choapanëdash. Ambo choash chonoadtemaid ushë icnu Nuquin Papan chiaid chuïbante shubun puduedshun Nuquin Papan chiaid chuïbampañëdash.

32 Aden chuïbansho tantiaish: —Ambia tantiaquidën chiacpaden chuïbanquidien Esus nechitec —quecuededpanëdash anocquido.

33 Aden Esusën chuïbanubien Nuquin Papan chiaid chuïbante shubu nuntan mayan icsa dapuduedaid icpanëdash. Aidi comapenec sidquetanec onquec:

34 —¿Nasaded yacnocquid Esus caid atotsi quec mibi cho? ¿Ëbipadquidtedi naimbudmenuecta cho? Ëmbi isaid mibi nec. Nuquin Papan bëdamboen isaidquio, icsapenquiocquidquio mibi nec —mayan icsan caquien:

35 —Otaquio tabad. Adec tabadec dapuduenta —Esusën cac mayan icsan abi dapuduedaid tacpanën nebudec icsa uainquio yec dapuduempanëdash.

³⁶ Adosho isash tantiadempambo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec —quepanëdash Capednaun yacnocquido.

³⁷ Aden tantiaquin Esusën mayan icsa dapuduemiosh, quequin isquidon chuiban-chuibanac Capednaun yacno dêuequidtedishuntsen tantiapanëdash.

Daicsambocquid dadpen Esusën bêdamiad
(*Mat 8.14-17; Mad 1.29-34*)

³⁸ Mayan icsa dapuduemiashic Nuquin Papan chiaid chuibante shubu yacnoësh puduenac Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bêdametsia? —caquien:

³⁹ Simonën nachi yacno choash dayunquio nidtuidec: —Chumbocquid dauebudta —Esus quenubi badedquio dauebudpanëdash. Adec dauebudash nidtoshon codocashun Esusbêd icquido pemepanëdash Simonën nachin.

⁴⁰ Adshumbic, inchëshbudtsëqui daicsaid utsi-utsien bê-bëpanëdash. Aden bê-bêsho isun damishquin Esusën bêdamepanëdash.

⁴¹ Adembidi mayan icsa utsi-utsien dapuduemepanëdash. Adoac, Nuquin Papan madombobi mibi nec, quec sidquesho tantiaishun: —Nuquin Papan chomiaid nec, quequin ëbi chiec adec onquenda —Esusën cac mayan icsa enëdpanëdash.

⁴² Adashic, badiadnuc matses nibëdacno Esus nidpanëdash. Esus nidacsho isun matses dadpenshun nibënquin istuidshun: —Nidenquio yec ëbëdi tabadta —capanëdash istuidquido.

⁴³ Adoaquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuec nidëdabi. Nuquin Papan chomiaid icquïn chuibanun nabono —quepanëdash Esus abi nibënquin istuidquido chiec.

⁴⁴ Aden chiashic Nuquin Papan chiaid chuibante shubu utsin-utsingieic puduedcuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

5

Abêd tabadmenuen chomiaid
(*Mat 4.18-22; Mad 1.16-20*)

¹ Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash.

² Adnubien masi yacno aton cano daëd nëshun icbon aton nëshaidtedi pambampanëdash.

³ Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

⁴ Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

⁵ Adoaquien: —Icbo, inchëshëmbi nuëcquid bednuen nëshaid nënebenuquin ëbitedishun bedamboccombi. Mimbi nëshaid nënetan cac nënetanëmbi —quepanëdash Simon.

⁶ Adash shodombo yacno nidshun nëshaid nënetanquin nuëcquid dadpenquioshë bedac nëshaid têsëdec taëpanëdash.

⁷ Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubu-cubutsëcquiocnoc nuëcquid sandoac cano daëd mentoadtsempanëdash.

⁸ Adoanec Esus yacno choequi danëshën sebudec shuebudash Simon Petedon: —Icho, ëbëd iquenquoio yec nidaneta. Icsambocquid nebique —capanëdash Esus chuiquin.

⁹ Abëd icquidobëdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanëdash Petedo.

¹⁰ Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëdenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaïden capucuenequin abuc tabadaïd mimbi chuiban-chuibanendac —quepanëdash Esus Petedo caic.

¹¹ Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

Daushumbocquid bëdamiaid
(Mat 8.1-4; Mad 1.40-45)

¹² Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

¹³ Adsho tantiashun adquid daushumbocquid mishtemaid nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquio bëdampañëdash.

¹⁴ Aden bëdametanec Esus: —Ëmbi naid utsibo chienda. Adenquiocquin isadaïdbo tsusiobo ismetanta ma bëdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaïd Moises dada uamiampicpadembi bëdambo icmiaïd cuidtequidquio meneta —capanëdash Esusën ambi bëdameboed chuiquin.

¹⁵ Adnubien Esusën bëdamesho isquidon Esusën bëdamiaid chuibanac mases dadpen Esusën chiaïd tantianuec cho-chopanëdash. Adecbidi, daicsambocquido bëdanuec cho-choacsho Esusën bëdamepanëdash.

¹⁶ Adashien mases nibëdacnombo nidash Nuquin Papa chiec onquepanëdash.

Dada shëquëquenquiocquid bëdamiaid
(Mat 9.1-8; Mad 2.1-12)

¹⁷ Adashic, ushë utsin Esusën chuibanuc padiseyobobëdi Nuquin Papan naden nata quequin chiaïd tantiamequid dadpen tabadpanëdash. Utsi-utsiec nidaïd Cadidia yacnoësh cho-chonobi utsi-utsiec nidaïd Udeya caïd yacnoësh cho-chonobi utsi-utsiec Edusaden caïd shubu dadpenquioshë yacnoësh cho-chopanëdash. Adec aïdo cho-choash tabadnubien Nuquin Papan nadatiambocquid naquid icmiac mases bëdamenuc Esus icpanëdash.

¹⁸ Aid icnubien dada shëquëquenquiocquid aton din nandoshon aton utsibon bëpanëdash. Aden bëquin shubu nuntan nënantanquio Esus icnubi

¹⁹ mases tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

²⁰ Dada shëquëquenquiocquid ëmbi bëaid Esusën bëdamec, quequin tantiaguin bëquidon ambi bëaid imbudsho isash dada shëquëquenquiocquid caic: —Mimbi tantiaïd icsa cuidenquoio yec bëpiscudtequidquio mibi nendac —quepanëdash Esus.

²¹ Aden chuisho tantiash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquio yec bēpiscudquidquio nec —quepanēdash ambibi tantiacpadec onquec.

²² Aidon tantiaid tantiec Esus: —¿Atotsi quiash mimbibi icsamboen tantiec onquepe?

²³ ¿Mimbi tantiaid icsa cuidenquio yec bēpiscudtequidquio nendac ěmbi chiaidquio bēdantequidpenda nedic? Adecbidi, ¿Mibi icsambocboedi mibi bēdanoque. Nidtoash nidta, quequin chiaid bēdantequidpenda nedic?

²⁴ Nuquin Papan chomiaid icquimbi mimbi tantiaid icsa cuidenquio yec bēpiscudtequidquio nendac ěmbi cac ad iquendac. Nuquin Papan chuimaidquio nec mibitedi camenuen dada shēquēquenquiocquid naden chiembique Tantia. Nidtoash nidquin min di buanec nid —capanēdash Esusën dada shēquēquenquiocquid chuiquin.

²⁵ Adoac nidtoshon aton di bedanec Nuquin Papan naboed chuibanequi aton shubuno nidpanēdash.

²⁶ Adsho isash tantiadempambo yec Nuquin Papan naid chiec onquecuedec tabadpanēdash: —Aden bēdamiaid isenquiochoeděmbi nēbimbobi aid isbempombi —quecuededpanēdash.

Debi, ěbi tsibanec cho, quequin Esusën chiaid
(Mat 9.9-13; Mad 2.13-17)

²⁷ Adashic, capucuenequin Debi cuēmēdquid Esusën istuidpanēdash. Debi nec queshumbi Mateyo cuēmpañēdash. Ancanquid dapan utsibon na bedtequid bedshumbanta caid Debi icpanēdash. Ancanquiděn chiapaden Debin utsibon na bedtequid bedbansho isun: —Ěmbi chiaid tantianush ěbi tsibanec cho —Esusën cac

²⁸ Debi nidtoanec aton natedi nianec Esus tsibananec nidpanēdash.

²⁹ Adshun aton shubuno Esus buanshun Debin pemepañēdash. Ancanquiděn utsibon na bedtequid bedbanta caido abipadquido dadpembēdtabi Esus Debin pemepañēdash.

³⁰ Aden adquidobēdtan Esusën pesho isash padiseyobo: —¿Atotsieshun mibi chuiquidbēdtan mibitedishun icsambocquidbēdtan pepeba? —quepanēdash Esusbēd icquido caic.

³¹ Aden chuisho tantiash Esus nadpanēdash: —Ěbi bēdamec cho, quenquio bēdambocquid iquec. Daicsambocquidien, Ěbi bēdamec cho, quendac.

³² Adecbidi, Nuquin Papan bēdamboen isaidquio icsho, Mimbi tantiaid icsa ěnta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ěnta, quequin chuinuec chondabi —quepanēdash Esus padiseyobo caic.

Buna mēmunaid
(Mat 9.14-17; Mad 2.18-22)

³³ Aden Esusën chuibansho tantiashun naden padiseyobon Esus chuipanēdash: —Uambēd icquido buna mēmunec Nuquin Papa chiec onquedenec. Adquiecbidi ěbēd icquido buna mēmunec Nuquin Papa chiec onquedenec. Adenquio mibēd icquido iquec. Aidon buna mēmunenquiocquin peshun sicaid actenec —quepanēdash padiseyobo Esus chiec.

³⁴ Adoaquien: —Aton chido bednun pambid meniac chidon codocacsho abi inquiděn abēd icquido menec. Aden meniac isuidesa abēd icquido nec. Adecbidi ěbi abi chuiquid icnuc ěbēd icquidon buna mēmunenquiocquin isuidenquio iquec.

35 Yucash chido inquit nibëdanan abëd icboedo unësquiocquin buna mëmünquin isuidpec. Adecbidi ëbi nibëdanan ëbëd icboedo unësquio yampec –quepanëdash Esus padiseyobo caic.

36 Aden chuibanëqui abi Esus onquec: –Dashcute chuca cuëshun dashcute shëñibëda nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec.

37 Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bënquiocquin.

38 Adembidi, ëmbi ënden tantiaiduidi tantianu, quequin Nuquin Papan nëbi chiaid pausudtequid bëda tantiauidquid yanec icsabudendac. Mibi adquid iquec, quequin tantiaquin utsi chiacimboen Esusën padiseyobo chuipanëdash.

39 Adashic ambi ënden chiaid tantienquiocboedi nëbi Nuquin Papan chiaid utsi chuibanac tantiaquidquio iquendac –quepanëdash Esus.

6

Chonoadtemaid ushë tantiaquid

(Mat 12.1-8; Mad 2.23-28)

1 Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash.

2 Aden pesho isquin padiseyobon: –¿Atotsieshun chonoadtemaid ushën chonoadpeque? Tantanu. Ëbi chui –capanëdash Esusbëd icquido chuiquin.

3 Adoaquien: –¿Tsedpa Dabid caidbëd icquidon piasquin pepampid tantiamböda ique?

4 Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menëbanshun aidobëdtambi pepampic. Aid pan Nuquin Papan nami-aidëñuidtsëqui petequid nepampic –quequin padiseyobo chuishun Esusën nadopanëdash:

5 –Ëbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubinì aid ushë icho yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

Mëuesadaid bëdamiaid

(Mat 12.9-14; Mad 3.1-6)

6 Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquío mëuesadaid dada icpanëdash.

7 Ambobidi tabadquimbi Esus chieshëñquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash.

8 Aden cainubien abi chieshëñquidon tantiaid tantiaquin mëuesadaid isquin: –Nënantanquio nidto –Esusën cac mëuesadaid nënantanquio nidtoash nidpanëdash.

9 Adsho isashien: –Tantanu. Chui. ¿Chonoadtemaid ushën matses tanti-aquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsi-utsiec unësquec? –quepanëdash Esus.

10 Aden chuishumbic iccuededquido isbanquin: –Ëbi mëd –cac Esus mëdequi mëuesadaid bëdampanëdash.

11 Adec mëuesadaid bédansho isashien comapenec nëishash: —
 ¿Mitsipadentsimbi Esus acpe? —quec onquecuededpanédash abi
 chieshënquido.

Esusën, Èbi chuibeneta, caido
 (Mat 10.1-4; Mad 3.13-19)

12 Adashic, ushë utsin macuësh yacno matses nibédacno Nuquin Papa
 chiec onquenuec nidash inchëshën ushenquio yec Nuquin Papa chiec Esus
 onquepanédash.

13 Badiadshun abéd icquido dadpen chomeshun, Èbi chuibeneta, quequin
 12tedictsèqui chuipanédash.

14 Nèidic, Simon, Esusën Petedo caid; utsibic, Andedes, Simonën utsibi;
 utsibic, Acobo; utsibic, Uan; utsibic, Uedipe; utsibic, Badtodome;

15 utsibic, Debi cashumbic Mateyo caid; utsibic, Tomas; utsibic, Acobo,
 Adpeon mado; utsibic Simon, ancانquid isadaidpembo bunesa;

16 utsibic, Udas, Acobon mado; utsibic, Udas Iscadiote, yuecshun Esus
 chieshënquido Esus bedmequid. Aidtedi, Esusën, Èbi chuibeneta, caido
 icpanédash.

Nuquin Papan bédamboen isaïdo icnuc ambi icsamboen isaïdo
 (Mat 4.23-25; 5.1-12)

17 Adashic macuësh yacnoësh abéd 12ted icquido pada-padambo yacno
 budash abi tsibanquido dadpen icsho isash Esus nidtuidpanédash. Nèidted
 icpanédash: Nèidic, Edusaden yacnoësh choquido; utsibic, Acte Dapa cuëman
 shubu dadpen icquid Tido caid yacnoësh choquido; utsibic, Sidon caid yacnoësh
 choquido. Aïdo Esusën chuibansho tantianuec cho-choash tabadnubi,
 Èbi bédamepec, quequin tantiec utsibo choash tabadpanédash.

18 Adec choquido mayan icsa dapuduedaid icsho isun Esusën dapudue-
 mepanédash.

19 Adsho isun nadatiambocquid Esus neque. Mishnu, qeshun mishequi
 bédancuededpanédash.

20 Adshumbic abéd icquidombo isbanquin naden Esusën chuibam-
 panédash:

—Nëmbo mibi icnuc mitsana nibédtenesho isun Nuquin Papan bédamboen
 isaïdo iquec abuc nidan con natedi mitsana nendac.

21 “Nëuëshquio bundodenesho isun Nuquin Papan bédamboen isaïdo yec
 abuc èbéd tabadec bundoesa iquendac.

“Nëuëshquio matses Nuquin Papan chiaid tantiesha icsho isash unëshquio
 yec shubidednequid Nuquin Papan bédamboen isaïdo yec abuc nidash èbéd
 tabadec bédambo iquebi quependac adquido.

22 “Esus tantiaquid icsho chieshënquin pudued cainquio yaid adembidi
 mua uaquin chuishunaid Nuquin Papan bédamboen isaïdquio nec.

23 “Adomboembidi èmbi èndenquimbo chuimiad aton matsesën icsamboen
 chuishundeniampic. Adomboembidi mibi min matsesën icsamboen
 chuishundenetsiash. Nidaidëshshun adoaid iquec Nuquin Papa yacno choac-
 sho ambi bédambo icmiaid mibi iquendac. Adquid iquendabi quequin
 tantiec mibi icsamboen chuishunaqui, Cuishon, queta.

24 “Padnuen, con na dadpen iquec, quequin tantiec bédamboec tabadebi,
 qesho Nuquin Papan icsamboen isaïdo mibi nec. Nidaidëshshun mimbi
 bedteniaiduidi tantiec Nuquin Papa yacno puduedtiapimbocquid mibi
 iquendac. Nidaidën bédamboec tabadquin ènden bedondaïdi mibi nec.

25 “Nidaidënsun abi bunaidtedi bedquido Nuquin Papan icsamboen isaïdo nec. Abi bunaiduidi tantiaquin Nuquin Papan chiaïd tantianu qeshun tantiatipimbo iquendac.

“Mitsanauidi tantiec, Bëdambo iquebi, quec mamë nec tabadquido icsho Nuquin Papan icsamboen isaïdo mibi nec. Adquido Nuquin Papa yacno puduedte bunsho, Padi, cac shubiquendac.

26 “Bëdambocquid nec, quequin mibi dadpenshun chuïsho tantienda. Adomboembidi mua uain Nuquin Papan ëndenquimbo chuïmiïdpebon chuïpampic. Aidon chiaïd tantiashun tsusedpabon Nuquin Papan chiaïd tantienquïo yanampic. Adquido Nuquin Papan icsamboen isaïdo nec – quepanëdash Esus.

Mibi uïmanëquïdo tantiaquin nabanta, quïaid
(Mat 5.38-48; 7.12)

27 Aden chiashic abi Esus onquec: –Ëmbi chiaïd tantiaquïdquïo nad iqueque. Chuïnu. Tantiata. Mibi chïeshëquïdo bëdamboen tantiaquin nabanta.

28 Adembidi mibi icsamboen chuïquïd bëdamboen chuïta. Adembidi, ëbi icsamboen naquïdo bëdamboen tantiaquin cuidenda, Papa, quequin Nuquin Papa chuïta.

29 Adembidi mibi cuesquïd cuidenda. Adembidi mibi icsamboen nadesho cuidenquïocquin adembi bëdamboen nabanta. Adembidi ampequin min dashcute bedanec nidsho isun, Chiata. Dadamicquïdtsen buan, cata.

30 Utsibic, aton na nibëdquïd, Bec cho, qesho meneta. Adembidi utsin mitsana ampesho isun cuidenquïocquin bëdamboen naota.

31 Adembidi ëbi bëdamboen nashuntiaquïdi nepec quequin mimbi tantiapadomboen utsi tantiaquin nashunta.

32 “Ëbëd tantiananquïduïdi tantianu, quec ¿bëdamboda mibi icpe? Padenquïo. Adembidi Esus tantïesan abïpadquïocquïdo tantiec.

33 Adecbidi, Ëbi bëdamboen tantiaquin nashunquïduïdi tantiaquin nashunoanu quec ¿bëdamboda mibi icpe? Padenquïo. Esus tantïesan adembidi nashunquïdquïo nec.

34 Adecbidi, Ëbi menequïduïdi menenu, quec ¿bëdamboda mibi icpe? Padenquïo. Esus tantïesan adenuïdi menec.

35 Naden nata, quequin chuïnu. Tantiã. Mibi chïeshëquïd icsho aid tantiaquin bëdamboen nabanta. Adembidi mibi meniantiapïmbocquïd, Bec cho, qesho, Yucash cuidnanun nanuna, quenquïocquin meneta. Mimbi adoshö isun Nuquin Papan mibi bëdamboen isendac. Adobanec bëdambo iquebi quec mibi tabadendac. Adomboen nabanquïdo Nuquin Papan nacpadomboen nabanquïd nendac. Adquido aton mado iquendac.

36 Nuquin Papan abi chïeshëquïdo nashundeniapadomboen mibi chïeshëquïdo nashundeneta –quepanëdash Esus.

Icsambocquïd nec, quequin chienda, quïaid
(Mat 7.1-5)

37 Aden chuïbanashic Esus abi onquec: –Ëmbi tantiapadomboen naisa icsambocquïd nec, quenda. Adesa abi yacno choacsö Bëdambocquïd neque. Puduedme, Nuquin Papan caindac. Adecbidi, Icsambocquïd iquec. Aid cuidtiadquïdi Nuquin Papa nec, quenda. Adenquïo icsho Nuquin Papan cuidtiadquïd mibi iquendac. Mibi icsamboen tantiaquin utsin nasho isash cuidnanenquïo yec bëpiscudta. Adquïd, Cuidnu, quenquïo yec mimbi icsamboen tantiaquin naid Nuquin Papa bëpiscudendac.

³⁸ Aton na nibëdquid bëdamboen tantiaquin meneta. Adembidi, mibi tantiaquin abi utsibëd bëdamboec tabadtequid Nuquin Papan mibi menendac. Utsi tantiaquin mimbi meniäcpadomboen mibi tantiaquin bëdamboen tabadmetequid daëd uashun Nuquin Papan mibi meneoäindac –quepanëdash Esus.

³⁹ Aden chuishumbic utsin tantienquo ictequid abëd icquido naden Esusën chuipanëdash: –¿Podquedën nidnu quec bëshuaid utsi bëyucampecta nidtic? Nidnu, quianec nidec abi daëdi nidaid shëcuë ämpaëdpatsiash.

⁴⁰ Adembidi tantianuequidën abi tantiaequid dëniätiäpimbo iquec. Tantiämiac abi tantiaequidpadquid iquendac –quepanëdash Esus.

⁴¹ Adoshombic adembi tantiaequin naden Esusën chuipanëdash: –¿Atotsi quiash utsi bëtsiädaid pistsëcquid isequi mibi bëtsiädaid dapa isätiäpimbo icpec? ¿Mibibi bëtsiädaid dapa bëbedäbäcquin mitsipadentsi mimbi utsi bëtsiädaid pistsëcquid bedshunuen ispe?

⁴² Adembidi, utsin tantiaid icsa abentsëc icnubien mimbi tantiaid icsa utsi-utsiec icnuc çatotsieshun, Mimbi tantiaid icsa ënta, quequin utsi chuipe? Mimbi tantiaid icsa nibëdacbimboen mimbi chuipeque. Adoenda. Mimbi tantiaid icsa ënshun utsin tantiaid icsa icsho isun ëmenuequin chui –capanëdash Esusën.

*Cuëte abipadquid aton bacuë nec, quequin chiaid
(Mat 7.17-20; 12.34-35)*

⁴³ Adoshombic, adembidi Esusën chuipanëdash: –Cuëte bëdan bacuë adquiobidi bacuëc. Cuëte icsan bacuë adquiobidi bacuëoäic.

⁴⁴ Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquo matses iquec. Adecbidi, echo bacuë isash, Bata nec, quenquo matses icoäic.

⁴⁵ Adembidi bëdamboen tantiaquidën ämbi tantiacpadomboen utsi bëdamboen tantiaquin nabanendac. Adecbidi ämbi tantiacpadec bëdamboec onquec. Adembidi icsamboen tantiaquidën ämbi tantiacpadomboen utsi icsamboen tantiaquin nabanec. Adecbidi ämbi tantiacpadec icsamboec onquec –quepanëdash Esus.

*Tantiaquidquo icnuc tantiaquidquid nec, quequin chiaid
(Mat 7.24-27)*

⁴⁶ Adoshombic: –¿Atotsieshun, Con Icho mibi nec, qeshumbi ëmbi chiacpadomboen naisa mibi ne?

⁴⁷ Èbi yacno choshon ëmbi chuibansho tantiaquiash nidshun nadomboen naquidquo iqueque. Chuinu. Tantiata.

⁴⁸ Cunquequid dapan chimeshnushe qeshun shubu uaquidën shëcuë ëquëduc uëdëshcashun buintad nitsinquid. Adembidi, natiamianquiec came-tequid yanäbäcnu tantesa uainquiocnuen ëbi tantiaquidquo icquin ëmbi chiaid papuduedshun adomboembidi nabanquid nec. Adquidën tantesa uainquo iquendac.

⁴⁹ Utsibic nad iqueque. Tantiä. Èquëduc uëdëshcabi nitsinaid cunquid dapan chimeshunendac. Adecbidi, ëmbi chiaid papudueduidtsäc-padomboen nabanenquo yec natiamianquid chonoc abi papudueduidtsäid bëpiscudendac. Adquid uquë nësecatequid nendac –quepanëdash Esus.

7

*Sondado chuiquidën tantiaid
(Mat 8.5-13)*

¹ Aden iccuededquido chuiquin nainash Capednaun caid yacno Esus nidoapanëdash.

² Capednaun caid yacno choash Esus tabadnubien isadaidpembon sondado chuiquidën yua abi cudasaid unëstiadtšëcquio icpanëdash.

³ Aton yua unëstiadtšëcquio icnubien, Nënquid bédamequid Esus nëmbobi iquec, quequin utsibon chiác:

—Aidën con yua bédametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

⁴⁻⁵ Adoaquien: —Ai —quianec Esus yacno isadaidbo tsusiobo nidshun chui-tuidec: —Sondado chuiquidën chuitan caido nebi. Con yua unëstiadtšëcquio iqueque. Esus bédamequid neque. Chuitan, cac mibi chiec chobi. Sondado chuiquid bédambocquid nec. Nuquin Papan chiaid chuibante shubu uamiondaidquio nioshe. Ambi chiacpadomboen aton yua bédametiadquidi mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash.

⁶ Adec aidobëd Esus nidshobi sondado chuiquidën chomiaid utsibo choquin bëquetuidash nadpanëdash: —Sondado chuiquidën chomiaid nebi. Aidën chiaid chuinuec chopobi. Naden chuita, caposhi: “Padicnuna, Icho. Icsambocquid nebique. Mibi bédambocquid iquec con shubun pudueden-quiocquidquidi mibi nec.

⁷ Èbi icsambocquid iquec mibi bëquedec nidenquiocobi. Mibi bédamequid yec con shubun puduedenquiocquin mibi yacnoshombi, Bédanta, mimi cac con yua bédampec.

⁸ Èbien sondado chuiquid nec. Èmbi nidta cacpadquiequi sondado nidec. Adecbidi, Cho, èmbi cacpadquiecbidi choaic. Ademebidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi mibi chuipombi —quepanëdash sondado chuiquidën chuitan caido Esus caic.

⁹ Adoaquien: —¿Abimbobida cai? —qeshun ambi chiaid tantiamenuequin iccuededquido Esusën bëisbanquin nadopanëdash: —Chuinu. Tantiata. Sondado chuiquid isadaidpembon èbi tantiaquidpadquid isadaidbo nibëdec —quepanëdash Esus.

¹⁰ Aden chiaquien sondado chuiquidën chuitan caido auebidi nidoash shubun puduedshun sondado chuiquidën yua bédamiaid istuidpanëdash.

Nianten mado uincuen uaid

¹¹ Adashic, ushë utsin shubu dadpen icquid Nain caid yacno Esus nidpanëdash. Aidbëdi abëd icquido nidpanëdash. Adecbidi matses utsibo dadpen nidpanëdash.

¹² Adec nidequi Nain tsasi uaid quënë shëcuë anoentsëqui choquimbi unësaid bëquido bëquetuidpanëdash. Unësaid epa icnubi ani niante icpanëdash. Niantebëd Nain yacnocquido dadpen cho-chopanëdash.

¹³ Adec cho-choec niante shubisho isash Esus unësquio yec: —Shubienquio yec ènëd —quepanëdash.

¹⁴ Adec, Ènëd, quetanec uidictšëc nidshun unësaid nanaid Esusën mishnubi abi bëquido nidtuidpanëdash. Nidtuisho isun: —Abuido, uëtsëdtota —cac

¹⁵ uëdtsëdtoash tsadec unëšboed onquepanëdash. Adsho isash ani caic: —Në, unëšboedi min mado uincuenoshe. Abëdi nidec nid —capanëdash Esusën.

¹⁶ Aden unësaid uincuemesho isash cho-choquido: —Adopenshenda uincuemec —qeshun Nuquin Papan naid chuibampanëdash. Aden chuibanec: —Nuquin Papan matses bédamboen isnuen ambi chomiaidquio nuquibëd icmiosh —quec isquido onquecuededpanëdash.

17 Aden isash nidshun unësaid uincuemiaid isquidon chuibansho isadaid-bon nidaid Udeya caid yacnoquidon tantiabempanëdash. Adembidi chiac dëuequidontsen tantiapanëdash.

*Ëbitedishun cainaid mibi nec, quequin Uanën chiaid
(Mat 11.2-19)*

18 Adnubien, acten mentoanondaïd Uan cuëmëdquid quënën nauedaid icsho abëd icquidon Esusën nabanaïd chuïbampanëdash. Adoaquien abëd icquido daëd chomeshun Uanën nadopanëdash:

19 –Esus yacno nidshun nadota. ¿Ëbitedishun cainaid Nuquin Papan chomiaïd abentsëccuïobi mibida ne? ¿Aïdtabi nedi? mibi quenuc, ¿Adambi utsi caimpe? quequin chuita –Uanën cac aid daëdi Esus yacno nidpanëdash.

20 Adec Esus yacno choash: –Acten mentoanondaïdëmbi Uanën chomïaïdo nebi. Uan nadosh: “¿Ëbitedishun cainaid Nuquin Papan chomiaïd abentsëccuïobi mibida ne? cac ¿Aïdtabi nedi? mibi quenuc ¿Adambi utsi caimpe?” quïosh Uan –quepanëdash Uanën chomïaïdo Esus caic.

21 Aden chiaquien icsambocquid bëdamequinc, mayan icsa dapuduedaid dapuduemequinc, bëshuaïd bëdamequinc caquin Esusën ismebampanëdash.

22 Aden nabanquin nainashic: –Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaïdi capuanosh. Adecbidi daushumbocquidon nami bëdanosh. Adembidi pashun tantiabenosh. Adembidi unësaid uincuemiïsh. Adembidi aton na nibëdquido tantiamenuen Nuquin Papan chiaïd Esusën chuïbanosh, quequin Uan chuitanta.

23 Ëmbi aden nabansho isun tantesa uainquiocquin Nuquin Papan bëdamboen isaidquïo nendac, Esus quïosh quequin Uan chuitanta –quepanëdash Esus Uanën chomïaïd daëd chïec.

24 Adashic, Uanën chomïaïdo nidambi iccuededquido tantiamëbanuec Uan chïec Esus nadpanëdash: –¿Atotsi isnuëc matses nibëdacno nidonda? ¿Cunquequidën ishacunaid isnuëcta nidtionda?

25 ¿Aïd isnuëc nidenquïo yec atotsi isnuëc nidonda? ¿Dashcute ushumbocquid dasiuidquid isnuëcta nidtionda? Padenquïo. Dashcute ushumbocquid dasiuidquido aton na dadpenquïo icquido ancanquid dapan shubun tabadquido nec.

26 Ad icnuc, ¿atotsi isnuëc matses nibëdacno nidonda? ¿Nuquin Papan ambi chiaïd chuïmiaïd isnuëc nidenquïoda ictionda? Ai, matses nibëdacno Nuquin Papan chuïmiaïd isnuëc mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic.

27 Ëbi cain naden Uan Nuquin Papan chuïmiampid nec:

“Mibi choec quequin chuïbanquidba chomembi.

Mibi choec quequin chuïbanac ambi tantiaïd icsa ënshun mibi cainquidombo iquendac.”

Aden ëbi cain Uan chuïquin dada uapampid nec.

28 “Adembi Uan chuïbanu. Tantiata. Nuquin Papan chuïmiaïd Uampadquid matsesën tishaid utsi nibëdec. Aïdën ëbi chotëquid chuïbanac choshon ëmbi nabansho isenquïo icposh. Isash, Nëïd Nuquin Papan chomïaïd nec, quëtsemposh Uan. Aïdi quënën nauedac ëmbi nabanaïd istiapiimbo yec tsadec, Nuquin Papan chomïaïd, ëbitedishun cainaid mibida ne, quepec –quepanëdash Esus.

29 Aden Esusën chuïbansho tantïash: –Nuquin Papan naid bëdambo iquëc –quepanëdash Uanën mentobanondaïdo.

³⁰ Utsiboen ambi tantiaid icsa ënenquoio icquin Uan Esusën chuisho tantias, Nuquin Papan naid bédambo iquec, quetiapimbo aido icpanédash. Aido padiseyobobéd matsesën naden nata quequin chiaid tantiamequido icpanédash.

³¹ Aden Uan chiash Esus: —¿Nuquin Papan chiaid nëbi chuisho tantiesa mitsipadquid nepeque?

³² Adquid chuinu. Tanta. Ambi tantiacpaden naisa icsho isash bacuëbo yacimboec nëishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquoio iquec. Adquidën Nuquin Papan chuimiadën nabansho icsamboen ispec.

³³ Nua cubudquin pesa Uan icsho isash, Mayan icsa dapudedaid nec, queposh Uanën chuisho tantiesa.

³⁴ Ëmbi peshun acsho isec, Nua peshun tantienquiocquin acquid nepec. Aidbidi icsambocquidobéd icquid nec, ëbi caposh.

³⁵ Aden tantienquiocquid, Bédamboen tantianu, queshun bédamboen tantiaquidënquoio chuibansho tantias abi tantiamequidpadquid iquendac — quepanédash Esus.

Chidon Esus tanoshcaid

³⁶ Adashic, Ëbi yacno pec cho, padiseyobo abentsëcshun cac aidbéd nidash shubun puduedash pete santen cuëshnudash Esus uepanédash.

³⁷ Adec Esus puduedash uesho isquidon chiac utsin, Icsambocquid nec, caid chido choquin noadte bēda danoshquete aton shubumpichobi bēpanédash.

³⁸ Aden bēequi Esus yuedacno choash puduedashun abi bēdamequid Esus istuidash, Ëbi bēdamequid bēdambo iquec, quequin ambibi tantiec shubiec Esusën taëno tsadbudshun aton bēunën tapascapanédash. Aden tapascac taë chucusho isun aton manédaidën tauschun taë tachoccabanshun noadte bēdan chidon tanoshcapanédash. Chidon aton na bedtequid dadpen menequin comapenec noadte bēda bedshun Esusën taë tanoshcapanédash chidon.

³⁹ Chidon adosho isash Esus yuedquid, Simon caid, abibi onquec: “Ëmbi yuedaid Nuquin Papan chuimiad iquec, Ëbi mishquid icsambocquid nec,” quequin chido mishmenquoio icpec, quepanédash Simon.

⁴⁰ Adoaquien, tantiaquidquio icquin Esusën: —Mibi tantiamequin chuinu. Tantiata, Simon —capanédash.

Adoaquien: —Aden chuiban. Tantanu —quepanédash Simon.

⁴¹ Aden tantiasun Esusën Simon ambi tantiaid icsa tantiamenuen utsi chuquin nadopanédash: —Bec cho. Yuecshun menenun nanuna, quepondash daéd. Abentsëcshun dadpen bedshunubi utsin daédpactsëc bedshumpondash.

⁴² Aden bedshunshun yuecshun ambi bedshunacted abi daédi meniantipimbo icpondash. Adsho isun: “Padi. Mimbi bedondaaid ëbi cuidenda,” quequin abi bedshunédaidën abi daédi chuipondash. Adoacsho, ¿Mitsiquid abi bedshunédaid ënenquiocquid tantiec bēpiscudenquoio icpec? —quepanédash Esus Simon caic.

⁴³ Adoaquien: —Ambi dadpen meneshun cuidenda caidien nechitec — quepanédash Simon.

Aden chiaquien: —Ai, bēdamboen tantiaquin mimbi chioc —quiash

⁴⁴ Simon ismenuec Esus chido yacmi bidiadshun naden chuipapanédash: —Min shubun puduedacsho mimbi taë pante ëbi menenquiococ. ¿Nëid chido isquindactio? Aidëmbien aton bēunën taë chucu uashun aton manédaidën con taë bēchishaid ucposh.

⁴⁵ Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh.

⁴⁶ Bëchin manoshcanesa mibi iccoc. Padnueni nëid chidombi noadte bëdan tanoshcaniosh.

⁴⁷ Adembidi mibi chiembique. Tantiata. Mayan icsa dadpenshun tantiamiaid icsho nëid chido bëdamepombi. Aden bëdamiashic abi icsaid tantienquo yec bëpiscudpobi. Ëmbi aden nac ëbi comapenen tantiaquioquin ëbi nashunquidquo nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumë nec —quepanëdash Esus Simon caic.

⁴⁸ Aden Simon chiashic chido caic: —Icsaquid nec, quenquiocquin icsainquo yacimboecquid mibi isembi —quepanëdash Esus chido chuiöaic.

⁴⁹ Adsho tantiahs: —Icsainquo yacimboecquid mibi isembi, quec ¿mitsipadquid Esus nepec? —quepanëdash iccuededquido.

⁵⁰ Aden iccuededquidon tantianubi chido caic Esus: —Ëbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquo yec nidta —quepanëdash chido caic.

8

Chidobo abi nashunquido

¹ Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yacimboec nidaidën tabadaid chuibenapanëdash. Abi bëdamequid tsibananc chidobo nidpanëdash.

² Ambi mayan icsa dapuduemiaidobëdtan ambi bëdamiadon Esus tsibanampanëdash. Madia, Macada yacnoshon tishaid chedon Esus tsibanampanëdash. Mayan icsa 7ted dapuduemiaid Madia icpanëdash.

³ Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenapanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(Mat 13.1-23; Mad 4.1-20)

⁴ Aden chuibeniash tabadtuidtsëcnubi ambi chuiquin tantiamboedo chochoquin tsibanampanëdash. Cho-chosho isun, Mibibimboecnuc chiembi, quenquiocquin Esusën nadopanëdash:

⁵ —Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec.

⁶ Utsibic, cuënote dadpen samëdacno secac badedquido dëyucuidtsash nidaid ëquëduc tapun nidenquo iquec bidiquequid.

⁷ Utsibic, nisanquid dëyucacno secac aibëdi dëyucash canidoudtsacsho nisanquidën bëtïnac unësquid.

⁸ Utsibic, nidaid bëdan secac dëyucash caniahs dadpen ëshëendac —quepanëdash Esus.

Aden chuibanashic: —Tantiata bëdambocquidën ëmbi chuiboe tantiapec —quepanëdash.

⁹ Adoquien: —¿Mitsipadquid tantiaid mimbi chuiboe icpec? Ëbitedi tantiamequin chuiöa —capanëdash abëd icquidon.

¹⁰ Adoaquien: —¿Mitsipadequini Nuquin Papa yacno tabadpe? queboedëmbi nëbi mimbi tantiabeneç. Padnuen utsibon tantienquio yaid aid iquec. Aden chiac:

“Èshë bédambocquid icquimbi tantiesa icquin ma Nuquin Papa yacno isenquioçpanuna.

Adembidi tantiate bédambocquid icquimbi tantiesa icquin ma abimbo chiaid tantienquioçpanuna”

—quepanëdash Esus.

¹¹ Aden chiashic: —Èmbi chuiboed nad iqueque. Tantia. Chuinu. Tiedën caniquid pete èshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec.

¹² Podquedën nidaid tsasimbocquidbimboecquid nad iquec. Nuquin Papan chiaid tantiaç papuduedtiapimboçsho Safansën bëpiscudmiaid adquid nec.

¹³ Cuënote dadpen samëdacno nidaidbimboecquid nadquid iquendac. Nuquin Papan chiaid tantiaç, Bédambo iquebi, quiashic natiamianquieç cametequid icnuc aid tantieç Nuquin Papan chiaid papudueduidquid iquendac.

¹⁴ Nisanquid dëyucaid dadpen yacno nidaidbimboecquid nad iquec. Nuquin Papan chiaid tantiaç abi bunaid, abi nënaid, ambi natequid adquid tantiaquin Nuquin Papan chiaid bëtashacbimboec icnuc bédamboec tabadaid ismesa yampec. Aden bédamboec tabadaid ismesa yanuc utsin Nuquin Papan chiaid tantiatiapimbo iquendac.

¹⁵ Nidaid bédabimboecquidien nad iquec. Nuquin Papan chiaid tantiadonec bédamboec tabadquin utsi ismequidquio nec. Adquid natiamianquid chonoc tantesa uainquioçquin ènenquioçquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenuec.

Tabote nënantan nanac chënquiacbimboecquid

(Mad 4.21-25)

¹⁶ Aden chuishumbic naden Esusën chuiopanëdash: —Tabote taboshon matsen bëtashesa. Adembidi tsadte tédion tabote nanesa icbo nec. Ma èmbi yuedaidon isnueshun nënantan tabote nanquid.

¹⁷ Adomboembidi mimbi ompoquin chuibanaid Nuquin Papan ompoenquioçquin chuibanendac. Adomboembidi mimbi tantiamenquio yaid aidëmbi chuibanendac.

¹⁸ Ad icnuc èmbi chiaid bédamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadeç tabadquid. Adeç tabadquin ompoenquioçquin utsi ismequid. Nuquin Papan chiaid tantiauidboed, Bédamboen tantiembi, qeshun papuduedmenquioçquin bédamboen ismesa nec. Aden ambi tantiauidaid uesadendac —quepanëdash Esus.

Aton utsibo aton titabëd choaid

(Mat 12.46-50; Mad 3.31-35)

¹⁹ Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Èbi choaid chuita, cac

²⁰ shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

²¹ Adoaquien: —Adquid chuinu. Tantia. Nuquin Papan chiaid tantiaçhun nabanquido èbëd icquid nec. Adquid buchi caindambi. Adquid utsi chido chuchu caindambi. Útsibic tita caindambi —quepanëdash Esus.

*Acte tëccoasquesho ënëdmiaid**(Mat 8.23-27; Mad 4.35-41)*

²² Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash.

²³ Adec nidec cano anuequi Esus ushtopanëdash. Adec ushnuvien cunquequid dapa comapenec cunquequid nubi acte tëccoasquequidën acte uemiac cano mentoadtsempañëdash. Adsho isash dacuëdec

²⁴ Esus ushacno nidshun tinec abëd icquido: —Nuqui mentoadequë. Isucun, Icbo —quec comapenec cuëdpañëdash abëd icquido. Adsho tantiasish isucunash nidtoshon: —Mibi comapenec cunqueque. Ënëd —Esusën cac cunquequid badedquio ënëdpañëdash. Adembidi: —Mibi comapenec tëccoasqueque. Ënëd —Esusën cac badedquio acte tëccoasquequid ënëdoapanëdash.

²⁵ Aden ënëdmetanec: —¿Atotsi quiash ëbi tantienquio yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tëccoasquequid ënëd cacpadequi ënëdchitosh, quec abëd icquido abibi onquecuededpañëdash.

*Mayan icsa dapuduedaid dapuduequin bëdamiaid**(Mat 8.28-34; Mad 5.1-20)*

²⁶ Adshumbic, acte tëccoasquec ënëdan nidaid Cadidia yacno chian cuëma utsiuc Esusbëd icquidon poteoac nidaidëmpi Cadada caid yacno aido nidpañëdash.

²⁷ Ambo nidequi canon choash dectatosho isash mayan icsa dapuduedaid dada Esus bëquedec chopañëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpañëdash.

²⁸ Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubi

²⁹ mayan icsa chuiquin: —Dapuduenta —capanëdash Esusën. Mayan icsa dapuduedaid nad icpañëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampañëdash. Adoac mayan icsan matses nibëdacno nidmiaid icpañëdash.

³⁰ Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoquien: —Sinco midted dapuduedondaid nebi —quepañëdash mayan icsa dapuduedaid onquec.

³¹ Aden chiashic: —Mibi bëdamboquid cadoque. Ënenquiocquin mëyanacno cuidnuequin ëbitedi nidmenda —quiashic

³² chanco dadpenshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepañëdash mayan icsa dapuduedaid.

Adoquien: —Aido dapuduedtan —Esusën cac

³³ dapuduequequi chanco mayan icsa dadpen dapuduedash acte quiusudacno chanco comapenec niquec chian pudun-pudunec mentoadbudnec nibëdquieq unësbunepañëdash.

³⁴ Adsho isash chanco pemequin isquido titinquianec shubu dadpen yacno choshon ambi isboed chuituidac

³⁵ anocquido istanu quianec Esus yacno cho-chopañëdash. Adec choshon mayan icsa dapuduequequi bëdamiaid dashcute dasiuidash bëdamboen tantiec Esusën taëno tsadsho istuidpañëdash. Adec aid onquesho isash anocquido, Uinsadpambo iquec, quiash dacuëdcuededpañëdash.

³⁶ Dacuëdsho isun mayan icsa dapuduequin bédamiaid isquidon ambi isboed dacuëdquido chuipanëdash.

³⁷ Aden chiac: —Nëuëshquo nidenquo icpec —quepanëdash dacuëdquido Esus chiec. Adoac Esusbéd icquido canon antabédtopanëdash.

³⁸ Adsho isun: —Mibéd niidiadquo iquebi —quepanëdash ambi mayan icsa dapuduequin bédamiaid Esus chiec.

³⁹ Adoquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanëdash. Aid nidnubien mayan icsa dapuduequin bédamiaid nidanec aton shubu yacno choshon anocquidtedi Esusën naid abi mayan icsa dapuduequin bédamiaid chuibanopanëdash.

*Chido intac budaid bédanaid icnuc champi uincuemiaid
(Mat 9.18-26; Mad 5.21-43)*

⁴⁰ Adashic chian potiash cuëma utsiuc Cadidia yacno Esus padpidec chosh isash: —Mibi isec bédambo iquebi —quepanëdash iccuededquido abi cainquido.

⁴¹ Adnubien, Nuquin Papan chiaid chuibante shubun tabadquid isquid Aido cuëmédquid choash Esusën taëno uebudash:

⁴² —Con champi abentsëc tishaid unësanecquidquo iccosh. Aton seta 12ted icquid niosh. Èbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash.

⁴³ Adnubien, chido seta 12ted matamec intac budaid chopanëdash. Aidi dauëchoquid dadpeshun bédametiapimbo icpanëdash.

⁴⁴ Adoac bédanabi yec, Bédamequidën èbi bédamepec, abibi quianec Esusën cachon choshon ismenquocquin Esusën dashcute cuëmano mishnubi aton intac badedquido bédampañëdash.

⁴⁵ Aden mishac: —¿Tsuntsimbini mishosh? —quepanëdash Esus. Aden chuisho tantiash abi datsidash capuquido mishambo yec otacquo tabadcuèdpanëdash. Adec tabadnubien: —Matses dadpeshun tsucus-tsucustsëcquiocquin mibi cuëscabedec —capanëdash Petedon.

⁴⁶ Adoquien: —Matses abentsëcshun èbi mishosh. Èmbi nadatiambocquin natequid bëuesadsac —quepanëdash Esus.

⁴⁷ Adec Esus onquesho tantiash chido, Ambi tantiacpadomboen èbi isec, quec abibi onquequi dacuëdec uedëquequi Esusën taëno uebuduidpanëdash. Adec uebudec datsidadquidon tantianubi: —Intac bédanuequin min dashcute cuëscatsequi bédanobi —quepanëdash chido Esus caic.

⁴⁸ Adoquien: —Mimbi tantiacpadquiec mibi bédanaye. Dacuëdenquo yec bédamboec tabadec nid, champi —capanëdash Esusën.

⁴⁹ Aden Esusën chuinubien Aidon shubun icquid utsibo Esus yacno chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

⁵⁰ Aden chuisho tantiash: —Dacuëndenda. Aden tantiequi nid. Mimbi tantiacpadquiec min champi bédaneque —quepanëdash Esus Aido caic.

⁵¹ Aden chianec Aidon shubuno nidash cho-choquidotedi, Èbéd puduedenda, quequin chianec Petedo, Uan, Acobo aidted buanec Aido cuëmédquidën champi yacno Esus puduedpanëdash.

⁵² Ambo puduedshun anocquido unësquo yec shubisho tantiashun: —Mibi shubieque. Ènëdta. Champi unësenquo yec usheque —capanëdash Esusën.

⁵³ Adsho tantiashun, Champi unēsacsho isombi, quequin Esus tantien-quiocquin shubiquidon mamēnshumbededpanēdash.

⁵⁴ Mamēnshumbedednubi Esusēn Aido cuēmēdquidēn champin mēdante mēdinquin: —Nidto, champi —comapenen cac

⁵⁵ Aton tiboedte unēsabi yec champi badedquio nidtopanēdash. Champi nidtoshō isash: —Peme —quepanēdash Esus.

⁵⁶ Aton champi nidtoshō isash: —Adopenshenda iquec —quepanēdash ani amēbēdi.

Adoaguien: —Mimbi isboed chuibanenda —quepanēdash Esus.

9

Esusēn ēbi chuibeneta, quequin ambi nidmiaido
(*Mat 10.5-15; 14.1-12; Mad 6.7-29*)

¹ Adashic ambi ēbi chuibeneta caido 12tedtsēqui chometanquin Esusēn nadopanēdash: —Ēmbi nadatiambocquin nabanacpaden mibitedishun nabanacuenac. Mayan icsa dapuduemequinc daicsaido bēdamequinc cain mibi capucueniacnoshon mimbi ismebenendac.

² Nēbi mibi nideque. Adec capucuenequin chuibenequimbi bēdamebeneta.

³ Nidquin cueste uidēn nidte buanenda. Shictoadte buanenda. Petequid buanenda. Mitsana bedtequid buanenda. Dashcute utsi buanenda. Buanen-quo yec dadauidquo nidfan.

⁴ Adec nidash mibi yuedquidēn shubun puduedshun ēmbi chiacpadom-boen nabanec anouidi tabadta.

⁵ Mibi nidacno mibi yuedquid nibēdsho isun naden nata. Mimbi tanti-aid icsa mibibi cuidadte nec, quequin nidaid putu tasequequin ismeta —capanēdash Esusēn abēd icquido chuiquin.

⁶ Aden chiac nidash abēd icquido abi yuedacno puduedash tabadquin Esusēn chiacpadomboen Nuquin Papabēd tabadaid chuibanquimbi daicsaido bēdamebenepanēdash.

⁷ Adnubien Esusēn nabansho isquidon Edodes chuibanpanēdash. Edodes Cadidia yacnocquido ancaquid icpanēdash. Aden Esusēn nabanaid chuisho tantiashun, ¿Tsudain nepec? Edodesēn caquien,

Acten mentoanondaīd, Uan cuēmēdquid uincuempash icnui, quenubien;

⁸ Edias Nuquin Papan ambi chiaid chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanēdash, quequin chuipanēdash Esusēn nabansho isun chuiquidon Edodes tantiamequin.

⁹ Adoaguien: —Mambi uincuentiapimboenoc Uan mapi budtemiondac. ¿Tsudain ēmbi tantiacmaidquo adobanquid icpec? —quiashic Esus iste bumpanēdash Edodes.

Matses dadpen pemiaid
(*Mat 14.13-21; Mad 6.30-44; Uan 6.1-14*)

¹⁰ Adashic ambi nidmeboedo Esus yacno padpidec choapanēdash. Choashumbic ambi nabamboedtedi chuibanpanēdash. Aden chuibanansho tantiash Esus abēd icquido bēyucanec shubu dadpen icquid Betsaida caid anoentsēqui nidpanēdash.

¹¹ Aido nidsho isun cho-choquidon tsibanampanēdash. Adsho isun Esusēn Nuquin Papa yacno tabadaid chuibanquimbi daicsaido bēdamepanēdash.

¹² Adashic ushē budtsan Esusbēd icquidombo Esusēn dayunquo choshon: —Nēmbo shubu nibēdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanēdash Esus chuiquin.

¹³ Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidtedtsëqui icsho isunda cho-choquidtedi pemenuenquin ëbitedi bedtan, cai? —quecuededpanëdash abëd icquido.

¹⁴ Ambobi tabadsho chido bacuëbobëdtabi tambanenquo icquimbi dadauidquo, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac

¹⁵ ambi chiacpadomboen tabadmepanëdash.

¹⁶ Aden tabadmesho isun panëmpi 5tedbëda nuëcquid daëd sananquin abuc isec: —Mibi bëdamboçquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

¹⁷ Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

Chuiquid dapa abentsëcquiobi iquec, quiaid

(Mat 16.13-19; Mad 8.27-29)

¹⁸ Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

¹⁹ Adoaquien: —Acten mentoanondaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenaidien Esus nechitec, utsibo queoaposh —quepanëdash abëd icquido.

²⁰ Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomi-aidquo yec Quidistu caid ma mibi neyoc —quepanëdash.

Abi unëste chiaid

(Mat 16.20-28; Mad 8.30-9.1)

²¹ Adoaquien: —Mimbi ëbi tantiaid nëbi utsi chienda —quepanëdash Esus comapenen chiec.

²² Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiaequido yec quec aidtedi ëbi chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquo nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

²³ Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmanc quenquiocquin tantesa uainquiocquid. Ëbi tantiaquidquo iquendac adquid. Nidaidën tabadaiduidi tantiaquid iquec Nuquin Papa yacno nidenquo iquendac.

²⁴ Cuesunenu cac unësmanc quiaish Esus tantiaquid nebi queboedi Esus tantiesa nebi quequid unësash Nuquin Papa yacno tabadenquo iquendac. Utsibo, Esus tantiaquid nebi, quiaishic abi cuesunenuequid icnuc adecbidi Esus tantiaquid nebi, queoapec. Adquid unësash Nuquin Papa yacno tabadenc.

²⁵ ¿Atotsieshun Nuquin Papa yacno tabadaid tantienquo yec nidaidën bëdamboec tabadnuequin bëdted-bedtede? Mimbi bedaidënquo Nuquin Papa yacno puduedtiapimbo mibi iquec.

²⁶ Esusbëdtabi ambi chiaid tantiaquid nebi nidaidënuësh quetiapimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi.

²⁷ Nad iquendac. Tantiapiota. Chuinu. Ëbi tantiaquid dadpen yansho ënabicquid utsin-utsinquien isendac —quepanëdash Esus.

Esus bed-bedquesho istiapimbo yaid

(Mat 17.1-8; Mad 9.2-8)

²⁸ Aden chiashic Esus mëdante utsiuc tauadoec ushash Nuquin Papa chiec onquenuc macuësh yacno nidoapanëdash. Petedo, Uan, Acobo aited buanec macuësh yacno Esus nidpanëdash.

²⁹ Adec macuësh yacno nidash Nuquin Papa chiec Esus onquenubi aton bësbed aton dashcutebëdi nac-nacquiò ushë chënquiacimboec icpanëdash.

³⁰ Adsho isnubien badedquio dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid.

³¹ Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecedpanëdash.

³² Adnubien Esusbëd chobedo abëd icquido 3ted ushcasdash tabadtuidquin Esusbëd utsi daëd nac-nacquiocquid dasiuidachimboec bed-bedquesho isbededpanëdash.

³³ Esusbëd daëd nidtuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcnc shubumpi uanuna, Icho. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

³⁴ Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd chobedo dacuëdpanëdash.

³⁵ Adnubien abu ushunuësh onquec: —Nëidic ëbëd icte bunquidquio, con madombo, ëmbi bëdamboen isaidquio neque. Aidën chiaidquio tantiata —quepanëdash Nuquin Papa Esusbëd icquido tedestedshun isenquiocnobi.

³⁶ Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

Mayan icsa dapuduedaid madompi

(Mat 17.14-21; Mad 9.14-29)

³⁷ Adashic badiadash macuësh dapa yacnoësh Esus budsho isash bëquedec matses dadpen cho-chopanëdash.

³⁸⁻³⁹ Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquio sidquianesho aidëmbidi bedshun bëcunedeniac con mado ëbcacushaniosh. Dapuduenenquio icquin con mado aidën uimambo icmedeniosh.

⁴⁰ Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquio iccosh —quepanëdash dada abentsëc Esus caic.

⁴¹ Adoaquien ambi nianaido caic Esus nadpanëdash: —Nadatiambocquid Nuquin Papa nec, quequin tantiesha mibitedi neque. ¿Teductsi icshun ëmbi chiacpaden mimbi tantiabempe? ¿Mimbi tantienquiocsho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash.

⁴² Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

⁴³ Adsho isash: —Nuquin Papan nadatiambocquin naid uinsadpambo iquec —quecuededpanëdash isquido.

Abi unëste chuioaid
(Mat 17.22-23; Mad 9.30-32)

⁴⁴ Adoaquien: —Chuinu. Bëpiscudenquiocquin tantiaquiota. Matsesacsho nëbi bedmendabi —quepanëdash Esus abi unës uate chiëc.

⁴⁵ Aden chuisho abëd icquidon tantienquiocpanëdash. Aden tantienquio yec, Mimbi chiaid tantienquio iquembi, quetiapimbo yec otacquio tabad-cuededpanëdash abëd icquido.

¿Tsutsi chuiquid dapa icpec? quequin chiaid
(Mat 18.1-5; Mad 9.33-37)

⁴⁶ Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecuededpanëdash. ¿Ëbida chuiquid dapa icpe? quec ambibi tantiequi adpanëdash.

⁴⁷ Adoaquien Esus tantiaquidquio icquin bacuëmpi chomeshun aton dayunquio tabëcash:

⁴⁸ —Chuiquid dapa icnu, qesa icta. Èbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiacpadomboen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoaindac. Nidaidënuësh utsi nashunquidquio icboedi aidquiobi Nuquin Papan chuiquid dapa icta caindac —quepanëdash Esus abëd icquido caic.

Abimbo tantiaquid ëbëd icquid nec quiaid
(Mad 9.38-40)

⁴⁹ Adashic, Uan Esusbëd icquid abentsëc nadpanëdash: —Mayan icsa dapuduemabanquid ispombi. Aidi mayan icsa dapuduemenuëc nadposh: “Esus, nadatiambocquin naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

⁵⁰ Adoaquien: —Adquid, Padicnuna, cainda. Nadatiambocquin naquidquio Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

Esus bunesabo, Samadia yacnocquido

⁵¹ Adashic Esus abi abuc indote ushë chote anoentsëqui yanan, Unësmene quenquio yec nidebi, quequin ambibi tantianec Edusaden yacmi Esus nidoapanëdash.

⁵² Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien

⁵³ Esus isadaidbo nec, quequin yuedenquiocpanëdash Samadia yacnocquidon.

⁵⁴ Adoaquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Ichbo? —quepanëdash.

⁵⁵ Adoaquien: —Padicnuna. ¿Matses unësmenuectabi chodio? —quianec

⁵⁶ shubu daëdpactsëc yacno nidoapanëdash abëd icquidobëd.

Esus tsibante bunquidën natequid

(Mat 8.19-22)

⁵⁷ Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananec nidendabi —quepanëdash Esus databëdquid abentsëc.

⁵⁸ Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹ Adoshombic: —Ëbi tsibanta —Esusën caquien utsi:

—Con pa unësascho chococashun mibi tsibanec nidendabi, Icbo —quepanëdash.

⁶⁰ Adoaquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

⁶¹ Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icbo —caquien:

⁶² —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

10

Abi bëyucanec nidquid 72ted icquido

(Mat 11.20-27; 13.16-17)

¹ Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash.

² Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpectsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui.

³ Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac.

⁴ Ëbi chuibenec nidanequin mitsana buanenda. Mitsana bedtequidbëdta shictoade buanenda. Tapucudte tapucudenguio yec nidanetan. Adec nidanequin utsi bëquedash tabadenquiocquin datambidanec shubun puduedec nidta.

⁵ Shubun puduedshun naden shubu icho chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna.

⁶ Aden chiac shubu icho bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icho ëbi chieshënquid ictsiash. Adquid yec mimbi chiaid tantianu quesa aid shubu icho icpec. Adquid icsho Nuquin Papan abi bëdamboec tabadte aid shubun icquido menenguio iquendac.

⁷ Mibi yuedacnouidtsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸ “Shubu dadpen yacno mibi choacsho yuedshun pete meniac isuidec, Utsitsen bec cho, quenda.

⁹ Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita.

10 Shubu dadpen yacno choshon mibi yuedquid nibëdsho isun aton podquedën nidquin naden chuïta:

11 Nuquin Papan chomiaid mibi chuïnuec chobi. Èbi daëdi yuedenquïochsho mibi chuïtiapimbo ìquebi. Adoac abi yacno ambi chomiaidën mibitedi yuedtiapimbo ìquendac. Nuquin Papan chomiaid tantiata bunesa mibi ìcsho isash mibi yacno capuec èbi tabitacquiaid tabesquenu. Is, quequin ismequin adota –capanëdash Esusën ambi nidmetequid 72ted ìcquido chuïquin.

12 Aden chiashic aido chiec abi Esus onquec: –Naid ìcsabëdtabi naid bëda chuïbante ushë chonoc mibi yuedesa Nuquin Papan comapenen cuidendac. Èbi choabicnuc Sodoma yacnocquido ìcpampic. Èbi choabicnuc aidon èbi tantiatiapimbo ìcpampic. Adquido Nuquin Papan bëdiactsëc cuidendac –quepanëdash Esus.

13 Aden ambi nidmetequid 72ted ìcquido chuïbanshumbic utsibo isacimboen Esusën nadopanëdash: –Nëbi ìcquido, shubu dadpen ìcquid tantiec unësquïocquin mibi chiembique. Tantiata. Shubu dadpen ìcquid Codasin caid yacnoshon èmbi nadatiambocquin nabansho mibitedishun ìsted-ìstedshumbi Nuquin Papan chomiaid nec quequin tantienquo mimbi ìcuededpec. Adembidi nadatiambocquin nabansho ìsted-ìstedboedi Betsaida yacnocquido mibi nec. Aden èmbi nasho isash èbi tantiesa mibi ìcoapec. Ènden yampido isadaidpembon èmbi nadatiambocquin nabansho isun, Icsaquid nebi, queshun unësquïocnoc shubiquin abi ìcsaid èntsempampic.

14 Aden Tido yacnocquidobëdtan Sidon yacnocquidon tantiashun abi ìcsaid èntsempampic. Adquido Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido èbi ìsquido mibitedi nec. Èbi tantiesa ìcsho Nuquin Papan mibi comapenen cuidendac.

15 Adecbidi, nëbi ìcquido, Capednaun yacnocquido mibi unëssh ìNuquin Papa yacnoda mibi nidpe? Padenquo. Èmbi nadatiambocquin nabansho isun tantiesa yec chian anëdënquïacno mibi nidendac –quepanëdash Esus abi tantiesabo chiacimboec onquec.

16 Aden chiashic, ambi nidmenu caido 72ted ìcquido tantiamenuen chuïbudec: –Mibitedishun èbi chiac èbi tantiaguïdo utsibo ìquendac. Adquïobidi mimbi èbi chiac èbi tantiesabo ìcoaindac. Adomboembidi èbi chuïbansho tantienquo yash èbi chomiondaid tantiesambo nendac –quepanëdash Esus. Aden chiac ambi nidmenu caido nidanepanëdash.

17 Adec nidanequin Esusën chiacpaden nabeniashic, Bëdambo ìquebi, quecuededec Esus yacno cho-choapanëdash. Adec cho-choash: –Mimbi chiacpaden nabanombi. Aden nabanquimbic, Esusën nadatiambocquin naidënuïdo dapuduenta èmbi caidtedi mayan icsa dapudemposh, ìcho –quecuededpanëdash ambi nidmiaïdo 72ted ìcquido ambi naboad Esus chuïbanec.

18 Adoquien: –Èmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacimboecnuc bedquetanacimboec Satanas abucüesh badedquïo paëdsho ìsec niobi.

19 Èmbi nadatiambocquin nabanacpadquid mibitedi ìcmebanombi. Aden mibitedi adquid ìcmïacsho mibi chieshënquïdon mibi icsa uatiapimbo ìquendac. Mibi chieshënquin icsa uanuequido nisibimboecquido nec. Aïdibidi icsa uanuequid yec chichumbimboecquido neoaic. Adquid nisi ìcsho catashac mibi petiapimbo ìquec. Adomboembidi catashac chichunën mibi setiapimbo ìcoaic. Adquidbimboec mibi chieshënquid ìcsho èmbi chiacpadomboen nabanac mibi icsa uatiapimbo ìquendac.

20 Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuequin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

21 Aden chuibanshumbic ambi nidmiaidon chiaid tantiash, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquido-bien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

22 Aden Nuquin Papa chiec onquequin nainec: —Con pa abia yampid icquin abitedi tantiaquidquio nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccuedquido caic.

23 Aden iccuededquido chuibanshumbic naden ambi 72ted icquido nidmian choboeduidtsëqui Esusën chuiopanëdash: —Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec.

24 Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic —quepanëdash Esus.

Utsi tantiaquin bëdamboen naquidquio

25 Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanëdash.

26 Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipéc? ¿Aid isquin atotsi mimbi tantiape? —quepanëdash Esus abi chuimequid caic.

27 Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacpadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

28 Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

29 Aden Esusën chiac ëbi otacquo icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiashun Esusën chuimeboed: —¿Mitsicquid con utsi nepec? —quepanëdash.

30 Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh.

31 Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnu, quenquiocquín uano datamposh.

³² Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh.

³³ Utsibic, Samadia yacnoësh choquid aid podquedëmbi choquin cuestasquin nianaid istuidash unësquiocquin

³⁴ aton dayun tsadbudshun cuestasquin nia-naidën chiuëtedi aton dauëmbi bënoshcashun bêtaneshumposh. Aden bêtaneshunshun cuestasquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh.

³⁵ Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestasquin nianaid bëdamboen isquin nashunta. Mimi aid nashunacsho isun mimi meneboed cuidquin mibi menendambi,” quequin chianec ampequidon cuestasquin nianaid istuidshun nashumboed nidposh –quepanëdash Esus.

³⁶ Aden chuishumbic: –Ëmbi chuiboed utsi-utsiec icposh. ¿Mitsicquid ampequidon cuestasquin nianaidën utsibimboecquid icposh? –capanëdash Esusën.

³⁷ Adoaquien: –Ampequidon cuestasquin nianaid istuidash unësquiocquin yanquin abi nashumboedien con utsi nec, capendac –quepanëdash Esus chuimequid.

Adoaquien: –Adembidi mimbembi ëmbi chuiboedbimboecnuc utsibo tantiaquin nashunoata –quepanëdash Esus.

Madtan nabanubi Madian tantiaid

³⁸ Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash.

³⁹ Adoac ambo puduedash tsadquin Esusën chuibansho Madian Madtan chibinquo datsadbudshun tantiapanëdash.

⁴⁰ Adec tsadquin Madian tantianubi Madtan ambi natiadquio yaidtedi tantiaquin nabampanëdash. Aden nabanequi Esus yacno choshon: –¿Con chibin ëbëdtambi nainquiocsho isenquioda mimi ique? Min utsibëdtan nabanta, cata, Icho –capanëdash Madtan Esus chuiquin.

⁴¹ Adoaquien: –Mimi natiadquio yaid dadpen tantiaquidquio mibi iqueque.

⁴² Ëbi tantiaquidquio icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi –quepanëdash Esus Madta caic.

11

Nuquin Papa chiec onquianete (Mat 6.9-15; 7.7-11)

¹ Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: –Nuquin Papa chiec onquianeta quequin Uan padon abëd icquido tantiamepanëdash. Adembidi Nuquin Papa chiec onqueta quequin ëbitedi tantiamequin chuioa, Icho –capanëdash.

² Adoaquien: –Nuquin Papabëd onquequin naden chuita: “Bëdamboequidquio mibi nec, Papa.

Adquid mibi icsho matstedishun mibi con icbo capashun, Papa. Mibi yacnoshon mimi uaido mayan bëdabon mimi chiacpadomboenuidi naic.

Adomboembidi matses abitedishunquo napashun, Papa.

³ Tantiacquidquo, mibi cadoque. Bumianenquiocquin badiadquidën-badiadquidënquien con pete ëbi bedmedene, Papa.

⁴ Adecbidi utsin ëbi chieshënsho cuidenquo yec ëbi abi icsaid bëpiscudacpadquiequi ëbi icsasho cuidenquo yec bëpiscudoata, Papa.

Adembidi, Satanasën icsa uanushe queshun ëbi cudasquin dayun uata, Papa, quequin chuita”

—quepanëdash Esus.

⁵ Adtanequic Esus nadpanëdash: —Mibëd nashunanquid iquec. ¿Adquid icnuda inchëshpotsambo abi yacno nidshun pete mimbi bedshumpatsia?

⁶ Inchëshpotsambo pete bedshunuec mibëd nashunanquid yacno nidash: ‘Ëbi yacno utsi chosho pete nibëdnubi yuedombi. Con pete nibëdsho isash pemenun bedec chobi. Mimbi meniaid cuidquin adquidí mibi meneoaimbi,’ quepatsiac mibi mibëd nashunanquid caic.

⁷ “Adoquien, nuntanuëshi: ‘Padi. Shëcnandombi. Con bacuë ishuncen din ictoshon mibi menetiapimbo iquebi,’ quequin mibëd nashunanquidën mibi chuitsiash.

⁸ “Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquo. Mimbi nidenquiocquin chuidonesho tantiashun mimbi chuibodtedi mibi menepatsiash —quepanëdash Esus.

⁹⁻¹⁰ Aden chiec abi onquec: —Adomboembidi Nuquin Papa chuidonesho mimbi bedtiadquo yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

¹¹ “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi?

¹² Adembidi, ¿Chachinan bacuë bec cho, queshoda mimbi chichun menedi?

¹³ Padenquo. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, quesho tantiashun menenquioda mibi ictic? —quepanëdash Esus.

*Bedtsibun namiaid Esus nec, quequin chiaid
(Mat 12.22-30; Mad 3.19-27)*

¹⁴ Adashic, mayan icsa dapuduedquin eme uaid icsho Esusën istanquin: —Dapuduen —cac mayan icsa dapuduempanëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabadcuededpanëdash.

¹⁵ Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepanëdash Esus chieshënquido.

¹⁶ Adnubien iccuededquid utsibo: —Nuquin Papan chomiaidquo icquin Nuquin Papa mimbi chiac aidëmbi abucshun naquin ëbi isambo yaid nada-tiambocquin ismepatsiashi. Aden mimbi Nuquin Papa chiac aidën nada-tiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

¹⁷ Aden chuisho tantiash tantiacquidquo yec abi icsamboen chuimenuquido chiec Esus nadpanëdash: —Chuiquid dapa nëishquin abëd icquido compenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac.

18 Adembidi, Bedtsibu cashumbic Satanás caid mayan icsatedi chuiquid dapa nec. ¿Mayan icsa icquinda abèd icquido dapuduemequid èbi icmepadic? Adembidi, ¿ambi mayan icsa dapuduemiác abèd icquido nibèdenquioda ictic?

19 Bedtsibun tantiamiaid nec, mimbì èbi capec. Adembidi mibèd icquidon mayan icsa dapuduemec. ¿Tsuntsin tantiamiaç aidon mayan icsa dapuduemepash? Nuquin Papan tantiamiaido nebi, aido qesho tantias, Abimbo caic, mibi quepec. Adomboembidi Nuquin Papan tantiamiaid nebi, quequin èmbi chuisho ¿atotsi quiash, Abimbo chiec, quenquo mibi icpe?

20 ¿Nuquin Papan tantiamiaç mayan icsa dapuduemequid èbi yec ambi chomiaidquo matses chuiquid dapa mibi yacno ènden choabida ictio? — quepanèdash Esus abi chuimequido chiec.

21 Aden chiashic abi onquec: —Mibitedi tantiamenuen utsi chuinu. Bèdamboen tantiata. Chuiquid dapa icquin abèd icquido cuèshèdnu quenquiocquin bèdamboen chuiquin namepec.

22 Aden namiaç tabadnubi chuiquid dapa icnuequid utsi chopec. Nèbi choquidèn abia chuiquid dapan yuábo nameshun nua meniaç aidèn yuabo yanoapec — quepanèdash Esus.

23 Aden chiashic: —Èbèd icquido èbi chieshènesa nec. Matses èbèd icquido icmenu quequid nebi. Matses Esusbèd icmenu quesa cuèshèdmianquid nec — quepanèdash Esus.

Abibi dapuduemboed mayan icsa dapuduedoaid
(Mat 12.43-45)

24 Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibèdacno nidash capuquin abi dapuduedbocpadquid istuidenquo icposh. Adquid istuidambo yec, Abibidi dapuduedoanu, quianec anobidi nidoaposh.

25 Adec nidshun abi dapuduemboed naden istuidposh. Mayan icsa nidan, Èbibi bèdambo iquec. Adash bèdambo tabadnu, abibi quiashic, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiápimbo icnuc abi dapuduemboed choshon aid abentsècquo

26 istuidashic nidoashun abipadquid chuituidac utsi 7ted abèdi choash abitedi dapuduedcuededac dada icsamboshè yamposh — quepanèdash Esus.

27 Aden Esusèn chiambien iccuededquid chido: —Mibi tishacsho shuma chishmiondaid Nuquin Papan bèdamboen isaid icpec — quepanèdash Esus caic.

28 Adoaquien: —Aden nasho padenquo. Nuquin Papan chiaid tantias, nabansho Nuquin Papan bèdamboen isaidquo nec — quepanèdash Esus chido caic.

Onasèn ismiampicpaden ismiaid
(Mat 12.38-42; Mad 8.12)

29 Adnubien abi yacno cho-choash utsi dadpen iccuededsho isun Esusèn nadopanèdash: —Nèbi nidaidèn tabadquido icsanuequido yec Nuquin Papan abucshun nadatiambocquin naid iste mibi bunacpaden mimbì isenquo iquendac. Nuquin Papan Onas ismiampicpaden ismiaid mimbì isendac.

30 Ninibe yacno nidshun ambocquido icsaid cuidte Nuquin Papan chuimi-acpaden Onasèn comapenen chuisho tantias, Abimbo chuiquid nec, qeshun abi icsaid Ninibe yacnocquidon èmbededpampic.

31 Utsibic, Nuquin Papan dadpen tantiamiaid, Sadomon iquec qesho tantias chuiquid dapa chido Sadomonèn chiaid tantianuec ènapenuèsh choshon tantias, Abimbo iquec, quepampic. Nuquin Papan matsesèn naid icsa ambi naid bèdabèdta chuibante ushè chonoc aid chidon tantiampic-padomboen Nuquin Papan chiaid abimbo iquec quequin mibitedishun

tantienquiocsho Nuquin Papan mibi isendac. Nuquin Papan bēdamboen tantiaquin chuiquid dapa Sadomon icmepampic. Abitedi tantiampidquio nēmbobi iqueque. Ēmbi chiaid tantiata.

³² Adembidi, matses icsaidbēdta ambi bēdamboen naid Nuquin Papan chuibanet ushē chonoc Ninibe yacnocquidon Onasēn chiaid tantiacpadomboen Nuquin Papan chiaid abimbo iquec, quequin tantienquio icsho Nuquin Papan mibitedi isendac. Nuquin Papan chuimiad Onasēn chuisho Ninibe yacnocquidon tantiabededpampic. Onas Nuquin Papan matses icsaid cuidte chuimaidquio icpampic. Padnuen mibi icsaid bedshunash abided ciudadtequid nēmbobi iqueque. Ēmbi chiaid tantiata –quepanēdash Esus abibi chiaidequi.

Tabote taboshon bētashenquio yacimboec abi bēdamboec tabadaid ismequid (Mat 5.15; 6.22-23)

³³ Aden chuishumbic Esusēn abi chuibanec: –Tabote taboshon ompoesa. Adembidi matsun bētashesambo icbo nec. Ma ēmbi yuedaidon isnueshun tabote nēnantan nanquid.

³⁴ Adoaidbimboec min tantiate iquec. Min tantiate bēdambocquid icquin bēdamboec tabadquin ismequid mibi nendac. Bētashacimboec min tantiate icnuc icsamboen ismequid mibi nendac.

³⁵ Con icbo ēbi bednuec choec qeshun bēpiscudenquiocquin isted-istedta.

³⁶ Min tantiate icsaisa icsho Nuquin Papan chiacpadomboen tantiaquidquio aidi nec, quequin utsibon mibi isendac –quepanēdash Esus.

Nuquin Papan icsamboen isaidquio (Mat 23.1-26; Mad 12.28-40; Duc 20.45-47)

³⁷ Aden Esusēn chuibaneshobien padiseyobo abentsēcshun: –¿Ada ēbi yacno pec nidtsia? –capanēdash. Adoac aibēdi nidash pete sanaid cueste dayunquio Esus tsadbudpanēdash.

³⁸ Adec Esus tsadsho isash, ¿Adpecshenda iquec. Penush mēpamēdenquio Esus icpec? quec abibi onquequin padiseyobon Esus yuedquidēmbi tantia-panēdash.

³⁹ Adoaquien, tantiaquidquio iquec Esus nadpanēdash: –Ēndenquimbo padiseyobon peshun acnun dēshote cachocbēdtabi pada-padaid cachoc bēdamboen dapanta quequin chuinēdacpaden mimbi naoaic. Aden dapanshun mimbi codocaidbēdtabi mimbi actequid nitsinaid anauc ampanenquio mimbi icpec. Mibitedi adquio iquec. Nesquin bēchish uquec dapanudquin mimbi tantiaid icsa ēnenquio mimbi icpec. Adecbidi, mibi bunaid bednuen icsamboen naquin ampequid mibi nec.

⁴⁰ Nuquin Papan chiaid tantiesabimboecquid mibitedi nec. Nuquin Papan matses uaquin dadabēdtabi tantiate uainquioda icpampic.

⁴¹ Ai. Adquid icnuc aton na nibēdquid tantiaquin mimbi pada-padaidēn nitsinaidpadquid menebanta. Aden mimbi nadenesho isun Nuquin Papan min tantiatebēdta min dada bēdamboen isendac –quepanēdash Esus.

⁴² Aden chiashic padiseyobo caic Esus nadpanēdash: –Uno bedanquin dies yacno ēnquin min tiedēn caniquid ēshē tambanshun, Nuquin Papan chiacpaden con na 9ted icnubi abentsēc Nuquin Papan na nec, quequin aid abentsēc menenuequin mimbi dayun uaic penquiocquin. Aden nabanquin Nuquin Papan ambi matses bēdamboen tantiaquin nabanacpaden naisabo mibi nec. Min tiedēn caniquid dies yacno cuēsaquin tambanshun Nuquin Papan chiacpaden abentsēc menebanshun utsibo bēdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo.

43 Adembidi, tsusio dapabimboecsho bēdamboen isplashuni, quequin tantiec Nuquin Papan chiaid tantiante shubun puduedash tsusiobo tsadacno mibi tsadtenec. Adomboembidi tantiec matses iccuededacno nidequi, Ēbi bēquedquidon ěbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquio mibi nec.

44 Adembidi, matses unēsaid chococate manenushe gueshun ismequin mabiunu, quenquio yacpadomboen ěbi icsaid tantianushe quequin ompoquid mibi nec —quepanēdash Esus padiseyobo chiec.

45 Adoaquien, Nuquin Papan naden nata quequin chiaid tantiembi, quiash utsibo tantiamequid abentsēc: —Padiseyobo chuiquin ěbipadquido mimbi chuoapec —quepanēdash.

46 Adoaquien: —Nuquin Papan ěndenquimbo naden nata quequin chidbēda mimbi naden nata quequin chiaid dadpen chuibanquin matses mimbi namec. Adoac aitede matsesën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

47 “Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ěnenquiocquin tantianu quiacimboen mimbi shubumpi uabanec. Ēm̄bi shubumpi uaido isun utsibon bēdamboen isplashuni, quequin aden mimbi nabanec.

48 Aden naquin tantiec, Nuquin Papan chuimiaido cuesunequin bēdamboen tsusedpabon napampic, quiacimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquio mibi nec.

49 Ēm̄bi chiacpaden chuibanta, cabicquin naden Nuquin Papan chuipampic. Ēm̄bi chuimiaid utsi-utsien aton matsesën mēyampec. Utsi-utsien mēyanshun cuesunepec, quec Nuquin Papa abitedi tantiaquidquio adpampic.

50 Aden min tsusedpabo Nuquin Papan chuimiaidon chuisho tantiesa icquin aido mēyampampic. Min tsusedpabopadquid nēbi icquido icquin Nuquin Papan chuimiaid tantiesambo mibi nec. Adquido iquec ěnden mēyanampidpadquido mibi neoaic. Aido cuesuniampidpadquido mibi neoaic.

51 Tsusedpan abia abed cuesunepampid icnubi ambi tsyuec Sacadias cuesunepampic. Aid Nuquin Papa tabadte shubu uashunaid dayunquiobi aidon cuesunepampic. Ai, Nuquin Papan chiaid tantiesatedi ambi chuimiaido cuesuniampidpadquido nēbi icquid neoaic.

52 “Nuquin Papan naden nata quequin chiaid tantiembi, gueshun utsibo tantiamenquiocsho Nuquin Papan icsamboen isaido mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanēdash Esus Nuquin Papan naden nata quequin chiaiduidi tantiaquido chiec.

53 Aden chiashic, Ēbēdtambi pec cho, queboedēn shubunuēsh puduenanec Esus nidpanēdash. Adec Esus nidambien abi comapen chieshēnquidombo padiseyobo: —Esus icsamboen chuimenu —quiampanēdash.

54 Adquid icquin Esusën chuibanacno nidaneshun chuimeoanuequin naden padiseyobon tantiapanēdash: Ēbitedishun chuimiac Nuquin Papan chiaid icsamboen Esusën chuishiash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unēs uametiadquio iquebi, quequin Esus chiembi, quequin tantiaquin Esus chuimepanēdash padiseyobon.

12

Natiamiantequidbēdtabi dayacmetequid (Mat 10.28-31)

¹ Aden padiseyobon: Esus icsamboen chuimeoanembi, quequin tantianubien matses dadpenquioshē Esus yacno cho-choash tsucus-tsucustsēcquio yec tabadpanēdash. Aido tsucus-tsucustsēcquio yec tabadnubien abēd icquido Esusēn nadopanēdash: —Sicaid nami uaid cabiunac amēec bidisqueoec matsesēn isenquiocnobi. Adembidi padiseyobon Nuquin Papan naden nata quequin chiaidbēdta ambibi tantiacpaden naden nata quequin dadpen chuiuoic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bēdamboen ista.

² Matsesēn ompoquin naid Nuquin Papan abitedi ismendac. Matsesēn ompoquin chienquio yaidbidi abitedi tantiamendac.

³ Inchēshēn min nuntanuēsh mibi icsamboec onquiaid Nuquin Papan matsestedi tantiamequin chuibanendac. Nuntanuēsh shoshquequin mimbi chiaid Nuquin Papan matsestedi tantiamenuen chuioaindac.

⁴ “Adembidi chuinu. Tantiata. Mibi cuesunuequid dacuēdēnenda. Adquidēn mibi cunesuquin mibi nibēdametiapimbo iquendac.

⁵ Nuquin Papauidtsēqui dacuēdēnta. Icsadednequid icsho aidēn mibi cunesumeshun chian anēdēnquequid nēsecaindac. Adoanquiduidtsēqui dacuēdēnta.

⁶ Nuquin Papa tantiaquid yec dacuēdēnda. Nuquin Papan ambi uaidtedi tantiec. Padichucu dadpen icquid abentsēc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquio ictic.

⁷ Ai, mibi tantiaquiec. Min manēdaidtedi ambi tambanaid nec. Aid pistsēcquidtedi tantiaquin Nuquin Papan mibi tantienquioda ictic? Mibi comapenen tantiec.

Esus tantiaquid nebi, quequin utsibon tantianubi chiaid (Mat 10.32-33; 12.32; 10.19-20)

⁸ “Abi chiambique. Tantiapiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nēid ēbi tantiaquid neque. Puduedme, quequin chiendambi.

⁹ Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nēid ēbi tantiesa neque. Puduedmenda, quequin Nuquin Papan uaido mayan bēdabo chiendambi.

¹⁰ Ēbi matsesacsho matsesēn icsamboen chuipec. Aden icsamboen chuiboshombic, Icsamboen chiambique. Ēmbi mibi icsamboen chienquio yacimboec bēpiscudta, Papa, quesho tantiash aidēn icsamboen chienquio yacimboec Nuquin Papa bēpiscudendac. Nuquin Papan Mayanēn tantiamiac nasho isash, Satanasēn tantiamiaid nec, quequid icpec. Aidēn chiaid bēpiscudenquiocquin Nuquin Papan abi yacno adquid yuedenquio iquendac.

¹¹ “Adembidi chuinu. Tantiapiota. Mibi chieshēnquido iquendac. Adquid icquin chuiquid dapa yacno Esus tantiaquido ēmbi buanacsho aidēn mēyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda.

¹² Nuquin Papan Mayanēn mimbi chuibante mibi tantiamequē — quepanēdash Esus abēd icquido caic.

Aton na dadpen icquidēn tantiaid icsa

¹³ Adashic, abi datsidadquid abentsëcshun: —Con pa unësan con pan na dadpen con buchín bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

¹⁴ Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic.

¹⁵ Aden aid chuishumbic utsibo chuiquin nadopanëdash: —Con na dadpen bednu, quesá icta. Mimbi bedaidënguio mibi Nuquin Papa yacno puduedti-pimbo iquendac.

¹⁶ “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh:

¹⁷ ‘Con tiedën caniquid bacuë dadpen iqueque. ¿Atontsimbimbi aitedi dayun uapeba?

¹⁸ Naden naimbi. Tiedën caniquid ëshë dayun uate shubu shënitedi chicbanshun aitedi nuamboshëcnuc shubu uabanuna. Aden nuamboshëcnuc shubu uashun aidënguio con tiedën caniquid bacuëtedi sandoshon dayun uanuna.

¹⁹ Aden dayun uashumbic nadopembi: Con na dadpen iquec yuecash naimëdenquio iquec. Ad icnuc nainquio yec tabadquin peshun aqúendambí. Aden naic, Bëdambo iquebi,’ quec aton na dadpen icquid abibi onqueposh.

²⁰ “Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanëdash Esus.

²¹ Aden chiashic: —Aton na dadpenuidi tantiaquin Nuquin Papan chiacpáden naisa yec aton na nianec unësash Nuquin Papa yacno tabadtiapimbo iquec —quepanëdash Esus.

*¿Atotsimbi napeba? quesá icta, quequin chiaid
(Mat 6.25-34)*

²² Aden iccuededquido chuishumbic Esusën abëd icquido nadopanëdash: —Aton na dadpen icquidën tantiacpáden tantienda. ¿Con na nibëdnuc atotsimbi pepeba? quec dacuëdenda. Adecbidi, ¿Atotsimbi dasiuidpeba? quec dacuëdenda.

²³ Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda.

²⁴ ¿Uicchunënda ambibi cuëte ëshë siac bacuëacsho chepadic? Padenquio. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquio icshöbi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan?

²⁵ Adecbidi, ¿mibi unëste ushë abimbo chonoc, Padi, quepecta mibi icti? Padenquio.

²⁶ Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

²⁷ “Adembidi, cuëtempi chuinu. Tantia. ¿Cuëtempinda aton bacuë ictequid daëdcapec? Padenquio. Adoenquio yaid aton bacuë ictequid bëdaidquio iquec. Cuëtempi bacuë ictequid bëdaidquio yacpadquid chuiquid dapa Sádomonën dashcute adquio ictiapimbo icpampic.

²⁸ Padnuen cuëte bacuë ictequid bëdaidquio icboedi badedquio sequiash chodquiachso tauiquid. Ad icnuc ¿Abipadquid Nuquin Papan uaidö mibi icsho mibi dasiuidte bedmenquioda icpadic? Èbi bedmenquio ictsiash quequin Nuquin Papa bëdiactsëc tantienda.

²⁹ Aden tantienquio yec ¿Atotsimbi peshun aqúe? quec dacuëdenda.

³⁰ Nuquin Papa tantiesan abi bunaiduidi tantianubi Nuquin Papa tantiaquidquio icquin pete actequidbêdta ëbi bedmedonec, quequin tantiec tabadta.

³¹ Adembidi, Nuquin Papabêd tabadnu quequin tantiec tabadta. Aden tantiaquin mimbi bedtiadquio yaid mimbi bedendac.

Abi yacno choacsho meniaid

(Mat 6.19-21)

³² “Nuquin Papan abi yacno mibi chomeque. Dacuëndenda, ëbi tantiaquido caimbi.

³³ Ambo nidabi icquin mitsana menebanquin mitsana bedtequid bedshun aton na nibêdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquio iquendac. Capishton petemaidquio aid iquendac.

³⁴ Mimbi tantiaidquio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bédamboec tabadte cudasquin mimbi dayun uaid iquendac —quepanêdash Esus.

Chieshenquiocquin caintequid

(Mat 24.45-51)

³⁵⁻³⁶ Aden chuishumbic Esusën nadopanêdash: —Aton icbo u isec nidan con icbo chonoshe quiaish dasiuidacchobi ushenquiocquin tabote dēbedtonequin, Con icbo chosho puduedmeshun nashunu, quequin aton yuabon caimpec.

³⁷ Aden abi cainquido aton icbon bédambo icmequin nadopec: “Ëmbimbo mibi pemenu. Nēmbo tabadec cho,” qeshun ambi yuaido icbonquio pemenu bédambo icmendac.

³⁸ Adembidi, icbo inchēshpotsembo choshon abi nashunuequin cainquido icsho icbon bédambo icmiaido iquendac. Adembidi, cachina cuēdanabi badiadabicnuc choshon abi cainquido icbon bédambo icmiaido iquendac.

³⁹ Adquidpenquio icbo utsi chuinu. Tanta. Aidi abi cainquid nibêdnubi aton na icnuc isedtanec choshon isac ampequid ënden nidac. Adsho isash, Ampequid choec, quequin tantiaquid yec nidenquio ictsenobi, quependac icbo.

⁴⁰ Adquiecbidi ampequid choacsimboec Nuquin Icho choeque. Ad icnuc, Chosho ëmbibi tantienquiocchitomane qeshun chieshenquiocquin ëbi cainta —capanêdash Esusën.

⁴¹ Aden Esusën chuisho tantiash Petedo: —¿Utsi chuiquin mibêd icquidoudi tantiamenuenda chio? ¿Abitedi tantiamenuenda chio? Tantienu. Ëbi chui —quepanêdash Esus caic.

⁴² Adoquien: —¿Icbon chiac mitsipadquiocquin ambi namiaido bédamboen napeba? Adquid chuinu: Pete tambanshun musucshun ëmbi namiaid utsifedi bédamboen menebanta, quequin ambi namiaid utsi abentsêc chianec icbo nidac.

⁴³ Adec nidashic choshon ambi chiacpaden ambi namiaidën chieshenquiocquin nabanacsho isun icbon bédambo icmiaid nendac. Adquid naden chuipec: Ëbi nidan chieshenquiocquin mimbi nabanoque.

⁴⁴ Ëmbi namiaid utsibotedi ëbipadquiocquin chuquid icta. Adquid icquin con natedi dayun uata, quequin chiendac icbon.

⁴⁵ Adquid icnubi adamboen naisa icbo utsin namiaid icpec. Aton icbo yuec choenquiosho isun aton icbon namiaid utsibo chieshênquinqin cuesbanshun ambentsêqui nua peshun tantienquio yanquin aquec.

⁴⁶ Aden nabanquin tantienquiocnoc aton icbo choshon ambi namiaidën icsamboen cuesbanaido isun icbon comapen cuesquin abi tantiesa utsibo ambi nidmiacnombo aidi nidmeoaindac.

⁴⁷ “Adembidi, ambi chiacpaden nabanesa icsho isun, Comapenen cuesta, icbon cac cuesendac.

⁴⁸ Aton icbo bunaid tantiaabicquidën cuesmetiadquiocquin nabansho aton icbon bëdiactsëc cuesmendac. Adembidi, Nuquin Papan dadpen tantiamido ambi chiacpaden nashuntiadquio iquendac. Adembidi, icbon dadpen meniaidon dadpen meneoatiadquidi nendac —quepanëdash Esus.

*Utsibëd bëdamboec tabadnu quesa icquin cuëshëdmequid
(Mat 10.34-36)*

⁴⁹ Aden chiashic abi onquec: —Ëbi tantiaquid icnuc ëbi tantiesa yec cuëshëdendac. Aido ënden cuëshëdondan ëbi tantiaquidombo bëdamboec tabadtsiandac, quec tsadebi.

⁵⁰ Adecbidi, Yuecshun ëbi unës uanun mëyantequid iquendac, quequin tantiec, Ënden mëyanondaid iquec abuc Nuquin Papabëd tabadtsiandabi, quec tsadebi.

⁵¹ ¿Nidaidënsnun abitedi bëdamboen tabadmenu quectabi chodionda? Padenquio. Ëmbi chiaid tantiesa ëbi tantiaquidbëd icboedi cuëshëdtsiash quianec chopondabi.

⁵² Nad iquendac: Min shubun icquid sincoted icboedi Esus tantiaquid utsi-etsiec yanubien utsi padenquio yec cuëshëdec adquid.

⁵³ Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëdendac. Shubu utsin aton mado ëbi tantiaquid icnuc aton papa adquid icnu quenquio yec cuëshëdendac. Adecbidi aton tita ëbi tantiaquid icnuc con tapadquid icnu quenquio yec aton champi cuëshëdendac. Shubu utsin, aton champi ëbi tantiaquid icnuc aton tita padenquio yec cuëshëdendac. Shubu utsin aton chaya ëbi tantiaquid icnuc aton babanën padenquio yec cuëshëdendac. Shubu utsin, aton babanën ëbi tantiaquid icnuc aton chaya padenquio yec cuëshëdendac —quepanëdash Esus. Abi tantiesa cuëshëdtequid chuibanec.

*Nuquin Papan ismiente isun nad iquendac, quequin tantiaid
(Mat 16.1-4; Mad 8.11-13)*

⁵⁴ Aden abëd icquidombo chuishumbic Esusën naden iccuededquido chuoapanëdash: —Inchësh chosho isec, Ue choec, quiacpadec choec.

⁵⁵ Adecbidi, ushë chënquec chosho isash, Chumbo yampec quiacpadec iquec.

⁵⁶ Aden isquin mimbi ëmbi nidaidënsnun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquio icquin ¿atotsieshun abucshun Nuquin Papan chomiaid isumbi tantienquiocquin mibi icsaid ënenquio ique? —quepanëdash Esus iccuededquido caic.

*Utsibëd chushcananquid
(Mat 5.25-26)*

⁵⁷ Aden chiashic: —Utsibëd chushcananquido mibi nec. Adec tabadec ¿atotsi quiash, Naden natiadquidi nebi, quequin tantiasnun mibi icsaid ënenquio ique?

⁵⁸ Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquio icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec.

⁵⁹ Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanëdash Esus.

13

Utsibo unësmiacpadec unësmemane quequin mibi icsaid ënta caid

¹ Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiashun iccuededquid utsibo: —Chuinu. Tantia. Cadidia yacnocquidon Nuquin Papan chiaçpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaidën intacbëd daëdash chididiquiosh, quequin chuipanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi —quecuedapanëdash Esus chiec.

² Adoaquien: —¿Cadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemias, quequina mibi tantiape?

³ Icsamboen mibi tantieque. Mibitedishun mibi icsaid ënta utsibo unësmiacpaden unësmenushe qeshun.

⁴ Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaid uebudquin abëd icquido 18ted cuesac unësosh, quiosh. ¿Edusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequina mibi tantiape?

⁵ Mibi icsamboen tantieque. Utsibo unësapadec unësmemane quequin mibitedishun mibi icsaid ënta —capanëdash Esusën abi chuimeboedo chuiquin.

⁶ Aden chuishumbic utsitsen chiec: —Ibon cuëte icnuc nadpec: ‘¿Con cuëte ada bacuëashe? Istau,’ quianec icho nidpec. Adec nidshun isquien bacuë nibëdec.

⁷ Adsho isun ichon abi neshcashunquid chuiquin nadopec: ‘Seta tedested matamiasch cuëte bacuë cuësnuc choudobi. Bacuëambo iqueque. ¿Bacuëenquicquididambi dayun uape? Utsi nitsinun dëdshuneta,’ quequin abi neshcashunquid aton ichon chiosh.

⁸ “Adoaquien: ‘Cuëte bacuëesa ëbi dëdshunemenda. Naden ëbi nameta, icho. Cuëte bacuëesa tacheschcatanquin seta abentsëc matamequin nidaid chëshë chodquiaid ëbi bëdamboen tasiameta. Adoac bacuëtsiasch.

⁹ Aden seta abentsëc matamiasch choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh —quepanëdash Esus. Ëmbi tantiacpadec tabadenquicboedi bëdamboen chiaç bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaid bëdamiaid

¹⁰ Adashic, chonoadtemaid ushën Nuquin Papan chiaid chuibante shubun puduedshun Nuquin Papan chiaid Esusën tantiamenubien

¹¹ seta dadpen 18tedi matamequin mayan icsan shuabudaid icpanëdash.

¹² Adquid icsho isun Esusën: —Shuabudaid icboedi nëbi cacueoaid mibi iquendac, chido —cashun

¹³ mishac cacuiash, Nuquin Papan nadatiambocquin naid nec, quequin chiec chido onquepanëdash.

¹⁴ Aden chonoadtemaid ushën Esusën chido bëdamesho isun Nuquin Papan chiaid chuibante shubu isquidon: —Nëid ushë chonoadtemaid ushë neque. Bëdamenu quequin nëid ushënquio bëdamenda. Chonoadtequid ushënquio bëdameta —capanëdash iccuededquido chuiquin.

¹⁵ Adoaquien Esus: —Mibi chiaçpaden naisa mibi neyoc. ¿Chonoadtemaid ushë icnuc, Con yua acte acmebono qeshun mibi yuaid tënëshacchobi acte yacno buanenquioda mibi icpe?

¹⁶ ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën bëdamenda quequido tantiaimequin chieç.

¹⁷ Aden Esusën chuisho tantiaash, Adenda, quequin bëdamboen chiombi, quetiapimbo yec otacquoio tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

Cuëte ëshëmpi chiaid

(Mat 13.31-32; Mad 4.30-32)

¹⁸ Adashic: —¿Nuquin Papan shubun icquido mitsipadquidquoio icpec?

¹⁹ Nadquidquoio iqueque. Chuinu. Tantia. Icbon cuëte ëshë pistsëcquiocquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabededec. Adquiecbidi, Nuquin Papan chiaid chuisho tantiatsëcquidën tantiaabenash bëdamboquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

Sicaid nami uaidpadquid

(Mat 13.31-33)

²⁰ Aden chuishumbic utsitsen chuioaic: —¿Nuquin Papan shubun icquido mitsipadquidquoio icpec?

²¹ Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëc bidisquedoc. Adomboembidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

Pudued-puduedtequid shëcuë pistsëcquoio chiaid

(Mat 7.13-14, 21-23)

²² Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpactsëcquid utsi-utsiec yacnotsen isbidanoaquin anocquidotsen tantiamenuen chuibenenu, quec Esus nidpanëdash.

²³ Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpactsëcta nidpec? Tantanu. Èbi chui.

Adoaquien Esusën nadopanëdash:

²⁴ —Nuquin Papa yacno pudued-puduedtequid shëcuë pistsëcquoio iquendac. Esusquoio tantiec aidëmpinquoio mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc,

²⁵ Nuquin Icbon, Èbi yacno puduedte ushë naimbudosh, caqui chochoshon, Èbi puduedme, quequin comapenen cuëmbededpec.

“Adoaquien: ‘Èbëd icquidpenquoio mibi neque. Mibi puduedmetiapimbo iquebique. Mibëd icquido yacno niddan,’ caindac Nuquin Icbon adquid.

²⁶ “Adoaquien: ‘Mibëdtambi peshun acbededombi. Èbi yacnoshon mimbi tantiaimequin chuibansho tantiombi,’ quequin abi tantiesan Nuquin Icho chupec.

²⁷ “Adoaquien: ‘Icsaquido mibi neque. Nëmbo puduedenda,’ quepec Icho.

²⁸ Aden chiaqui Abadauan yec Isac yec Acobo yec quec Nuquin Papan chuimaido aidtedi Nuquin Icho yacno tabadsho isash abi tantiesan adtiapimbo yec chian anëdënquiacno tabadec shubiquiec, Nuquin Papa icsambo iquec, quec nëishpec.

²⁹ Nuquin Papa yacno abi tantiesa puduedtiapimbo nobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac.

³⁰ Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoindac –quepanëdash Esus.

*Edusaden isash anocquido Esus unësqiotequid
(Mat 23.37-39)*

³¹ Aden Esusën chuibanquin naimbudnubien padiseyobo utsi-utsiec cho-choshon: –Ancanquid Edodes mibi cuesunemete bunequé. Nëuëshquio nidec nid –capanëdash Esus chuiquin.

³² Adoaquien: –Edodes cuesunemeneuebimboec onquequidquio nec. Aid yacno nidshun naden chuita. Nëbi mayan icsa dapudüemequin utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquin adomboembidi nabanoaimbi. Adobanquimbi naimbudembi.

³³ Adobanequi nëbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ¿Edusaden yacno choabidabi unës uapec? quiosh, Esus quequin Edodes chuita –capanëdash Esusën.

³⁴ Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: –Nuquin Papan chuimiao cuesunequido mibi nec. Adem-bidi, Nuquin Papan mibi yacno chomiaido cuënoten se-sequido mibi neoaic. Èbi tantiaquid icmenu, quequin chuideniombi. Cachinan, Con bacuë chieshëncid choec, qeshun nua shocotsëcshun aton bacuë cudasquin mabësec aton podon. Adem-bidi: Mibi chieshëncid choec, qeshun mibi cudasquin chuibanombi. Aden chuisho tantiatiapimbo yec mibi tabadpoc.

³⁵ Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshëncid cuesunenequido choabincuo ëbi nidacsho yuen ëbi isenquio mimi iquendac. Yuecash abucueësh choasho isash, Ambi chomiaid Nuquin Papan bëdamboen isaidquio nec, quequin tantienquicoedëmbi tantiendac –quepanëdash Esus Edusaden uano icnuc Edusaden yacnocquido tantiamequin chiacbimboec onquec.

14

Padiseyobon shubun Esus puduedash tabadaid

¹ Adashic, chonoattemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe qeshun isnuequin padiseyobo utsibo tabadquin caimbededpanëdash.

² Aden caimbedednubien podo nidte chedo bidisquiaid uano tsadsho isun Esusën:

³ –¿Chonoattemaid ushën daicsambocquid bëdamenquiocte ushë nec, quequinda mimi tantiape? –caquien

⁴ abi caimbededquido otacquo tabadcuededpanëdash. Adec aido otacquo tabadcuedednubien podo nidte chedo bidisquiaid dada Esusën bedshun bëdameshun: –Nidec nid –cac bëdambo yec nidpanëdash.

⁵ Aden aid nidmeshun abi bëdamenushe quequin caimbededquido caic: –¿Chonoattemaid ushën nua uëdëshcaidën min baca ampaëdacsho isun badedquio bedtanquin indoenquioda mimi icsia? –quepanëdash Esus.

⁶ Aden chuisho tantiaish adquiobidi otacquo tabadcuededpanëdash.

7 Adashic, tsusiobon dayunquoio tsadsho isash, Chuiquid dapa nec, ut-sibo quetsiash, quec padiseyobo cho-choec, quequin tantiashun Esusën nadopanëdash:

8 —Pec cho, cac choshon tsadte bëtinenda. Tsadte mimi bëtinambien shubu ichon ambi pec cho caid utsi mibi chuiquid tsusio chosho

9 isun: “Chuiquid dapa choeque. Uano tabadad,” ichon cac icsamboen naombi quiash natiaic uano tsadpec mibi.

10 Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu ichon.

11 Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

12 Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidouidi pec cho cainda. Aido pemiac, mibi pec cho caoic.

13 Pemenu, quequin aton na nibëdquido, daicsaidobëdta bëshuaido pec cho cata.

14 Adquido mibi cuidquin pemetiapimbo iquec. Adquido pemias, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

Nuquin Papa yacnoshon pequido

15 Aden Esusën chuisho tantiash abëdtan pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

16 Adoaquien aidi tantiamenuen utsi chiacbimboec Esus nadpanëdash: —Yuednu, quequin nadënquoio pec chota, quequin ambi yuedtequid dadpen chuiposh.

17 Ambi chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidposh.

18 Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaid abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

19 “Utsibic: ‘Baca bedshun, Bëdamboen nimbanquinda buaneque. Isnu,’ queshun isedtanenquiocquin ambi bedboed nimbameposh.

20 “Utsibic: ‘Con chido bedombique. Nidenquoio iquebi,’ queposh.

21 “Aden chuisho tantiash nidshun aidon chiacpaden aton yuan icbo chuoaposh. Adsho tantiash nëishun ichon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

22 “Nidshun chuitanec aido bëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

23 “Adoaquien: ‘Shubu ënëdacno nidshun ëmbi chuibocpadquido isun bëoata ma con shubu tsucus-tsucustsëcquio yec ma adquido tabadpanuna.

24 Abia ëmbi pec cho caidon ëbëdtambi petiapimbo iquendac,’ queposh icbo —quepanëdash Esus.

Esuspadquio ictequidquio

25 Adashic, nidsho matses dadpeshun tsibanac abi choacmi bidiadshun isec Esus nadpanëdash:

26 —Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo

icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic.

²⁷ Unësmane quiash mëyanac dayactiapimbocquid ëbipadquio ictiapimbo icoaindac —quepanëdash Esus.

²⁸ Aden chiec Esus abi onquec: —¿Shubu uanu, qeshun abia shubu uaid isec, Nëidtenquio nanu, qeshun aitededquiobidi bëshun toccashun shubu uainquioda icpec?

²⁹ Aden tantienquiocquidën abentse-abentsen bë-bëtsëcquin baded naintiapimbo iquec.

³⁰ Adsho isun utsibon mamënshumpec. Bëdamboen isun shubu uaquid-padquid, Esuspadquio icnu, qeshun ëmbi chiaid bëdamboen tantiabenash adquiobidi icpec. Ëbi tantiauidtsëcquid ëbipadquio ictiapimbo iquec.

³¹ “Adembi chuinu. Tantiata: ‘Mibëd icquidobëd cuesnanuec chuiquid utsi nëmbo cho-choec,’ qesho tantiashun nëmbobi icquido chuiquidën naden tantiapec: ‘Ëbëd icquido daëdpectsëc iquec. Aitedtedsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec.

³² Padnuen, abëd icquido dayactiapimbo icsho isun chuiquidën: Chuiquid utsi bëqued tanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuiposh.

³³ Adembidi ëbipadquio icnuequidon bëdamboen tantiata. ¿Ëbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda —quepanëdash Esus abi tsibananquido chiec.

*Sa batapentsëcquiocquid
(Mat 5.13; Mad 9.50)*

³⁴ Aden chiashic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic?

³⁵ Padenquio. Secatequid adquid nendac. Adecbidi Esuspadquio icnu quiash ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tiantanu, qeshun tantiacpadomboen nabanta —quepanëdash Esus.

15

*Obeca abentsëc bënudtequid
(Mat 18.10-14)*

¹ Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tiantanu, quiash Esus datsidadpanëdash.

² Adsho isash padiseyobo Esus tantiamenquio yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuededpanëdash.

³ Adoaquien, tantiaquidquio iquec Esus:

⁴ —¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibë nec nidenquioda mibi icpe?

⁵ Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec.

⁶ Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipec.

⁷ Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuededpendac —quepanëdash Esus.

Aton na bedtequid bënudtequid

⁸ Aden icbon aton yua bënudaid chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec?

⁹ Ai. Aden nibëquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

¹⁰ “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

Aton mado cuëshëdquid

¹¹ Aden chido chiashic utsi chiacbimboec Esus nadpanëdash: —Aton mado daëd icnubi

¹² tsyuec tishaid aton papa caic: ‘Tsusio budquin mimbi chiondapden nëbi ëbi aitted meneta, papa,’ quepondash. Adoac aton na musucshun aton mado abi daëdi menëbampondash.

¹³ “Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash.

¹⁴ Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuededpondash.

¹⁵ Adec bundoquiec abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chanco pemebanta,’ queshun aton chanco yacno tsusion mado nidmepondash.

¹⁶ Aden nidmiac nidquin chanco pemebanequi ambi chanco pemiaid petiadquio yec tabadshobi anocquidon menenquio icpondash.

¹⁷ “Adec natiambo bunec tabadquin aton papa ambi nianondaibëdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi con na nibëdnuc unëspebi.

¹⁸ Nëbi con pa yacno nidshun naden con pa chiembi: Nuquin Papan chiacpaden nainquiocquin mibi tantienquio yec nidshun icsamboen nabanombique.

¹⁹ Adquid icsho con mado nec, ëbi cainda, papa. Nëbi min yuapadquid ëbi icme,’ quequin chiembi,

²⁰ abibi quianec aton papa yacno nidoapondash. Adec nidec ancuenquio yacno aton mado nidondaic casenash chosho isash unësquiocnoc aton mado bëquedquin dayumbudshun shubi uatanquin aton papan tanchoccapondash.

²¹ Adoac ambibi tantiaocpaden aton papa chuiquin: ‘Nuquin Papan chiacpaden nainquiocquin mibi tantienquio yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,’ capondash aton madon.

²² “Aden chiaquien bëdambo yanshun ambi namiaidombo naden aton papan chuipondash: ‘Con mado ënden nidondaic choashe. Dasiuidte bëdaidquio bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta.

²³ Adoshombic, bacan bacuë nuacquid dapa bedshun cuesuneta nuquitedi bédamboec tabadquin penun.

²⁴ Con mado unësacimbocboedi nēbi ëbēdi tabadoaic. Aidi bēnudacimbocboedi nēbi istuidacimboc choash iquec,' cac bacan bacuë cuesuneshun codocacsho pebededpondash.

²⁵ “Adnubien bëyuc tishaid tied nantan icpondash. Auëshquio nidec shubu anoentsēqui choquin tentencate cuëdēmec matses cuëdēnsho tantiatuidpondash.

²⁶ Aden tantiatuidashien aton papan namiaid istuidash: ‘¿Atotsi naic nec?’ quepondash bëyuc tishaid.

²⁷ “Adoquien: ‘Min utsi ënden nidondaic choaposh. Aidi chosho isash unësquiocquin nuquitedi bédamboec tabadquin pemenuquin aton bacan bacuë nuacquid dapa papan cuesunemiosh,’ cac

bëyuc tishaid nëishash shubun puduedenquo icpondash.

“Adsho isash, Puduedenquo iccosh, quequin chiac bëyuc tishaid yacno nidshun: ‘Min utsibobēd bédambo icnuec cho, mado,’ capondash aton papan.

²⁹ Adoquien: ‘Seta dadpen matamequin mimbi chiacpadomben naban-teniombi. Adquid icsho ëbēd capuquidobēdta ëbi pemenuen yua utsin bacuë mimbi cuesunemenquiocpaboc.

³⁰ Nēbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepaboc,’ quequin bëyuc tishaidēn aton papa chushcapondash.

³¹ “Adoquien: ‘Mado, ëbēd icquid mibi nec. Adquid icnuc con natedi mitsana neyoc.

³² Min utsi unësacimbocboedi nēbi choash tabadoaic. Aidi bēnudacimbocboedi nēbi istuidaid nec,’ quequin aton papan choebēn buchi chuipondash —quepanēdash Esus.

16

Icbon na icsamboen isquid

¹ Adshumbic, abēd icquido Esusēn naden chuipanēdash: —Icbon, Con na dadpen isquid icta, caid icnubi: Mimbi con na ista caidēn mitsana uesbudec, quequin utsibon chuiposh.

² Adoac, ambi con na ista caid chomiasch icho nadposh: ‘Mimbi con na ista caidēn mitsana uesbudec, quequin chioshi. Adoac, con na isquid mibi ictiapimbo iquec, caimbi. Nēbi ¿Ëmbi tambamboed abitedida iqueque? Con na daēd uata quequin ëmbi meniac mimbi daēd uabanquin dada uaid bec cho. Isnu,’ queposh icho.

³ “Aden chiac icbon na isquid otacquo onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibēdeque. Bec cho, quetiapimbo icoaiibi.

⁴ Naden natsiambi. Con icbon na meniondaic abitedi cuidmenquo yac ëbi yuedtsiash,’ queposh.

⁵ “Aden tantiasun ambi icbon na meniondaic abentse-abentsen chomiac bëyuc choquid chuiquin: ‘¿Tedsit ëmbi con icbon na meniaqui mimbi cuidenquiocpaccoc?’ caquien:

⁶ “ ‘Bēchi shocosh nuacquid dapan cushtoaid 15tedi bedshun cuidamboc-combi,’ queposh.

“Adoquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

7 “Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquio mimbi icpo?’ caquien:

“Tsitsan dapa dadpen 1000ted tiedën caniquid ëshë bedombi,’ queposh.

“Adoaquien: ‘Mimbi aidted bedombi quequin dada uaid secashun dada uatempiti utsin tsitsan dapa dadpen 800fed tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaïd cuidambocquidën dada uaposh.

8-9 “Aden dada uabansho isun dada uatempitedi bedshun icbo yacno nidshun meniãc isbanec icbo tantiaquidquio iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon –quequin Esusën chuipanëdash. Aden chuishun ambi chuiboed tantiamenuen abi chuibudec: –Nuquin Papa yacno mitsana buantiapimbo icquin nidaidën tabadquin mitsana meniãc mimbi meniãdotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac –quepanëdash Esus.

10 Aden chuishumbic adomboembidi chuiquin Esusën nadopanëdash: –Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac.

11 Adembidi mimbi nidaidënshun bedquin mimbi icsamboen nabansho isun, ¿Ëbi tantiaquid bëdamboen ista, quequina Nuquin Papan mibi chuipeba? Padenquio iquec.

12 Adembidi, ¿utsin na isquin bëdamboen nashunenquio icsho isun abi yacno chosho isun mibi menependa ictic? Padenquio.

13 “Adecbidi, chuiquid daëd icnuc aid daëdshun namiaidquio ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquibidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec –quepanëdash Esus.

14 Aden chuibanubi aton na bedtequid ambi tantiaidquio icnuc chieshec padiseyobo tabadcuededpanëdash.

15 Adec tabadsho isun Esusën: –Bëdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bëdamboen naquidbimboecsho matsesën isplashuni, quequin tantiaquin nasho Nuquin Papan bëdamboen istiapimbo iquec.

16 “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëda Nuquin Papan chuimiaid utsibon dada uampid mimbi ënden tantionaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpader puduedte bunec.

17 Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

*Aton chido nianquid
(Mat 19.1-12; Måd 10.1-12)*

18 “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic –quepanëdash Esus.

Aton na dadpen icquid icnubien aton na nibëdquid

19 Adequi onquequimbi utsi chiacimboen Esusën naden chuipanëdash: –Dada, aton na dadpen icquid bëdaïdquio dasiuidquidën badiadquidën badiadquidënquien nua peshun acposh.

²⁰ Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh.

²¹ Bunquieac ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquatin aton chiuë bëtashuntuidposh.

²² “Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi

²³ chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec.

²⁴ Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebudoaquin ëbi ëcpanun Dasado acte bëme, papa,’ caposh.

²⁵ “Adoquien: ‘Chuinu. Tantia, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquieac tsadposh. Nëbi aidi ënabi bëdamboec tabadnubien anchumbo yec mibi tënquebudec.

²⁶ Adboedi, uquëmbo mibi iquiec cuëma utsiuc potetemaïd icnuc nëuëshquio nidtiapimbo iquiec. Adquibidi mibi yacnoquido nëmbo chotiapimbo icoaic,’ quequin Abadauanën aton na dadpen icboed chuiquosh.

²⁷ “Adoquien: ‘Ëbi yacno potetemaïd icnuc con pan shubu yacno Dasado nidme.

²⁸ Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe queshun Dasado aido chuimetanta, papa,’ quequosh aton na dadpen icboed.

²⁹ “Adoquien: ‘Nuquin Papan chiaïd, Moisesën dada uampidbëdta dada uaid utsi isec tsusiobo onquepayoc. Aden chiaïd ma min buchi adon tantiaquiopanuna,’ quequin Abadauanën chuiquosh.

³⁰ “Adoquien: ‘Aïd tantienquioctsiash, papa. Unësboed nidshun chiac aïdon tantiapatsiash,’ quequin aton na dadpen icboedën chuiquosh.

³¹ “Adoquien: ‘Padicnuna. Nuquin Papa tantiesa icquin uincuemiaïdën chiaïd min utsibon tantienquio icpatsiash,’ caposh Abadauanën aton na dadpen icboed chuiquin –quepanëdash Esus.

17

Matses icsaid chiaïd, ambi Esus tantiaïd chiaïd, ambi natequid chiaïd (Mat 18.6-7, 21-22; Mad 9.42)

¹ Aden chuishumbic abëd icquido Esusën nadopanëdash: –Icsa uanquid iquendac. Adquid Nuquin Papan comapenen cuidendac.

² Adquid ëbi tantiabenabicquid icsa uanabicsho cuënote yuëmboquid têtanetanquin acte shodomboshë yacno nënepatecnëdan.

³ Aid tantiec aidpadquid icmane quequin bëdamboec tabadquin ismeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënëdnuna,’ quesho tantiash aidi icsainquio yacbimboec bëpiscudta.

⁴ Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aïdtedebidi aidi icsambo yenquio yacbimboec bëpiscudoata –capanëdash Esusën abëd icquido chuiquin.

⁵ Adoaquien: —Nuquin Papa nadatiambocquin nabanquidquo nec, quequin tantiaquidquo ictiadquo iquebique. Adquid ëbi icmë, icbo —capanëdash abëd icquidon Esus chuiquin.

⁶ Adoaquien: —Cuëtempi ëshë mostasa caid pistsëcquo iquec. Siac dëyucash nua yanec. Adebidi Nuquin Papa nadatiambocquin nabanquid iquec quequin mimbi bëdiactsëc tantiapec. Aden bëdiactsëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquo iquec, quequin tantiabenshun nëid cuëtempi caic, Cuëte mananuc tabadboedi adquiecbidi acte nantan tabadoata, quequin mimbi chiacpadece acte nantantsen abi tabadacpadecebidi tabadoaindac —quepanëdash Esus.

⁷ Aden chiashic Esus abi onquec: —¿Min yua mimbi neshcata cac nidshun neshcaquin nainash shubunò chosho isun: “Nëmbo tsadquin pec cho,” caquina mimbi icpe?

⁸ Padenquo. “Con pete codocashun ëbi pemeshun acte menetanquin mimbitsen peshun acta,” mimbi caic.

⁹ Aden mimbi chiac mimbi chuiboedtedictsëqui nabanquin mimbi yuaidën naimbudec. Aden naimbudsho isash: “¿Bëdamboen mimbi naoc,” quecta mibi icpe?

¹⁰ Padenquo. Ambembi nainquo iccosh. Mimbi chiacpaden min yuan nabanosh. Adembidi Nuquin Papan chuiboedtedtsëqui nabanash Nuquin Icho caic: “Mimbi chuiboedtedi nabampombi. Mimbi namiaid icquin ëmbi naboed ëmbi natequiduidi napombi,” quequin mimbi chuite nendac —quepanëdash Esus.

Daushumbocquido bëdamiaid

¹¹ Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec

¹² shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquedtuïdpanëdash.

¹³ Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapenen cuënquin.

¹⁴ Adsho tantiaishun Esusën: —Isadaïdho tsusiobo yacno nidshun ismetanta —capanëdash. Adoac nidanequi abitedi bëdambudnepanëdash.

¹⁵ Adoac bëdamboed abentsëc dëbidiadanec Nuquin Papan naid chiec onquec choaic

¹⁶ Esusën taëno tsadbudash: —Mimbi bëdameboc bëdambo iquebi —quepanëdash Esus caic. Aidi Samadia yacnocquid isadaïdpembo nepanëdash.

¹⁷ Adoaquien: —¿Diestedidambi bëdamepo? —quepanëdash Esus dëbidiadanec choebo caic.

¹⁸ Aden chiashic iccuededquidtedi caic: —Nëidi isadaïdpembo yequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaïdbo icquimbi Nuquin Papan naid chienquo icpec —quepanëdash Esus.

¹⁹ Aden chuishumbic: —Mimbi tantiacpadequi mibi bëdanoque. Nidtoanec nid —capanëdash Esusën daushumbo icboedi chuiquin.

Chuiquid dapabëd bëdamboec tabadte chote ushë

(Mat 24.23-28, 36-41)

²⁰ Adshumbic: —¿Chuiquid dapa abentsëcbëd bëdamboec tabadte ushë choaid mitsipadënquo nuqui ispeque? Tantanu. Ëbi chui —capanëdash padiseyobon Esus chuiquin.

Adoaquien: —Chuiquid dapabëd bëdamboec tabadte ushë chote ismete nibëdendac.

²¹ Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi —quepanëdash Esus padiseyobo abi chuimeboedo caic.

²² Aden padiseyobo chuishumbic abëd icquido Esusën nadopanëdash: —Yuecash natiamiantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquio mimbi iquendac.

²³ Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshë. Isnu. Cho,” cac istanenda.

²⁴ Nuquin Papa yacno bëdamboec tabadte ushë chonoc abu bedquetanicbimboec uëshëmbo chënquec ëbi chosho abitedishun isbededendac.

²⁵ Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec —quepanëdash Esus.

²⁶ Aden chiec Esus abi onquec: —Ëndenquimboshë Noe tabadnuc matsesën icsamboen tantiaded-tantiadednëdaccpadomboen ëbi choate ushë icnuc ademibidi matsesën tantiadenepec.

²⁷ Nadec tabadpampic: Nuquin Papan chiaid tantiesä cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Ademibidi tantiaquin aton chido bedpampic. Ademibidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanëdash Esus.

²⁸ Adec Noe tabadnuc icsamboen tantiec matses tabadaid chiashic, Esus nadpanëdash: —Adecbidi Dod caid icnuc icsamboen tantiec matses tabadpampic. Nuquin Papan chiaid tantiesä iquec abi bunaiduidtsëqui tantiaquid icoapampic. Nidaidën tabadaiduidquio tantiaquin nua peshun nua actenepampic. Ademibidi tantiaquin aton na dadpen bedtenepampic. Ademibidi tantiaquin aton tied nitsindenequinc, shubu uadenequinc, caquin napampic.

²⁹ Aden nabanquin Nuquin Papan chiaid tantienquio icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiachimboecquid nëdënquetequid ue sequiachimboec sequequidën Sodoma yacnoquidtedi Nuquin Papan chiaid tantiesäbo unës uabunepampic —quepanëdash Esus.

³⁰ Aden chiashic: —Ëbi choate ushë icnuc ëmbi chuibocpadquiec Nuquin Papan chiaid tantiesä yec abi bunaiduidtsëqui tantiaquid iquendac.

³¹ Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquio yec cuenta. Adecbidi, tied nantan mibi icnuc aid ushë chosho isash shubu yacno mitsana bednuc nidenquio yec badedquio cuenta.

³² Mibi yacnoquidtedi unës uanushe bidiadshun isenquio yec cuenta, cac Dod cuenubien aton na tantiec aton chido aucbidi bidiadsho unës uampidpadquid iquenda.

³³ Unësmäne queshun ambi tantiacpadec tabadquid unësash mëyanacno tabadnubien unësmäne quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac.

³⁴ Ëbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesä nianendac.

³⁵ Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac.

³⁶ Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanëdash Esus.

³⁷ Aden chuisho bëdamboen tantienquiocquin abëd icquidon: —¿Mitsimbo budpec, icho? —capanëdash.

Adoquien: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanëdash Esus abëd icquido caic.

18

Cadonequidquio chido chiaid

¹ Adashic, Èbëd icquido chieshenquio yec Nuquin Papa chiec onquian-onquianquidquio ma icpanu quec aido tantiamenu quec Esus nadpanëdash:

² —Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh.

³ Adnubien uano tabadquid niante chido icposh. Aidi icsambocquid cuidte chuiquid yacno nidshun: ‘Èbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

⁴ “Aden chuidoniaqui abi icsambocquid naquid cuidte chienquiochoedëmbi chido ënëdenquio yec

⁵ choded-chodedquin adomboembidi chuioasho tantiasun: ‘Nuquin Papabëdta matses tantiesa nebi, quequimbi niante ënëdenquio yec chodednesho isun uimabudmane qeshun abi icsamboen naquid cuidte chuiquiono,’ qeshun cuidte chuiquidën chuiquipopsh.

⁶ Aden chiashic Esus: —Choded-chodedquin chidon chuioasho tantiasun: “Mibi icsamboen naquid cuidte chuinu,” queposh icsambocquid cuidte chuiquid.

⁷ ¿Adomboembidi ambi cuënaidon, Èbi chieshënuqid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba?

⁸ Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsisumbimbi ëbi tantiaquin caimbudnequido istuidpendac? —quepanëdash Esus.

Padiseyobo abentsëc icnuc ancanquidën utsin na bedtequid bedmianiaid chiaid

⁹ Adashic, bëdamboquid nebi, quish utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash:

¹⁰ —Nuquin Papa tabadte shubu uashunaid yacno Nuquin Papa chiec onquenuc nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh.

¹¹ Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tantiapaden naden Nuquin Papa chuiposh: Bëdamboquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidën utsin na bedtequid bedmianiaidpadquidpenquio nebi, Papa.

¹² Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adem-bidi, uno bedanquin dies yacno cuëscaquin con na tambanshun 9ted dayon uaquin abentsëc mibi menedenembi, Papa, quequin padiseyobon chuipus.

¹³ “Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquoio yec abi onquec: ‘Icsambocquin nabanquid nebi que. Èbi tantiaquin pauc, Papa,’ queposh –quepanëdash Esus.

¹⁴ Aden chiashic: –Chuinu. Tantia. Ancanquidën utsin na bedtequid bedmianiaid Nuquin Papan bëdamboen isaidquoio icnubien padiseyobo ambi icsamboen isaidquoio icposh. Icsaisa yacbimboec, Bëdamocquid nebi, quequid yuecshun Nuquin Papan aidën icsamboen tantiaid ismequin chien-dac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuioaindac –quepanëdash Esus.

*Bacuëbo Esus yacno bë-bëaid
(Mat 19.13-14; Mad 10.13-16)*

¹⁵ Adshumbic, aton bacuëbo Esus mishmenuequin utsin-utsinquinen bë-bësho isun: –Bacuëbo bë-bëenda. Esusën nabanaid utsi iqueque. Nidanec nid –capanëdash Esusbëd icquid.

¹⁶ Aden chuisho tantias Esus nadpanëdash: –Bacuëbo nidmenquiocquin con dayunquoio cho-chome. Chiac, Abimbo caic, quequin tantiaquidquoio bacuëbo nec.

¹⁷ Adomboembidi, Nuquin Papa yacno tabadte iquec, quequin chiac bacuëbon badedquoio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac –quepanëdash Esus.

*Nëbi caniquid chuiquidën chiaid
(Mat 19.16-30; Mad 10.17-31)*

¹⁸ Adshumbic, nëbi chuiquid caniquidën: –Nuquin Papa yacno nidnuequin ¿atotsimbi nape? Bëdamboen tantiaquidquoio icquin ëbi chui. Tantiaru –capanëdash Esus chuiquin.

¹⁹ Adoaquien: –¿Mitsipaden tantiec bëdamocquid nec, quepe mibi? Nuquin Papauidsëqui bëdamocquid nec.

²⁰ Abi yacno nidnuequin ambi naden nata paequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec –capanëdash Esusën nëbi chuiquid caniquid chuiquin.

²¹ Adoaquien: –Canidotsëcquimbi aden nadeniondambi –quepanëdash nëbi caniquid.

²² Aden chuisho tantias: –Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota –quepanëdash Esus.

²³ Aden Esusën chuisho tantias aton na dadpen tantiec unësquoio yanshun Esusën chiacpaden natiapimbo icpanëdash.

²⁴ Adsho isun: –Aton na dadpen tantiaquin Nuquin Papa badedquoio tantiatiapimbo adquidën iquec. Nuquin Papa tantienquoio yec abi yacno puduedtiapimboquid iquendac.

²⁵ Adquiecbidi shëcuë pistsëcquid puduedte nidaidën capuquid dapan badedquoio tantiatiapimbo iquec. Tantiamic puduedec. Adembidi Nuquin

Papan shubu abentsëquën puduedmianquid icsho aton na dadpen icquidën badedquio tantiatipimbo icoaic. Aden aid tantiatipimbocquid ambibi tantiacpadequi puduedte bunec –quepanëdash Esus.

²⁶ Aden chuisho tantiasch iccuededquido nadpanëdash: –¿Tsutsi Nuquin Papa yacno puduedquid icpec? –quepanëdash Esus caic.

²⁷ Adoaquien: –Matses ambibi tantiacpadeq puduedtiapimbocnoc Nuquin Papambien abi yacno yuedanquid matses tantiamendac –quepanëdash Esus.

²⁸ Adoaquien Petedo: –Mibëd icnu, quequin ëbëd icquidbëdtan con natedi nianondambi, icbo –quepanëdash Esus caic.

²⁹ Adoaquien: –Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho

³⁰ ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac –quepanëdash Esus Petedo chiec.

Ëbi unës uaindac, quequin Esusën chiaid

(Mat 20.17-19; Mad 10.32-34)

³¹ Adashic, abëd icquido uano buanash: –Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabanendac.

³² Anoshon bedshun buanshun isadaidbon isadaidpembo ëbi menendac. Aden meniäc bedshun ëbi mamënschumbededquimbi, icsamboen chuibed-edquimbi, dacuishtuabededquimbi, dacuesbededtsëcquien mëyanshun ëbi cuesten decanquin unës uaindac.

³³ Adoaqui daëdec ushtanec uincuenendabi –quepanëdash Esus abëd icquido chiec.

³⁴ Aden abi unëste Esusën chuisho abëd icquidon bëdamboen tantienquio yec tabadpanëdash.

Bëshuaid bëdamiaid

(Mat 20.29-34; Mad 10.46-52)

³⁵ Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiasch: “Mitsäna bedtequid bec cho,” quepanëdash bëshuaid.

³⁶ Adec tsadquimbi matses dadpen cuen-cuensho tantiaschun: –¿Atotsi quec cuen-cuene? –capanëdash.

³⁷ Adoaquien choquid abentsëc: –Nasaded yacnoësh choquid Esus cuenec nec –quepanëdash.

³⁸ Adsho tantiaschun bëshuaidën: –Dabid, tsusedpan mado mibi icquin ëbi tantiaquin nata –capanëdash Esus cuënquin.

³⁹ Adshobien: –Adec cuëdenquio yec tsad –capanëdash choquidon. Adoaquien bëdiactsëc cuëmboedëmbi comapenquien: –Tsusedpa Dabidën mado mibi icquin ëbi tantiaquin nashunta –caoapanëdash bëshuaidën.

⁴⁰ Adoac nidtuidshun Esusën: –Aidi bec cho –cac abi yacno bësho isun:

⁴¹ –¿Atotsimbi mibi nashumpeba? –capanëdash Esusën bëshuaid chuiquin.

Adoaquien: –Bëshuaid nebique. Ëbi bëucshune, Icbo –capanëdash.

⁴² Adoaquien: –Mimbi tantiacpadomboen padpidemboen is –cac

⁴³ badedquio isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdanschö isun Esusbëd nidanequidotedishuntsen Nuquin Papan naid chuibededpanëdash.

19

Saqueyo, ancanquidën utsin na bedtequid bedmianiaid dapa

¹ Adec nidequi Edico caid yacno datambidanec Esus nidpanëdash.

² Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash.

³ Adoaid icquimbi utsi, Esus cuenec, qesho tantiash, ¿Mitsipadquidquio Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuctsëcquid icquin Esus Saqueyon isenquio icpanëdash.

⁴ Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

⁵ Adec tsadnubien aid podquedënquio choec nidtuidshun Saqueyo bushcuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac

⁶ Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

⁷ Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

⁸ Adnubien, aton shubu nuntanuësh nidtoash Saqueyo: —Chuinu. Tania, Icbo. Nëbi con na mais uaquin aton na nibëdquid menenun nabono. Adoshombic, con matses: “Con na mimbi ampioc,” qesho tantiashun ëmbi ampiaidbëdta daëd-daëdquiecnuc daëd uaquin menebanembi —quepanëdash Esus chieç.

⁹ Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec.

¹⁰ Icsambocquid Saqueyo icbocpadquid nibënquin istuidshun nësecanushe qeshun mënchicnuec chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹ Aden Esusën chuisho tantiashun Edusaden yacno choash chuiquid dapa Esus yantsiash, quequin utsibon icsamboen tantiapanëdash.

¹² Aden tantianubi tantiaquidquio icquin utsi chiacbimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’

¹³ qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

¹⁴ “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

¹⁵ “Adoquid, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ¿tedtsi daëd uapashba? abibi qeshun ambi meneboedo chomeposh.

¹⁶ “Adoac bëyuc choquid: ‘Mitsana bedtequid abentsëc ichoedi utsi 10ted icnuc daëd uaombi, icbo,’ queposh.

17 “Adoquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

18 “Adnubien utsi: ‘Mitsana bedtequid abentsëc ichoedi utsi 5ted daëd uapombi,’ queposh.

19 “Adoquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

20 “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo.

21 Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanush quïash dacuëdec tsadteniobi,’ queposh.

22 “Adoquien: ‘Ëmbi chiaid niacquid mibi neyoc. Mimbi mua uaqin chiaidtedimboesho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco?

23 ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquid icco? Aden meniac daëd uashun bedtsenombi,’ queposh abi chuiquid.

24 “Aden aton na daëd uaisa chuishumbic iccuededquido chuiquin: ‘Ëbi chieshëquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

25 “Adoquien: ‘Aton na dadpen iqueque. Aid menenda, chuiquid,’ queposh iccuededquido.

26 “Adoquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaqin menembi. Ëmbi chiacpaden chieshquin daëd uainquiocsho isun ëmbi meneboed bedshunembi.

27 Adembidi ëbi chieshënec abi chuiquid dapa ëbi icmete bunesho nëmbo bec cho. Bëshun ëmbi isnubi abitedi cuesuneta,’ caposh abi chuiquidën — quepanëdash Esus.

Chuiquid dapabimboec yec Edusaden yacno Esus choaid (Mat 21.1-11; Mad 11.1-11; Uan 12.12-19)

28 Aden chuibanashic Esus Edusaden yacmi nidequi anoentsëqui choash nidtuidpanëdash.

29 Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adëc nidtuidash abëd icquid daëd caic:

30 —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tēchicshun nëmbo bëta.

31 Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icbo bunaid nec,” quequin chuita — quepanëdash Esus.

32 Adoac nidshun istuidtanquin

33 cabayobitsecquidëmpi tënëshaid tēchicsho isash: —¿Atotsi canuen aid tēchique? —capanëdash ichon.

34 Adoquien: —Con Icbo bunaid nec —qeshun Esus yacno nimbanquin abi tënëshaidën buampanëdash Esusbëd icquidon.

35 Aden bëshun, Chuiquid dapa Esus nepanui, quec onqeshun Esusbëd icquidon aton dashcute bëntsecquid chictanquin cabayobitsecquid capucshun Esus catsadampanëdash.

³⁶ Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, qeshun aidontsen adopanëdash.

³⁷ Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onquecuededpanëdash:

³⁸ —Nuquin Papan chomiaid ambi chuiquid dapa icmiaid ambi bëdambo icmiaidquibidi nec. Nuquin Papa yacno abëdi bëdamboec tabadequi ic-saisatedi iquendac —quepanëdash iccuededquido comapenec cuëdcuededec.

³⁹ Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰ Adoaquien: —Ëmbi naid chiec aitedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

⁴¹ Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash:

⁴² —Ëbi bëdambo icmequid Esus nec, quec nëbi ëbi tantiaquid mibi ictsian-dac. Tantiesa icquin mibi chuiquid mimbibi nibënacpadquid mimbibi istuidti-apimbo iquendac.

⁴³ Yuecash choquin uimanëmënuquidon mibi cuentiapimboconoc tsicatebud-cuenendac.

⁴⁴ Aden mibi tsicatebudcuenshun min bacuëbobëdtabi naimbudquin mibi unës uashun nendac. Min shubutedi nibëdquendac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquio icnuc anocquido chiacbimboec adpanëdash.

Nuquin Papa tabadte shubu uashunaid yacnoshon cuemiaid

⁴⁵ Adashic, Edusaden yacno choash Nuquin Papa tabadte shubu uashunaidën puduedshun nuntanshunquo aton na bedtequid bednun menebanquido Esusën cuemepanëdash.

⁴⁶ Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

⁴⁷ Adoshombic, badiadquidën-badiadquidënquiec Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash.

⁴⁸ Aden caimbededquimbi Esusën chiaid tantianu quec dadpen Esus dat-sidadacsho isun ashunquo isadaidbon Esus cuesunemenuen bedtiapimbo icpanëdash.

20

¿Tсандан чуибанта каид мибине?

(Mat 21.23-27; Mad 11.27-33)

¹ Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash.

² Cho-choshon: —¿Tсандан чуибанта каид мибине? Tantanu. Ëbitedi chui —capanëdash.

³ Adoaquien: —Ëmbia tantianu. Ëbi chui.

⁴ ¿Nuquin Papan ëmbi chiaid chuibanshun mentobanta caidta Uan icpondash? Padenquio mibi quenuc, ¿Matsesën nata caidta nepondash, quequinda mimbi tantie? —quepanëdash Esus isadaidbo tsusiobo caic.

⁵ Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi qesho tantiash Esus nadpendac. ¿Atotsieshun Uanën chuisho mibitedishun tantienquio icponda?

⁶ Matsesën nata caid Uan pado niondash, ëbitedi qesho tantiashun iccuededquidon cuënoten nuquitedi se-sependac. Nuquin Papan chuimiaid, Uan icpondash, quequin iccuededquidon tantiec —quepanëdash isadaidbo tsusiobo.

⁷ Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

⁸ Adoaquien: —Mimbi chienquio yacpadembi ëmbitsen ëbi chuita caquid mibi chienquio icoaimbi —quepanëdash Esus.

Neshcashunquidon icsambocquin naid

(Mat 21.33-44; Mad 12.1-11)

⁹ Aden isadaidbo tsusiobo chuishumbic, Utsi chuinu, quiacimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic:

¹⁰ ‘Tiedën caniquid ënden bacuëpash, Ëbi neshcashunquidën musucaid con na bedmenu,’ qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoaposh.

¹¹ Adoshombic, icbon aton tied yacno ambi namiaid utsi nidmeoaposh. Aid chosho isun adembiti cuestanquin icsamboen nashun ambi musucaid menenquiocquin icbo neshcashunquidon aidtsen nidmeoaposh.

¹² Adoshombic, ambi namiaid utsitsen icbon nidmeoaposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

¹³ “Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembali. Aidi con tied yacno chosho bëdamboen ispec,’ quequin aton mado nidmeposh.

¹⁴ “Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna.

¹⁵ Aden cuesunian icbo unësan aton natedi nuquin na ictsandac,’ quecuededshun tied tsitsuno icbon mado buanshun icbo neshcashunquidon cuesuneposh —quequin chiashic Esus:

“‘Min mado cuesuniosh,’ quequin utsin chiac ¿atotsi tied icbon napec?

¹⁶ Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquio icpashun —quepanëdash iccuededquido.

¹⁷ Adoaquien iccuededquido bëisequi Esus nadpanëdash: —¿Nuquin Papan dada uamiaidën naden chienquioda icpampic? Ai, aidën chuipampid nad iquec: “Shubu uanuequidën isuidaaid buintad utsin ambia nitsinaid icposh.”

¹⁸ Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac –quepanëdash Esus.

¹⁹ Aden Esusën chuisho tantiash: –Nuqui naid chiacbimboen chiec Esus niosh –quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

Sesadën shocoshëmpi neque. Mene, quequin chiaid
(Mat 21.45-46; 22.15-22; Mad 12.12-17)

²⁰ Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdamboquid nebi, quequin ismiacbimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuishiash. Aden chuisho isadaidpembo ancaquidën Esus bedpashun, quequin tantiaquin nidmepanëdash.

²¹ Aden nidmiac choash Esus ista caid abentsëc: –Mimbi tantiamequin chuibanaid bëdambo iquec, quequin tantiambi, Abitedi Nuquin Papan chiaid abimbo chuibanquid mibi nec.

²² Adquid mibi icquin ëbi chui. Tantianu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? –quepanëdash isadaidbo tsusiobon ista caid Esus caic.

²³ Aden chuisho tantiashun choboedën icsamboen tantiaid tantiaquin Esusën nadopanëdash:

²⁴ –Piucquid shocoshëmpi ancanquidën bec cho caid sananquin abuc cadota –cac sananquin abuc cadosho isash: –¿Tsuntsin podò bitsi dada uaid aidën icpec? –quepanëdash Esus.

²⁵ Adoaquien: –Ancanquid Sesadën na nec –quepanëdash tsusiobon ista quequin chomiaid.

Adoaquien: –Ancanquid, Bec cho, qesho meneta. Nuquin Papan naden nata cac adobanta –capanëdash Esusën.

²⁶ Aden chiac, Bëdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquio tabadcuededpanëdash.

Uincuen uaid chido bedesa nec, quequin chiaid
(Mat 22.23-33; Mad 12.18-27)

²⁷ Adashic, saduseyobo caido yec

²⁸ unësaid uincuen uate nibëdec quequin chuiquido Esus yacno chopanëdash. Aido choash: –Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic.

²⁹ Aden Moisesën dada uaid icnuc dada 7ted iccuededpòsh. Aited dada icnuc bëyuc tishaidën aton chido bedshun bacuë tishmiabi yec unëspòsh.

³⁰ Aton buchi unësan aidën chido bedash adecbidi bacuë tishmiabi yec unësoapòsh aton utsi.

³¹ Adembidi, bëyuc tishaid tsibanquidën-tsibanquidënquien chido abentsëqui bedto-bedtoec bacuë tishmiabi yec unësbunepòsh.

³² Yuecash chidotsen unësoapòsh.

³³ Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tantianu –quepanëdash saduseyobo Esus caic.

³⁴ Adoaquien: —Nidaidënshun dadan aton chido bedec. Adecbidi, Min bënëbéd nída, quequin aton papan chiac aton champi aton bënëbéd nidec.

³⁵ Uincuen uate ushë choan Nuquin Papan bédamboen isaïdo abëdi tabadquin chido bedenquo iquendac. Adembidi, aton champi menenquo aton papan iquendac.

³⁶ Adecbidi, Nuquin Papan uaido mayan bédabo unësesa yacpadquequi Nuquin Papan uincuen uatequid unësenquo iquendac. Nuquin Papan uincuen uatequido aton bacuëbo nendac.

³⁷ Adembidi chuinu. Tantia. Cuëtampi nëdënquiacbimboecquid isun Moisesën dada uapampid nec. Cuëte nëdënquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaïd mibi nec. Adecbidi tsusedpa Isaquën papa cain cuënaïd mibi neoaic. Adecbidi tsusedpa Acobon papa cain cuënaïd mibi nec,” quequin Moisesën chuipampic.

³⁸ Moisesën tsusedpabo ambi chuiboed ënden unësampidën nami chodquaidën papa cain Nuquin Papa cuëntiapimbo iquec. Aton nami chodquiash abi tantiaquidquo icquin tantiec tsadquidën papa cain Nuquin Papa cuë nec —quepanëdash Esus saduseyobo chiec.

³⁹ Aden Esusën chuïsho tantiaash Nuquin Papan naden nata quequin chiaïd tantiamequid padiseyobo utsi-utsiec nadpanëdash: —Bédamboen mimbi chuibanoc —quepanëdash Esus chiec.

⁴⁰ Aden Esusën chuïsho tantiaashun Esus chuimetiapimbo utsibo icpanëdash.

¿Tsuntsin mado Quidistu nepec? quiaid

(Mat 22.41-46; Mad 12.35-37)

⁴¹ Aden utsibon abi icsamboen chuimetiapimbo icsho isun Esusën nadopanëdash: —Ëbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuïpec?

⁴² Dabidën ambibi Sadmo caid dada uaquin naden chuipampic: “Icbo utsi yec con mado mibi chiembique. Tantia, quequin chiec icbo dapa nadpampic:

‘Ëquë con dayun abiucquo cainec tsadec cho

⁴³ ma mibi chieshënquidtedi mimbi namiaïd ma icpanu,’ ”

quequin Nuquin Papan Esus chiaïd Moisesën dada uapampid nec.

⁴⁴ Aden Dabid padon dada uaquin ¿mitsipadomboentsibi con icbo cashumbi con mado ëbi caoapampic Dabidën? —quepanëdash Esus abi chieshënquido caic.

Naden nata quequin chiaïd tantiamequidpadquid iquenda, quequin chiaïd

(Mat 23.1-36; Mad 12.38-40; Duc 11.37-54)

⁴⁵ Aden chuïshun iccuededquidon tantianubi abëd icquido Esusën nadopanëdash:

⁴⁶ —Nuquin Papan naden nata quequin chiaïd tantiamequidpadquid iquenda. Aïdo ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Ëbi bëquedquidon ëbi chuïquid dapabimboecsho isash onquequin chuïpashuni quec tabadec. Adomboembidi tantiec Nuquin Papan chiaïd chuïbante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuïquid dapabimboecsho ispashuni, quec tsusiobo tsadacno tsadtenec. Adquidpadquid iquenda.

⁴⁷ Aidon bédamboen nabanacimboen nianten natedi bedbanec. Aidombidi Nuquin Papa abimbo tantiacbimboec yuen chiec onquec. Aden

bëdamboen nabanacbimboecquido Nuquin Papan comapenen cuidendac. Adoesa bëdiactsëc cuidendac –quepanëdash Esus abëd icquido chiec.

21

Nianten piucquid shocoshëmpi meniaid

(Mad 12.41-44)

¹ Adashic, Nuquin Papa tabadte shubu uashunaid yacno tabadtuidash tsadquin Esusën isbampanëdash. Ambi isaido Nuquin Papa tabadte shubu nacenmete cuidnu, quequin menequin aid shubun shocosh tabëcaidën aton na bedtequid utsin-utsinquien sandobededpanëdash. Aton na bedtequid dadpen icquidon dadpen sandobededsho isquimbi

² nianten aton na nibëdquidëmbi aton na bedtequid shocosh daëd ictscëcquid sandosho ispanëdash.

³⁻⁴ Adosho isash: –Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niantie isec. Utsibon aton na dadpen abi icnubi dadpen menesho, Daëdpactsëc menequid nec, quequin Nuquin Papan aido isoaic –quepanëdash Esus.

Abitedi naimbudte ushë choec quequin chuite

(Mat 24.1-35, 42-44; Mad 13.1-37)

⁵ Adashic, Nuquin Papa tabadte shubu uashunaidbëdtabi matsesën dectanaid didiquesho isec: –Nuquin Papa tabadte shubu bëdaidquio iquec –quepanëdash utsibo.

⁶ Adoaquien: –Mimbi nëbi isaid yuecash nidbëdquiendac. Matses utsibon nëid shubutedi chic-chicbudendac –quepanëdash Esus.

⁷ Adoaquien: –¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiantie icpeque? Tantianu. Chui –quepanëdash utsibo.

⁸ Adoaquien: –Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda.

⁹ Adecbidi: “Cuesnancuededec,” qesho tantiash dacuëdenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquio choenquio iquendac –quepanëdash Esus.

¹⁰ Aden chiequi abi onquebudec: –Adecbidi, abi ancaquid dapan nidmiac nidaid utsin icquidobëd cuesnancuededendac.

¹¹ Adecbidi, nidaid utsi-utsiec yacno canchednuec ishcut-ishcutendac. Adecbidi, utsi-utsiec yacno bunquiotie iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimbi isacmaid abucueësh natiambo icsho mimbi isbedendac.

¹² “Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnequid yacno mibi buanendac. Utsi-utsien ancanquid yacno buanac

¹³ aidotsen tantiaquid yantsiash qeshun ëbi chuibanta.

¹⁴ Aden buanaqui, ¿atotsimbi ancanquid cape? quequin tantiec tsadenda.

¹⁵ Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshënkuido iquendac.

¹⁶ Adembidi, Nuquin Papan chiaid tantiesan min shubun icquidën mibi bedshun cuidnequid yacno buanash: ‘Cuidquin cuesuneta,’ quependac. Aton papambi adôtsiash. Animbi aton mado adembidi adôtsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash.

17 Ĕbi tantiaquid chieshënquid dadpen iquendac.

18-19 Aden nabanquin mibi cuesunemenu, cac chieshenquoio yec, Esus tantiaquid nebi, quequid icta. Adquid iquec unēsash ěnēdenquoio yec Nuquin Papabēd mibi tabadendac.

20 “Adecbidi shubu dadpen icquid Edusaden caid yacno cuesanquid dadpen cho-choshon tsicategbudsho isash, Edusaden yacno naimbudte ushē choec, quequin mimbi tantierendac.

21 Aden tantiec ma Cadidia yacnocquido macuēs̄h dapa yacno cuempanuna. Adecbidi, Edusaden yanocquido ma auēs̄hquoio cuempanuna. Adecbidi, dēuequido Edusaden yacno ma nidenquiocpanuna.

22 Aid ushē icnuc Nuquin Papan chiacpadomboen cuidtequid iquendac.

23 Aid ushē chonoc matses utsibon Edusaden yacno tsicategbudac pete naimbudnuc bacuē usunquidobēd bacuē chishmequido mēyadec nati-aquindac. Edusaden yacnocquido abi tantiesabo icsho Nuquin Papan natiambocquin cuidte iquendac.

24 Edusaden yacnocquid utsi-utsien chēshten cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicategboedo Edusaden yacno tabadendac. Nuquin Papa, Chēn, quenquiocnoc adec tabadendac. Chēn, quenuc niden-dac.

25 “Adec Nuquin Papa, Chēn, quian badiadēn ushē, inchēs̄hēn ushē uispa chedo aidtedi ambi nadatiambocquin naid ismiantequid iquendac. Aid ismianti icsho isash, Uinsadpambo iquec, quec comapenec dacuēdec matsesti tabadcuededendac. Acte natiambo chēuēs̄hō isash adquiecbidi comapenec dacuēdec matsestedi tabadcuededoaindac.

26 Adecbidi, uispa utsi-utsiec paēdted-paēdtednubi utsi-utsiec tididiquen-dac. Adsho isash matses dacuēdec padishendac.

27 Adnubini Nuquin Papan chomiaid matsesaid ěbi dasiuidaid bēchomauanquiec ushē chēnquiacbimboec uēs̄hēmo yec nadatiambocquin nabanquidquoio abu ushun ěbi budsho matsestedishun isbededendac.

28 Natiambocquin naid tauadoacsho isun, Nuquin Papa yacno ěbi yuedte ushē chote anoentsēqui yanec, quequin bēdambocquin abuc isteneta — quepanēdash Esus.

29 Aden chuishumbic ambi chuiboed ushē chote tantiamenuen nadopanēdash:

30 —Cuētempi bacuēacsho isash, Ĕnden suc seccuduquiac nēbi seta taēec, quequin matsesēn tantiec.

31 Adembidi ěmbi chuiboed icsho isun, Nuquin Papabēd tabadte ushē choec, quequin mimbi tantiec.

32 Abimbo chiembique. Tantia. Ĕmbi chuibamboed naimbudabicnuc con tan matses isadaidbo naimēdbudenquoio iquendac.

33 Abubēdta naimbudtequid nidaid nendac. Ĕmbi chiaid abimbo iquendac.

34-35 “Adembidi chuinu. Tantiata. Nidaidēn capuquidēn, Nēbi ěbi sec, quequin tantienquoio yec capusho badedquoio siac cuentiapimbo iquec. Adembidi, Natiate ushē choec, quequin tantienquoio yec chieshquin badiadquidēn-badiadquidēnquien paēmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushē choendac. ¿Matses-tedi cuidte ushē choenda ictic? Ai, aid ushē choendac, quequin caimbudec bēdamboec tabadta.

36 Ĕnenquiocquin aid ushē chote caimbunec tabadquin Nuquin Papa naden chuidoneta. Chieshmane mibi tantiaquidquoio ěbi icme, Papa. Adembidi natiambocquin cuidte ushē chonoshe qeshun ěbi mēnchicta, Papa. Aid ushē

chonoc ëbi bedshun mimbi chomiac matsesaidën dayun tsadquidquo ëbi icmeta, Papa, quec onquedeneta –capanëdash Esusën.

³⁷ Aden chuishumbic, badiadquidën-badiadquidënnuquen Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënnuquie macuësh Odibos caid yacno nidash tabadtenepanëdash.

³⁸ Adembidi, badiadquidën-badiadquidënnuquen Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

22

Esus bedmenu, quequidquo Udas

(*Mat 26.1-5, 14-16; Mad 14.1-2, 10-11; Uan 11.45-53*)

¹ Adashic, nami uabicquid pete tantiate ushë, Pascuas caid, anoentsëquin yampanëdash.

² Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquo icpanëdash.

³ Adnubien Udas cashumbic Iscadiote caid Esusbëd icquid dapuedeshun Satanasën tantiamiac

⁴ Esus chieshënnuquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënnuquid utsibo iquec quianec aido yacno Udas chöash, Esus bedmete bunebi, quequin chuiapanëdash.

⁵ Aden chiac isadaidbo tsusiobo bëdambo iquebi quetanquin: –Esus bedmiacsho mibi piucquid menenu –capanëdash Udas chuiquin.

⁶ Adoaquien: –Adonuna –quianec Esus yacno nidoash abëd capuquimbi Esus tantiec datsidquido nibëdacnoshon abi chieshënnuquido, isadaidbo tsusiobo, Esus bedmembu, quequin isted-istedpanëdash Udasën.

Ënquin nidaidënnshun Esusën pebanaid

(*Mat 26.17-29; Mad 14.12-25; Uan 13.21-30; 1Cod 11.23-26*)

⁷ Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe queshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash.

⁸ Aid ushë chonoc Uambëdta Petedo chuiquin: –Matante ushë tantianuequin obeca bacuë cuesuniaid penun nacnenta –capanëdash Esusën.

⁹ Adoaquien: –¿Mitsishumbimbi aid nacnempe? –quepanëdash Uambëd Petedo.

¹⁰ Adoaquien: –Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananeac shubun aid puduedacno nidshun

¹¹ shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëd tan pepe? quiosh Esus, quequin chuita.

¹² Aden chiac abuc dectatoshon abuc quënnëcquid mibi aidëmbi ismendac. Ashunquo penun nacnenta –capanëdash Esusën.

¹³ Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempañdash.

14 Adashic, inchëshën choash abëd icquidobëd pete sante cueste dayun uequi Esus:

15 –Èbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquio yanobi.

16 Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquio iquendambi. Matses icsaquid icsho cuidnushe qeshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi – quepanëdash Esus.

17 Adoshombic dëshote sananec Nuquin Papa chiec onqeshun actanquin abëd icquido menec: –Në, aniactse-aniactsen acban mibitedishun.

18 Tiedën caniquid ënë nidaidëshun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi – quepanëdash Esus.

19 Adoshombic, pete bedshun Nuquin Papa chiec onqeshun cuësh-cuështanquin menebanquin: –Mibi icsaid bedshunacsho ëbided cuidquin mëyanquin cuesuniaid tantiaquin pebeded –capanëdash Esusën.

20 Adoshombic pete utsi petanquin dëshoten sicaid cushtoshon menec: –Ënden, Icsambocquin naombi, qeshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe qeshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esuseded cuidadac, quequin tantiatequidquio nendac.

21 Èbi chieshënquido ëbi bedmenuequin chuiquid pete sante dayun ëbëdi uec.

22 Nuquin Papan chiampicpaden ëbi matsesacsho unës uaid iquendac. Èbi chieshënquido bedmenuequin chuiquid comapenen cuidte iquendac – quepanëdash Esus.

23 Aden Esusën chuisho tantiash abëd icquido: –¿Midacquidien capec? – quecuededpanëdash.

24 Adashic: –Doseted nuqui iquec. ¿Tsudain chuiquid icpec? quequin utsibon ispec –quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash.

25 Adec chushcanansho tantiash Esus nadpanëdash: –Isadaidpembo ancaquidën comapenen aton matses namebanquin daëdpactsëc menebanec. Aden meneshun, Èmbi namiaido bëdambo icmequid nebi, quequin muaquin chiec.

26 Mibitedi adquid iguenda. Nadquidquio icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta.

27 Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi.

28 Èbi chieshënquido icnuc ëbi nianesa

29 icsho con Pan ëbi chuiquid icmiacpadquid chuiquid mibitedi icmendambi.

30 Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac – quepanëdash Esus abëd icquido caic.

*Esus ëmbi isacmaid nec, quequin Petedon chiaid**(Mat 26.31-35; Mad 14.27-31; Uan 13.36-38)*

³¹ Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquoio iquec. Aden yuaneuquin piacho macuesquin nainshun bitsi secacimboen mëyantannique ëbëd icboedi mibi cuëshëdmetiadquoio iquec.

³² Aden mibi Satanasën yuatiadquoio iquec, quequin tantiaquin Nuquin Papa naden chiombi. Simon ëbëd icquidquoio iqueque. Yuadnushe queshun Satanasën niac-niacmete chiaid Petedo tantienquoio icmeta, Papa, quequin chiombi. Adec ëbëd icboedi cuëshëdtsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

³³ Adoquien: —Mibi caic, Quënën nauednu, quenuc mibëdi nauedadebi. Adecbidi mibi caic, Unës uanu, quenuc adecbidi mibëdi unës uadebi, Icbo —quepanëdash Petedo Esus caic.

³⁴ Adoquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

Buanenda, queboedëmbi, Buanta, quequin chiaid

³⁵ Aden Petedo chuishumbic abëd icquidtedi chuiquin: —Mitsana bedtequid buanenquoio yec shictoachte buanenquoio yec dashcute utsi buanenquoio yec quec nidaneta, ëmbi cac nidash çmibitedi bunecta tabado? —capanëdash Esusën.

Adoquien: —Padenquoio —quepanëdash abëd icquido.

³⁶ Adoquien: —Ënden adquid buanenda, queboedi, Ëbi nibëdnuc mitasana bedtequid shictoachtebëdtabi buanta. Chështe bednu, queshun mitasana bedtequid nibëdnuc min dashcute abentsëc menequin chështe bedshun adembidi buanta, caimbi nëbi.

³⁷ Nuquin Papan ëbi chuiquin dada uamiampid nad iqueque. Tantiata. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

³⁸ Adoquien Esusën chuiboed tantienquoio yec abëd icquido: —Në, chështe daëd iqueque. Is, Icbo —quepanëdash.

Aden abëd icquidon tantienquioscho isash: —Ai, padi —quepanëdash Esus.

*Macuësh Odibos caid yacnoshon Esusën Nuquin Papa chiaid**(Mat 26.36-46; Mad 14.32-42)*

³⁹ Adashic, Edusaden caid yacnoësh macuësh Odibos caid yacno abi nidte-niacpadën nidnuc abëd icquidon tsibanampanëdash.

⁴⁰ Adec nidequi abi tabadteniacno choshon Esusën: —Chieshëmënkuidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin.

⁴¹ Aden chiashic abiuidsëqui uano nidash danëshën nidaidën sebudash Nuquin Papa chiech nadeq yuec Esus onquetan-onquetampanëdash:

⁴² —Mëyantannique mibi unës uanu, ëbi chieshënquidon casho tantias bunenquoio yec, Adoenda, quepatsiac mibi Papa. Adoshombic mibi bunacpadom-bonen nameta, Papa —capanëdash Esusën Nuquin Papa chuiquin.

⁴³ Aden Esusën baded-badedquien chuishobi Nuquin Papan uaid mayan bëda choshon Esus chieshtomenquoio icpanëdash.

⁴⁴ Aden uidën uaqui adec uëshquec Nuquin Papa chuiquiequi ichachëd intacash nidaidën siquepanëdash.

⁴⁵ Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uestho istuidshun:

⁴⁶ —¿Atotsi quiaish ushe? Nidtoashon ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

Esus bedaid

(Mat 26.47-56; Mad 14.43-50; Uan 18.2-11)

⁴⁷ Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchocuanesho isash:

⁴⁸ —¿Ëbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

⁴⁹ Aden Udasën nac Esus bednuesho isash Esusbëd icquido: —¿Cho-choquido nuquida cuesten cuespe? —quec

⁵⁰ onquetanquin abentsëcshun isadaidbo tsusio dapan yuan pabiate opioc pateshunepanëdash.

⁵¹ Adosho isash: —Padi. Chën. Adoenda —quetanquin Esusën tsusio dapan yuan pabiate patiacno mishquin bédamepanëdash.

⁵² Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëda tsusio utsibo cafc: —¿Matses cuëshëdmequid nec, qeshunda utsin-utsinquien chështe sananubi utsin-utsinquien cueste sananec cho-chopec?

⁵³ Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquiobi nendac. Satanën tantiamiacpaden utsibo ismenquocquin inchëshëmbi mimbi icsa uanuen ëbi bedendac —quepanëdash Esus.

Ëmbi isacmaid nec, Petedo quiaid

(Mat 26.57-58, 69-75; Mad 14.53-54, 66-72; Uan 18.12-18, 25-27)

⁵⁴ Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash.

⁵⁵ Adec choec umanuc cuëte dëtsiadaid cuëec utsibo tabadacno Petedo cuëte cuëec tsadpanëdash.

⁵⁶ Ambo Petedo tsadsho isash tsusion yuaid chido anoentsëqui choshon bédamboen isec: —Nëid bëboedbëd icboedi nec —quepanëdash.

⁵⁷ Adoaquien: —Bëboed ëmbi isacmaidquio nec —quepanëdash Petedo.

⁵⁸ Adashic, yuecpectsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquio iccobi —quepanëdash Petedo.

⁵⁹ Adashic yuec-yuecpectsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queoapanëdash.

⁶⁰ Adoaquien: —Mimbi chiaidbëd icquidpenquio nebi —quepanëdash Petedo. Aden chuinubien cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiaish

⁶¹ Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiaish

⁶² unësquio yec umanuc nidash Petedo shubiquiopanëdash.

Esus sondadon mamëshunaid

(Mat 26.67-68; Mad 14.65)

⁶³ Adshumbic Esus cuenushe qeshun abi isquidon, sondadon, Esus mamëshumbedequin cuesbededpanëdash.

⁶⁴ Adoshombic, dashcute cuëshaidën bëpucshun cuestanquin Esus son-dadon nadopanëdash: —Mibi tantiaquidquo icquin çmidaquidën mibi nëbi cueseque. Tantiyanu. Chui —capanëdash Esus chuiquin.

⁶⁵ Aden cuesbededquin Esus icsamboen chuiapanëdash.

Isadaidbo tsusiobo yacno Esus buanaid

(*Mat 26.59-66; Mad 14.55-64; Uan 18.19-24*)

⁶⁶ Adshumbic badiadnubi isadaidbo tsusiobo iccuededacno Esus buan-shun

⁶⁷ nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tantiyanu. Chui —quepanëdash isadaidbo tsusiobo Esus caic.

Adoquien: —Ëmbi abimbo chuisho mibitedishun tantienquio iquendac.

⁶⁸ Ademibidi, çMitsipadquidquo Nuquin Papan chomiaid neque? Tantiyanu. Èbi chui, cac ècbedenquio mimbi iquendac.

⁶⁹ Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquio Nuquin Papan dayunquio tsadendabi —quepanëdash Esus isadaidbo tsusiobo tantiamequin chiec.

⁷⁰ Adoquien: —çNuquin Papan madombobi nebi, quequinda chio? —quepanëdash isadaidbo tsusiobo Esus caic.

Adoquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹ Adoquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquio iquembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

23

Pidato yacno Esus buanaid

(*Mat 27.1-2, 11-14; Mad 15.1-5; Uan 18.28-38*)

¹ Aden ambibi chiec Esus muc nec, isadaidbo tsusio abentsëc qesho tantiash isadaidbo tsusiobotedi nidtoshon Esus bedshun Pidato yacno buapanëdash.

² Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

³ Adoquien Pidato: —çIsadaidbo chuiquid dapada ne? —quepanëdash Esus caic.

Adoquien: —Mimbi chiaidquio abimbo iquec —quepanëdash Esus.

⁴ Adsho tantiash: —çAtotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵ Adoquien: —Ambi tantiamiaidënquio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiameoaposh —quepanëdash isadaidbo tsusiobo Pidato caic.

Edodes yacno Esus buanaid

⁶ Aden chuisho tantiash: —çNidaid Cadidia yacnoësh choquidta Esus nec? —quepanëdash Pidato.

⁷ Adoquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno

Esus buamepanëdash Edusaden yacno Edodes choash tabadec, qesho tantiashun.

⁸ Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquo nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec

⁹ Esus chuimenu quec Edodes onquepanëdash. Adoaqui Esusën ëcbedenquo icpanëdash.

¹⁰ Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec.

¹¹ Adoac Edodesbëd sondado Esus icsamboen chuiquin mamënsumbededshumbi chuiquid dapan dashcutebimboecquid abichobicquid Esus dasiuinshun Pidato yacno buameoapanëdash.

¹² Mimbi tantiapaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

Esus cuesten dectameta quiaid

(Mat 27.15-26; Mad 15.6-15; Uan 18.39-19.16)

¹³ Adashic, isadaidbo tsusiobobëdta isadaidbo utsibo chomeshun

¹⁴ Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioic. Adoac aibdëdi onquiash, ¿Cuëshëmianquidta nedic? quëndabi.

¹⁵ Aden ëmbi tantiapadomboen tantiaquin Edodesën ëbi yacno chomeoaposh. Esus unës uainquioctiadquidi nec.

¹⁶ Aden tantiaquin mëyanshun aidi nidmenuna —quepanëdash isadaidbo tsusiobo caic.

¹⁷ Aden chiac naden isadaidbon tantiapanëdash. Setan-setanguien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo nadec cuëdcuededquin:

¹⁸ —Nëid Esus caid unës uatiadquidi nec. Mimbi quënën nauednëdaid Badabas cuëmëdquid pudumeta —capanëdash comapenec cuëdcuededquin isadaidbon.

¹⁹ Ancanquid bunenquiocquin utsibo cuëdcuededmiondaid utsi cuesuniondaibidi Badabas icsho quënën nauedmepanëdash.

²⁰ Adec isadaidbo cuëdcuededsho tantiash Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

²¹ Adnubien: —Cuesten dectame —capanëdash isadaidbon yuec comapenec cuëdcuededquin.

²² Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantanu. Ma unës uainquioctiadquidi neyoc. Aden tantiaquin mëyameshun Esus nidmimbi —quepanëdash Pidato.

²³ Adoaqui: —Cuesten dectame —quepanëdash cuëdcuededoic isadaidbo Pidato, Ai, camenuc.

²⁴ Adoac iccuededquidon chiacpaden namenuc

²⁵ Pidaton: —Utsi cuesuniondaid Badabas pudumeshun Esus cuesten dectameta —capanëdash Pidaton cuesten dectamënquido chuiquin.

Esus mëyanaid

(Mat 27.32-44; Mad 15.21-32; Uan 19.17-27)

²⁶ Pidaton, Esus cuesten dectameta, cac sondadon abi dectante cueste Esus buamequimbi Simon. Sidene yacnoshon tishaid, chosho bèqueduidtanquin Esus dectante cueste Simon buamiac Esus tsibambëpanëdash.

²⁷ Adec Esus nidsho isun matses dadpeshun shubiquin tsibanampanëdash. Adembi abi tsibanquid chidobo icpanëdash.

²⁸ Adec chidobo abi tsibanec shubisho tantiash bidiadshun isec Esus: —Èbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuededta.

²⁹ Yuecash mëyantequid ushë choendac. Aid ushë chonoc bacuë tishtipimboquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.”

³⁰ Mëyantequid ushë chonoc matses utsibon natiambocquin mëyanaquin naden mimbi Nuquin Papa chiendac:

“Natiamianqueque. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

³¹ Èbi buansho isec shubiequi, Èbi mëyantequid ushë choec, quequin tantiesa mibi icpec. Nëdënquenquioctiadquidi achuëshquioquid nëdëncasho isash: “¿Tanunquocquid badedquio nëdënquenquio icpec,” quecta mibi icti? Adembi: “Cuidenquioctiadquidi nec,” queboedëmbi ëbi icsaisa unës uasho isash: “¿Èbitedi icsambocquid comapen cuidenquio icpec,” queoapecta mibi ique? Ai, quequin tantiatiad —quepanëdash Esus.

³² Adnubien Esusbëdta icsambocquid dada daëd nidmequimbi

³³ macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash.

³⁴ Dectanac diadequi Esus Nuquin Papa caic: —Èbi unës uanuequidon tantienquocquin unës uainquioctiadquidi cuesten dectanoshibique. Aidon icsamboen nambo yacbimboec bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempï puduemebanquin isquin Esusën dashcute bedbampänëdash.

³⁵ Adnubien matses dadpeshun isnubi Isadaidbo tsusiobo isec tabadquin mamënschumbedec: —¿Utsi-utsien Nuquin Papa yacno yuedanquidta nec? Aidi matses mënichitequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

³⁶ Adembi sondadon mamënschumbedequin paëmbocquid mucambocquid sananquin Esus ismequimbi:

³⁷ —Isadaidbo chuiquid dapa iquec unësenquio iquebi, quiaash nëid bednush bud —capanëdash sondadon.

³⁸ Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

³⁹ Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

⁴⁰ Adec Esusbëdta dectamboed abentsëc onguesho tantiash aibëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe?

⁴¹ Icsamboen nabanacsho cuidaid ëbi daëdi nec. Aidi bëdambocquin nabanquid icsho cuidenquioctiadquidi nec —quepanëdash.

⁴² Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

⁴³ Adoquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi iquendac —quepanëdash Esus abëdta dectamboed abentsëc chiech.

Esus unësaid

(*Mat 27.45-56; Mad 15.33-41; Uan 19.28-30*)

⁴⁴ Adec onquenubi ushë cuembo yanuc bëtinaçbimboec inchëshquio yashic ushë budtsan chënquedoapanëdash.

⁴⁵ Inchëshquio icnubi Nuquin Papa tabadte shubu uashunaid yacno puduedtemaid quënën dashcute bitsipambocquid tsincabudquin dectanëdaid tembi daëdquio yec canchedbudcuempanëdash.

⁴⁶ Adnubien unësbudec comapenec cuëdec: —Mibi yacno ëbi yuedta, Papa —quiash Esus unësbudpanëdash.

⁴⁷ Adec Esus unëso isequi ambi isboedtedi tantiaquin Nuquin Papan naid chiech sondado chuiquid: —Abimbo chiosh. Cuesten dectanaid Esus caid bëdamboequid niosh. Aidi unësenquioctiadquidi unës uaposh —quepanëdash.

⁴⁸ Ambo tabadquin isquid utsibo Esus unëso isash unësquio yec aton shubuno nidanepanëdash.

⁴⁹ Aido nidnubien nidaid Cadidia yacnoësh choshon chidobon Esus tsi-banamboedon dadabëdtambi uano tabadquin isbededpanëdash.

Esus nauedaid

(*Mat 27.57-61; Mad 15.42, 47; Uan 19.38-42*)

⁵⁰ Adnubic, ambobi dada, Ose cuëmëdquid, isadaidbo tsusio utsibobëd iccuedquid abentsëc bëdamboequid icpanëdash.

⁵¹ Isadaidbo tsusio utsibo, Esus unës utiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquio icpanëdash.

⁵² Aidi Esus unëso isash Esusën dada nauedtiadquio yec Pidato yacno nidshun ambi tantiacpaden Osen chuipañdash.

⁵³ Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquio Esus Osen badedquio nauedpanëdash.

⁵⁴ Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

⁵⁵ Adnubien: Nauednu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash.

⁵⁶ Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnenash inchëshbudtsëqui seis icnu Nuquin Papan chiacpadeç chonoadtemaid ushë nec, quiash Esus nauedacno nidenquio yec tabadpanëdash. Nuquin Papan chiacpadeç tabadpanëdash.

24

Esus uincuenta

(*Mat 28.1-10; Mad 16.1-8; Uan 20.1-10*)

¹ Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus naued-bocno isec chidobo nidpanëdash.

² Ambo choshon Esus nauedshun bëtashaid cuënote shëcniacsho isashi

³ shëcuën puduedash aton Icbo Esusën dada nibëdsho isec tabadpanëdash.

⁴ Adec tabadnubien dada daëd dashcute dasiuidacimboec dasiuidash chënquec chopanëdash.

⁵ Aid isash dacuëdcuedequisenquo yec chidobo tabadpanëdash. Adsho isash dada daëd: —¿Atotsi canuen unësacsho nauedac uincueniaid nibëne?

⁶ Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco?

⁷ Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoabi,” quequin Esusën chiondash —quepanëdash dada daëd chidobo caic.

⁸ Aden chiac chidobon Esusën chiaid abi bëpiscudaid padpiden tantia-panëdash.

⁹ Aden tantiaish Esus nauedaid shëcuë yacnoësh puduenanec Esus tantiaquid dadpen tabadacno choec puduedshun ambi isboedbëdtabi ambi tantia-panëdash.

¹⁰ Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Èbi chuibeneta caido chuipanëdash.

¹¹ Aden chuisho tantiaish: —Mimbi chiaid tantiatipimbo iquebi —quecuededpanëdash iccuededquido.

¹² Adnubien Petedo nidtoanec titinguec nauedaid shëcuë yacno choash shuebudquin shëcuë anisquin dataniaid dashcuteuidi uesho ispanëdash. Aden isanec nidequi: —¿Atodain nechitec? —quepanëdash Petedo tantienquo yec.

Emaus yacmi nidte (Mad 16.12-13)

¹³ Adashic abi ushëmbi Edusaden yacnoësh utsibobëd iccuededboed dada daëd shubu daëdpactsëc icquid Emaus caid yacno nidpanëdash.

¹⁴ Adec nidequi ambi Edusaden yacnoshon isboedbëdta ambi tantia-panëdash.

¹⁵ Aden chiec onquec nidshobi Esusën aid daëdi chinunash aidobëd nidpanëdash.

¹⁶ Aden abi chinuntuidsho isac utsibimboec Esus isadpanëdash.

¹⁷ Adec nidequi Esus: —¿Atotsi chuibanec onquec nide? —quepanëdash. Adsho tantiaish unësquo yec mamënenquo yec nidtuidpanëdash.

¹⁸ Adec nidtuidash Quëdeyopas cuëmëdquid: —¿Edusaden yacno tabadtu- idquin anoshon naboed mimbiuidtsëqui tantiamboda icco? —quepanëdash Esus caic.

¹⁹ Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiaid icquin ambi chuibanaiid ambi nabanaidbidi Nuquin Papabëdtan matses dadpenunshun bëdamboen isaid icpash.

²⁰ Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh.

²¹ Nëbi chuiquid dapa isadaidpembo iquenquicpashun, quequin Esus isadaidbo yec isadaidbo chuiquid dapa ictsiash quequin ëbitedishun tantia-panëdash. Èmbi caboedi unës uaposh. Aidi unës uan daëdec ushobi.

²² Adec daëdec ushun dacuëdanquiecnuc chidobon naden chuibededpash: “Esusën dada nauedbocono badiadnuc nidshun isac

²³ nibëdosh. Ambobi icnubi Nuquin Papan uaido mayan bëdabo daëd ischo isac, 'Mimbi nibënaid nibëdec. Uincuenac,' quiosh," quequin chidobon chuiposh.

²⁴ Aden chidobon chuisho tantienquo yec ëbëd icquido Esusën dada nauedocno nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

²⁵ Adoquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiadon dada uampid bëdiactsëc tantiatsec tantiesabidi ma mibi neyoc.

²⁶ ¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus.

²⁷ Aden chuibanquin Moisesën dada uampidbëdtabi Nuquin Papan ambi yuechshun nanun chiaid chuimiadon dada uampid tantiamequin Esusën chuibanpanëdash.

²⁸ Aden chuibanequi shubu daëdpactsëc icquid Emaus caid yacno anoentsëqui choshon datanshobimboecnuc Esus isun:

²⁹ —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

³⁰ Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash.

³¹ Aden nasho isun badedi, Esus nec, quequin tantianubi Esus nibëdquo yampanëdash.

³² Adsho isash: —¿Podquedën choquin Nuquin Papan chiaid dada uampid chuisho tantiasch, Bëdambo yanobi, quenquiodabi ëbi daëdi ictio? —quepanëdash Esus yuedquido.

³³ Aden chuitanequi shubu yacno choaed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash:

³⁴ —Abimbo iquec. Nuquin Icho uincuempaccosh. Uincuenanec choquin aidëmbi Simon ismetuidposh —quepanëdash iccuededquido.

³⁵ Aden iccuededquidon chuisho tantiaschun Emaus yacnoësh choaed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

Abëd icboedo yacno Esus chote

(Mat 28.16-20; Mad 16.14-18; Uan 20.19-23)

³⁶ Adec onquedednubi nënantanquo choshon Esusën: —Nuquin Papan bëdamboen isaïdo yec dacuëdenquo yec tabad —capanëdash.

³⁷ Adec aid chosho isash: Podo bitsi nec, quec dacuëdequi abëd icquido tabadpanëdash.

³⁸ Adsho isashien Esus: —¿Atotsi quiasch, ¿Esusida nepec? mibitedi quepe?

³⁹ Con mëdantebëdta con taë is. Èbibi nebique. ¿Mëtoccaid taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

⁴⁰ Aden chuitanquin abi bëchshun shuin mëtoccoaid chiuë aton mëdantebëdta aton taë Esusën ismepanëdash.

⁴¹ Aden ismiac, Aidquiobi nec, quenquo yec abëd icquido mamëncuededquin isec bëdambo yanec, Adec uincuentequidshenda dactiapaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien

⁴² nuëcquid shëaid cuëshë menepanëdash.

⁴³ Aden meniac bedshun Esusën pepanëdash abëd icquidon isnubi.

⁴⁴ Aden piash: —Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi —quepanëdash abëd icquido tantiamenuc.

⁴⁵ Aden chuishumbic abëd icquido tantiamequoquin:

⁴⁶ —Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqui daëdec ushash uincuenendac.

⁴⁷ Aid tantiashun mibi icsaid mimbi ënsho isash, Icsaquid nec, quenquo yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanöaindac.

⁴⁸ Mëyanquin unës uaqui ëbi uincuenacsho mibitedishun ispoc.

⁴⁹ Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanëdash Esusën.

Esus abuc indote

(Mad 16.19-20)

⁵⁰ Adashic, bëyucanec nidequi Betania yacno anoentsëqui choash nidtuidshun aton mëdante abuc sananquin ismec: —Nëidtedi bëdamboen ista, Papa —quepanëdash Esus.

⁵¹ Aden chiacsho abëd capucuenequido niamequin Esus aton Papan abuc indopanëdash.

⁵² Aden indosho isash, Èbitedishun icbo nec, quequin ismec shuebudash: —Bëdambo iquebi —quianec Edusaden yacno nidanepanëdash.

⁵³ Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nitted-nittedquin Nuquin Papan naid chuidenepanëdash.

Padi. Aiteded dada uaombi, Teyopido.

UANËN DADA UAID

Nuquin Papa tantiamanquid chiaid

¹ Èndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquibidi yec: —Nadquio Nuquin Papa iquec —quec tantiamanquidquio nec.

² Aidëmbi Nuquin Papabëd icquin

³ abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec.

⁴ Aidquio Nuquin Papa yacno tabadmianquid nec. Nuquin Papapadquidquibidi yec: —Nadquio Nuquin Papa iquec —quequin paposhquiabimboencuc tantiamanquidquibidi Esus nec.

⁵ Adembidi matses ambi icsamboen naid tantiamequid nec. Adquid icquin: —Con Pamboen bëdamboshë icquidquio nendac. Aidën chiaid niacniaquec mibi icsamboec tabadec —quequin chuisho tantiatiapimbo icquin matsesën Esus chieshëmpondash.

⁶ Aden Esusën chuibeniabi icnuc con shënisio acten mentoanquidëmba Nuquin Papan chiacpadomboen ambi chiaid chuibampondash.

⁷ —“Nuquin Papa yacnuësh abi tantiamequidquio choendac,” quequin Uanën chuibansho tantiasun ma dadpeshun ambi chuiboed tantianu —quequin Nuquin Papan con shënisio abí chuibanquid icmepanëdash.

⁸ Nuquin Papa yacnuësh choacmaidëmbi con shënisio: —Nuquin Papan chomiaid Esus nec —quequin chuibampondash.

⁹ Aden ambi chuiboedquio Nuquin Papa tantiamenuec matsespanëdash Esus.

¹⁰ Adash matsesbëd tabadsho ambi matses uaidombi tantienquio icquin chieshëmpondash.

¹¹ Aden con matses isadaidbon Esus tantienquio iccondash. —Isadaidbo con matses nec —Nuquin Papa quenëdacpadquiec: —Isadaidbo con matses nec —queoapondash Esus. Adsho ambi con matses caidonquiobi dadpeshun Esus tantienquio icpondash.

¹² Utsibombien daëdpactsëcshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanëdash.

¹³ —Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padenquio. —Nuquin Papan mado nebi —quequin ¿ambembi chuiquidta con mado capanëdash? Padenquio. Nuquin Papan Mayanën tantiamiacpadomboen aton Madombo Esus tantiasho dada con mado caquin chido con champi capanëdash. Adembidi Esus tantiasho adoendac.

¹⁴ Adec Nuquin Papa tantiamequidquio Esus matsespanëdash. Nuquin Papan Mado abentsëqui yec bëdamboshë icpondash. Èbëd tabadquin nada-tiambo icquin nabanquin matses bëdamboen nashumbampondash. Aden Nuquin Papambo tantiamequidquio Esusën.

¹⁵ Aid con shënisio chuipondash. —Èmbi chuiboedquio nec. “Èbi icsaquid icnuc bëdamboshë icquidquio choec,” èmbi caboedquio nec. “Èmbia Nuquin Papan chiaid chuibambon aidëntsen tsyuec choshon chuibanendac. Èbi bëyuc tishaidi tishabi icnubi aid ènden icpampic,” èmbi caboedquiobi Esus nec —quepondash con shënisio.

16 Con shënision chiacpadquidquio icquin abi tantiaquido Nuquin Papan bédamboen isaido icmeshun adenuidi Nuquin Papa nuqui bédamboen ismec.

17 Ēndenquimboshë Nuquin Papan chiaid dada uaquin Moisesën Nuquin Papan matses icsaido cuidte tantiamepampic. Padnuen Esuquidistun Nuquin Papan bédamboen iste tantiamequin: —Nadquio Nuquin Papa iquec —quequin matses bédamboen tantiamepondash.

18 Ambi isacmaidquio icsho matsesën Nuquin Papa bédamboen tantiatipimbo iquec. Padnuen aton Mado abentsëcshunquio aton dayun tsadquidënuobi matsesun Nuquin Papa bédamboen tantiamepondash. Aidquio chuinu. Tantia.

Tsusiobon chuimiac Uan acten mentoanquidën chiaid

(Mat 3.11-12; Mad 1.7-8; Duc 3.15-17)

19 Con shënisio Nuquin Papa tantiabenuid acten mentobenequid niondash. Aden acten mentobenesho isash Moisesën chiampid namequido aid chuimenuet cho-chopondash. Edusaden yacnocquido isadaidbo tsusiobon: —Chuimiac —cac cho-choquin con shënisio chuituidpondash.

20 —¿Tsumtsin chiac nai? ¿Mimbembida nai? “Bédamboshë icquidquio Nuquin Papan chomendac,” quequin nuquin tsusedpan ¿dada uapampidta ne? —cauidpondash. Adoquien: —Padenquio. Aidpenquio nebi —quepondash.

21 Adshobien: —¿Tsumintsi ne? ¿“Naden naindambi,” quequin Nuquin Papan chiaid chuibanquidquio unëspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: ¿Tsumintsimbo ne? “Moisespadquidquio choendac,” ¿capampidta ne? —caquien: —Padenquio. Aidpenquio nebi —queoapondash con shënisio.

22 Adshobien padpidemboen: —¿Tsumintsimbo ne? ¿Mimbenquiobienda nao? Ēbi: “Chuimetan,” caboed chiec nidnu. Baded ëbi chui —caquien:

23 —Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bédamboshë icquid chomiabi icnuc aid bëyuquec utsiba choendac. Aidën shubu nibëdacno capucuenequin chuibanendac naden.

‘Chuiquid dapambo choeque. Podqued andëdbanshunta,’

quiachimboen chuiquin: ‘Nuquin Icho choeque. Icsaid ënash bédamboec tabadta,’

quequin chiendac bëyuc choshon,”

quequin chuipampid nebi —quepondash con shënisio.

24 Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shënisio chuituidpondash.

25 —Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquio icquin acten mentobano?” mibi caimbi —caquien:

26 —Nuquin Papan chiacpadomboen abi tantiabenuido acten mentobenec nebi. Ēbi aden bédamboen nanuc utsimbien bédamboenshë naindac. Aidi mibëdi tabadshobi ma mimi tantienquio icboc.

27 Ēmbia Nuquin Papan chiaid chuibanombi. Aidëntsen tsyuec choshon comapenen tantiaquin Nuquin Papan chiaidquio chuiquin Nuquin Papan tantiamendac. “Aidi bédamboshë icquid icnuc ëbi icsaquid icsho ¿atotsieshun: ‘Aid choec,’ quequin chuiquidquio Nuquin Papan icmiosi?” quec tsadebi —quepondash con shënisio padiseyobo chiec.

28 Acte Odan caid uquë cuëmatsiucueësh shubu dadpen icquid Betania caid yacnuësh adpondash.

Abided cuidadtequid nendac, Esus caid

²⁹ Badiadshun padpiden con shënision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquo obeca bacuëbimboecquid choeque. Aidi isadaidbon obeca bacuëded cuidquin unës uacimboc matses icsaid bedshunec abided cuidadec unësendac.

³⁰ Èmbi chianeboedquo nec. “Èbi bëyuc tishaidi tishabi icnubi aidi ènden icpampic,” quiaish: “Èbi bédapabi icnuc bédamboshë icquidquo choendac,” quepobi.

³¹ Aid chosho con matses isadaidbo tantiamenuen Nuquin Papan acten mentobenequid icmiondashi. Adondaideñbi èmbibi badedquo tantienquo iccombi. “Nuquin Papan chomiaid nec,” quequin tantienquo iccombi — quepondash con shënisisio.

Esus mentoaid

(*Mat 3.16-17; Mad 1.9-11; Duc 3.21-22*)

³² Adashic abi onquec: —Nuquin Papan naden ismiac tantiabenombi. Aton Mayan aton dada nibédquiec dëbimbimboec budec: “Matsadtoendac,” quebocpadequi Esus matsadtoشو ispombi.

³³ Adsho isash: “Adquidshenda caposh Nuquin Papan: ‘Acten mentoanquid icta,’ èbi caboedën. ‘Con Mayan dëbimbimboec budec matsadtoedën abi tantiaquidobéd con Mayan tabadmendac,’ Nuquin Papan caboedshenda nepec,” quiobi Esus caic. Èmbembi tantienquo ictsenombi.

³⁴ Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquo Esus nec,” quequin mibi chiec nebi — quepondash con shënisisio.

Nëid dada uaquid Uan Esusbëdyanaid

³⁵ Adashic badiadash ambi acten mentobambocno con shënisisio nidoapondash. Aid tsibanequi nidoapondabi.

³⁶ Adec nidquin isquien Esus cuempec. Cuensho isashien con shënisisio: —Is. “Nuquin Papan namiaidquo obeca bacuëbimboecquid nec,” èmbi caboed cueneque — quepondash.

³⁷ Adsho tantiatanequini con shënisiobéd iccondaidd utsibéd Esus chinunec nidpondac.

³⁸ Nidquin chinunac bidiadquin istanequien: —¿Atotsi quec ne? — quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu —capondambi. —Chuiquidquo nec —quequin con onquetembi Dabi caondambi.

³⁹ Adoac: —En isec cho —cac abi ushacno isec nidondabi. Ushë abucquo icnuc puduedash yuec tabadec onquetaniash inchështsëcnubi chondabi.

⁴⁰ Èbëdtan Esus chinunondaidd Andedes niondash. Shubu dadpen icquid Betsaida caid yacnuësh caniquid niondash. Aton buchi Petedo niondash. Petedobidi Simon capondash.

⁴¹ Adnubien Andedes aton buchi chiec nidpondash. Adec nidquin Petedo istuidash: —Nuquin tsusedpabon chuiampid Nuquin Papa yacnuësh choquid Mesias caid istuidombique. En isec cho, buchi —capac caondash. Nuquin Papa yacnuësh choquid Quidistu cashumbic con onqueten Mesias caic.

⁴² Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaidd moco utsi uatiapimbo yacimboc mibi chieshtoengquo icquid yanendac,” quequin mibi nidaidd moco cuëndambi — quepondash Esus Petedo caic. Con onqueten nidaidd

moco cain Sepas capondash Esusën. Quidieco matsesën onqueten Petedo capondash.

Esusën Uedipebēda Natanaid istuidaid

⁴³ Badiadash: —Con nidaid Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash.

⁴⁴ Betsaida yacnuēsh caniquidbidi nepondash aid.

⁴⁵ Esusbēd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesën chiampicpadomboen chuiquin nuquin tsusedpabo utsibon: “Bēdamboshē icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuēsh caniquid neque. Osen mado nec —quepac caondash.

⁴⁶ Adsho tantiasht: —¿Nasaded yacnuēshta dada bēdambo icquid chopatiasht? Auēshquoio dada bēdambo icquid chotiapimbo iquendac —quepac caondash Natanaid. Adsho tantiasht: —En isquie cho —quepac caondash Uedipe.

⁴⁷ Adoac choshobien Esusën: —Is. Isadaidbombo neque. Muesambo nec —caquien

⁴⁸ Natanaidën: —¿Mitsipaden ëbi tantie? Mabi mimbi isacmaidquoio nepayoc —capondash. Adoquien: —Uedipen bedtanabi icnubi mibi cuēte icueda caid tayun tsadsho tantiombi —capondash Esusën.

⁴⁹ Adsho tantiashtumbien: —Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac —capondash Natanaidën: —Istiapimbo yacno chīosh —quequin tantiashtun.

⁵⁰ Adoquien Esusën: —“Cuēte icueda caid tayun tsadsho mibi tantiombi,” ëbi qesho ¿tantiashta: “Nuquin Papan Madombobien nec,” badedquoio que? Padpiden comapenen tantiaquin nabansho isun mimbi ëbi tantiaquiotsiadac.

⁵¹ Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bēdabo Nuquin Papa yacno dectatonesho isash: “Aidbēd tabadte Nuquin Papan ëbi tantiametiadquoio iquec,” quequin tantiapampicpadomboen mimbi ëbi tantiendac. “Matsesun Nuquin Papan Madon matses abēd tabadte tantiamec,” quequin mimbi ëbi tantiendac —quepondash Esus abēd icquido chiec.

2

Esusën ambembi actequid uaid

¹ Aden Natanaid chiash aton nidaid Cadidia caid yacnobi Esus tabadpondash. Ambo tabadec daēdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobēd Esusën tita puduedpondash.

² Esustsen puduedpondash.

³ Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid naimēdoshe. Comapenen tantiaquid icquin mimbi tantiacpadomboen nata, mado —capondash.

⁴ Adoquien: —¿Atotsi quequin mimbi ëbi chuipe, tita? Chiata. Con Pan tantiacpadënquoio naimbique —quepondash Esus.

⁵ Adsho tantiatanquin anin yuabo actequid cushtobanquido chuipondash. –Con madon chiacpadomboen nata –capondash.

⁶ Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash.

⁷ Adnubien Esusën: –Në tabadquidën acte cushtoban –cac cubucubuctsëcquio icnuc acte cushtobampondash yuabon.

⁸ Cushtobanacsho isun Esusën: –Ueshun buanshun mibi ancaquid acmetan –cac acmetampondash.

⁹ Adoac acquin tanaquien actequid bëdamboshë icquid icpac caondash acte icboedi. –Nibëda damboedquio ¿mitsimbo bedpash? –quepac caondash yuabo ancaquid. Adsho tantiaishun yuabon: –Esusënquiobien naccosh –quequin tantiapac caondash. Adnubien yuabo ancaquidën chido bednuequid chuipondash: –Aidën actequid bëpash –queshun.

¹⁰ –Nuquin matsesën actequid bëdambo icquidba isedanquido acmequid nendac. Adquid acmiac matses nua cubudacsho isash: “Actequid ics-actsëcquidtsen acmenu,” quequid yendac. Aden mimbi nambo. Bëdambo icquidquio ma mimbi nëbi acmianeyoc –quepondash yuabo ancaquid chido bednuequid chieac. Adnubien yuabon actequid bëdamboshë icquid abitedi acmebampondash.

¹¹ Aden comapenen tantiaquid icquin ambembi actequid uaqin Esusën tauamboen ismebempondash. –Nuquin Papa yacnuësh choquid yec comapenen tantiaquidquio nebi –quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquio. Adsho isun: –Con matsesën chiampid Nuquin Papan chomi-aidien nec –quequin tantiaabendamb.

Esusën chushcaquin cuemiaid

(Mat 21.12-13; Mad 11.15-18; Duc 19.45-46)

¹² Aden ambembi actequid uatanec nidec shubu dadpen icquid Caped-naun caid yacno Esus niondash. Aton tita yec aton buchi yec abëd icquido yec ëbi yec quec Esusbëd nidaniondabi. Ambo daëdpectsec ushec tabadondash.

¹³ Ambo ushcuidanec nidequi shubu dadpen icquid Edusaden yacnotsen Esus nidaniondash. –Nuquin matses tsusedpabo unës uainquio icquin Nuquin Papan matamiampid inchësh tantiaquin obeca bacuë pec nëbi tabadeque. Isec nidnu. Nid –quianec nidanepondash.

¹⁴ Nidashic Nuquin Papa tabadte shubu uashunaid dapa daquënë uaidën puduedondash nuntanquio puduedabi. Puduedshun isquien matses dadpen nëish yua chedobëd fabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua mnequid piucquid bednuec utsibo tabadnubi utsibo ambi tabëcaid dayun tabadpondash. Aido nidaid utsi yacnuësh choquido aton piucquid dadpen bedshun ampeshunquin daëdpectsëc menequido niondash.

¹⁵ Adec tabadsho istanquimbien Esusën cueshcate badedquio nacentanquin cuesquin niacumpondash umanuc abitedimbo. Aden umanuc niacuntanquin tabëcaidtsen bidiachbanquin piucquid siabudshumbampondash.

¹⁶ Adotanquimbic dëbimbimboecquid yuaquidotsen chushcapondash. –Baded mitsana buanec nid. ¿Piucquid bednuen shubu uaidta nedic? Ma con Pa tantiate shubu neyoc –quequin chushcapondash.

¹⁷ Adsho isun naden tantiondambi. –Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquio nendac,” quequin Esusën nate chuiquin dada uapampic –quequin tantiondambi.

¹⁸ Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme —caquien

¹⁹ ismenquo icquin ompoacimboen Esusën chuipondash. Abibi cadequi: —Mimbi nëid shubu icsa uabocsho padpiden nachenoaindambi bédambo icnuc. Daëdec ushquin nacnenquin nainendambi —quepondash Esus.

²⁰ Adsho tantiash Nuquin Papa tabadte shubu uashunaid dapa ca danec: —¿Badedquioda nacnempatsia? Nëid nacnenquin seta dadpenquioshë 46tedquiobi matamiac cadenec —quepondash con matses chuiquido.

²¹⁻²² Yuecquo ictaneshun Esusën aden chiaid tantiondambi. Ünës uacsho chococac daëdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daëdec ushquin nacnenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

Dadpeshun Esus tantiauidaid

²³ Nuquin Papa tabadte shubu uashunaid daquënë uacnoshon cuemeshumbic Edusaden yacnoshontsen comapenen tantiaquin nabanquin Esusën ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —queshun Esus bëdiactsëc tantiatsëccondash.

²⁴ Aden tantiatsëcsho ambembi tantiash: —Ai, ëbi tantiaquidquo nec —quenquo icquin: —Ëbi bëdiactsëc tantiatsec —quequin tantiapanëdash.

²⁵ Utsin chiambobi ambembi tantianëdash. Aden matses abitedishun otacquo tantiaid ambembi tantiaquidquo Esus niondash.

3

Esusën Nicodemo caid chiaid

¹ Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash.

² Inchëshën Esusbëd onquenuc chopondash. Choshombic aidëmbi: —“Nuquin Papan icmiacpadquid chuiquidquo mibi nec,” quequin tantiembi. Mimbi comapenen tantiaquin nabansho isun: “Nuquin Papan nami-aidënuidsëquien adotsiash,” mibi caombi —quepondash.

³ Adsho tantiashun: —Ai, adquid nebi —quenquo icquin Esusën ompoacimboen chuipondash naden. —Tantia. Mibi bédamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquo ictsiac

⁴ —quesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo.

⁵ Adsho tantiashun Esusën: —Nuquin Papan Mayanën tantiamiac: “Nuquin Papa tantiaquin ëbi icsaid ëntiadquo iquebi,” quiash bédamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac.

⁶ Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac.

⁷ “Chuca uaiduidtsëqui Nuquin Papabëd tabadendac,” ëbi quesho tantiash: “¿Midapaden chie?” quepequien mibi iquec.

⁸ Tantia. Mibi chuinu. Cunquequid isadenquo icquid nec. Isadenquo icquimbi cuncac cuëte ishçüdsho isash: “Abi cunquec,” mibi quepec. Adquiobidi isadenquo Nuquin Papan Mayan iquec. Isadenquo icquimbi aidën chuca uaid bédamboec tabadsho isun: “Nuquin Papan Mayanën

nac,” quequin mimbi tantiatsiac. “Nëid utsitsen natsiash,” quequin mimbi tantienquo icnubi Nuquin Papan tantiacpadomboen aton Mayanën utsitsen chucha uatsiandac —quepondash Esus.

⁹ Adsho tantiash: —¿Midapadec? —quepondash Nicodemo.

¹⁰ Adoaquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc.

¹¹ Ënden ushë utsin mibi chedo chiombi. Ëmbi isondaidquo chuiquinc ëmbi tantiondaidquo chuiquinc caombi. Adsho tantiash: “Tantiadenquo iquec,” ma mibi queboc.

¹² ¿Ëmbi chuiboed tantiadenquo icnubi padpiden chuiquin ëmbi Nuquin Papan abi yacnoshon naid chuishomenda tantiatsia?

¹³ Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Ëmbien Nuquin Papa yacnuësh chondaidënquo: “Nadquo iquec,” quequin Nuquin Papa tantiamendac.

¹⁴ ¿Atotsi canuen nuquin tsusedpa Moisesën nisibimboecnuc shocosh nacenaid dectampampic? “Nuquin Papan chiapadec ma aid isec nisin piaid bëdanu,” quequin cuesten dectampampic. Adomboembidi matses cuidmenquo icnuec cuesten dectamëdendabi ëbided cuidadec unësec.

¹⁵ Ëbi tantiaquido unësacsho cuidenquo icquin Nuquin Papa yacno ëbëd tabadmenuec adendabi —quepondash Esus Nicodemo chiech.

Nuquin Papan matses abitedi tantiaquin naid

¹⁶ Aden Esusën abided cuidadec unëste chuipondash. Nuquin Papan: —Ma adec abided cuidadec unësnu —quequin Esus chomepanëdash. —Unësquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsëccquiobi abided cuidpanëdash. —Ëmbi adoaid con Mado tantiaquid unësacsho icsaido cuidacno nidmenquo icquin ëbëdi tabadmendambi —quequin aton Madoded cuidpanëdash.

¹⁷ ¿Matses cuidnuenda Nuquin Papan Esus matsesmepanëdash? Padenquo. Matses cuidenquo icnuen napanëdash.

¹⁸ Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshëmpec —queshun.

¹⁹ Nuquin Papan matsesmiaidën Esusën abi icsaid chuisho matses icsambo icquidon tantiatiapimbo iquec. Ambi icsamboen naid ëntiapimbo icquin Esus tantiatiapimbo iquec.

²⁰ Adquidon: —Ëbi icsaid Esusën utsibo tantiamenushe. “Icsambo iquec,” ëbi canushe —queshun Esus chieshëmpec.

²¹ Nuquin Papan chiapadec tabadquidombien Esus chieshënenquo iquec. —Nuquin Papan namiapadec tabadquid nebique. Ma Esusën ëmbi bëdamboen naid chuibampanuna —quiash Esus tantiate bumpec.

Uan acten mentoanquidën Esus chuioid

²² Adec Nicodemobëd onqueboshien Esus nidpondash. Edusaden yacnuësh nidec aid nidaidëmbi Udeya caidën capucueniondash. Abëd nidshobini Nuquin Papan chiaid Esusën chuibampondash. Adec nidshun Nuquin Papa tantiabenquido acten mentobeniondami.

²³ Adnubien adomboembidi con shënisontsen acten mentobeniac caondash. Enon caid yacnoshon Sadin caid anoentsëqui chunquen diadacnoshon matses dadpen acten mentoac caondash con shënision.

²⁴ Chieshëmënuquidon quënën nauedabi adoac caondash.

²⁵ Adnubien con shënisio**b**éd icquido con matses utsibéd: —Mimbi icsamboen chiec —quec chushcananac caondash. Con shënisio**b**éd icquido: —Uanën Nuquin Papa tantiabenguido bédamboen acten mentobamposh —quesho tantiash: —Padenquio. Esusëmbien bédamboen acten mentobaniosh —quepac caondash.

²⁶ Adshumbien con shënisio**b**éd icquidon: —Nuqui chuiquid chiec nidnu. Nid —quianec nidquin con shënisio chuituidpac caondash. —Acte Odan caid uqé cuëmatsiucshun ¿mitsicquid: “Nuquin Papan chomiaid nec,” mimbi cadio? Aidën mimbi naid dëniacquin matses dadpenquio acten mentobeniac caosh. ¿Ada bēda icpec? —caquien:

²⁷ —“Nuquin Papan chiacpadomboen Esusën nash. Adomboembimbi naic,” qeshun Esus chieshëntiapimbo iquendabi.

²⁸ “Nuquin Papan chomiaidpenquieni nec,” quequin mibi chiondambi. “ ‘Nuquin Papan chomiac bédamboshē icquid choendac,’ quequin bëyuc choshon aid chiec nebi,” quiondabi mibi chiec.

²⁹ “Èmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiachimboec cuishonquepobi. ¿Aden chido bedmequidën: “Min bënëbéd nidenda,” caquinda ictiosh? Padenquio. Bënëbéd nidmiash bédambo yacchimboec Esusbéd nidanesho isash bédambo iquebi.

³⁰ Èmbibi Nuquin Papan chiacpadomboen Esus tantiamequin ënquin chuibanuc èmbi acten mentoaido daëdpactsëc yanendac. Èmbi chuiboedquio Esus tantiaquidoen dadpenquio yanendac. Aidquio bédamboshē iquec —quepac caondash con shënisio abéd icquido chiec.

Nuquin Papa yacnuësh choquid chiaid

³¹ Adshumbic con shënisio**n** aden chuipac caondash. —Esusquio bédamboshē iquec. Nuquin Papa yacnuësh choquid abipadquid utsi nibédec. Padnueni matses yec: “Nuquin Papa isondambi. Nadquio iccondash” quequin chuitiapimbo iquebi. Esusëmbien

³² ambi isondaidbēda ambi tantiondaidquio chuipec. Aden chiaqui matses dadpen: “Abimbo caic,” quenquio icpec.

³³ Esus tantiaquidon: “Nuquin Papa muesambo nec. Ambi: ‘Bédamboshē icquid choendac,’ quequin dada uamepampidquio Esus nec,” capec.

³⁴ Nuquin Papan chomiaidquio icquin Nuquin Papan chiaidquio Esusën chuibanec. Nuquin Papan aton Mayan abéd tabadmiaid icquin comapenen tantiaquin ismëbanquin chuibanec.

³⁵ Ambi tantiaidquio icsho aton Papan abitedishun Icbombo icmiac.

³⁶ Adnuc: “Abitedishun Icbombo Esus nec,” quequin aton Mado tantiaquido unësacsho Nuquin Papan abēdi tabadmendac padpidec unësenquio icnuc. Esus chieshënquidoen Nuquin Papa yacno isenquio yec icsaido cuidquiacno nidendac —quequin con shënisio**n** chuipac caondash.

4

Acte uequid chido Esusën chiaid

¹ Esusbéd icquin Nuquin Papa tantiabenguido acten mentobanondambi. Adnubien con matses chuiquido padiseyo caidon: —“Uan acten mentoanquidën naid dëniacquin Esusën matses dadpenquio acten mentobanosh,” quiosh —qeshun Esus chieshëmpac caondash.

² Esusën nainquio icnuc ëmbimbo nasho isun chiaqui aden Esus chieshënac caondash.

3 –Mibi adosh –cac: –Con nidaidën nidnu –quianec nidondash Esus. Aid nidaid Udeya caid yacnuësh nidec aton nidaid Cadidia caid yacno nidondash.

4 Aid podquedën nidequi nidaid utsi yacno Samadia caid yacno nidpondash.

5-6 Adec nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: –Ëbi unësan nëid tied: “Con na nec,” cata, mado –quequin aton mado Ose chiampid tied niondash. Ambo aidën uedëshcampid acte uete icpondash. Aid dayunquiobi: –Tiboquenu –quec Esus tsadtuidpondash.

7-8 Adec tsadtuidnubini: –Pete bedtanu –quianec shubuno nidanepondac. Esus abentsëqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusën: –Acte beccho. Acnu, champi –caquien:

9 –“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. –Samadia yacnocquidbëd onquesambo isadaidbo nec –quequin tantiec adac caondash.

10 Adshobien Esusën badedquio cuembo chienquio icquin chuipac caondash. –Nuquin Papan bëdamboen isquin naidbëdta ëbi tantiaquin: “Acte beccho,” mimbi ëbi catsiac. Adsho acte bëdambo icmianquid mibi acmetsiambi –quepac caondash Esus.

11 Adoaquien acte uequid chidon actembo ca danquin: –¿Mitsipaden acte ueshun ëbi menetsia? Ma min tëchu nibëdpayoc. ¿Midapaden mimbi uetiapimboen acte uquëducquio iquec? ¿Mitsimbo acte bëdambo icmianquid ueshun ëbi acmetsia?

12 Nëid acte nuquin tsusedpa Acobon uedëshcapampid nec. Aton yuabobëdtan aton bacuëbon acpampid nec. Nuquin tsusedpa bëdambo icquin nampid icnuc ¿mitsipadquidquio icquin nai? ¿Bëdamboshë icquid icquinda mimbi acte bëdamboshë icquid ëbi acmepatsia? –capondash acte uequid chidon.

13 Adoaquien: –Nëid acash mibi bundoaiç.

14 Ëmbi acmiac mibi bundoenquio ictsiac. Acte bëdambo icmianquid acmiac ënëdenquio yec tabadquid mibi yantsiac –quepac caondash Esus badedi cuembo chienquio yec. –Ëbi tantiaquidobëd con Mayan tabadmiac bëdambo yanec unësacsho ëbëdi tabadmendambi –quequin tantiec adac caondash.

15 Adsho tantiaşhun padpiden acte ca danquin: –Adquidquio ëbi acme. Bundoenquio yec nëmbo acte uec choenquio ictsiabique –caquien:

16 –Min bënë bedtan –capac caondash Esusën. –Nuquin Papan chomidquio yec comapenen tantiaquid mibi nec –camenuen adoac caondash.

17 –Min bënë bedtan –caquien acte uequid chido: –Con bënë nibëdec –quepac caondash. Adshobien Esusën: –Abimbo mimbi caic. Min bënë nibëdec.

18 Dada mëdante auc abentsëctedquiobi min bënë icpadenec. Aidon mibi niambudnian nëbi mibëd icquid min bënëpenquio nec. Abimbo mimbi caic –quepac caondash Esus.

19 Adsho tantiaş: –Isambobi comapenen tantiaquidien mibi nechitec. Mibipadquidquio chiec: “Nuquin Papan chomidquio nendac,” quepec con matses. Adquid icquin en ëbi chui. ¿Mitsishunquiemi Nuquin Papa bëdamboen tantiaş?

²⁰ Con matses: “Nëmboen Nuquin Papa iquec. Nëid macuësh dapanshunuidtsëqui Nuquin Papa tantiac bédambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bédambo ictsiash,” quepec —quepac caondash acte uequid chido.

²¹ Adsho tantiashun Esusën: —Tantia. Mibi bédamboen chuinu. Nëbi nëid macuësh dapanshunuidtsëqui Nuquin Papa tantienguio icquin Edusaden yacnoshonuidtsëqui tantienguio icquin nidaid utsi-utsiec yacnoshon adembi Nuquin Papa tantiabedendac.

²² Min matsesën Nuquin Papan chiaid daëdpactsëc tantiatsëcshun Nuquin Papa bëdiactsëc tantiatsec. Con matses isadaidbombien Nuquin Papan chiaid dadpen tantiashun: “Nuquin Papan chomiaid nuquin matses bédambo icmianquid nuquin matsesën tishendac,” quequin bédamboen tantiec.

²³ Nëbien utsin-utsinguien muainguio icquin: “Con Icho nec,” quequin Nuquin Papa tantiendac. Ambi chiapadec bédamboec tabadsho isash: “Adquid ëbi tantiaquidquo nec,” quetsiash Nuquin Papa.

²⁴ “Nuquin Papa tantiaquid ictiadquio iquebi,” quequidën Nuquin Papan Mayanën tantiamiacpadomboen abi tantiaquin ambi chiapadomboen naquid nendac —quepac caondash Esus acte uequid chido chiec.

²⁵ Adsho tantiash chido: —“Nuquin Papan matses bédambo icmequid chuiquid dapa chomendac,” quequin chuisho tantiondami. Aid mesias caidi utsibon quidistu caposh. Aidëmbi nuqui tantienguio yaidtedi tantiamestsiash. Aidbimboecquidien mibi nechitec —caquien:

²⁶ —Mimbi chiaidquibini nec —quepac caondash Esus chido chiec.

Esus Samadia yacnocquido chiec tabadaid

²⁷ Adnubini pete bedtanec chopondac. Adshun isquien chidobëd onquepec. Adsho isash: —¿Atotsi chiec chidobëd onquepec? —quepondabi utsibëd otacquo onquec. —¿Atotsi chiec chidobëd onquio? —cainquio iccondambi Esus.

²⁸ Adec ëbi chonobi tëchu nianec acte uec choquid chido nidpondash aton matses chiec shubuno nidec.

²⁹ —Isec cho. Èmbi isacmaid dadan ëmbi naid abitedi chioshi. ¿Nuquin Papa yacnuësh choquid Quidistu caidta nioshe? En isec cho —catuidac:

³⁰ —En isnu. Nid. Aidien nechitash. Isnu —quianec matses dadpen chopondash.

³¹ Aido choabi icnubi: —Në pete, Icho —ëmbi caquien:

³² —Padì. Mimbi tantienguio yaid con na utsi iquec —quepondash Esus petepenquio chiequi.

³³ Adsho tantiashini pete ca danec: —¿Utsibonda pete bëshumpash? —quecuededpondac ëbitedi.

³⁴ Adsho tantiash Esus: —Èbi cuishoncamete utsi iquec. Èbi chomiondaid Nuquin Papan chiapadomboen naic bédambo iquebi pete piacimboc. Ambi chiaidtedi nainuec dayacquo iquebi —quepondash.

³⁵ Adashic padpidec: —“Ushë daëd-daëdquiecnuc nidmeshun nadquid adosbiecquid ëshëacsho bedembi,” quepec nuquin matses. Adosbiecquid ëshëacpaden zyuecshunda nëmbo icquidon ëbi tantiabempec? Padenquio. “Nëidon Esus tantiendac,” mimbi cacmaidobi cho-choeque. Is.

³⁶ Acte uequid chido ëmbi chuiboedën chiac matses dadpen cho-choeque. Chuibanuna. Èbi tantiash Nuquin Papabëd tabadtequid yanendac. Adsho isash nuqui cuishonquendac piucquid bedashbimboec.

³⁷ Tied icbon: “Con na peta,” cac ambi nidtsinacmaid matsesën bedec.

38 Aden ambi nitsinacmaid bedacimboen mimbi naic. Utsibomba Nuquin Papan chiaid chuibanëdaido nëmbo icquido mimbisen chuibanec. Adoac nëmbo icquidon Nuquin Papabëdta ëbi tantiabenec. Cho-choeque. Is. En chuiban –capondash Esusën abëd icquido chuiquin.

39 Adnubien Esusbëd onqueboed chidon chuitanaido cho-chopondash. –“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashe. Isnu. Nid –quianec cho-chopac caondash.

40 Cho-choquimbi badedi: –Ëbi yacno ushquin chiec cho –quequin beduanac Samadia yacno tabadquin chuibampondash Esusën. Aid matses chiec ambo daëdec ushpondash.

41 Aden Esusën chuisho tantiashien: –Nuquin Papa yacnuësh choquid Esus nec –quiampondash anocquido dadpen.

42 Adashic acte uequid chido chiec: –Mimbi chuishouidi tantiaboedëmbi nëmbo aidënquo chuisho bëdamboen tantiaquioc. “Nuquin Papa matses bëdamboen ismeguid nec,” quequin tantiembi –quiampondash Samadia yacnocquido dadpen.

Chuiquid dapan mado Esusën bëdamaïd

43 Daëdec ushanec Samadia yacnuësh Esus nidondash. Abi caniondacno nidaïd Cadidia caïd yacno nidpondash.

44 –Ëmbi chiapaden abi caniondacnoshon Nuquin Papan chiaid chuibanquidën chuisho aton matsesën tantienguo iquec. Con nidaïdën nidsho con matsesën abi chuiquid dapa icmetiapimbo icpebi –quianec aton nidaïdën chopondash.

45 Adsho isun: –Tantiesa nendac –Esusën caboedombi abi bëdiactsëc tantiatsëccondash. –¿Choecta icco? Nuquin Papan nuquin tsusedpabo unës uainquo icquin matamiampid inchësh tantianuec Edusaden yacno nidshun mimbi nadatiambo icquin nabansho isondambi –quepondash abi bëdiactsëc tantiatsëcquido Esus chiec.

46 Adec aton nidaïdën nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caïd yacno con matses chuiquid dapa icpac caondash. Aidën mado unës-tiadtsëcquo yampac caondash.

47 Adashic: –Esus Udeya yacnuësh choac caoshe. Istanu –quianec chopac caondash unëstiadtsëcquo icquidën papa. Adec Esus yacno choshombien: –Con mado unëstiadtsëcquo iccoshe. Bëdamec cho –caqui

48 nidenquo yec abi datsidadquido chiec: –Ëbimbo mimbi tantienguo iquec. Ëmbi bëdameteuidtsëqui mimbi tantiec. Ëmbi comapenen tantiaquin nabansho isunuidtsëqui: “Nuquin Papan chomiaïdien nechitec,” quequin mimbi tantiec –quepondash Esus.

49 Adec onqueshobien abi niacbidanquin padpiden: –Baded cho. Con mado unëstiadtsëcquo iccoshe –capondash.

50 Adoaquien Esus: –Padi. Min mado unësenquo ye. Nidec nid –quesho tantiash: –Abimbo caic –quianec nidpondash.

51 Adec nidquimbi abi chuinuec cho-chosho aton yuabo bëquedac caondash. Aden bëquedaquï yuan: –Min mado bëdanosh –quesho tantiashun:

52 –¿Mitsimbo ushë icnuc con mado bëdanosh? –cac: –Ënden ushë yaquëduidtsëcnubi da una yantsëcnubi bëdanosh –quepac caondash aton yuabo.

⁵³ Adsho tantiash: —Adënquioshendabi: “Min mado unësenquoio ye. Nidec nid,” caposh Esusën —quepac caondash unëstsemboedën papa. Adshun: —Nuquin Papan chomiaidquoio yec comapenen tantiaguin nabanquidquoio Esus nec —quequin aton shubun icquidobëdtambi Esus tantiapac caondash.

⁵⁴ Adec Udeya yacnuësh choash Cadidia yacnobidi ambi uba chinaid actequid uaguin ismequin tauaondacnobidi tabadquin bédamequintsen Esusën ismepondash.

5

Esusën dada icsatsaid bédamaid

¹ Yuecquoio ictanec Esus: —Edusaden yacno cuëdënnec nuquin matses chochoeque. Nuquitsen nidnu. Nid —quianec nidanepondash.

² Shubu dadpen icquid Edusaden caid dacuenadquin daquënë uaid puduedte shëcuë dadpen icnuc abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqeten Betesada capondash. Ambobi daicsaido tabadte shubumpi mëdantetedi icpondash.

³ Acte nënantanquoio icnuc dacuenadquiec shubumpi tabadquidën matses dadpen tabadpondash daicsaidouidquoio. Bëshuaido yec capuenquoio icquido yec canite tsasiaido yec quec tabadpondash.

⁴ —“Nuquin Papan abi yacnoshon uaid mayan bédan tèccuascaid acten abia mentoadquid bédanquid,” quedeneque. Tëccuascaic ma chobono —quiash cainec tabadpondash.

⁵ Adnubien Esusën ënden caniaidquoio ambobi uesho istuidpondash. Èndenquimboshë aton dada icsabudash seta dadpen 38tedquiobi matamec capuenquoio yec icsabudtsaidquoio nepondash.

⁶ Adsho istuidshun: —Èdenquoio daicsabudaid nec —quequin tantiashun: —¿Bédanteda bune? —catuidpondash Esusën.

⁷ Adoaguien: —Ai ¿mitsipadequini bédampe? Èbi bëdiactsëcquoio nidnuc utsiba badedquoio mentoadteniosh. Èbi buanquin mentoquid nibëdec —quepondash daicsatsaid.

⁸ Adshobien Esusën: —Min ushte nacentanquin buanec nid —cac

⁹ badedquoio aton dada bédantanquin aton ushte buanec nidpondash. Aid ushë chonoadenquoio icte ushë niondash.

¹⁰ Aden buanshobien con matses chuiquidon: —¿Chonoadenquoio icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimi niacpayoc —quequin chushcapac caondash.

¹¹ Adoaguien: —Èbi bédameboedën: “Buanec nid,” cac mambi naiyoc —quepac caondash Esusën bédameboed.

¹² Adsho tantiashun: —¿Tsuntsin naosh? —caquien:

¹³ —Tsaudi. Èmbi isacmaid èmbi isquiambobi badedquoio nidaccosh matses dadpen icnuc —quepac caondash bédameboed.

¹⁴ Adshumbic Nuquin Papa tabadte shubu uashunaid daquënë uacno puduedshun ambi bédameboed daicsaboed Esusën istuidpondash. Istuidshumbien: —Tantia. Mibi chuinu. Èmbi bédameboedquoio mibi neque. Mimi icsamboen naid ënash bédambo icta. “Nuquin Papan cuidquiac bédanenquoio yec daicsabudquiochitomane,” quiash adta —capondash Esusën.

¹⁵ Adoaguien bédameboed abi: “¿Tsuntsin naosh?” caboedo chiec nidpac caondash. Nidshumbic: —Èbi bédameboed Esus niosh —quequin chuituidpac caondash.

16 Aden chuisho tantiatanequien: —Chonoadenquio icte ushënuidi bédamepac caosh. Icsambo iquec —quequin con matses chuiquidon Esus chieshëmpac caondash.

17 Adnubien: —Mibi adosh —quesho tantiashun abi chieshënuquido istuidshun Esusën naden chuipondash. —Mimbi Nuquin Papa caid con Pa ënenquio icquin matses nashunquidquio nec. Adecbidi ënenquio icquin matses nashunquidquio nebi. Chonoadenquio icte ushëmbidi con Pabëdtan adoquid nebi —quepondash Esus.

18 Adsho tantiatanequien: —“Chonoadenquio icte ushën naquid icsambo iquec,” nuqui caboedquio: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquio nebi,” quechitequien nioshe. Cuesunequimbien ictiad —quepac caondash con matses chuiquido.

Nuquin Papan Mado nebi, quiaid

19 Adec abi chieshënuquido abi cuesunete bunshobien padpiden istuidshun chuipondash Esusën. —¿Ëmbimbo naidtambi nadio? Padenquio. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi.

20 Ëbi tantiaquin Con Pan ambi naidtedimbo ëbi tantiamec. Ambentsëqui nainquio iquec. Aidën tantiamiacpadomboen bëdiactsëc naquin nëid capuenguio icquid bédamiombi. Adembidi ambi tantiamiacpadomboen naquin dacuëdampamboecnuc naindambi ma isquionoeshun.

21 Con Papadquidquio yec unësaid uincuemquidquio nebi. Matses ëmbi tantiaidotedi ëbëdi tabadmenuen uincuemendambi.

22 ¿Ëbi tantiesabo cuidnuen ambiuidtsëqui chuiquidta con Pa nedic? Padenquio. Ëmbien ambi chiapadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesa icsambo icsho cuidnuna,” caindambi con Pa.

23 Aidëmbi: “Ëbi tantiacpaden ma con Madotsen bédamboen tantianu,” gueshun aden matses cuidte chuiquid icmiondashi. Ëbi adquid icmiondaid icsho ëbi tantiatiapimbo icquidon ëbi chomiondaid Nuquin Papatsen tantienquio iquec.

24 ¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësascho cuidenquio icquin ëbëdi tabadmendambi. Cuidtequid icboedi ëbi tantiasch ëbëdi tabadtequid yanendac —quepondash Esus.

25 Adashic padpidec onquec: —Tantia. Mibi padpiden chuinu. Unësaidën tantienquio yacimboen ëbi tantienquio icboedombi ëbi tantiabensho bédamboen tantiamequin bédamboec tabadquid icmendambi. Adshun aido unësascho uincuemeshun ëbëdi tabadmendambi.

26 Con Pan icmiacpadequi unësaid uincuemquidquio nebi. Abibi unëstiapimbo icquid icquin unësaid uincuemquidquio con Pa nec. Ambi icmiacpadquequi abi yacpadquidquio iquebi.

27 Adec unëstiapimbo iccondaidi matsesash icsaisambo icsho Con Pan matses icsaido cuidquid icmiondashi.

28 Ëbi adsho tantiashun: “¿Abimbobida capeba? Muequien nechitec,” ëbi cainda. ¿Muectabi nedi? Padenquio. Con Pan tantiacpadënuquio ëmbi cuënac unësaidotedi uincuenendac.

29 Adec uincuenacsho ëbi tantiaquido ëbëdi tabadmequin ëbi tantiesabo icsaido cuidacno nidmendambi.

30 Ëmbentsëqui nainquio iquemb. Con Pan chiapadomboen naquin matses cuidte chiendambi. Matsesën naidtedi tantiaquid icquin adoendambi.

Ëmbi naid nainquoio icquin Con Pa bēdambo icmenuen aidēn chiacpadomboen naimbi —quepondash Esus abi chieshēnquido chiec.

Utsintsen ëbi chiec, quequin Esusēn chiaid

³¹ Adshumbic Esusēn abi chieshēnquido chuiopondash. —Nuquin matsesēn naden chiec. “Abentsēseshun chiaid icsambo iquec. Daēdshun chiaid abimbo iquec,” quequin chiec. Aden chiaid tantiec ëbiuidtsēqui: “Nuquin Papan Mado nebi,” qesho tantiashun: “Abimbo mimbi caic,” mimbi ëbi catiapimbo iquec.

³² Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac.

³³ Aden ëbi chuiquid utsi acten mentoanquid Uan pado icpadenec. Aidēmbi ëbi abimbo capadenec. “¿Nuquin Papa yacnuēsh choquidta ne?” quequin mimbi chuitanac: “Padenquoio. Esusuidi Nuquin Papa yacnuēsh choquid nec,” quepadenec Uan pado.

³⁴⁻³⁵ Aden chieshtoenquoio icquin bēdamboen chuipadenec. Chuisho tantiatsash mibi bēdambo icuidtsēcondac. “Ëmbi Uan padon naid chuisho tantiashun: ‘Abimbo mimbi caic,’ ëbi capashun. Ëbi adosho bēdamboen istisambi,” quequin mimbi tantiondaid Uan caombi. Matses icquimbi Uanën ëbi bēdiactsec tantiamequin chuipadenec. ¿Adquid matsesēnuidtsēquidabi abimbo chuipec?

³⁶ Con Pambien: “Con Mado neque. Matses ismenu,” qeshun comapenen tantiaquidquio icmepondashi. Ambi adomiaid icquin comapenen tantiaquin nabanquin ëmbi ismesho isash: “Ai, adquid nec,” quetiadquidi mibi nec.

³⁷ Ëbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onqesho ¿ada mimbi tantiapadio? ¿Nuquin Papada istio? Padambo mimbi iquec.

³⁸ Adembidi ambi dada uamequin chiampidquio ma mimbi bēdamboen tantienquoio yoc. Aid bēdamboen tantiashumbien Nuquin Papan chomiondaid ëbitsen mimbi tantiatsiac.

³⁹ Mibi nadpec. “Nuquin Papan chiaid nuquin tsusedpabon dada uampid tantiaquidquio nebi. Aid isbanquid yec Nuquin Papabēd tabadtequid nebi,” mibi quepec. Ma ëbimbo chuiquin Nuquin Papan dada uamepampid neyoc.

⁴⁰ Aden dada uamepampid isbanquidombi mimbi ëbi tantienquoio iquec. Ëbi tantiashoembi mibi Nuquin Papa yacno ëbēd tabadmetsiandac.

⁴¹ “Ëbi adsho tantiashun ma matsesēn ëbi: ‘Bēdambo mibi iquec,’ canu,” ¿quectabi ique? Padenquoio. Con Pan chiacpadomboen nanuembimbi aden chiec.

⁴² Ëbi tantienquoio icsho isun: “Nuquin Papa tantiesabo nec,” quequin mibi tantiembi.

⁴³ Embien Nuquin Papan chiacpadomboen naic. Aden nasho mimbi ëbi tantienquoio iquec. Utsi: “Nuquin Papa yacnuēsh choquid nebi,” quec muaquidien mimbi badedi tantiatsiac.

⁴⁴ Mibibi tantiadec: “Mibi bēdambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bēdambo iquec,” cametiapimbo iquec —quepondash Esus abi chieshēnquido chiec.

⁴⁵ Adashic padpidec: —¿Embentsēquidambi: “Ëbi tantiesabo neque. Cuidnuna,” quequin mimbi naid Nuquin Papa chuiepe? Padenquoio. Mimbi tantiaidēnquoio Moisesēntsen: “Nēido icsambo iquec,” mibi caindac.

⁴⁶ Aidēn chiampid bēdamboen tantiaquimbien mimbi ëbi tantiatsiac. Aidēn chiampidi mabi neyoc.

⁴⁷ Aden Moisesën chiampid tantienquo icquin ëmbi chuiboedtsen mimbi tantiatiapimbo iquec —quequin Esusën abi chieshënquido chuipondash: — Moisesën chiampid tantiaquidquo nebi —quequido chuiquin.

6

Esusën pete uatanquin 5000tedi pemiaid (Mat 14.13-21; Mad 6.30-44; Duc 9.10-17)

¹ Yuecquo ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabëdtoshon potiacpondash. Aid chiambidi matses utsibon Tibedias capondash.

²⁻³ Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin ëbi chedo chuipondash. Adnubien Esusën matses dadpen bédamesho isboedo Esus isnuec chopondash.

⁴ Nuquin Papan isadaidbo unës uainquo icquin matamiampid inchësh tantianuec pec tabadte ushë nëbi yanuc niondash.

⁵ Aido cho-chosho istanequin Esus: —Uedipe, piucquid buanshun ¿mit-simbo pete bedtane nêido pemenun? —quepondash Uedipe chiec.

⁶ —¿Atoda queque? Tantiyanu —quiash adpondash Esus. —Pete bedabi icnuc ëmbibi pete uanu —quequin otacquo tantiequi adondash.

⁷ Adoaquien Uedipe: —Ma aidtedquo pemetiapiambo yoc. Inchëshën ushë 8tedquiobi nidmec chonoashun bedaidtedimbo piucquid menequin pete bedshun: “Pemenun,” cac aidtedquo pemiatenquo ictsiash —quepondash Uedipe.

⁸ Adnubien Andedesën Petedon utsin:

⁹ —Ma nê madompin panëmpi 5tedtsëc icpayoc, Icbo. Nuëcquidëmpi daëdquiobi ictsec. Matses dadpenquo iquec. Aidtedtsëcquid pemetiapiambo iquec —caquien

¹⁰ Esusën: —Padi. Aidi bédambo iquec. Abitedi: “Nëmba tabad,” caban —cac: —Nëmba tabad —cabanac sebad-sebadpambo icquidën uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido bacuëbobëdta tambanambo icpondambi.

¹¹ Adshumbien Esusën madompin pete pamba bedtanquin Nuquin Papa chuipondash. —Pete uaquid yec mibi bédamboshë iquec. Mimbi uaid nêid pete bédambo iquec, Papa —quec onquetanquin: —Meneban —cac abëd icquidon tabadquido abitedi menebampondash. Adotanquimbic nuëcquidëmpitsen bedtanquin adembidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash.

¹² Aden ambi piactembi pebededacshobien Esusën: —Napi uaid secainda. Sandoshon dayun ua —cac

¹³ tsitsan dapan napiuaid sandoshon dayun uapondambi tsitsan 12tedquiobi sandoaic icnuc.

¹⁴ Aden pemiaquien pemiaido: —Comapenen tantiaquin Esusën pete dadpenquo icmiac. Moisesën chuiampidshenda nepec. “Nuquin Papan bédamboshë icquid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquo yec.

¹⁵ Adsho ambembi tantianshen: —Abi chuiquid icmenuen ëbi “Bednu,” caique. Nêbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

*Esus acte bëntse choaid**(Mat 14.22-27; Mad 6.45-52)*

¹⁶ Esus cuembon inçhëshbudtsëqui chian budondabi ëbitedi.

¹⁷ —Capednaun yacno nidnu —quec cano antabëdtoshon potenubi inçhëshpondash Esus acte bëntse chopanushta.

¹⁸ Adnubien cunquequid dapa cunquetuidpondash. Acte comapenec tèccuasquenuc

¹⁹ uncadenquo yampondash. Ënapen nidabi nëbi 6 quidometedos cactionsëqui nidshun isquien matseshimboec acte bëntse chopec. Adsho istanec dacuëdquiondabi.

²⁰ Adshobini: —Ëbi neque. Dacuëdenda —capondash.

²¹ Adoac: —Esus nec —quetanquin badedi antsadtomiondambi. Aid antsadtometanquin badedquo potepondambi. Nandoash ambobi ushondabi Capednaun yacno.

Pemiaidon Esus istuidoaid

²² Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëquidëmbi abëd icquidon potepaboc. Ma aibdëd nidenquo icpaboc. ¿Mitsimbo nidpash? —quepac caondash pemiaido.

²³ Adnubien shubu dadpen icquid Tibedias caid yacnocquidon cano dadpen bë-bëpac caondash. Pete pemebocno anoentsëqui nando-nandosho isash:

²⁴ —Potequimbien Esusën yashe. Nëid canobi antabëdtoshon potenuna —quetanec antabëdtoshon potiac-potiacpac caondash.

Potiac-potiacash Capednaun yacno pudundoshon

²⁵ Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquo yec:

²⁶ —Tantia. Mibitedi chuinu. ¿Ëbimbo tantianueta chodio? Padenquo. Ëmbi pete uasho isash: “Nuquin Papan namiaidën naoshe. Istanu,” ¿quecta ictio? Peteuidtsëqui tantiaquin ma mimi ëbi nibëneyoc.

²⁷ Peteuidtsëqui tantiaquin pete bednuen naquidquo ma mibi neyoc. Aidquo chodquetequid nendac. Chodquetiapimbo icquid tantiaquin bëdamboen nata. Aden nash ëmbi icmiacpadquiec Nuquin Papabëd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapenen tantiaquid icquin mibi adquid icmetsiambi —quepondash Esus.

²⁸ Adsho tantiaish: —“Nuquin Papan chiacpadomboen nata,” quepequien mibi iquec. Adomboen natiadquo icquin ¿atotsimbi nape? —caquien:

²⁹ —Nuquin Papan chiacpadomboen natiadquo icquin ambi chomiondaidquo tantiaata —quepondash Esus ambi pemiaido chiec.

³⁰ Adoquien: —¿Mimbi aden chuishouididambi: “Adquid nec,” quequin tantiape? ¿Atotsi utsi comapenen tantiaquin mimi ëbi ismepatsia?

³¹ “Ëndenquimboshë pete nibëdacnoshon Moisesën con tsusedpabo nibëdbëdi sequiaid pete pemianepampic,” quequin dada uapampid isombique. Adquid nacenquin ëbi isme —quepondash pemiaido peteuidtsëqui tantiec.

³² Adoquien Esus: —Nuquin tsusedpa Moisesën nainquien icpampic. Con Pambien aden pemepampic. Nëbi ambi chomiondaid petebimboecquid utsien Nuquin Papan mibi tantiametiadquo iquec.

³³ Aid petebimboecquidën matses bëdambo icmetsiash pete piacbimboecnuc —quepondash Esus abibi cadequi.

34 Adsho tantiash petembo ca danec: —Ënenquo icquin adquid ëbi pemeta —quepondash pemiaido ambi peboeduidtsëqui tantiec.

35 Adshobien Esusën: —“Ëbiuidtsëqui petebimboecquid icquin matses bëdambo icmequid nebi,” caimbi. Ëbi tantiaquid ënenquo icquin bëdambo icmendambi petebëdi acte bundoenquo yacimboecnuc.

36 Ëmbi chuibocpadomboen ma mimbi ëbi tantienquo icboc. Ëmbi comapenen tantiaquin nabansho isumbi ma mimbi ëbi tantienquo icboc.

37 Utsibombien ëbi tantiendac. Nuquin Papan tantiamiaidtedishun ëbi tantiasho bëdamboen isquin cacumenquo iquendambi.

38 ¿Ëmbi tantiacpadomboen naquidtabi nedi? Padenquo. Nuquin Papan chiacpadomboen nanuec mabi abi yacnuësh chondac.

39 Aden aidën chiacpadomboen nanuen ëbi tantiaquido unësacsho uincuemeshun cuidenquo icquin ëbëdi tabadmendambi. Unësaid abitedi uincumete ushën adoendambi.

40 Nuquin Papa bunacpaden ëbi tantiaquido uincuemeshun Nuquin Papa yacno ëbi tabadacnombó tabadmendambi —quepondash Esus ambi pemeboedo chiec.

41 Adec: —Nuquin Papa yacnuësh chondaic yec petebimboecquid nebi —quesho tantiashien con matses chuiquido:

42 —¿Adquidida nepec? Ma icsamboen chuiipayoc. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmédquid neyoc. Ma Osen mado neyoc. Anitsen tantiembi. Matsesën tishaid Nuquin Papa yacnuësh choquid ictiapimbo iquec —quecuededpondash.

43 Adshobien Esusën: —Shoshquetsëcquin ëbi icsamboen chienda. Abimboembi caoc.

44 Ëbi chomiondaidën Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatiasac. Aden Nuquin Papan ëbi tantiamiaido unësacsho unësaid uincumete ushën uincuemendambi.

45 Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bëdamboen istë matses tantiamendac,” quequin chuiapampic. Aden Nuquin Papan tantiamiaido ëbi tantiaquido yantsiash.

46 “Ambi tantiamiaidën matsesën Nuquin Papa ispash,” quenquo iquebi. Ëmbiuidtsëqui abëd icquin Nuquin Papa isondambi. Aden abëd icquin abi isondaic matsesonambi —quepondash Esus: —Matsesi nec —abi caquido chiec.

47 Adashic padpidec: —Abimbo caombi. Ëbi tantiaquido Nuquin Papa yacnombó ëbëdi tabadmendambi.

48 Petebimboecquid icquin aden tabadmendambi. Adecbidi bëdamboec tabadmianquid nebi.

49 Nuquin tsusedpabon pete utsi nibëdacnoshon mana caid pepampic. Aid pequidi tsusiobudash unëspampic unëstiapimbo icquid yanabi.

50 Petebimboecquid utsiën Nuquin Papa yacnuësh chondaic nëmbobi iquec. Aid piash ëmbi chiacpadquiec padpidec unësenquo yec Nuquin Papabëd tabadtequid yanendac.

51 Adquidquid nebi. Con nami piash matses unëstiapimbo icquid yanendac. Adquidquid matses icmenuec ëbided cuidadquin con nami menendambi —quepondash Esus ompoachamboen chiec. —Ëbi tantiaquido nëbi bëdamboen tabadmeshun unësacsho Nuquin Papa yacno ëbëdi tabadmendambi padpidec unëstiapimbo icnuc —quequin tantiec: —Petebimboecquid icsho ëbi piash matses unëstiapimbo icquid yanendac —quepondash Esus. —Ëbi tantiaquido

cuidmenquo icnuec ëbided cuidadec unësendabi —quequin tantiec: —Con nami menendambi —quepondash Esus.

⁵² Adec: —Con nami piash matses unëstiapimbo icquid yanendac —quesho tantiashien namimbo ca danec con matses chuiquido onquecuededpondash. Utsi-utsiec: —¿Mitsipaden Esusën aton nami nuqi pemepatsiash? Aidquo tantiatiapimbo iquebi —quecuedednubi utsi-utsiec: —¿Atotsi chuitiadquo yec niosh? Chuisho tantianu —quecuededpondash.

⁵³⁻⁵⁴ Adsho tantiashun Esusën ambi chiacpadomboembidi chuiopondash. —Tantia. Mibi chuinu. Matses tantiaquidquo nebi. Aden tantiaquiec ëbided cuidadec unësendabi. Ëbi adec unëso isun con nami pequin con intac acquinc cash nididënuësh bëdamboec tabadquid yanash Nuquin Papabëd tabadtequid mibi yanendac. Adquid icsho unësaido uincuemete ushënquo uincuemendambi ëbëdi tabadmenuen. Ëmbi chiacpadomboen nainquo yash Nuquin Papabëd tabadtiapimbo mibi iquendac.

⁵⁵ Ai, con nami petebimboecquid nec. Con intac actebimboecquid nec. ¿Petebëdi acte naimëdanda mibi bëdambo icpatsia? Adecbidi con intac chididiquic con nami icsabudec ëbided cuidadec unësaid tantienuo yec mibi bëdamboec tabadtiapimbo iquendac.

⁵⁶ Aden ëmbi namibëdta intac chuisho bëdamboen tantiashun ëmbi chiacpadomboen matsesën natiadquo yanendac. Adsho isun aibëd tëshnanenquo icquin bëdamboec tabadquid icmendambi.

⁵⁷ Nuquin Papa unëstiapimbo icquid yec matses uincuemequidquo nec. Aidën chomiac ambi namiapadomboenuidi naquin ëbi tantiec tabadquid unësascho uincuemequin unëstiapimbo icquid icmendambi.

⁵⁸ Aden ëmbi naid tantiamenuc: “Nuquin Papa yacnuësh chondaid petebimboecquid utsi iquec,” quobi. Ëbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon pepampidpadquidpenquo nebi. Adquid pequidi tsusiobudash unëspampic. Ëbi tantiaquidien padpidec unëstiapimbo icquid yanendac

⁵⁹ —quepondash Esus Nuquin Papan chiaid chuibante shubunuësh Capednaun yacnuësh.

Abi tantiauidquidon Esus nianondaid

⁶⁰ Adec: —Con nami pequin con intac acquinc cash mibi bëdambo ictsiac —Esus quesho tantiashien abëd icquido utsi-utsiec: —Aidën chiacpadomboen natiapimbo iquebi. Icsamboen chiec —quepondash Esus tantiamenquo yec.

⁶¹ Adec onquesho ambembi tantiash Esus onqueoapondash. —¿Ëmbi chuiboed tantiash chieshtotiadquioda ique?

⁶² Nuquin Papan matsesmiad yequi unësash ëbi iccondacno ëbi nidacsho isash ¿atoda mibi quendac? Abimbo caombi. Nuquin Papa yacnuësh chondaidini nec.

⁶³ Namimbo intacquiobëdta ca danequien mibi nec. ¿Namimbo pequinc intacquo acquinc cashta mibi bëdambo icpatsia? Padenquo. Nuquin Papan Mayanën ëmbi chuiboedbëdta ëbi tantiamequin matses bëdamboec tabadquid icmetsiash. Adoaid unësash Nuquin Papa yacno ëbëdi tabadtsiash —quepondash Esus cuembo chiec.

⁶⁴ Adashic padpidec: —Ëmbi aden bëdamboen chiaqui utsin-utsinquien mimi ëbi tantienquo yanendac —quepondash abi tantiauidquido chiec. Aido tauamboec abëdi nidnuc: —Nëidën ëbi tantienquo yanendac. Nëid utsin ëbi chieshënuquido ëbi bedmendac —quequin ambembi Esusën tantia-panëdash.

⁶⁵ Adashic padpidec: —Ëbi tantiauidquido tantiaquin naden chiombi. “Nuquin Papan tantiamiabi yaidën ëbi tantiatiapimbo iquendac. Nuquin Papan tantiamiaidënquien ëbi tantiatsiash,” quequin chiombi —quepondash Esus.

⁶⁶ Adsho tantiashun dadpeshun Esus nianondash.

⁶⁷ Aden nianaquien Esusën abëd icquido 12ted icquid chuipondash. —¿Mimbitsendabi niampe? —caquien

⁶⁸ Petedo: —Padenquo. ¿Tsudabëd icnuendambi mibi nianuc? Mibi-padquid utsi nibëdec. Mimbiuidtsëquien: “Ëbi tantiaquid bëdamboen isquin unësacsho uincuemeshun ëbëdi tabadmendambi,” quequin chuipoc.

⁶⁹ “Abimboen caosh,” quequin mibi tantiambi. “Nuquin Papa yacnuësh chonëdaid yec bëdamboshë icquidquien nec,” caombi mibi. Mibi nianti-apimbo iquebi —quepondash Petedo Esus caic.

⁷⁰ Adoaquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Ëmbi adondaid abentsëc Satanasën namiaidquio yec icsamboshë iquendac —quepondash Esus.

⁷¹ —Simon Iscadioten mado Udasën ëbi chieshënquido ëbi bedmendac —quequin ambembi tantiash adondash Esus.

7

Aton utsibon Esus tantienquo yaid

¹ Abi tantiauidquidon nianac Cadidia yacnouidi yuec Esus capucuenepondash. —Nidaid Udeya caid yacnocquido con matses chuiquidon ëbi cuesunetiadquio iquec —quiash Udeya yacno nidenquo icpondash.

² Adnubien con matses abitedi: —Edusaden yacnuësh cuëdëntanu —quiampondash. Adanec nidaid utsi Udeya caidën nidec 7tedec ushec cuëdënuec matses dadpen nidacno Edusaden yacno nidanepondash. Cuëdënuec Esus nidenquo icpondash.

³ Adec nidenquo icsho isumbien aton utsibon: —Edusaden yacno nidec nid. Mibëd ictiadquio icquid ano icnushe. Comapenen tantiaquin nabanquin aido ismec nid.

⁴ ¿“Ma matses dadpeshun ëbi tantianu,” quequina matses daëdpactsëc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon.

⁵ —Nuquin Papan chomenëdaidquio nec —quequin tantienquo icquimbi adopondash aton utsibon.

⁶ Adoaquien Esus: —Matses dadpen nidnuc nidtiadquio yec mibia nidta. Abitedishun isnuc nëbi nidtiapimbo iquebique.

⁷ Mibien anocquidon chieshëntiapimbo ye. Mibia nidta. “Nuquin Papan chiaid niac-niaquec mibi icsaic,” ëmbi cac chieshënondashibique.

⁸ “Cuesunenushe,” quiash nëbi nidtiapimbo iquebique. Mibia nidta. Nuquin Papan tantiapadec nidendabi

⁹ —quiash anobi Cadidia yacno Esus tabadpondash.

Esustsen Edusaden yacnuësh cuëdënuec nidaid

¹⁰ Aden aton utsibo nidanemiash yuec-yuecpactsëc ictanec abitsen Esus nidpondash Edusaden yacnuësh cuëdënuec nidec. Abitedi ismenquo yec tsyuec Esus nidpondash.

¹¹ Adnubien con matses cuëdëncuededacnoshon abi chieshënquidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash.

12-13 Adsho tantiash con matses Esus chieshënquido dacuëdë nec utsibo tantiamenquio yec sho-shoshquetsëcquieq onquepac caondash. Utsi-utsiec: —Esus bēdambošhē icquid nec —quenubien utsi-utsiec: —Ma icsambo icquid neyoc. “Nuquin Papa yacnuēi chondaidini nec,” quec ma muequi neyoc —quec onquecuededpac caondash.

14 Adnubien con matses cuëdë nec taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash.

15 Adsho tantiash: —¿Mitsipaden tantiashun chuipen naic? Nuquibēdtan Nuquin Papan chiaid isbanambo aidën iquec —quepondash con matses chuiquido.

16 Adsho tantiash Esus: —Ëmbembi chienquio icquin ëbi chomiondaidën chiaidquio chiec nebi.

17 Nuquin Papan chiacpadomboen natiadquio icquidën bēdamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquio chiec nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën.

18 Ambembi chuiquidën: “Mabi matsesën bēdambo canu,” quequinuidtsëqui chuibantsiash. Adquidpenquieni nec. Ëmbien: “Ëbi chomiondaidquio ma matsesën tantianu,” quequin ambi chiaidquio chiendac.

19 Mimbien adoenquio iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquio dada uapampic. Ëbi: “Cuesunenu,” caquin aidën chiaid ma mimbi niac-niaqueyoc —quepondash Esus abi chieshënquido chiec.

20 —Mimbi ëbi: “Cuesunenu,” caoc —Esus qesho tantiashumbien ano tabadquidon: —Podobitsi icsa dapuduedash mibi tantiadenquio yec onquepec. ¿Tsuntsin mibi cuesunepatsiash? —capondash.

21 Adoaquien Esus: —Nëidën ëbi cuesunetsiash —quequin chienquio yec: —Chonoadenquio icte ushën comapenen tantiaquin dada bēdamepondambi. Aden bēdamiacsho isash: “Adopenshenda naic. Chonoadenquio icte ushën daicsatsaid bēdamequin Nuquin Papan chiaid niac-niacposh,” ma mibi quepondac.

22 ¿Ëmbentsëquidambi chonoadenquio icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi incubien Nuquin Papan chiacpadomboen naquin: “Nuquin Papan yuambo nebique. Ismenü,” qeshun Abadauanëmbien shui dëbid dëteshunequin tauapampic. Yuecquio ictaneshun adembiidi Moisesëntsën adopampic. Nëbi adembiidi naic chonoadenquio icte ushëmbi chonoadquimbi ma mimbi shui dëbid dëteshuneyoc.

23 Aden Moisesën chiampid niaquenquio icquin shui nacnenquin mimbi bēdamboen naic. Ëmbitsen daicsatsaid dada abichobi bēdamequin mambi bēdamboen naondac. ¿Atotsi quequin ëbi chushcai?

24 Chonoadenquio icte ushën dada bēdamequid icsho: “Icsambo mibi iquec,” mimbi ëbi capec. Aden ëbi bēdamboen tantienquio icquin mimbi icsamboen chiec. Ëbi bēdamboen tantiaquioshon ëmbi naboed bēdamboen chui —quepondash Esus abi chieshënquido chiec.

25 Adec Esus: —Chonoadenquoio icte ushën naondambi —quesho tantiashien anocquido Edusaden yacnocquido naded onquecuededpac caondash. —Nuqui chuiquidon: “Cuesunetiad,” caboedien nëid nechitec.

26 En is. Abi chieshënquidobëdi tabadquin chieque. Chuisho ma chuiquidon chushcainguio icboc. “Nuquin Papa yacnuësh choquid Quidistu caid Esus nec,” quequin tantiashumbien nachitec —quetanequien

27 aidobidi: —Nuquin Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiadenquoio ictsiash —quepondash ano tabadquido.

28 Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Ëmbi isonaid nec. Aton nidaid Cadidia caid yacnuësh caniquid nec,” ¿quequindabi bédamboen tantiapadi? Ma mimbi padenquoio yoc. Ëbemi chondaidpenquoio nebi. Ëbi chomiondaid abi iquec. Ma mimbi aidquiobi tantienquoio yoc.

29 Ëmbien aidquoio tantiendac. Aiddëd tabadondaiddquoio nebi. Adsho aidën: “Nid,” cac chondaid nebi —caquien

30 —“Con pa Nuquin Papam nec,” quechitequien nec —queshun abi chieshënquidon: —Cuesunemenuembien bedtiad —quetanquin: —Bednu —caqui bedadenquoio icpondash. —Nëbi ma Esus unës uainquoio icnu —Nuquin Papa quenuc bedmenquoio icquin Esusën mêtampanëdash.

31 Esus cuesunetiadquoio icnubien utsibon dadpeshun Esus tantiabempondash. —Nëidpadquid utsi nibëdtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bédamebamposh. Nuquin Papa yacnuësh choaid Quidistu caid Esus nec —quequin dadpeshun Esus tantiabempondash.

Ëbi istuidenquoio iquendac, quequin chiaid

32 Aden Esus chiec sho-shoshquetsëcquiec onqueshobien Esus chieshënquidon padiseyo caidon tantiapac caondash. Adshun abëdtan chuiquid utsibo chuipac caondash. —Ëmbi chuibocpaden Esusien bedtiad. Icsamboec onquioshe —cac: —Ai, adembiem ictiad —quepac caondash. Adshumbic abëd icquido sondado chuiquin: —Baded bedtan —capac caondash.

33 Adoac nidanequin tantiatuidaquien naded Esus onquepondash. —Yuec-yuecpectsec mibëd icashic ëbi chomiondaiddëdtsen tabadoaic nidendabi.

34 Ëbi nibënquin ëbi istuidenquoio mimbi iquendac. Ëbi nidacno mibi nidtiapimbo iquec —quepondash Esus.

35 Adsho tantiash abi chieshënquido: —Nuqui istuidmenquoio icnuec ¿mit-simbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ¿anocquidoda chuiplatsiash?

36 Tantiadenquoio yec onquepec. ¿Atotsi quepec? “Ëbi nibënquin mimbi ëbi istuidenquoio iquendac. Ëbi nidacno mibi nidtiapimbo iquec,” quepequien iccosh. ¿Atotsi quepash niosh? —quepac caondash Esus chieshënquido.

Aton Mayan abi tantiaquidbëd tabadmete chiaid

37 Adnubien cuëdë nec ënëdte ushënquiobi con matses abitedimbo cuëdë nuec cho-chopondash. Cho-choash tabadbudnubien nidtoash comapene onquequin Esusën chuipondash. —Acte natia bunac bimboec Nuquin Papa tantiate bunquin ëbi bédamboen tantiata.

38 Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobëd tabadmendambi.

Adoac mibéd tabadquin mibi bédamboen tabadmequin utsibotsen Nuquin Papa tantiate bumetsiash –quepondash Esus.

³⁹ –Nuquin Papabédta ëbi tantiamequidquo Nuquin Papan Mayan nec –quequin tantiec adondash. Adquid abi tantiaquidobéd tabadmequin chomiabi aden chuipondash Esusën. Nuquin Papa yacno nidambien abi tantiaquidobéd Nuquin Papan Mayan tabadcuenondash.

¿Nuquin Papan chomiaidta nepeba? Esus caid

⁴⁰ –Nuquin Papa tantiate bunquin ëbi tantiata –Esus quesho tantiashien Esus chiec ano tabadquido onquecuededpac caondash. Utsi-utsiec: –“Nuquin Papan chiaid chuiquidquo choendac,” quequin nuquin tsusedpa Moisesën chiampidien Esus nechitec –quenubien

⁴¹ utsi-utsiec: –Nuquin Papa yacnuësh choquid Quidistu caidien Esus nechitec –quenubien utsi-utsiec: –¿Cadidia yacnuështa Nuquin Papa yacnuësh choquid chopadic?

⁴² Padenquo. Nuquin Papan chiaidquo naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid canampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquo nec –quepac caondash.

⁴³ Adec dadpen: –Bédambo icquid nec –quenubi aidedbidi: –Icsambo iquec –quepac caondash.

⁴⁴ Adnubien: –Icsambo iqueque. Cuesunemenuembien bedtiad –queuidpac caondash. Adshun Esus bedabi icpondash.

Isadaidbo chuiquid dapabon Esus chieshënaid

⁴⁵ Adnubien: –Esus bedtan –caboedo sondado bedabi Esus chieshënquido chiec chopac caondash. Chosho: –¿Atotsi quiash bedabi cho? –caquien:

⁴⁶ –Ma bédamboenshë chuiboc. “Adamboen chuibanquid utsi nibëdec,” qeshun bedtiapimbo iccobi –quesho

⁴⁷ tantiashien: –Aid muasho tantiashun: “Abimbo caic,” ¿cainda icco?

⁴⁸ ¿Adambi Esus muasho tantiadio? ¿Ada tsusiobon tantiadiosh? Padenquido iccosh.

⁴⁹ Utsibombien tantiash. Adquidon ëmbi bédamboen tantiacpadamboen Nuquin Papan chiampid tantienquo iquec. Icsambo aido iquec. Aido cuidchitoshon. Esus icsambo iquec –quepac caondash con matses chuiquidido padiseyobo Esus chieshë nec.

⁵⁰ Adnubien incheshën puduedash Esusbéd onquiondaid Nicodemo caid abitsen chuiquid yec nadpac caondash.

⁵¹ –¿Abibi chuimiabida cuidpec? Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bédambo ictsiash. Chuimiabi cuidac icsambo ictsiash –quepac caondash Nicodemo abédtan chuiquid utsibo chiec.

⁵² Adoaquien chuiquidido: –Esus yacpadec Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquo iquendac,” quequin mimbi tantiatsiac. Ma Esus muequi neyoc –quepac caondash chuiquidido Nicodemo chushcaic.

⁵³ –¿Chuimiabida cuidpec? –quetsëcsho aden Nicodemo chushcanec abitedi nidaniac caondash aton shubuno ushec nidec.

1 Nicodemo chushcabon Esus macuësh dapa Odibos caid yacno ushec nidondash.

2 Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen cho-choec abi datsidadsho Esusën chuipondash.

3 Aden chuinubien con matses tsusiobon aton bënëpenquoio chudmesho istuidshun chido bëpondash. Moisesën dada uampid chuibanquidobëdtan tusedpabon chiampid namequido padiseyobon Esus yacno bëshun chido nënantanquoio nitsimpondash.

4 Adshumbien Esus chuipondash. —Aton bënëpenquoio chudmesho istuidshun nëid bëombi.

5 Nuquin Papan chiaid Moisesën naden dada uapampic. “Aton bënëpenquoio chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido.

6 —¿Atotsi Esus quepatsiash? Nuquin Papan chiampidquoio chienquoio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquoio icquin shuebudshun mëdanten nidaid dada uapondash.

7 Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbia cuënoten se —quetanec

8 padpidec shuebudshun mëdanten nidaid dada uaoapondash.

9 Adnubien: —Nuquin Papan chiaid niaquesambo icquin en mimbia cuënoten se —cac: —Nuquin Papan chiaid niaquesamboen nibëdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouïdtsëqui Esusbëd icnuc.

10 Adec nidanian Esusën nidtoquin isquien nibëdec. Nidanias. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac:

11 —Ai, nibëdosh —quesho tantiashien: —Ëmbimbo mibi cuënoten senquoio iquembique. Mibi icsaid ënash bëdamboec tabadec nid, champi —capondash Esusën. Adoac chido nidondash.

Pabiate cuembo icnuc tantiamequid

12 Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënquido tantiamequin padpiden chuiopondash. —Pabiate cuembo icnuc con Pan bëdamboen iste matses tantiamequidquoio nebi. Ëmbi tantiamic ëbi tanti-aquido icsateuidi bunenquoio yanec bëdamboec tabadte buncuenendac. Adec ëbëd tabadtequid yanendac —quepondash Esus.

13 Adsho tantiash abi chieshënquido: —Mibentsëqui: “Adquid nebi,” quesho tantiatiapimbo iquebi. Muequien mibi nechitec. Matses daëdshun chiac bëdambo ictsiash —quepondash.

14 Adsho tantiash Esus: —Ëmbi abimbo cadebi. “Con Pa yacnuësh chondash anobidi nidendabi,” quec muainquoio iquebi. “Aton papa yacnuësh choash anobidi Esus nidoaindac,” quequin ma mimbi ëbi tantienquoio icboc.

15 Cadidia yacnuësh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nëid icsambo iqueque. Cuidnuna. Nëid bëdambo iqueque. Cuidenquoio icnuna,” quequin nëbi chienquoio iquembï.

16 Aden chuiquin abimbo chuitsiambi. Ëmbentsëqui chienquoio icquin ëbi chomiondaid Nuquin Papabëdtambi chuiquin abimboshë chuitsiambi.

17 Nuquin Papan chiaidquo Moisesën naden dada uapampic. “ ‘Ic-saosh,’ quequin daëdshun chuisho tantiash: ‘Abimbo chiec,’ quequid yendac. Adecbidi: ‘Bëdambo iquec,’ quequin daëdshumbidi chuisho tantiash: ‘Abimbo chiec,’ quequid yendac. Abentsëcshun chuishoen mua caquid yendac,” quequin Nuquin Papan chiaidquo Moisesën dada uapampic.

18 Aden Moisesën dada uampid tantiashun ëmbentsëqui chienquo iquemi. Ëbi chomiondaid con Pabëdtantsëqui chiemi –quepondash Esus.

19 Adsho tantiashun abi chieshënquidon: –¿Mitsimbo papa icpec? – capondash. Adoaquien: –Con Pa ëbëdta ma mimbi tantienquo icboc. Ëbi tantiaquimbien mimbi con Patsen tantiatsiac –quepondash Esus abi chieshënquido chiec.

20 Abi chieshënquido onquecuededec quënën tabadnubi aid quënë cachotsëqui Nuquin Papa tantiaquin piucquid menequin nauedte tabëcacoshon Esusën chuipondash. Adec Esus anoentsëqui tabadsho abi chieshënquidon bedabi icpondash. Nuquin Papa: –Ma ëmbi tantiacpadënquo matsesën unës uanu –quenuc Esus bedabi icpondash.

Utsibon Esus tantiauidaid

21 Adnubien Esusën abi chieshënquido padpiden chuoapondash. – Nidendabi. Ëbi nidan ëbi nibënquin mimbi ëbi istuidenquo iquendac. Abi chiaid niac-niacquido icsho Nuquin Papan bëdamboen isambobi mibi unësendac. Adash ëbi nidacno mibi nidtiapimbo iquendac –quequin chuipondash Esusën.

22 Adsho tantiash Esus chieshënquido: –¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta: “Ëbi nidacno mibi nidtiapimbo iquec,” quepec? –quepondash abi chieshënquido.

23 Adsho tantiash Esus: –Mibi matses nec. Ëbien con Pa yacnuësh chondaidquo nec.

24 “Adquid icsho ëbi tantienquo icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bëdamboen isabi mibi unësendac,” mibi caombi –quepondash Esus.

25 Adsho tantiash abi chieshënquido: –¿Mitsipadquid icquin ëbi aden chie? –quepondash Esus caic. Adoaquien: –Ëmbi chianeboedquiobi mabi neyoc –queopondash Esus.

26 Adashic padpidec: –Mimbi naid dadpen chuiquin mibi cuidte chien-dambi. Ëmbembi chienquo icquin ëbi chomiondaid muesanquo chiaidquo chiendambi. Aidën chiaiduidi matses abitedi chiendambi –quenubien

27 Esus chieshënquidon: –Abi chomiondaid Nuquin Papambo nec –quequin tantienquo icpondash.

28 Aden tantienquo icsho isun Esusën padpiden chuoapondash. –Matsesmiadquo icshobi ëbi cuesten dectanshumbic mimbi ëbi tantiaabenadac. “Ambi chiapadquidshenda nepadenec. Ambembi chiaid chienquo icquin aton Papan chiaidquo chuiquin aidën chiapadomboenshenda napadenec,” quequin ëbimbo mimbi tantiendac –quepondash Esus.

29 Adashic padpidec: –Nëbi ëbi chomiondaid ëbëd iquec. Aid bëdambo icmenuen ambi chiapadomboen nasho isun ëbi nianenquo iquec –quepondash Esus.

30 Adsho tantiashun: –Abimboen Esusën caic. Nuquin Papa yacnuësh choquidien nec –queshun Esus tantiauidtsëcondash dadpenshun.

Satanasën yuabo nec, quequin Esusën chiaid

³¹ Adsho isumbien Esusën abi bēdiactšec tantiauidtsēchoedo chuipondash. —Ĕbi tantiaquidēn ěmbi chiacpadomboen natiadquio iquendac.

³² Nuquin Papabēdta ěbi aden tantiasho icsamianquidēn yua icboedi aidēn yuapenquio mibi icmetsiambi —quepondash Esus abi tantiauidtsēchoedo chiec.

³³ Adec Esus: —Yua —qesho tantiashien: —Abadauan yampidēn tsyuequido yec utsin yuacmaido nebi. Tantienuio icquin mimbi icsamboen chiec. ¿Atotsieshun: “Mibi yuapenquio icmetsiambi,” quequin ěbi chio? —capondash abi tantiauidtsēchoedon Esus chuiquin.

³⁴ Adoaquien: —Tantia. Mibi abimbo chuinu. Uidēn uacbimboen icsambo icquidēn ambembi abi icsaid ěntiapimbo iquēc. Abembi bēdambo ictiapimbo iquēc.

³⁵ ¿Mitsipadquid nuquin matsesēn yuaid icpec? Aton madopen yec icsambo icsho icbon cuemequid. Aton madombo bēdamboen isquid.

³⁶ Aden con Pan aton Madombo icsho ěbi bēdamboen isquin ěbi tantiaquidotsen bēdamboen isendac. Aden ěbi tantiaquido bēdamboen isquin bēdamboec tabadte bumequin abi yacno ěbēd tabadtequido icmendac —quepondash Esus.

Satanasën madobimboecquido chiaid

³⁷ Adshumbic Esusën abi chieshēnquido chuiopondash. —“Con tsusedpa Abadauan icpampic,” quequin mimbi abimbo chioc. Adboedēmbi ěbi cuesunetiadquio mibi iquēc. Ĕmbi abimbo chuisho tantiate bunenquio icquin ěbi cuesunetiadquio mibi icpec.

³⁸ “Con Pabēd tabadquin isondambi,” quequin ěmbi bēdamboen chuisho tantienquio icquin min papabimboecquidēn chiacpadomboen mimbi naindac —quepondash Esus abi chieshēnquido chiec.

³⁹ —Min papabimboecquidēn chiacpadomboen mimbi naindac —qeshobien: —Con tsusedpa Abadauanēn nacpadomboen mambi napaboc —capondash Esus chieshēnquidon. Adoaquien Esus: —Ma mimbi adoenuio yoc. Abadauanēn nacpadomboen naquin mimbi bēdamboen natsiac.

⁴⁰ Bēdamboen natiapimbo icquin mimbi ěbi cuesunetiadquio iquēc. Nuquin Papan chiaidquio abimbo chuisho mimbi adotiadquio iquēc. Nuquin Papan chiaid tantiec ma Abadauan cuesuniantiapimbo icpampiyoc.

⁴¹ Min papabimboecquidēn namiacpadomboen naquidien mibi nec —capondash Esusën abi chieshēnquido chuiquin. Adoaquien: —Mambi Nuquin Papauidtsēqui tantieyoc. Utsi tantiatiapimbo icquin Nuquin Papauidtsēqui con pa caimbi —quepondash Esus chieshēnquido.

⁴² Adsho tantiashien Esus: —Nuquin Papambo tantiaquimbien mimbi ěbitsen tantiatsiac. Ĕmbi choenuio iccondabi. Nuquin Papan: “Matsesbēd tabadec nid,” caquini chondac. Adoauid icsho Nuquin Papa tantiaquidēn ěbitsen tantiatsiash.

⁴³ ¿Mitsipadquid yec ěmbi chiaid tantiash: “Tantiandenquien icpec,” quepe mibi? Ĕmbi abimbo chuisho tantiate bunenquio yec pamumēdacbimboec mibi iquēc.

⁴⁴ Min papabimboecquid Satanas nec. Aid bunacpadenuidi mimbi natiadquio iquēc. Ĕndenquimboshē Nuquin Papan tauamboen matses uanubi min papabimboecquid cuesunianquidquio nepampic. Aton padibi nec. Nuquin Papan chiacpadomboen namenquio yec chieshēnec muaquidquio nec. Aton padibi icquid yec matses muamequidquio nec. Aidēn madobimboecquin mimbi ěbi tantiatiapimbo icpec.

⁴⁵ Ëmbi Nuquin Papan chiaidquio abimbo chuisho mimbi tantiatiapimbo iquec. Icsambo icquidën ambembi chuisho mimbi tantienquio yaquien bëdambo ictsiash. Mabi icsambo icquidpenquio neyoc.

⁴⁶ ¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquio mimbi icpe?

⁴⁷ Nuquin Papa tantianuequidën Nuquin Papan chiaidquio chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshënquido chushcaic.

Esus chieshënquido cuënoten siantiadpambo yanaid

⁴⁸ —Nuquin Papa tantiesabombo ma mibi neyoc —Esus quesho tantiashien abi chieshënquido: —Ma mibi podobitsi icsa dapuduedash neyoc. Tantiadenquio yec mibi onquec. Samadia yacnoquidobimboec icsamboshë ma mibi iqueyoc —caquien

⁴⁹ Esus: —Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquio abimbo mimbi chiec,” catiadquidi mimbi ëbi: “Muec nec,” capec.

⁵⁰ “Mabi: ‘Bëdambo iquec,’ canu,” quenquio iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac.

⁵¹ Tantia. Mibi bëdamboen chuinu. Ëmbi chiacpadomboen naquidquio unësenquio ictsiash —quepondash Esus ompoacbimboen chiec. —Ëbi tanti-aquido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc —quequin tantiec adondash.

⁵² —Unësenquio ictsiash —quesho tantiash Esus chieshënquido: —Ma mimbi tantiadenquio icnuc chuipayoc. Adsho: “Mayan icsa dapuduedashien nec,” mibi caombi. “Ëmbi chiacpadomboen naquidquio unësenquio ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bëdamboen isaidombo abitedi unëspampic.

⁵³ ¿Aido Nuquin Papan namiampidombo icnuc Nuquin Papan namequaidquioda ne? ¿Mitsipadquid mibi nepe? Muequien mibi nechitec —quepondash.

⁵⁴ Adoquien Esus: —Ëmbembi: “Mabi: ‘Bëdambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bëdambo iquec,” quequin ëbi comapenen tantiaquin namec.

⁵⁵ “Tantiembi,” mimbi caboed Nuquin Papa ma mimbi tantienquio yoc. Ëmbien Nuquin Papa tantiaquiec. “Aid tantienquio iquembi,” quec mibi yapadec muatsiabi. Mambi con Pa tantiaquin ambi chiacpadomboen nayoc.

⁵⁶ Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuësh choash bëdambo icmianquidquio matsesbëdi tabadendac,” quequin tantiec cuishonquepadenec. Nuquin Papan tantiamiac ëbi aden tantiapadenec —quepondash Esus.

⁵⁷ Adsho tantiashun Esus chieshënquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanën mibi tantiatiapimbo icpampic —caquien

⁵⁸ Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquio nebi —quepondash Esus.

⁵⁹ Adsho tantiash nëishtanequin: —¿Icsamboenda chuipec? ¿Nuquin Papada muauapebac? —quetanquin cuënote dapa bedtanequin: —Seshunenu —cac siadenquo yec ompodanec cuempondash Esus.

9

Esusën bëshuaid bëdamiaid

¹ Yuecquio ictaniash chonoadenquo icte ushën capucuequin Esusën dada bëshuaid istuidpondash. Anin bëshuacshobi tishnëdaid niøndash.

²⁻³ Aid istuidshumbimbi: —En chui, Icho. Tantuanu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaidta nepec? —caquien: —Padenquo. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? —caondambi. Adoaquin: —Padenquo. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec.

⁴ Nëbi ambi chiacpadomboen nanuna. “Nainabi inchëshmane,” quiash comapenec chonoadnuna. Inchëshën matses chonoadesa —quepondash Esus. —“Con Pan tantiaidtedi nainabi unëshmane,” qeshun unëshabi icquin con Pan chiaidtedi nainendambi —quequin tantiec: —“Nainabi inchëshmane,” quiash comapenec chonoadnuna —quiøndash Esus.

⁵ Adashic: —Matsesbëd icquin Nuquin Papa bëdamboen tantiamequidquo nebique. Nëidtsen tantiamenu

⁶ —quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

⁷ Adotanguimbi: —Acte tiquidimbo icquid Sidoe caidën bëpamëdec nid —cac nidash bëpamëdtanec bëdamboen isec aton shubuno nidpac caondash. Aid acate con onqueten Sidoe quequin buanaid caic.

⁸ Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: —Bëshuaid nebique. Piuccquid beccho —quedonetsec tsadtsëcsho isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash.

⁹ Utsi-utsiec: —Ai, aidquiobi nec —quenubi utsibo: —Padenquo. Aid-bimboecquidien nec —quesho tantiash: —Aidi nebi —quepac caondash bëshuacboed.

¹⁰ Adsho tantiashun: —¿Mitsipadec bëdano? —caquien:

¹¹ —Esus caidën bëdamioshi. Nidaidën uicchun cuishtucashun nidaidbëdta uicchun cabiunshun bëbitaccashun: “Acte tiquidimbo icquid Sidoe caidën bëpamëdec nid,” cac nidash bëpamëdec bëdanobi. Nëbi bëdamboen isembi —quepac caondash bëshuacboed.

¹² Adsho tantiashun: —Mibi bëdamequid ¿mitsimbo iquec? —cac: —Tsaudi —quepac caondash bëshuacboed.

Bëshuaid bëdameboed chuimiaid

¹³ —Bëdamioshi —quesho tantiashun: —¿Abimboda capec? Ma con chuiquidon chuimenu —quequin padiseyobo yacno bëshuacboed buampac caondash.

¹⁴ Buanaacshobien padiseyobon: —Chonoadenquo icte ushën nac caosh —quequin tantiaquin:

15 —¿Mitsipadec bédano? —caquien: —Esusën nidaidbédta uicchun cabi-unshun bēbitaccac bēpamēdec bédanshun nēbi bēdamboen isembi —quepac caondash bēshuacboed.

16 —Bēpamēdec bēdanobi —quesho tantiashien chuiquido onquecuededpac caondash. Utsi-utsiec: —Nuquin Papa tantiaquid icquin Nuquin Papan chaid niac-niaquenquo ictsiash. Chonoadenquo icte ushēn nēid bēdamequin ma Nuquin Papan chaid niac-niacpayoc —quenubien utsibo: —¿Nuquin Papa tantiesānda aden bēdamepatsiash? Ma comapenen tantiaquin nacnempaboc —quepac caondash. Adshumbic abitedishun: —Esus icsambo iquec —cainquo icquin

17 bēshuacboed chuipac caondash. —Mibi bēdamequid ¿tsutsi mimbi cape? —caquien: —Nuquin Papan: “‘Yuecshun naden naindambi,’ quequin chaidquo chuiquidien nec,” caimbi —quetanec bēshuacboed nidpac caondash.

18 Aid nidnubien Esus chieshēnquido: —Bēshupenquien niash. Muequien niashe. Anibēdta amē chuimenen chomenuna —quetanquin

19-20 chomeshun bēshuacboed cain: —¿Min madoda niosh? —capac caondash. Adoac: —Ai, con mado niosh —queshobien: —¿Bēshuacshobida tishonda? —capac caondash. Adoquien: —Ai, bēshuacshobi tishondaid nec —ani qeshobien: —Bēshuaid ¿mitsipadec bēdanosh? —capac caondash.

21 Adoquien: —Tsaudi. Bēdansho isambo iccombi. ¿Tsundambien bēdamechitash? Dada ēnden caniaid neque. Aidi chuime —quepac caondash bēshuacboedēn tita amēbēdi.

22 —“Nuquin Papa yacnuēsh choquid Esus nec,” quequido Nuquin Papan chaid chuibante shubun puduedmenquien ictiad —quequin chuiquidon chaid tantiash dacuēdec:

23 —Dada ēnden caniaid neque. Aidi chuime —quepac caondash.

24 Adoac padpiden bēshuacboed chomeoapac caondash padiseyobon. Chomiash: —“Nuquin Papan bēdamioshi. Nuquin Papa bēdambo iquec,” ¿quecta icco? Ma Esus Nuquin Papan chaid niac-niacquid neyoc. Ma icsamboshē icquid neyoc —quepac caondash.

25 Adsho tantiash bēshuacboed: —Icsamboshē icquidien Esus nechitec. Aden tantienquo iquembi. Mabi bēdameboc. Isenquo icboedēmbi mambi nēbi bēdamboen iseyoc. Adenuidsēqui tantiembi —quepac caondash.

26 Adsho tantiashun: —¿Mitsipaden mibi bēdamiosh? —caquien:

27 —Mambi mibi chuipaboc. Ma mimbimbobi tantienquo icboc. ¿Atotsi quequin padpiden: “Ēbi chui,” cai? ¿Esus tantiatiadquioda icti? —capac caondash bēshuacboedēn.

28 Adsho tantiash nēishtanquin chushcapac caondash. —Mibi Esus tantiaquidquo nec. Mibi icsambo iquec. Ēbien nuquin tsusedpa Moises tantiaquidquo nec.

29 “Moisesien Nuquin Papan chuiquin namepampic,” quequin tantiembi. ¿Tsuntsin chiac mibi bēdamequidēn napash? Ma mibi bēdamequid ēmbi tantiacmaidquo neyoc —quepac caondash chuiquido.

30 Adoquien bēshuacboed: —¿Abida cai? “Dadpenquo tantiembi,” ma mibi quepaboc. Adboedi: “Ēmbi tantiacmaidquo nec,” ¿quecta ique? Mimbi tantiacmaidēmbini bēdamiosh. Ma bēdambo yoc.

31 Abi icsaid ēnabi icquidēn chianesho Nuquin Papan tantienquo ictsiash. Abi tantiaquin ambi chiacpadomboen naquidēn chianiac tantiashun Nuquin Papan nashuntsiash.

32 Anin bēshuacshobi tishaid bēdamenquo ictenec. Adquid bēdamequid nibēdpadene.

³³ Nuquin Papa tantienquo icquin Esusën ëbi bédamenquo ictsenosh. Nuquin Papa tantiaquimbini bédamiosh. Ma Esus bédambo icquid neyoc — quepac caondash bëshuacboed.

³⁴ Adsho tantiaş nêishquioshon; —Bëshuacsho tishaid yec mibi icsamboshë iquec. Icsactsëccquidên chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshênquidon bëshuacboed Nuquin Papan chiaid chuibante shubun padpiden puduedmenquo icpac caondash.

Ambi bédameboed istuidoashun Esusën chiaid

³⁵ Adnubien: —Mimbi bédameboed cuemiac caosh —quesho tantiaşhun Esusën ambi bédameboed istuidpondash. Istuidshumbic: —Nuquin Papan matsesmiadquo caic: “Nuquin Papa yacnuësh choquid nec,” ¿quequinda mimbi tantiape? —capondash Esusën ambi bëshuaid bédameboed chuiquin.

³⁶ Adoaquien: —¿Tsutsi neque? Isnu —cac:

³⁷ —Ëbi nec. Mibi bédameboedi nebi —caquien:

³⁸ —Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquo yec mibi bédamboshë iquec —quetanec ismenuec danëshên tinquebudpondash.

³⁹ Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbéd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiaşo Nuquin Papan bédamboen isec. Utsibo: “Nuquin Papa tantiaquiembi,” quec muaquidon ëbi tantiatiapimbo icquin Nuquin Papa tantienquo iquec —quepondash Esus.

⁴⁰ Adsho tantiaş nêishtanec: —¿Nuquin Papa tantiesabodabi nedi? —quepondash Padiseyobo.

⁴¹ Adsho tantiaşien: —Nuquin Papa tantiesambo icsho ëmbi tantiamiac Nuquin Papabêdta ëbi tantiaşo Nuquin Papan mibi bédamboen istiaş. “Nuquin Papa tantiaquiembi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec —quepondash Esus abi chieshênquido chiec.

10

Obecabimboecquido chiaid

¹⁻² Adshumbic abi chieshênquido Esusën padpiden chuioapondash ompoacimboen chuiquin. —Tantia. Mibitedi chuinu. ¿Mitsipaden nuquin matsesën aton yua obeca dadpen dayun uaquin napec? Obeca daquênë uaidën puduedte shëcuênquo obeca icbo puduedquid. Daquênë uaid mayadec puduedquidien ampequid nendac.

³ Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan.

⁴ Adshobic icbon daquênë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuënec. Con icbo nec,” quequin icbo tsibanquid obecan.

⁵ Utsibon cuënaquien tsibanenquo yec dacuêdec cuenquid obeca. Icbouidsëqui tsibanquid obeca nec —Esus qesho tantiaşien:

⁶ —Tantiadenquo yec mibi onquec —quepondash Esus chieshênquido.

⁷ Adsho tantiaşhun Esusën chuipondash. —Tantia. Mibi bédamboen chuinu. Obeca daquênë uaid puduedte shëcuëbimboecquid nebi.

8-10 Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Ëbi tantiesain Nuquin Papa yacno puduedtiapimbo iquendac. Ëbi tantiaquido cain obeca caombi. Aido bëdamboen dayun uaquin bëdamboec tabadquid icmendambi. Aido unësacsho uincuemeshun Nuquin Papa yacno ëbëdi tabadmendambi. Adec ëbi bëdambo icnu ampebimboecquid abi iquec. Ëbi tantiaquido icsamete bunguido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquo iquec. Aido Nuquin Papan cuidtequidombo nendac. Padnuen ëbi tantiaquidon mimbi chiaid tantienquo icquimbi ëmbi chiaiduidtsëqui tantiendac —quepondash Esus abi chieshënuquido chiec.

Ëbi tantiaquido dayun uaimbi, quequin chiaid

11 Adashic Esus padpidec onqueoapondash. —Obeca icbobimboecquid nebi. Icho cudasachimboec ëbi tantiaquido cudasnuec ëbided cuidadec unësendabi.

12-13 Utsiboen adenquo ictsias. Piuçquid bednuen obeca isquidbimboec iquec. ¿Mitsipadopaid obeca isquidën? Bëdi dapa chosho isun: “Con napenquo nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidën icbonpenquo nianacsimboen ma mimbi icsamboen napayoc. Nuquin Papa tantiate bunguido ma mimbi Nuquin Papambo tantiamenquo iqueyoc —quepondash Esus abi chieshënuquido chiec.

14-15 Adashic abi onquec: —Ëmbien matses bëdamboen tantiamequin ëbi tantiaquido dayun uaindac. Nuquin Papabëd ëbi tantiananacpadquieç ëbi tantiaquidobëdtsen tantiananquiebi. Aden ëbi tantiaquido tantieç Nuquin Papa cuidmenquo icnuec ëbided cuidadec unësendabi.

16 ¿Nëid matses isadaidbuidtsëqui tantiectabi adec unëspadi? Padenquo. Matses utsibontsen Nuquin Papan tantiamiaido icquin ëbi tantiendac. Aidobëdta nëid matses con matses caquin abitedi bëdamboen dayun uaindambi.

17 Con Pan tantiamiacpadec ëbided cuidadec unësendabi. Aden ambi chiacpadomboen ëmbi nasho con Pan ëbi tantiaquieç. Unësash ëbembu uincuenendabi.

18 Matsesën ambembi ëbi unës uatiapimbo ictsias. Ëmbi tantiacpadquiequi matsesën unës uadendabi. Adecbidi uincuentiadquo yec ëbembu uincuenendabi. Aden con Pan namiacpadomboen naindambi —quepondash Esus.

19 Adsho tantiash con matses chuiquido nadeç onquecuededpac caondash.

20 Esus chieshënuquido: —Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquo tantiatiapimbo iquendabi —quenubien

21 utsibo: —Podobitsi icsa dapuduedashta ¿adec onquepatsias? Bëdamboequien onquiosh. ¿Podobitsi icsa dapuduedaidënda aden bëshuaid bëdamepatsias? Bëdambo icquidëmbien adotsias —quepac caondash.

¿Quidistu caidta ne? quequin chiaid

22 Yuec ictanec con matses cuëdënuec Edusaden yacno cho-chopondash. “Nuquen Papa tabadte shubu uashunaidnoshon tsusedpabon icsa uaquido cuemenëdaid ushë tantieç cuëdëntanu,” quianec cho-chopondash. Ambo iquenuampamboec icpondash aton padibi.

²³ Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquio puduedabi quënë cachoqui capupondash. Aid quënë cachoc: “Sadomonën nacnenaaid nec,” caondash.

²⁴ Ambo Esus capusho isashien con matses chuiquido Esus natia datsidadshun: —En sebadënquio chui. Tantienuio yec tsadtiapimbo iquebique. Mimbi cuembo chuisho tantiatiadquio iquebi. ¿Nuquin Papan chomiaid Quidistu caidta ne? —capondash con matses chuiquidon.

²⁵ Adoaquien Esus: —Mambi mibi chuipaboc. Ma mimbimbobi ëbi tantienquio icboç. Con Pan: “Adota,” cac comapenen tantiaquin nabandeniombi. Mibi bëdamboen tantiamenuen adodeniombi.

²⁶ Adosho isash mibi: “Ai, Nuquin Papa yacnuësh choquidien nec,” queti-adquidëmbi mimbi ëbi tantienquio iccoc. Nuquin Papan tantiamiabi yaido icquin mimbi ëbi tantiatiapimbo iquec.

²⁷ Con Pan tantiamiaidien ëbi tantiaquid yanendac. Adshun obecan aton icho tsibanacimboen ëmbi chiacpadomboen natiadquio yanendac.

²⁸ Aido unësacsho uincuemeshun Nuquin Papa yacno ëbëdi tabadmen-dambi padpidec unëstiapimbo icnuc. Unësabi icsho: “Con na nec,” qeshun bëdamboen dayun uaindambi. Ëmbi adoacsho bedshunacimboen icsambo icquidën yuaquin Nuquin Papan cuidtequido icmeoatiapimbo iquendac.

²⁹ Con Patsen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho ademvidi mënchictiapimbo iquendac.

³⁰ Aden ëbi bedshuntiapimbo icquin con Patsen bedshuntiapimbo iquendac. Con Papadquidquio nebi —quepondash Esus.

Cuënoten seshunetiadpambo yanoaid

³¹ —Nuquin Papapadquidquio nebi —Esus qesho tantiash nëishtanquin cuënote dapa bedshun abi chieshënquidon Esus seshunetiadquio icoapondash.

³² Adsho isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? —quepondash Esus.

³³ Adoaquien: —¿Bëdamboen nabanshodambi: “Mibi seshunenu,” cadi? Padenquio. “Con Papadquidquio nebi,” quequin Nuquin Papa muauasho mambi mibi nayoc. Matses icquin mimbi aden icsamboen chuisho tantishumbimbi mibi seshunec —quepondash abi chieshënquido.

³⁴ Adshobien Esusën: —Nuquin Papan chiaidquio nuquin tsusedpan naden dada uapampic. “Nuquin Papa naded onquec: ‘Min matsesën ëmbi chiacpadomboen nasho: Ëbipadquid nec, caombi,’ queposh Nuquin Papa,” quequin dada uapampic.

³⁵ Matses caic: “Ëbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chiac,” quequin chiambo iquec. “Muesambo icquin Nuquin Papan icsamboen chuitiapimbo iquec,” qeshun mimbi chushcambo iquec. Nuquin Papa adoambobi ¿ëbida chushcai?

³⁶ Nuquin Papan namiacpadec abi yacnuësh chondaid nebi. Adquid yec: “Nuquin Papan Madombo nebi,” quioibi. Ëbi adsho tantiashun ¿atotsi quequin ëbi chushcai? ¿Nuquin Papadambi muauadio? Mambi abimbo caboc.

³⁷ Ëmbi chiaidquio tantiatiapimbo icquimbi ëmbi naidquio tantiata. Ëmbi Nuquin Papan namiacpadomboen comapenen tantiaquin nabanenquio icsho isun mimbi ëbi mua catsiac.

³⁸ Con Pan namiacpadomboen nasho isun: “Ai, ambi chuibocpadquidshenda nepec,” ëbi cata. Ęmbi chiaiduidtsëqui tantiatiapimbo icquin adota. Adshun: “Ai, Nuquin Papapadquidquibidien Esus nec,” quequin mimbi tantiabentsiac –quepondash Esus.

³⁹ Adsho tantiaash padpidec nëishtanquin abi chieshënquidon: –Bedchitono –caqui bedadenquio icpondash.

⁴⁰ Adashic acte Odan caid potiash con shënisison tauaquin matses acten mentodenecono Esus nidoapondash. Ambo ëbi chedobëdi fabadpondash.

⁴¹ Adshumbic Esusën comapenen tantiaquin ismequin ambo icquido chuibaampondash. Adsho tantiaashun: –Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadene. Esusën adobansho isun: “Nëid chuiquinshenda Uan padon abimbo capadene,” caimbi –cabededpondash anocquidon.

⁴² Adshumbic: –Nuquin Papa yacnuësh choquidien Esus nec –quequin Esus tantiabempondash.

11

Dasado caid unësaid

¹ Udeya yacnuësh Esus cuembon Dasado Esusën utsibimboecquid unëstiadtsëcquio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash.

² Madian aton manëdaidën ucbanquin Esus tanoshcabi icnuc adec aton utsi unëstiadtsëcquio yanac caondash.

³ Adnubien aton chuchun: –Esus chuitan –cac aton matsesën Esus chuituidpondash. –Mimbi con utsi caidquio unëstiadtsëcquio yanoshe. En isec cho –catuidpondash.

⁴ Adoaquien Esus: –Chiata. ¿Unësash chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” qeshun naindambi –quepondash.

⁵ Adbosh Dasado aton chuchubëdta tantiaquidquio yequi

⁶ badedquio nidenquio yec anobi daëdec ushpondash Esus.

⁷ Daëdec ushumbic Esusën: –Nuqui icbocno Udeya caidën padpidec nidnu. Nid –capondashi.

⁸ Adoaquimbi: –Icho, ma mibi anoshon cuënoten seshunetsempondac. ¿Anobidida nidiad? ¿Ada: “Seshunequionoshe,” cadec? –capondambi.

⁹⁻¹⁰ Adoaquien cuembo chienquio icquimbi: –Badiadën capuec tocoshquetanec uebudesa. Inchëshëmbien tocoshquetanec uebudquid –quequin Esusën chuipondashi. –Nëbi ëbi unës uatiapimbo iquec. Badiadën nidachimboen con Pan tantiaidtedi nainabi icsho ëbi unës uatiapimbo iquec. Inchëshën uebudachimboen ambi tantiaidtedi nainshobini ambi tantiapadenëquio matsesën ëbi unës uaindac –quequin tantiec adondash Esus.

¹¹ Adshumbic Esusën padpiden ompoachimboen chuioapondash. –Ęmbi con utsi caid Dasado ushtoaccoshe. Isucumec nidnu. Nid –quesho

¹² tantiaashini: –Ma ushnu. Ushash isucunquid –quepondac.

¹³ Esusën Dasado unësaid chuinubi Dasado ushe dantsëcondambi.

¹⁴ Adnubien Esusën seabadëquio chuipondash. –Dasado unësaccosh.

¹⁵ “Bëdamec nidiadquidi niobi” ¿quepectabi ique? Padenquio. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombic. Nëbi mibi ismec nidnu. Nid

16 —caquien: —Ai, abĕdquiobi unĕsec nidnu. Nid —quampondash Tomas anin abi ushĕmbi daĕdpambo tishaid. Adanec abitedi nidondash.

Unĕsaid uincuemequidquo nebi, quiaid

17 Adashic unĕsacno anoentsĕqui Esus chopondash. Choshon: —Unĕsacsho chococash daĕd-daĕdquieci ushobi —quetsĕcquieci onquecuededsho tantiatuidpondash.

18-19 Esus choabi icnuc con matses chuiquido Dasado unĕsacnuĕsh sedenquenuc Edusaden yacnuĕsh cho-chopac caondash. Unĕsaid nĕbi ictsĕcncuc tedes quidometedos tiontsĕcquidĕn badedquio cho-chopac caondash. Chochoash unĕsaidĕn chuchubĕd sedenquec tabadpac caondash.

20 Adnubien: —Esus choec —quesho tantiaish Madta bĕquedec chopondash aton chibi Madia shubuno sedenquec tsadnubi.

21 Choequien Esus bĕquedec: —Mibi icnuc con utsi unĕsenquio ictsenosh, Icho. Con utsi unĕsosh.

22 Mimbi chiapadomboen Nuquin Papan nĕbi natsiash —quepondash Madta: —ĭAda con utsi uincuemetsia? —quequin chuitiadquio yequi.

23 Adoquien Esusĕn: —Min utsi uincuenendac —capondash.

24 Adsho tantiaish: —“Ai, yuecash unĕsaido abitedimbo uincuemete ushĕn con utsi uincuenendac,” quequin tantiambi —quepondash Madta.

25 Adsho tantiaishun Esusĕn: —Ĕbibi matses unĕsaid uincuemequidquo nebi. Ĕmbi tantiapadĕnquio uincuenendac. Aden ĕbi tantiaquido unĕsacsho uincuemendambi.

26 Ĕmbi adoac Nuquin Papa yacno ĕbĕdi tabadendac padpidec unĕstiapimbo yec. Ĕmbi aden chuisho tantiaish: “Ai, abimbo mimbi caindac,” ĭquequinda tantie? —capondash Esusĕn.

27 Adoquien Madta: —Ai, adembi tantiambi. “Nuquin Papa yacnuĕsh choquid Quidistu caidien mibi nec. Nuquin Papan Madombo mibi nec. Con tsusĕdpabon dada uaquin chuipampidquien nec,” mibi caombi —quetanec

28 nidpondash aton chibi chieci. Nidshun: —Nĕmbo cho, chibi. Chuinu —cac aton chibi choshobien: —Esus chosh. Mibi iste bunoshe. En isec cho, chibi —caquien

29 Esus bĕquednuc badedi choquin istuidpondash.

30 Shubu dadpen yacnombo choabi icsho Madtan bĕquedacnobi Esus tabadsho Madiantsĕn istuidpondash.

31 Adec Madia nidsho isun chococacnobi sedencaic nide danquin abĕd sedenquenuequidon tsibanampac caondash.

32 Adnubien Madia Esus istuidtanec dayumbudec sedenquampondash aton utsi tantieci. Adec shubitanec ĕnĕdash: —Mibi unĕsquio iccoc, Icho. Bĕdambo icquid mibi nec. Mibi icnuc con utsi unĕsenquio ictsenosh —quepondash Madia Esus caic.

33 Adnubien Madia tsibanec cho-choec con matses chuiquido sedenquetuidpondash. Madiabĕd sedenquecuededsho istanec: —Ai, unĕsquio icnuc nec —quiash Esus abitsen shubiantiadtsĕcquio icpondash.

34 Adec shubiantiadtsĕcquio tsadacnuĕshien Esus: —ĭMitsimbo mimbi chococaye? En isnu. Nid —quepondash. Adoac: —En isec cho —quianec nidnubien

35 shubinidequi nidpondash Esus.

36 Adec shubinidsho isumbien: —Ma Dasado unĕsquio icnuc shubieyoc —cabampondash con matses chuiquidon.

37 Adnubien utsibo: —ĭAtotsieshun bĕshuaid bĕdamiondaidĕmbi Dasado unĕso bĕdamenquio icposh? —quepondash.

Esusĕn Dasado uincuemiaid

³⁸ Nidquimbi chococacno istuidequi Esus shubiantiadtsĕcquio yanoapon-dash. Nidaid cuĕnoteuidpambo icquid macuĕsh tsimpiduc shĕcuĕ uaidĕn unĕsaid nauedshun cuĕnote dapan bĕtinacnuĕsh shubiantiadtsĕcquio ic-condash.

³⁹ Adashien Esus: —Cuĕnote bidiacquin shĕcuĕ shĕcne —quepondash. Adsho tantiasĕ unĕsaidĕn chuchu Madta: —Padi. Ĕnden pisenashe. Chococash mabi daĕd-daĕdquieq ushboc —quepondash.

⁴⁰ Adoquien Esus: —Dacuĕdenda. Mambi mibi chuiboc. Mimbi: “Nuquin Papan Madombobien mibi nec,” ĕbi casho: “Ĕmbi comapenen tantiaquin nabansho mimbi isendac,” mambi mibi capaboc. En na. Baded bĕcune —cac

⁴¹ cuĕnote shĕcuĕ bĕtinaid shĕcnequin bĕcunepondash.

Adsho istanquimbien Esusĕn abuc isquin Nuquin Papa chuipondash comapenec onquequin. —Papa, ĕmbi nĕbi chuisho mimbi tantiec. Ĕmbi chuibocpadomboen mimbi naindac. Mibi bĕdambo iquec, Papa.

⁴² Ĕmbi otacquio chianiaid mimbi tantioc. Ĕbi datsidadaido tantiamenuen nĕbi comapenec onquequin mibi chiemi. “Mibi chuitanquin ĕmbi comapenen tantiaquin nabansho isun: ‘Nuquin Papan chomiaidien nec,’ quequin ma nĕidon ĕbi tantianu,” queshun comapenec onquequin mibi chiemi, Papa. Padi, aidtedtsĕqui mibi chiombi, Papa —quepondash Esus.

⁴³ Adtanquimbien comapenen cuĕnquin: —Dasado, puduenec cho —capondash.

⁴⁴ Adoquien Dasado badedquio puduenanec chopondash abi dashcute dataniacchobi. Unĕsacsho uesquin dashcuten datanefanquin dashcuten abi bĕpucacchobi chopondash. Adĕc chosho istanquin: —Baded dashcute dachic. Ma nidnu —capondash Esusĕn.

*Nĕbien Esus unĕs uametiad, quiaid
(Mat 26.1-5; Mad 14.1-2; Duc 22.1-2)*

⁴⁵ Aden Esusĕn ĕnden unĕsaidquiobi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash.

⁴⁶ Adnubien utsin Edusaden yacno nidshun Esus chieshĕnquido padiseyobo chuituidpac caondash. —Esusĕn unĕsaid uincuemiash —quepondash.

⁴⁷ Adsho tantiatanquimbien chuiquid dapan abĕdtan chuiquid utsibo chochomepac caondash padiseyobo yec tsusio dapabo yec quenuc. Aden chochomiash tabadec onquepac caondash. —ĔMitsipadotiad? Nuquin matses ismequin comapenen tantiaquin dadpen nabampac caosh.

⁴⁸ Aden Esusĕn nabansho isun nuqui ĕmiabi icsho nuquin matsesĕn abitedishun abi chuiquid dapa Esus icmetsiasĕ. Adnubien nuqui yuaquido Doma yacnocquidon ambi chuiquid icmiacmaidquio chuiquid yansho isun nĕishun nuqui acshun siatsiasĕ. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiasĕ. ĔMitsipadotiad Esus? —quepac caondash chieshĕmĕnquido.

⁴⁹ Adnubien abĕdtan chuiquido chuiquid dapambo aid setan icquin Caipas caidĕntsĕn chuipac caondash. —ĔMidapadotsĕcquien mimbi chiendac? Tantiadĕntsĕcquio icnuc ma mimbi chuipaboc.

⁵⁰ Tantia. Mibi bĕdamboen chuinu. ĔAtotsi quec: “Abitedi unĕs uaindac,” mibi quepe? Ma nuquin matses abitedi unĕs uainquo icnueshun Esused unĕs uamenuna —quepac caondash chuiquid dapambo abĕdtan chuiquido chic.

⁵¹ Aden chuiquin ambembi chiambo Nuquin Papan oncamiac Nuquin Papan chiaidquio aden chuipac caondash. —Nĕid setan abĕdtan chuiquido

chuiquid dapambo nec —queshun Nuquin Papan aden oncamaiqui Caipas onguepanēdash. —Matses cuidmenquoio icnuec con Madoded cuidadec unēsendac —queshun Nuquin Papan Caipas aden oncamepanēdash.

⁵² Aden Caipasēn chuinēdaid tantiaquin ēmbitsen chuinu. Tantia. ¿Isadaidbouidtsēqui cuidmenquoio icnuecta Esus abided cuidadec unēstiondash? Padenquoio. —Matses utsitsen abi tantiaquid yansho isun abēdi tabadmenuec Esusded cuidadec unēspondash —quequin tantiambi. Nēbi Caipasēn chuisho tantiashun tsusiobon chiaid chuinu.

⁵³ Aden Caipasēn Esus unēs uamete chuisho tantiashien Esus chieshēnquido: —Nēbimbobien Esus unēs uametiad —quecuededpac caondash.

⁵⁴ —Tsusiobon mibi adosh —quesho tantiatanequien chieshēmēnquido ismenquoio yec Esus cuempondash. Cuenegi nidaid utsin nidash masi dapa yacno anoentsēqui shubu dadpen icquid Epadain caid yacno nidpondash. Ambo tabadquin ēbi chedo Esusēn chuibampondash.

⁵⁵ Epadain caid yacno tabadnubien Nuquin Papan con tsusedpabo unēs uainquoio icquin matamiampid inchēsh tantiec cuēdēnuec Edusaden yacno con matses nidanepac caondash. Cuēdēnec taēabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuēdēntemaid,” quedenegue —quianec nidanepac caondash.

⁵⁶⁻⁵⁷ Adshumbien Edusaden yacnoshon Nuquin Papa tabadte shubu uashunaid daquēnē uaidēn puduedtanquin Esus iste bunquin nibēntuidpac caondash mishtemaid mishquidon. Nibēntuidshobien: —Nuqui chuiquido nadpac caosh. “Esus istuidshun ēbi chuita. Bedshun unēs uamechitono,” quepac caosh —quesho tantiashien: —¿Ada Esus chopeba? “Unēs uamenushe,” quiaish choenquien icchitec —quecuededpac caondash.

12

Madia Dasadon chuchun Esus tanoshcaid

(Mat 26.6-13; Mad 14.3-9)

¹ Aden mishtemaid mishquidon abi nibēnubien Edusaden anoentsēqui ambi Dasado uincuemiondacno Betania yacno Esus chopondash. Seistedec ushash Nuquin Papan matamiampid inchēsh tantiec cuēdēnec taēnushi niondash.

² Ambo chosho isash: —Esus bēdambo iqueque. Pemenu —queshun: —Pec cho —cac puduedash tabadpondash nēidtedi. Nēidic Esus. Nēidic Dasado. Nēidic shubu icho. Nēidic Esusbēd icquid ēbi chedobi. Nēidic Dasadon chuchu daēd. Aidtedi icpondash. Adec penuec tabadsho Madtan pete menebampondash.

³ Adnubien Madian: —Esus bēdamboshē iquec. Ismenu —quetanquin bēdamboshē nuadquidēn Esus tanoshcapondash. Tanoshcatanquin aton manēdaidēn taucpondash. Aden tanoshcaid shubu anuestsēcquiec comapenec nuadpondash. Piuquid dadpenquoio menequin bedaid niondash. Sedunten cushtoaid bēdambo nuadquid nado caid niōndash.

⁴ Adsho isun Esus bedmequidēn Udasēn Madia chushcapondash.

⁵ —Padi. Mimi uesquieque. Utsi uain nata. Nēid danoshcate meneshun piucquid dadpenquoio seta abentsēc matamec chonoadaidtedquiobien bedtiad. Adoshombien piucquid nibēdquido aid piucquid menetiad —capondash Udasēn.

⁶ Adomboen chuisho tantiashun Udas bēdambo icquidquido danondambi. Esusbēd icquido ēbitedishun piucquid bedshun sauedten sauedshun dayun uaquidquiemi danondac. Piuquid bēdamboec dayun uashumēnenquoio

yequi abibi ampeshumënashi adondash Udas. Aden ambi ampiaid tantiequi: —Piucquid nibédquidoen menetiad —quequin muaquin Madia chushcapondash.

⁷ Adshobien Esusën: —Padi. Chushcainda. Ma nanu. Ma nuquin matsesën unësaid bédambo nuadnuc danoshcapaid yoc. “Nëbi con Mado unësendac,” quequin Nuquin Papan tantiamiacpadomboen ëbi unëso chococate tantiaguin Madian ëbi tanoshcaquin naic.

⁸ Piucquid nibédquido dadpen iquec. Nibëdenquio iquendac. Ëbien mibéd icboedi nëbi nibédquido yanendac. Ëbi tantiec Madia bédambo iquec — quepondash Esus Udas chiec aidi: —Abi chieshënquido Esus bedmenu — quepanuda.

Dasadotsen cuesunetiadquio yaid

⁹ Adnubien: —Betania yacno Esus choaccosh —cac Edusaden yacnuësh matses dadpen Esus isec cho-chopondash. Ambobidi Dasado Esusën uincuemiondaid icsho aidtsen isnuec cho-chopondash.

¹⁰⁻¹¹ Cho-choshon Dasado uincuemiondaid isumbien abentsëcshun abentsëcshunquien: —Comapenen tantiaquin nabanquidquio yec Nuquin Papapadquidquibidien Esus nec. Nuquin Papan chomiaidien nec — quequin Esus tantiabempondash. Esus tantiabenshumbic abi chuiquidon chiaid tantienquio yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabenosh,” quioshe. Dasadotsembien unës uatiad —quianac caondash chieshëmënquiec.

Chuiquid dapa ismiacimboen Esus ismiaid (Mat 21.1-11; Mad 11.1-11; Duc 19.28-40)

¹² Madian tanoshcaboc ushah Esus Edusaden yacno puduanec nidondash. Nidshobien Edusaden yacnuësh cuëdënuec cho-choboedon: —Esus choec —quesho tantiatanquin

¹³ niste podobiecquid bedbëtse nec Esus bëquedec cho-chopondash. Esus bëquedshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uiccaiqui:

“Mibi bédamboshë iqueque. Ëbi bédamboen ista. Nuquin Papan chomiaid yec mibi bédamboshë iquec. Con matses isadaidbo chuiquid dapambo mibi nendac,” quecuededpondash Esus caic.

¹⁴ Ambi podquedën choquin bedbëtsemboed cabayobitsecquidëmpi catsadtoanec Esus chosho isash adcuededpondash. Adec aid catsadte Nuquin Papan tantiamiacpadomboen con tsusedpan dada uaqin naden chuiampic.

¹⁵ “Edusaden yacnocquido chiec: ‘Dacuëdenda, Edusaden yacnocquido. Is. Cabayobitsecquidëmpi catsadtoanec mibi chuiquid dapambo choeque,’ quepec,”

quequin Nuquin Papan chiaid dada uapampic.

¹⁶ Adec Esus catsadtoanec chosho isun aden chuiampid tantienquio iccondambi. Esus abuc nidambimbi ëbitedishun tantiabenondac. —Esus chuiquinshenda nuquin tsusedpan dada uapampic. Aidën chiacpadomboen niste podo uic-uiccaquin: “Bédambo iquec,” quequin nuquin matsesën Esus ismebededpondash —quequin tantiabenondambi.

¹⁷ Esus cabayobitsecquidëmpi catsadtoanec choabi icnuc Esusën Dasado uincumesho isboedon: —Uincuemesho isombi —quequin matses dadpen chuibenepanëdash.

18 Adsho tantiashun: —Unësaid uincuemequid Nuquin Papan chomiaidien neque. Istanu —quianec Esus bëquedec cho-choshon aden niste podò uic-uiccaquin ismepondash.

19 —Esus bëdamboshë iquec. Nuqui chuiquid dapa nendac —quecuededsho tantiashien Esus chieshënquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

Matses utsibo: Esus isnu, quiaid

20 Edusaden yacno cuëdë nec cho-chobedo matses utsibo isadaidpembot-sen icpondash.

21 Adnubien adquido matses utsibon Esus iste bunquin shubu dadpen icquid Betsaida caid yacnuësh caniquid Esusbëd icquid Uedipe chuituidpac caondash. —Esus istiadquid iquebi —quesho tantiashien: —Chiata. Chuitambo —quianec nidshun

22 Esusbëd icquid utsi Andedesba chuibëtsenec Andedesbëd choequi Uedipe Esus chiec chopondash. —Matses utsibon mibi istiadquid iquec —caquien

23 aid matses utsibo isadaidpembo tantiamenuc Esus comapenec onquepondash. —Nuquin Papan matsesmiondaidquid icquin nëbimbobimbi ambi chiaidtedi nainendac. Èmbi adoacsho Nuquin Papan: “Mibi bëdambo iquec,” ëbi caindac —quepondash Esus abi unës uate chiequi.

24 Adshumbien ompoacbimboen chuipondash. —Tantia. Mibi chuinu. ¿Mitsipadquid pete ëshë chococaid icpec? Chococac canias bacuëec bëdambo icpaid yoc. Chococabi bëdambo ictiapimbo iquec. Adoacbimboen chococabi yac matses bëdambo icmetiapimbo iquendabi. Unësacsho chococac matses bëdambo icmequid nendabi —quepondash Esus.

25 Adashic padpidec: —Ambi naiduidi naquin ëmbi chiaid niacquido Nuquin Papan cuidtequido nendac. Ambi naiduidi nainquid icquin ëmbi chiacpadomboen naquido ëbëdi tabadtequido yanendac.

26 Adquid ëmbi chiacpadomboen natiadquid yec ëbi yacpadec chiesh-toenquid ictsiash. Adquidquid unësash uincuenash ëbëdi tabadsho Nuquin Papan: “Nëid con Mado tantiaquid bëdambo iquec,” capendac —quepondash Esus.

Esusën abi unës uate chiaid

27 Adashic abi unës uate tantiec Esus nadpondash. —Unësquioshë yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec nebi —quepondash Esus.

28 Adtanequien Nuquin Papa chiec: —Nuqui tantiacpadomboen nëbi nainembi, Papa. Èmbi aden nainacsho: “Nuquin Papa bëdambo iquec,” matses cameta, Papa —quenubien abucuëshquid Nuquin Papa comapenec onquepondash. —Ai, ëmbi namiaid mibi icsho: “Nuquin Papan namiaid nec. Nuquin Papa bëdambo iquec,” matses camepombi. Nëbi padpiden adomeoaindambi —quepondash Nuquin Papa.

29 Abucuësh onquesho bëdamboen tantiabi yec utsibo: —Abu cuëdtoec nec —quenubien utsibo: —Nuquin Papan abi yacnoshon uaid mayan bëdan Esus chuipash —quecuededpondash.

30 Adsho tantiash Esus: —¿Èbi tantiamenuc onquediosh? Padenquid. Mibi tantiamenucquien niosh. Aden tantiashun ëmbi bëdamboen chuisho tantiata.

³¹ Nuquin Papa chieshënquid Satanasën yuaido matses dadpenquioshë iquec. Nëbi Nuquin Papan tantiacpadomboen aido utsi-utsien Satanas bedshunendambi: “Chën. Con na neque,” quequin.

³² Èbi abuc dectanac aden matses èbi tantiaquid icmendambi – quepondash Esus.

³³ –Èbi cuesten dectanquin unës uaindac –quequin tantiec: –Èbi abuc dectanendac –quepondash Esus.

³⁴ Adsho tantiashe abi datsidadquido: –“Èbi dectanendac,” quiosh. “Unësebi,” quepequien iccosh –quiashien Esus chiec: –“Nuquin Papa yacnuësh choquid Quidistu caid unësesambo nendac,” quequin Nuquin Papan chiaid nuquin matsesën chuinubi: “Unësebi,” ¿quecta icco? “Unësebi,” quequid Nuquin Papa yacnuësh choquid ictiapimbo mibi iquec. “Nuquin Papan matsesmiaid nebi,” quequid ¿tsutsi mibi nepe? –quepondash Esus datsidadquido.

³⁵ Adoaquien Esusën: –Nadquid nebi –quenquio icquin ompoacbimboen naden chuipondash. –Mibi bédamboen tantiamequid nëbi isadenguio iquendac. Aid nibëdnuc bédamboen mimbi tantienquio iquendac. Nidabi aidën chuisho bédamboen tantiata.

³⁶ Nuquin Papan bédamboen iste tantiamequid tantiata. Adsho bédambo icmequin Nuquin Papan cuidtiapimbo icquid mibi icmendac –quepondash Esus abibi cadequi. Adtanec nidpondash aidon istiapimbo icnuc.

Isadaidbon Esus tantienquio yaid

³⁷ Èmbi dadpen chuiquin dada uabanacpadomboembi Esusën comapenen tantiaquin dadpen nabansho isun con matses isadaidbon Esus tantiatiadquidi Esus tantienquio icpondash.

³⁸ Aden Esus tantienquio icte con tsusedpa Isayasën Nuquin Papan tantiamicpadomboen chuiquin dada uapampic.

“Nuquin Papa yacnuësh choash nadec onquendac.

‘Mimbi chiaidquio chuibansho tantiashe: Muequien mibi nec, èbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuësh choquidien nec, quetiadquidi adenguio iquendac, Papa,’ quependac,”

quequin Esusën chuite Isayasën dada uapampic.

³⁹ Nuquin Papan pamumëdabimboecnuc icmiac con matsesën Esus tantienquio icpondash. Aden chuiquin Isayasën padpiden dada uapampic.

⁴⁰ “Isadaidbon èbi tantiatiapimbo icsho isun

‘Ma adembi tantienquio icpanuna,’ caimbi.

Ma adequi pabiate shëcuë nibëdabimboec icchitono.

Èbi tantiashe abi icsaid bëpiscudquin bédamboen ismane,”

quequin Nuquin Papan ambi con matses caido nëishëshun chushcaid Isayasën dada uapampic.

⁴¹ Nuquin Papambo Esusbëd uinsadpambo yec tabadsho isondaic icquin Isayasën aden Esus tantienquio icte chuiampic.

⁴² Con matses dadpenshun Esus tantienquio icnubi con matses chuiquidon abentsëcshun abentsëcshunquien Esus tantiauidpac caondash. Adoboedi: –“Nuquin Papan chiaid chuibante shubun puduedenda,” canushe –quiash dacuëdquin: –Esus tantiaquid nebi –quequin chuitiadquidi utsibo chienquio icpac caondash.

⁴³ –Ma con matsesëmbi èbi bédamboen isnu –quequinuidtsëqui tantiaquin aton matses chuitiapimbo icpac caondash. –Ma Nuquin Papan èbi

bëdamboen isnu. Aton Mado tantiaquid nebique –quetiadquidi adenquio yac caondash.

Cuidenquio icte chiec nebi, quiaid

⁴⁴ Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. –¿Ëbi tantianuequidën ëbiuidtsëquida tantiapadic? Padenquio. Ëbi tantiaquidën ëbi chomiondaïdtsen tantiatsiash.

⁴⁵ Adembidi con Papadquibidi ëbi icsho isun: “Ai, adquiobidien Nuquin Papa iquec,” quequin tantiatsiash.

⁴⁶ Nuquin Papan matses bëdamboen iste tantiamenuc matsesbëd tabadec chondabi. Adec matsesash: “Ëbi tantiaquido ma Nuquin Papan bëdamboen isquin bëdamboen tabadmenu,” quiash nebi.

⁴⁷ “Ëmbi aden chuisho tantiatiapimbo icquido nëbi cuidnu,” ¿quectabi icti? Padenquio. Nëbi Nuquin Papan bëdamboen isquin cuidenquio icte chuinuequini nec.

⁴⁸ Nuquin Papan cuidte ushëmbien ëbi tantiesabon: “Nuquin Papan chidshenda chuipadenec. Aid tantienquio yec icsabudquiopobi,” quequin ambibi tantiendac. Adsho Nuquin Papan cuidendac.

⁴⁹ ¿Ëmbembi chuiquindambi nadi? Padenquio. Ëbi chomiondaïd con Pan chiaidquio chiequini nec.

⁵⁰ “Ëbi tantiaquid ëbëdi tabadendac padpidec unësenquio yec,” queshun Nuquin Papan chiaiduidtsëqui chiequini nec –quepondash Esus.

13

Esusën abëd icquido tapanaid

¹⁻² Esusën comapenen tantiaquin nabanaid chuiquin aïdtedi chiombi. Nëbi abi tantiaquido tantiaquiec abided cuidadec unësaid chuiquin unësash abi uincuenaidtsen chuinu. Tantia. Nuquin Papan con tsusedpabo unës uainquio icquin matamiampid inchësh tantiaquin pec tabadte ushë nëbi yanuc inchëshën Esusbëd pec bëdamboec tabadondabi. Padnuen Udas Simon Îscadioten mado Satanasën tantiamiacpadomboen Esus bedmete tantiec tsadpanëdash. Adnubien Esus: –Nëbi con Pa yacno nidebi nëido nianec.

³ Con Pabëd tabadec ambi tantiacpadec abëdi abitedishun Icbombo iccondaidi nëbi anobidi nidoash adquiobidi icoaindabi. Adquid icquin nëido bëdamboec tantianante ismenu –quequin tantiaquin

⁴ yuan nacbimboen nadopondash. Uequin peboedi nidtotanec dashcute bëntse icquid dachiquidtanec daucudte tsibidiquepondash.

⁵ Tsibidiquetanquin pada-padaïd dapan acte cushtotanquin abëd icquido tapambampondash. Daucudten tauchbanquin tapambanondash.

⁶ Aden tapambanquimbi: –Mibitsen tapanu –cac Petedon: –¿Icbonda yua tapampaid? Ëbi tapanenda, Icho. Padi –capondash.

⁷ Adoaquien Esusën: –Ëmbi nasho nëbi mimbi tantienquio iquec. Yuecshun mimbi tantiendac. En tapanu –caquien:

⁸ –Padi. Mibi bëdamboshë icquid nec. Ëbien icsaquid nec. Yua namiacbimboen mibi tapametiapimbo iquebique. Padi –caoapondash Petedon. Adoaquien: –Ëmbi tapanabi yac con yuambo mibi ictiapimbo ictsiac –capondash Esusën.

⁹ Adsho tantiashun Petedon: –En na, Icho. Tapantanquimbi mapinobëdtabi ëbi mëpanta –caquien:

10 —Padi. Nesboed mibi nec. Taĕnouidsĕqui bĕchishacsho tapanembi. Ĕmbi bĕchish ucac mibi bĕdambo iquec. Abentsĕc icsambo iquec —quepondash Esus. —Bĕchish ucacimboen ĕmbi nasho Nuquin Papan mibi bĕdamboen isendac icsaid ucudachimboecnuc —quequin tantiec: —Ĕmbi bĕchish ucac mibi bĕdambo iquec —quepondash Esus.

11 —Udasĕn ĕbi unĕs uamenuen bedmendac —quequin tantiec: —Abentsĕc icsambo iquec —quepondash Esus.

12 Aden tapambanash dasiuidash samĕdquin pebededquin abĕd icquido Esusĕn chuipondash. —Ĕmbi naboed ĵada tantie? Tantia. Mibi chuinu.

13 “Ĕbi chuiquidquo mibi nec,” mimbi ĕbi capec. Adembidi: “Con Icho mibi nec,” mimbi ĕbi capec. Bĕdamboen mimbi chiec. Adquid nebique.

14 Ĕmbi nabocpadomboen mimbitsen nata. “Ĕbĕd icquid tantiaquiquin tapanquin nashunu,” qeshun naombique. Adecbidi nashunanta. Naden tantiaashun nata. “Esus tantiaquido tantiaquiembi. Con buchibimboecnuc nashunu,” quiaash nashunanta.

15 Ĕmbi nabocpadomboen namenuen adombique. Mimbitsen nata.

16 En chuinu. Tantia. ĵIcbon chiacta chieshpadic? ĵ“Nid,” cacta nidenquo icpadic? Icbon chiacpadomboen yuan naquid yendac. Adomboen tantiaquin ĕmbi chiacpadomboen nata.

17 Ĕmbi aden chuisho tantiaashun ĕmbi chiacpadomboen naic mibi bĕdambo iquendac —quepondash Esus.

18 Adashic padpidec: —Mibitedi caic: “Bĕdambo iquec,” quetiapimbo iquendabi. Tauamboen: “Nuquibi icnu. Cho,” ĕmbi caondaico con yuabotedi tantiembi. Abentsĕc icsambo iquec. “Aid con yuapenguido nec,” quequin ĕmbi tantiaidi nec. Nuquin Papan tantiamiac aidĕn icsamboen nate chuiquin nuquin tsusedpan dada uapampic naden. “Ĕbĕdtan planeboedĕmbi ĕbi unĕs uamenuen bedmendac,” quequin dada uapampic.

19 “ ‘Abi unĕs uametebi chioshi. Nuquin Papapadquidquobi icquimbien naosh,’ quequin ma tantianu,” qeshun mibi chiombi.

20 Mibipadquidĕn nate mibi chuinu. Tantia. Mibipadquidĕn ĕbi chuiban-sho tantiash: “Ai, abimbo caic,” qeshun utsibon ĕbi tantiatsiash. Adembidi ĕbi tantiashun ĕbi chomiondaic Nuquin Papatsen tantiatsiash —quepondash Esus.

Abi bedmequid Esusĕn chiaid

(Mat 26.20-25; Mad 14.17-21; Duc 22.21-23)

21 Adshumbien abi bedmequid Udas tantiac unĕsquo icnuc Esusĕn chuipondash. —Tantia. Mibitedi chuinu. Ĕbĕd icquidĕmbi ĕbi chieshĕnquido ĕbi bedmendac —quesho

22 tantiash abĕd icquidobĕd bĕisnane: —ĵTsutsi capec? Nĕdien cachitec —quecuededpondabi otacquo tantiec.

23 Ĕbi tantiaquidquo yec con cachoetsĕqui Esus uepondash.

24 Adec Esusĕn dayuntsĕqui ueshobini: —“ĵTsutsi cai?” ca —capondash Petedon mĕdquin onquenquo icquin.

25 Adoquimbi cachoc isquin: —ĵTsutsi cai, Icho? —capondac.

26 Adoquien Esus: —En istac. Pete cuĕshĕn ĕnĕ puntanquin menequin mibi ismenu —quetanquin pete cuĕshĕn ĕnĕ puntanquin Udas Simon Isca-dioten mado menepondash.

27 Adoac penubi Satanasquo Udas dapuduedquiopanĕdash ambi tantiaidquo namenuc. Adshobien Esusĕn: —Mimbi tantiacpadomboen baded nĕbimbobi naic nid, Udas —capondash.

²⁸ Adsho tantiashini ëbitedi: —Tantiadenquoio yec onquepec. ¿Atotsi quiash: “Baded naic nid,” quepec? —quepondac.

²⁹ Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibëdquido piucquid menetan,” quepequien iccosh —quecuededpondash.

³⁰ Pete cuëshëmpi pesho: —Nëbimbobi baded naic nid —caquien Udas nidpondash. Inchëshëmbi nidpondash Esus bedmenuen chiec nidec.

Tantiananquiota, quequin chiaid

³¹ Abi bedmenuen chiec Udas nidbombien Esus: —Nuquin Papan mat-sesmiaidquoio icquin ambi tantiaidtedi nëbimbobimbi nainendac. Ëmbi nainsho isash con Pa bëdambo iquendac.

³² Ëbitsen bëdambo icmenuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac —quepondash Esus. Abi unës uatebëdta abi unësash uincuenash Nuquin Papa yacno nidte chiec adpondash.

³³ Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacpadomboen mibi chuiuanu. Tanta, mado. Ëbi nidacsho mimbi ëbi istuidenquoio iquendac. Ëbi nidacno mibi nidtiapimbo iquendac.

³⁴ Aden tantiaquin Nuquin Papan chiaid utsi mibi chuinu. Ëbi nidan ëmbi chiaicpadomboen nata. Ëmbi mibi tantiaquiacpadquiec tantiananquiota.

³⁵ Ëbi tantiaquido tantianasho isun: “Adec tantiananquido Esus tantiaquidombo nec,” quequin utsibon tantiatsiash —quepondash Esus.

Petedo: Ëmbi isacmaid nec, quete chiaid (*Mat 26.31-35; Mad 14.27-31; Duc 22.31-34*)

³⁶ Adec —Nidebi —quesho tantiashun Petedon: —¿Mitsimbo nide, Icho? —capondash. Adoaquien Esus: —Nëbi mibi nidtiapimbo yacno nidebi. Yuecash ambo mibitsen nidendac —quepondash Esus.

³⁷ Adsho tantias Petedo: —¿Atotsi quetiadquoio yec: “Nëbi ëbëdi nidtiapimbo mibi iquéc,” quepo mibi? Mibëd nidec dacuëdenquoio ictsiabi. Mibi chieshënquidon: “Unës uanu,” mibi casho tantias: “Ëbien natiad,” quetsiandabi —quepondash Petedo.

³⁸ Adsho tantiashien Esus: —“Ëbien natiad,” ¿quecta icpatsia? Padenquoio mibi ictsiac. Cachina bënë cuëdanabi icnuc mibi chieshtouidendac. “Ëmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac —quepondash Esus. Adsho tantiashini Esusbëd icquido ëbitedi dacuëdcuededpondac.

14

Nuquin Papabëd tabadmendambi, quiaid

¹ Ëbitedi dacuëdcuededsho isashien Esus: —Dacuëdenda. “Ëbi dayun uaquid nec,” quequin mimbi Nuquin Papa tantiacpadomboen ëbitsen tantiaquiota.

² Mimbi tantiacpadquoio Nuquin Papan shubu iquéc. Quënë dadpenquioshë iquéc. Tsucustiapimbo iquéc. Adpenquoio icsho mibi aden chienquoio ictsiambi. Adquid tantiaquin: “Ëbi tantiaquido ëbëdi tabadmendambi,” quequin chiombi.

³ “Adquid iquéc,” quiash ëbia nidshun con Pa chiendambi. “Ëbi tantiaquido neque. Nuquibëdi tabadmenuna,” quequin chiendambi. Adashic ëbi yacno mibi buanuec choindabi.

⁴ Ëbi nidan ëbi nidacno nidte mimbi tantiec —quepondash Esus.

5 Adsho tantiashun Tomasentsen: —¿Mitsimbo nide, Icho? Tantiambo iccombi. Podqued tantienquo iquembique. Ëbi chui —caquien

6 Esus: —Nuquin Papa yacno nidte tantiamequidquo nebi. Nuquin Papan chiaiduidtsëqui chiec muesambo nebi. Adquid icquin ëbi tantiaquid Nuquin Papabëd tabadmendambi. Ëbi tantiesan Nuquin Papa tantiatipimbo ictsiash. Ëbi tantiaquidënuidtsëqui Nuquin Papa tantiatsiash.

7 Ëbi caic: “Nuquin Papan Mado nec,” quequin mimbi Nuquin Papatsen tantiendac. Nëbi abipadquid ëbi icsho isun Nuquin Papambo isac bimboen mimbi tantiendac —quepondash Esus.

8 Adshobien Uedipentsen: —Nuquin Papa ëbi isme, Icho. Nuquin Papa iste bunebique. Aid isash bëdambo ictsiabi —caquien

9 aïdtsen Esusën: —¿Tantienquioda ique, Uedipe? Yuec mibëdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquobidini nec. Ëbi adquid icsho isun: “Adquidquobidi Nuquin Papa iquec,” quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa ëbi isme,” cai?

10 “Nuquin Papapadquidquo nebi,” ëbi qesho tantiash: “Ai, abimbo caic,” ¿quenquioda icco? Ëmbembi chienquo iccombi. Con Pan chiaidquo chiequini nec. Adembidi ëmbembi nabanenquo iccombi. Ëbëd tëshnanenquo icquin con Pan namiaquimbi naoc. Ëmbembi nainquo iccombi.

11 “Con Papadquidquo nebi,” ëbi qesho tantiashun: “Ai, abimbo caic,” cata. Ëmbi chiaid tantiatipimbo icquin ëmbi comapenen tantiaquin dadpen nabamboedquid tantiata. Aden ëmbi nabamboed tantiaquin: “Nuquin Papan chomiaidënuidtsëquien adotsiash,” quequin tantiata.

12 Tantia. Mibi chuinu. Ëmbi nacpadomboen ëbi tantiaquidontsen comapenen tantiaquin nabanendac. Ëmbi chuibanac daëdpactsëcshun ëbi tantiabentsëccosh. Con Pa yacno nidshun ëmbi chomiaidën con Mayanën namiac mibipadquidën ëbi chuibanac dadpenshun ëbi tantiabenendac.

13 Ëmbi chiacpadomboen naquidën: “Ëbi nashunta, Icho,” qesho tantiashun ambi chiacpadomboen nashunendambi. “Nuquin Papa bëdamboshë iquec,” camenuen

14 ëbi tantiaquidën chiacpadomboen nashunendambi —quepondash Esus abëd icquido chiec.

Nuquin Papan Mayan tabadte chiaid

15 Adashic abëd icquido padpiden chiec Esus: —Ëbi abimbo tantiaquidën ëmbi chiacpadomboen natiadquo iquendac.

16 Adotiadquo icsho isun con Pabëd icquin con Pa chiendambi naden. “Nuqi tantiaquido bëdamboen tantiamenuen nuquin Mayan aïobëd tabadmenuna, Papa,” ëmbi cac Nuquin Papan con Mayan mibëdi tabadmendac.

17 Adoac mibi nianenquo yec mibëdi tëshnanenquo iquendac. Mibëd icquin ëbi chuiquin mibi abimbo tantiamendac. Aid isadenquo icsho ëbi tantiesabon aid tantiatipimbo iquec. Mimbien aid tantiec. Con Pan ëbëd icmiaidquo nec. Ambi namiaid ëbi icsho aid tantiashumbimboen mimbi tantiec. Ëbi nidan choash mibëdi tëshnanenquo yec tabadendac con Mayan.

18 ¿Shiadimpi mëyadacbitsec icnudambi mibi niampe? Padenquo. Nuquin Papan Mayan con Mayambi nec. Mibëd aid icnu ebëd yac bimboequi con Mayan tantiadendac.

¹⁹ Nēbi ēbi nidacsho ēbi tantiesabon ēbi isenquoio icnuc mimbi ēbi isendac uincuenacsho. Adec uincuenaid icquin con Mayan mibēd tabadmequin mibi unēsacsho uincuemeshun ēbēdi tabadmendambi.

²⁰ Ēbi uincuenaid ushēmbi mimbi naden tantiendac. “Esusēn Nuquin Papa tantiaquieac aibbēd tēshnanenquoio icquin aidēn chiacpadomboenuidi naindac. Adecbidi Esusbēd tantiananquieac aibbēd tēshnanenquoio icquin aidēn chiacpadomboen natiadquoio yec tabadebi,” quequin mimbi tantiendac.

²¹ Ēmbi chiacpadomboen naquid ēbi tantiaquidquoio nec. Ēbi tantiaquidquoio mibi icsho con Pabēdtan mibi tantiaquioquin: “Adquoio aton Papabēd Esus iquec,” camequin mibi bēdamboen tantiamendambi –quepondash Esus.

²² Adsho tantiaashun Udas utsin abi bedmequidēnpenquoio: –“Nuquin Papa yacnuēsh choash con matses chuiquidquoio yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuēsh choquid icquin ¿atotsieshun ēbiuidtsēqui tantiamē, Icho? –caquien

²³ Esus padpidec: –Ēbi tantiaquiduidtsēqui naden tantiamendambi. Ēbi tantiaquid ēmbi chiacpadomboen naquid nec. Aden nasho con Pabēdtan tantiaquioquin aibbēdi con Mayan tabadmendambi. Adoac con Mayanēn tantiamiac ēbēd iquec con Pabēd iquec quiachimboec tantiadendac.

²⁴ Ēbi tantienquoio icquidoen ēmbi chiaid niac-niacquido nendac. ¿Ēmbiuidtsēqui chiaidta adquidēn niac-niacpadic? Mambi Nuquin Papan chiaidquoio chuiboc. Aidēn chiaidquoio adquidēn niac-niaquec –quepondash Esus abēd icquido chiec.

²⁵ Adashic padpidec Esus onquiondash. –Mibi bēdiactsēc tantiamequin mibēd icquin con Pan chiaid chuibanombi.

²⁶ Con Pa yacno nidshun ēmbi: “Nuquin Mayan aidobēdi tabadmenuna, Papa,” cac con Pan con Mayan matsesbēd tabadmendac. Adoac ēmbi naidbēdta ēmbi chiondaidtedimbo mibi bēdamboen tantiamendac.

²⁷ Con Pa yacno nidshun con Mayan mibēdi tabadmequin dacuēdenquoio icquid mibi icmendambi. Adoac dacuēdenquoio yec bēdamboec tabadta. Ēbi tantiesabo dacuēdachimboec dacuēdenda. Comapenec dacuēdtanec uinte paēdtanec aido tabadnubi mibi dacuēdenquoio yec bēdamboec tabadta.

²⁸ “Nēbimbobini con Pa yacno nidendac. Adtanequic choaindabi,” quepobi mibi chiec. Ēbi adsho tantiaash ēbi tantiaquidombo cuishonquetsiash. “Esus abi namequid aton Papabēd tabadec nidec,” quiash ēbi tantiec cuishonquetsiash.

²⁹ Nidnumbi mibi chiec nebi. “Unēsash uincuenendabi. Adashic con Pa yacno nidendabi,” quiobi. “Ēmbi chiacpadec ēbi adsho isun ma nēidon: ‘Esusēn abimboshenda capondash. Ambi chiondacpadquid Nuquin Papan Madombo nec,’ quequin tantianu,” quiash adobi.

³⁰ Nēbi ēnquimbi chuinu. Ēbi tantiesabon icho Satanas ēbi unēs uamenuec choec. Ambēmbi aidēn ēbi unēs uametiapimbo iquec.

³¹ Con Pan tantiacpadequini unēsendac. Ēbi adec unēsō isash: “ ‘Nuquin Papa tantiaquin ambi chiacpadomboen naic abided cuidadec Esus unēsac,’ quequin mā matses abitedishun tantianu,” quiash adebi. Nēbimbobimbi naique. Nidec nidnu. Nid –quepondash Esus.

1—Nidec nidnu. Nid —quetanquimbi padpiden chuipondashi ompoachimboen chuiquin. —¿Mitsipadquio shancuinbiecquid uba caid icpec? Mapictsëc ictequi cuidi-cuidipambo yanquid. Adquidic shancuin bacuëbimboec didiquequid. Uba dadan aton cuidi canimequin bédambo icmequid. Adomboembidi ëbi tantiaquido bédambo icmendambi. Nuquin Papan uba icho-bimboecquid nec.

2 Uba aton ichon cuidi utsiuc bacuëesa icsho pateshunepaid yoc. Adoachimboen ëbi tantiauidtsëcboedon ambi icsamboen naid ëntiapimbo icsho con Pan ambi icsaido cuidacno nënendac. Uba icbombidi bédamboen bacuëmenuen dadpen cuidi icquid cuidi dadpen pateshun siaquid. Adomboembidi ëbi tantiaquido bédamboshë icmenuen Nuquin Papan aidon icsamboen naid ëmetsiash.

3 Ëmbi chiacpadomboen naic mibi bédambo iquec. Aden ëbi tantiasho Nuquin Papan mibi bédamboen isec.

4 Ëbi adembidi tantiaquin ëmbi chiacpadomboen nata. Adsho isash mibi bédamboen tabadmec mibëd iquendabi. Uba cuidi padquëdaid bacuëtiapimbo iquendac.

5 Adecbidi ëbëdi tëshnanash matses bédambo ictiapimbo iqueque. Ëbëd tëshnanenquio yec bédamboec tabadta. Bédamboec tabadquin mimbi utsibo ëbi tantiametsiac.

6 Uba ichon cuidi utsiuc bacuëesa icsho pateshun tsindoshon nëdëncapaid yoc. Adoachimboen ëbi tantiesabo unësacsho Nuquin Papan ambi icsaido cuidacno nësecaindac —quepondash Esus.

7 Adshumbic Esusën padpiden chuipondash. —Ëbi tantiaquin ëmbi chiacpadomboen naquidën: “Ëbi nashunta, Papa,” cac ambi chiacpadomboen Nuquin Papan nashuntsiash.

8 Nuquin Papan adoshonac: “Nuquin Papa bédambo iquec,” mimbi catsiac. Adembidi utsibotsen: “Nuquin Papa bédambo iquec,” camenuen bédamboec tabadquin ëbi tantiameta. Mimbi adosho: “Ái, ëbi tantiaquidquio nec,” caindambi.

9 Con Pan ëbi tantiaquiacpadomboembi mibi tantiaquiembi. Adoaid icquin ëbitsen tantiaquiquin ëmbi chiacpadomboen nata.

10 Abi tantiaquiquin ambi chiacpadomboen nashobini con Pan tantiaquiec. Adembidi ëbi tantiaquidën ëmbi chiacpadomboen nasho ëmbitsen aid tantiaquiendambi.

11 “Ëbi cuishonquiacpadquiecbidi ma ëbi tantiaquiec cuishonquequiono,” qeshun aden mibi chiembi —quepondash Esus abëd icquido chiec.

Tantiananta, quequin Esusën chiaid

12 Adashic abëd icquido padpiden chiec Esus: —Ëmbi mibi tantiaquiacpadquiec tantiananta.

13 Nadquiec caimbi. “Min utsi cuesnu,” cashunac: “Ëbien natiad,” quiacbimboec tantiananta. Aden mibi tantiec ëbided cuidadec unësendabi.

14 Ëmbi chiacpadomboen nasho mibi con utsi caimbi.

15 Ëmbi con yua caboedobi mibi con utsi caimbi. Ichon: “Tantia. Chuinu. Nadono. ¿Ada bëda icpec?” quequin aton yua chienquio icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi.

16 “Esusbëd iquec nidnu,” ¿quequina mimbemi tantiadionda? Ëmbien mibi: “Nuquibi icnu. Cho,” caondac. “Utsibo tantiamequin ma nëidon ëbi chuibenenu. Adoac utsibotsen ëbëd tabadtequid yanendac,” qeshun mibi cho caondambi. Aden ëmbi chiacpadomboen naquidën Nuquin Papa

chuiquin: “Min Mado Esus tantiaquid ëbi icsho ëmbi chiacpadomboen ëbi nashunta, Papa,” mimbî cac mimbî chiacpadomboen Nuquin Papan mibi nashuntsiash.

¹⁷ Ëbi adsho tantiash ëmbi chiacpadquiec tantiananta –quepondash Esus.

Esus tantiaquido chieshënte chiaid

¹⁸ Adashic padpidec Esus onquepondash. –Ëbi tantienquio icquidon chieshënac: “Aden Esusba chieshënondash,” quequin tantiata.

¹⁹ Ëbi tantiesabo icsho ëbi chieshënquidon mibi bëdamboen istsiandac. Adquid iccondaïdi ëmbi: “Cho,” cac ëbi tantiaquid mibi yanondac. Adec ëbi tantiaquid icsho mibitsen chieshënoaindac.

²⁰ “Yuan ichon chiacpadomboen napaid yoc,” quequin ëmbi çchuiboedta tantie? Aden ëmbi chiacpadomboen nasho ëbi chieshënquidon mibitsen chieshënoaindac. Adembidî ëmbi chiaïd tantiatiapimbo icquidën mimbî chïaïdtsen tantiatiapimbo icoaindac. Padnuen ëmbî chiaïd tantiaquidën mimbî chïaïdtsen tantiendac.

²¹ Ëbi chieshënquidombi ëbi chomiondaïdquio tantiaquin ëbi chieshënenquio ictsiash. Ma ëbi chomiondaïd Nuquin Papa tantienquio icquin aidon ëbi chieshëmpayoc. Adomboembidî ëbi fantiaquidotsen chieshënoaindac.

²²⁻²³ ÇËbi chieshënquidon ëbiuidtsëquida chieshëmpadic? Ma ëbi chieshënquin Nuquin Papatsen chieshëneyoc. Adquid icsamboshë iquiec. Nuquin Papa yacnuësh choshon ambi chiaïd ëmbi chiabi icnuc ëbi chieshënquido ëbi chieshënec icsainquio ictsenash. Nuquin Papa yacnuësh choshon mambi Nuquin Papan chiaïdquio chuibamboc. Adnuc Nuquin Papan ëbi chieshënquido: “Mibi icsamboshë iquiec,” caindac.

²⁴ Adembidî Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshënec mibi icsambo iquiec,” cainquio ictsenosh. Utsibon nabanacmaidquio comapenen tantiaquin mambi nabamboc. Adosho isash ëbi chieshënquido: “Icsapenquio iquebi,” quetiapimbo iquendac. Ëmbi nabansho isun ëbi chieshënquin con Patsen chieshënec.

²⁵ “Aden matsesën ambembi ëbi chieshëmpec,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënquidon isbanaidî nec –quepondash Esus.

²⁶ Adashic padpidec: –Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiãc mibëdî tabadquin abimbo chuiquin ëbi tantiamequiendac.

²⁷ Adoac mimbitsen ëbi chuibanendac. “Yuec aidbëd tabadondashun Esus tantiembi,” qeshun mimbî ëbi chuibanendac. Aden mimbî chuïsho ëbi chieshënquidon mibitsen chieshënendac. Adoac dacuëdenda.

16

¹ “Chieshtonoshe,” qeshun mibi aden chiombi. Mibitsen chieshënac dacuëdenda. Mibëd con Mayan tabadmembique.

² Ëbi tantiaquido caquin: “Isenda. Esus tantiaquid neque. Nuquin Papan chiaïd chuibante shubun puduedmenda,” caindac. Shubu utsi-utsiec yacnuësh adendac. Adomboembidî mibi chieshënquin utsi-utsien cuesun secash: “Nuquin Papa tantiaquidquio icquin Esus tantiaquido cuesun secaombi,” quependac.

³ Aden Nuquin Papa ëbëdta tantienquio icquidon ëbi tantiaquidotsen chieshënendac.

⁴ Mibi chieshënac: “ ‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” qeshun nëbi

mibi chiemi. “Ëbi icnuc ëbi tantiaquido cuesun secadenquo iquec. Ëbi nidambien aido cuesun secabenendac,” quequin tantiaquin ënden aden mibi chienquo iccondambi. “Nëbi nidebi,” queshun nëbi mibi chiemi – quepondash Esus.

Nuquin Papan Mayan chote chiaid

⁵ Adashic: –Nëbi ëbi chomiondaidbëd tabadec nidendabi –quepondash Esus. Adsho tantiash padequimbo tabadpondabi. Adec ëbi padequimbo tabadsho isash Esus padpidec onquepondash. –“¿Mitsimbo nide?” ¿quenquioda ique?

⁶ Ai, ëmbi chuiboed tantiac unësquo icnuen mimbi ëbi chienquo icchitec.

⁷ Ëbi nibëdnuc mibi bëdambo iquendac. Ëbi nidenquo icnuc con Mayan mibi bëdamboen tantiamenuc choenquo ictsiash. Nidshumbimbi mibëdi tabadmenuen chomendac.

⁸ Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac.

⁹ Aden Nuquin Papan Mayanë tantiamiac: “Esus tantienquo yec icsambo icchitebi,” quendac matses.

¹⁰ Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantiashoeni Nuquin Papan bëdamboen istsiash,” quendac matses. Ëbi isadenquo yec con Pa yacno nidan con Mayanë tantiamiac matses adendac.

¹¹ Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquo icquidobëdta Nuquin Papan cuidendac,” quendac matses. Con Mayanë tantiamiac adec matses onquendac – quepondash Esus.

¹² Adashic abëd icquido chiec Esus: –Mibi dadpenquo chuitiadquo icquimbi nëbi dadpen chienquo iquemi. Nëbi ëmbi chuïsho mimbi tantiatipimbo iquec.

¹³ Nuquin Papan Mayan choshombien mibi abimbo chuiquin ëbi tantiamendac. Ambembi chienquo icquin Nuquin Papan chiaiduidi chiendac. “Nadquo iquendac. Adecbidi nadquid choendac,” quequin mibi dadpen tantiamendac.

¹⁴ Adembidi ëmbi naidbëdta ëmbi chiaidtedi tantiamequin: “Esus bëdamboshë iquec,” camendac.

¹⁵ ¿Ëbiuidtsëqui tantiamenuenda con Mayanë adopec? Padenquo. Ëmbembi chiaid mambi chiumbo yoc. Nuquin Papan chiacpadomboenuidi naquin ambi chiaiduidtsëquimbi chuibandenioc. “Con Mayanë ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quioibi –quepondash Esus abëd icquido chiec.

Abi nidte Esusën chiaid

¹⁶ Adashic padpidec: –Nëbi isadenquo yanebi. Adashic yuecpactsëc yash isadcuendabi –quepondash Esus. –Nëbi unësash uincuenash padpidec isadebi –quequin tantiec adondash.

¹⁷ Adsho tantiashini ëbitedi: –¿Atotsi quepec? Tantiadenquo yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquo yec: “Nëbi isadenquo ictanec yuecpactsëc yash isadcuendabi,” queposh?

¹⁸ ¿Atotsi quepec nec? –quepondabi Esusbëd icquidobëd onquec. Esus tantiamenquo yec sho-shoshquetsëcquiec onquepondabi.

19 Adsho ambembi tantiash: —Ĕbĕd icquidon ĕbi chuitiadquo iquec — qeshun Esusĕn: —“ĶAtotsi chuitiadquo yec nio?” quequin ĕbi chuite mibi bunegue.

20 Tantia. Mibi Chuinu. Ĕbi unĕso isash mibi sedenquenubi ĕbi tantienquo icquido cuishonquendac. Adec sedenqueboedobi mibitsen cuishonquia-nendac.

21 ĶMitsipadquo bacuĕ tishec chido icpec? Bacuĕ cuididiquenuc natiam-boshĕ icboedi bacuĕ tishash cuishonquepaid yoc.

22 Adecbidi nĕbimbobi ĕbi unĕso isash mibi natiaquendac. Adboedi yuec-pactsĕcshun ĕbi padpiden isash mibi cuishonquendac ĕnĕdenquo yec.

23 Adnubini con Pa yacno nidendac. Ĕbi adnuc mibi bĕdambo iquendac. Ĕbi nidan: “Ĕbi nashunta,” ĕbi catiapimbo icquimbi Nuquin Papa mibi chianendac. Ĕbi tantiaquidĕn: “Min Mado Esus tantiaquiembique. Ĕbi nashunta, Papa,” cac ĕbi tantiaquin con Pan mibi nashunendac.

24 Aden mimbi Nuquin Papa chianenquo iccoc. Nĕbi adomboen chianeta. “Min Mado Esus tantiaquid icsho ĕbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuishoncamendac —quepondash Esus abĕd icquido chiec.

Esusĕn abĕd icquido ĕnquimbi chiaid

25 Adashic abĕd icquido padpiden chiec: —Ompoachimboen dadpen chuibanombi. Yuecpectsĕcshun: “Con Pa nadquo iquec,” quequin mibi sebadĕnquo chiendambi —quepondash Esus. —Uincuenshun aden chien-dambi —quequin tantiec adondash Esus.

26 Adashic padpidec: —Con Pa yacno ĕbi nidan mimbi: “Min Mado Esus tantiaquid nebique. Ĕbi nashunta, Papa,” quequin Nuquin Papa mimbibi chianendac. “Ĕmbiuidtsĕqui: ‘Ĕbi tantiaquid nashunta, Papa,’ cac ĕbiuidtsĕqui tantiaquin Nuquin Papan mibi nashuntsiash,” Ķquectabi ique? Padenquo.

27 Mibitsen tantiaquin Nuquin Papan mibi chianiac mibi nashunendac. “Nuquin Papa yacnuĕsh choquid Esus nec,” quequin ĕbi tantiaquid mibi icsho con Pan mibitsen tantiaquiquin mibi nashunendac.

28 Matsĕbĕdi tabadec Nuquin Papa yacnuĕsh chondash nĕbi con Pa yacno-bidi nidendabi —quepondash Esus.

29 Adsho tantiashini ĕbitedi: —Adquidshenda mibi nepec. Ma nĕbi mimbi sebadĕnquo chieyoc.

30 Mibi: “Nĕbi isadenquo yanebi,” quioc. Adashic: “Yuecpectsĕc yash isadcuendabi,” mibi qesho tantiash mibi tantiamenquo yec shoshquetsĕcquiec: “ĶAtotsi quepec?” quecuededpobi. Mibi chuimetiadquo iccobi. Ĕmbi chiambobi ma mimbibi tantiapaboc. Comapenen tantiaquidquo icquin ma mimbi abitedimbo tantiapayoc. Aden tantiaquid yec Nuquin Papa yacnuĕsh choquid mibi nec —quepondabi ĕbitedi.

31 Adsho tantiash Esus: —Ai, nĕbi mimbi ĕbi tantiaquiec.

32 Aden ĕbi tantiaquidquobi ĕbi chieshĕnquin bedsho isanec mibi niquen-dac ĕbi nianec. Mimbi niamĕnubi con Pan ĕbi nianenquo iquendac.

33 “Ĕbi nidan Nuquin Papan Mayan mibĕd tabadendac. Ĕbi tantiaquid Con Pan tantiaquiec,” quequin dadpen chuibanombi. “Ĕbi tantiec dacuĕdenquo yec ma tabadnu,” qeshun mibi aden chuibanombi. Ĕmbi chiaid tantiashun chieshĕmĕnquido dacuĕdĕnenda. Satanasĕn: “Icsamenu,” cac icsainquo iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuĕdĕnda —quepondash Esus abĕd icquido chiec.

17

Esusën Nuquin Papa chiaid

1 —Dacuëdenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bëdambo icmeta. Aden mimbi bëdambo icmiac mibitsen bëdambo icmendambi, Papa.

2 Ëndenquimboshë mimbi ëbi chiondac naden chuiquin. “Nuqui matses uaidon abitedishun Icho mibi nec, Mado,” quequin mimbi ëbi chiondac. Mimbi adondaïd icquin mimbi tantiactedi matses nuquibëd tabadtequido icmendambi, Papa.

3 Matsesën nadosho adoendambi. “Abipadquid utsi nibëdnuc Nuquin Papa iquec. Ambi chomiondaïdquio Esus nec,” quequin tantiasho nuquibëd tabadtequido icmendambi, Papa.

4 Mimbi chiacpadomboen naquin nëbimbobimbi nainec. Ëmbi adoacsho isash matses: “Ambi chomiaïd tantiasho Nuquin Papan nuqui bëdamboen isec. Nuquin Papa bëdamboshë iquec,” quependac, Papa.

5 Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa —quepondash Esus Nuquin Papa chiec.

Esusën abëd icquido Nuquin Papa chiaid

6 Adshumbic Esusën abëd icquido ëbitedi chuiquin aton Papa chuioapondash. —Mimbi tantiactedi mimbi ëbi tantiaquid icmiacsho mimbi bëdamboen iste chuibanombi. Aden mimbi chiaïdquio chiac: “Ai, adotiadquio iquebi,” quiosh, Papa.

7 Adembidi aidon: “Nuquin Papan namiaïdquio nec. Ambembi nainquio iquec,” quequin ëbi tantiaposh.

8 Mimbi chiaïd ëmbi chuisho tantiashun mimbi comapenen tantiaquin nabamiaïd nasho isun: “Ma Nuquin Papan chomiaïdquio nepayoc,” caposhi ëbëd icquidon, Papa.

9 Ëbi tantienquio icquido mibi chienquio iquembi, Papa. Ëbi tantiaquiduidtsëqui mibi chiec nebi. Mibi tantiaquido icsho mimbi tantiamiac ëbitsen tantiec aidon.

10 Adsho isun: “Nuqui tantiaquido nec,” caimbi, Papa. Aidon: “Mibi bëdambo iqueque. Con Icho mibi canu. Mimbi chiacpadec bëdamboec tabadtiadquio iquebi,” quequin bëdambo icmioshi, Papa.

11 Mibi bëdamboshë iqueque. Ëbi mibi yacno nidan ëbi tantiaquido dayun uata, Papa. Ëbi chieshënidon chieshtomenushe. Nëido bëdamboen dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma ëbi tantiaquido tantiananu. Nëido bëdamboen dayun uata, Papa.

12 Aidobëd icquin mimbi chiaïdquio bëdamboen chuibanquin chieshtomimbo iccombi. Aden bëdamboen dayun uaqin ëbi tantiaquido cudasënquin Satanas yuamiambo iccombi. Udas abentsëquien Satanasën yuatsaccosh. Mimbi chiaïd matsesën dada uapampicpadomboen ëbi bedmenuen Satanasën Udas yuaccosh. Adoac ëbi bedmequid yanash mimbi cuidtequid iqendac.

13 Nëbi mibi yacno nidendabi, Papa. “Ëbi nidan dacuëdec ëbi tantiaquido chieshtonoshe,” qeshun mibi otacquo chienquio iquembi. “Ëmbi abi dayun uate chuisho tantiash ëbi yacpadec ma cuishonquenu,” quequin mibi otacquo chienquio iquembi, Papa.

14 Mimbi chiaidquio nëido chuibanombi. Adoac ëbi tantiaquido yansho ëbi chieshënquidon nëidotsen chieshëmpec. Ëbi yacpadec mimbi chiaid niacniacte bunenquio icshobidi nëido chieshënquieq, Papa.

15 Aden tantiash: “Ëbi tantienquio icquidobëdi ëbi tantiaquido tabad-menda,” çuqetabi ique? Padenquio. “Ëbi tantiaquido chieshtomenda,” caimbi, Papa. Satanasën yuanushe. Bëdamboen dayun uaquin chieshtomenda, Papa.

16 Ëbi tantiesabo tabadacpadec tabadenquio icquin ëmbi nabocpadom-boen natiadquio iqueque.

17 Mimbi chiaidquio pausunquioquin bëdamboen tabadme, Papa.

18 Mimbi ëbi: “Matses chiec nid,” caondacpadomboen aido: “Ëbi chuibeneta,” caindambi. Adoac nëidon ëbi chuibenendac, Papa.

19 Nëido tantiaquieq nëbimbobini mimbi chiacpadec ëbided cuidadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiash ëbi tantiaquido min yuabombo icmenuec adebi, Papa —quepondash Ësus aton Papa chiec.

Esusën abi tantiaquid utsibo Nuquin Papa chiaid

20 Adashic padpiden Nuquin Papa chiec Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquio yanendac. Ëbi tantiaquidotedi tantiaquin mibi chiec nebi, Papa.

21 Nuqui tëshnanenquio yacpadequi nuquibëd tëshnanenquio icquid icmeta, Papa. Nuqui tantiananquiacpadec ëbi tantiaquidotedi shubu abentsëquën tabadacbimboecnuc tantianameta, Papa. Adsho isash nuqui tantienquio icquido nadtsiash. “Esus tantiec bëdambo iquec. Aden Nuquin Papanuidtsëqui bëdambo icmetsiash. Nuquin Papan chomiaidquien Esus nechitec,” quetsiash.

22 “Mibëd ëbi tantiananquiacpadquieq ma ëbi tantiaquido tantiananquiono. Ma chieshënanenquio icnu,” quequin mimbi ëbi namiacpadomboen ëbi tantiaquido namiombi, Papa.

23 Nuqui tëshnanenquio yacpadec aidobëd tëshnanenquio iquendabi. “Chieshënanenquio yec tantiananquieq ma bëdamboec tabadnu,” quec aidobëd tëshnanenquio iquendabi, Papa. Adec ëbi tantiaquido bëdamboec tantianansho isun matsesën naden tantiatsiash. “Ambi chiacpadquid Nuquin Papan chomenëdaid icquin Esusën abi tantiaquido aden bëdamboen tabadmec. Ambi chomenëdaid aton Mado tantiaquiacpadomboen Nuquin Papan aid tantiaquido tantiaquieq,” quequin matsesën tantiatsiash, Papa.

24 Mimbi ëbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: ‘Ëmbi tantiaidquio mibi neque. Nuquibi nanuna, Mado,’ cac nuqui bëdamboshë yec tabatnecpadequi nuqui tabadsho ma ëbi tantiaquidon isnu,” qeshun mibi: “Nuqui yacno tabadmeta, Papa,” caimbi.

25 Icsaisambo mibi icsho icsambo icquidon mibi tantiatipimbo icnubimbi mibi tantiaquieq. Mibi yacnuësh choquid icshobini ëbëd icquidon: “Ai, Nuquin Papä yacnuësh choquidien nec,” quequin tantiaposh, Papa.

26 Aden tantiamenuen yuec ëbëd icquidobëd tabadquin mimbi naid chuibanombi. Ëbi nidan ëmbi chomiaidën con Mayanën adembidi ëbëd icquido tantiamendac. “Mimbi ëbi tantiaquiacpadomboen ma nuqui daëdi

tantiaquiash ma tantiananquiono,” queshun con Mayan aidobëd tabadmendambi. Adoac ëbëd icacbimboec con Mayan tantiadendac, Papa – quepondash Esus Nuquin Papa chiec.

18

Esus bedmiaid

(*Mat 26.47-56; Mad 14.43-50; Duc 22.47-53*)

¹ Aden Nuquin Papa yuen chianec Esus nidpondash. Ëbi chedobëd nidquin acte Sededon caid potiash tiedno cuëte odibos caid nitsinacno ëbitedi chiec tabadtenebocnombo chopondash.

² Ambo tabadnubien Udas: –Ëbi abëd tabadtenebocno tiednoen nidchitash –quianec Esus bedmenuec

³ chopondash. Aden chieshëmënuquido chuiquid dapabo chuitanshun matses dadpen bëpondash nëidtedi. Nëidic con matses chuiquid dapabobëdtan padiseyobon namiaido sondado chedo. Nëidic con matses yuaquido Doma yacnocquido sondado dadpen. Nëidic aid sondado chuiquid. Aidedi Udasën bëpondash. Tabotëbëdta cuëste sanambédedsëcquiec cho-chopondash. Utsibombic chështe.

⁴ Adec cho-chosho isash bëquedbanec nidquin: –Ëbi unës uamec –quequin tantiaquin Esusën: –¿Atotsi quec ne? ¿Tsutsi nibëne? –cac

⁵ –Nasaded yacnuësh caniquid Esus bednuec nebi –quepondash sondado chuiquid. Adshun isac aibëd Esus bedmequid Udas icpondash.

⁶ Adshobien Esusën: –Në iquebi –capondash. Nuquin Papa-padquidquiobi icquin adoac dacuëdec: –Auchbidi cuenu –quec uebudcuëdedpondash bednuequidotedi.

⁷ Adshobien padpiden Esusën: –¿Tsutsi nibëne? –cac: –Nasaded yacnuësh caniquid Esus bednuec nebi –queoasho tantiashun:

⁸ –“Në iquebi,” caombi. Ëbiuidtsëqui bedta. Èbëd icquido bedenda –capondash Esusën.

⁹ –“Mimbi ëbi tantiaquid icmiaido Satanas chieshtomiambo iccombi, Papa,” quequin ëmbi Nuquin Papa chuibocpadomboen nëido chieshtometipimbo iquebi –quequin tantiec: –Nëid bedenda –quepondash Esus.

¹⁰ Adnubien Petedon abi tsidiadaid chështe chictanquin chuiquid dapan yua abiucquoio pateshunepondash. Aid yua Madco niondash.

¹¹ Adosho isashien Esus: –Padi. Chën. Min chështe naued. Nuquin Papan chiacpadec paëmbo icnuc unësendabi –quepondash Esus.

Anasën shubuno Esus buanaid

(*Mat 26.57-58; Mad 14.53-54; Duc 22.54*)

¹² Adshobien sondado chedon Esus bedpondash. Aden bedshun: –Cuidmenun chuiquid dapa yacno mibi buanu –catanquin catanepondash.

¹³⁻¹⁴ Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshënc: –Nuquin matsestedi unës uamenquoio icnuen Esused unës uamenuna –queboed Caipas niondash. Aton cucu chuiquid dapabidi niondash. Aidi Anas niondash. Anasën shubunoba Esus buampondash. Ashunquoio Caipas ismenuen buampondash.

Petedon: Ëmbi isacmaid Esus nec, quequin chiaid

(*Mat 26.69-70; Mad 14.66-68; Duc 22.55-57*)

¹⁵ Esus buansho isun Petedobëdtan chinunondambi. Chinuntuidash nidëqui Caipasën shubuno choash daquënë uaidën puduednuesho tantiashun

shëcuë isquid chidon puduedmiondashi. Ambi isondaid icsho aden puduedmiondashi.

¹⁶ Ëbi puduedmequin Petedo ambi isacmaid icsho puduedmenquio icpondash. Adsho istanquin: —Ëbéd icquid neque. Shëcneshun. Ma puduednu —capondambi.

¹⁷ Adoac puduedmeshun shëcuë isquid chidon: —¿Në bedboed Esusbéd icquidta mibi ne? —capondash Petedo chuiquin. Adoquien Petedo dacuëdec: —Padenquio —quepondash muequi.

¹⁸ Adnubien iquendoshon daquënë uacnoshon cuëte dêtsiadoshon sondado chedobéd anocquido yuabo cuëte cuëc tabadpondash. Adsho isashien Petedotsen cuëte cuënuac nidpondash ëbi shubunquio puduednuc.

Caipasën Esus chuimiaid

(Mat 26.59-66; Mad 14.55-64; Duc 22.66-71)

¹⁹ Adec ëbi puduednubien Caipasën Esus chuimepondash. —Mibéd icquid ¿tedtsi iquec? ¿Ëbéd icquido dëniaqueta icpec? Mibéd icquido ¿mitsipaden chuibano? —capondash.

²⁰ Adoquien Esusën chuipondash. —¿Ompoquindambi chuibandio? Nuquin Papa tabadte shubu uashunaid daquënë uaidën puduedshun mambi chuibandeneboc. Nuquin Papan chiaid chuibante shubun-shubunquieci puduedcuenequin mambi chuibeneboc. Ompoquin chiambo iccombi.

²¹ Mimi: “Icsamboen naosh,” caid ëbiuidtsëqui chuimenda. Ëbéd icboedotsen chuime. Ëmbi chiaid abitedi tantiashun aidombi mibi chuitsiashe. Aidotsen chuime —quepondash Esus.

²² Adsho tantiashun: —¿Chuiquid dapada adopaid? —quetanquin sondado chuiquidën mëdanten bëcuespondash Esus.

²³ Adoquien: —¿Icsamboendambi chuidio? ¿Atotsimbi icsa uaoque? En chui. Mambi abimbo chuiboc. ¿Abimbo chuiquidta cuespaid? —quepondash Esus.

²⁴ Adondash Esus Anasën abi cataniacchobi Caipasën shubuno bëac.

Petedon: Ëmbi isacmaid Esus nec, quequin chuioaid

(Mat 26.71-75; Mad 14.69-72; Duc 22.58-62)

²⁵ Adnubien Petedo abi cuëte cuëc tsadsho abëdtan cuëte cuëc tabadquidon: —Esusbéd icquidien mibi nechitec —capondash. Adoquien Petedo: —Padenquio. Mabi aïdbéd icambo yoc —quepac caondash.

²⁶ Adshobien chuiquid dapan yua utsin Petedon pateshuneboedën matsësën: —Esus bedacnômbi mibi ischitoc —caquien

²⁷ padpidec: —Padenquio. Mabi ano nidambo yoc. Ëmbi isacmaidquio ma Esus neyoc —quenubien Esusën chuiboedquio cachina bënë cuëdampac caondash.

Pidato caidën shubuno Esus buanaid

(Mat 27.1-2; Mad 15.1-5; Duc 23.1-5)

²⁸ Adnubien Caipas aton chuiquid utsibobéd: —Nuquin matses yuaquido ancaquid Pidato caid ismenuembien Esus buantiad. Aid Esus unës uamenuembien natiad —quecuedpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchësh tantiec con matsësbed pec tabadtiapimbo icchitomane —quiash Pidaton shubun puduedenquio icpondash.

²⁹ Adnubien Pidaton aton shubunuësh puduantanquin Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien

30 —¿Bëdambo icquidambi mibi ismenuen bëdio? Con matses chuiquid dapa ictiadquio icquin icsamboen naoshe. Cuidquiota —quepondash chieshëmënkuido.

31 Adoquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Ëmbi cuidquin unës uacsho isash min matses chieshtonoshe. Min matsesën: “Con matsesënuidsëqui unës uaquin cuidaquien bëdambo ictsiash,” qeshun ëbitedi chieshënushe —quepondash Esus chieshënkuido Pidatombo Esus unës uametiadquio yec.

32 Ënden abi chieshënkuidon bedabi icnuc: —Ëbi cuesten dectanquin unës uaindac —quequin Esusën chiacpadomboen namenuec adpondash.

33 Adnubien aton shubun puduedtanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien

34 Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash.

35 Adoquien Pidaton: —¿Isadaidbodabi nedi? Padenquio. Ëmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien

36 Esusën Pidaton bëyuc chuiboed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

37 Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuc matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiatie bunquidon ëbi tantiatsiandac —quepondash Esus.

38 Adsho tantiash Pidato: —¿Tsuntsin matses uaquid quequin abimbo chuipatsiash? —quetanec puduëshun Esus chieshënkuido chuihoapondash. —¿Icsambo icquidta Esus nedic? Ma icsapenquio icquid neyoc.

39 Nëid cuidtiapimbo icquin chuinu. Nuquin Papan matamiampid inchësh tantiatie ushën min matses quënën nauedaid abentsëc cuemedeniøndambi. Adembidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien:

40 —Padenquio. Esus nainda. Utsibi cuemeta. Badabas caid cuemeta —quecuedpondash. Badabas caid Doma yacnocquido cuesun siaquin cuemete bunquidquio icnuc adcuededpondash Esus chieshënkuido Esus unës uamete bunquiec.

19

Esus cueshcaid

(Mat 27.27-31; Mad 15.16-20)

1 —Badabasquio cuemeta —guesho tantiatanquin Pidaton: —Në Esus cueshcanuen buan —capondash. Adoquien buanshun sondadon canite cuëshë dëdectanquin nachenaïd cueshcanten Esus comapenen cueshcapac caondash.

2 Cueshcatanquin pinchuc-pinchucpambo icquid mauete nachenaïd Esus mauemepac caondash. Adotanquimbic chuiquid dapan dashcutedimboecquid umucquid dasiuintanquin:

3 —Adec dasiuidquid chuiquid dapambo nec —quequin sondadon Esus mamëshunpam caondash. Aden mamëshunquimbi: —Isadaidbo matses

chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacnobidi buanoapac caondash.

Esus unës ua, quiaid

(Mat 27.15-26; Mad 15.6-15; Duc 23.13-25)

⁴ Buanoacsho istanequien Pidato padpidec puduenoash Esus bëquido chiec: —Mimbi bëboed Esus icsapenquio iquec. Icsambo icquid icsho: “Unës uata,” catsiambi badedi. Icsapenquio icquid icsho adotiapimbo iquebi. Padi. Cueshaquin cuidombique —quepondash Pidato. Adnubien

⁵ Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec puduëshobien Pidaton: —Is. Mimbi bëboed choeque —cac

⁶ chosho istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënquido comapenec cuëdec. Adoaquien Pidaton: —Mimbi cuesten dectanquin unës uatan. Ëmbimbo adotiapimbo iquebi. Icsapenquio icquid icsho Esus unës uatiapimbo iquebi —capondash Pidaton.

⁷ Adoaquien Esus chieshënquidon: —Con matsesën: “Nuquin Papa muauaquid unës uaquid yendac,” cacpadomboen natiadquio iquebi. Ès-usën: “Nuquin Papan Madombo nebi,” quequin Nuquin Papa muauaoshe. Unës uaquimbien ictiad —quepondash.

⁸ —“Nuquin Papan Madombo nebi,” quiosh —quesho tantiashien Pidato dacuëdquiec yampac caondash.

⁹ Adash aton shubun Esusbëdi puduedoashun Pidaton Esus chuiopondash. —¿Tsutsimbo ne? ¿Mitsiüëshquio chonda? —caqui Esusën ëcbedenquio icpondash.

¹⁰ Aden ëcbedenquio yac nëishashien Pidato: —¿Chuitiapimboda ique? ¿Tantienquioda ique? Ëmbi: “Cueme,” cac mibi cuemetsiash. Ëmbi: “Cuesten dectanquin unës ua,” cac mibi adotsiashe. En chui —caquien Esus:

¹¹ —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquid-penquio icquin mimbi ëbi cuesten dectanquin unës uametiapimbo ictsiac. Èbi cuesten dectanquin unës uamenuc mibi icsambo icnuc ëbi bëboedo chuiquid dapabo icsamboshë iquec —quepondash Esus.

¹² Adsho tantiashun Pidato: —Esus unës uatiapimbo icchitebi. Cuemetiadquio iquebi —quetanquin padpiden Esus chieshënquido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Èbentsëqui chuiquid dapambo nebi,” quiac caosh. Aid dëniaquec Esus chuiquid dapa icte bunquiec. Esus cuemequin mibi chuiquid dapambo mimbi nëishmeque. Esus cuesten dectanquin unës ua —quecuededpondash.

¹³ Adsho tantiashun Esus puduemeoatanec cuënote nacnenaïd abuc tsadunaïdën cuidte chuinuc tsadten tsadtopondash Pidato. Aid cuënote nacnenaïd con onqueten Cabata capondash.

¹⁴ Nuquin Papan matamiampid inchësh tantieta ushë badiadash icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin.

¹⁵ Adoaquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash Esus chieshënquido. Adoaquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënquido: —Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin

unës ua —quecuededpondash Esus chieshënquido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

¹⁶ Adoquien Esus chieshënquidon chiacpadomboen: —Esus cuesten dectanquin unës uatan —capondash Pidaton aton sondado chuiquin.

Cuesten dectanquin Esus unës uaid
(*Mat 27.32-56; Mad 15.21-41; Duc 23.26-49*)

¹⁷ Adoac buanquin: —Nëidën dectanu —qeshun sondadon cuate daëd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash.

¹⁸ Ambo nidshun aton dashcute dachictanquin bëchun shuin mëtoccaquinc tatoccaquinc catanquin cuate daëd napotiaid ambi bëboedëmbi Esus dectampondash. Icsambo icquid daëdpambo cuesten dectanaid uquë diadbudcuenec diadnuc Esusquio nënantanquio dectampondash.

¹⁹⁻²⁰ Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cuate pada uaidën dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —qeshun Pidaton adopac caondash. Aden dada uashun dectanaid isashien Esus chieshënquido nëishquiopac caondash. —Shubu dadpen icquid Edusaden caid anoentsëqui Esus dectanaid icnuc matses utsin onqueten-onquetenquien dada uaid matses dadpeshun isnushe —quiash

²¹ Pidato chiec nidpac caondash. —Icsamboen chuiquin ma mimbi dada uapacnoc. ¿Con matses chuiquid dapada Esus nedic? Adquidpenquo nec. Utsi uain dada uata. “‘Isadaidbo matses chuiquid dapa nebi,’ quequid Esus nec.” quequin cuate cuëshë utsin dada uata —caquin

²² —Padi. Mambi ëmbi tantiaboedquio dada uaboc. Utsi uain dada uaoatiapimbo iquebi —quepac caondash Pidato.

²³ Adnubien Esus dectanquido sondado daëd-daëdquiec icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi daëdcaid tuscabi icquid niondash.

²⁴ Adquid icsho isun: —Canchenquio icquin ¿tsundanquio bedequé? Isnuna —qeshun abi cuëmëdquidtedi dada uabanshun tëchun sandoshon cadotanequin dada uaidëmpi abia puduemaiid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “‘Abentse-abentsen con dashcute bedosh. Con dashcute utsi bednu,’ quequin dada uaidëmpi abia puduemaiid isnuen naosh,’ quependac,” quequin dada uapampic.

²⁵ Adnubien Esus dectanaid cuate tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash.

²⁶ Në chido tabadnuc ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. —Nëid con mado cata, tita. Ma mibi bëdamboen dayun uanu —capondash Esusën.

²⁷ Adshumbic ëbitsen chuiquin: —Con ta tita cata. Adshun bëdamboen ëbi dayun uashunta —cac con shubunobi buanondambi bëdamboen Esus dayun uashunuen.

28 Adboshien unësquionoshi Esus: —Con Pan chiacpadomboen nainembi. Matses tantiec ëbided cuidadec unësebi —quequin tantiec con tsusedpan dada uaqin chuipampicpade: —Acte bundobi —quepondash Esus.

29 Adsho tantiashun matsun acte mucambo icquid anidquid shapushapupactsëcquidën punshun cuate dëdectanshun abuc sananquin ëccuëscadonetsëcquin chishmepondash.

30 Adoac acte mucambo icquid chishtanequien: —Con Pan chiacpadomboen nainquiombi —quepondash. Adtanequi tédquëdbudpondash Esus unësequi.

Esus uinte masiaid

31 Adnubien Esus chieshënquido: —Badiadash Nuquin Papan matamiampid inchësh tantiate ushë iquec. Chonoadenquio icte ushë nec. Aidën cuesten dectanquin unës uaid chococac icsambo ictsiashe. Nëbimbobi chococamenu —qeshun Pidato chuitampac caondash. —Baded nidte podquënquin unës uame. Inchësheque —cac

32 Pidaton aden chiac sondadon nidte podquëntanondash. Esusbëdta dectanaid ëquë diadquidba nidte podquënshumbic utsiuc diadquidtsen.

33 Adotanquin isquien Esus ënden unësac. Adshobien nidte podquënenquio icpondash.

34 Adotanquimbic: —Unësabi icnushe —qeshun: —Unës uaqiobono —quetanquin sondadon cudan podo ansequin Esus uinte masepondash. Adoac nua intac chididiquiondash actebëdi.

35 —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaqin.

36 Nuquin Papan tantiamiac con tsusedpan: “Canite podquënenquio iqendac,” quequin dada uapampicpadomboen canite podquënenquio icpondash Esus.

37 Adembidi podo ansete dada uapampic. “Ambi podo anseboed isec tabadendac,” quequin dada uapampic.

Esus unësacsho chococaid

(*Mat 27.57-61; Mad 15.42-47; Duc 23.50-56*)

38 Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënquido dacuëdënquin: —Esus tantiaquid nebi —quequin utsibo chienquio icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash.

39 Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbo icnuc 35 quidostembi icnuc bëac caondash.

40 Adshumbien Osebëdtambi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoquin. Adshumbic padpiden dabiunoaquin. Adshumbic dataneoquin. Chococanun con matsesën adoquid.

41-42 Adashic: —Badiadash Nuquin Papan matamiampid inchësh tantiate ushën unësaid chococac icsambo ictsiashe. Badedquio chococanu —qeshun tied nëbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

20

Esus uincuenaid

(*Mat 28.1-10; Mad 16.1-8; Duc 24.1-12*)

¹ Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac.

² Cuënote dapa bëcunepamboen shëcniacsho istanec titinquianec choquin chuituidpondashi. —Esus padoen buanchitaccosh. ¿Mitsimbo buampash? — quepondash Madia Petedobëdta ëbi chuituidec.

³ Adoaquini: —Istanu —quianec

⁴ titinquianec chococacno Petedobëdi nidponac. Petedo nianec ëbia nidpondabi.

⁵ Adshumbimbi puduedenquio icquin shëcuë anshuebudshun anisponac. Adshun isquien dashcute dataniaiduidtsëqui uec.

⁶ Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash.

⁷ Në dataniaid uenubi udictsëc dashcutempi bëpucaid bëdamboen shëbunaid uiondash.

⁸ Aid puduedsho istanec tsyuec puduedshun ëmbitsen isondambi. Adash: —Uincuenac. Nuquin Papan Madombobi nec —quepondabi Petedobëdtsëqui onquec.

⁹ —Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquio icboedi adondabi.

¹⁰ Aden istanec ëbi ushboconbidi chiec choapondabi.

*Esusën Madia Mactada yacnocquid ismiaid
(Mad 16.9-11)*

¹¹ Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien

¹² Nuquin Papan abi yacnoshon uaido mayan bëda daëd ushumbo icquid dasiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash.

¹³ Adshumbic aidën: —¿Atotsi quiash sedenque, champi? —caquien: —Con Icho pado ¿midambo buanac? Istiadquio iquebi. ¿Mitsimbo buampashba? Unësquio iquec —quetanec

¹⁴ aubidi nidnuec bidiadshun isquien Esusquio icpec. Utsi dansho

¹⁵ Esusëntsen: —¿Atotsi quiash sedenque, champi? ¿Tsutsi nibëne? —caquien Madian tied neshcaquid danquin: —¿Con Icho padoda buano? ¿Mitsimbo buano? Ëbi isme. Shëcuë utsin chococanun buanu —capac caondash Madian Esusquobi chuiquimbi.

¹⁶ Abi adoshobien Esusën: —Ëbi nebi, Madia —cac bëisquotanequien: —Esus nec. Ëbi chuiquidquio nec —quetanquin con onqueten cuënquin: —Dabi —capac caondash. Adotanquimbien Esus dayumbudpac caondash unësquio icsho.

¹⁷ Aden abi dayumbudshobien Esusën: —Ëbi dayunenda. Padpidec nidenquio icte danquin ëbi dayunenda. Ëmbi chuibocpadec con Pa yacno nidabi yuec-yuecpactsec tabadtanec nidebique. Ëbëd icboedo ëmbi con utsibo caboedo ëmbi chuiboedquio chuitan. “ ‘Nuquin Papa yacno nidendabi,’ quioish,” catan —quepac caondash Esus.

¹⁸ Adoaquien ëbi chiec Madia chopondash. —Nuquin Icho Esus isombi. Uincuenaccosh. Ambi chuiboed chuinu. Tantia —quequin Esusën abi chiaidquio chuituidpondashi Madian Mactada yacnocquidën.

Uincuenshun Esusën abéd icquido ismiaid
(*Mat 28.16-20; Mad 16.14-18; Duc 24.36-49*)

¹⁹ Madian aden chuituidboed inchëshbudtsëqui shubun tabadpondabi Esusbéd icboedobédi. Esus chieshënguido dacuédënquin umanucuësh utsi puduedtiapimbo icnuc bédamboen bêtashash tabadnubien shëcuënuësh puduedenquo icboedi nuntanquiobi Esus isadcuempondash. Adtanequin: –Dacuédenda –quepondash.

²⁰ Adtanquin abi bëchun shuin mëtoccaid abi podo ansiaidbêdta ismiaquini cuishonquiampodac: –Nuquin Icbo uincuenac –quiash.

²¹ Adec cuishonqesho isashien ambi chuibocpadechidi: –Dacuédenda –quetanec: –Tantia. Mibi chuinu. Con Pan: “Mats chiec nid,” ëbi caondac-padomboembidi: “Ëbi chuibeneta,” mibi caimbi –quepondash Esus.

²² Adtanquin ëbi chedo dabushcabampondash. Dabushcabanashic: –Nuquin Papan Mayan mibéd tabadendac.

²³ Mibéd icquin Nuquin Papan tantiaidquo tantiamequin Nuquin Papan Mayanën mibi utsibo chuibamendac. Ádoac mimi aden chuibanaido caic: “Nuquin Papan chiaid niaquec icsambo icboedi Esus tantiaid yansho Nuquin Papan nêid bédamboen isec,” quequin mimi chiacpadomboen Nuquin Papan bédamboen istsiash. Utsien: “Nuquin Papan chiaid niaquec icsauidequi icsho nêid Nuquin Papan bédamboen istiapimbo iquec,” quequin mimi chiacpadomboembidi Nuquin Papan bédamboen istiapimbo ictsiash –quepondash Esus ëbi chedo chiec. Adtanequi isadenquo yanoaondash.

Esusën Tomas ismiaid

²⁴ Adec Esus isadenquo yanoanubien Esusbéd icboed utsi Tomas abi ushëmbi anin daéd tishaid chopondash.

²⁵ Choshobi: –Esus isombi –cac: –¿Aidquiobida nepash? Utsien nechitash. Bëchun shuin mëtoccaid shëcuë isun aid shëcuë mädanten bëmishquinc podo ansiaid bëmishquinc caquioshombimbi: “Ai, nuquin Icbo uincuenac,” quequin tantiatsiac. Padambobi: “Con Icbobien niash,” quetiapimbo iquebi –quepondash Tomas.

²⁶ Tomas adbon 7tedec ushash shubu nuntambidi tabadoapondabi. Tomas chedobédi tabadondabi. Puduedtiapimbo icnuc padpiden bêtashoash tabadnubien shëcuë shëcniabi Esus isadcuenoapondash. Adashic: –Dacuédenda –queoapondash.

²⁷ Adtanequin: –Is con mädante, Tomas. Shëcuë bëmishhec cho. Nê podo ansiaid iqueque. Aidtsen bëmishhec cho. Adshun: “Uincuenabien icchitash,” queboedëmbi: “Uincuenaccosh,” quequin tantiata –caquien

²⁸ mishenquoio yec badedi: –Tso. Con Icbombo ma mibi neyoc. Nuquin Papapadquidquibidi ma mibi neyoc –quepondash Tomas.

²⁹ Adsho tantiashien Esus: –Ëbi isun: “Nuquin Papapadquidquibidi mibi nec,” quequin mimi ëbi tantiec. Utsibombien ëbi isabi: “Ai, Esus Nuquin Papapadquidquibidien nec,” quequin ëbi tantiasho Nuquin Papan bédambo icmëndac –quepondash Esus Tomas chiec. Adtanec isadenquo yanoapondash.

³⁰ Comapenen tantiaquidquoio yec abembi uincuenash Esus adpondash. Ënden unësabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi.

³¹ Padi, aidtedi chiombi. –“Nuquin Papan chomiaidquoio yec Nuquin Papan Madombobien Esus nec,” quequin aid tantiash ma Nuquin Papa yacno abéd tabadtequido icpanu –quequin aidtedi dada uaombi.

21

Chian cuëmanuësh Esus isadoaid

1 Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu.

2 Esus uincuenash daëdec isadan con nidaid Cadidia caid yacno nidanepondabi. Nidaniash nëidtedi tabadpondabi. Nèidic Petedo. Nèidic Tomas anin abi ushëmbi daëd tishaid ëmbi caboed. Nèidic Cana yacnoquid Natanaid. Nèidic ëbëdta tishaidquio. Nèidic ëbi. Nèidic Esusbëd icboed utsi daëd. Aidtedi icpondabi.

3 Adnubien Petedo: —Ëmbi bedtenecpaden nëshaidën nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic pad-piden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

4 Badiadquionobi acte cuëman masi dapan Esus nidsho istuidpondambi. Utsiembi dampondac.

5 Adshobini Esusën cuëmpondash. —Con utsibo ¿tedtsi bedo? —cac: —Padambo. Nibëdosh —capondambi.

6 Adsho tantiashun: —Mimbi nëniauc nënenquio icquin cano utsiuc nëshaid nëne. Adoac nuëcquid bedadec —cac ambi chiauc nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

7 Adsho isumbimbi: —Ma Esus neyoc, Petedo. Nuquin Icho nec —capondac. Adoquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nëpudunash Petedo tan-tanidëc nidpondash Esus isnuec.

8 Èbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactiontsëc nidondabi.

9 Tsyuec choash pudundoshon isquien pambëdi nuëcquid cuëten shëadtsec.

10 Adnubien Esusën: —Mimbi bedboed daëdpactsëc beccho. Penu —cac

11 Petedo: —Ai, bedtanu —quianec nidash cano anidtosshon nëshaid cubu-cubuctsëcquio icquid indopondash. Acte cuëmano tsindoshon isac dad-penquioshë 153tëdi nuëcquid icpondash. Nua-nuaic tsadquido icpondash. Nèshaid tèsëdtiadtsëcquio icnuc indondambi.

12-13 Adshumbic ambi: —Pec cho —cac cho-choash tabadsho pamba menebantanquin nuëcquidtsen Esusën menebampondashi. Adoac: —¿Tsutsi ne? —quenquio icquin: —Esus nec. Comapenen tantiaquin nuëcquid nuqui bedmiösh —quequin tantiondambi ëbitedishun.

14 Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

Esusën Petedo chiaid

15 Aden chian dapa cuëmashun Esusbëdtan piondambi. Adshumbic Onas caidën mado Petedo Esusën chuipondash. —Tantia. Mibi chuinu, Petedo. Nèidon ëbi bëdiactsëc tantianuc ¿ada ëbi tantiaquie? —caquien: —Ai, mibi tantiembi. Aden ëmbi tantiaid mimbi tantiec —quepondash Petedo. Adsho tantiash: —Èbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uachimboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantiec adpondash.

16 Adshumbic padpiden: –¿Ada ĕbi tantiaquie, Petedo? –cac: –Ai, mambi mibi tantieyoc –quesho tantiashien padpidec: –Ĕbi tantiaquin con obecabimboecquido ĕbi dayun uashunta –queoapondash Esus.

17 Aden daĕden chuishumbic padpiden Esusĕn: –¿Ada ĕbi tantiaquie, Petedo? –cac shubiantiadtsĕcquio yanondash Petedo. –Unĕs uabi icnuc: “Ĕmbi isacmaid Esus nec,” quequin ĕmbi chuiboctedembidi Esusĕn chiebi –quiash shubiantiadtsĕcquio yanondash. Adashic: –Mibi con Icho nec. Mā mimi abitedimbo tantieyoc. “Petedon ĕbi tantiaquiec,” quequin ma mimi tantieyoc –queoapondash Petedo. Adsho tantiash Esus padpidec: –Ĕbi tantiaquin con obecabimboecquido ĕbi dayun uashunta –queoapondash Esus.

18 Adashic Petedobidi chuoiaic: –Tantia. Utsien chuinu. Cania yec mibibi tsiuidondac. Adanec mibi bunacno mibi nidtedniondac. Tsusibudtasacshoen tsiumeshun utsibon ĕquĕ mĕdimbudcuentsĕcshun mibi nidte bunacnanombo mibi buanendac –queoapondash Esus.

19 –Aden mimbisen Nuquin Papa chiacpadomoenuidi nabansho ĕbi chieshĕnquidon mibi unĕs uaindac –queoquin tantiec adpondash Esus. Adashic: –Ĕnenquo icquin ĕbi tantiata –quetanquimbic: –Cho. Nidnu –cac ĕbitedi pudanec nidondabi.

20 Tsyuec nidshobini Petedon bidiadquin ispondash. Adshumbic: –Nĕid Esusĕn tantiaidquo nec. Esus bedmiaid inchĕshĕn Esus aton cachoctsĕqui uesho aidĕn: “¿Tsutsi cao, Icho?” capondash.

21 ¿Mitsipadec aid unĕspatsiash? –queshun: –Ma nĕid. ¿Mitsipadec unĕspec? –capondash Petedon ĕbi unĕste Esus chuimequin.

22 Adoquien Esus: –Ĕbi bunacpadequi aidi unĕsendac. “Ĕbi Nuquin Papa yacnuĕsh choabi yacpadec ma unĕsenquo icnu,” ĕbi quiacpadec unĕsenquo ictsiash. Adecbidi: “Ĕbi choabi icnuc ma unĕspanu,” ĕbi quiacpadec unĕstsiash. “Nadec unĕsendac,” quequin mibi chienquo iquembique. Ĕnenquo icquin ĕbi tantiata –queoapondash Esus.

23 Adec: –Unĕsenquo ictsiash –Esus quesho tantiash ĕbi caic: –Esusĕn tantiaidquo yec Uan unĕsenquo iquendac –quecuededpondash Esus tantiaquido. ¿Adenda Esusĕn chuidiondash? Ma padenquo iccondac. –Ĕbi bunacpadequi aidi unĕsendac. “Ĕbi Nuquin Papa yacnuĕsh choabi yacpadec ma unĕsenquo icnu,” ĕbi quiacpadequien unĕsenquo ictsiash. “Adecbidi ĕbi choabi icnuc ma unĕsnu,” ĕbi quiacpadec unĕstsiash –quequien iccondash.

24 Aden Esusĕn nabanondaid ĕnquin chiombi. Ĕmbi isondaidquo chuiquin abimbo chuiquin aidtedi dada uaombi.

25 Esusĕn naidtedimbo chuiquin dada uambo iccombi. Ĕmbi tantiaidtedi naombi. Ambi naidtedimbo ambi chuibanaidtedimbo chuiquin dada uaqun dada uate dadpenquioshĕ naimbudnetsiambi. Padi. Aidtedi dada uaombi.

ESUS CHUIBENEQUIDON NAID

Esus aton Papan abuc indote

¹⁻² Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi.

³ Cuesten dectanac unësash uincuenshun: “Uincuenobique. Is,” quequin Esusën utsi-utsien ismebampänëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauiqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash.

⁴ Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta.

⁵ Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

⁶ Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantanu. Chui —capanëdash Esus chuiquin.

⁷ Adoaquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec.

⁸ Aden chuishumbic: —Aton Mayan Nuquin Papan meniac aidënquo tantiamequin pausunac ëbi chuibenequidquo mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

⁹ Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

¹⁰ Adec Esusbëd chobedo isec tabadnubien dashcute ushumbocquid dasiuidquid daëd choash tabadec:

¹¹ —Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

Matias Esus chuibeneta quequin iccuededquidon chiaid

¹² Aden Esus abuc indosho isash abëd macuësh Odibos caid yacno chobedo Edusaden caid yacno nidoapanëdash. Chonoadtemaid ushë nec, quec aidtionsëqui capunëdash. Aido Edusaden yacno choash abuc quënë yacno abi tabadbcno dectatoash tabadoapanëdash.

¹³ Aid quënë nuntan Esusën ëbi chuibeneta caido nëidted icpanëdash: nëidic Petëdo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidedi Esusën ëbi chuibeneta caido aid quënë nuntan tabadnubi

¹⁴ utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacbim-boec onquecuededpanëdash.

¹⁵ Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuiapanëdash:

¹⁶⁻¹⁷ —Udas pado chuibanu. Tantiata. Esusbëd icquin piucquid dayun uaquid icquimbi Esus chieshënquido Udasën Esus bedmepondash.

¹⁸ Aden Esus bedmeshun ambi piucquid bedboed menequin aton tiedëmpi bedashic aid tied nantanuësh têtaniadash pobidisquiash paëdec aton pucu tishidpac caondash.

¹⁹ Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuëmbededpondash.

²⁰ Adembidi ëndenquimboshë Udas pado tishabicnuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu mosadpanuna ma aibidi aton matses nibëdquid shubu icpanuna.”

Aden Udas pado cuidte chuiquin cuëdënte Sadmo caid utsitsen naden Dabid Padon dada uaoapampic:

“Aidën icsain nacpaden tanenquiocquin ma utsin bëdamboen napanuna,” quequin Dabid padon dada uapampic —quepanëdash Petedo.

²¹ Aden chiashic abi onquec: —Udas pado nibëdnuc Esus chuibeneta quequin abentsëc nuquitedishun chuinuna. Nëid quënë nuntan nuquibëd capuquido dada dadpen iquec. Nuqui Esus chuibeneta caid nadquid ictiad. Chuinu. Tantia.

²² Esus Uan padon acten mentosho isash niamëdenquio yec Esusbëd capucueneshun Esus indosho isquidquio icsho, Esus chuibeneta, quequin nuqui chuitiad. Adoac Esusën ëbi chuibeneta caidobëdtan Esus uincuemiaid chuibantiad —quepanëdash Petedo iccuededquido chiec.

²³ Aden Petedon chuibanac daëd istuidash Petedobëd iccuededquido, Petedon chuibocpadquid nëid daëd iquec, quequin chuiapanëdash aidon. Ambi istuidaid abentsëc Ose cashun Badsabas cashumbic Ustus, quequin cuënaid nepanëdash. Utsibic, Matias cuëmëdquid icpanëdash. Nëid daëd Petedon chuibocpadquid nec, qesho tantiashun: —Nënantanquio tabadec cho —cac abi daëdi choash tabadsho isash

²⁴ Nuquin Papa chiec nadecc iccuededquido onquepanëdash: —Nënantanquio chomeboed nëid daëd iqueque. Is, Papa. ¿Mitsicquidimbi Esus chuibeneta, cape? Èbitedi tantiame, Papa.

²⁵ Udas pado tauitdiadpambo chian anëdënquiacno nidboedën nauidaid namenu, quequin mimbì bëdamboen isaid abentsëc ëbi isme. Papa. Aden mimbì ismiac ma aidëntsen Esus chuibenepanuna —quepanëdash Nuquin Papa chiec.

²⁶ Aden chuitanquimbic aid daëd abi cuëmëdquid abentse-abentsen dada uatempin dada uashumbic tëchun sandoshon cadotaniac dada uatempi abia puënaid istanquin, Matias cuëmëdquid nec, quequin isbededboshic, Esusën ëbi chuibeneta caido onseted icboedi nëbi Matiasbëd doseted yanosh, quequin chuibededpanëdash nuntan iccuededquidtedishumbi.

2

Aton Mayan Esus tantiaquidtedi menebanaid

¹ Adashic isadaidbon ambi aton tiedën caniquid abia ëshëaid bedaid tanti-aid ushë chotsëcnubi Esus tantiaquidtedi shubunuëshì iccuededoapanëdash.

² Ambo iccuededquimbi badedquio shubu nuntan cunquequid dapa choec natiambo cunquiacbimboecsho abitedishun isbededpanēdash.

³ Aden aid isbedednubi cuēte dētsisidac bimboecquid budec mais-maisec Nuquin Papan Mayan matsadtocuededpanēdash abi isquittedi.

⁴ Nuquin Papan ma aidobēd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanēdash ambi matsadtomiaidotedi.

⁵ Aden Nuquin Papan aton Mayan menenubien isadaidbo utsibo Edu-saden yacno cho-choash dadpen tabadpanēdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoēsh Edusaden yacno cho-choapanēdash.

⁶ Ambo cho-choash tabadnubi Nuquin Papan aton Mayan meniaidmeniaidquiec nēmbobi choquidon onqueten-onquetenquiec onquesho tantiaish nēbi cho-choboedo utsi-utsiec:

⁷ —¡Padtec! Dacuēdanquiopaic. Ēbipadquiecshenda onquepec. ¿Onquequidotedi nidaid Cadidia yacnoquidoda nepec?

⁸ ¿Mitsipaden con onquete bedash onquecuededpec nec?

⁹ Ēbitedi nidaid utsi-utsiec yacnoēsh cho-choquido nebi. Padtia yacnoēsh choquido; utsibic, Media yacnoēsh choquido; utsibic, Edan yacnoēsh choquido; utsibic, Mesopotamia yacnoēsh choquido; utsibic, Udeya yacnoēsh choquido; utsibic, Capadosia yacnoēsh choquido; utsibic, Ponto yacnoēsh choquido; utsibic, Asia yacnoēsh choquido;

¹⁰⁻¹¹ utsibic, Pidiquia yacnoēsh choquido; utsibic, Pampidia yacnoēsh choquido; utsibic, Equipito yacnoēsh choquido; utsibic, Dibia Sidene uidictsēcuēsh choquido; utsibic, shubu dadpen icquid Doma caid yacnoēsh choquido; utsibic, acte nēnantan nidaid nacnēdquid Quideta caid yacnoēsh choquido; utsibic, Adabia caid yacnoēsh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo ēbitedi nebi. Ēbibimboec onquequidtedishun Nuquin Papan naid chuibanasho tantiambi.

¹² ¿Mitsipaden tantiaquin oncamiaquien adec onquepec? —quepanēdash Edusaden yacno cho-choquid.

¹³ Adnubien: —¿Bēdamboec onquepequida onquec? Paēmboquid cubudquin acshun tantienquicoquid nepanui —queoapanēdash utsibo.

Accuededquido Petedon chuibanaid

¹⁴ Adec onquesho tantiaishun Esusēn ēbi chuibeneta caido cho-choquin Petedon nidtoshon tantiamenu quequin naden cho-choboedo comapenec onquequin chuipanēdash: —Mimbi icsamboen tantiaid chiembique. Tantiata.

¹⁵ Ushē abuctotsēcnubi ēbitedishun paēmboquid acamboccombi.

¹⁶ Utsin-utsinquiec onqueten onquesho mimbi tantiaid Nuquin Papan ēndenquimboshē chiampicpadec onquec nebi. Tsusedpa Oedēmbi Nuquin Papan ma matseshēd tabadnueshun aton Mayan menenun chiaid naden aidēn dada uampic:

¹⁷ Nēid nidaid naimbudnubi

Con Mayan matses utsi-utsien menendambi.

Aidon madobobēd tan aidon champibontsen ēmbi yuecquio icshun nanun chiaid chuibanendac.

Adembidi caniabontsen ushquin ēmbi chiacpaden isendac.

Adembidi tsusiobontsen ushquin ēmbi chiacpaden isendac.

¹⁸ Aden con Mayan meniac ambi tantiacpadomboembidi ēmbi chuiquin namiaidon dadan chidobēdan

ëmbi yuecquio icshun nanun chiaidquiobidi chuibanoaindac.

¹⁹ Adembidi, con Mayanën tantiamiac ëmbi yuecquio icshun nanun chiaid masesën chuibanubien abucüesh uinsadpamboctequid icnubi nidaidëshun ismete intacimboectequidbëdtabi nëdënquetequid cuëte pushudquidimboectequid abembi pushudquidbëdta adquidtedi mibi ismendambi.

²⁰ Adquid icnuc badiadën ushë chënquenquiocnoc inchëshacimboectequid inchëshën ushë piu-piupambo yec intacimboecsho mimbi isbededendac.

Ëmbi ismiaidtedi icambi matses cuidte ushë choendac.

²¹ Ismequimbi con Icbombo nec ëbi caquidquio mënchiqëndambi, quequin Nuquin Papan chuimiapcaden Oedën dada uapampic.

²² “Adembidi Nuquin Papan chomiaid chiembique. Tantiata, isadaidbo. Nasadec caid yacnoësh choquid, Esus, Nuquin Papan chomiaid icquin nadatiambocquin nabanquin ismebansho mimbi isondac.

²³ Aidi Nuquin Papan tantiampicpaden Esus bedshun mimbi isadaidpempo chuiquid menequin, Unës uata, cac cuesten dectanquin Esus unës uapanëdash.

²⁴ Aden mimbi nac unësacsho icsaisa chococacno yuec ictiapimbo iquec, qeshun Nuquin Papan Esus uincuemepanëdash.

²⁵ Adembidi ëndenquimboshë tsusedpa Dabid padon Esus chuibanquin naden dada uapampic:

‘Con Icho abuc nidec bëyucanquid ëbëd tsadacimboecsho isec nebi.

Aidi con dayun tsadquid icsho isquin natiaic cametequid dacuëdënenquio iquendambi.’

²⁶⁻²⁷ Aid unësash uincuenta tantiec ëbitsen uincuenendabi, Papa, quec cuëdëneg bëdambo iquebi.

²⁸ Nuquin Papa yacno tabadacpadec nidaidën tabadquin ismiac mibi yacno nidash mibëdi tabadec bëdamboshë iquebi mimbi camiaid iquendabi,’

quequin Esus tantiaquin Dabid padon dada uapampic.

²⁹ “Adomboen tantiaquin dada uash Dabid unësacsho chococapampid nëbi shëcuë iquec.

³⁰ Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshë yash mibi ëndenquimbo unësampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon.

³¹ Aden Nuquin Papan nanun chiaid tantiaquin Esus uincuenta isacimboen dada uäquin, Nuquin Papan Chomiaid unësacsho chococaqui aton nami chodquenquio yec uincuenendac, quequin chuipampic Dabid padon.

³² Ai, Dabid padon chiampicpadembi Nuquin Papan Esus uincuemepanëdash. Aid uincuemiacsho isonidaid icquin mibitedi chuibanec nebi.

³³ Aid uincuenash Nuquin Papan dayunquio tabadendac nëbi. Ambo choacsho matses tantiaquin Nuquin Mayan ma aibëd tabadneshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquieq onquesho nëbi mibitedishun tantiec.

³⁴ Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic:

‘Nuquin Papa Icho Dapa icquin abipadquid icho cain: Nëbi ëbëdi tsadec cho.

³⁵ Mibi chieshënnquido dëniacquidquio mibi icmenun nabono. Chiata,’ quequin Nuquin Papan nanun chiaid Dabid padon dada uapampic.

36 “Aden tantiaquin Dabid padon chuipampid Esus mimbi cuesten dectanquin unēs uaid uincuemequin matses icsaid bedshunash abided cuidaquad Nuquin Papan icmepondash. Adoac ěmbi chiaid abimbo iqueque. Esus tantiaquidquo icta, isadaidbo —quepanēdash Petedo.

37 Aden Petedon chuisho tantiaquin iccuededquido abi icsaid tantiec unēsquo yec: —Esus tantianuequin ¿atotsi nuqui nape? —quepanēdash utsi-utsiec Petedobēda Esusēn ěbi chuibeneta caid utsibo chiec.

38 Adoacquin Petedo: —Mibi icsaid ěnshun, Esus con Icbombo nec, quequin abimbo tantiaquin acten mentometa ma ěbi icsaid Nuquin Papa bēpiscudnu queshun. Adoacsho aton Mayan mibi menendac.

39 Adembidi tantiaquo isun min tsyuecquidtsen menendac. Adembidi nidaidtedi yacnocquidēn tantiaquo isun aton Mayan meneoaindac ambi chiampicpaden —quepanēdash Petedo Esus isquidquo.

40 Aden chuibanequi: —Mimbi icsamboen tantiaid ěnta. Aden ěnash Esus tantiaquidquo icta —quequin chuibudquin Petedon ěmpanēdash.

41 Aden chuisho tantiaquo, Tantiaquiembi, quepanēdash utsi-utiec. Aid ushēmbi dadpenquioshē tedes midted Esus tantiaquid yampanēdash. Adquid icsho isun acten mentobampanēdash.

Esus tantiaquido iccuededaid

42 Adashic, Esus tantiembi, queboedo tantiabenabi iquec Esusēn ěbi chuibeneta caidon Esus chuibanesho tantiec tabadequi Nuquin Papa chiec onquedenapanēdash.

43 Adec tabadcuededsho isash: —¡Padtembo! Dacuēdampambo iquec —quec utsibo tabadpanēdash. Adnubien Esusēn ěbi chuibeneta caidon nadatiambocquin nabampanēdash.

44 Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpanēdash.

45 Aton na menequin piucquid bedshun utsin na nibēdsho isun menepanēdash.

46 Adecbidi badiadquidēn-badiadquidēnquiec Nuquin Papa tabadte shubu uashunaid yacno nidash iccuededpanēdash. Adecbidi shubu utsi-utsiec yacno nidash iccuededquin Esus unēsaid tantiaquin panēmpi cuēsh-cuēshun peded-pededpanēdash. Adembidi bundoshon pebededoapanēdash. Adobanēqui ěbi icsaid bedshunash Esus cuidaaid tantiec bēdambo iquebi, quec

47 Nuquin Papan naid chiec cuēdēncuededpanēdash. Adec tabadsho isash, Bēdamboquido nec, quec utsibotsen Esus tantiaquid yanash abi tantiaquid utsitedibēd iccuededpanēdash.

3

Caputiapimbo icquid bēdamiaid

1 Adnubien abi nidteniapadēn ushē budec 3 yanuc Petedo Uambēd Nuquin Papa tabadte shubu uashunaid yacno Nuquin Papa chiec nidpanēdash.

2 Ambo nidnubien caputiapimbocquid aid shubu shēcuē Bēdaidquo caid yacno utsibon buampanēdash. Anin tishacchobi yec caputiapimbocquid icpanēdash. Aidi badiadquidēn-badiadquidēnquien buandenequin aid shēcuē cuēmano nanded-nandedac uequimbi cho-chosho isun: —¿Adabi piucquid menetsia? —cabampanēdash.

3 Ambo Petedobēd Uan chosho isquin: —¿Adabi piucquid menetsia? —capanēdash caputiapimbocquidēn uequin.

4 Adoquien Uambëd nidtuidash nidquin Petedon: —Ëbi daëdi is — capanëdash caputiapimboquid bëisquin.

5 Adoquien, Ëbi menepashun, quequin abi daëdi isobien,

6 Petedon: —Piuccquid con na nibëdec. Ëmbi tantiaidën ëbi tantiamebocpaden naimbique. Nasaded yacno iccondaidën Esusën bëdamiacpadece bëdanash nidtoash nidec nid —capanëdash.

7 Aden chuiquin caputiapimboquidën mëdante abiucquio bedtanquin Petedon nidtopiac badedquio nidtopanëdash caputiapimboquedi.

8 Bëdambo yec nidtoash capupanëdash. Adec bëdanash Petedobëd Uan chedobëd capuashic Nuquin Papa tabadte shubu uashunaidën puduedash, Nuquin Papan bëdamioshi, quec pudundotan-pudundotanec: —Cuishon — quepanëdash.

9 Adec capusho isquidon nadobededpanëdash:

10 —Nuquin Papa tabadte shubu uashunaid shëcuë, Bëdaidquio caid yacno uetsequi, Piuccquid ëbi menepashun, queboedi capueque. En is. ¡Adpaidie. Is! Tantiadempamboctequid nec —quequin isbededpanëdash.

11 Adec capuequi Petedobëdta Uan mëdinec Sadomonën tacpan quënë uabicquid yacno puduednubien iccuededquid tsibanash anotsen tantiadempambo yec tabadoapanëdash.

12 Adec tabadsho isun Petedon naden chuibampanëdash: —¿Atotsi quiash padtec quequin ëbi daëdi comapenen bëise? ¿Ëbi daëdshun nacta nëid capupadic? ¿Ëbi bëdambocquid icquindambi nadio? Padenquio. Nuquin tsusedpabon Papa caidën bëdamiaid nec.

13 Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidëmbi ambi nidaidën chomiaid Esus nëbi aton Papabëd tabadoaic. Aton Papa yacno nidoabicsho Esus bedshun Pidato meniaquien, Nëid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unës uaquimbien ictiad, quequin mibitedishun chuipondac.

14 Icsaisa nec, quequin utsin isnubi Esus bunenquiocquien icsaquid cuidenquiocquien nidmë, quequin mimbi chuipondac.

15 Abia uincuentequid mibi chuiquid dapa mimbi unës uacshobien Nuquin Papan aidi uincuemepondash. Aid uincuenacsho ëbitedishun isondambi.

16 Esusën ëbi bëdamepec, quequin tantiash nëid taë icsachobedën Esus tantiash capusho mibitedishun isec.

17 “Utsibo, Nuquin Papan chomiaid nec, quequin tantienquiocquien mibi chuiquidobëdtan mimbi Esus unës uamiondac.

18 Ëmbi matses chuiquid dapa icmenu caid matsesën mëyanaid iquendac, quequin ambi chuimiaidtedi Nuquin Papan dada uamiampicpaden mimbi naondac.

19 Nëbi mimbi icsamboen tantiaid ënquin Nuquin Papa tantiata ma mibi icsaid bëpiscudpanuna; adecbidi ma abëdi tabadebi, quequin tantiec mibi bëdambo icpanuna;

20 adecbidi ma ambi chuiquid dapa icmiaid Esus mibi bedmenuen chomepanuna.

21 Nuquin Papan abitedi icsaisa icmete ushë choabicnuc ambi chiampicpadequid nëbi Esus abuc aton Papabëd tabadec.

22 Adembidi chuiquin Moisesën dada uampid nad iqueque. Tantiata:

'Chuiquid Dapa ëbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantianshun bëdamboen nabanta.

23 Ambi chiaid tantiesa Nuquin Papan nësecaindac,' quequin Moisesën dada uampic.

24 "Adomboembidi Samuedën chuibampampic. Adomboembidi Nuquin Papan chuimiaid utsibon chuibanoampic.

25 Nuquin Papan chuimiaidon tsyuecquido mibitedi nec. Tsusedpa Abadauanën tsyuecquidobidi mibitedi nëoaic. Aidon tsyuecquido icsho Nuquin Papan Abadauan chiampicpaden chuioid mibitedi nec. Naden Abadauan Nuquin Papan chuipampic:

'Mibi ëndenquimbo unësampin aton matsesbëdta matses utsi-utsien min tsyuecquidën bëdambo icmendac.'

26 Nuquin Papan Abadauan chiampicpadec aton tsyuecquid choacsho mimi unës uapondac. Aidi Nuquin Papan uincuemiac ma isadaidbomba abi icsaid ënsho ma ambi bëdambo icmiaid icpanuna –quepanëdash Petedobëd Uan.

4

Ambi naid Petedobëdta Uan isadaidbo tsusiobon chuibamiaid

1 Aden Petedobëdtan Uanën chuibanubien isadaidbo tsusiobo chochopanëdash. Utsi-utsiec Nuquin Papa tabadte shubu uashunaid yacno cho-choquid bëdamboen tabadmequidquico icnubi utsi-utsiec saduseyobo icpanëdash.

2 Esus unës uacsho Nuquin Papan uincuemiacpadembi matsesten unësacsho uincuemioaindac, quequin Esus chuibenequidon chuibanubi chopanëdash aid.

3 Choshon Petedo Uambëdta bedash: –Inchësheque. Badiadshun nëidën chiaid tantianush nidnu. Nid –guianec puduanquimbi Petedobëdta Uan quënen nauedmepanëdash isadaidbo tsusiobon.

4 Aid daëdi bedabicnuc Petedobëdtan Uanën chuibansho tantiaquido Esus tantiaquid dada dadpen sinco midted yampanëdash.

5 Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoësh iccuededpanëdash.

6 Nëidtedi icpanëdash: ancanquid dapa daëd Anasbëdi Caipas icpanëdash. Nëidic aton shubun icquido abipadquido: nëidic Uan, utsibic Adecandedo, aïdidi cho-choash iccuededpanëdash.

7 Iccuededshumbic Petedobëdta Uan bëmeshun nënantanquico nidtomesun: –¿Tutsi chuiquin caputiapimbocquid bëdamio? –capanëdash tsusiobon.

8 Adoaquien Petedo Nuquin Papan Mayanën comapenen tantiamiac nadpanëdash:

9 –Caputiapimbocquid tantiaquin bëdamiaid isec ¿mitsipaden nao, quecta mibitedi tabadpe? Ancanquidbëdtabi chuiquid utsibo isadaidbo utsibo mibitedi chiembique. Tantiata.

10 Caputiapimbocquid Esuquidistu Nasaded yacno iccondaidën bëdamiaid niosh. Mimi unës uacsho Nuquin Papan uincuemiaidën nac nëid caputiapimbocboedi nëbi nidtoash capusho mimi isec.

11 Aid bëdamequid mimi tantienquico yaid Nuquin Papa yacno yuedanquidquico nec.

12 Nuquin Papa yacno yuedanquid utsi nibëdec. Nuquin Papa yacno tabadte bunec aid tantiaquid icta –quepanëdash Petedobëd Uan.

13 Adec Petedobēd Uan dacuēdenquio yec comapenec onquesho tantiash tsusiobo: —Aid daēdi tsusiopenquio iquequi adecbidi Nuquin Papan chiampid tantiabenabicquid iquequi Esusbēd icquid aid daēd icquin ġmitsipadomboen caputiapimbocquid bēdamepashba? —quec tantiadempambo yec tsusiobo tabadpanēdash.

14 Aden ambi bēdameboed aibdēdi icsho isash, Icsamboen mimbi naoc, quetiapimbo tsusiobo tabadpanēdash.

15 Adshun Petedo Uambēdta nidmiash, Tantuanu, quec onquecuededec tsusiobo:

16 —ġMitsipadomboen aid daēd nuqui napeba? Nadatiambocquin nasho Edusaden yacnocquidtedishun isbededpoš. Ad icnuc, Caputiapimbocquid bēdanambo iquec, ēbitedi quetiapimbo iquebi.

17 Dadpeshun tantianushe queshun, Esus padpiden chuibanoainda, quequin aid daēdi chuinuna —quecuededpanēdash tsusiobo.

18 Adshun Petedobēdta Uan chomeoashun: —Padpiden Esus chuibanoainda. Aidēn chiaid chuiquin tantiamenda —capanēdash tsusiobon.

19 Adoaquien: —ġMitsicquidēn chiaid ėmbi natequid icpec? ġNuquin Papan chiaid niacquindambi mimbi chiacpaden nadi?

20 Nuqui isboed nuqui tantiaboedbidi chuitequidquio iquendac —quepanēdash Petedo.

21-22 Adoaquien: —Ėmbi chiacpaden nainquiocsho isun mibi daēdi mēyantsiambique. Baded nid cueschitomane —capanēdash tsusiobon. Abi tishaid seta 40ted icquid caputiapimbocsho bēdamepanēdash. Aid Nuquin Papan bēdamiacsho isash utsibo cuēdēncuededpanēdash. Adsho tantiash Petedobēdta Uan mēyantiadquicboedi adotiapimbo yec tabadpanēdash tsusiobo.

Isadaidbo tsusiobon chiaid Esus tantiaquidon chuioaid Nuquin Papa chiaid

23 Tsusiobon nidmiac nidash iccuededbocnombo choash puduedshun tsusiobon chuiboed Petedobēdta Uanēn chuioapanēdash.

24 Adoac abentsēc onquiacbimboen naden Nuquin Papa chuipanēdash: —Con Icbombo mibi nec. Abubēdta nidaid acte chedo uashun aidēnquio icquidtedimbo mimbi uabampampic.

25 Adembidi ėndenquimboshē mimbi tantiacpaden min Mayanēn tantiamiac mimbi chuimiaid, Dabid padon naden dada uapampic:

“ġAtotsieshumbini ēbi dēniaciapimbo icquidombi isadaidpembo comapenec nēishash ēbi dēniacte buncuededpec? Adquiecbidi ġAtotsi quiash ėmbi chomiaid icsamboen nanushbimboec isadaidbo onqueuidoapec?”

26 Ancanquidobēd chuiquid utsibo ėmbi chomiaid aton Icbobi mēyanuec iccuededec.”

27 Ai, mimbi Dabid pado dada uamiampicpadembi ėnabi Edusaden yacno isadaidpembo ancaquid daēd Edodesbēd Ponsio Pidato icnubi isadaidbo chedo iccuededquin mimbi Chomiaid icsaisa Esus icsa uanuec onquecuededpondash.

28 Mimbi tantiampicpadembi unēs uapondash, Papa.

29 Adquidēn Petedobēdta Uan chushcasha mimbi tantioc. Cuesambocquid ēbitedi icmequin mimbi chiaid ēbi chuibame, Papa.

30 Icsaisan Esusēn bēdamiacpaden nadatiambocquin naban, Icbo —quepanēdash Esus tantiaquido Nuquin Papa caic.

³¹ Adoac abi iccuededacno ishcudpanēdash. Adec ishcudnuc ambocquid Nuquin Papan Mayanēn comapenen pausunac dacuēdenquiocquin Nuquin Papan chiaid chuibampanēdash.

Abentsēc yachimboec tabadaid

³² Aden chuibanequi abentsēc onquiacbimboec tabadec Esus tantiaquido, Con na nec, quenquō yec, Nuquin Papan na nec, quec tabadcuenepanēdash.

³³ Adequi tabadcuenequimbi dacuēdenquiocquin, Esuquidistu uincuenacsho isombi, quequin chuibenepanēdash. Adec Esus tantiaquido tabadsho utsibon bēdamboen isbededquin aidēn chuibansho bēdamboen tantipanēdash.

³⁴⁻³⁵ Adembidi nidaid icbo utsinutsinquien aton nidaid menequin piucquid bedshun Esus chuibenequido menepanēdash. Adembidi, shubu icbo utsinutsinquien aton shubu menequin piucquid bedshun meneoapanēdash. Aden meniac aton na nibēdquid icsho isun Esus chuibenequidon mēnebanac bunenquio tabadpanēdash.

³⁶ Adecbidi ambo acte nēnantanquio nidaid nacnēdquid shubu uaidēnshun Chipide caid yacnoshon tishaid Edusaden yacno choash Ose tabadpanēdash. Aidi, Bēdamboen mimbi naoque. Adobanta, quedenesho Bednabe cuēmpanēdash.

³⁷ Aidēmbi aton nidaid menequin piucquid ambi bedaidtedimbo Esus chuibenequido meneoapanēdash.

5

Ananiasbēd aton chido Sapida muaid

¹ Adnubien dada utsi Ananias cuēmēdquid aton chido Sapidabēdtan aton nidaid menequin piucquid bedpanēdash.

² Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniacbimboen menepanēdash Ananiasēn.

³ Adnubien, Piucquid abitedi meniacbimboen Ananiasēn mua uaposh, quequin Nuquin Papan Mayanēn tantiamiac naden Petedon Ananias chuipanēdash: —Satanasēn tantiamiaid icquin *¿mitsipaden tantiaquin Nuquin Papan Mayanēn isnubi mua uaquin ēbi menio?*

⁴ *¿Min nidaid meniabi icnuc mitsanapenquioda nediosh? Mitsana niosh. Adecbidi, *¿aidi menequin piucquid bedaid mitsanapenquioda nediosh? Aidedi mitsana niosh. *¿Mitsipaden tantiaquin piucquid abitedi meniacbimboen meniano? Aden bēquin abimbo chienquiocquin Nuquin Papambobi mimbi mua uaboc***

⁵ —Petedo qesho tantianec Ananias unēsequi uebudpanēdash. Adsho isash Esus tantiaquidtedi dacuēdpanēdash.

⁶ Unēsacsho isun dashcute cuēshēn dataneshun buanshun caniabon chococatampanēdash.

⁷ Bēnē chococambic ushē abuctoan unēsboedēn chido aton bēnē unēsaid tantienquio yec choapanēdash.

⁸ Choasho isumbien: —*¿Ada min nidaid menequin nēidtedi piucquid bedo? —Petedo qesho tantiashien:*

—Ai, aidtedi bedombi —quepanēdash Sapida.

⁹ Adoaquien Petedo: —*¿Nuquin Papan Mayanēn ēbi muasho tantiapec, quequin tantienquiocquinda min bēnēbēdtambi min piucquid abitedi meniacbimboen meniano? Nēbi min bēnē chococaboedon mibitsn buanendac —Petedo quenubic*

¹⁰ Petedon tayumbi uebudec Sapida unēspanēdash. Aidtsen unēsacsho buanshun aton bēnēbēdtabi chococatampanēdash.

11 Adoac aid daëdi unësaid tantiash Esus tantiesatedi Esus tantiaquidobëd comapenec dacuëdcuededpanëdash.

Bë-bëaidtedi bëdanaid

12 Adashic Sadomonën tacpan caid yacnoësh Esus tantiaquido iccueded-nubi Esus chuibeneguidon nadatiambocquin nabampanëdash.

13 Adomboen nabansho isash Esus tantiesabo dacuëdec tacpan yacno chotiapimbo yequi: –Esus tantiaquido bëdamboshë iquec – quecuededpanëdash.

14 Adec tabadequi utsi-utsiec dadpen dadabëdi chido Esus tantiaquido yampanëdash.

15 Adec Esus tantiaquid yanshun, Daicsaido Petedon bëdamepec, quequin tantiaquin daicsaido bë-bëshun Petedo capuacno nambededpanëdash.

16 Adembidi dëuequidon Edusaden yacno daicsaid bë-bënubi mayan icsan mëyanaido bë-bëoapanëdash. Aden bë-bëaidtedi bëdampanëdash.

Esus chuibeneguido tsusiobon quënën nauedmiaid

17 Adnubien isadaidbo ancaquidbëd tsusio dapa utsibo saduseyobo caid isec otacquo tabadboedi matses dadpen Esus chuibeneguido yacno cho-chosho isash nëishcuededpanëdash.

18 Adec nëishcuededshun Esus chuibeneguido bedmeshun quënën naued-mepanëdash.

19 Aid inchëshëmbi Nuquin Papan uaid mayan bëda choshon quënë shëcuë bëtashaid bécadoquin abitedi puduemec:

20 –Mibi puduemibique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanooata – quepanëdash Nuquin Papan uaid mayan bëda.

21 Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanooaic tabadoapanëdash aitedi. Chuibanubien isadaidbo tsusio dapan abëd icquidobëdtambi tsusio utsi-botedi cho-chomeshun: –Esus chuibanquido bedtan –cac

22 quënën nauedaid puduenushe quequin isquido chuiquid nidshun isquien Esus chuibeneguido nibëdec.

23 Adsho isash choaquin: –Quënë shëcuë bëdamboen bëtashquin quënën nauedaid puduenushe quequin isquido shëcuë cuëmano capusho isombi. Shëcuë bécadoash puduedshun isaquien ënden puduen-puduenac – quepanëdash quënën nauedaid puduenushe quequin isquido chuiquid.

24 Aden chuisho tantiash isadaidbo tsusiobo: –¿Atodain nechitec? – quepanëdash Nuquin Papa tabadte shubu uashunaid isquido chuiquid chiec.

25 Adnubien dada utsi choshon: –Mimbi quënën nauedboedon Nuquin Papa tabadte shubu uashunaid yacnoshon chuibanooasho tantiombi. ¿Ada tantio? –capanëdash.

26 Adoaquien quënën nauedaid puduenushe quequin isquido chuiquid capitan caidën ambi namiaidobëdtan tantiec nidshun bedtanquin bëoapanëdash. Matsesën cuënoten ëbi se-senushe queshun mëyanenquiocquin Esus chuibeneguido bëoapanëdash.

27 Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo:

28 –Esus chuibenenda, quequin chiambocquidëmbimboen Esus chuiban-quin Edusaden yacnocquidtedi mimbi tantiamebanoc. Adoquimbic, Esus unës uaid tsusiobon naid nec, quequin mimbi chuibanoc –quepanëdash tsusiobo.

²⁹ Adsho Esus chuibenequido utsibon tantianubi Petedonuidi: —¿Matsesën nata caidodabi nedi? Nuquin Papan nata caid icquin nabanembi.

³⁰ Mimbi cuesten dectanquin unës uaondaid Esuquidistu Nuquin Papan padpiden uincuemepanëdash. Nuquin Papa caid tsusedpabon Papa caidquio nec.

³¹ Esus uincuemeshun aton dayunquio tsadmequin matses bëyucanquin Chuiquid abi yacno matses Pudedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna.

³² Esuquidistun nabansho isbempondambi. Adembidi abi unësash uin-cuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiameoaic —quepanëdash Petedo.

³³ Aden Petedon chuisho tantias tsusiobo: —Icsambo iquec —quiash Esus chuibenequido cuesunete bumpanëdash.

³⁴ Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bëdamboen isaid, Camadied cuëmëdquidën: —Chiata. Bëboededi buantan —cac

³⁵ buanambic: —Icsamboen nanushe qeshun bëdamboen tantiaquiota. Aido cuesunete mibi bunequ. Cuesunenushë chiata.

³⁶ Ëndenquio utsi Teyudas cuëmëdquid icpondash. Aidi tsusio dapa icnuequin chuisho tantiash dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash.

³⁷ Adashien matses tambanta caid ushëmbi utsi Udas cuëmëdquid Cadidia yacno icnëdaidbëd matses dadpen capupanëdash. Udastsen cuesuniac abëd icnëdaidtedi padpidec choenquio yec adëcbidi udimbo nidanepanëdash.

³⁸ Adec umanuc buamboedo chuiquid nibëdanaque. Aidbëd icboedo mishenda. Cuesunemenda. Aidën chuibanaidbëdtabi ambi naid matsesën naiduidtsëqui icnuc badedquio ënëdendac.

³⁹ Aido Nuquin Papan namiac chuisho mimbi ëmetiapimbo iquendac. Nuquin Papa chieshënushe qeshun aido nidmeta.

⁴⁰ Aden Camadiedën chiac: —Adonona —qeshun: —Buamboedo bëoata —cac bëacsho cueshcanten cuesmepanëdash. Aden cuestanquin: —Esus chuibanoinquio yec nidtan —qeshun puduemepanëdash.

⁴¹ Puduemiac Esus mëyanaid tantiec nidequi abi chuibanansho mëyanaid yec bëdambo iquebi, quec tabadpanëdash.

⁴² Adshumbic badiadquidën-badiadquidënquien Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus nec, quequin chuibanpanëdash aidon. Shubu utsi-utsiec yacno nidshun adomboembidi chuibenepanëdash.

6

Niante chidobo pete menabanquid icta caid

¹ Adashic badiadquidën-badiadquidënquiec Esuquidistu tantiaquid dadpen-dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanëdash.

² Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ëntiapimbo iquebique.

³ Niantebo meneta canuen nadquidquo istuidshun chuita. Nuquin Papan aton Mayan meniac tantiamiac bēdamboec tabadsho mimbi bēdamboen isaidquo istuidta. Adquid 7ted istuidshun, Niante chidobo pete menebanquid ic̄ta, cata.

⁴ Aidtedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanēdash Esus chuibenequido.

⁵ Adoaquien: —Mimbi bēdamboen chioc —quepanēdash Esuquidistu tanti-aquid utsibo. Aidēn chuibocpadembi aidtedi istuidpanēdash. Nēidic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquo Esteban cuēmēdquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēdquid.

⁶ Aidtedi istuidshun Esuquidistu tantiaquid utsibon aido bēdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

⁷ Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiaish utsi-utsiec Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantiaish Esuquidistu tantiaquido yampanēdash.

Esteban bedaid

⁸ Adnubien Nuquin Papan Mayan meniaidēnquo. ambi comapenen tantiamiaidēnquo, Estebanēn nadatiambocquin ismēbampanēdash.

⁹ Aden nadatiambocquin ismenuc bēdamboen tantienquo yec utsibo comapenec onquecuededpanēdash. Nēidic, Sidene yacnoēsh choquido; utsibic, Adecandedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aidtedi Edusaden yacno cho-choash tabadec Estebambēd comapenec onquepanēdash.

¹⁰ Comapenec onquequin Esteban Nuquin Papan aton Mayan meniaid ic̄sho aidēn comapenen tantiamiac onquesho dēniaquec utsibo onquetiapimbo ic̄panēdash.

¹¹ Onquequin dēniactiapimbo ic̄quin utsibo naden aidon chuipanēdash: —Tsiusiobo naden chiec nidtan: Estebanēn nuquin tsusedpa Moises caidēn dada uampidbēdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanēdash.

¹² Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo ic̄cuededacno buanquin yuedshun ismēpanēdash.

¹³ Ambo abi dēniactiapimbocquidon Esteban muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēdta Nuquin Papan Moises dada uamepampid ēnenquiocquin muaquin chuibanec.

¹⁴ Naden Estebanēn chioshe. Tantia: Nasaded yacno ic̄condaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata quequin chiaid natiapimbocquid nec, quequin Estebanēn chuibanosh, quequin muaquin chuipanēdash Esteban dēniactiapimbocquidon chomiaidon.

¹⁵ Aden Estebanën chiaid muaquin chuiquin naimbudquimbi tsusiobobëdtambi comapenen Esteban bëisquin Estebanën bëtantiate ushëbimboec ushumbo yec chënquesho isbededpanëdash.

7

Estebanën chuibanaid

¹ Adec Estebanën bëtantiate ushëbimboec chënquesho isec tsusio dapambo Esteban chuiquin: —¿Abimboda mimbi naid chuiposh?

² —caquien yuecquo onquequin Estebanën naden chuipanëdash: —Chiembique. Tantiaquiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uëshëmbo yec dasiuidteniaid matsesën istemaid bëchomaoanquiec icquid Abadauan ismepampic.

³ Aden ismec nadece onquepampic: “Min utsitedi nianec nidaid utsi yacno mibi ëmbi ismenu caid yacno nidfa.”

⁴ Adsho tantiashe Candeyabon nidaid yacnoësh nidashic nidaid Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocono Nuquin Papan nuquin tsusedpa Abadauan chomepampic.

⁵ Aden chomeshun Nuquin Papan naden Abadauan chuipampic: “Nëid nidaidën mibi capuacno mitsanapenquio nec. Yuecshun mibi menenun nanuna. Mimbi tishmiambochoedi min chidon tishaid abentsëc min madombo nëid nidaid menendambi.

⁶ Nëid nidaid bedabi yec mimbi tishmiaisën tishmiais caidaido matses utsibon nidaidën tabadendac. Ambo tabadshobi anocquidën aido yuashun seta dadpen 400ted matamequin mëyanendac.

⁷ Adoacsho aidotsen cuidquin mëyanoaindambi,” quepampic Nuquin Papa. Adashic abi Nuquin Papa onquec: “Min madon tishmiais caidaido abi mëyanacnoësh nidashic nëid macuësh yacno choshon ëmbi chiacpadomboen nabanendac.”

⁸ Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuëbëdta dada caniaidtedi shui dëbid dëtemeta. Adobansho isun, Èmbi chiaid bëdamboen naquidquio aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanën ambia dëtemeshun dadatedi aidëmbidi shui dëbid dëtemeoapampic. Adoshombic yuecquo icshun Abadauanën aton mado tishmeshun Isac cuënquin 7tedec ushun Isaquën shui dëbid dëtemeoapampic. Adoshombic ademibidi Isaquën aton mado tishacsho Acobo cuënquin aitedecbidi ushun Isaquëntsen Acobon shui dëbid dëtemeoapampic. Adoshombic, canishun Acobon tishmiaido 12ted icpampic. Abentse-abentsen tishmeshun aitedecbidi ushun aton madon shui dëbid dëtemeoapampic. Adoquien yuecash Acobon madotedi tsusiobudnepampic —quepanëdash Esteban isadaidbo tantiamenu quequin chiec.

⁹ Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaquio icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid Ose meneoapampic.

¹⁰ Adoac, Yuanu, qeshun natiamiaid Ose icsho isun Nuquin Papan aid dayun uaqun dacuëdenquio icmequin comapenen tantiaquidquio bëdamboen chuiquidquio Ose Nuquin Papan icmepampic. Adquidquio icsho isun Equipito yacnocquido ancaquidën Padaon caidën Equipito yacnocquido chuiquidquio Ose icmepampic.

11 “Yuecash Equipito yacnocquido chuiquid, Ose, icnubi nidaid Equipito caid yacnocquidbēd nidaid Canan caid yacnocquido natiambo buncueded-pampic. Adnubi nidaid Canan yacno nuquin tsusedpabo Isadaidbon pete nibēdquiec yampampic.

12 Adshumbic, Equipito yacno quēnē uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiombique. Bedtan,’ cac Osen utsibo aton papan chiacpadec pete bedec nidaneppampic.

13 Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimēdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquiochoedēmbi Padaonēn tantiabempampic.

14 Aton utsibo Padaon chuibanshumbic Osen aton utsibo chuiquin: ‘Nuquin pabēdta nuquin matses bedtan,’ capampic. Adoac bedoanec Equipito yacno choapampic. Abēd icquido 75ted icpampic.

15 Adashic, Equipito yacno yuec tabadashi tsusio budashi Acobo unēspampic. Auēshquiobidi nuquin tsusedpabo Acobon madotedi adechidi unēsoapampic. Unēsacsho Equipito yacno chococapampic.

16 Adashic, yuecquio yash Equipito yacnoēsh nidquin unēsaidon tishmiaid caidaidon aton mēdimbon canite buampampic. Canite buanshumbic Siquen caid yacno nidshun ēndenquimbo matses utsi, Amod caid, piucquid menequin tsusedpa Abadauanēn tied bedshunēdacno chococapampic.

17 Aden chuishumbic Estebanēn nadopanēdash: –Equipito yacnoēsh tsusedpabo nidabi icnuc Nuquin Papan, Nidaid menenun nanuna, quequin chuiampid ushē chote anoentsēc yanuc nuquin tsusedpabo dadpen yanec caidpampic.

18 Dadpen caidsho isun Equipito yacnocquido ancaquid utsin Ose pado tantienquio icpampic.

19 Aidēmbi mua yaquin chuiquin natiamequin nuquin tsusedpabon dada bacuē tishacsho bedtemaid nec, quequin nemepampic.

20 Adnubien dada bacuē Moises tishacsho Nuquin Papan, Aid bēdaidquio iquec, quequin ispampic. Aidi icucshun ushē abentsēc choaid nidmequin Equipito yacnocquido ismenquiocquin aton mado Moises anin ompampic.

21 Ompoaqui Moises shubisho tantiashun tsitsan ambi danoshcaidēn aton mado acte nantan anin nuntampampic. Aden nuntanambien Equipito yacnocquido ancaquidēn champi nesec budquin tsitsanēn Moises noadtsēcsho istuidshun bedash, Con mado caimbi, quepampic ancanquidēn champi.

22 Bedtsac canitsequi aidēn shubu nuntan tabadec Equipito yacnocquid matsesēn naid mēquiadec aidēn chiaid Moises paquiadpampic. Aden Equipito yacnocquidon naidtedi naquin aidēn chiaidtedi Moisesēn tantiabenquiopampic.

23 “Adashic, Equipito yacnocquidobēd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonataadacno nidquin Moisesēn istuidpampic.

24 Istuidnubi Equipito yacnocquid dada abentsēcshun isadaidbo dada abentsēc mēyanquin cuesunesho isun Equipito yacnocquid cuidnuequin Moisesēn cuesuneopampic.

25 Ĕmbi adosho isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquiec nidnubi aton matsesën tantienquio icpampic.

26 Badiadash aton matses yacno padpidec nidquin aton matses daëd cuesnansho istuidshun, Ĕmenu, abibi quec choquimbi: ‘¿Atotsi quec min matsesëd cuesnane?’ Moisesën catuidpampic.

27 Adoquien Moises cuëscatanec: ‘¿Ĕmbi nasho cuidquin ëbi chuiquid tsuntsin mibi icmioshe? Chui. Tiantianu,’ quetanequi:

28 ‘¿Equipito yacnocquid mimbi cuesunecpadenda ëbitsen cuesune?’ quepampic cuesnanquid Moises caic.

29 Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

30 “Adashic, seta dadpen 40tedbidi matamec nidaid Madian caidën tabadec cuëtampiuidquio yacno matses nibëdquiec yacno macuësh dapa Sinai caid anoentsëqui Moises chopampic. Ambobi tabadquimbi cuëtampi nëdënquiacimboecquid nënantanquio Nuquin Icbon Chomiaid tabadsho Moisesën ispampic.

31 Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuipampic:

32 ‘Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ quesho tantiash dacuëdec uëdëquec istiapimbo yec Moises niduidpampic.

33 Niduidsho isec Nuquin Icho Moises chiec nadpampic: ‘Nëmbo ëbi icsapenquio icquid icnuc caputemaid nidaid iqueque. Min tapucudte chichshun tantiata.

34 Min matses ëbi cudasaido Equipito yacnocquidon mëyanac uëshquec shubiquosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,’ quepampic Nuquin Icho Moises chiec.

35 “Aden cuëtampi nëdënquiacimboecquid nënantanquio icboedën Nuquin Papan Chomiaidën isadaidbo bëyucanquin buanquid icta cac: ‘¿Ĕmbi naid icsho cuidquin ëbi chuiquid tsuntsin mibi icmioshe? Chui. Tiantianu,’ abi caondaïdo bëyucanquin buanquid Moises icpampic.

36 Adquid Nuquin Papan icmiac Equipito yacnoshon aton matses bëyucanquin buanun Moisesën nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeoapampic. Adoshombic, matses nibëdquiec yacno seta dadpen 40tedbidi matamec abi tabadcueniachnoshontsen nadatiambocquin nabanquin isadaidbo Moisesën ismeoapampic.

37 Aidëmbi naden chuipampic: ‘Yuecquio icshun ëbipadquid mimbi tishmi-aidën tishmiadon caidaïd Nuquin Papan chuiquidquio icmendac,’ quequin Moisesën chuipampic.

38 Isadaidbo bëyucanquin chuiquid Moises matses nibëdacno isadaidbobëd macuësh dapa Sinai caid yacno choash Nuquin Papan chomiaidobëd Moises tabadpampic. Ashunquio Nuquin Papan abëdi tabadte tantiamenuequin cuënote pada-padamboquidën ambi naden nata quequin dada uaid Moises menepampic.

39 Aden aid dada uaid bedshun bëyucanquin chuisho tantiesha yanec nuquin tsusedpabo Moises bunenquio yec Equipito yacno nidoate bumpampic.

40 Adashic, Moises macuësh yacno yuecquio tabadnubi Moisesën ut-simbo Adon cuëmêdquid aton matses utsibon naden chuibededpampic: ‘¿Moises nuqui Equipito yacnoshon bëyucanquin bëboed mitsi nidpash nec? Nibêdequien iquec. ¿Atotsi quec nidpash? Nuquin Papan uacpadquiocnoc nacnenta. Nacnenash bëyucanquin chuiquid aid iquendac,’ tsusedpabon cac

41 bacan bacuëbimboecnuc Adonën nacnempampic. Ambi nacnenaid tantiaquin isadaidbon nidaidën capuquid yua cuesuneshun cuêdênêmbededpampic.

42 Adquid cuêdênênsho tantiaash isadaidbobêd ictiapimbo iquec Nuquin Papa, Padi. Adenda, quenquo icpampic. Adquido Nuquin Papan êndenquimbo tantiaquin naden chuipampic: ‘Adomboen mimbi nacnenaid tantiec tabad.’ Adembidi Nuquin Papan yuecquio icshun nanun chiaid isadaidbo chuiquin naden dada uamepampic:

‘¿Matses utsi nibêdquio yacnoshon seta dadpen 40ted matamequin ëbi tantiaquina nidaidën capuquid yua cuesuneshun pambid tauidenio? Padenquo.

43 Êmbi uaid badiadên ushë, ëbitedishun bëyucamembi, qeshun aidpadquid nacnenshun Modoc cuênquin aton shubumpi nuntan namposh.

Aidbêdtabi uispa dapatsen ëbitedishun bëyucamembi, qeshun aidpadquidbidi nacnenshun Dempan cuênc danêshën sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun êmbi menenu caid nidaid yacno mibi nidmenquo icquin nidaid utsi, Babidonia caid udi mibitedi nidmeoaindambi.’

Aden ambi chiaid niacquido isadaidbo tantienquo icquidobi Nuquin Papan chuipampic —quepanêdash Esteban isadaidbo chiec.

44 Aden chiec yuec onquebudec: —Matses utsi nibêdacnombo nidanequin tsusedpabon Nuquin Papa tabadte chichanshun buampampic. Aidêmbi Moises ismiacpadembi isadaidbon Nuquin Papa tabadte shubu uashumpampic.

45 Adashic, tsusedpabo aid shubu uaquidotedi unësan ambi tishmi-aidontsen aid shububidi adomboembidi chichanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chichanaid bëshun bëyucanquid Osue cuëmêdquidbêdtan nuquin tsusedpabon aid nidaid nënantanquo shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic.

46 Aidi Nuquin Papan bédamboen isaidquio aid nidaidën tabadquin Nuquin Papa tabadte buantiapimbocquid shubu uashuntiadquiocquin shubu uate bë-bëmepampic.

47 Aid shubu uabi Dabid unësam bic ambi tishmiadên, Sadomon cuëmêdquidên, Nuquin Papa tabadte nainquin shubu uashumpampic.

48 Aden matsesën shubu uaidên Nuquin Papa tabadenquo iquec. Adem-bidi Nuquin Papan chuimianiaidên naden chuipampic:

49 “Abutenquiobi con tsadte dapa iquec. Adecbidi nidaidtenquiobi êmbi tincatequid nendac.

¿Adquid icnubidabi matsesën nidaidên shubu uashun tabadmepadic?
¿Nidaidênuidi tsadpectabi tiboquendac?

50 ¿Tauaquiouimbi abitedi uambodambi ictionda?”

quequin Nuquin Papan chuimiai dên dada uapampic —quequin chiashic Esteban abi onquec:

51 —Pacuênêdacimboen Nuquin Papan chiaid tantiaash icsaquin ënesa mibitedi nec. Aton Mayanën tantiamenu cac tsusedpabotedishun chieshêmpampicpadembi mibitedishun chieshênoaic.

⁵² ¿Nuquin Papan ambi yuecquio icshun naden nanuna quequin chiaid ambi chuimiaidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unës uamiondac.

⁵³ Nuquin Papan chiaid ambi uaidon mayan bëdabon meniaqui Nuquin Papa chieshënquido mibi nec –quepanëdash Esteban isadaidbo chuiquin ênec.

Esteban se-siaid

⁵⁴ Adec Esteban onquesho tantiashun nëishënshun Esteban iccuededquidon chushcapanëdash.

⁵⁵ Adoaquien Nuquin Papan Mayan meniaidquio icquin Estebanën abuc isquin Nuquin Papa uëshëmbo yec matsesën istiapimbo bëchomaoanquiec ictequid abichobi dasiuidteniaid chënquenubi Nuquin Papabëd tancandaëdquiec Esuquidistu nidtuidsho ispanëdash.

⁵⁶ Aden isequi: –Abuc shëcuë uaid shëcniaye. Is. Umbo Esuquidistu, matsesondaïd, Nuquin Papabëd tancandaëdquiec tsadsho isembi –quepanëdash Esteban.

⁵⁷ Adsho tantiash tsusio bo comapenec sidquianec pamumëdanec titinquen Esteban bedshun

⁵⁸ Cuënoten se-senuen shubu nibëdacno udi buampanëdash. Aden Esteban buanshun aton dashcute Saudo cuëmëdquidën taëno sampanëdash Esteban se-senuequidon.

⁵⁹ Sanshun se-siaquic Estebanën Esuquidistu cuënquin naden chuipanëdash: –Ëbi yued, Icho –quiashic,

⁶⁰ danëshën sebudash comapenec nadec onquec: –Ëbi se-sequido icsaid cuidenquio yec bëpiscudta, Icho –quepanëdash. Adec onquetanec Esteban unëspanëdash.

8

Saudon Esus tantiaquido mëyanaid

¹ Esteban se-senu caquien, Ai, adota, quiash isec uano Saudo tsadpanëdash. Esteban se-siaid ushëmbo Edusaden yacnoshon Saudon Esus tantiaquid utsi-utsien comapenec mëyanquin tauadopanëdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaïd Udeya yacno utsi-utsiec choash tabadnubien Samadia caïd yacno choash utsibo tabadoapanëdash.

² Adnubien Nuquin Papan chiapadomboen naquin Esteban chococaic comapenec sedenquec shubipanëdash.

³ Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën naued-mepanëdash.

Samadia yacnoshon Esus chuibanaid

⁴ Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenepanëdash.

⁵ Adembidi niente chidobo aton na nibëdsho menequid, Uedipe cuëmëdquid nidaïd Samadia caïd yacno choshon adembidi Esus chuibanopanëdash.

⁶ Aidën nadatiambocquin nabanquin Esus chuibansho ambocquido iccuededquin bëdamboen tantiapanëdash.

⁷ Aidëmbi nadatiambocquin nabanac mayan icsa dapuedaid icboedi mayan icsa sidquianec cuempanëdash. Adecbidi canite icsaidbëdta caputi-pimboquid dadpen bëdampañëdash.

⁸ Adsho isash Samadia yacnocquido, Bëdambo iquebi, quec tabadpañëdash.

⁹ Adnubien Samadia yacno ënden chonaid, Nadatiambocquin nabanquid dapa nebi, quequin mayan icsan tantiamiacpaden Simon cuëmëdquidën nabampañëdash.

¹⁰ Adosho isash: “¡Eee! Abimboshenda caposh. Nëid dada Nuquin Papan ambi nadatiambocquin nabante tantiamiaid nec,” quequin anocquidobëdtan abi chuiquidon comapenen tantiampañëdash.

¹¹ Aden yuen Simonën ismiac, Isnuequid dadpen badiadquidën-badiadquidënquiec abi yacno choash iccuededpañëdash.

¹² Adnubien, Nuquin Papa yacno puduedmianquid Esus nec, quequin Uedipen chuibansho tantiaquid yampañëdash dadabëdi chido chedo. Adsho aitedi acten mentomepañëdash.

¹³ Simontsen: —Esus tantiaquid nebi —quesho acten mentoaqui Simon Uedipebëd capuquimbi Uedipen nadatiambocquin nabansho isun, Adopenshenda nabanec, quequin ispañëdash Simonën.

¹⁴ Adashic yuecash Samadia yacnocquido Edusaden yacno nidash nadpañëdash: —Nuquin Papan chiaid Samadia yacnocquidon tantiabedec. Aden chuisho Esus chuibenequidon tantiasun Uambëdta Petedo Edusaden caid yacnoësh nidaid Samadia caid yacnoshon nidmepañëdash.

¹⁵⁻¹⁶ Adec aid daëd nidaneshun: —Esus tantiaquid acten mentoaidouidi nëidtedi nec —anocquido quesho tantiasun: —Nëidtedi min Mayan mene, Papa —quec onquequin

¹⁷ Petedobëdtan Uanën mëdanten Esus tantiaquido mamishbampañëdash. Aden mamishbanubi aitedi Nuquin Papan aton Mayan menepañëdash.

¹⁸ Aden Petedon nasho isash Simon: —Ma adquiec mëquiadnueshun mibi puicquid menenu.

¹⁹ Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —quepañëdash.

²⁰ Adoaquien Petedo: —¿Piuicquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min puicquid icpanu.

²¹ Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac.

²² Mimbi icsamboen tantiaid ënta. Aden icsaid ënsho isash Nuquin Papa mibi icsaid bëpiscudendac.

²³ Mayan icsan yua icquin tactau tishidaid mishaid mucambo yacpavec icsamboen mimbi muaquin chuibanaido icsaindac.

²⁴ Adoaquien: —Ëbi tauiantiadpambo chian anëdënquequid nënenushe quiash mibi Uambëd Nuquin Papa chiec bëdamboec onquebudneta —quepañëdash Simon.

²⁵ Adec Samadia yacno tabadquin Petedobëdtan Uanën: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuiopanëdash aidëmbidi.

Uedipe Etiopia caid yacnocquidbëd icaid

²⁶ Adoshombic, Samadia yacno Uedipe icsho Nuquin Papan uaid mayan bëdan nadopañëdash: —Nëuëshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibëdacno podquedën nidash nidtuidtanec chotan.

²⁷ Adoac nidtoanec nidquimbi Nuquin Papan uaidēn mayan bēdan chuibocno choquin Etiopia caid yacnoēsh choquid Uedipen bēquedtuippanēdash. Ancanquid chido Candase cuēmēdquid aton na dayun uashunquid aid dada napanēdash. Aidi Edusaden yacno nidash tabadquin Nuquin Papa chianec

²⁸ padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanēdash.

²⁹ Adnubien Nuquin Papan Mayanēn: —Nidaid cano chinunta —cac

³⁰ Uedipen titinguequin chinumpanēdash.

Aden Etiopia yacnoēsh choquid dada uaid isec onquesho isash: —¿Isbanec onquequinda tantiaque? —quepanēdash Uedipe.

³¹ Adoaquien: —Tantiamequid nibēdnuc ¿mitsipadentsimbi tantiape? Ēbēdi antsadtoec cho —cac Uedipe abēdi antsadtopenēdash.

³² Aidbēdi antsadtoshon Etiopia yacnoēsh choquid Nuquin Papan dada uamiampid isec onquesho Uedipen naden tantiapanēdash:

“Obeca cuesunenuen nimbambocpadomboembidi mētaneshun nimbanoa-posh Nuquin Papan chomiaid unēs uanuequin.

Adecbidi obeca bacuē abi datasnuequid icnuc cuēdenquio yacpadec abi unēs uanuequid icnuc cuēdenquio icoaposh Nuquin Papan Chomiaid.

³³ Aidi Icsaisa icsho mēyansho isec, Icsambocquidta neque. Isnu, quenquioc-posh aton matses.

Aidi chido inesa yec ambi tishmiaid nibēdnuc ¿Tsuntsin ambi naid chuipadic?”

³⁴ Aidedtsēqui abi isec onqueboed Uedipe ismeshun Etiopia yacnoēsh choquidēn: —Ēbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibanec? Ēbi chui. Tiantanu —capanēdash Etiopia yacnoēsh choquidēn Uedipe chuiquin.

³⁵ Adoaquien, Matsestedi icsaid bedshunash abided cuidadec Esus unēsaid Nuquin Papa yacno puduedmianquid nec, quequin dada uapampidēn chiec, quequin Etiopia yacnoēsh choquid tantiamenuen chuibampanēdash Uedipen.

³⁶ Adoanec nidquimbi Etiopia yacnoēsh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanēdash.

³⁷ Adoaquien Uedipe: —Esus tantiaquidquio nebi, quesho mibi acten mentono —capanēdash.

Adoaquien: —Nuquin Papan mado Esuquidistu nec, quequin aid tanti-quid nebi —queshun Etiopia yacnoēsh choquidēn:

³⁸ —Nidtuid —cac nidaid cano nidmequidēn cabayo nidtuidmian acte budshun Etiopia yacnoēsh choquid Uedipen mentopanēdash.

³⁹ Adashic, acte nantanuēsh abi daēdi dectatosho Nuquin Papan Mayanēn Uedipe buampanēdash. Adoac Uedipe padpiden isenquio yequi, Esus tantiec bēdambo iquebi, quec Etiopia yacno nidoapanēdash.

⁴⁰ Adnubien Uedipe Nuquin Papan Mayanēn nidaid utsi Asoto caid yacno buampanēdash. Ambo capucuenequin shubu dadpen icquid yacno-yacnomboen Esus chuibēc onquec choequi shubu dadpen icquid Sesadeya caid yacnoetsen choapanēdash.

9

Saudon tantiate paucaid

¹ Adnubien Edusaden yacnoēsh Esus tantiaquid utsi-utsiec nidanenubien Saudo Edusaden yacno tabadpanēdash. Ambo tabadec chushquec Esus

tantiaquidtedi cuesunemetiadquio yec isadaidbo chuiquid dapabo yacno Saudo choash

² shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bēmete bunebi. Damasco caid yacnoshontsen adote bunebi. ¿Ada mimbi adota quequin dada uashun ēbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquido chuipanēdash Saudon.

³ Aden chiac dada uaid bedash Edusaden yacnoēsh puduanec nidec Damasco anoentsēqui yanshobi abucuēsh bed-bedquequin Saudo dēcatepanēdash.

⁴ Aden dēcatiac Saudo paēdash uestho isun nadec abucuēsh onquec: –Saudo, ¿atotsieshun ēbi tantiaquido mimbi mēyampeba? Ēbitsen mēyantiadpambocquin mimbi aido mēyanec –quepanēdash.

⁵ Adoaquien: –Icbo, ¿Tsutsi mibi ne?

⁶ Adoaquien: –Mimbi mēyanaid Esus nebi. Ēmbi chiaid chieshēnec mibi tabadeque. Nidtoash Damasco yacno nidtan. Anoshon ēmbi nata cacpadomboen anocquid mibi chuimembique. Nidtan.

⁷ Adec abucuēsh onquenubi Saudobēd cho-choquido nidtuidshun tantiequi onquequid isenquio yec tabadtuidpanēdash.

⁸ Onquec ēnēdan nidtoash Saudo istiadquio iquequi bēshupanēdash. Adsho isun mēdinanquin Damasco yacno buampanēdash.

⁹ Adequi Damasco yacno choash 3tedec ushec isenquio yec buna mēmunquiec Saudo tsadpanēdash.

¹⁰ Adashic, Saudo puduedash tabadacno ēdibictsēc tabadquid Esus tantiaquid Ananias cuēmēdquid icpanēdash. Aid usho Esusēn: –Chuinu. Tanta –caquien:

–¿Atoda? Nēbi uebi, Icbo –quepanēdash Ananias.

¹¹ Adoaquien: –Nidtoash podqued cuembocquid caid yacno nidtan. Ambo choash Udasēn shubun puduedshun shubu dadpen icquid Tadso caid yacnoshon tishaid Saudo cuēmēdquid Nuquin Papa chiec onquec tsadsho mimbi istuidendac.

¹² Adec aid ushac bimboec tsadsho mibi choshon aidi padpiden ismenuen mimbi mēdanten mamishac isoshe. Aidi istan –capanēdash Esusēn.

¹³ Adoaquien: –Con matses dadpeshun Saudon naid icsa chuibansho tantiombi, Icbo. Aidēmbi Edusaden yacnoshon mibi tantiaquido mēyamepac caoshe.

¹⁴ Aidbidi Edusaden yacnocquido chuiquid dapanquio dada uaid sananquin nēmbotsen mibi tantiaquido bedmeshun tanemenuc aidi chopac caosh –quepanēdash Ananias Esus chiec.

¹⁵ Adoaquien: –Aidi ēbi chuibeneta caidquio icmeshun ēmbi bēdamboen isaid neque. Aid dacuēdēnenquio yec nidshun istanta. Aidēn isadaidbo abi chuiquidobēdta isadaidpembo abi chuiquidobēdtabidi ēbi chuiben-chuibeneccapauendac.

¹⁶ Ēbi chuibenesho mibi mēyantequid iquendac, quequin Saudo tantiamembi –quepanēdash Esus.

¹⁷ Adsho tantianec Ananias nidash Udasēn shubun puduedshun Saudo mamishec: –Con utsi, mibi podquedēn chosho chuiquidēn Nuquin Ibonquio, Esusēn mibi padpiden ismenuen Nuquin Papan Mayan mibi menenuembidi chomiaid nebi –quepanēdash Ananias Saudo chiec.

¹⁸ Aden Ananiasēn chuinubi nuēcquid bitsibimbocquid ēshēnuēsh paēdnubi bēshuacboedēmbi, Saudon, bēdamboen ispanēdash. Aden isec capusho isun acten mentopanēdash.

19 Adecbidi Saudo penquio yec padishachoedi piash padpidec uidëncuenoapanëdash.

Damasco yacnoshon Saudon Esus chiaid

20 Adec uidëncuenash Saudo Esus tantiaquidobëd tabadpanëdash. Ambo tabadec Nuquin Papan chiaid chuibante shubu yacno nidshun: — Esuquidistu Nuquin Papan madombo nec — quequin chuipanëdash Saudon.

21 Aden chuisho tantiaquid tantiadempambo yec tabadec: —¿Edusaden yacnoshon Esus tantiaquido mëyameboedida nec? ¿Adecbidi nëmbo choshon tanemeshun isadaidbo Edusaden yacnocquido chuiquid dapabo yacno buamenuec choabida ictic? —quepanëdash Damasco yacnocquido.

22 Aden anocquidon tantianubi Nuquin Papan Mayanën oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuidedchuidedpanëdash.

Isadaidbo Esus tantiesa abi cuesunete bunsho isash Saudo cuenaid

23 Adembidi yec ushquin Saudon ënenquiocquin chuibansho tantiaquid, Icsamboen chiec, quiash isadaidbo utsibo yec abi cuesunete bunsho isun tantiaquidën chuisho Saudon tantiaapanëdash.

24 Adnubien Saudo cuesunenuen shubu dadpen icquid abichobi tsicatequin daquënë uaidën shëcuë cuëmanoshon abi chieshëñquidon caimpanëdash Saudo püduensho bednu quequin.

25 Aden cainsho isun Saudo cuesunenushë queshun chiac inchëshëmbi onquenquiocquin tsitsan dapan Saudo antsaduntanquin tsicatiaid quënë cachoc Saudo budmepanëdash.

26 Budanec Saudo Edusaden yacno nidoash Esus tantiaquidobëd tabadnuesho isash, Saudon mua uaquin ëbi bednushe quiash dacuëdcuededpanëdash aido.

27 Adnubien, Saudobëd Esus tantiaquid utsitedi yacno choshon Bednaben yuedpanëdash. Aden yuedshun: —Saudon Damasco yacno nidquin Nuquin Icbo ispac caosh. Nuquin Icbo Saudobëd onquepac caosh. Adanec Damasco yacno choshon dacuëdenquiocquin Esus chuibampac caosh, quequin Saudon naid Bednaben chuibampanëdash.

28 Aden Bednaben chuibanac Esus tantiaquido Saudo dacuëdenquiocnobi aidobëdi capuquin Saudon anoshombidi Esus chuibanoapanëdash.

29 Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiaquid aid cuesunenuequin aidontsen cainoapanëdash.

30 Aden Saudo cuesunenuen, cainec quesho tantiaquid Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsëqui nidmepanëdash.

31 Adashic Saudo nidmian cuesunenushë quenquio yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuëdenquio yec tabadpanëdash. Adec tabadquin, Nuquin Papan chiaid tantiabenu, quesho Nuquin Papan Mayanën adomboembidi tantiamiac bëdamboec tabadpanëdash. Adec tabadquin Esus chuisho tantiesa icboedi Esus tantiaquid dadpenquio yampanëdash.

Petodon Ananias Dodcastsen bëdamiaid

32 Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanëdash.

³³ Ambo choshon dada, Eneyas cuëmédquid, seta dadpen 8ted matamec canite tsasiaid Petedon istuidshun:

³⁴ –Eusën mibi bédamiaeque. Nidtoшон min uete buanun nacenta, Eneyas –Petedon cac Eneyas badedquo nidtoash capupanédash.

³⁵ Eneyas capusho isash Dida yacnocquidobédi nidaid Sadon caid yacnocquido Esus tantiaquid yampanédash.

³⁶ Adnubien Dida uditsec shubu dadpen icquid Ope caid yacnocquid, Esus tantiaquid utsi, chido, Tabita cuënshumbi quidiecon onqueten Dodcas cain cuënaid tabadpanédash. Aidi bédambocquid icquin badiadquidënbadiadquidënquien pete nibédquido menedenepanédash. Adembidi aton na nibédquido Dodcasën menedenepanédash.

³⁷ Aidi Petedo Dida yacno icnubi icsabudec unëso isun abéd icquidon dapanshun shubu abuc quënë icquidën nampanédash.

³⁸ Aden nanshun, Petedo Dida yacno tabadec, quesheo tantiasun aid chomenuequin dada daéd Petedo tabadacno nidmiac aid daédi Petedo tabadacno choshon Dodcas unësboed chuishun: –Nidtuidenquoio yec badedquo ebédi cho –cac

³⁹ abédi badedquoio Ope yacno Petedo nidpanédash. Adec nidec Ope yacno chosho isun abuc quënë icquidën puduedmepanédash. Ambo puduedsho isun shubiquimbi niantebon Dodcasën tuscaboed dashcute dadpen Petedo ismepanédash.

⁴⁰ Adosho isun abitedi puduemiashe danëshën sebudash Nuquin Papa chiecon onquetanec nidtoшон unësboed isquin: –Nidto, Dodcas –Petedon cac uincuenequi Petedo isec Dodcas badedi uëtsëdtopanédash.

⁴¹ Uëtsëdtoшо isun mëdinquin nidtomeshun niantebobëdta Esus tantiaquid utsibo cuënquin cho-chomeshun uincuenboed ismepanédash.

⁴² Aden Dodcas ismeshe isash aton shubuno nidanequin Dodcas uincuenaid chiecon Ope yacnocquido dadpen Esus tantiaquid yampanédash.

⁴³ Adnubien Petedo Ope yacnocquid nidaidën capuquid bitsi uashun chodcashun nacnenquid Simombéd yuec Petedo tabadpanédash.

10

Petedo Codnedion chomiaid

¹ Adnubien shubu dadpen icquid Sesadeya caid yacno Codnedio cuëmédquid isadaidpembo nidaid Itadia caid yacnoësh Sesadeya caid yacno choash tabadpanédash. Aidi sondado dadpen 100tedi chuiquid icpanédash.

² Aidi aton shubun icquidobédi Nuquin Papa tantiaquid icquin isadaidbo aton na nibédquid icsho isun menebanquid icpanédash. Adëcbidi Nuquin Papa chiecon onquianedenepanédash.

³ Adquid yec ushë budtsambi tedes yanuc Nuquin Papa chiecon onquequimbi ushacimboecquin Nuquin Papan uaid mayan bëda Codnedion ispanédash. Nuquin Papan uaid mayan bëda choshon: –Codnedio –capanédash.

⁴ Adsho tantiashe dacuëdquin comapenen isec: –¿Atotsibi name, Icho? –quepanédash Codnedio.

Adoquien: –Abi chiecon mibi onquedenesho Nuquin Papan tantiecon. Adembidi aton na nibédquid tantiaquin menedenequid mibi icsho Nuquin Papan bédamboen isaid mibi neque. Chuinu. Tantiata.

⁵ Nëbi Simon cuënshumbic Petedo cuënoaid ma bednu mimbi namiaido Ope yacno nidmetan.

⁶ Simon utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec –quepanëdash Nuquin Papan uaid mayan bëda Codnedio chiec.

⁷ Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun

⁸ Nuquin Papan uaid mayan bëdan chuibocpaden Petedo bedmenuen ambi nãmiaido Codnedion nidmepanëdash.

Petodon ushacimboec tsadquin isaid

⁹ Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onquenuec shubu macano pada-padapambocquid yacno dectatopanëdash.

¹⁰ Adec dectatoash shubu icbon codocanubi Petedo bundoec ushacimboec tsadquimbic

¹¹ abu posonianec abi yacmi dabidiete dapabiecquid bucun dënëshbudcuenaid budsho Petedon ispanëdash.

¹² Aidënquio ambi petequid ambi petemaid chedo nidaidën capuquid tacbidën capuquidbëd podochoquid chedo antabëdpanëdash.

¹³ Adnubien: –Nidtoson cuesuneshun pe, Petedo –capanëdash abucuësh onquein.

¹⁴ Adoquien: –¿Abida cai? Ëmbi petemaid tauishun mibi shëdmetemaidquio antabëdquid nec. Adquid piamboccombi, Icbo –quepanëdash Petedo.

¹⁵ Adoquien padpidec abucuësh onquec: –Nuquin Papan bëdambo icmi-aid icsambo iquec cainda –quepanëdash.

¹⁶ Adotanquimbic antabëdquid abuc buanshun adomboembidi abentsëc chotsëcnuc budmequin adembidi Petedo chuishun abuc shëcuë uaid yacno badedquio buanshun puduedmeoapanëdash.

¹⁷ Adosho isash Petedo ambi isboed tantiec tsadnubi Codnedion chomiao Simonën shubu istuidash shëcuë cuëmano choec nidtuidpanëdash.

¹⁸ Choec nidtuidash: –¿Nëmboda Simon Petedo tabadec? –quetuidpanëdash.

¹⁹ Aden chuituidnubi ambi isboed tantiec Petedo tsadsho Nuquin Papan Mayanën: –Dada abentsëc chotsec choshon mibi nibë nec.

²⁰ Ëmbi chomiaido neque. Budash cacuidenquio yec aidobëdi nidtan –capanëdash.

²¹ Aden chiac budshun Codnedion chomiaido isash: –Mimbi nibënaid nebi. ¿Atotsi quec cho? –quepanëdash Petedo.

²² Adoquien: –Codnedio cuëmëdquidën chomiaid nebi. Aidi sondado dadpen chuiquid bëdambocquidquio nec. Adquid icquin Nuquin Papan chiacpaden nabansho isun isaidibon bëdamboen isaidquio nec. Aidi Nuquin Papan chomiaid mayan bëdan naden chuipac caosh. “Simon cuëshumbic Petedo cuënoaid bedmetan. Bëac chuibansho tantiatia,” quequin Nuquin Papan uaid mayan bëdan ëbi chuiposh quequin Codnedion ëbitedi chuioaposh –quepanëdash Codnedion chomiaido Petedo chiec.

²³ Adoquien: –Pudued –quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnocquid utsin-utsinquien tsibanampanëdash.

²⁴ Adec nidanec Sesadeya caid yacno chopanëdash. Adnubien, Nëid ushëmbien chotech, quequin tantiashun Codnedion aton shubun icquido abi isedquid chedo Petedon chuibansho tantiamenuen aton shubu nuntan iccuededmepanëdash.

²⁵ Aden iccuededmiac tabadnubi utsibobëd choec Petedo chedo puduedsho isash, Mibi bëdambocquid icnubi adesa nebi, quequin Petedo ismec danëshën sebudec shuebudash Petedo bëisenquio yec Codnedio uepanëdash.

²⁶ Adec uesho isash Petedo: —Mibipadquid nebique. Nidtotā — quepanëdash Codnedio caic.

²⁷ Adtanec Codnediobëd onquetanec quënë utsin puduedshun isadaidpembo dadpen Petedon istuidpanëdash.

²⁸ Aden aido isec: —Isadaidbo nebi. Adquid yec isadaidpembobëd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ëmbi bëdamboen isaid icsambo iquec cainda, quequin ismequin ëbi tantiamiac

²⁹ mimbi ëbi bedmiaido choacsho isash, Mibëd capuesa nebi, quenquio yec chobi. Adecbidi nëmbo choash isadaidpembon shubu nec. Nëmbo puduedtiapimbo iquebi, quenquio yec puduedobi. Nëbi Tantianu. Chui. ¿Atotsieshun ëbi chomio? —quepanëdash Petedo Codnedio chiec.

³⁰ Adoaquien Codnedio: —Abentsëc choec ushanec ushë budec tedes yanubi Nuquin Papa tantiec buna mëmunec con shubu nuntanuësh Nuquin Papa chiec onquec tsadobi. Adnubien dashcute shocosh bedbedquiachimboec dasiuidquid ëbi yacmi Nuquin Papan budmiac onquec:

³¹ “Codnedio, mibi Nuquin Papa chiec onquesho Nuquin Papan tantiec. Adembidi aton na nibëdquido mimbi menebansho aidëmbi bëpiscudenquio icquin tantiec.

³² Nuquin Papa bëdamboen tantianuen Simon cashumbic Petedo caid Ope yacnocquidbëd tabadquid ma chono qeshun mimbi namiaido nidmeta. Aidi Simon cuëmëdquid utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec,” quec Nuquin Papan uaid mayan bëda onqueposh.

³³ Aden chiac: “Petedo bedtan,” quequin ëmbi namiaido nidmiombi. Adoac bëdambocquid yec cacuidanenuio yec badedquio mibi choc. Adec mibi choacsho isash bëdambo iquebi. Nuquin Papan nuqui isnubi ambi mibi tantiamiacpaden chuibanansho tantiec tabadnuna —quepanëdash Codnedio Petedo chiec.

Codnedion shubu nuntanshun Petedon chuibanaid

³⁴ Aden Codnedion chuiban cac Petedon naden chuipanëdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nëbi abimbo tantiemi.

³⁵ Nuquin Papan chiaid tantiashun matses utsin-utsinquien chieshënenquiocquin bëdamboen nabansho isun, Aidedi Nuquin Papan abi yacno yuedendac, quequin tantiemi.

³⁶ Èdenquimboshë Nuquin Papan dada uamequin con tsusedpabo isadaidbon tishmiaido caidaido naden chuiampic: Esuquidistu abentsëqui matses-tedi chuiquid icnubi utsibëd bëdamboec tabadendac.

³⁷ Nidaid Cadidia yacnoshon Uan padon chuibanquin acten mentoaquien Esuquidistun ambi naid tauapondash. Mibitedishun aid tantiondac.

³⁸ Ma abëd tabadneshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bëdamboen nabanquin abi chieshënuquidën Satanas caidën mëyanaido Esuquidistun bëdamebampondash. Adosho mibitedishun isbampondac.

³⁹ Isadaidbon nidaid, Udeya caid yacnoshon shubu dadpen icquid Edu-saden yacnoshombidi Esuquidistun nabansho ispondambi. Aidi cuesten dectanquin isadaidbon unës uaqui

40 uincuenash, Uincuenobi, quequin Esuquidistun ismebempodashi.

41 Aidi uincuenshun matsesedi ismenquiocquin aidbëdtan peshun acquidotedictsëqui Esuquidistun ismepondashi.

42 Abëdi icshobi, Èbi chuibanquin matses icsaid cuidte chuibante ushë choec quequin chui, cac nebi.

43 Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ënsho isash abi icsaid Nuquin Papa bëpiscudendac. Esuquidistu chuiquin aden dada uapampic —quepanëdash Petedo Codnedion shubun iccuededquido tantiamequin chiec.

Isadaidpembo Nuquin Papan aton Mayan meniaid

44 Aden Petedon chuibanshobi abitedi tantiaquid icsho isun Nuquin Papan ma abëd tabadnueshun aton Mayan menepanëdash.

45-46 Aden meniac isadaidpembo nëbi Esuquidistu tantiaquido yanshun abi onquiacmaidënquio utsin onqueten onquequin Nuquin Papa chiec cuëdëmpanëdash. Adsho tantias Petedobëd cho-choboedo isadaidbo aton tsusedpabon nacpaden shui dëbid dëtemequido: —¡Padtec! Tantiadempamboctequid nec. Isadaidpembotsen Nuquin Papan aton Mayan meniac —quepanëdash isadaidbo Petedobëd cho-choboedo.

47 Adoaquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic?

48 Aid, acten mentometa —capanëdash Petedon.

Aden acten mentoaqui: —Nuquibi tabadnuna —cac Petedobëd cho-choboedo acten mentoaidobëd daëdpactsëc ushec tabadpanëdash.

11

Isadaidbo Petedon ambi naid chiaid

1 Adnubien utsibo Sesadeya caid yacnoësh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bëdamboen tantias Esuquidistu tantiaquido yansh, quequin chuipanëdash. Anoshon chuibëtsenec Edusaden yacnotsen choshon adomboembidi chuiopanëdash.

2 Aden chuisho anocquidon Esuquidistu tantiaquid utsibon tantias tsusedpabon chiacpadomboen shui dëbid dëtemequido yec Petedo nëmbo choacsho isun, Aidi ambi nabanaid chuimenu, quequin caimpanëdash. Aden cainubic Petedo choacsho isash

3 comapenec onquecuedec: —Isadaidpembo shui dëbid dëtemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tantanu —quepanëdash Edusaden yacno tabadquido.

4 Adoaquien Petedon nadopanëdash: —Aidobëd ëbi tabadboed chuibanu. Tantiata.

5 Ope yacnoësh Nuquin Papa chiec onquequin ushachimboen naden ispombi. Abuc posonianec ëbi yacmi dabidiete dapabiecquid dënëshbudcuenaid budposh.

6 Aidënquio nidaidën capuquid tacbidën capuquidbëd podochoquid chedo antabëdsho ispombi. Aidën antabëdquid nuqui petequidbëd nuqui petemaid icpsh.

7 Adquid icsho isnubi: 'Nidtohsen cuesuneshun pe,' caposhi.

8 Adsho tantiashun: ‘Aidtedi ëmbi petemaid tauiquin mibi shëdmetemaidquio nec. Adquid pesambo nebi, Icbo,’ capombi.

9 Adoaquien abucueš padpidec onquequin: ‘Nuquin Papan bëdambo icmiaid icsambo iquec cainda,’ caposhi.

10 Adomboembidi abentsëc chotsëcnuc tabëcaido abuc buanshun padpiden budmeshun adembidi chuishun buanshun abitedi abuc puduedmeoaposh.

11 Abuc buanoabombic dada abentsëc chotsec Sesadeya caid yacnoëš choquido shubu shëcuë cuëmano nidtuidash nidpac caosh.

12 Aidtedi icnubi Nuquin Papan Mayan: ‘Aidobëdi cacuidenquio yec nid-tan,’ qesho tantiash aidobëdi nidpobi. Aidobëd Ope yacnocquido dada 6ted Esuquidistu tantiaquido puduanec nidec Codnedion shubun ëbëdi pudued-posh.

13 Puduedacsho isash Codnedio: ‘Nuquin Papan chomiaidën ambi uaid mayan bëdan naden chuiposhi: Simon cuëshumbic Petedo caid Ope yacno tabadeque. Aid bedmenuen mimbi namiaido nidmeta.

14 Aidëmbi mibëd icquidtedi Nuquin Papa yacno puduedmianquid chuiba-nedac, quequin Nuquin Papan uaid mayan bëdan chuiposhi,’ quequin Codnedion chuioposhi.

15 “Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh.

16 Aden meniacsho isun Nuquin Icbo Esuquidistun chiondaid ëmbembi tantiatsëcquieq tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipon-dash Nuquin Icbo Esuquidistun.

17 ¿Aden isadaidpembotsen Esuquidistu tantiaquid yansho Nuquin Pa-pan aton Mayan aidotsen menesho, Padi. Menenda, caindambi icti? — quepanëdash Petedo shui dëbid dëtemequid utsibo chieq.

18 Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaid ënsho isun Nuquin Papan aidotsen abëd icquid icmeoapac —quepanëdash Nuquin Pa-pan naid chieq.

Antioquiya yacnoshomba Esus tantiaquido iccuedaid

19 Esteban cuënoten seshuniash: “Esuquidistu tantiaquido cuesunenu,” qesho tantiash ëbitsen cuesunenushë quianec Edusaden caid yacnoëš Esuquidistu tantiaquid utsi-utsiec nidanepanëdash. Nidegui nidaid Penisia caid yacno choash utsi-utiec tabadnubi utsi-utsiec acte nënantanquio nidaid nactëdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibampanëdash.

20 Adshumbic, utsibo Chipide caid yacnoëš Antioquiya yacno cho-choquidobëdtan nidaid Sidene yacnoëš Antioquiya yacno cho-choquidon isadaidpembo Esuquidistu tantiamenuen chuibampanëdash.

21 Aden chuibanu, qesho Nuquin Papan bëdamboen tantiamiac aidon chuibanaid tantiashun isadaidpembon: Èbi icsaid ënu, quequin ënash Esuquidistu tantiaquid dadpen yampanëdash.

22 Adec isadaidpembo Esuquidistu tantiaquid dadpen yanosh, qesho tantiashun Esuquidistu tantiaquid utsibon Edusaden yacnocquidon Antio-quiya yacno Bednabe nidmepanëdash.

23 Aidi Edusaden yacnoëš puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iquec. Adembi tantiaquin chieshenquiocquin Esuquidistu tantiata —quepanëdash Bednabe.

²⁴ Bednabe bēdamboequid icsho Nuquin Papan aton Mayan meniac Esuquidistu bēdamboen tantiaquidquio icquin Esuquidistu chuibanac Esuquidistu tantiaquid utsi-utsiēc dadpen yampanēdash.

²⁵ Adashic Antioquiya yacnoēsh puduanec Saudo bednuec nidequi shubu dadpen icquid Tadsō caid yacno choshon

²⁶ Saudo istuidash Antioquiya yacno aibbēdi Bednabe choapanēdash. Ambo choash seta abentsēc matamec anocquid Esuquidistu tantiaquidobēd iccuededquin Esuquidistu chuibanquin aid daēdshun tantiamēpanēdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuēmpañēdash.

²⁷ Bednabebēd Saudo Antioquiya yacno tabadnubien Edusaden yacnoēsh Antioquiya yacno Nuquin Papan yuecquio icshun nanun chiaid chuiquido cho-chopanēdash.

²⁸ Cho-choshon abentsēqui Accabo cuēmēdquid Nuquin Papan Mayanēn oncamiac: —Yuec-yuecpectsēc yash nidaidtedi yacnocquidon pete nibēdendac —quepanēdash. Aden chiambic shubu dadpenquioshē icquid Doma yacnocquido ancaquid Quēdaudio cuēmēdquid icnubi pete nibēdquieic yampanēdash.

²⁹ Adnubic, Udeya yacnocquidon pete nibēdec, qesho tantiaashun Esuquidistu tantiaquidon Antioquiya yacnocquidon aton piucquid adquid menenuen ambi dayun uaidtedi Edusaden yacno buamepanēdash.

³⁰ Esuquidistu tantiaquido Edusaden yacnocquido chuiquido nēid piucquid menetanta ma pete bunquido menenueshun, quequin ambi dayun uaidtedi Bednabebēdta Saudo menequin Edusaden yacno buamepanēdash Antioquiya yacno tabadquin Esus tantiaquidon.

12

Acobo cuesuniaidbēdta Petedo quēnēn nauedaid Nuquin Papan puduemiaid

¹ Adnubien Edusaden caid yacno tabadquid domanobo ancaquid Edodes cuēmēdquidēmbi Esuquidistu tantiec iccuededquido utsi-utsien comapenen mēyanuequin bedmeshun quēnēn nauedmēpanēdash.

² Aido quēnēn nauedmeshun Esuquidistun ēbi chuibeneta caid abēd capucuenēboed Acobo cuēmēdquid chēshten cuesunemēpanēdash. Acobon utsimbo Esuquidistun ēbi chuibeneta caid abēd capucuenēboed utsi Uan nepañēdash.

³ Adoac, Acobo cuesuniosh, qesho tantiaash isadaidbo utsibo, Esuquidistu tantiesabo: —Bēdamboen Edodesēn naosh —quepanēdash aido. Adec onqesho tantiaash Edodes: Isadaidbon pan bidisquesa tantiaid ushē choec, quequin Esuquidistun ēbi chuibeneta caid utsi, Petedo cuēmēdquid, bedmeshun quēnēn nauedmēpanēdash.

⁴ Aden quēnēn nauedmeshun Petedo cuenushe qeshun sondado 4ted quēnē nuntan tabadmēshun pan nami uambocquid petequid tantiaid ushētedi naimēdambi ambi naid icsa Petedo chuimēnuequin Edodesēn caimpanēdash. Adnubien quēnē nuntanshun Petedobēdta mētaniaid sondado daēd uenubi utsi daēdshun shēcuē ēctabēdquin Petedo isec tabadpanēdash. Aid isquidotedi badiadnuc puduedshun isanec ushē abuctotsan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtsēcnubi badiadnuc isboedo choapanēdash. Adecbidi isboed utsibo inchēshēmbi padpiden isec choapanēdash.

⁵ Adnubien Esuquidistu tantiaquido iccuededdash Nuquin Papa Petedo quēnēn nauedaid chiec yuec onquepanēdash.

⁶ Adshumbic, Badiadshun Petedo bēmembali, quequin Edodesën tantianubi aid inchëshēmbi Petedo bucun mētaniacchobi ushnubi

⁷ Nuquin Icbon chomiaid, ambi uaid mayan bēda, nibēdquiochoedi Petedon dayun choan quēnē nuntan comapenec chēnquepanēdash. Aidēn Petedon dayun choshon shictodo macuesquin: —Baded nidto —cac nidtonobi seccudquec shocosh bucu mētaniaid mēchiquidpanēdash.

⁸ Adtanquimbien Nuquin Papan uaid mayan bēdan: —Chinëshēdtanec tapucudta —cac Petedo chinëshēdtanec tapucudpanēdash.

Adsho isash: —Min dashcute bēntsecquid dasiuidshun ēbi tsiban —quianec nidsho

⁹ Nuquin Papan uaid mayan bēda nidsho isac bimboecquin abimbo tantienquiocquin Petedon tsibanampanēdash.

¹⁰ Adec nidquimbi sondado abēda mētaniaidēn tantienquo icnubi datanshun shēcūē isquid daēdshumbidi tantienquo icnubi aidotsen datanoashumbic umanuc puduenenubi shocosh shēcūē abembi shēcniadpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampanēdash.

¹¹ Abēd icboed nibēdnubien Petedo padpiden tantiaquiec: —Edodesbēd isadaidbo, Esuquidistu tantiesabo, ēbi cuesunete bunsho isun Nuquin Papan ēbi puduemenuen ambi uaid mayan bēda chomiosh. Abimbo iccosh —quianec Petedo nidpanēdash.

¹² Adec nidequi Nuquin Papan abi puduemeboed tantiequi Uan cashumbic Madcos caidēn titan shubu yacno Petedo chopanēdash. Aidēn tita Madia cuēmēdquid icpanēdash. Ambobi Esuquidistu tantiaquid dadpen iccuedec Nuquin Papa chiec onquepanēdash.

¹³ Adnubien choshon Petedon shēcūē tosh-toshcasha tantiash chido yua Doda cuēmēdquid isnuec nidtopanēdash.

¹⁴ Aid shubu shēcūē yacno choshon Petedon cuēnsho tantiash bēdamboshē iquequi shēcnenquo yec auchidi titinquec: —Petedo shēcūē yacno choash nidec —quequin iccuedequido chuituidpanēdash.

¹⁵ Adsho Nuquin Papa chiec iccuedequidon abimbo tantienquiocquin: —Muequi mibi nec. Aidida isplash neba —quepanēdash iccuedequido.

Adoaquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bēda ischitashien nec —quepanēdash tantiesā.

¹⁶ Adnubi padpiden Petedon tosh-toshcasha shēcnequin isash: —iTsol! Abimbo caic —quecuededpanēdash.

¹⁷ Adnubien mēdante uic-uiccaic Petedo: —Onquenquo yec tabadquin tantiatā. Ēbi nashunquin Nuquin Icbon naboed chuibanu —quepanēdash Petedo abi quēnē nauedacnoshon Nuquin Papan puduemaiid chuibanec. Aden chiash: —Ēbi puduemaiid Esuquidistun utsi, Acobobēda Esus tantiaquid utsibo chuitanta —quianec puduenanec utsi yacno Petedo nidpanēdash.

¹⁸ Adashic, badiadnubi quēnē nuntan Petedobēd icboed sondadotedi: —¿Mitsimbo nuquibēda mētaneboed icpec? Nibēdeque. Is —quec dacuēdpanēdash.

Adashic, Petedo nibēdec, quequin sondadon chiac

¹⁹ Edodesën: —Nibēntan —cac nidshun sondadon istuidenquiocsho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesën cuesunemepanēdash.

Adashic, Edodes nidaid Udeya caid yacno abi tabadacnoësh puduanec shubu dadpen icquid Sesadeya caid yacno choash tabadpanêdash.

²⁰ Sesadeya caid yacno anoentsêcbidi shubu dadpen icquid Tido caid icnubi aid yacnoësh anoentsêqui shubu dadpen icquid utsi Sidon caid icpanêdash. Tido caid yacnocquidbêd Sidon caid yacnocquido Edodesbêd chushcananquido icboedi padenquio yanec tabadpanêdash. Adec chushcananenquio yec tabadquin, Sesadeya yacno Edodes choash tabadosh, qesho tantiash Edodesên yua Bêdasto cuêmêdquidbêd onquenuec chochopanêdash. Cho-choshon, Êmbi pete nibêdsho isun Edodesên menioshi. Nêbi aid chushcainquio iquembi, quiosh, quequin cho-choquidon chuituidpanêdash. Aden chiac adomboembidi Bêdaston Edodes chuioapanêdash.

²¹ Aden adomboembidi Bêdaston chuioasho tantiashun Edodesên: –Êmbi chiapadên cho-choata, quiosh Edodes, quequin chuita –cac cho-choquido Bêdaston chuioapanêdash. Aden chiac Edodes onqesho tantianuec ambi chiacatedec ushash dashcute nac-nacquiocquid dasiuidash abembi onquenuec tsadten abuc tsadtoash onquec taêpanêdash.

²² Aid onqesho tantiash: –Nidaidênshun tishaid onquiaidpenquio nec. Abuc tabadquid nuquin papa caidien Edodes nechitec –quec iccuededquido comapenec cuêcuedepanêdash.

²³ Aden chuisho tantiash, Mimbi Nuquin Papa caidpenquio nebique. Aidi abia yampid abentsêcquiobi iqueque. Aiduidi fantiata, quequin chuitiadquidêmbi chienquio icsho tantiashun Nuquin Papan chomiaidên ambi uaid mayan bêdan daicsa uac chichan dadpen yanec Edodes badedi unêspanêdash.

²⁴ Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanêdash.

²⁵ Adnubic Antioquiya yacnocquidon Esuquidistu tantiaquidon aton picquid ambi menunen dayun uaid Bednabebêdta Saudo meniac buanec Edusaden yacno choshon anocquido Esuquidistu tantiaquido menetanashic auêshquio puduanec Antioquiya yacno nidoapanêdash. Aidobêdi Uan cashumbic Madcos caid nidpanêdash.

13

Saudobêdtabi Bednabe nidmiaid

¹ Adashic, Esuquidistu tantiaquid utsi-utsiec Nuquin Papan yuecquio icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanêdash. Nêdic, Bednabe; utsibic, Simon, Dada Chêshê caid; utsibic, Sidene yacnoësh choquid, Dusio cuêmêdquid; utsibic, Cadidia yacnoësh choquid, tsusio dapa, Edodesên shubun icquid icboedi, Manain cuêmêdquid; utsibic, Saudo cuêmêdquid.

² Aidedishun Esuquidistuidi tantianuen buna mêmunsho Nuquin Papan Mayanên: –Saudobêdan Bednaben aid daêdshun êmbi chuibocpaden ma napanuna –capanêdash.

³ Adoaquien, buna mêmunquin nainash Nuquin Papa chiec onqeshun abêd icquid utsibon mêdanten Saudo Bednabebêdta mamishquin nadopanêdash: –Nidaid utsi-utsiec yacno nidshun Nuquin Papan chiapaden Esuquidistu chuibenetan –capanêdash abêd icquidon.

Chipide yacnoshon Esuquidistu chuibanaid

⁴⁻⁵ Esus tantiaquidon mamishquin chiaquien Nuquin Papan Mayanên nidmiac Saudobêd Bednabe Antioquiya yacnoësh puduanec nidpanêdash. Aid daêd nidsho isash Uan cashumbic Madcos cain cuênaid nidpanêdash dada uate buanshunec. Aidedi nidanec acte cuêman shubu dadpen icquid

Sedusia caid yacno choash cano antabēdtoanec acte nēnantanquio nidaid nacnēdquid Chipide caid yacno nidtampanēdash. Chipide yacno choash nidequi shubu dadpen icquid Sadamina caid yacno choapanēdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebēdtan chuibampanēdash.

⁶ Adoshombic, Sadamina yacnoēsh nidquin chuibidanec Chipide cuēma utsiuc shubu dadpen icquid Pabos caid yacnotsen choash tabadoapanēdash. Ambo tabadquin isadaidbo Badesus istuidpanēdash Pabadobēd icquidon. Satanasēn tantiamiaid icquin abimbo chiacbimboec, Nuquin Papan yuecquo icshun nanun chiaid chuiquidquo nebi, quequin muaquin chuipanēdash Badesusēn.

⁷ Aidi Pabos yacnoquido tsusion shubun tabadpanēdash. Anocquido tsuio cobednadod caid Sedquio Paudu cuēmēdquid icpanēdash. Aidi tantiaquiono, quec tabadquin, Isedquido chosh, qesho tantias, Aidon chuibanaid tantianu, qeshun Saudobēda Bednabe chomeshun tsusion yuedpanēdash.

⁸ Yuedac Pabodon Esuquidistu chuibampanēdash. Saudu quequin isadaidbon cuēnubi Pabado quequin isadaidpembon cuēmpañēdash. Aden Pabodon Esuquidistu chuibansho tantiec tsusio tsadsho isun Badesusēn tantiamenquiocnuen utsi uain chuiapanēdash. Ambi ompoaid ismianesa Badesus icsho Edimus cuēmpañēdash.

⁹ Aden utsi uain chuisho tantiasun Nuquin Papan Mayanēn tantiamiac Edimus bēisequi Pabado:

¹⁰ —Satanasēn bacuē yec bēdamboen naidbēdta bēdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaqin muaquin mimbi adenuidi chuibaneque. Tantia.

¹¹ Nēbi non Icbon mibi mēyanquin bēshu uaindac. Ushē chēnqesho mimbi yuen isenquio iquendac —quepanēdash Pabado Edimus chiec.

Aden chuibon Edimusēn ēshē cuen-cuempambo yec inchēshbudacimboc yanash: —¿Tsuntsimbini mēdinshun buampeba? —quequin nibēdacno mishquin uēmbampanēdash.

¹² Aden Edimus bēshu uacsho isec: —Nuquin Icbon chiaid abimbo iquec —quiash tsusio Sedquio Paudu cuēmēdquid Esuquidistu tantiaquid yampanēdash.

Nidaid utsi, Pisidia caidēn shubu dadpen icquid Antioquiya caid utsi yacno Bednabe Pabadobēdi choash tabadoaid

¹³ Adashic, Chipide yacnoēsh puduanec nidaid Pampidia caid yacno Pabadobēd icquido canon potepañēdash. Aden potias nidaid Pampidia caid yacno choash Pabadobēd Bednabe pudndonobi Uan cashumbic Madcos caidbidi Edusaden yacno nidoaic cuēshēdpanēdash. Adec Pabadobēd Bednabe pudundoanec nidquin shubu dadpen icquid Pedque caid

¹⁴ isbidanec nidaid Pisidia caid yacno shubu dadpen icquid Antioquiya yacno chopañēdash.

¹⁵ Ambobi tabadequi chonoadtemaid ushēn Nuquin Papan chiaid chuibante shubun puduedash tabadpanēdash. Ambo tabadnubien Nuquin Papan Moises dadā uamiampid isec onquequin chuibanshumbic Nuquin Papan yuecquo icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daēdi tabadacno nidshun, ¿Ēbitedi bēdambo icmenuen chuibanquin tantiametiadquio ada mibi icpe? cata —tsusion cac ambi namiaid nidshun tsusion chiācpaden Pabadobēdta Bednabe chuituidpanēdash.

16 Adoaquien abi tsadacnoëshi nidtoashi Pabado: —Nuquin Papan naid mibi chiembique. Tiantiaquiota.

17 Nidaid Equipito caid yacno nuquin tsusedpabo tabadshobi Nuquin Papan bédamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënguio bëyucanquin tsusedpabon tishmiaidën tishmiaid caidaido Equipito yacnoshon buanubi

18 tsusedpabon Nuquin Papan chiaid chieshëmpampic. Adoaquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic.

19 Aden buanquin nidaid Canan caid yacno buanshun anocquido isadaid-pembo istuidmeshun matses utsibo utsi-utsiectsëcquieq 7tedi icquido naimbudmeshun aidon nidaidtedi nuquin tsusedpabo menebampampic.

20 Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmëdquid tsusedpabo chuiquid icmepampic.

21 Aidi isadaidbo chuiquid icnubic, Matses utsibo ancaquidpadquid bunebi, quequin tantiasahun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmëdquid, isadaidbo ancaquid icmepampic.

22 Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmëdquid tsusedpabo ancaquid icmeoapampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid, Isain mado, ëbi bédamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanëdash Pabado aton matses Antioquiya yacnocquido tantiamenuen chiec.

23 Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanëdash.

24 Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanëdash.

25 Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmiosi, caindambi,’ quepanëdash Uan acten mentoanquid —quepanëdash Pabado.

26 Aden Uan padon chiacpaden chuibanashic: —Abaduanën tishmiaidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanëdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanëdash.

27 Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobëd aton tsusio dapabo, Icsambocquid neque. Unës ua, quequin chuipanëdash. Aden chuiquin utsibëd iccuededte ushënushënuen abi isec onquiaid Nuquin Papan dada uamiampicpadembi aidon napanëdash.

28 Esuquidistu icsaid nibëdquidquio caiqui, Icsambocquid neque. Aid unës uatiadquidi mibi nec, quepanëdash Isadaidbo Pidato caic.

29 Adoaquien Nuquin Papan dada uamiampicpaden nabanambien Esuquidistu cuesten dectanquin unēs uacsho chicshun, Ēbi unēsacsho nēidēn ěbi nauedec, quequin ambi shēcuē uain nacnenaid chucanquio Osen Esus nauedpanēdash.

30 Adoacsho Nuquin Papan Esuquidistu uincuemiac

31 capusho Cadidia yacnoēsh Edusaden yacno abēd capuceneboedon aidi isbepanēdash. Aden isun aidombi Esuquidistu chuibededec. Adembidi aid isboedobēdtambi abimbo chuibanquidquio nebi —quepanēdash Pabado.

32 Aden chiashic: —Abi chiembique. Tantia. Nuquin Papan chometequid ambi chuipampid tsusedpabon isenquiocnobi

33 Nuquin Papan uincuemiacsho nuqui isondaaid aidi nec. Aidi chuiquin Nuquin Papan dada uamiampid nad iqueque. Tantia. Chuinu. ‘Con madombo mibi nec.

Nēbi ěmbi uincuemiacqui ěmbi chiactedi mimbi naimbudoc.

Adoshō isun ěbipadquiocnoc chuiquid dapa mibi icmēmbi.’

Aden ěndenquimboshē aton mado tantiaquin Nuquin Papan chiampic.

34 Adecbidi ambi uincuemetequid Esuquidistun nami chodquesa icpanēdash. Aid chuiquin dada uamiampid nad iqueque. Tantiata. Chuinu. ‘Dabid chiampicpadembi mibi icsaisa icsho ěmbi bēdamboen isaid mibi nec, mado,’

quequin Nuquin Papan dada uamepampic.

35 Ambi dada uamiampid utsi nad iquec:

‘Icsaisa icsho aton nami chodquesa icmenuna,’

quequin Nuquin Papan chiampic.

36 “¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquin nabanash Dabid unēsacsho isun aton mēdimbon nami chodquiacno Dabid chococac aidēn namitsen chodquepampic.

37 Nuquin Papan uincuemetequidēn namien chodquesa icpanēdash.

38 Aidi icsainquiocquid yec ěbitedi icsaid bedshunash abided cuidadpanēdash.

39 Adoac abi tantiaquidquiotsen icsaisabidi Nuquin Papan isec. Nuquin Papan naden nata quequin dada uamiampidtedi matsesēn natiapimbo iquec. Aden ambi chiacpaden natiapimbo yec, Nuquin Papan bēdamboen isaid nebi, quetiapimbo icboedēmbi, Matses icsaquid icsho cuidnushe quiash abided cuidadec Esus unēspanēdash, quequin tantiasho, Esuspadquid icsaisa Nuquin Papan nuqui isec.

40 Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

41 ‘Ěmbi ěndenquimboshē dada uamiampicpadembi adquid chomēmbi.

Ěmbi chomiaid isquidon chiac mimbi tantienquio icpec.

Adquid yec, Tantiadempambo iquec, quec mamēnshumēnquid ěbēdi tabadtiapimbo iquendac.

Adquid icmane queshun tantiaquiota’

—quepanēdash Pabado iccuededquido chiec.

42 Aden chuibudashic Pabado Nuquin Papan chiaid chuibante shubu yacnoēsh abēd choedobēd puduenanec nidsho isash: —¿Iccuededte badiad utsi chonoc iccuededquin chuinuecta mibi choape? —quepanēdash iccuededquid utsibo Pabado chiec.

⁴³ Aden chianec Pabadobëd Bednabe nidsho isun isadaidbo utsin-utsinqueimbëdtan isadaidpembo isadaidbopadquid icnuequid utsin-utsinquein tsibanampanëdash. Aden abi tsibanansho isash: —Nuquin Papan bëdamboen isaid yec bëdamboec tabadta —quepanëdash Pabado Bednabëbëd.

⁴⁴ Adashic, chonoadtëmaid ushë icnuc Nuquin Papan chiaid tantianuec Antioquiya yacnocquid dadpen iccuededoapanëdash.

⁴⁵ Dadpen iccuededsho isash isadaidbo tsusiobo: Ëmbi chuibansho tantianuec aitedi choenquio iccosh, quequin tantiec nëishpanëdash. Adec nëishash: —Mimbi Nuquin Papan chiaid icsamboen chuibanec —quepanëdash Pabado caic.

⁴⁶ Adoquien, dacuëdenquio yec Pabadobëd Bednabe: —Mibitedi con mat-ses icsho, Nuquin Papan dada uamiampid chuibanu, queboedëmbi tantiesa icsho isun mibi chuibanenquio iquëmbi. Mibi tantiesa yec Nuquin Papabëd tabadte bunësabidi icnuc isadaidpembo Esuquidistu chuibanendambi.

⁴⁷ Nuquin Icbon naden tantiamioshibique. Tantia. Chuinu. “Isadaidpembo ëmbi chiaid chuibanquid mibi icmëmbi ma nidaidtedi yacno ëbi tantiaquido ëbi yacno puduedquid ma icpanuna,” quequin chioshi —quepanëdash Pabado abi chieshënquido isadaidbo Nuquin Papan dada uamiampicpaden chiec.

⁴⁸ Adsho tantias isadaidpembo: —¡Padtec! Nuquin Papan chiaid bëdamboshë iquëc —quecuededpanëdash. Adoquien, Nuquin Papan ëbëdi mibi tabadmendambi, quequin chiaid ambi tantiamiactedi Esuquidistu tantiaquid yampanëdash.

⁴⁹ Adec Esuquidistu tantiaquid yanash auëshquio dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanoapanëdash.

⁵⁰ Adosho tantias, Pabado icsambocquid nec, quequin isadaidbo tsusiobon Antioquiya yacnocquid chidobobëdta anocquido chuiquid dapa nëishmeshun Pabadobëdta Bednabe mëyantänquin ashunquio nidmëpanëdash.

⁵¹ Aden nidta cac puduanec nidtuidash, Esuquidistu ëmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanëdash.

⁵² Pabadobëd Bednabe Antioquiya yacnoësh nidan Antioquiya yacnocquid Esuquidistu tantiaquido: —Bëdambo iquebi —quecuededpanëdash. Adëmbidi aitedi aton Mayan Nuquin Papan menëpanëdash.

14

Iconio yacno

¹ Adashic, Pabadobëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanëdash.

² Aido Esuquidistu tantiaquid yanubi isadaidbo utsibo Pabadon chuibanaid tantiatiapimbo icquin Esuquidistu tantiaquido muaquin chuiquin isadaidpembo utsibo nëishmëpanëdash.

³ Aido nëishmiambi Iconio yacno yuec tabadquin Pabadon Bednabëbëdtan dacuëdenquiocquin Esuquidistu chuibampanëdash. Aden chuibansho isun Nuquin Papan ambi nadatiambocquin tantiadempambocquid ismequid Pabadobëdta Bednabe icmëpanëdash.

⁴ Aden icmiac aid daëdshun nadatiambocquin nasho isash, Isadaidbo tsusiobon chuibocpadec Pabadobëd Bednabe icsambocquid nec, utsi-utsiec quenubien, Ambi chiaid abimbo iquëc, utsibo quepanëdash.

5 Aden chuishumbic, Pabadobēdta Bednabe cuestanquin cuēnoten senuequin Esus tantiesabo isadaidpembon aton tsusio dapabobēdtan cainubi adembidi isadaidbon aton tsusio dapabobēdtan cainoapanēdash.

6-7 Aden caimbededosh, quequin tantiaquidēn chiac cuenec nidequi nidaid Dicaonia caid yacno Pabadobēd Bednabe choash shubu dadpen icquid Disteda caid yacno choash tabadquin Pabadobēdtan Bednaben Esuquidistu chuibampanēdash. Adtanec auēshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanēdash. Adtanec auēshquio puduanec nidshun dēuequiec shubu dadpen icquid utsi-utsiec yacnocquidotsen chuibampanēdash.

Disteda yacno

8 Disteda yacno tabadnubien anocquid taicsaidi anin tishaid caputiapimbo icpanēdash.

9 Aidi Pabaton Esuquidistu chuibansho tantiec, Esuquidistun ēbi bēdamepatsiash, quec otacquo tsadpanēdash. Aden caputiapimbocquidēn tantiacpadomboen Nuquin Papan Pabadotsen tantiamiac

10 caputiapimbocquid comapenen bēisquin: —Nidto —Pabaton cac badedi nidtoash taicsaid bēdanash capupanēdash.

11 Aden taicsaid bēdamiac capusho isash anocquid aton onqueten cuēdcuededquin: —Disteda yacnocquidon tantiaid matsesbimboec yanash abucūēsh budoshe. Nēid daēdi isec cho —capanēdash.

12 Adtanequi Bednabe otacquo tsadquid icsho isash ambi tantiaid abentsēc Upited icnuc Upited cain Bednabe cuēnquimbi Pabado chuiquidquio icsho isun ambi tantiaid utsi Medcudio icnuc Medcudio cain Pabado cuēmpañdash Disteda yacnocquidon.

13 Aden cuēnsho tantiaishun baca bēnē daēd bēec: Mibi daēdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacnenaid Upited caid dayun uaquido baca cuesunenu, quepanēdash.

14 Aden baca cuesunenuen bēsho isun abi dasiuidaid aton dashcute bēntsecquid shoyonquin cancheuidashic iccuededquidon nēnantanquo nidash Pabadobēd Bednabe comapenec nadpanēdash:

15 —Ēbi daēdi mibipadquid matsesquio nebi. Mimbi tantiacmaid nebique. Baca cuesunenda. Chiaid bēda mibitedi naden chuinuēc chobi. Nuquin Papa caid abentsēcquioibi iquec. Aidēmbi abubēdta nidaid uashumbic aidēnquidtedi uabanampidquio neque. Aiduidtsēqui tantiaquin ambi uaidbimboecnuc matsesēn nacnenaid tantiesa icta.

16 Ēndenquimbo Nuquin Papan, Adoenda, cainquiocnoc matsesēn ambi tantiacpaden nabampampic.

17 Aden, Adoenda, cainquiocquimbi, Abitedishun icbo icquin bēdambocquid nebi, quequin ismequin ue secamedenequinc, cuēte bacuēmequinc, nuqui penun tiedēn nitsimbeniaid canimequinc caquin Nuquin Papan nac bēdamboen nuquitedi pebededec. Aden nabanquin Nuquin Papan, Bēdambo iquebi. Cuishon, camiaido nuquitedi nec —quepanēdash Pabadobēd Bednabe Disteda yacnocquido chiec.

18 Aden chuido-chuidoquai baca cuesunenu icpanēdash Disteda yacnocquidon.

19 Adnubien Antioquiya caid yacnocquidobēd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid

yacnocquido nêishcuededpanêdash. Adec nêishcuededshun Pabado cuënoten se-siash, Unêsosh, qeshun nimbanquin buanshun shubu nibêdacno Pabado netampanêdash.

²⁰ Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobêd Disteda yacno choec shubun puduedpanêdash. Badiadash puduanec shubu dadpen icquid Dedbe caid yacno Pabadobêd Bednabe nidoapanêdash.

Nidaid Sidia caid shubu dadpen icquid Antioquiya yacno choaid

²¹ Adec Dedbe yacno choash tabadquimbi Pabadobêdtan Bednaben chuibanac Esuquidistu tantiaquid dadpen yampanêdash. Auêshquo puduanec nidoaic padpidec Disteda caid yacno choash tabadquin, Dadpen tantiamequiono, quequin chuibanpanêdash.

²²⁻²⁴ Aden chuibanashumbic: —Natiastianquid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nêbi dayacquo yec tabad —capanêdash Pabadon. Adotanquin ambia Esus tantiaquid utsi-utsien Pabadobêdtan Bednaben: —Bêdamboec tabadquin ismequin Esuquidistu tantiaquid utsibo chuiban —capanêdash. Adotanec, ambi chuiboedobêd Pabado Bednabe chedo Nuquin Papauidi tantiec buna mêmunquin chiec onquepanêdash. Aden Nuquin Papa chuiquin naimbudquin, Nêmbocquid mibi tantiaquido bêdamboen dayun uata, Papa, quequin chianec Pabadobêd Bednabe chedo Disteda yacnoesh nidoapanêdash. Adecbidi Iconio yacno choashun adomboembidi chuibanapanêdash. Adecbidi Antioquiya yacno choashun adomboembidi chuibanapanêdash. Antioquiya yacnoesh puduanec nidec nidaid Pisidia caid datambêtsenec nidaid Pampidia caid yacno choash nidec

²⁵ shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanêdash.

²⁶ Auêshquo cano antabêdtoanec nidec shubu dadpen icquid Antioquiya caid yacno, Nuquin Papan Mayanên nidta, quequin chiondacnombo choapanêdash.

²⁷ Ambo choash tabadquin anocquido Esuquidistu tantiaquid utsibobêd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobêdtan Bednaben chuibanpanêdash. Isadaid-pembo dadpen Esuquidistu tantiaquid yamposh, quequin chuipanêdash.

²⁸ Adtanequi yuec Antioquiya yacno Esuquidistu tantiaquid utsibobêdi Pabado Bednabe chedo tabadpanêdash.

15

Edusaden yacnocquido iccuededec tantianu quiaid

¹ Pabadobêd Bednabe Antioquiya yacno choabicnubien nidaid Udeya caid yacnoesh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dêbid dêtemesa abi yacno Esuquidistun yuedtemaid neniand, quequin chuipanêdash.

² Adnubic Pabadobêd Bednabe Antioquiya yacno choash tabadquin aidon chiaid tantiash: —Nuquin Papan aden chiambo iqueque. Aden chienda —quepanêdash.

Adsho comapenec cuêdquin chushcapanêdash. Adsho tantiashun abi chuiquidon, Edusaden yacno nidshun chushcanamboed chuitanta, quequin Pabadobêdta Bednabe chuishumbic Esuquidistu tantiaquid utsibo chuioquin aido nidmeapanêdash.

³ Adoac Antioquiya yacnoësh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanëdash. Adsho tantias: —Aid tantiec bëdambo iquebi —quepanëdash anocquid Esuquidistu tantiaquido. Adtanec auëshquio nidequi nidaid Samadia caid yacno choash tabadquin adomboembidi chiac adquiecbidi, Bëdambo iquebi, quepanëdash anocquido.

⁴ Auëshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobëdtan Bednaben chuibanoapanëdash.

⁵ Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dëbid dëtemetiadquidi nec. Nuquin Papan naden nata quequin Moises dada uamiampid nabantiadquid neoaic —quepanëdash.

⁶ Adoaquien Esuquidistu ambia tantiaquido tsusiobobëd Esuquidistun ëbi chuibeneta caido: Tantiabono, quias onquecuededpanëdash.

⁷ Adec yuec onquecuededash nidtoash Petedo nadec onquepanëdash: —Chuinu. Tantiata. Ënden Nuquin Papan naden chuipondashi: “Isadaidpembo Esuquidistu tantiaquid icmete bunebique. Aidotsen chuibanta,” quequin chuipondashi. Aden ëmbi chuioasho mibitedishun tantiondac.

⁸ Ëmbi isadaidpembo Esuquidistu chiac abi tantiaquid aido yampondash. Matsesën tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniampademi isadaidpembo meneoapondash.

⁹ Utsibo nec, quenquiocquin aidotsen tantiamequin paucoapondash.

¹⁰ Aden Nuquin Papan nasho isun, ¿Atotsieshun Nuquin Papan naid ic-sambo iquec quiacpaden tsusedpabon natiapimboctequid nuquitsen nati-pimboctequid isadaidpembon nabanta cate nuqui bumpe?

¹¹ Padenquo icnuna. Matsestedi icsaquid icsho cuidnushe quias abided cuidadac, quequin tantiaquiec unësash abëdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanëdash Petedo.

¹² Aden Petedon chuiquin ënambic Pabadotsen Nuquin Papan tantiamiac ambi nadatiambocquin naquin isadaidpembo ismebanaid chuipanëdash. Adembidi Bednaben chuioapanëdash.

¹³ Aid daëdshun chuibanquin nainan Esusën utsi Acobo, Esus tantiaquido tsusio dapa, nadpanëdash: —Ëmbitsen chuinu. Tantiata.

¹⁴ Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibëdta aton matses icniac.

¹⁵ Adomboembidi Nuquin Papan chuimiaidën dada uampid nad iqueque. Tantia. Chuinu:

¹⁶ “Isadaidbobëd yuec tabadenquiochoedi padpidec choash aidobëd icoaind-abi.

Dabid padon tsyuecquido isadenquiochoedi isadcuenendac

¹⁷ ma aton Icho matsestedishun istuidpanuna;

ma adembidi isadaidpembon ëmbi cuënaidon aidbidi istuidpanuna,

¹⁸ quec Nuquin Icho ambi ënden tantiampicpadomboen chiaid nec” —quiashic abi Acobo onquec:

¹⁹ —Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquo ictiad.

²⁰ Nēiduidtsēqui dada uaquin isadaidpembo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chidouidtsēqui chudta; adembidi, min bēnēuidtsēqui chudmeta; adembidi, Nēish tētaniaid intacchobi codocaid penda, quequin isadaidpembo chuibanuna.

²¹ Adec Moisesēn dada uaid iccuededquin isec nuqui onquedenec. Aid ic-nuc, Adomboembidi nata, quequin isadaidpembo chuinuna –quepanēdash Acobo iccuededquido chiec.

²² Adashic Esuquidistu tantiaquido iccuededec onquec ēnēdshun ěmbi dada uaid Antioquiya yacno buanuec Edusaden yacnocquid daēd nidta, quequin Pabadobēda Bednabe nidmepanēdash. Abentsēc Udas cashumbic Badsabas cuēnaid; utsibic, Sidas cuēmēdquid. Aid daēdi Nuquin Papan chiaid comape-nen tantiaquidquo icpanēdash.

²³ Isadaidpembo chuiquin Edusaden yacnoshon Esuquidistu tantiaquidon naden dada uapanēdash:

“Esuquidistun ěbi chuibeneta caidobēdi ambia Esuquidistu tantiaquido Edusaden yacnocquido yec min utsibimboeccquido nebi. Isadaidpembo Esuquidistu tantiaquido Antioquiya yacno tabadquidobēda nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta.

²⁴ Ēbēd icquido nēuēshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi.

²⁵ Aden chuisho tantiashun nēmbocquidobēd iccuededec onquequin abentsēcshun tantiacimboen dada uaombi. Aidi nēmbocquid daēdi Pabado Bednabebēda buantan, quequin chiemi.

²⁶ Unēsmane, quenuquo yec capucuenequin Esuquidistu chuibanquido Pabadobēd Bednabe nec.

²⁷ Adquid aid daēd icsho isun aid chedobēda Udas Sidas chedo mibi yacno nidmēmbi. Adoac ěmbi dada uacpaden ma mibitedi chuioapanuna abimbo iquec camenuen.

²⁸ Nuquin Papan Mayanēn ěbitedi tantiamiacpaden isadaidbon naden nata quequin chiacpaden nata mibi caisa nebi.

²⁹ Nēidtedtsēqui ěbitedishun nata caid nec: Nuquin Papan uaidbimboecnuc nacnenaid tantiaquin utsibon abi yacnoshon sanaid penda; adembidi, min chidouidtsēqui chudta; adembidi, min bēnēuidtsēqui chudmeta; adembidi, mimi nēish cuesuniaid intacchobi codocashun penda. Adoac ěmbi chiac-paden nabanec mibi bēdambo icpec. Padi aiddtedtsēqui chiemi.”

³⁰ Aden dada uaquin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menepanēdash.

³¹ Aden meniac isbanash: –Mimbi bēboed dada uaid isash bēdambo iquebi –quepanēdash isadaidpembo Antioquiya yacnocquido.

³² Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamepanēdash. Adomboembidi chuibanquin Sidasēn tantiamēoapanēdash.

³³ Aden dadpen ushquin chuibanshun: –Edusaden yacno nidoaibi –caquien:

–Ai, mibi nidsho isash unēsquio icquimbi mibi chomequido yacno nidtan, mibi caimbi –quepanēdash Esuquidistu tantiaquido Antioquiya yacno tabadquido.

³⁴ Adec aido Edusaden yacno nidnubien

35 Pabadon Bednabe chedobëdtan Antioquiya yacno tabadquin Esuquidistu tantiaquid utsibo Nuquin Papan chiaid bëdamboen tantiamenuen chuibampanëdash.

Pabadobëd Bednabe cuëshëdaid

36 Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanëdash.

37 Adoaquien: —Ma Madcosbidi nidoanu. Chuita —quepanëdash Bednabe.

38 Adoaquien: —Chieshec aidi cuëshëdondashe. Padi. Nuqui daëdtsëqui nidnu. Nid —quepanëdash Pabado.

39 Adoaquien Bednabe aden tantienquio yec Pabadobëd comapenec onquish Madcosbëd cano antabëdtoanec Chipide yacno nidoapanëdash.

40 Adnubien Pabado Sidas abëd Edusaden yacnoësh choboed caic: —Nuquibi nidnuna —quepanëdash.

Adec aid daëd nidnuesho isash anocquid Esuquidistu tantiaquido: —Ma Nuquin Papan mibi daëd bëdamboen nidmequin ma mibi bëdamboen namepanuna —cac Pabadobëd Sidas nidpanëdash.

41 Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bëdamboen tantiamenuen chuibampanëdash. Aden chuibeneshumbic nidaid Sidisia yacno choshon Esuquidistu tantiaquido shubu utsin-shubu utsinqueic iccuededacnomboec puduedcuenequin Pabadon chuibanoapanëdash.

16

Pabadobëd Timoteyo nidaid

1 Adec nidec shubu dadpen icquid Dedbe caid yacno choash tabadquin adomboebidi chuibanoash nidequi shubu dadpen icquid Disteda caid yacno Pabadobëd Sidas choapanëdash. Ambo Esuquidistu tantiaquid Timoteyo cuëmëdquid tabadpanëdash. Aidën tita isadaidbo Esuquidistu tantiaquid icnubi aidën papa isadaidpembo quidieco matses icpanëdash.

2 Timoteyo bëdambocquid nec, quequin Disteda yacnocquidon Pabado chuipanëdash. Adomboebidi shubu dadpen icquid Iconio yacnocquidon chuiopanëdash.

3 Aden dadpenshun chuisho tantiashe Timoteyo buante bumpanëdash Pabado. Adec, Timoteyo buanu, qeshun ëbi capucueniacno isadaidbo dadpen iqueque. Aidon Timoteyo isash, Aidën papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dëbid dëtemepanëdash.

4 Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaqin chiaid Pabadon chuiopanëdash.

5 Adembidi Nuquin Papan chiaid chiac ënden Esuquidistu tantiaquidon tantiabenuiocnobi utsi dadpen Esus tantiaquid yanoapanëdash.

Ushquin Masedonia yacnocquid Pabadon isaid

6 Adanec nidaid Sidisia caid yacnoësh nidsho Nuquin Papan Mayanën: —Nidaid Asia caid yacno Esuquidistu chuibanuec nidenda —cac Pabadobëd icquido nidaid Pidiquia caidtsen datambidanec nidaid Cadasia caidbidi datambidanec

7 nidaid Misia caid yacno chopanëdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanën aido tantiaméapanëdash.

⁸ Adoac nidaid Misia datambidanec shubu dadpen icquid Todoas caid yacno ëbi tabadacnobi chopondash.

⁹ Ambo choash tabadec inchëshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ëbitedi Esuquidistu chuibanec cho —quec onquesho Pabadon tantiapondash.

¹⁰ Aden tantiash: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ëbitsen Pabadobëd nidpondabi.

Didia cuëmëdquid Esuquidistu tantiaquid yanaid

¹¹ Adanec Todoas yacnoësh puduanec cano antabëdtoanec cuebi nidequi acte nënantanquio nidaid nacrëdquid Samotodasia caid yacno choash Pabadobëd icquido tabadtuidpondash. Badiadash auëshquio puduanec cano antabëdtoanec nidquimbi potebidanec nidaid Masedonia caid yacno ëbitedi chopondabi. Aid nidaidën acte cuëmambi shubu dadpen icquid Niapodis caid yacno pudundoanec

¹² nidequi shubu dadpenquio icquid Pidipos caid yacno domanobo dadpenquioshë tabadacno yuec ushec tabadpondash.

¹³ Pidipos yacno tabadashic isadaidbo iccuededte badiadën Nuquin Papa chiec utsibo onquedeniacno istuidnuec puduanec shubu nibëdacno nidequi acte utsi cuëmambi choapondash. Ambo choshon iccuededquido chidobo istuidshun Esuquidistu Pabadon chuibampondash.

¹⁴ Pabadon chuibanacno chido Didia cuëmëdquid shubu dadpen icquid Tiatida caid yacnoësh choquid icpondash. Aidën piucquid bednuen dashcute cuëshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash.

¹⁵ Aidbëd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedash Pabadobëd icquido tabadpondash.

Pabadobëdta Sidas quënë n nauedaid

¹⁶ Adashic padpidec Nuquin Papa chiec onquedeniacno Pabadobëd icquido nidoasho chido yuaidën bëquedtuiddpondash. Aidën mayan icsan tantiamiacpaden yuecash nad iquendac, quequin chuisho piucquid dadpen aid chido matsesën meniac aid chidon ambi bedaidtedi abi yuaquid meneoapanëdash.

¹⁷ Pabadobëd icquido bëquedtuiddshun tsibambëec choec aid chido: —Nëid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nëid dadatedi nec —quec

¹⁸ badiadquidën-badiadquidënquiec comapenec cuëdpondash.

Adec cuëdtonesho tantiate bunenquio yec ambibidi bidiadquin mayan icsa dapuduedaid chido chuiquin comapenen Pabadon: —Esuquidistun nadatiambocquin naidënquio dapuduenta —cac badedquio mayan icsa dapuduempondash.

¹⁹ Aden dapuduemiac chido bëdanacsho isun abi yuaquidon: —Nëbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneoatiapimbo iquec, quequin tantiash nëishun Pabadobëdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton

na bëshun utsibon sambanaid anoentsëqui abi chuiquido icsho isun chido yuaquidon Pabadobëdta Sidas ambo buampondash.

²⁰⁻²¹ Aden abi chuiquid tsadacno bëshash: —Nëid dada daëd isadaidbo nec. Nëmbo choshon abi chuiquidon naden nata quequin chiaid chuibanec. Èbitedi domanobo icquin ambi chiaid èbitedishun natemaid icnuc matsestedic chushquecuededosh —quepondash chido yuaquido abi chuiquido chiec.

²² Aden chuisho tantiaquidon chiac dadpen cho-choash iccuededquin Pabado bëquidon chiacpadomboen aidontsen chuioc abi chuiquido: —Bëboedon dashcute chicshun cueshcaten cuesta —cac sondadon cuespondash.

²³ Aden comapenen cuesmeshun buameshun quënën nauedmeshun ambi quënën nauedaïd ista caid chuiquin Pidipos yacnocquido chuiquidon: —Puduenanec cuenushe qeshun nëid daëdi bëdamboen isquiota —capondash.

²⁴ Adsho tantiahsun ambi ista caidën Pabadobëdta Sidas nënantanquio quënën nauedquin tsadunshun cueste shëcuë uaidën tausunash puduentanquin quënë bëdamboen bëtashpanëdash.

²⁵ Aden bëtashash aton shubu dayunquiocquidën puduedambic inchëshpotsembo Pabadobëd Sidas Nuquin Papa chiec onquepanëdash. Adechidi Nuquin Papan naid chiec cuëdëmpanëdash. Adec cuëdënsho utsibon tantianubi

²⁶ comapenec nidaid ishcutnubi mëtaniaidtedi mëchiquidpanëdash.

²⁷ Adnubien ista caid isec tsadboedi ushtanec isucunquin isac shëcuë bëtashaid ènden shëcniac. Adsho isash ista caid: —Quënën nauedaïdo puduenpuduempacnui —quetanec: —Chuiquid dapabon bë cuesunemetsiash —qeshun siadnuequin chështe abi tsiusudaïd chicsho

²⁸ istanquin Pabado: —Quënën nauedaïdtedi nëmbo iquebique. Seshuniadenda —quequin comapenen cuëmpanëdash.

²⁹ Adoaquien, seshuniadtsemboedën: —Tabote bec cho —cac ambi namiadën tabote bedtanquin meniäc tabote bedshun sananec badedi quënën puduedash dacuëdec uëdëquec Pabadobëd Sidas tabadacno choash danëshën sebudec shuebudpanëdash. Mibi daëdi bëdamboequid icnubi adquidpenquio nebi, quequin tantiaquin ismepanëdash.

³⁰ Adsho isun Pabado nïdtomiaqui seshuniadtsemboed bëyucanec nidquin aton shubun Pabadobëdta Sidas yuedash: —¿Nuquin Icho yacno puduednush mitsipadequibi èbi icsaid cuidadpeque? Chui. Tantianu —quepanëdash seshuniadtsemboed.

³¹ Adoaquien Pabado: —Mibibi cuidadtiapimbo iquec. Mibëdta min shubun icquido icsaquid icsho cuidnushe quiash abided cuidadec unëshash Esuquidistu aton Papa yacno puduedash abi tantiaquido yuedquid neque. Mibi icsaid ènash, Esuquidistu con Icho nec, quequin abimbo tantia

³² —qeshumbic seshuniadtsemboedbëd icquido Esus tantiamenuen Nuquin Icbon chiaid Pabado chuiapanëdash.

³³ Adoaqui Pabadobëdta Sidas cuesaid chiuë acten bëpanshunquin nainacsho aton shubun icquido Esuquidistu tantiaquido yansho isun aïtedi Pabadobëdta Sidasën acten mentobampanëdash.

³⁴ Aden mentobanaqui aton shubun yuedshun pemepanëdash. Adashic, Nuquin Papan chiaid abimbo tantiaquid yec ambi bëdambo icmiaïdo seshuniadtsemboedbëd icquido icpanëdash.

³⁵ Adashic, badiadash Pidipos yacnocquido chuiquidon: —Nauedaïd shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caid adomboembidi chuiocapanëdash.

³⁶ Aden chiac ista caidën: —Quënën nauedboed daëd pudueme, quequin chuiquid dapabon chiosh, quequin aidon chomiaidën chioshibique. Dacuëdenquio yec nid —capanëdash Pabadobëdta Sidas chuiquin.

³⁷ Adoaquien Pabado: —Ëmbi naid chuimenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquio caimbi. Ëbi daëdi puduemenuec ma chuiquid dapabo abibi chopanuna —quepanëdash.

³⁸ Aden chiac puduenanec nidequi abi chuiquido yacno choshon, Mimbi quënën nauedmeboed daëd domanobo nec, quequin chuisho tantiash chuiquid dapabo comapenec dacuëcuededpanëdash.

³⁹ Adec dacuëdec nidequi nauedaid shubuno choash: —Domanobo nec, quequin tantienquiocquin mibi quënën nauedmiombi —qeshun puduemetanec: —Pidipos yacnoësh nidtan —capanëdash Pabadobëdta Sidas chuiquin.

⁴⁰ Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bëdamboen tabadmenuequin Pabado chuibampanëdash. Aido chuibidanec Pabadobëd icquido nidoapanëdash.

17

Tesadonica caid yacnocquido isadaidbo nëishcuededaid

¹ Pidipos yacnoësh puduanec nidequi Pabadobëd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, qesho tantiash Tesadonica caid yacno Pabadobëd icquido tabadpanëdash.

²⁻³ Ambo tabadec isadaidbo iccuededte badiadën abi nidteniacpader Nuquin Papan chiaid chuibante shubu yacno choshon Pabado Esus tantiamenuen Nuquin Papan ënden chiampid chuibampanëdash. Nuqui icsaid bedshunash abided cuidadec Esuquidistu unësaid ambi uincuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanëdash Pabado. Sabado 3ted matamequin adomboen chuibampanëdash.

⁴ Aden chuibanaqui Esus tantiaquid utsi-utiec yampanëdash. Nëdic, isadaidbo utsi-utsiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanëdash.

⁵ Aden Pabado chuibanac Esus tantiaquid dadpen yansho isash isadaidbo utsibo nëishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nëishmiac natia chushquecuededpanëdash. Adec chushquec nidequi Pabadobëdta Sidas bednuëc Ason cuëmëdquidën shubuno puduëdec nidpanëdash.

⁶ Ambo choshon Pabadobëd Sidas nibëdsho isun Esuquidistu tantiaquido Asombëd icquido bedshun abi chuiquid dapabo yacno Pabado chieshënquidon buanec abi chuiquid dapabo yacno choash: —Nidaid utsi-utsiec yacno capucuenequin chuitemaid chuibanquido nëmbo

⁷ choacsho Asonën aid daëd yuedaccosh. Nuqui ancaquid Sesadën chiaid niacquin ancanquid utsi Esus cuëmëdquid iquec, quequin chuibanec —quepanëdash Pabado chieshënquido abi chuiquido chiec.

8 Aden, Ancanquid utsi iquec, quequin Pabadobëdta Sidasën chiec, qesho tantiash chuiquid dapabo iccuededquidobëd comapenec chushquecuedepanëdash.

9 Adtanec abi chuiquid Asombëd icquido caic: —Nëbi, ¿Atotsi tanti-aquin Pabadobëdta Sidas yuedo? quequin mibi chuimetiapimbo iquembi. Yuecshun mibi chomeshun chuimembi. Ëmbi chuimiabi Tesadonica yacnoësh nidenda. Ëmbi chiacpaden nanuequin piucquid ëbi mene —capanëdash Tesadonica yacnocquido chuiquid dapabon Asombëd icquido chuigin. Adoquien piucquid meniac bedshun: —Min shubuno nidtan —cac nidanepanëdash Asombëd icquido.

Bedeya yacnotsen tabadaid

10 Adshumbic bednushë qeshun aid inchëshëmbi Tesadonica yacnocquido Esuquidistu tantiaquidon Pabadobëdta Sidas shubu dadpen icquid Bedeya caid yacno nidmepanëdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanëdash.

11 Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ënden dada uamiampid Pabadon chuibanoshantiashun bëdambocquid icquin, Abimbobida chuibanoshe. Isbono, quequin Nuquin Papan chiampid isban-isbampanëdash Bedeya yacnocquidon.

12 Aden isbanec, Abimbo caic, quiash Esuquidistu tantiaquid dadpen isadaidbobëd isadaidpembo Esuquidistu tantiaquido yampanëdash. Adecbidi isadaidpembo chuiquid dapabo quidieco matses utsi-utsiec aton chido chedobëd Esuquidistu tantiaquid yampanëdash.

13 Adnubien, Bedeya yacnoshontsen Pabadon chuibanec, qesho tantiash Tesadonica caid yacnocquido, isadaidbo, Asombëd icquido bedmeboedo, Bedeya yacno choshon anocquidotsen nëishmiac comapenec chushquecuedepanëdash.

14 Adsho tantiashun Esuquidistu tantiaquidon Bedeya yacnocquidon acte dapa cuëmano Pabado nidmepanëdash. Adnubi Sidashëd Timoteyo nidenuo yec Bedeya yacno tabadnubien

15 Bedeya caid yacnoshon utsibon bëyucanquin Pabado buampanëdash. Aden buanec nidequi shubu dadpen icquid Atenas caid yacno chopanëdash. Ambo choash abia bëyucanquido: —Ëbi chobocnobidi Bedeya yacno nidoaibi —quesho tantiashun Pabado:

—Mibi yacno choash, Badedquio Atenas yacno chota, quiosh Pabado, quequin Sidashëdta Timoteyo chuita —capanëdash. Aden Pabado chiaquien Bedeya yacnocquido abi yacno nidoapanëdash.

Atenas yacnotsen Pabado tabadaid

16 Abia bëyucanquido Bedeya yacno nidambi Atenas yacno Pabado tabadquin, Sidashëd Timoteyo choec, qeshun cainec capuquimbi Atenas yacnocquidon nacnenaïd isbampanëdash. Aidon Nuquin Papan uaidbimboecnuc nacnenaïd dadpen tabëcaïd papa cain cuënaïd ambi tantiaïdo icsho isash, Nuquin Papa Abentsëcquiobi iquec, quequin tantias Atenas yacnocquido nec, quequin tantiec Pabado unësqüio yampanëdash.

17 Adec unësqüio yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabado chuibanpanëdash. Adembidi anocquidon piucquid bednuen aton na sambanshun ismiacno nidshun adomboembidi Pabado chuibanapanëdash. Isadaidbobëd onquequin Esuquidistu Pabado chuipanëdash. Adembidi isadaidpembobëd onquequin Esuquidistu chuioapanëdash.

¹⁸ Anoshon chuibansho tantiash epicudeyo cuëmédquidën chuinédacpaden tantiaquido Pabadobéd onquepanédash. Adembidi tantiash estoico cuëmédquidën chuinédacpaden tantiaquido Pabadobéd onquepanédash. Aido Pabadobéd onquequin Pabadon Esus chuisho tantianquio yec: —¿Atodain comapenec onquequin nëid dadan chuipash? —quepanédash. Adnubien utsi: —Matses utsibon papa cain cuënaid chuibanec nepanui —quepanédash. Pabadon Esuquidistu unësash uincuenaid chuisho tantiash adpanédash.

¹⁹⁻²⁰ Adec onqueshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëash Pabado: —Mimbi chiaid ëmbi tantiacmaid nec. ¿Midapadquidquio mimbi chuibaneque? Tantianu. Chuiban —quepanédash abi bëquido caic.

²¹ Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh cho-choquido badiadquidën-badiadquidënqueic utsin-utsinquin ambi tantiacpaden chuibansho tantianuec iccuededpanédash.

²² Aden mimbi tantiacpaden chuibanta caquien nënantanquio nidtoshon naden Pabadon chuibanpanédash: —Chuibanu. Tantiata. Mimbi papa cain cuënaid mimbi tantiaid iquec, quequin tantiemi.

²³ Capucuequequin mimbi tantiaidbimboecnuc nacnenaid dadpen isombi. Mimbi papa cain cuënaid dadpen tabëcaid icnubi mimbi cuënacmaid abentsëc iccosh. Aid mimbi cuënacmaid icnuc abibimboecnuc nacnenaid nibëdosh. Aton shubumpiuidtsëqui iccosh. Mimbi cuënacmaid mimbi tantiacmaid mibi chuibanu. Tantiata.

²⁴ “Ëmbi Nuquin Papa cain cuënaid nidaidbëdtabi abu uashumbic aidënquiocquidtedi uaquidquio nec. Abitedi uaquidquio yec abitedishun icbombo aidi nec. Aidi tabadmenuequin matsesën shubu uashunaidën tabadesa nec.

²⁵ Aidi abitedishun Icho icnuc abitedi aton na nec. Adquid icsho, Con na mibi menenu, matsesën aid catiapimbo iquec. Aidën tantiacpadecec ëbitedi nëmbobi tabadebi. Aidën tantiacpadecec ëbitedi tiboquebi. Aidën tantiacpaden ëbitedishun bedbanoaimbi.

²⁶ Aidëmbi bëyuc dada uampidën tsyuecquido ëbitedi nec. Aid bëyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taënuec ue yanendac. Adecbidi, inçhështanec badiadoaic. Adecbidi, ushë nidash choaic.

²⁷ Aidëmbi naden tantiec: Matses tantiaquin abitedi uaqin nashunden-emb. Aden ambi matses abi tantiaquin nabanaid isash matses, ¿Tsuentsin nabanaid nepec? queshun ëbi tantiaquin Icho ëbi capec, quequin tantiaquin Nuquin Papan nuqui nashunec. Aden nashunquin Nuquin Papan nadati-ambocquin nabanaid nuqui ismedenec.

²⁸ Aidën nac tiboquequid ëbitedi nebi. Aidën nac capuquidbidi ëbitedi nebi. Adembidi min matsesën dada uampid adomboen chiaid nad iqueque. Tantiata. Chuinu: Nuquin Papan bacuëbo ëbitedi nebi, quequin min mëdimbon chuipanédash.

²⁹ “Nuquin Papan bacuëbo ëbitedi iquec tiboquequid icquin matsesën nacnenaid tiboquesa papa cain cuënenquioctiadquidi matses nec.

³⁰ Ënden matsesën ambi nacnenaid aden cuënscho tantiash Nuquin Papa, Chën. Adoenda, quenquiochoedi nëbi, Mimbi icsamboen tantiaid ënta, quequin chiec.

³¹ Matsesën naid chuibante ushë chonoc matses icsaidbëdta ambi bëdamboen naid chuibanquin Nuquin Papan chomeshun matses icmiaidën cuidbanendac. Ambi abipadquid matses icmiaid, Nuquin Papan matsesën naid chuibanquid icmenu caid unësacsho isun ambi chiampicpaden

nanuequin Nuquin Papan uincumepondash —quepanēdash Pabado Adeyopaco yacno iccuededquido Esus tantiamenuc.

³² Adec aidi unēsacsho Nuquin Papan uincumepondash, quequin Pabado chuisho tantiaash utsi-utsiec mamēnshumēnubi utsi-utsiec: —Aidēn chuiboed padpiden tantianuna —quepanēdash.

³³ Adoaquien, Pabado Adeyopaco caid yacnoēsh nidpanēdash.

³⁴ Adec nidshun yuec ushquin chuisho tantianu quec Pabado bēd iccuededquin utsin-utsinquien padpiden-padpidemboen tantiabededpanēdash. Aden Pabado chuibanac utsi-utsiec Esuquidistu tantiaquid yampanēdash: Nēdic, Dionisio cuēmēdquid Adeyopaco caid yacno iccuededquido chuiquid nepanēdash. Utsibic, chido Damadis cuēmēdquid adecbidi Esuquidistu tantiaquid yampanēdash. Aidobēd utsi-utsiec Esus tantiaquid yampanēdash.

18

Codinto yacno Pabado tabadaid

¹ Adec Atenas caid yacno tabadash auēshquio puduanec nidec shubu dadpen icquid Codinto caid yacno Pabado chopanēdash.

² Ambo isadaidbo Aquida cuēmēdquid nidaid Ponto caid yacnoshon tishaid Pabado istuidpanēdash. Isadaidbotedi nidaid Itadia yacnoēsh nidtan, ancanquidēn cac aton chido Pidisida cuēmēdquid bēd Codinto yacno choash Aquida icpanēdash.

³ Nidaidēn capuquid yua bitsi shubumpi nacnenquid abipadquid Aquidabēd aton chido icsho isun aidobēd tabadquin Pabado shubumpi nacnempādash.

⁴ Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuc Nuquin Papan chiaid dada uamiampid Pabado chuibampanēdash.

⁵ Ambo tabadnubi Sidashēd Timoteyo nidaid Masedonia yacnoēsh choambic shubumpi nacnenquiocquin isadaidbo Esuquidistu tantiamenuc Pabado chuibampanēdash.

⁶ Adsho, Aid tantiatipi, quequin isadaidbon Esuquidistu icsamboen chuisho tantiaash abi daēd dasiuidaid bēntsecquid chicshun ishcunec Pabado: —Esuquidistu mibitedi chiombi. Aid tantiesa yec unēsash Nuquin Papa yacno puduedenquo mibitedi iquendac. Adquid Nuquin Papan cuidquin nēsecatequid nendac. Nēbi padpiden mibi chienquo iquemi. Isadaidpembon tantiaash, quequin aido chuibanembī —quepanēdash Pabado isadaidbo tantiesa chiec.

⁷ Aden chiashic Nuquin Papan chiaid chuibante shubu yacnoēsh puduanec aid dayuntsēqui shubu icquidēn Pabado puduedpanēdash. Aid shubu icbo Usto cuēmēdquid Nuquin Papa tantiaquid icpanēdash.

⁸ Uston shubunoshon Esuquidistu Pabado chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnoquid dadpen Esuquidistu tantiaquid yampanēdash. Adsho adquidtedi acten mentobampanēdash.

⁹⁻¹⁰ Adashic, yuecash inchēshēn Pabado usho Nuquin Papa: —Codinto yacnoquid dadpen Esuquidistu tantiaquid yanendac. Aden ěmbi chiac dacūedenquiocquin comapen chuideneta. Mibi dayun uaquidquo nebi. Aden dayun uasho ěbi tantiesabon mibi natiametiapimbo iquendac —quepanēdash Pabado caic.

11 Aden chiac Codinto caid yacno seta abentsëc matamiash ushë 6ted nidmec tabadquin Nuquin Papan chiaid Pabado chuidonepanëdash.

12 Adnubien nidaid Acaya caid yacnocquidon chushcaid chuisho tantiashun matses icsambocsho cuidte chuiquid Cadion cuëmëdquid icnubi isadaidbon Pabado bedshun abi chushcaid Cadion chuinen buampanëdash.

13 Ambo bëquin puduedmiash: —Ancanquidën chiaid niacquin matsesën tantiatemaid nëid dadan chiosh —quepanëdash Pabado chieshëquido Cadion caic.

14 Adoquien Pabado onquetsenubi Cadiomba onquedopanëdash: —Tantiata, isadaidbo. Mibi chuïnu. Nëidën icsamboen nabanaid mibitedishun ëbi chuisho tantiatsiambi.

15 Aden chienquo yec, Nëidi mibi onquiaidbëdta min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaid chuiquidquo nëid dada nec, mibi queopec. Aden mimbi chuisho tantiashun, Èbi chienda caimbi. Domanobo chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiquid yacno nidshun chuitanta.

16 Aden chuishumbic Cadionën: —Aidtedi umanuc puduemeta —cac isadaidbo Pabado bëboedo Cadionën namiaidon puduemepanëdash.

17 Adoac puduëshumbic Nuquin Papan chiaid chuibante shubun iccuededquido chuiquid utsi Sostenes cuëmëdquid bedshun isadaidbon comapenen cüespanëdash. Adosho isun chiac Cadion, Icsamboen naic, quenquo yec otacquo tsadpanëdash.

18 Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanëdash. Abëdi Aquida aton chido chedobëd Codinto yacnoësh nidec shubu dadpen icquid Senquedeya caid yacno chopanëdash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manëdaid Pabado matasmepanëdash.

19 Ambo ushë abentsëc nidmec tabadash cano antabëdtoanec acte dapa potiash Epeso yacno choshon Aquida aton chido chedobëd, Nëmbobi tabadnu, quepanëdash. Adsho tantiashun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibanpanëdash Pabado.

20 Aden chuibanho tantiashun: —Adomboembidi chuibanuec ¿ada ëbëd yuec tabadtsia? —iccuedequidon caquien: —Nëbi padenquo iquebi.

21 Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquo puduanec nidequi cano antabëdtopanëdash Pabado.

22 Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanëdash.

23 Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auëshquo nidequi nidaid Pidiquia caid yacno choash tabadquin Esuquidistu tantiec iccuededquid dadpen bëdamboen tantiamenuen chuibanapanëdash Pabado.

24 Adnubien isadaidbo Apodos cuëmëdquid shubu dadpen icquid Adecandedia caid yacnoësh Epeso yacno chopanëdash. Aidi dadpen tantiaquid yec Nuquin Papan chiampid tantiaquid nepanëdash.

25 Uan pado acten mentoanquid Esuquidistu chiec onquiaiduidi tantiacquid chuibanquid Apodos icpanëdash.

²⁶ Aidi Nuquin Papan chiaid chuibante shubu yacno nidshun dacuēdenquiocquin ambi tantiaid chuibampanēdash. Aden chuisho tantiaish, Ēbi yacno isec cho, queshun Aquidan aton shubu yacno buanshun Esuquidistu choaid ambi nadatiambocquin naidbēdtabi abi unēsash uincuenaid chuibampanēdash Aquidabēdtan aton chidon Apodos tantiamequin.

²⁷ Aden Esuquidistu bēdamboen tantiaish Epeso yacno yuec tabadquin Esuquidistu Apodosēn chuibampanēdash. Adec yuec tabadquin chuibanashic, Nidaid Acaya caid yacno nidnu, quepanēdash. Adec nidnuesho tantiaishun, naden dada uashun Apodos menepanēdash Epeso yacnocquidon: Nēid dada uaid sananquid Apodos cuēmēdquid Esuquidistu tantiaquid nec. Ēmbi isaid neque. Yuedta, quequin dada uashun, Apodos Epeso yacnocquidon menepanēdash ma nidaid Acaya caid yacnocquido Esuquidistu tantiaquido Apodosēn menenu, queshun. Aden meniac puduanec nidec nidaid Acaya caid yacno chosh puduedshun Esuquidistu tantiaquido bēdamboen tantiamenuen chuibampanēdash.

²⁸ Aden chuibanquimbic isadaidbo Esuquidistu tantiesabo icsho isun abēd onquequin, Esuquidistu Nuquin Papan Chomiaid nec, quequin Nuquin Papan chiampid Apodosēn chuibampanēdash.

19

Epeso yacno Pabado abēd icquido tabadaid

¹ Codinto yacno Apodos icnubi Pabado nidaid Pidiquia caid yacnoēsh puduanec podquedēn choec macuēsh dapa dectatocuētsenec shubu dadpen icquid Epeso caid yacno choapanēdash. Ambo choshon Esuquidistu tantiaquido istuidshun:

² —¿Esuquidistu tantiaquido icshoda Nuquin Papan aton Mayan mibitedi menepanēdash? —capanēdash Pabaton.

Adoaquien: —Nuquin Papan Mayan iquec, quequin tantiamboccombi —quepanēdash Epeso yacnocquido.

³ Adoaquien Pabado: —¿Atotsi canuen mibi acten mentobampanēdash? —quepanēdash.

Adoaquien: —Uan padon chiaid tantiaquid icsho acten mentondashi —quepanēdash Epeso yacnocquido Pabado chiec.

⁴ Adoaquien: —Mibi icsaid ēnta, queshun abimbo tantiaquidtedi acten mentobanquin, Ēbi tsibanec choquid Esus tantiaquid icta, quequin Uan padon chuipanēdash —quepanēdash Pabado Epeso yacnocquido chiec.

⁵ Aden chiac, Esuquidistu tantiaquid nebi, quequin Epeso yacnocquidon chuisho tantiaishun padpiden acten mentomepanēdash.

⁶⁻⁷ Aden aidtedi acten mentoacsho mēdanten Pabaton mamishbanac aid doseted Nuquin Papan aton Mayan menepanēdash. Aden meniac abi onquiacmaidēnquo onquec Nuquin Papa chiec cuēdēmpañdash Epeso yacnocquido.

⁸ Adashic Nuquin Papan chiaid chuibante shubun puduedshun Pabaton Nuquin Papabēd tabadaid chuibampanēdash. Cuemo tantiamenuequin ushē choaid 3ted nidmequin badiadquidēnbadiadquidēnquien dacuēdenquiocquin Nuquin Papan chiaid Pabaton chuibampanēdash.

⁹ Aden chuisho tantiaish pamumēdacbimboec tabadquin, Tantiatiapibi, quequin utsinquien chieshēmēnquioquin Esuquidistu icsamboen chuipanēdash. Aden chiac Esuquidistu tantiaquidobēd Pabado, Nidnu, quianec Nuquin Papan chiaid chuibante shubu yacnoēsh

puduanec nidec Tidano cuëmédquidën chuibante shubu yacno choshon adomboembidi tantiamenuen matsesbëd onquequin Nuquin Papan chiaid chuibampanëdash.

¹⁰ Seta daëd matamequin adomboembi chuibampanëdash Pabadon. Aden chuibancho tantianeshun chiac nidaid Asia caid yacnocquidon tantianpanëdash. Adoac isadaidbobëd isadaidpembe Esus tantiaquido yampanëdash.

¹¹ Epeso yacno Pabado tabadsho Nuquin Papan nadatiambocquid icmiacsho

¹² Pabadon dada cuëscashun dashcute cuëshë buanshun daicsaid mishbanac bëdampanëdash. Adembidi Pabadon dada cuëscabanaidën nënquid mishac bëdampanëdash. Adembidi pashuaidtsen pamishac bëdanoapanëdash. Adembidi mishac mayan icsa dapuduempanëdash.

¹³ Adnubien mayan icsa dapuduemenuen Pabadon chiacpaden tanquin isadaidbo utsibon: —Esus Pabadon chuiboedënquido dapuduen —capanëdash.

¹⁴ Pabado tanuequido isadaidbo chuiquid Esqueba cuëmédquidën mado 7ted icpanëdash.

¹⁵ Aden chiaquien mayan icsa: —Esus iquec, quequin ëmbi tantiaid aidi nec. Pabado iquec, quequin ëmbi tantiaidbidi aidi nec. ¿Mibitedi tsutsi neque? Tiantianu. Chui

¹⁶ —queshun nebudquin dashcute ched-chedcapamboen mayan icsan cuesactaniaqui shubu nuntanüesh puduenanec cuempanëdash Esqueban mado.

¹⁷ Adec cuensho isquidon chiac Epeso yacnocquid isadaidbobëd isadaidpembe dacuëdcuededpanëdash. Adec dacuëdquin, Dacuëdampambo iquec. Esuquidistu bëdamboquid nec, quequin tantiabededpanëdash.

¹⁸ Esuquidistu tantiesha icboedi Esuquidistu tantiaquid yanec dacuëdenquido yec Esuquidistu tantiaquido iccuededacno nidshun abi icsaid chuibampanëdash.

¹⁹ Adquid dadpeshun icsamenuen ambi ompoquin naid ismenquiochoebombi, Nëbi adquid ictiapibi, quequin cuëte dëtsiadotanquin ambi ompoquin tantiamiaid dada uatetedi tantianuen bedash utsitsen icsabudnushe qeshun abitedi tauipanëdash. Aden tauiboed menequin piucquid dadpen bedtsiandac, quepanëdash.

²⁰ Aden abi icsaid dada uate tauisho isquidon chuibanac Esuquidistu tantiaquid dadpen yampanëdash.

²¹ Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnosen nidiadquido iquebi —quepanëdash Pabado.

²² Aden chias Asia caid yacno abi tabadquin Masedonia caid yacno abia Timoteyobëdta Edasto nidmepanëdash Pabadon.

²³ Aid daëdi nidan Epeso yacno tabadquin Esuquidistu Pabadon chuibanaquien tantiesabo nëishpanëdash.

²⁴ Adquid Demetedio cuëmédquid Diana caidbimboecnuc nacnemequid icpanëdash. Aidëmbi ambi nacnemiaid menequin piucquid dadpen bedbampänëdash.

²⁵ Aden Esuquidistu tantianu quesa icquin ambi Dianabimboecnuc nacentha caidobëdta abipadquid Diana nacnemequid utsibo iccuededmeshun Demetediön nadopanëdash: —Nuqui tantiaid Dianabimboecnuc naceneshun menequin piucquid dadpen nuqui bedbanec.

²⁶ Aden nanubi nidaid utsi yacnoësh Pabado cuëmédquid nëmbo choshon utsi comapenen chuibanac Epeso yacnocquid dadpembëdta nidaid Asia

caid yacnocquid dadpeshun tantiec. Dianabimboecnuc nacnenaïd tiboquesa iquec. Adquid matsesën tantiad abimbo ictiapimbo iquec, quequin Pabado chiec.

²⁷ Aden chiac matses dadpeshun tantiash Dianabimboecnuc nacnenuido icsambo iquec, quetsiash ëbitedi caic. Adecbidi, Dianabimboecnuc nacnenaïdbëd abi tabadte shubu uashunaid icsambo iquec, queoapec. Adecbidi Dianabimboecnuc nacnenaïd tiboquesa icsho matsesën tantienquïo ictiadquidi nec, queoapec Pabado. Aden chiac nidaïd Asia yacnocquïdon dadpeshun Diana tantiaboedombi padenquïo yampec. Aidëmbi tantienquïo yanshun aïdbimboecnuc nuqui nacnenaïd bedenquïo iquendac –quepanëdash Demetediö.

²⁸ Aden chiac ambi chomeboedtedi, Pucquid ëbi menequin ëmbi nacnenaïd matsesën padpiden bedenquïo ictsiash, quec nëishash: –Epeso yacnocquïdon tantiad Diana bëdambo iquec –quec comapenec cuëdcuededpanëdash.

²⁹ Adec comapenec cuëdcuededsho tantiash Epeso yacnocquid utsibo aïdobëd cuëdcuededpanëdash. Adec cuëdcuededquin nidaïd Masedonia caid yacnoësh Pabadobëd chohoed Cayobëdta Adistadico bedshun iccuededte shubu yacno cuëdcuededquïdon buampanëdash.

³⁰ Aden aïd daëd bedshun buansho isquïdën chiac Pabado, Iccuededte shubu yacno nidnu, qesho tantiashun: –Padi. Ambo nïdenda –capanëdash Esuquïdistu tantiacquïdon.

³¹ Adembidi, anocquïdo chuiquïd utsin-utsinquïen Pabado chuioapanëdash.

³² Adnubien cuëdcuededquïdon Cayobëdta Adistadico bedshun buansho isash matses dadpen, ¿Atotsieshun aïd daëdi bëo? quequin tantienquïo yec tabadpanëdash.

³³ Adnubien, Nuqui tantiacpadomböen chuitan, quequin isadaïdbon Ade-candedo cuëmëdquïd nënantanquïo tsicunepanëdash. Aden tsicunequïen nïd-toash: –Tantia. Chuïnu –quequin

³⁴ daëdpactsëc chiec onquesho tantiash onqueboedi ënëdash tabadnubi: –Isadaïdbo aïd nec –quesho tantiash: –Epeso yacnocquïdon Diana cain ambi tantiadimböecnuc nacnenaïd bëdambo iquec –quec baded-badedquïec cuëdcuededpanëdash.

³⁵ Adec cuëdcuededshöbïen Epeso yacnocquïdon naden nata quequin chi-aïd dada uaquïdën ënëdmenequin nadopanëdash: –Epeso yacnocquïdon tantiata. Chuïnu. Diana caïdbimboecquïd abucuësh paëdaïdbimboecnuc nacnenaïd nuqui comapenen tantiadbëdta abi tabadte isquïdo nuqui nec. Adquïd Epeso yacnocquïdo nec, quequin nidaïd utsi yacnocquïdon tantiec.

³⁶ Aden utsïbön tantiec, quequin tantiaquin icsamboen naïnda.

³⁷ Dada daëd mïmbi nëmbo bëboed Diana caïdën shubun puduedamboc-cosh. Adembidi ampiambo iccosh. Adecbidi, Diana caïd chiec icsamboec onquenquïoccosh.

³⁸ Adenquïo icnuc Demetediöbëd icquïdo abi chushquïaid chuïnec Epeso yacnocquïdon naden nata quequin chiaïd tantiaquïd yacno nïdshun

³⁹ mïmbi tantiacpaden chuita cuëdcuededenquïocquin.

⁴⁰ Comapenec cuëdcuededec qesho tantiash ancanquïd dapan Epeso yacnocquïdo bëdamboen tabadmeta caïd yacno nïdshun chiac, Ancanquïd dapan chiacpadec Epeso yacnocquïdo tabadenquïo iqueque. Cuëdcuededquïdo chome, nuqui catsiash. Aden chömiac ¿atotsi nuqui chuïpe?

⁴¹ Aidën nuqui chömenushe quïash min shubuno nïdaneta –capanëdash Epeso yacnocquïdon naden nata quequin chiaïd dada uaquïdën. Aden chiac Demetediöbëd iccuededquïdo nïdanepanëdash.

20

Masedonia yacnocquido isbidanec nidequi Quedesia yacnocquido isbidanec nidaid

¹ Natia cuëdcededboedo nidanian Esuquidistu tantiaquido chomiash Pabado: —Nidaid Masedonia caid yacno nidoaibique. Bëdamboec tabadta —quianec Epeso yacnoësh puduanuc abëdi nidondabi.

² Auëshquio puduanec nidquin nidaid Asia caid yacnocquid utsi-utsien chuibidanec nidaid Quedesia caid yacno choapondash Pabado.

³ Ambo choash ushë abentsëc chotsëcnuc nidmec tabadash: —Nidaid Sidia caid yacno nidnu —quepondash. Adsho tantiasun: —Ambo nidacsho mibi cuesunenuequin isadaidbon cainec —cac nidaid Masedonia caid yacno Pabado nidoapondash.

⁴ Nidaid Masedonia caid yacno choash Pabado tabadnubien abëd capuquido bëyucanec nidaid Asia caid yacno nidpondash. Abëd capuquido nëidted icpondash. Nëidic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo cuëmëdquid; utsibic, shubu dadpen icquid Dedbe caid yacnoësh choquid, Cayo cuëmëdquid; utsibobi, nidaid Asia yacnoësh choquido: nëidic, Timoteyo cuëmëdquid, utsibic Tiquico cuëmëdquid, utsibic Tedopimo cuëmëdquid. Aidedi icpondash.

⁵ Aidedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash.

⁶ Aidedi nidan pan nami uainquioctequid pete ushëtedi tantiec tabadanec Pabadobëd cano antabëdtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabadobëd icquido tabadoapondash.

Eyutico unësascho uincuemiaid

⁷ Todoas caid yacno tabadequi dominco ushën Esuquidistu tantiaquidobëd iccuededquin Pabadobëd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiaish yuec onquepondash inchëshpotsembo yantsëcquie.

⁸ Aid onquiacon shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash.

⁹ Pabado onquenubi nëbi caniaid, Eyutico cuëmëdquid, iste shëcuë yacno tsadec ushcasmash ushtotanec abucuësh paëdpondash. Adec paëdsho isash bud-budshun unësascho isbedednubien

¹⁰ Pabadotsen budquin dayumbudec: —Unësboedi abi tiboquianeque. Shubicededenda —quepondash.

¹¹ Aden chiash abuc quënë yacno padpidec dectatoashun abitedishun pebededpondash. Aden piash tabadec Pabado utsibëd onquecuededpondash badiadbudtsëcquie. Adec badiadbudbon Pabadobëd icquido shubu nuntanuësh puduem-puduenubien

¹² paëdboed aton shubuno utsibobëd nidpondash bëdambo yec.

Todoas yacnoësh puduanec Mideto yacno chote

¹³ Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abëd capuquid utsibobëd puduanec nidequi cano antabëdtoanec Ason yacno nidoapondabi.

¹⁴ Adec nidequi Ason yacno choshon istuidac Pabado ëbëdi cano antabëdtoanquin potiaish shubu dadpen icquid Mitidene caid yacno choapondash.

¹⁵ Auëshquio puduanec nidec badiadash acte nënantan nidaid nactnëdquid Quoio caid datambidanec nidash badiadash acte nënantan nidaid nactnëdquid utsi Samos caid datambidanec shubu dadpen icquid Mideto caid yacno choapondash.

¹⁶ Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unëshmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

Epeso yacnocquido tsusiobo Pabado chuibanaid

¹⁷ Adashic Mideto caid yacno tabadtuidshun Epeso yacnocquido Esquidistu tantiaquido tsusiobo Pabado chomepondash.

¹⁸ Aden chomeshun naden aido chuipondash: —Chiembique. Tantiata. Ëbi ënden nidaid Asia caid yacno choash mibëd yuec tabadquin nabanaid mibitedishun istenepondac.

¹⁹ Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta cacpaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi.

²⁰ Esuquidistu mibitedi bëdamboen tantiamenuen matses dadpen iccuededacnoshon chuibanondambi. Adembidi shubu utsin-utsinqueic puduedcuenequin chuibanondambi.

²¹ Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

²² “Aden chuibanshobi Nuquin Icbon Mayanën: Edusaden yacno nidta, quequin chuioposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi.

²³ Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi.

²⁴ Aden Nuquin Papan Mayanën chuisho tantiaishi, Ëbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papabëd tabade iquec, quequin chuibanembi.

²⁵ “Nëshunquio Nuquin Papan chiaid ëmbi chuibancho mibitedishun tantibenonndaiddon nëuëshquio ëbi nidacsho mimbi isoainquio iquendac.

²⁶ Ëmbi nëshunquio Esuquidistu mibitedi chuibanac, Esuquidistu chiambo iccoshi, quetiapimbo mibitedi iquendac.

²⁷ Tantienguiocsiash, quenquiocquin Nuquin Papan tantiacpaden chuibanombi.

²⁸ Aden chuibanash nëbi nidebi. Ëbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabadnushë queshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuc Esuquidistu unëshpanëdash.

²⁹ Ëbi nidan abimbo chiacchimboen chuiquid Esuquidistu tantiaquido chuiquid icnuec choendac.

³⁰ Adembidi mibēdi iccuededquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquio icnuequin adoendac.

³¹ Adquid Esuquidistu tantiec iccuededquido cuēshēdmequid neque. Ista. Adquid iquendac, quequin mibēdi tabadquin ēnenquiocquin chuibanondambi. Adquid choec, quequin mibitedi chiec shubiondabi.

³² “Bēdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bēdambo icmeshun abēdi tabadmendac.

³³ Mibēd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi.

³⁴ Ēmbibi shubumpi nacnenshun menequin piucquid bedshun con na bedondambi. Adembidi nacnenshun bedshun ēbēd capuquido menebanondambi.

³⁵ Adembidi chonoadshun aton na bedshun natiapimbocquid meneta, quequin mibitedi ismebanondambi. Nuquin Icbo Esuquidistu nidaidēn tabadec nadpanēdash: ‘Utsin natiapimbocsho menequid Nuquin Papan bēdambo iquebi camiaid nendac. Nabanenquio yec bedshumēnquidquio icsho Nuquin Papan bēdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabado.

³⁶ Aden chiashic Pabado Nuquin Papa chuinuec utsibobēd danēshēn sebucuededash onquecuededpondash.

³⁷ Aden Nuquin Papa chiec onqueshumbic nidtocuededshun abitedishun Pabado chuiboed tantiaquin Pabado dayumbededquin shubi uabededpondash.

³⁸ Ēbi padpiden mimbi isoainquio iquendac, Pabado guesho tantias shubicuededpondash. Adec shubiquin dayumbudash unēsquio yec Epeso yacnocquido tsusiobo Pabado bēd cano yacno nidanepondash.

21

Edusaden yacno Pabado nidoaid

¹ Epeso yacnocquido tsusiobo acte cuēman tabadnubi cano antabēdtoanec Pabado bēd capuquido nidquimbi cuebi potiash acte nēnantan nidaid nacnēdquid Cos caid yacno choapondash. Badiadnuc auēshquio puduanec nacnēd acte nēnantan nidaid nacnēdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash.

² Ambo choashic nidaid Penisia caid yacno cano dapa utsin nidnuequid istuidash antabēdtoanec Pabado bēd capuquido nidoapondash.

³ Adec nidquimbi acte nēnantan nidaid nacnēdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bēaid icbo yacno buamepondash.

⁴ Aden buan-buanubi Esuquidistu tantiaquido yacno nidanec puduedash 7tedec ushec Pabado bēd capuquido tabadpondash. Ambo tabadnubi, Edusaden yacno Pabado cuesunenuequid iquec, quequin Nuquin Papan Mayanēn tantiamiac aidon, Edusaden yacno nidēnda, quequin Pabado chuipondash.

⁵ Aden chiaqui cano icbo nidnuesho isash padpidec cano antabēdtoanec, Nidnu, quepondash Pabado. Aid nidnuesho isash Esuquidistu tantiaquido bēnēbēdi aton chido aton bacuēbo chedo Pabado bēd acte cuēmano choash Nuquin Papa chiec onquecuededpondash.

⁶ Adec Nuquin Papa chiec onqueshun, Nidec nid, cac Pabadobëd icquido cano antabëdtoanubien Tido yacnoësh acte cuëmano chobedo aton shubuno nidaneopondash.

⁷ Adec cano antabëdtoanec auëshquio nidec shubu dadpen icquid Tode- maida yacno choash Pabadobëd capuquido tabadtuidpondash.

⁸ Adec anocquidobëd tabadec badiadash cano antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niante meneta caid utsi 6tedibëd Uedipe icpondash.

⁹ Aidën champibo 4tedi aton bënën bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰ Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash.

¹¹ Adec choshon Pabadoon tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, que- quin isadaidpembo menendac —quepondash Accabo Pabado chiec.

¹² Aden Accabon chuisho tantiash shubiquin Pabadobëd chobedon Uedipen shubun icquidobëdtan, Edusaden yacno nidenda, quequin Pabado chuiöapondash.

¹³ Adoaquien: —¿Atotsi canuen shubiquin ëbi icsambo icme? Edusaden yacno nidshun Nuquin Icho Esuquidistu chuibansho ëbi taneshun unës uatsiash, quequin tantiaquin abi Esuquidistu chuibanuna —quepondash Pabado.

¹⁴ Adoaquien, Nidenda, caqui niacbidanec, Edusaden yacno nidebi, queopondash Pabado.

Adec, Nidebi, qesho tantiashun: —Ma Nuquin Icho bunacpadec nidpa- nuna —capondash.

¹⁵ Aden chiashic Sesadeya yacnoësh puduanec Edusaden yacno Pabadobëd capuquido nidoapondash.

¹⁶ Adec nidsho isash Sesadeya yacnocquid Esuquidistu tantiaquid utsi- utsiec Pabadobëd nidquin Menason cuëmëdquidën shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabenquidbidi nepondash.

Pabadoon Acobo isaid

¹⁷ Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash.

¹⁸ Aden yuedac tabadash badiadash Acobo isec nidoapondash. Acobobëd Esuquidistu tantiaquido tsusiobotedi icpondash.

¹⁹ Adec nidec ambo puduedshun, Mibi isec chobi, quequin, Ëmbi Es- uquidistu chuibanubi Nuquin Papan tantiamiac isadaidpembo dadpen Es- uquidistu tantiaquido yanosh, quequin Pabadoon chuipondash.

²⁰ Aden chuibanac Nuquin Papan naid bëdambo iquec, quiash Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec.

²¹ Adquidombo icquin, Min bacuëbon shui dëbid dëtemenda, quequin isadaidpembo Pabadoon chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec.

²² Aden chiec tabadquin mibi nëmbo choaid tantiash mibi cuesunete buntsiash. Mibi cuesunete bumenquio icmenuequin ¿Atotsi nuqui napeba?

²³ Naden nac bēdambo ictshashe. Tantia. Chuinu, Pabado. Nēmo ēbēd icquido Nuquin Papauidi tantiec tabadnuequid daēd-daēdquiec iquec.

²⁴ Nuquin Papan ēbi bēdamboen dayun uadenesho ismenu, quiaish nidaid Quedesia yacnoēsh, Ēbi matas, quesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnenuquid piucquid menembi,” quepondac. Nēbimbobi Edusaden yacno mibi choaōc. Nēid dadatedibēd Nuquin Papa tabadte shubu uashunaid yacno nidshun mimbi ēnden chiondacted piucquid meniac, Pabado ic-sambo iquec, quequin chuiboedombi, Nuquin Papan, Naden nata, quequin chiacpaden naquidquo Pabado nec, quequin tantiatsiash.

²⁵ Ēmbi isadaidpembo Esuquidistu tantiaquid utsibo dada uaquin naden chuiōaombi: “Nuquin Papan, Naden nata, quequin chiaid dada uamiampid nēidtedictsēqui mimbi natequid nendac. Nēidic, Nuquin Papan uaidbim-boecnuc nacnenaid tantiaquidon pete sanaid penda; adembidi, min chidouditsēqui chudta; adembidi chidon min bēnēuidi chudmeta; adembidi, nēish cuesaid intacchobi codocaid penda.” Aden dada uabanquin isadaidpembo chiombi –quepondash Acobo Pabado chiec.

²⁶ Aden chiaquien badiadash Nuquin Papa tabadte shubu uashunaid yacno dada 4tedbēd choash Pabado, Nēidted dadabēdtambi ēmbi Nuquin Papan chiaacted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

Pabado bedaid

²⁷ Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoēsh choquidon isadaidbon ispondash. Aden isash Pabado bedmete bunec, Isadaidbo utsibo nēishmenu, quec:

²⁸ –Isadaidbotedishun tantiata. Nēidēmbi Nuquin Papa tabadte shubu uashunaidēn puduedtemaid isadaidpembo yuedquīn nēid shubu bēda icsa uameboed neque. Bednu. Uidēn uaic cho –quequin abimbo chiacbimboec onquecuededpondash.

²⁹ Epeso yacnoēsh choquid isadaidpembo Tēdopimo Pabado bēd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰ Aden chiac, Icsambocquid bednu, quianec titinquec cho-choshon Pabado bedshun nimanquin umanuc buanac Nuquin Papa tabadte shubu uashunaid isquidon shēcuē bētashpondash.

³¹ Aden Pabado buanec, Cuesunenu, quec cuēdcuededsho tantiashun chui-tanac

³² abi chuiquidbēd sondado cho-chosho isun Pabado cuesbededquin isadaidbon ēmpondash.

³³ Adec choshon sondado chuiquidēn bedtan cac Pabado bedshun shocosh bucun mētanemepondash. Aden mētanemiash: –¿Tsutsi nēid nepec? ¿Atotsi icsamboen naosh? –quepondash sondado chuiquid.

³⁴ Adoaguien iccuededquid utsi-utsitsēccuien chiec onquecuedednubi utsi-utsitsēccuien utsi uain chiec cuēdcuededpondash. Adec dadpen cuēdcuededsho: –Tantiatiapibi ye. Quēnēn nauedmenu. Buanec nid –quepondash sondado chuiquid sondado chiec.

³⁵ Aden Pabado buanec nidec nauedte shubun dectatonobi cuēdcuededquidon tsucusuededtsēccuien Pabado bednuesho isun Pabado abuc cadoanquin sondadon buampondash.

³⁶ Aden cadoanquin buansho isash cuēdcuededquido: –Aidien cuesunetiad –quepondash sondado chuiquid chiec.

Ambi nabanaid iccuededquido Pabadon chiaid

³⁷ Adec abi buanec shubun puduedtsenubi Pabado: —¿Ada ëbi onquesho tantiatsia? —quepondash Quidieco matsesën onqueten Pabado sondado chuiquid chiech.

Adoaquien: —¿Quidieco matsesën onqueten onquequidta mibi ne?

³⁸ Chuiquid dapa icnuequin Equipito yacnocquid matses dadpen cuëte nibëdacno buanaccondaidiën nechitec, qeshun mibi bedombi.

³⁹ Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰ Adoaquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquoio tabad, quequin ismequin Pabadon mëdante uic-uiccapondash. Aden nasho isash isadaidbo otacquoio tantiec tabadsho isash: —Ebedeyon, nuquin onqueten mibi chuinu —quec naded Pabado onquedopondash:

22

¹ —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

² Adec aton onqueten Pabado onquesho tantiash isadaidbo otacquoio tantiec tabadpondash.

³ Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquoio tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantiaquid Camadiedën nuquin tsusedpabon naden nata quequin chiaid tantiaquid. Aidon naden nata quequin chiaid tantiaquin adomboembidi nadeniombi mibitedishun nacpadembi.

⁴ Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chido chedo bedmeshun mëyamequin quënën nauedmeshun unës uamepondambi.

⁵ Ëmbi adobanquin naondaïd tsusio dapatedishun tantiec. Adondash, quequin chuitiadquoio icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

⁶ “Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiabimboec chënquequin dëcatepondashi.

⁷ Adec chënquequin dëcatiac nidaïdën paëdshun naded abucuësh onquesho tantiaquidambi. ‘¿Atotsieshun ëbi mëyane, Saudó? Ëbi chui. Tantiu,’ capondashi.

⁸ “Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaïd mimbi mëyanaid Esus nebi,’ capondashi.

⁹ “Adnubic ëbëd icquidon shocosh bed-bedquiabimboec chënquesho isequi con Icbon chuisho tantienquoio yec tabadpondash.

¹⁰ “Aden dëcatiac uequin ëmbentsëqui tantiec: ‘¿Atotsimbi nape, Icbó?’ quepondabi.

“Adoaquien: ‘Nidtoash Damasco yacno nidtan. Anoshon ëmbi nata quequin chiaïd utsin mibi chiendac,’ capondashi Nuquin Icbon.

¹¹ Adoaquini nidtoquin shocosh bed-bedquiabimboec chënquequidën bëshuacsho isun ëbëd icquidon mëdananquin Damasco yacno buampondashi.

12 “Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquio icsho isadaidbo utsibon bëdamboen isaidquio icpondash.

13 Èbi yacno choshon aidën: ‘Saudo, abuc is,’ cac cuedoquimbi Ananias ispondambi.

14 “Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismendac. Aidën chuisho mimbi tantiendac.

15 Aden aid isquin tantiashun utsi-utsien dadpen mimbi isaidbëdta mimbi tantiaid mimbi chuibenendac,’ quequin

16 chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpauuna. mibi paucacbimboen utsibo ismenuen acten mentometa,’ capondashi Ananiasën.

17 “Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacbimboec tsadpondabi.

18 Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho tantienquiocquid yec nëmbocquido mibi cuesunete buntsiashe. Edusaden yacnoësh badedquio nidan, quequin Nuquin Icbon chuipondashi.

19 “Adoaquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi.

20 Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icho chiec.

21 “Adoaquini Nuquin Icbon: ‘Isadaidpembo yacno mibi nidmembique. Nidan,’ capondash –quepondash Pabado ambi nabanaid iccuededquido chiec.

Pabado cuestsenaid

22 Pabadon ambi nabanaid chuibansho tantiec iccuededquido otacquo tabadboed, Isadaidpembo, quec Pabado onquesho tantiash: –Tantiatiapibi. Adec onquequid isadaidbo utsibëd tabadenquio ictiadquidi nec. Aid unës uata –quec cuëdcuededpondash iccuededquido.

23 Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabadon chuiboed tantiatemaid nec, quequin ismequin.

24 Adnubien, Cuesunushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuimenuen comapenen paëmbocnoc cuesta, quequin sondado chuiquidën chuipondash.

25 Adoaquien cueste nidtsinacno Pabado buanshun cuestebëdta tanenuen podon bedshun shoyonaqui Pabado: –¿Atotsi canumbini shoyonquin nai? ¿Domanobon nidaidënshun tishaid icsho ëmbi naid chuimiabida ëbi cuese? –quepondash Pabado sondado chuiquid chiec.

26 Adsho tantiash sondado chuiquid puduanec nidec abi chuiquid comandante caid yacno choash: –¿Atotsi natseno? Bëboed: “Domanobon nidaidënshun tishaid nebi,” quiosh –quepondash sondado chuiquid comandante chiec.

²⁷ Adoaquien Pabado yacno nidshun comandanten: —¿Domanobon nidaidēnshun tishaidta mibi nepe? —capondash Pabado chuiquin.

Adoaquien: —Ai, domanobon nidaidēnshun tishaidquio nebi — quepondash Pabado.

²⁸ Adoaquien: —Domanobon nidaidēnshun tishaidpenquio ēbi icsho, ¿ada adquid ēbi icmetsia? quequin piucquid meniondambi —quepondash comandante Pabado chiec.

Adoaquien: —Con tan tishaid yec domanobo nebi —quepondash Pabado comandante chiec.

²⁹ Aden Pabadon chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucun mētanemechitombi, quequin tantiec comandante dacuēdpondash.

Isadaidbo tsusiobo iccuededacno Pabado buanaid

³⁰ Adshumbic, badiadshun ambi mētanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nēid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nēnantanquio Pabado nidtomepondash.

23

¹ Aden nidtomaquien isadaidbo tsusiouidi comapenen isec: —Utsibo, ēmbi naid chuibanu. Tantiata. Nuquin Papan isnubi ambi naden nata quequin chiaid nabanquidquio icteniobi —quepondash Pabado.

² Aden chuisho tantiashun: —Muaquin chieque. Ēccues —Isadaidbo tsusio dapan Ananiasēn cac Pabadon dayunquio icquidēn Pabado ēccuespondash.

³ Aden ēccuesaquien Pabado: —Mibi icsaid nibēdacbimboec mibibi tsadsho Nuquin Papan mibi ēccuesmendac. Nuquin Papan naden nata quequin chiaid nantiēmbi, quequimbi ēbi ēccuesmequin Nuquin Papan chiaid ma mimbi ntiapaboc —quepondash Pabado isadaidbo tsusio dapa caic.

⁴ Aden Pabadon chuisho tantiash aton dayunquiocquidquio: —¿Aden Nuquin Papan isadaidbo tsusio dapa icta caid chiash dacuēdenquioda ique? —quepondash.

⁵ Adoaquien: —Ēmbi chuiboed Nuquin Papan isadaidbo tsusio dapa icta caid nec, quequin tantiambocombi. Aidi Nuquin Papan isadaidbo tsusio dapa icta caidquio icsho ēmbi chuibocpaden chienquio ictsenombi. Mimbi abimbo chioc. Ēmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

⁶ Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ēbibi padiseyobon tishmiaid nebi. Adquid yec, Unēsash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ēbi mimbi chiec —quepondash Pabado iccuededquido caic.

⁷ Aden Pabadon chiaquien saduseyobo, Uincuenta nibēdendac, quequin ēmbi tantiapaden Pabadon tantienquio iquec, quec comapenec onquecuednubi padiseyobo, Uincuenta iquendac, quequin ēmbi tantiapaden Pabadon tantiec, quec comapenec onquecuededpondash.

⁸ Unēsash uincuentequid nibēdec, quec saduseyobo. Adecbidi, Nuquin Papan uaid mayan bēdabēd ambi uaid utsi mayan nibēdec, queoaic saduseyobo. Padiseyoboen, Uincuentequid iquec, quec. Adecbidi Nuquin Papan uaid mayan bēda, ambi uaid utsi mayambidi iquec, queoaic.

⁹ Aden ambi tantiapaden chuibanec comapenec onquec saduseyobobēd padiseyobo natiambo cuēdcuededpondash. Adec onquec cuēdcuedednubi

padiseyobo, Nèid dada bédambocquid nec. ¿Mayanèn chioshi, queshodambi muc nec capadi? Adecbidi, ¿Nuquin Papan uaid mayan bédan chioshi, queshodambi muc nec caopadi? Padenquo iquemi. Pabaton chuiboed abimbo iquec, quepondash padiseyobo saduseyobo caic.

¹⁰ Adec comapenec onquec natiambo chushcanansho tantianshun comandanten: —Podon shoyonquin canite dèchicnushe qeshun mènchicshun shubu nuntan bèoata —cac sondadon Pabado mènchicpondash.

¹¹ Aden mènchicshun shubu nuntan sondadon yuedaquien Pabado ushash badiadash padpidec inchèshèn Pabado ushnubi Nuquin Icho chopondash: —Mimbi Edusaden yacnoshon èbi chuibanacpaden shubu dadpen icquid Doma caid yacnoshontsen mibi chuibamembique. Dacuèdenquo yec dayacquo icta —capondash Nuquin Icho Pabado chuiquin.

Pabado cuesunenu quequin ompoquin cainaid

¹²⁻¹³ Adec Pabado béd Nuquin Icho onquebombien badiadash isadaidbo 40ted Pabado cuesuniabi icquin buna mèmunembi, quequin abimbo chiemi, quepondash.

¹⁴ Aden nanu quiash isadaidbo tsusiobo yacno nidash: —Pabado cuesuniabi icquin buna mèmunembi, quequin muenquiocquin chuibanombi.

¹⁵ Èbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabaton naid bédamboen tantianuna. ¿Ada padpiden isadaidbo tsusiobo iccuedede shubuno bèmeoatsia? quequin chuitan Pabado bèmeoatsiashe. Aden Pabado sondadon bèsho Pabado cuesunenuna —quepondash Pabado cuesunenuquido isadaidbo tsusiobo caic.

¹⁶ Aden aidon chuishobien Pabaton piaquèn tantianshun Pabado yacno nidshun chuiopondash aton piaquèn.

¹⁷ Adoquien Pabaton sondado 100ted chuiquid cho, cata cac nidshun aton piaquèn chiac Pabado yacno sondado chuiquid chopondash. Adec chosho isun: —Nèid con piac nec. Aidi comandante chuite buneque. Aid yacno buanta —Pabaton cac

¹⁸ buampondash.

Aden Pabaton piac comandante yacno buanash sondado 100ted chuiquid: —Quènèn nauedboed Pabado cuèmèdquidèn èbi chomeshun: “Con piac comandante chuite buneque. Aid yacno buanta,” cac bèombi —quepondash sondado 100ted chuiquid comandante chiec.

¹⁹ Aden chiaquien Pabaton piac mèdinanquin udictsèc buanash comandante: —¿Atotsi èbi chuinuec cho? —quepondash comandante.

²⁰ Adoquien Pabaton piac: —Badiadshun isadaidbon ambi namiaid mibi yacno chomec. Aden chomiac nèmo choshon naden chiec: “¿Ada isadaidbo tsusiobo iccuedede shubuno Pabado mimbi bèoapatsia? Aidèn naid chuibansho bédamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid.

²¹ Isadaidbon muaquin chiendac. Con cu Pabado buamenuen mibi aden chiendac. Comandanten Pabado bèmetsiashe, quequin tantiaquin Pabado con cu cuesunenuquin caineque. Nidmenda. Con cu cuesunenuquid: “Pabado cuesuniabi icquin buna mèmunembi,” quiosh. Con cu cuesunenuen nèbimbobi podqued cuèmanshun ompodshon cainec —quepondash Pabaton piac comandante chiec.

²² Adoquien comandanten: —Isadaidbon chiaid mimbi chuiboed utsi chienquo yec nidec nid —capondash Pabaton piac chuiquin.

²³ Aden Pabaton piac nidmeshun sondado 100ted icquido chuiquid daèd chomiashe comandante nadpondash: —Ènden inchèshan Sesadeya yacno

ma mibēdi mimbi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuiyoata. Adomboembidi shocosh sianten senuequin sananquid 200fed icquido chuiquin mitsana nacnenta, quequin chuiyoata.

²⁴ Adembidi Pabadohēd icquido cobednadod Pediques yacno buanun cabayo nacnenta –capondash comandanten sondado 100ted chuiquid daēd chuiquin.

²⁵ Aden chuishumbic naden comandanten dada uapondash Pediques cobednadod caid chuiquin:

²⁶ “Quēdaudio Disias nebi. Chuiquid dapa cobednadod caid, Pediques, mibi bēdambocquid icsho chuinu. Pabado ěmbi bedboed mibi yacno buamenuen dada uaimbique. ěmbi dada uaid isec onqueta.

²⁷ Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiashun sondado dadpembēd choquin mēnchiccombi.

²⁸ Aden mēnchicshumbic, ĩAtotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi.

²⁹ Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabado chuiho tantiashun quēnēn nauedenquioctiadquidi nauedmepondash, quequin tantiashumbi quēnēn nauedmeopombi.

³⁰ Aden Pabado quēnēn nauedmeoashumbic, Podqued cuēmanshun Pabado cuesunenuquin isadaidbon cainec, quesho tantiashun badedquio mibi yacno buamiombi. Adembidi, Pabado icsambocquid nec, quequin aid cuesunenuquido mibi yacno nidmēmbi. Adoac ma ambibi Pabado naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: –Pabadohēda nēid cobednadod Pediques menenuen buanta –capondash comandanten.

³¹ Aden comandanten dada uashun meniac aidēn chiacpaden Pabado buanec sondado aid inchēshēmbi shubu dadpen icquid Antipatidis caid yacno chopondash.

³² Ambo choash badiadshun sondado cabayo catsadquidonuidquio Pabado buanec nidnubi sondado utsitedi aubidi nidaneoapondash.

³³ Adec Pabado buanec nidequi Sesadeya yacno choshon abi chuiquid comandanten Quēdaudio Disiasēn dada uaidbēda Pabado Pediques menepondash cabayo catsadquidon.

³⁴ Aden meniaquien dada uaid isbanash: –ĩMitsicquid nidaidēn icquid mibi ne? –capondash Pediquesēn Pabado chuimenuen.

Adoquien Pabado: –Nidaid Sidisia caid yacnoshon tishaid nebi –quepondash.

³⁵ Adoquien: –Mibi icsambocquid nec, quequin chuiquido isadaidbo choacsho mimbi nabanaid chuimēmbi –quepondash Pediques Pabado chiec. Aden chiec onqueshumbic ěnden chuiquid dapa Edodes cuēmēdquidēn, utsibo abi chushquiaid chuimiondaid shubuno Pediquesēn buamiac ashunquio Pabado nauedsho isun: –Puduenanec cuenushe ista –capondash sondado chuiquin.

¹ Adashic, 5tedec ushash isadaidbo tsusio dapa Ananiasbēd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuēmēdquid bēquin.

² Aido chosho isun Pediquesēn Pabado chomiacsho isun isadaidbo tsusiobon tantiacpaden chuinuequidēn Tedtudon naden Pediques chuipondash: —Mibi chuinu. Tantia. Chuiquid bēdamboquid icquin mimbi bēdamboen nabanac isadaidbo bēdamboec tabadec.

³ Mimi aden nabansho isun, Bēdamboquid mibi nec, quequin mibi chiemi.

⁴ Aden chuishun mibi chieshmenquiocnuequin isadaidbon chushcaboed badedquio chuinu. Tantiata.

⁵ “Nēid mimbi bēmeboed Pabado caidbēd ictiapimbo iquebi. Nēid Nasaded yacno iccondaid tantiaquido tsusio nec. Aidēmbi nidaidtedi yacno nidshun ambi tantiaid chuibanquin isadaidbo comapenen chushcamequin cuēdcuededmiac cuēshēd-cuēshēdposh.

⁶ Aidēmbi Nuquin Papa tabadte shubu uashunaidēn puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi.

⁷ Aden cuidnu quenubien comandante Disias cuēmēdquid choshon Pabado mēnchicanquin buamposh.

⁸ Pabado ambi naid chuisho mimbibi tantiaishun, Isadaidbo tsusiobon abimbo chiosh. Icsambocquid nec, quequin mimbi chuioapatsiac — quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

⁹ Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

¹⁰ Adsho tantiaishun, Onqueta, quequin mēdante uiccaquin Pediquesēn ismiac Pabado nadec onquepondash: —Chuiquid dapan tantiaata. Ēmbitsen chuinu. Dadpen seta matamequin con matses isadaidbo abi chushquiaid tantiaishun mimbi bēdamboen tantiacpaden namedenioc. Adquid mibi nec, quequin tantiaquin, Ēmbi naid chuibanec bēdambo iquebi, quec dacuēdenquio yec onquebique. Tantiata.

¹¹ Edusaden yacno choash ambobi 12tedec ushobi. Ēbi anoshon isboedon, Abimbo iquec, quequin nēmo choshon mibi chuitsiash. Edusaden yacno choash Nuquin Papa shubu uashunaidēn puduedec Nuquin Papa tantianuec choapobi.

¹² Ambo puduedash utsibēd chushcananenquio yec tabadsho istuidash, Icsambocquid nec, queposh. Adembidi chuibanquin utsibo nēishmequin chushcamenquio iccomb. Pabado icsambocquid nec, quequido Pabado chiaid abimbo iquec, quetiadquidi nec.

¹³ Ēmbi naid Tedtudon chuibamboed, Abimbo iquec, quetiapimbo iquec tsusiobo.

¹⁴ Nēiduidtsēqui abimbo iqueque. Chuinu. Tantia. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquio nebi.

¹⁵ Adembidi, matses unēsacsho Nuquin Papan uincuemiac abi tantiaquid abēdi tabadnubi abi tantiesa chian anēdēnquequid nēsecaindac, quequin tantiemi isadaidbo tsusiobon tantiacpadembi.

¹⁶ Aden tantiaquin Nuquin Papan, Bēdamboen mimbi naoc, capashuni, quequin bēdamboen nabanec tabadec nebi. Adembidi, matsestedishun,

Bëdamboen mimbi naoc, capashuni, quequin adomboembidi bëdamboen nabanec tabadec nebi.

¹⁷ “Adequi nidaid utsi-utsiec yacno capucuenec tabadcuenequin, Edu-saden yacnocquid isadaidbo bunec tabadec, qesho tantiash piucquid menenuc choapobi. Adembidi, Nuquin Papan bëdamboen dayun uabeni-shi, quequin piucquid menenuc choapobi.

¹⁸ Aden menenuc abi tabadte shubu uashunaidën puduedash ëbentsëqui capusho ëbi chushcaboedon istuidposhi. Bëdamboec tabadsho istuidposhi.

¹⁹ Ëbi capusho istuidquido isadaidbo nidaid Asia caid yacnoësh choquido niosh. Aido, Pabado icsamboec tabadsho isombi, quepac caosh. Ambi chiaid abimbo icnuc nëshuntsen adomboembidi chuitiadquidi nec.

²⁰ Adembidi isadaidbo tsusiobon: ‘Padiseyobo yec bëdambocquid nec,’ quequin ëbi anoshon chiacpadembidi nëshuntsen adomboembidi chuioti-adquidi nechitec.

²¹ Anoshon nëiduidtsëqui chiec comapenec cuëdobi: ‘Unësash uincuentequid iquec,’ quequin chuisho tantiashun, Icsambocquid nec, quequin isadaidbo tsusiobon ëbi mibi chiec caimbi —quepondash Pabado Pediques chiec.

²² Aden Pabadon chuisho tantiash Pediques tantiauidquid iquec: —Nëbi mimbi aitededquio chuibansho tantiembi. Comandante Disias nëmbo choan mibi padpiden chuimembi —quepondash Pediques Pabado chiec.

²³ Aden chuishumbic naden Pediquesën sondado chuipondash: —Shubuno Pabado buanshun puduednushë qeshun ista. Abi menenucquid abi isnuequid chedo chosho isun yuedta —quepondash Pediques ambi Pabado ista caid chiec.

²⁴ Adashic, daëdpactsëc ushash Pediquesbëd aton chido, Dusidia cuëmëdquid chopondash. Aton chido isadaidbo icpondash. Adec aton chidobëdi choshon abi yacno Pediquesën bëmiacsho ambi tantiaid Esuquidistu Pabadon chuibanac Pediquesën tantiauidpondash.

²⁵ Aden chuibanquin Pediques Pabadon nadopondash: Utsin abi utsibëd chushcananaid chuibanacsho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuiopondash Pabadon. Adembidi, Esuquidistu tantienquio icsho chian anëdënquequid Nuquin Papan nësecanushe quequin Esuquidistu tantiata, quequin Pabadon chuiopondash. Aden Pabadon chuisho tantiash: —Padi. Ëmbi naid nibëdsho isun padpiden chuimenuen mibi bëmeoaimbique. Nëbi nidec nid —cac Pabado nidpondash.

²⁶ Adshumbic, adembidi abi yacno Pabado Pediquesën bëmeded-bëmededpondash. Nidtiadquio icquin piucquid Pabadon ëbi menetsiash, quequin tantiaquin Pabado bëmiash aibëd Pediques onquepondash.

²⁷ Adashic, seta daëd matamiash Podsiho Pesto cuëmëdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesën Pabado shubu nuntan niampondash naden tantiaquin: Pabado shubun nauedshun ëmbi niansho isash, Bëdambocquid nec, quequin isadaidbon ëbi cain chuibededpec, quequin Pediquesën Pabado shubun nauedshun niampondash.

25

Pabadon ambi naid Peston chuimiaid

¹ Pesto cobednadod yanash Sesadeya yacno choash 3tedec ushanec Edu-saden yacno nidpondash.

² Adec Pesto Edusaden yacno choash tabadsho isadaidbo tsusiobo, Pabado chushcaquido:

³ —¿Ëbitedi bēdambo icmenuequin Pabado Edusaden yacno ada bēmeoatsia? —quepondash Pesto chiec. Pabado bēsho cuesunenuequidon cainshun cuesunepc, quequin tantiaquin isadaidbo tsusiobon aden Pesto chuipondash.

⁴ Aden chuisho tantiaash Pesto: —Sesadeya yacnoshon nauedaid Pabado iquec. Ambo nidebi.

⁵ Pabadon icsamboen naosh, quec utsi-utsiec ëbēdi nidshun anoshon Pabadon naid icsa ëbi chuita —quepondash isadaidbo tsusiobo caic.

⁶ Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bēmepondash isadaidbo tabadnubi.

⁷ Aden bēmiacsho isash Pabado dēcatec isadaidbo Edusaden yacnoësh chobedo Pabadon naid chiec abimbo chiacbimboec onquecuededpondash.

⁸ Aden isadaidbon chiaquien: —Ëmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobēd puduedambocobi. Adembidi, empedadod Doma yacno tabadquid, Sesad cuēmēdquidēn chiaid niacamboccombi —quepondash Pabado.

⁹ Adoaquien: —¿Edusaden yacno buanac anoshon adomboembidida isadaidbo tsusiobo chuiotsia? —quepondash Pesto Pabado chiec. ¿Edusaden yacno Pabado ada bēmeoatsia? quequin isadaidbon chiacpaden nanuec Pesto adpondash.

¹⁰ Adoaquien Pabado: —Domanobo ancaquidēn empedadod caidēn, Sesad cuēmēdquidēn, Mibi yacnocquido bēdamboen tabadmequid icta, caid icquin mimbiombo chushcananquid bēdamboen tabadmeta. Isadaidbo icsamboen tantiaquin nainquioccombi. Abimbo Pabadon chiec, quequin mimbi tantiec.

¹¹ Icsambocquidquio iquec Pabado unēs uame, qesho tantiaash, Adoanenda, quenuioctsiabi. Isadaidbon abimbo chiacbimboen chuisho tantiaash, Pabado buanshun cuidta, quetiapimbo mibi iquec. Isadaidbo yacno buanta, mibi quenuec, Empedadod ëmbi naid chuite bunebi, quequin dada uaindambi —quepondash Pabado Pesto chiec.

¹² Aden Pabadon chuisho tantiaash Pesto udictsēc nidash abipadquidbēd onquiash choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

¿Atotsimbi Pabado napatsia? quequin Peston Aquidipa caid

¹³ Adashic daēdpacksēc ushash ancanquid utsi Aquidipa cuēmēdquidbēd aton chuchu Bedenise cuēmēdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash.

¹⁴ Adec isedec choash dadpen ushec tabadsho isash Pabado chiec Pesto nadpondash: —Pediquesēn quēnēn nauedmiaid Pabado cuēmēdquid chuinu. Tantiata. Aidi abi iquec shubu nuntan.

¹⁵ Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unēs uata, quequin isadaidbo tsusiobon chuiposhi.

¹⁶ “Adoaquien, Mibi abēdi chushquiaid Pabadontsen chiambocnoc unēs uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi.

¹⁷ Aden chiac nēmbō choshon abi chushquiaid aidon chuisho tantiec tsadnuen Pabado bēmiombi.

¹⁸ Aden Pabado bëmiacsho ëmbi tantiacpaden abi chushcaquidon Pabadon naid chienquiocposh.

¹⁹ Ëmbi tantiaidpenquo Esuquidistu unësash uincuenaid Pabadon tantiaid icsambo iquec, quequin chuiposhi isadaidbo tsusiobon.

²⁰ Aden ambi tantiaidquio bëdamboen tantienquo yec nadpobi Pabado caic. Min matsesën naden nata quequin chiaid tantienquo iquembique. Edusaden yacno buamiac mimbi naid anoshon chiac bëdambo ictsiash, quequin chiombi.

²¹ Adoaquien: ‘Empedadod, Sesad yacno nidshun ëmbi naid chuitiadquio iquebi,’ queposh Pabado. Aden chiac quënë yacnoshon aid puduedmeti-apimbo iccobi. Nëmbobi Pabado quënën tabadec —quepondash Pesto Pabado chiec Aquidipa tantiamenuquin.

²² Adoaquien Aquidipa: —Ëbi aidën chuibansho tantiate bunebi —quepondash.

Adoaquien Pesto: —Badiadshun aidëmbi chuisho mimbi tantiendac —quepondash.

Aquidipa ambi naid Pabadon chiaid

²³ Aden Peston chiaquien badiadash bëdaidquio dasiuidash Aquidipabëd aton chuchu choash iccuededte quënën puduedash sondado chuiquido chuiquid utsibobëd aid daëdi tabadpondash. Aido tabadsho isun Peston Pabado bëmepondash.

²⁴ Bëmiac Pabado nënantanquo nidtonobi Pesto nadpondash: —Ancanquid Aquidipan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chiochi. Ëbi Edusaden yacno choacsho isun adoposh. Adomboem-bidi nëshun Sesadeya yacnoshontsen aidombidi chuioposhi.

²⁵ Aden chuisho tantiaishun nëid ambi naid chuimeoapombi. Aden Pabadon chiaidtsen tantiaishun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabadon chuiposhi. Adoac Doma yacno aidi buamenuna.

²⁶ Aden buamenuen çatotsimbi dada uaqin empedadod chuiplatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiaishun, Naden dada uata, mimbi cac dada uatsiambi.

²⁷ Ambi icsamboen naid nibëdnuc Doma yacno buametiapimbo iquebi —quepondash Pesto ancanquid Aquidipabëd iccuededquido chiec.

26

¹ Aden Peston chiaquien: —Mibibi onquequin mimbi naid chui. Tantienu —quepondash Aquidipa Pabado caic.

² Adoaquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi.

³ Isadaidbon naden nata quequin chiaidbëdta abi onquiaid mimbi tantiec. Aden tantiaquid mibi icsho ëmbi nabanaid ëmbi chuibansho tantiata. Chuinu.

⁴ “Ëbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi.

⁵ Ëbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec.

⁶ Unēsash uincuenta iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ēbi icsho isash, Icsambocquid nec, quec isadaidbo.

⁷ Nuquin tsusedpa Acobo isadaid caidēn madobon tsyuecquidon, Unēsascho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon.

⁸ Nuquin Papan nadatiambocquin uincuemete chiaid mimbi tantienquo icpe.

⁹ “Ēnden ěmbitsen tantiauidquin shubu dadpen icquid Nasaded yacno ictened, Esus cuēmēdquid tantiaquid icsambocquid nec, quequin unēs uamembi, qeshun adobampondambi.

¹⁰ Edusaden yacnoshon adquid dadpen mēyamepondambi. Isadaidbo tsusiobon, Adota, cac ěmbibi Esus tantiaquid bēdamocquid icsho bedshun quēnēn nauedmepondambi. Unēs uanu, qesho tantiash, Ai, unēs uatiadquo iqueque. Adota, quepondabi.

¹¹ Nuquin Papan chiaid chuibante shubu utsi-utsiec yacno nidted-nidtedondabi aido mēyamenuc. Esus, Nuquin Papan madopenquo nec, aido camenuen mēyamepondambi. Adembidi nidaid utsi yacnoshontsen adquid istuidshun mēyameoapondambi.

¹² “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi.

¹³ Adec nidquimbi ushē cuembo yanec ushē comapenec chēnquequidēn ěbēd icquidobēda ēbi dēcatesho isondambi. Abimbo iquec, quequin mibi chinu. Ancanquid dapan tantiata.

¹⁴ Aidēn dēcatiac ěbitedi nidaidēn uebudcuededondabi. Adec uequimbi con matsesēn onqueten ebedeyon onqueten abucuēsh onqesho naden tantiondambi: Saudo, ¿atotsieshun ēbi tantiaquido mimbi mēyampe? Ēbitsen mēyantiadpambocquin mimbi aido mēyanec, quec onquequin chiondashi.

¹⁵ “Adoaquimbi: ‘¿Tsutsi mibi ne, Icho?’ caondac.

“Adoaquien, Mimbi mēyanaid Esus nebi.

¹⁶ Ēmbi namiaid mibi icmenuc chobi. Esus isombi, quequin ¿ēbi chuibeneta caid nēbi mibi yanec? Ēbi chuibenequin mimbi isaidbēda ěmbi yuecshun ismetequid chuibeneta.

¹⁷ Aden ēbi chuisho mibi cuesunete bunquid isadaidbobēd Isadaidpembo icsho mibi mēnchiquendambi. Adquid chuibanta, quequin mibi nidmembi.

¹⁸ Aden chuibanac utsin-utsinquien pashuac bimboe boedēmbi tantien-dac. Icsambocquid nebi, quequin tantienquico boedi, Icsaobique. Ēbi pauc, Papa, quependac adquid. Mayan icsan yua icboedi Nuquin Papan bacuē iquendac. Adquid yanash abi icsaid paucac Nuquin Papan bēdambo icmiaid ēbi tantiaquid utsibēd iquendac, quequin Esusēn chuipondashi.

¹⁹ “Aid abucuēsh onqesho tantiashun chieshenquicoquin chuibenimbi caimbi, mibi chuiquin Aquidipa.

²⁰ Damasco yacnoshomba chuibanondambi. Anoshomba chuiban-shumbic Edusaden yacnoshontsen chuibanooandambi. Anoshon chuiban-shumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ēnquin Nuquin Papa abimbo tantiaquin ambi chiacpaden nabanta, quequin chiombi.

²¹ Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi.

22 Padnuen ëbi dayun uaquid Nuquin Papa icquin isadaidbon cuesunenushe queshun cudasëmposhi. Adoac nëid ushënquoio mibëdtabi mimbi namiaido mibi chuibanec nebi, ancanquid Aquidipa. Moisesën, Nadquoio iquendac, quequin dada uampicpaden chuiquid nebi. Nuquin Papan chuimiaid utsibon, Nadquoio iquendac, quequin chiampicpaden chuiquid-bidi nebi. Aidon chuipampid nadquoio iqueque. Tantia.

23 Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chiendac, quequin chiampicpadec chopanëdash –quepondash Pabado iccuededquido chieç.

24 Adec Pabado onquesho tantiaş: –Min tantiate icsabudash mibi onquec. Mimbi tantiaid dadpen iquec tantienquoio yec onquechitequien mibi nec –quepondash Pesto Pabado caic.

25 Adoaquien Pabodon: –Bëdamboen tantiec onquebi. Ëmbi chiaid abimbo iquec, caimbi mibi ancaquid Pesto.

26 Ancanquid Aquidipan ëmbi chuibamboed abimbo iquec quequin tantiec. Aden aidën tantiaşo dacuëdenquiocquin aid chiembi. Ëmbi chuibamboed ompoenquiocquin isquidon chuisho aidëmbi tantiapondash.

27 Nuquin Papan ambi naden nanun chiaid dada uamiampidon chiaid chuisho mimbi tantiec –capondash Pabodon Aquidipa chuiquin.

28 Adoaquien Aquidipa: –¿Mimbi chuiboedtedtsëqui tantiaştabi Esuquidistu tantiaquid yampe? –quepondash Aquidipa Pabado chieç.

29 Adoaquien Pabado: –Esuquidistu tantiaquid ëbipadquid mibëd iccuededquidtedibi Nuquin Papan icmepaşun. Nëid ushënquoio daëdpectsëc chiombi. Aidtedtsëqui chiac tantiatiapimboçşo isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquicpanuna –quepondash Pabado.

30 Aden Pabodon chuibanaquien ancanquid Aquidipa nidtopondash. Nidtoşo isaş Pestobëd Bedenise iccuededquid utsibo chedo nidtocuededpondash.

31 Adec nidtocuededash puduenaş onquecuededec: –Chuibamboed ic-samboen nainquiocçşo. Adoenquiocçşo unës uainquioctiad. Adembidid ënden quënën nauedenquicpatecnëdan –quepondash ancanquido.

32 Aden chiaş: –Empedadod chuite bunebi Pabado quiambocçşo quënën nauedacnoshon aidi mimbi nidmetsenosh –quepondash Aquidipa Pesto chieç.

27

Doma yacno Pabado buanaid

1 Adashic, Nëbi mëtaniaido nidaid Itadia caid yacno buanac bëdambo iqueque. Pabadobëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash.

2 Ucen buanta cac Pabadobëdta utsibo bedshun acte cuëmano buanshun cano dapa Adadamitio cain cuënaid istuidpondash. Aid cano dapa istuidashien, Içbo, nidaid Asia caid cuëman shubu dadpen icquid utsi-utsieç yacno nidtuidebi, quequin chuisho tantiaş Pabadobëd antabëdtopondabi. Adec antabëdtoşo isaş puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoëş choquid icpondash.

³ Adec cano antabēdtoanec nidquin shubu dadpen icquid Sidon caid yacno buampondash. Ambo choash, Mitsana nibēdeque. Mibi yuedquid yacno nid. Aidon mibi menetsiash, quequin Pabado bēdamboen tantiaquin sondado chuiquidēn, Udion, chuipondash.

⁴ Adshumbic Sidon caid yacnoēsh puduanec nidquin potesho cunquequidēn bēquedtuīdac ushē choacmi cuenadtanquin acte nēnantan nidaid nacrēdquid Chipide caid datampondash.

⁵ Adembi nidaid Sidisia caid ēquē datanash nidaid Pampidia caid ēquētsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash.

⁶ Ambo choshombic sondado chuiquidēn cano utsin nidnuequin nibēnquin istuidpondash. Nidaid Equipito caid yacno shubu dadpen icquid Ade-candedia caid yacnoēsh choboedi nidaid Itadia caid yacno buanu caid istuidpondash. Aden aid istuidshun Pabadobēd icquido aid canontsen antabēdtomepondash.

⁷ Adec Mida yacnoēsh puduanash nidquin potec dadpen ushacsho cunquequidēn cano bēquedtuīdpondash. Aden bēquedac bēdiactsēc nidquimbi shubu dadpen icquid Nido caid ēquēbitsen datambidanec acte nēnantan nidaid nacrēdquid Quideta caid yacno buanoapondash. Uquē cuēma utsiuc Sadmon caid icpondash.

⁸ Ushē choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsēc shubu dadpen icquid Dasia caid iccondash.

⁹ Cunquequidēn bēquedac yuenquo potiactanetsēcquien buampondash. Comapeñec cunquequidēn nuqui bēquedendac, quequin tantiaquin Pabadon nadopondash:

¹⁰ —Chuinu. Tantiata. Nēuēshquio puduanquin potesho cunquequid dapan bēquedshun cano chic-chictsiash. Acten mentoadmane quequin potenquo iquembi, quequin chuita —capondash Pabadon sondado chuiquid chuiquin.

¹¹ Aden Pabadon chiaqui sondado chuiquidēn niacbidanquin cano icbobēdtan cano nidmequidēn nidnu quequin chiaid tantiapondash.

¹² Cunquequid dapa cunquenubi Buenos Puedtos yacno tabadec iqnen uanquid dapanquo nuqui iqnenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

Acte dapa potesho cunquequid dapanquo cano bēquedte

¹³ Nuqui iqnenendac, quequin tantiaquin bēdiactsēc cunquesho isun abi bunacpāden nanuequin cano uidēn uate shocosh yuēmbocquid indoash puduanquin Quideta cuēma anoentsēqui buampondash.

¹⁴ Adec nidequi udictsēc yanshobi ushē cho-choaid ēquēctšēcshun Quideta caid nidaid mananucuēsh cunquequid dapa choquin bēquedtuīdquin

¹⁵ icbon cano nidmetiapimboconobi cano buampondash.

¹⁶ Aden cunquequidēn buanaqui acte nēnantan nidaid nacrēdquid utsimpi Quēdauda caid ēquēbictšēc cuenadquimbi canompi cano dapan nēshun buanadpandash.

¹⁷ Aden canompi anandoshon cano dapa canchednushe qeshun uidēn uaqin datanebanshumbic cano buante dashcute abi dectantē cuestebēdtabi imbudshun dashcute chicacsho cunquequidēn cano comapenen buampondash.

¹⁸ Aden cano cunquequid dapan buanubi badiadnuc acte natiambo tēccoasquesho isun ambi ansandoshon bēboed acte nēsiapondash.

19 Adshumbic 3tedec ushun bucu dēnēshun cano dashcute indotetedi nēsiaoapondash.

20 Aden nēsecanec nidquimbi inchēshēn ushēbēdta uispa abu chēshēn bētīnacsho isenquo iccondambi. Adembidi badiadēn ushē isenquo iccondambi. Dadpen ushquin aighted isenquioccondambi. Aighted isenquiocnobi acte comapenen tēccoascapondash. Ad icsho isash, Bēnudchitequien nuqui iquec, abitedimbo quecuededpondash.

21 Adequi nuqui iquec, qeshun buna mēmumbededequi abitedi nidanepondabi. Adec canon nidnubi Pabado nidtoash nadpondash: — Chuinu. Tantiata. Quideta caid yacnoēsh puduanenda caombi. Adsho tantiaboshi tantienquo yec mibi puduampoc. Ēmbi chiacpaden nabanuc mimbi ansandoaidtedi abi ictsiandac. Adecbidi, Unēsebi, quenquo nuqui ictsiandac.

22 Padnuen acte tēccoasquenubi nuquitedi unēsenquo iqueque. Dacuēdenquo yec dayacquo icta. Canouidi canched-canchedendac.

23 Nuquin Papan namiaidquo nebi. Adquid icsho inchēshēn ambi uaidēn mayan bēdan ambi chomiaidēn naden chiōshi:

24 “Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibēd icquidtedi acte yacnoshon mēnchiquembique. Dacuēdenquo yec tabad,” caposhi Nuquin Papan uaid mayan bēdan.

25 Aden aidēn chiac dayacquo icta. Nuquin Papa ambi chiacpaden nabanquid nec, quequin tantiembi.

26 Adembidi, acte tēccoasquequidēn nuqui acte nēnantan nidaid nacnēdquid cuēmāno buanshun cano cancheshunendac, quequin tantiombi — quepondash Pabado canon antabēdtoaido chiec.

Cano canched-canchedaid

27 Adashic, Buenos Puedtos caid yacnoēsh ēnden nidboshi 14tedec ushec acte Adidia caid yacnoshon cunquequidēn buampondash. Aden acte tēccoasquequin buanubi inchēshpotsembo yanuc, Cuēma anoentsēquien nuqui choendac, quequin cano nidmequidon tantiapondash.

28 Aden tantiaquin, ¿Tionda iqueque? Tanu, qeshun yuēmbocquid shocosh bucu dēdectanshun pumbudquīn tampondash. Aden tanshun, Aidiompempenquo iquec, quequin chuipondash.

29 Nidaid cuēnote dapa cunquequidēn buanquin cano semenushe qeshun cano uidēn uate dapa yuēmbocquid tsitsumi tsidectanshun acte nēnequin uidēn uash ma badiadbono quīash tabadpondash.

30 Adec tabadnubi cano nidmequido cuenueshun dēbiate yacnoshontsen cano uidēn uate yuēmbocquid dēdectanuequin abimbo chiacimboen canompi anandoboed nēnetsempondash. Cano dapa mentoadtsiash, qeshun cuenuequin adopondash.

31 Adec aido nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic.

32 Aden Pabado chiacquien abi dēctante bucutedi sēnac canompi nēpaēdpondash cuenuequido nidtiapimbo yec.

33 Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsēcquin mimbi piamboccoc.

34 Mibi mentoadenquo iqueque. Min manēdaid abentsēc paēdenquo iqueque. Penquicochoedi unēschitomane quenquiocquin peta —quepondash Pabado.

³⁵ Aden chuishumbic utsitedi ismequin pan bedshun Nuquin Papa chuishun pan cuëshun Pabadon pepondash.

³⁶ Aden Pabadon pesho isun, Nuquitsen penuna, qeshun abitedishun pebededpondash.

³⁷ Cano antabêdoquido 276ted icpondash.

³⁸ Aidtedshun peshumbic, Cuêmano nidec, quequin ambi sandoaid utsitedi tiedên caniquid êshê acte nêsiapondash, Cano yuêmbo iquec, qeshun.

³⁹ Adshumbic, badiadnuc ambi isacmaid nidaid istuidpondash. Acte cuidiantanquid cuêmambi masi icsho isun ambo cano nidmenueshun

⁴⁰ uidên uaid tebanac acte nêpaêdpondash. Adembidi, cano dêbidiadmete bucutedi secudoashun cano dêbiateno buanquin dashcute shoyontanquimbi cadoapondash, Cunquequidên acte daêd naccuêscananacno buampashuni, quequin.

⁴¹ Aden cano nidmenubi cano dêbiaten masi setuidec dêchiquidiapimbo yec cano dapa dêtoquepondash. Adec dêchiadash acte têccoasquequidên cano dapa canche-canchequin tauapondash.

⁴² Adsho isash sondado, Mêtaniaidtedi cuentsiashe. Cuesunenu, qesho

⁴³ tantiash Pabado cuesunenushe qeshun: —jChên! —capondash sondado chuiquidên. Aden chuishumbic, Acten tantanec mêquiadquido tantanec nidanenubi

⁴⁴ tantantiapimbocquido cano cuësh-cuêshêdaid bedbanash noadec tantanquido tsibanec nidta, quequin chuipondash sondado chuiquidên canon antabêdoquido chuiquin. Aden ambi chiacpadquiec nidanec mentoadenquio yec abitedi nidaid yacno choash dectatocuededpondash abitedi.

28

Madta caid yacno Pabadobêd icquido choaid

¹ Adec nidaid yacno choash dectatoneshun, Nêid acte nênantan nidaid nacnêdquid Madta caid nec, qesho tantiabededpondash.

² Ambo tabadquidon abitedi bêdamboen yuedpondash. Iquen uampamboec ue sequenubi Madta caid yacno chosho isun cuête dêtsiadoshon, Cuêec cho, quequin chuipondash.

³ Adnubic Pabadontsen cuête tanunquiocquid bedtanquin tsindoquin masandopondash. Aden masandoaid nêdênquiacnoêsh puduenquin nisin Pabado mêpepondash.

⁴ Aden mêpiash êcchiquidenquio yec mêdiadsho isashien anocquido: —Nisin piaid cuesunianquid nepanui. Mentoadenquio yec actenuêsh dectatoacsho nisin piac unêschitequien iquec. Abi icsaid cuidtequidien nechitec.

⁵ Adec onquecuedednubien Pabadon comapenen uicac nisi cuête dêtsiadaoidên nêpaêdpondash. Adnubien Pabado abi bêdambo icpondash.

⁶ Aden Pabadon uicac nisi paêdsho isun Pabadon mêdante mêbidisquetsiashe. Isnu, quequin isbededpondash. Aden tantiaquin yuen cainquin mêbidisquenquiocsho isash, Nisin mêpeboed utsibon papa cain cuênaid nepanui, quecuededpondash Madta caid yacnocquido.

⁷ Madta caid yacnocquido tsusio dapan shubu aonoentsêqui icpondash. Tsusio dapa Pudio cuêmêdquid icpondash. Aidêmbi aton shubu yacno canon choaedotedi yuedshun abentsêc chotsêcnuc ushquin êbitedi bêdambo icmepondash.

⁸ Adnubien Pudion papa chumbo yec pieneac aton madon shubu nuntan uepondash. Adec Pudion papa uec qesho tantiash Pabado aid isec nidshun ashunquibi Nuquin Papa chuishumbic Pudion papa damishquin bêdamepondash Pabadon.

⁹ Pudion papa bēdanacsho isash Madta caid yacnocquido nēnquidbēd daic-said chedo cho-chopondash. Ēbitsen bēdametsiash, quiash cho-chosho aidot-sen bēdamepondash Pabadon.

¹⁰ Adosho isun canon choquido bēdamboen tabadmepondash anocquidon. Nidnuesho tantiashun menēbampondash mitsana nibēdec quequin.

Doma yacno Pabado choash tabadaid

¹¹ Adashic ushē 3ted nidmiash Madta caid yacnoēsh puduampondash. Madta caid yacno choash cano icbo, Iquenoampamboec icnuc nēmo tabad-nuna, quiash tabadash: —Nidnu. Nid —quianec aton cano antabēdtosho isun Pabadobēd icquido sondado chuiquidēn antabēdtomepondash. Aid cano shubu dadpen icquid Adecañedia caid yacnoēsh chopondash. Cano icbon papa cain cuēnaid daēd ambi tantiaidbimboecnuc cano dēdectanquin nacne-naid icpondash. Ambi papa cain cuēnaid abentsēc Castod icnuc utsi Podus icpondash. Adembidi aton cano cuēmpondash icbon.

¹² Aidēn puduanec nidequi acte nēnantan nidaid nacnēdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash.

¹³ Ambo tabadash puduanquin aid acte nēnantan nidaid nacnēdquid cuēma anoentsēqui potequi nidaid Itadia caid cuēmano choashun shubu dadpen icquid Dequo caid yacno buampondash. Ambo choash ushach badiadash puduanec nidec cano tsitsumishun cunquequidēn buanac badiad utsin shubu dadpen icquid Puteyodi caid yacno chopondash.

¹⁴ Ambo choshon Pabadobēd icquidon Esuquidistu tantiaquid abi istu-idadcsho abitedi yuedpondash. Sietetedec ushec Esuquidistu tantiaquidobēd tabadashic auēshquio puduanec podquedēn nidequi shubu dadpenquo icquid Doma caid yacno chopondash Pabadobēd icquido.

¹⁵ Podqued Apio caidēn choec, quequin chuituidac Esuquidistu tantiaquid Doma yacnocquid utsi-utsiec Pabado bēquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsēc chotsec quequin cuēnaid yacnocquido Pabado bēquedoac nidaneoapondash. Aido cho-chosho isashien, Ēbi dayacquo icmenuen nēdtedi mimbi chomioc, Papa, quec dayacquo iquebi, quiampondash Pabado.

¹⁶ Adec aido bēquedec choash aubidi nidec Pabadobēd Doma yacno choapondash. Doma yacno choacshobien Pabado quēnēn nauedenquioc-quin shubun tabadmepondash sondado abentsēcshun abēd tabadquin is-nubi.

Doma yacnoshon Pabadon Esuquidistu chuibante

¹⁷ Adec aton shubun tabadec 3tedec ushun isadaidbo tsusiobo chuine-uequin, Aido chome, capondash. Aido chomiachsho isun Pabadon nado-pondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo ic-combi. Adoenquiocshobi Edusaden yacnoshon nuquin matsesēn bedshun domanobo chuiquid meniondashi.

¹⁸ Aden meniac domanobo chuiquidēn, Mimbi naid chuiban, cac chuibanondambi. Aden chuibansho tantiash, Unēs uainquioctiadquidi mimbi naic, quepondash domanobo chuiquid ēbi caic.

¹⁹ Aden domanobo chuiquidēn tantianubi nuquin matses tsusiobon, Unēs uatiad, quequin chiac, Empedadod, Sesad yacno nidshun ēmbi naid chuite bunebi, quequin chuipondambi, Con matses icsambo iquec, quenquiocquin.

20 Ĕmbi chuiboed mibi chuinuequin mibitedi chomiombi. Unēsash uin-cuente nec, quequin tantiaquin nuquin matsesēn cainacpaden cainquid icsho mētaniaid nēbi —quepondash Pabado isadaidbo tsusiobo chiech.

21 Adoquien: —Nidaid Ūdeya caid yacnoshon mimbi naid chuiquin dada uaid bedamboccombi. Adembidi, Edusaden yacnoēsh choquido, Pabado icsambocquid nec, quequin chienquioccosh.

22 Padnueni mimbi tantiaid chuisho tantiate bunec. Utsi dadpen Quidis-tubo icsambocquid nec, quec —quepondash isadaidbo Doma yacnocquido tsusiobo Pabado caic.

23 Aden Pabaton tantiaid tantianuec, Nēidted ushash padpidec choaind-abi, quianec nidanepondash tsusiobo. Adec nidaniash ambi chiactedec ushash Pabado tabadacno choapondash isadaidbo tsusiobobēd utsibo dad-pen. Adec cho-choash tabadsho isun: —Matses icsaquid icsho Nuquin Papan cuidnushe quiash abided cuidadec Esuquidistu unēsānēdash. Aid tantiaquid yec Nuquin Papabēd tabadendac, quequin Pabaton chuibam-pondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbēdtabi Nuquin Pa-pan naden nanun chiaid ambi utsibo dada uamiampid chuibampondash Pabaton. Ambi dada uamiampidēn chiaid Nuquin Papan madombo Es-
uquidistu nec, quequin badiadnubi chuiquin tauashun inchēshbudtsēqui chuiquin ēmpondash Pabaton.

24 Aden chuibanac utsi-utsiec, Abimbo iquec, quenubi utsi-utsiec, Tantiat-pibi, quepondash.

25 Aden abentsēc tantiacimboen tantiatiapimbo yec comapenec on-quesho tantiahsien Pabado nadpondash. —Nuquin Papan Mayanēn Isayas dada uamequin nuquin tsusedpabo naden chuiampic:

26 “Isadaidbo caid yacno nidshun naden chuita.
Mibitedishun tantiaded-tantiadedquimbi abimbo tantienquo iquendac;
Adembidi Ĕmbi nadatiambocquin nabanaid isted-istedquimbi abimbo isen-
quo iquendac.

27 Bēdamboen tantiaboedobi nēbi min matses pamumēdacimboec tabadec;
pashuacimboen tantiec tabadoaic; ushacimboebidi tabadoaic.
Adec tabadenquiocquin Ĕmbi nabansho mimbi istsiac. Adembidi Ĕmbi chiaid
mimbi tantiatsiac. Aden tantiahsun mibi icsaid mimbi ĕntsiac.
Adquiduidi Ĕmbi bēdambo icmiaid nendac.”

28 Adesa mibi icnuc isadaidpembo Esuquidistu chuimembi. Aden aidi chuisho aidon tantiendac —quepondash Pabado

29 Nuquin Papan dada uamiampicpaden chuiquin isadaidbo Doma yac-nocquido tantiamenuc. Aden chuisho tantiahs isadaidbo nidanepondash.

30 Adembidi seta daēd matamec tabadquin Pabaton Esuquidistu chuibampondash. Aton shubun tabadquin abi isedec choquidtedi Pabaton yuedpondash.

31 Ūtsi, Chēn, quenquiocnobi dacuēdenquiocquin, Nuquin Papabēd tabadte iquec, quequin huibampondash. Adembidi Esuquidistu tantiamenuc chuibampondash Pabaton.

Padi. Esuquidistun, Ĕbi chuibeneta, caidon naid chuibanquin aitedi dada uaombi, Teyopido.

DOMA YACNOCQUIDON ISTE

Tauamboen chiaid

¹ Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papantsen: —Con Mado chuibeneta —caidquio nebi.

² Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë.

³ Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec.

⁴ Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec.

⁵ Aidën: —Pabadon chuibeniac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi.

⁶ Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac.

⁷ Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

Doma yacnocquido iste Pabado bunaid

⁸ Tantia. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “Doma yacnocquido Esus tantiec tabadosh, quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi.

⁹ Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabadon abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenuc.

¹⁰ Nadembidi Nuquin Papa chianembi. —Doma yacnocquido istantiadquio iquebi. Mimbi nidmiac nëbi nidtsiabi, Papa —quequin chianembi.

¹¹ Aden mibi istantiadquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadomboen chieshtoenquio icquin Esus tantiaquionona —quequin mibi chuibantsiambi.

¹² —“Chieshtoenquio icquin Esus tantianuna,” quec chuianec bëdamboec tabadec aido bëd dambo ictsiabi —quiash mibi iste bunebi.

¹³ Tantia, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —queshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpenshun Esus tantiabencpadomboen ma Doma yacnocquidon utsibontsen Esus tantianu —quiash mibi yacno nidtiadquio iquebi.

¹⁴ Esuquidistun chiacpadomboen ambi naid matses abitedi chuiban-tiadquio iquebi. —Dadpen tantiaquidobëdtabi tantienquio icquidotsen chuibenenu. Adembidi dada uaquidobëdtabi dada uainquio icquidotsen chuibenenu —quiash nebi.

¹⁵ Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

16 Esusën naid chuibenec bēdambo iquebi naden tantiash. —Nuquin Papan tantiacpadece matses cuidmenquo icnuec Esus abided cuidadec unēsac caondash. Aid tantiasho Nuquin Papan matses cuidenquo iquec. Abia chiaid isadaidbon Esus tantiasho cuidenquo icquin isadaidpembō matses utsibontsen Esus tantiasho Nuquin Papan cuidenquo iquendac —quiash Esusën naid chuibenec bēdambo iquebi.

17 Esusën naid chuisho tantiash nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bēdamboen isbenec ambi chiaid niac-niacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “Nuquin Papa ambi chiacpadombōen naquidquo nec,” quequin abi tantiec tabadquid Nuquin Papan bēdamboen isec,” quequin dada uamepampic.

Matses utsibo icsamboec tabadaid

18 —Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadtē bunquin matsēs dadpen-shun Nuquin Papan cuidte tantiatiapimbo iquec.

19 Abi tantiametequid ambi uaid isun Nuquin Papa tantiatiadquidi Nuquin Papa tantiatē bunenquo matses icpec. —Adquidshenda Nuquin Papa nepec —matses camenuen Nuquin Papan abitedi uapampic.

20 Nidaid uaquinc cuēte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nēid uaquidien nādquo icchitec. Nibēdantiapimbo icquidien nechitec. Abipadquid utsi nibēdnuc comapenen tantiaquin nabanquidquo yec abitedishun Ichoen nechitec —quetiadquidi adenquo matses iquec. Adquid Nuquin Papan cuidendac.

21 Ambi uaid isash: —Nēid uaquid bēdambo iquec. Aidēmbien ēbi nashunchitec —quetiadquidi pamumēdacbimboecquin Nuquin Papa tantiatiapimbo matses iquec.

22 —Dadpen bēdamboen tantiēmbi —quequimbi tantiēnquo matsēsēn iquec.

23 Aden unēstiapimbo icquid Nuquin Papambo tantiatiapimbo icquimbi unēsquid-uidquo tantiaquin aidbimboecnuc nacen-shun papa quequin chianec. Utsibon matsesbimboecnuc nacen-shun: —Ēbi bēdamboen ista, papa —quequin ambi nacnenaid chiec. Utsibombic aben icquid nidaidēn capuquidbimboecnuc nacen-shun adembidi chiec. Utsibombic aben icquid tacbidēn siuidquidbimboecnuc nacen-shun adembidi ambi nacnenaid chiec. Ēnden adquo matses yampicpadombōembidi nēbi adombōembidi matsēsēn naic.

24 Adsho isash Nuquin Papa: —Ma bēdamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnēdambic nēbi abi bunacpadece icsamboec tabadec utsin chido chudteuidi bunquiec dada. Adecbidi aton bēnēpenquo chudmeteuidi bunquiec chido.

25 —Abitedi uaquidquo Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambōien bēdamboshē iquec —quequin ēnenquo icquin chuitiadquidi aidon padenquo icpec.

26 Adsho isash: —Ma abi bunacpadece icsamboec tabadpanu —quiampampic Nuquin Papa. Adnēdambic nēbi icsabudquiec dada bunenquo yequi chido daēdi dachudnanec.

²⁷ Adecbidi chido bunenquio yequi dada daëdi chichudnante natia buniquopec. Aden ambi chiaid niac-niaquec icsamboec tabadsho Nuquin Papan cuidendac.

²⁸ Adec abi tantiate bunenquio icsho isash: —Ma bēdamboec tabadnu — queuidboedi Nuquin Papa: —Ma abi icsate bunacpadequi tabadpanu — quiampampic. Adnēdambic nēbi pabiate shēcuē nihēdadbimboecquin Nuquin Papan chiaid niac-niaquec icsamboec tabadpec bēdambo ictiadquidobi.

²⁹ Nadquido icsamboec tabadquido nec. Nēdic aton chidopenquio chudquido. Nēdic aton bēnēpenquio chudmequido. Nēdic icsamboshē icquido. Nēdic aton na dadpen bedteuidi bunquido. Nēdic chieshquido. Nēdic matses utsibobimboec icte bunec chieshēmēnquido. Nēdic cuesunianquido. Nēdic chieshēmēnquido. Nēdic muaquido. Nēdic icsa uate bunquido. Nēdic utsibo icsaiduiddi chuiquido.

³⁰ Nēdic ambenquiobi chuishunquin chieshēnquin muauaquido. Nēdic Nuquin Papa chieshēnquido. Nēdic mamēnshumēnquido. Nēdic utsibo nashunenquio icquin aton nauidi naquido. Nēdic: —Ēbiuidtsēqui bēdambo iquebi —quequido. Nēdic: —¿Icsaquin atotsimbi utsi nape? —quec icsate bunquido. Nēdic anibēdtan amēn chiaid niac-niacquido.

³¹ Nēdic piushbimboecquin Nuquin Papan chiaid tantienquio icquido. Nēdic aton matses tantienquio icquido. Nēdic nēishash baded nēish bēdanenquio icquido. Nēdic utsibo bēdamboen istiapimbo icquido. Adquidtedi Nuquin Papan chiaid niac-niacquec icsamboec tabadquid nendac.

³² —Abi icsaid ėntiapimbo icquido Nuquin Papan cuidquin chian anēdēnquiacno nēsecaindac —quequin tantiequi ėnēdenquio yec icsaded-icsadedquiec. Utsibotsen icsasho isash cuishonquec. —Bēdambo iquec. Ēbipadquidquio nec —quepec.

2

Matsesēn naid Nuquin Papan abimbo chuite

¹ Aden icsamboec tabadaid ėm̄bi chuisho tantiash: —Adquid icsamboshē iquec —¿quecta ique? —Aden naic aid icsaic —queboedi mibitsen adecbidi icsapec. —Icsaquidpenquio nebi —quec mibi muaic.

² Nuquin Papambien matsesēn naidtedi tantiaquid icquin: —Nēido icsambo iqueque. Icsano nidmenu —quequin abimbo chiendac.

³ —Matses utsibo icsambo iquec —queboedombi mimbitsen Nuquin Papan chiaid niac-niacpec. Adash: —Nuquin Papan nuqui cuidenquio iquec —¿quecta ique? Mibitsen Nuquin Papan cuidendac.

⁴ Ambi uaido matses abitedi icsambo icsho isash unēsquio icquin matses bēdamboen iste bunquin icsaidobi Nuquin Papan baded cuidenquio iquec. —“Icsaboedi nēbi Nuquin Papan chiapadec bēdamboec tabadtiadquio iquebi,” quequin ma matsesēn ėbi tantianu —queshun Nuquin Papan matses baded cuidenquio iquec. Abi icsaid ėnenquio icsho ėsun cuidendac. ¿Adsho tantiashta mibi nadpe? —Mua. Nuquin Papan ėbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

⁵ —Nuquin Papan chiaid niacboedēmbi ėnta —caqui: —Padi. Ēm̄bi naiduiddi naic bēdambo iquebi —quequin ėnenquio icquin Nuquin Papan chiaid niac-niacbudec icsamboecuidi mibi tabadec. Aden m̄m̄bi Nuquin Papa cuidmendac. Nuquin Papan matsesēn naidtedi chuite ušhēmbi m̄m̄bi icsamboen naidtedi chuishun Nuquin Papan mibi cuidendac.

⁶ Matsesēn naidtedi tantiaquin matses cuidendac. Bēdambo icquido abēdi tabadmequin icsaido icsano nidmendac Nuquin Papan.

⁷ Abi tantiec bēdambo icquido: —“Mibi bēdambo iquec,” mabi Nuquin Papan canu —quiash abēd tabadte bunec Nuquin Papan chiacpadec bēdamboec tabadec nec. Aido unēsacsho Nuquin Papan abēdi tabadmendac padpidec unēstiapimbo icnuc.

⁸ Icsaquidoen Nuquin Papan chiaid chiaqui tantiate bunenquo icquin aton nauidi naic icsamboecuidi tabadsho Nuquin Papan comapeñen cuidendac.

⁹ Adoac icsamboec tabadquido abitedi natiacuededec tabadendac. Shu-biquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibotsen icsasho Nuquin Papan cuidendac.

¹⁰ Abi tantiec bēdamboec tabadquido unēsacsho abi yacno tabadmeshun: —Nēid bēdamboec tabadquid niondash —quequin utsibo tantiamequin Nuquin Papan bēdambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmequimbi matses utsibotsen abi tantiaquid icsho Nuquin Papan abēdi tabadmendac.

¹¹ Icsamboec tabadquido icsano nidmequin bēdamboec tabadquido abēdi tabadmendac. —Isadaidbouditsēqui bēdamboen isembi —quenquo icquin adoendac.

¹² Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiaishi aidēn chiaid niac-niaquec icsamboec tabadsho abitedi cuidendac.

¹³ Ambi: —Naden nata —quequin chiaid tantiaishumbic adomboen naisa bēdamboen istiapimbo icquin ambi chiacpadec tabadquid Nuquin Papan bēdamboen istsiash.

¹⁴ ¿Ada Nuquin Papan chiaid tantiacmaidon matses utsibon bēdamboec tabadte tantienquo iccuededpec? Ma bēdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bēdamboen naic Nuquin Papan chiaid tantiaishumbimboen.

¹⁵ Adec bēdamboec tabadec: —Bēdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec.

¹⁶ —Adec matses abitedi bēdamboec tabadte tantiequi adquiec tabadenquo iquec —queshun Nuquin Papan chiacpadēn Esuquidistun matses cuidendac. Matsesēn otacquo tantiaidbēda matsesēn ompoquin naidtedi ambembi tantiaishun Esusēn matses cuidendac. Esus chuibanquin aden aidēn cuidte chiombi.

Isadaidbon Nuquin Papan chiaid niac-niacaid

¹⁷ Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidēn tsyuecquid icsho Nuquin Papan ēbi bēdamboen isec. Utsibon Nuquin Papan tantienquo icnubi Nuquin Papanbo con matsesbēdtambi bēdamboen tantiembi. Bēdambo iquebi —mibi quepec. Adboedi mibi icsaic.

¹⁸ Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec utsibo bēdamboec tabadsho isash: —Aido bēdamboec tabadec —queboedi mibi bēdamboec tabadenquo icpec.

¹⁹ Adechidi: —Nuquin Papan chiaid tantiacmaido Nuquin Papan chiaidquo chuibanquid nebi. Paposhquiabimboecnuc tantiamequidquo nebi —mibi quepec. Adboedi aidēn chiaid niaquec mibi icsaic.

²⁰ —Chuisho tantiaibi icquido nēbi tantiabentsēcquidobēda Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquo chuibanquid nebi —mibi quepec.

²¹ Adec: —Nuquin Papan chiaid niac-niaquenda —queboedëmbi aidën chiaid mimbi niac-niaquec. —Ampenda —queboedëmbi mimbitsen ampepec.

²² —Utsin chido chudenda —queboedëmbi utsin chido mimbitsen chudpec. Papa quequin matsesbimboecnuc matses utsibon nacnenaïd isash: —Nuquin Papa tantienquoï yec nëïd nacnenguid icsambo iquec —queboedëmbi aidën nacnenaïd tantiate shubun puduedshun mimbi ampepec.

²³ —Nuquin Papan ambi chiaid con tsusedpa Moises dada uamepampid bedshun con matses isadaïdbonuidtsëqui Nuquin Papa tantiec —queboedëmbi ambi chiaid niac-niaquec mibi icsamboec tabadec.

²⁴ Adec mibi icsamboec tabadte chuiquin Nuquin Papan naden dada uamepampic. “Isadaïdbo icsamboec tabadsho isun matses utsibon: ‘Ambi Nuquin Papa caïdtsëmbien icsambo ichitech,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bëdamboen tantienquoï iquec.

Nuquin Papa tantiaquidquoï icte chiaïd

²⁵ —Nuquin Papan matses nebi —quequin Isadaïdbon Nuquin Papan aton tsusedpa chiampicpadomboen aton bacuëbo shui dëbid dëteshun secaic. Adonëdaïd ambi chiaïd niac-niaquenquoï yec bëdamboec tabadsho Nuquin Papan bëdamboen istsiash. Isadaïdbo utsibon ambi chiaïd niac-niacsho Nuquin Papan bëdamboen istiapimbo iquec ambi con matses cacmaidobimboecnuc.

²⁶ Nuquin Papan con matses cainquoï icpampido matses utsiboen ambi chiapadec bëdamboec tabadsho Nuquin Papan bëdamboen istsiash ambi: —Con matses nec —caïdobimboecnuc.

²⁷ Adec matses utsibo Nuquin Papan chiapadec bëdamboec tabadsho isash isadaïdbo nadec chiadpec. —Matses utsibo bëdamboec tabadnubi Nuquin Papan Moises dada uamepampid isban-isbanshumbi isadaïdbon Nuquin Papan chiaïd niac-niacpec. Isadaïdbo matses dadpen icsambo iquec —cadpec.

²⁸ ¿Shui dëbid dëteshun secaquido isadaïdbotedi Nuquin Papa tantiaquidomboda nedic? Padenquoï. ¿Matses ismenuen Nuquin Papan chiapadomboen nashumbic ompoquin icsamboen naquido Nuquin Papa tantiaquidquioda nedic? Padenquoï.

²⁹ ¿Ambi Moises dada uamepampiduidi ëmbimbo nanuequid Nuquin Papa tantiaquidquioda nedic? Padenquoï. Nuquin Papa tantiaquidquien aton Mayanën tantiamiacpadec bëdamboec tabadec. Adquid: —Mibi bëdambo iquec. Con matses mibi canu —capec Nuquin Papan matsesën adoenquoï icnubi.

3

Nuquin Papan isadaïdbo tantiec, quequin chiaïd

¹ Aden: —Abi tantiec bëdamboec tabadquid Nuquin Papan con matses catsiash —quequin ëmbi chuïsho tantiaïsh: —¿Isadaïdbo yecta icsambo icpec? —¿quecta ique? —Padenquoï iquec —caïmbi. —¿Ada aïdo ambi con matses caïdo Nuquin Papan nashunac? —¿quecta ique?

² Ai, aïdo nashunquiac. —Ëmbi chiaïd dada uaid ma aïdomba tantianu —quequin con matses isadaïdbo tsusedpabo ambi chiaïd Nuquin Papan dada uamepampic.

³ Aden dada uamiampid Nuquin Papan chiaïd chuïbanac con matses isadaïdbo: —Nuquin Papan chiapadomboen nanuna —queboedombi muaquin utsin-utsinquien nainquoï icpampic. ¿Ada con matses isadaïdbo

utsi-utsiec muaquido icsho isun Nuquin Papan ambi chiacpadomboen nainquo icpatsiash?

⁴ Padenquio. Ma ambi chiacpadomboen naquidquido Nuquin Papa neyoc. Muesambo nec. Matses abitedimbo muaquidquido icnuc Nuquin Papan abimbo chuiquidquido nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquido nec.

‘Nëid bédambo iquec. Nëid icsambo iquec, quequin Nuquin Papan abimbo chuibanendac, quequin ma matsesën tantianu,’ quequin

Nuquin Papan: ‘Mibi icsaoc,’ quequin ëbi chuiboed chiombi,” quequin dada uapampic.

⁵ Èbi adsho bédamboen tantiata. Icsamboen tantienda. —Nuquin Papan chiaid niac-niaquec ëbi icsasho isash: “Adquidpenquo Nuquin Papa nec. Icsaisambo nec,” quetsiash con matses. Adec icsaquimbi ëmbi con matses Nuquin Papa bédambo icte tantiameshobi Nuquin Papan ëbi cuidac icsambo ictsiash —quequin icsamboen tantienda.

⁶ Matsesën naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bédambo iquec. Mibi cuidenquo iquembi —quetiapimbo Nuquin Papa iquec. Muesambo nec.

⁷ Nadembidi icsamboen tantienda. —Èbi muaquidquido icnubi: “Adquidpenquo Nuquin Papa nec. Bédamboshë iquec. Muesambo nec,” quetsiash con matses. Adec muaquimbi Nuquin Papa muainquo icte con matses tantiametsiambi. Aden ëmbi abi tantiameshobi Nuquin Papan ëbi cuidac icsambo ictsiash —quequin icsamboen tantienda.

⁸ Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquio. —Pabado chedo: “ ‘Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Èbi muauaquido Nuquin Papan cuidchitoshon.

Matses abitedi icsaquido nec, quiaid

⁹ Tantia, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquio. Nuquin Papan chiaid niaquesamboen nibëdec. Matses utsibo con matses isadaidbobëd abembi bédamboec tabadtiapimbo iquec. Abitedimbo icsamboec tabadquido nec. Aden mibi chiombi.

¹⁰ Aden chuiquin Nuquin Papan dada uamepampic naden.

“Nuquin Papan chiaid niaquesambo nibëdec.

Abitedimbo icsaquido nec.

¹¹ Nuquin Papa tantiaquin ambi chiacpadomboenuidi naquidquido nibëdec.

Nuquin Papa tantiate bunquidquido nibëdec.

¹² Bënudshun podqued tantienquo yachimboen Nuquin Papa tantienquo icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ami chiaid niaquesambo nibëdec.

Abitedimbo icsapec.

¹³ Nadquido iquec. Nëid icsamboec chuishumënquido. Unësaid ënden chococano shëdec: ‘Pisenac,’ quequin tantiacimboen adquido onquesho tantiaash: ‘Icsambo icquido nec,’ quequin matsesën tantiec.

Nëidic muaquido.

Nëidic nisin pequin icsa uachimboen icsa uate bunec icsamboec onquequido.

14 Nēidic nēishash chieshēmēnec: ‘Unēschitoshon,’ quequin icsamboenuidi chuiquido.

15 Nēidic intac mēyamec badedquio cuesunianquido.

16 Nēidic abēd icquido natiamec chieshēmēnquido.

17 Adquidtedi cuesnante bunec bēdamboec tabadtiapimbo iquec.

18 Nuquin Papan cuidnushe, ‘quenquio icquid Nuquin Papa tantiesabo nec,’ quequin dada uamepampic.

19 Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiashun: —Icsaquidpenquo nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedibēdtabi isadaidbotsen chiac: —Abimbo chiec —quīash dacuēdec ēcbedanenuio tabadendac matses abitedi.

20 Aden ambi chiaid niaquesambo nibēdnuc: —Ambi chiaid niaquesa icsho Nuquin Papan nuqui bēdamboen isec —quequin nuqui abimbo chuitiapimbo iquec. Nuquin Papan chiaid isash: —Ambi chiaid niac-niaquec icsamboequien nuqui tabadchitec —quequin nuqui tantiapec.

Nuquin Papa matses bēdamboen ismete chiaid

21 Aden ambi chiacledi natiapimbo yec matses icsasho isun Nuquin Papan abi matses bēdamboen ismete chuiquin isadaidbo tsusedpa Moisesbēdta tsusedpabo utsibo dada uamepampic ēndenquimbo. Aden ambi dada uamepampicpadomboen nēbi Nuquin Papan abi matses bēdamboen ismequid matsesmpac caondash.

22 Adoac Nuquin Papa abi tantiaquido bēdamboen ismenuc Esuquidistu abided cuidadec unēspac caondash. Nēbi aidquio tantiasho Nuquin Papan matses bēdamboen isec. Isadaidbobēdtambi matses utsibontsen Esus tantiasho adoendac.

23 Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo nibēdec.

24 Adquid bēdamboen istiapimbo icquin matses bēdamboen iste bunquin aton Mādo Esuquidistu abided unēs uamequin Nuquin Papan cuidpac caondash. Nēbi abided cuidadaid Esus tantiasho nuqui bēdamboen isec icsaisabimboecnuc.

25 —Icsaido cuidquid icquimbi nuqui cuidenquio icnuen Nuquin Papan nac —nuqui camenuen Nuquin Papan nuqui icsaid bedshumequin Esused unēs uamequin cuidpac caondash. Esus tishabi icnuc Nuquin Papan abi tantiaquido cuidenquio icpampic: —Yuecshun con Madoded cuidendambi —quequin tantiaquin.

26 Nēbi adecbidi: —Icsaido cuidquid nebi —quequimbi Nuquin Papan ambi chiacpadecc nuqui icsaid bedshunec abided cuidadaid Esus tantiasho adembidi nuqui bēdamboen isquin cuidenquio iquendac.

27 Ēmbi aden chuisho tantiash: —Ambi chiacpadomboenuidi nasho Nuquin Papan bēdamboen isebe —quequin mimbi abimbo chuitiapimbo iquec. Matsesēn Nuquin Papan chiacpadomboenuidi natiapimbo icsho bēdamboen istiapimbo icboedi nēbi Esus tantiasho Nuquin Papan nuqui bēdamboen isec.

28 Aden matsesēn ambembi naquin Nuquin Papa bēdamboen ismetiapimbo iquec. Padnuen utsin: —Matsesash ēbi icsaid bedshunec abided cuidadaid tantiasho Nuquin Papan ēbi bēdamboen isec —quequin Esus tantiasho Nuquin Papan bēdamboen isec.

29 ¿Isadaidboudida Nuquin Papan bēdamboen ispatsiash? Padenquio. Matses utsibo isadaidpembobi Nuquin Papan bēdamboen istiasiash.

³⁰ Matses abitedi uaquid icquin ambi chiacpadomboen isadaidbon Esus tantiasho Nuquin Papan bēdamboen isec. Adembidi matses utsibon Esus tantiasho Nuquin Papan bēdamboen isec.

³¹ Adoaido: —Nuquin Papan chiaid niac-niaquec icsamboec tabadnuna —¿quetta icpec? Padenquoio. Esus tantiaquido icquin Nuquin Papan chiacpadomboen natiadquoio nuqui yanec.

4

Nuquin Papan Abadauan bēdamboen isaid

¹ Tantia. Aden Nuquin Papan bēdamboen iste chuiquin isadaidbo tsusedpa Abadauan caid ēnden icpampidtsen mibi chuinu. ¿Atotsieshun Nuquin Papan Abadauan bēdamboen isbempampic?

² Bēdamboecuidi tabadsho Nuquin Papan bēdamboen isaid yec Abadauan: —Bēdamboecuidi tabadquin Nuquin Papa bēdamboen ismembī —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembī —quenquoio icpampic Nuquin Papa.

³ Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbī caic,’ Abadauan quesho: ‘Adquid bēdamboen isendambi,’ queshun Nuquin Papan bēdamboen isbempampic icsaisabimboecnuc,” quequin chuiampic.

⁴ Matsesien adenquoio iquec. —Ambi chiacpadomboen nasho icbon yua bēdamboen isquid —nuqui quepec.

⁵ Nuquin Papambien nadotsias. Matses icsaboedi: —Bēdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bēdamboen isbentsias icsaisabimboecnuc.

⁶ Adembidi Nuquin Papan tantiamiac ambi bēdamboen iste chuiquin con tsusedpa Dabidēn dada uapampic naden.

⁷ “Ambi chiaid niac-niacboedēmbi: Bēdambo icquid icquin Nuquin Papan ambi chiacpadomboen naindac, quequin abi tantiasho Nuquin Papan ēbi bēdamboen isec ēbi icsaid bēpiscudacimboen.

Icsaisabimboecnuc ēbi bēdamboen isquin ēbi cuidenquoio iquendac,’ quiash matses bēdambo yec cuishonquec.

⁸ ‘Abi tantiaquid icsho isash ēbi icsaid bēpiscudash:

Ēmbi chiaid mimbī niac-niaccoque. Mibi cuidnu, Nuquin Papan ēbi cainquoio iquendac,’ quiash matses bēdambo iquec,”

quequin Dabidēn chuiampic ēndenquimbo.

⁹ ¿Shui dēbid dēteshun secaido isadaidboudida Nuquin Papan bēdamboen ispec? Padenquoio. Matses utsibotsen bēdamboen istias. Tantia. Ēmbi chuiboedbidi chuioanu. Abi tantiaquid icsho Nuquin Papan Abadauan bēdamboen isbempampic ambi chiaid niac-niacacmaidbimboecnuc.

¹⁰ ¿Ambi chiacpadomboen shui dēbid dēteshun secacshoda Nuquin Papan Abadauan bēdamboen isbempampic? Padenquoio. Shui dēbid dēteshun secabi icsho Nuquin Papan Abadauan bēdamboen isbempampic.

¹¹ Bēdamboen isbenshumbic: —Abadauan, ēmbi chiacpadomboen nabenta. “Nuquin Papan bēdamboen isaido nebi. Aid bēshunchitomane,” queshun min matstedī shui dēbid dēteshun secabanta —capampic Nuquin Papan. Adoac Abadauanēn nabempampic. Aden shui dēbid dētiacmaid icquin Abadauanēn Nuquin Papa tantiacpadomboen nēbi shui dēbid dētiacmaidon

Esus tantiasho Nuquin Papan bēdamboen isendac ambi chiaid niacniacacmaidbimboecnuc.

¹² Abadauanēn tsyuecquido isadaidbo Abadauambimboecquido Nuquin Papa tantiaquido abi iquec. —Shui dēbid dētemenēdaid icsho Nuquin Papan bēdamboen isebe —quenquo icquin Nuquin Papabēdta Esus tantiasho isadaidbo Nuquin Papan bēdamboen isaido abi iquec.

Nuquin Papan Abadauan chiaid

¹³ Ēndenquimboshē Nuquin Papan Abadauan naden chuipampic. —Abadauan, mibi nibēdanan yuecshun min tsyuecquid abentsēcshun utsibo bēdambo icmendac. Nidaid utsi-utsiec yacno tabadquido adoendac —quepampic Nuquin Papa. —Min tsyuecquid abentsēqui tantiasho matses bēdamboen isendambi —quequin otacquo tantiaquin Nuquin Papan adopampic. ¿Ambi chiacpadomboenuidi Abadauanēn nashoda Nuquin Papan aden chuipampic? Padenquo. Nuquin Papan chiac: —Ai, abimbo caic —qeshoen Abadauan bēdamboen isbenshun Nuquin Papan adopampic.

¹⁴ ¿Nēbi: —Moisesēn chiaid niaquesa icsho Nuquin Papan bēdamboen isebe —quec muaquidoda Nuquin Papan bēdamboen ispadic? Padenquo. Adec muaquidobi bēdamboen isquin ambi Abadauan chiaid niactsiash. Adotiapimbo icquin ambi chiacpadomboen Abadauanēn tsyuecquid tantiaquidoen bēdamboen isec.

¹⁵ —Moisesēn chiaid niaquesambo nebi —queboedombi aidēn chiaid niacniacsho isun Nuquin Papan cuidendac. Ambi chiaid niaquesambo nibēdec. Nuquin Papan: —Bēdamboec tabadta —quequin chiaid nibēdnuc ambi aden chiaid matsesēn niactiapimbo ictsias. Ambi: —Bēdamboec tabadta —quequin chiaid abi iquec. Aid niaquesambo nibēdec.

¹⁶ Nuquin Papan naden Abadauan chuipampic. —Abadauan, ėmbe chuisho tantiash: “Mimbi abimbo caic,” qesho mibi bēdamboen isquin min tsyuecquido bēdambo icmendambi —quequin chuipampic. Nēbi ambi chuipampicpadomboen naquin Esus tantiaquido Nuquin Papan bēdamboen isec. Nuquin Papan ambi chiaid dada uamepampidēn Moisesēn tsyuecquido isadaidbon Esus tantiasho Nuquin Papan bēdamboen isec. Abadauanēn Nuquin Papa tantiacpadomboen matses utsibontsen Esus tantiasho adembidi bēdamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec.

¹⁷ Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unēsan yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoaquin: —Abimbo mimbi caic —quequin Nuquin Papa Abadauanēn tantiapampic. —Comapenen tantiaquin unēsaid uincuemeguidquo icquin ambi chiacpadomboen ēbi bacuē tishmendac —quequin Abadauanēn Nuquin Papa tantiapampic. Nēbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

¹⁸ Nuquin Papan: —Min tsyuecquido dadpenquo iquendac —cac: —¿Mitsipadoac aidtedi con tsyuecquido icpec? Ma con bacuēbo nibēdpayoc. Tsusiombo icquin bacuē tishmetiapimbo iquebi —queuidboedi Abadauan nadpampic. —Ai, abimbo mimbi caic —quepampic aton mado nibēdnubi. Adshun tsusioctšēcquio icquimbi aton mado tishmepampic. Nēbi aton tsyuecquido dadpenquo iquec Nuquin Papan chiampicpadequi.

¹⁹ —Con seta dadpenquo 100tedi icnuc tsusiohudtsēcshun ėmbimbo bacuē tishmetiapimbo iquebi. Con chido ėndenquo machobudtsēccondaid icquin bacuē usundotiapictšēcquio iquec —quequin tantiequi: —Nuquin Papan abimboen caosh —quepampic.

20-21 —Nuquin Papa mue nec —quenquo yec: —Nadatiambo icquid icquin ambi chiacpadomboen Nuquin Papan naic —queshun Nuquin Papa tantiatsëboedëmbi aid tantiaquiopampic. Adshun: —Mibi bëdamboshë iquec, Papa —quequin Nuquin Papa chuipampic.

22 Adsho tantiashun Nuquin Papan bëdamboen isbempampic icsaisabimboecnuc.

23 Aden Nuquin Papan ambi Abadauan bëdamboen isaid isadaidbo tsusedpa dada uamepampic. ¿Abadauanën naiduidi tantiamenuenda aden dada uamepampic?

24 Padenquo. Nuquitsen Nuquin Papan ambi bëdamboen iste tantiamenuen aden dada uamepampic. Nuquin Icho Esusbëdta abi uincuemequid Nuquin Papa tantiasho nuquitsen bëdamboen isec.

25 Nuquin Papan tantiacpadec nuqui cuidmenquo icnuec nuqui icsaid bedshunec abided ciudadec Esus unëspanëdash. Aden Nuquin Papa abi tantiaquido bëdamboen ismenuec unësash uincuempanëdash Esus.

5

Esus tantiaquido Nuquin Papan bëdamboen isaid

1 Aden Esus tantiasho Nuquin Papan bëdamboen isaïdo yec abi cuidte dacuëdënenquo yec abëdi nuqui bëdamboec tantiananec.

2 Ëmbi chuibocpaden abi tantiaquido nuqui cuidmenquo icnuec abided unësquin Esusën Nuquin Papa nuqui bëdamboen ismepec. Adoac nuqui nadpec. —Nuqui bëdamboen isquin unësacsho nuqui abipadquid icsaisa icmequin Nuquin Papan abëdi nuqui tabadmendac —quec nuqui cuishonquec.

3 Nadectsen nuqui cuishonquec. —Esus tantiaquid icsho utsibon chieshënaqui Esus tantiatsëboedi chieshtoenquo icquin Esus tantiaquidquïo yanebi —quectsen nuqui cuishonquec.

4 Aden chieshtoenquo icquin Esus tantiasho Nuquin Papan nuqui bëdambo capec. Adoac: —Esus tantiaquid icsho Nuquin Papan ëbi bëdambo icmec. Unësacsho abi yacno ëbi tabadmendac ambi chiacpadomboen —quepec nuqui.

5 Adec: —Abi yacno ëbi tabadmendac —quequin Esus tantiaquid ¿ada Nuquin Papan cacumepec? Padenquo. Aton Mayan nuquibëd icmiac paposhquiabimboen nuqui naden tantiec. —Nuquin Papan ëbi bëdamboen tantiaquin abi yacno ëbi puduedmendac —quequin nuqui tantiec.

6 Aden matses tantiaquiec Nuquin Papan tantiacpadec Esus nadpanëdash. Matses abitedi abembi bëdamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquo icnuec abided ciudadec Esus unëspanëdash.

7 ¿Ada adquid matses icpadic? Padenquo. ¿Cuesanquidën matses bëdambo icquid caic: —Cuesnu —quesho tantiashunda dadpeshun: —Aid cuesenda. Èbiquien cuesta —capatsiash? Padenquo. Bëdamboshë icquid cuesmenquo icnuen: —Nëid cuesenda. Èbiquien cuesta —cachitembien ictsiash abentsëcshun. Icsambo icquid icshoen aden chienquo ictsiash.

8 Padnuen matses abitedi icsamboecuidi tabadnuc nuqui cuidmenquo icnuec Esuquidistu abided ciudadec unëspanëdash. —Nuquin Papan ëbi tantiaquiec —matses camenuen Nuquin Papan aden Esus namepanëdash.

9 Nëbi abided cuidadaidquo Esus tantiasho Nuquin Papan nuqui bëdamboen isec icsaisabimboecnuc. Aden bëdamboen isquin Nuquin Papan nuqui cuidtiapimbo iquenda.

10 Matsesën abi chieshënsho isun aïdo cuidte bunenquo icquin Nuquin Papan aton Madoded cuidpanëdash. Aden aton Madoded cuidash nëish

bédanshun Nuquin Papan aton Mado tantiaquid bédamboen isec. Nēbi Nuquin Papan uincuemenēdaid icquin Esusēn nuqui bédamboen tabadmec.

¹¹ Adembidi aidēn tantiamiacpadomboen nuqui: —Ēbi cuidenquio icnuen aton Madoded cuidquid bédamboshē iquec —quequin Nuquin Papa tantiec nuqui cuishonquec.

Adanēn naidbēda Esusēn naid chiaid

¹² Nuqui bédamboen ismequid Esus tishabi icnuc abia matses uaidēn Adanēmba Nuquin Papan chiaid niac-niaquec icsasho cuidquin aidba Nuquin Papan unēsquid icmepampic. Adembidi Adanēn tsyuecquido matses abitedi Adan icsapadecbidi icsate tantiaquimbi Nuquin Papan unēsquidoidquio matses icmepampic.

¹³ Nuquin Papan: —Adec icsaında —quequin ambi chiaid Moises dada uamiabi icnubi matses abitedi icsapampic. —Ēmbi Moises chuimiaiđ mimbiniac-niaquec —Nuquin Papa quetiapimbo icnubi matses icsapampic.

¹⁴ Nuquin Papan chuiboedquiobi niaquec Adamba icsasho Nuquin Papan cuidac unēsec taēpampic. Adan unēsambic aidēn nacpadomboen nabi icsa utsi naiqui matses abitedi icsasho adembidi unēsquidoidquio Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidēn chiaid niactiapimbo yec utsi naic icsashobi adopampic. Ambia Nuquin Papan chiaid niacāmpid Adampadquidpenquio Esuquidistu nec.

¹⁵ Matses abentsēcshun Adanēmba Nuquin Papan chiaid niacsho cuidquin aidba unēsquid icmeshun aton tsyuecquido matses unēsquidoidquio Nuquin Papan icmepampic. Adebidi Nuquin Papa matses bédamboen ismequid abentsēc iquec. Esusuidtsēqui abī tantiaquidotedi cuidmenquio icnuec abided ciudadec unēs spac caondash. Nēbi aid tantiasho Nuquin Papan nuqui bédamboen isec.

¹⁶ Adanēn nachimboen Nuquin Papa matses bédamboen ismequidēn nambo. Adan abentsēqui icsaquin Nuquin Papa cuidmiac abī unēsacpadquiec matses abitedi unēsquidombo yanac. Nuquin Papa bédamboen ismequidēmbien matses icsaid bedshunec abided cuidadquin Nuquin Papa abī tantiaquidotedi bédamboen ismec icsaisabimboecnuc.

¹⁷ Ambi chuiboedi niacquin Adanēn Nuquin Papa cuidmiash unēsquid yanacpadec matses unēsquidoidquio iquec. Esuquidistunuidtsēqui nac Nuquin Papan matses bédamboen isendac. Nēbi aid tantiasho Nuquin Papan nuqui bédamboen isquin bédamboec tabadquid icmendac. Adec bédamboec tabadec unēsash Esusbēdan Nuquin Papan namiacno bédamboshē yacnombo nuqui tabadendac.

¹⁸ Adec matses abentsēqui icsasho aidbēda aton tsyuecquido matses abitedimbo cuidquin Nuquin Papan unēsquidoidquio icmepampic. Padnuen Nuquin Papan chiacpadec abentsēqui abided cuidadaidēn Nuquin Papa abī tantiaquido bédamboen ismequin Nuquin Papa yacno tabadmendac.

¹⁹ Nuquin Papan chiaid niac-niaquec Adan icsaic taēambic aton tsyuecquido abitedimbo icsaquidoidquio yanac. Padnuen Nuquin Papan chiaid niaquesambo icquin Esusēn Nuquin Papa nuqui bédamboen ismec.

²⁰ ¿Matses bédamboen isnuenda Nuquin Papan ambi: —Bédamboec tabadta —quequin chiaid Moises dada uamepampic? Padenquio. Matses abī icsaid tantiamenuen ambi chiaid Moises dada uamepampic. Aden chiaid chuisho tantiash: —Icsaobi —quequin tantiaquin abided cuidadaid tantiasho Nuquin Papan matses bédamboen isec.

²¹ Taēc matses icsasho cuidac unēsquidoidquio yanac. Adsho isun matses bédamboen isnuen Nuquin Papan ambi chiaid niaquesambo Esusedec cuidac. Nēbi Nuquin Icho Esuquidistu tantiasho Nuquin Papan nuqui bédamboen

isec icsaisabimboecnuc. Nuqui unēsacsho abēdi tabadmendac padpidec unēstiapimbo icnuc.

6

Esus tantiaquid bēdamboec tabadquid, quiaid

¹ Nuquin Papan bēdamboen iste ěmbi chuisho tantiaashun naden tantienda. –Icsaido cuidmenquio icnuec abided cuidadec unēsapanēdash. Aid tantiaasho Nuquin Papan bēdamboen isquin nuqui cuidtiapimbo iqueque. Aden bēdamboen isaqui icsaquionona –quequin tantienda.

² Esus tantiaquido adesambo nec. Esus tantiec icsateuidi nuqui bunenquio yanec.

³ ¿Tantienquioda ique? Naden chuiquin mimbi acten mentomiac. –Ĕbi cuidmenquio icnuec abided cuidadec unēsaid Esus tantiaquid nebique. Ambi chiacpadec tabadtiadquio iquebique. Utsibo ismenu –quequin mimbi acten mentomiac. Adec Esus unēsaid tantiequi icsaboedobi icsate bunenquio nuqui yanec.

⁴ Aden Esus abided cuidadec unēsaid tantiaasho Nuquin Papan utsiacimbocnuc nuqui icmec. Esus unēsacsho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiacimbocnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bēdamboec tabadcuene.

⁵ Adec abided cuidadec unēsaid tantiec icsate bunenquio yanquid yec Esus uincuemiacbimboen comapenen tantiaquin Nuquin Papan utsiacimbocnuc icmiaidtsen nuqui nec.

⁶⁻⁷ Esus tantiabi yec icsaquido icboedi matses icsaid bedshunec Esus unēsaid tantiec nuqui icsate bunenquio yanec. Mētaniaid abibi mēnchiquidtiapimbo yachimboec matses abembi icsaic ěnēdtiapimbo iquec. Adboedi Esus tantiec nuqui icsate bunenquio yanec.

⁸ Adec Esus unēsaid tantiec icsainquio yanec nuqui nadpec. –Nuquin Papan uincuemiaidēn Esusēn nuqui bēdamboen tabadmec. Unēsacsho Nuquin Papa yacno abēdi nuqui tabadmendac –nuqui quepec.

⁹ Nuquin Papan uincuemiac Esus padpidec unēstiapimbo iquendac. Aton dada unēsquid icboedi unēstiapimbo icquid yanac.

¹⁰ Matses icsaido cuidmenquio icnuec abided abentsequi cuidadec Esus unēsac caondash padpidec unēsenuqio yec. Adsho uincuemiac Nuquin Papan chiacpadomboen nabanec aibbēd tēshnanenquio yec tabadec.

¹¹ Ĕbi adsho tantiaash nadta. –Ĕbi cuidmenquio icnuec abided cuidadec unēsacsho uincuemiaid Esus ěbēdi iquec. Aid tantiec icsainquio yanebi. Ambi nacpadec tabadtiadquio iquebi –queta.

¹² Icsamboec tabadenquio icnuna. Nuqui icsate bunaid nainquio icnuna.

¹³ –Icsaquionona –quesho tantiaash: –Padi –quenuna. Unēsacimbocnuc Nuquin Papa tantienquio ictenedēmbi uincuenacimbocnuc Nuquin Papa nuqui tantiabenondaque. Ambi chiacpadec bēdamboequien tabadtiad.

¹⁴ –Nuquin Papan ambi: “Bēdamboec tabadta,” quequin chiaid Moises dada uamiactedi naquin ěmbimbo Nuquin Papa bēdamboen ismembī –quenquio icquin Esus tantiaasho Nuquin Papan nuqui bēdamboen isec. Ambi bēdamboen isaideo yec nuqui icsate bunenquio nuqui yaneque. Bēdamboec tabadnuna.

¿Tsuinsin yuabo Esus tantiaquido icpec? quequin chiaid

¹⁵ –Aden Nuquin Papan nuqui bēdamboen isec –quequin ěmbi chuisho tantiaashun naden icsamboen tantienda. –Nēbi abided cuidadaid Esus

tantiasho ëbi bédamboen isec. Ëbi cuidtiapimbo iqueque. Ambi chiaid niac-niaquec icsabudquionona –quequin tantienda. Ësus tantiaquid adesambo nec.

¹⁶ ¿Tantienquioda ique? Icbon chiacpadomboen yuan naquid. Icsamequidën tantiacpadomboen icsamboen naquid aton yua nendac. Aidën yua icquïn icsaid ëntiapimbo yec unësash icsano nidendac. Nuquin Papan yuain ambi chiacpadec bédamboec tabadcuendac.

¹⁷ Mibi adec tabadsho isun: –Ësus chuibanac icsaid ëntiapimbo icboedi Ësus tantiabenash Doma yacnocquido bédamboec tabadcuendac. Aden namec mibi bédambo iquec, Papa –quequin Nuquin Papa chiombi.

¹⁸ Satanasën yua icquïn mimbimbo mibi icsaid ëntiapimbo icsho Nuquin Papan nac ambi chiacpadquiec mibi bédamboec tabadcuendac.

¹⁹ –Matses icquïn: “Nuquin Papan chiaid tantiadenquio iquec,” canushe –quequin bédamboen tantiamenuen mimbimbo mibi tantiaid yuan naid mibi chiombi. Satanasën yua yec icsateuidi bunquiec mibi icsaded-icsadedondac. Adec icsamboshë iccondaïdi nëbi Nuquin Papan chiacpadequien bédamboec tabadtiaid.

²⁰ Satanasën yua yec icsaquiec Nuquin Papan chiacpadec bédamboec tabadtiaipimbo mibi iccondac.

²¹ ¿Ada bédamboec tabadonda? Ma mibi chieshëmënquiec tabadteneyoc. –Ëbi chieshëmënquiec tabadondaid tantiashun: “Mibi icsambo iquec,” ëbi canushe –queshun mimbi naondaid ma mimbi chienquio iccondac. Icsaid ënabi yec unësash icsano mibi nidtsenac. Adecbidi icsaid ënenquio icquido unësash icsano nidendac.

²² Nëbi nuqui Ësus tantiasho Nuquin Papan aton yuabo nuqui icmiac. Adoac icsaid ëntiapimbo icboedi nëbi nuqui bédamboec tabadcuendac. Adquid unësacsho Nuquin Papan abëdi tabadmendac.

²³ Icsaïdo cuidquïn Nuquin Papan icsano nidmendac. Abided cuidadec unësaid Esuquidistu Nuquin Icho tantiasho Nuquin Papan nuqui bédamboen isquïn unësacsho abëdi tabadmendac.

7

Bédamboec tabadte chiuinen chido bënëchoquid Pabadon chiaïd

¹ Con utsibobimboecquido mibi neque. Tantia. Padpiden mibi chuinu. Naden chiaïd mimbi tantianëdac. –Nuquin Papan dada uamiac Moisesën chiampicpadomboen matsesën naquid. Unësun aidën chiaïd natiapimbo iquec –quequin mimbi tantianëdac.

² Nuquin Papan chiacpadomboen inaidën aton bënë nianesa. Dada utsi chudmesa chidon. Bënë unësambien nianesa dada utsin bedadquid.

³ Bënë unësabi icnubi aton bënë nianquin dada utsi bedanec cuenacsho: –Icsambo iquec. Nuquin Papan cuidtequid nec –cabededtsiash. Bënë unësambien dada utsin bedadquid chido. Aden bedacsho Nuquin Papan: –Mibi cuidnu –cainquio ictsias.

⁴ Adecbidi ambi chiaïd niac-niacsho Nuquin Papan cuidtsenaido nuqui iccondac. Adondaïdi abided cuidadec unësaid Ësus tantiasho Nuquin Papan: –Mibi cuidnu –nuqui cainquio iquendac. Aden Nuquin Papan uincuemënëdaïdën Ësusën aton yua nuqui icmequin bédamboec tabadquid icmenuen nuqui icsaid bedshumpanëdash.

⁵ Ësus tantiabi yec nuqui bunacpadecuidi nuqui icsapadeneç. –Adenda –quequin Nuquin Papan chiaïd tantiashi: –Adequi icsaquionona –quiash nuqui icsaquiodeneç. Adquid yec unësacsho icsano nidmequin Nuquin Papan nuqui cuidtsenëdash.

⁶ Esus tantiabi yec nuqui nadondac. —Moisesën chiacpadec bēdamboec tabadsho Nuquin Papan nuqui bēdamboen istsiash. Ambi chiaid niac-niacsho nuqui cuidendac —quiondaidi nēbi Esus tantiec nuqui adenquo iquec. Nēbi Nuquin Papan Mayanēn tantiamiacpadec nuqui bēdamboec tabadec.

Icsaquid nebi, quequin Pabadon chiaid

⁷ —Nuquin Papan ambi chiaid Moises dada uamepampid icsambo iquec —¿quectabi ique? Icsapenquo iquec. Nuquin Papan ambi chiaid Moises dada uamiaid isun: —Nuquin Papan chiaid niac-niaquec icsachitobi —quequin nuqui tantiec. “Ūtsin na isash: ‘Con na adquid nibēdec, quec chieshēmēnenda,” quequin Nuquin Papan Moises dada uamiaid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiemi ictsenchtōndac.

⁸ Ūtsin na isash: —Adquid con na nibēdec —quiash chieshēmēntsēchoedi Nuquin Papan: —Adenda —quequin chiaid tantiashi icsaquid yec utsin na comapenec bunquiech chieshēmēnquiondabi. Nuquin Papan chiaid nibēdnuc: —Adec icsachitobi —quequin tantienquo ictsenondambi.

⁹ Nuquin Papan chiaid tantiabi yec Nuquin Papan cuidte dacuēdēnenquo yec: —Bēdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi.

¹⁰ Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenquo iccobi. Icsachitobi. Adquid Nuquin Papan cuidendac —nuqui quianondac.

¹¹ —Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac.

¹² Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

¹³ ¿Nuquin Papan chiaid isbanashta matses Nuquin Papan cuidtequido yanactic? Padenquo. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —queshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Ēbien cuidchitec —nuqui quianondac.

¹⁴ Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidtiapimbo yachimboen icsaquido icquin Nuquin Papan chiacpadomboen natiapimbo nuqui iquec.

¹⁵ —Nuquin Papan chiacpadomboen nanu —queboedombi natiapimbo nuqui iquec. Adecbidi: —Ūtsibo icsacpadec icsainquo iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui.

¹⁶ —Nuquin Papan chiaid bēdamboen icchitec. Aidēn chiaid niacte bunenquo iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi.

¹⁷ Bēdamboeuidi tabadtiadquidini icsaquid yec ēbembic icsadenechitec.

¹⁸ —Bëdamboec tabadnu —queboedi icsaquid yec ëbemi bëdamboec tabadti-pimbo iquebi. Icsaquidini nec.

¹⁹ —Bëdambo icte bunebi —queboedi ëbemi bëdamboec tabadtiapimbo iquebi. —Icsate bunenquoio iquebi —queboedi ëbenquiobi icsaded-icsadedebi.

²⁰ Icsate bunenquoio icboedi icsaquid yec ëbemi bëdamboec tabadtiapimbo iquebi.

²¹ —Adquid nebi. Nuquin Papan chiacpadec bëdamboec tabadtiadquidi badedquio icsaded-icsadedebi —quequin tantiemi.

²² —Nuquin Papan chiaid bëdambo iqueque. Ambi chiacpadec ëbemi bëdamboec tabadnu —queboedi

²³ icsaquid yec ëbemi bëdamboec tabadtiapimbo iquebi. Mëtaniaid abembi mënchiquidtiapimbo yachimboen ëmbi naid ëntiapimbo iquebi. —Nuquin Papan chiacpadec bëdamboec tabadnu —queboedi bëdamboec tabadtiapimboeni icchitec.

²⁴⁻²⁵ Adquid yec shubitiadquio icchitebi. Icsaquid yec: —¿Mitsipadequini bëdamboec tabadpeba? —queboedi: —Abi tantiasho Esuquidistumbini bëdamboen tabadmec —quianondabi. Adshun Nuquin Papa naden chiemi. —Ëbi bëdamboen tabadmequid Esus mimbi ëbi tantiamiac. Mibi bëdambo iquec, Papa —quequin Nuquin Papa chiemi.

8

Nuquin Papan Mayanën namiaid

¹ Aden matses bëdamboen tabadmequid Esuquidistu tantiasho: —Mibi icsambo iqueque. Cuidnu —cainquoio iquendac Nuquin Papan.

² Icsaquido yec bëdamboec tabadtiapimbo icsho Nuquin Papan cuidtequido icboedëmbi Esus tantiasho Nuquin Papan aton Mayan meniac aidën tantiamiacpadec nuqui bëdamboec tabadanendac.

³ —Moisesën chiacpadec bëdamboec tabadec unësash Nuquin Papa yacno tabadebi —queboedi icsaquido yec abembi bëdamboec tabadtiapimbo matses iquec. Adsho isun matses bëdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unëspanëdash.

⁴ —Abided cuidadaid con Mado Esus tantiasho bëdamboen isquin con Mayan matses menendambi. Adoac aidën tantiamiac ëmbi Moises chuimi-ampicpadec bëdamboec tabadendac. Matses abi icsate bunacpadec icsainquoio yec bëdamboec tabadendac —queshun Nuquin Papan Esused cuidpac caondash.

⁵ Adec Nuquin Papan Mayanën tantiamiaid Esus tantiaquid Nuquin Papan tantiacpadec bëdamboec tabadte bunec. Padnuen icsaquid: —Ëbi bunaid nanu —quequin ambibi tantiacpadec icsaic.

⁶ Aden abi bunaidquio naic icsamboec tabadquid Nuquin Papan cuidendac. Padnuen Nuquin Papan Mayanën tantiamiacpadec tabadquid Nuquin Papan cuidte dacuëdënenquoio yec bëdambo yec unësash Nuquin Papa yacno tabadendac.

⁷ —Icsate bunquidën ëbi chieshë nec. Ambi naiduidtsëqui naquin ëmbi chiacpadomboen natiapimbo iquec —queshun Nuquin Papan cuidendac.

⁸ Adquido chuiquin: —Mibi bëdambo iquec —catiapimbo Nuquin Papa iquec.

⁹ Esus tantiaquidien adesa nec. Esus tantiasho Nuquin Papan aton Mayan nuqui meniac aidën tantiamiacpadec nuqui bëdamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusën Mayambidi nec.

¹⁰ Abided cuidadaid Esus tantiasho bēdamboen isquin Nuquin Papan aton Mayan meniaid yec abēd tabadtequido nuqui nec. Icsaquido yec matses abitedi unēsquidombo icnubi Esus tantiaquid unēsacsho Nuquin Papan abēdi tabadmendac.

¹¹ Esus uincuemequidēn Nuquin Papan ambi aton Mayan meniaido unēsacsho nuqui uincuemequin nuquin dada utsi uaindac. Aton Mayan nuquibēd tabadsho isun nuqui adoendac.

¹² ¿Ēbi adsho tantiashta Esus tantiaquid abi bunacpadequi icsapec? Padenquo. Bēdamboec tabadte bunec.

¹³ Utsiboen abi bunacpade icsamboecuidi tabadec unēsacsho cuidquin Nuquin Papan icsano nidmendac. Nuquin Papan Mayanēn tantiamiacpade ictabdqin nuqui icsaid nuqui ēnec. Adash unēsash Nuquin Papa yacno nuqui tabadendac.

¹⁴ Aden aton Mayanēn bēdamboec tabadmiaido Nuquin Papan: —Con mado nec. Con champi nec —capendac.

¹⁵ ¿Icbo icsambo icquidēn yua dacuēdmiacbimboenda Nuquin Papan Mayanēn nuqui dacuēdmec? Padenquo. Nuqui bēdambo icmec. Aidēn tantiamiacpadomboen Nuquin Papauidtsēqui papa nuqui capec.

¹⁶ Aden Nuquin Papan Mayanēn: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec.

¹⁷ —Con mado nec. Con champi nec —queshun nēbi Nuquin Papan nuqui bēdamboen isquin unēsacsho abēdi tabadmequin nuqui bēdamboshē icmendac. Utsibon chieshēnac chieshtoenquo yec unēsacsho Nuquin Papan abēdi tabadmequin Esus bēdamboshē icmiac. Adembidi Esus tantiaquid icsho utsibon chieshēnaqui chieshtoenquo icquin Esus tantiequi unēsacsho Nuquin Papan abēdi tabadmequin nuqui bēdamboshē icmendac. Nuquin Papa yacnombo Esuquidistun natedi nuquin na nendac.

Nuquin Papan bēdamboshē icmete chiaid

¹⁸ Adec Nuquin Papa yacno nuqui bēdamboshē icte tantiaquin nuqui nidaidēn natiaic tabadaiduidi ma nuqui tantiatipimbo iqueyoc.

¹⁹ Aden Nuquin Papan nuqui bēdamboshē icmete tantiec ambi uaid utsitedi nidaidēn icquidtedi aben icquidtedi: —Nēbimbobi bēdambo icmepashuni —queded-quededec tabadec.

²⁰ Abia matses uaid Adan icsasho cuidquin ambi uaid nidaidēn icquidtedi Nuquin Papan unēsquiduidquo icmepampic aidon: —Padi —catipimbo icnuc.

²¹ —Yuecshun ēmbi Esus tantiaquido uincuemequin aton dada utsi uacpadēn ēmbi uaido utsi nidaidēn icquidtedi chodquete icboedi utsi uain bēdamboshē icmendambi —quequin tantiaquimbi unēsquiduidquo icmepampic. Aden Nuquin Papan chiaid tantiaquin ambi uaidon nidaidēn icquidtedishun aton dada abi bēdambo icmete tantiaquin cainec tabadec.

²² Unēstiapimbo icte bunec unēsquid yec: —¿Tedectsicshun Nuquin Papan nuqui utsi uapeba? Nēbimbobi Nuquin Papan utsi uapashuni —queded-quededec Nuquin Papan uaidtedi. Bacuē tishquid bacuē paēmbo icnuc: —Badedquo tishmepashuni —quiacbimboec adpec.

²³ Nuquin Papan meniaidēn aton Mayanēn tantiamiacpaden nuquitsen naden chiec. —Con dada utsi uaquin unēstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unēstiapimbo icquid icmendac —queded-quededquin nuquin dada utsi uate tantiaquin nuqui cainec.

24-25 —Esus tantiaquido unēsacsho Nuquin Papan nuquin dada utsi uaindac —quequin tantiaquin nuqui Esus tantiabenondac. Nuquin dada utsi uabi icnubi: —Nëbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquiu iqendac.

26 —Aden aton dada utsi uate tantiaquin yuen cainec chieshtonoshe —queshun Nuquin Papan Mayanën nuquibëd icquin bëdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquio icsho isun Nuquin Papan Mayanën abi chiec. Unēsquio icnuc onquenguio icquin chiec: —Mimbi tantiacpadomboen aid matses bëdambo icmeta, Papa —quequin Nuquin Papan Mayanën nuqui comapenen chuided-chuidedec.

27 Aden Nuquin Papan: —Ma Esus tantiaquido bëdambo icnu —quequin tantiaidbidi aton Mayanën onquenguio icquin chuisho Nuquin Papan tantiec. Otacquiu tantiaidtedi tantiaquid icquin Nuquin Papan aden aton Mayanën chiaid tantiec.

Nuquin Papan nuqui bëdambo icmiaid

28 Aden tantiashun nuqui naden tantiec. Ambi tantiamiacpadomboen abi tantiaquido bëdambo icmete bunquin Nuquin Papan bëdamboen nashunec. Unēsquio yec tabadsho aden naic. Natiambo icsho adembidi naic. Cuishonquesho adembidi naic.

29 Ëndenquimboshë nidaid uabi yequi Nuquin Papa nadpampic. —Ëmbi tantiaidtedi ëbëdta con Mado tantiaquid icmequin Esuspadquio icnuc bëdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquio icnuc bëdambo icmenuen Nuquin Papan naic.

30 Ëndenquimboshë nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquio icnuec abided cuidadaid Esus tantiasho Nuquin Papan nuqui bëdamboen isec isaisabimboecnuc. Nuqui bëdamboen isquin nuqui bëdamboen tabadmec. Unēsacsho nuqui unëstiapimbo icquid icmeshun abëdi tabadmendac.

31 ¿Embi aden chiaidtedi tantiashta Esus tantiaquido dacuëdpec? —Nuqui cudasquin Nuquin Papan nuqui bëdambo icmendac. Ëbi chieshënuquidën: “Cuid,” cac Nuquin Papan ëbi cuidenquio ictsiash —quec nuqui dacuëdenquio iquec.

32 Nuquin Papan nuqui tantiaquiec. Aton Madombo cudasenquio icquimbi nuqui cuidenquio icnuen aton Madoded cuidquin unēs uamepanëdash. Adshumbic Esus tantiasho ënenquio icquin bëdamboen isquin nëbi bëdambo icmequin unēsacsho abëdi tabadmequin nuqui bëdamboshë icmendac.

33 ¿Nuquin Papan nuqui bëdamboen isquidëmbida nuqui cuidpec? Padenquio. ¿Utsibo nuqui caic: —Icsambo iquec —queshobida Nuquin Papan nuqui cuidpec? Padenquio.

34 ¿Esusëmbida nuqui cuidpec? Abi tantiaquido cuidmenquio icnuec abided cuidadec Esus unēsac caondash. Unēsacsho Nuquin Papan uincuemiatic Nuquin Papa yacnoshon aidëmbi abi tantiaquido chianec. —Ëbi tantiaquido bëdamboen isquin cuidenda, Papa —quequin Nuquin Papa chianec tabadec. ¿Adquidënquiobida nuqui icsano nidmequin cuidpec? Padenquio.

35 Nuqui bëdamboen isquin ënenquio icquin Esusën nuqui tantiaquiec. ¿Shubisho isunda Esusën nuqui tantienquio icpec? Padenquio. ¿Dacuëdshoda Esusën nuqui tantienquio icpec? Padenquio. Adembidi nuqui tantiaquiec. Utsibon chieshënshe bëdamboen isquinc pete natia bunsho bëdamboen isquinc nuquin dashcute nibëdsho bëdamboen isquinc nuqui Esusën caindac. —Ëbi

acshunendac —quesho bēdamboen isquinc chieshēmēnquidon: —Cuesunenu —casha bēdamboen isquinc nuqui caindac Esusēn ēnenquo icquin.

³⁶ Aden utsibon Esus tantiaquido chieshēnte chuiquin Nuquin Papan dada uamepampic naden.

“Mibi tantiasho ēbi: ‘Cuesunenu,’ caded-cadedec uimanēmēnquidon.

Aben icquidbimboecnuc: ‘Cuesunenu,’ caded-cadedebi, Papa,”

quequin Nuquin Papan chiaid dada uapampic Esus tishabi icnuc.

³⁷ Aden utsibon nuqui chieshēnsho Esuquidistun nuqui bēdamboen tantiaquie. Shubisho abi nuqui tantiamec. Adoac Esus tantiatsec shubiquimbi chieshtoenquo icquin nuqui Esus tantiaquie yandac.

³⁸⁻³⁹ Nuquin Papantsen ēnenquo icquin nuqui tantiaquie. Nuquin Icho Esus tantiasho Nuquin Papan nuqui bēdamboen isec. Unēsacsho nuqui bēdamboen tantiatsh. Unēsabi icsho nuqui bēdamboen isec. ¿Nuquin Papan abi yacnoshon uaid mayan bēdan: —Aid tantienda —cashoda nuqui Nuquin Papan tantienquo yampatsiash? Padenquo. Adembidi nuqui tantiaquiōtsiash. ¿Podobitsi icsabon icho Satanasēn: —Aid tantienda —cacta Nuquin Papan nuqui chieshēmpatsiash? Padenquo. Adembidi nuqui tantiaquiōtsiash. Nēbi nuqui bēdamboen tantie. Yuecshun adembidi nuqui bēdamboen tantie. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiōtsiash. Abuc nidacsho Nuquin Papan nuqui bēdamboen tantiatsh. Nidaid uguēducquo nidacsho adembidi nuqui bēdamboen tantiatsh. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bēdamboen tantiatsh ēnenquo icquin.

9

Pabadon aton matses isadaidbo chiaid

¹⁻² Aden con matses isadaidbo tantiaquid Nuquin Papa nec. —Aden abi tantiaquidi con matsesēn bēdamboen tantienquo iquec —quiash shubitiadquo iquebi. Muainquo iquebi. Esus tantiaquid icsho Nuquin Papan Mayanēn tantiamiaid icquin abimbo chiembique. Tantiata.

³ Con matses isadaidbo tantie unēsquo yec tsadebi. Nuquin Papan: —Min matses abitedi cuidenquo icnuc mibiuidtsēqui Esusbēd tabadmenguio icquin icsano nidmenguio cuidnu —capatecnēdani. Adoac: —Ai, con matses cuidenquo icnuc ēbided cuid —quetsenondabi.

⁴ Con matses tsusedpa Acobo caid Nuquin Papan Isadaid caidēn tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibēdi tabadebique. Mibi ismenu —quequin con matses tabadacno abu ushu bēchamuanquiequid chomequin ismepampic. Adashic nadpampic. —Ēmbi chiapadec bēdamboec tabadsho mibi bēdamboen isquin bēdambo icmendambi. Mibi nianenquo iquendambi —queshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantie isadaidbo tabadpampic. Adshumbic matses cuidmenguio ictequid chuiquin: —Mibi bēdambo icmendambi —quequin Nuquin Papan con matses chuipampic ēndenquimboshē.

⁵ Abadaun chuiquinc Isac chuiquinc Acobo chuiquinc capampic. Ambi chiapadomboen Isadaidbon chidon tishac Esuquidistu matsesac caondash. Nuquin Papapadquidquobi yec abitedishun Icho yec matsesac caondashe. Esus chuiquin: —Nuquin Papa padquobi yec mibi bēdamboshē iquec —canana ēnenquo icquin.

⁶ Ēmbi chiapaden Esus tantienquo icsho Nuquin Papan con matses dadpen bēdamboen istiapimbo iquec. ¿Aden tantiashtabi nadpe? —Nuquin Papa muapampic. Ambi chiapadomboen nainquo icquin con matses bēdamboen

istiapimbo iquec —¿quectabi ique? Padenquoio. Nuquin Papan abimbo chuipampic. Isadaidbo dadpenshun Nuquin Papa bédamboen tantienquoio iquec. Ambi tantiactedishun abi tantiasho ambi chiacpadomboen Nuquin Papan bédamboen isec.

⁷ Ēndenquimboshē con tsusedpa Abadauanēn mēdaidtedi adembidi Nuquin Papan bédamboen isambo. Abadauanēn mado abentsēqui Isac caic: —Aidēn tsyuecquido ěmbi mibi cuēnacpadomboen con matses caindambi —quequin Nuquin Papan chuipampic.

⁸ ¿Abadauanēn bacuēbotedishun tsyuecquidotedida Nuquin Papan con matses caido nepec? Padenquoio. Ambi chiacpadomboen Isaquēn tsyuecquido Nuquin Papan con matses caido nec.

⁹ Naden Nuquin Papan Isac tishte chuipampic. “Ĕmbi tantiacpadēn choashun ěmbi namiac Sadan min chidon dada bacuē tishendac,” quepampic Nuquin Papa Abadauan chiech.

¹⁰ Aden ambi: —Adoendambi —quequin chiacpadomboen naquidquoio Nuquin Papa nec. Aden Nuquin Papan Isaquēn bacuē abi ushēmbi daēd tishte chuipampic. Adnubien con tsusedpa Isaquēn aton chido Debeca caid bedshun chudquin dada bacuē daēd usundomepampic Nuquin Papan chiacpadomboen.

¹¹⁻¹² Aid dada bacuē daēd tishabi icshobi Nuquin Papan ani naden chuipampic. “Ĕmbi tantiacpadquid min madon utsimpi bēyucquidbimboecquid nendac,” quepampic. Aid daēd tishabi bédamboec tabadtiapimbo icnubi: —Tishacsho ěmbi tantiacpadembi tsyuec tishsaidēmpi abentsēqui bédamboen isendambi —quequin tantiec adpampic Nuquin Papa.

¹³ Adembidi Isaquēn mado chuiquin Nuquin Papan ambi chiaid dada uamepampic. “‘Acobouidtsēqui tantiaquioquin aton buchimpi Esau bēdiactsc tantiatsemdambi,’ quepampic Nuquin Papa,” quequin dada uamepampic.

¹⁴ ¿Ĕmbi aden chuisho tantiash: —Nuquin Papa icsambo iquec —quecta mibi ique? Ma Nuquin Papa icsapenquoio icquid neyoc. Icsaquido yec matses abitedi ambi cuidtequido icsho Nuquin Papan ambi tantiactedi bédamboen isec.

¹⁵ Aden Nuquin Papan con tsusedpa Moises chuipampic.

“Embi tantiactedi matses bédamboen isendambi.

Aidtedi cuidenquoio iquendambi,”

quequin chuipampic.

¹⁶ ¿—Ĕmbembi nasho Nuquin Papan bédamboen istsiash —quec matses bunacpadenda Nuquin Papan matses bédamboen ispec? Padenquoio. Ambi tantiactedishun abi tantiasho Nuquin Papan bédamboen isendac.

¹⁷ Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuipampic. “‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquoio nec, ma ěbi canu,’ quequin mibi chuiquid dapa icmiondambi. Mibi icsasho pacuēnēdacbimboecnuc mibi icmembi,” quequin Nuquin Papan padaon chiaid Moisesēn dada uapampic.

¹⁸ Aden ambi tantiacpadomboen utsi-utsien icsaido pacuēnēdacbimboecnuc icmequin abi tantiamenquoio iquec. Adembidi utsi-utsien bédamboen isquin abi tantiamec.

¹⁹ ¿Ĕbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesēn nainquoio icpadic? —¿quecta ique?

²⁰ ¿Matses icquinda mimbi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ëbipadquid matses uao, Papa? —¿capenda nuqui ique?

²¹ ¿Ada abi nacnenquid matsun chushcapadic? Padenquio. Matsunacnenquidën ambi tantiacpadomboen nacnenendac. —Nëid nidaid tëshë tëshu bëdambo icquid acte uetequid nacnenu. Nëid nidaid tëshë matsumpi icsactsëcquid opa acmete nacnenu —quequin matsunacnenquid. Aden ambi tantiacpadomboen nidaid tëshun nacnenquid.

²² Adembidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapenen tantiaquidquio nebi. Adquid icquin icsaido cuidquid nebique. Ismenu —queboedëmbi ambi cuidtequido baded cuidenquio iquec. Ambi ëndenquimboshë tantiacpadomboen aido icsano nidmendac.

²³ —Ma ëmbi bëdamboen isaidon naden tantianu. “Icsaisambo icquin matses bëdamboen iste bunquin Nuquin Papan icsaido badedi cuidenquio iquec,” quequin ma tantianu —queshun icsaido badedi cuidenquio iquec. Ambi ëndenquimboshë tantiacpadomboen ambi bëdamboen isaido abëdi tabadmendac.

²⁴ Aden ambi tantiacpadomboen Esus tantiasho Nuquin Papan nuqui bëdamboen isec. Isadaidbon abi tantiasho bëdamboen isquinc isadaidpembomatses utsibon abi tantiasho bëdamboen isquinc nuqui caindac.

²⁵ Ambi matses utsibotsen aden bëdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ëmbi con matses cacmaidobi con matses cabenendambi. Adembidi ëmbi bëdamboen tantiacmaidobi matses utsibo bëdamboen isbenendambi,”

quequin Nuquin Papan chiaid dada uashun

²⁶ nadentsen dada uapampic.

“Matses utsibo ambi con matses cacmaidobi ambi tantiacpadën aido abentse-abentsen Nuquin Papan bëdamboen isendac.

Bëdamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bëdamboen iste chuiquin dada uapampic.

²⁷ Ambi con matses caidombi abi tantiatipimbo icsho isash Nuquin Papa chushquiaid con tsusedpa Isayasën naden dada uapampic. “Masitedi dadpenquio caidnëdaido isadaidbo daëdpactsëcshun abi tantiasho bëdamboen isquin aïdtedtsëqui Nuquin Papan cuidenquio iquendac.

²⁸ Ambi chiacpadomboen ambi tantiacpadën matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasën dada uapampic.

²⁹ Nuquin Papan chiaid padpiden dada uaquin isadaidbo cuidte Isayasën chuipampic naden.

“Shubu dadpen icquid Sodoma caid yacnocquidobëdta shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibëdquieic iquendac.

Adembidi con matses Nuquin Papan uesquin cuidtsempanëdash.

Abitedishun Icho icquin con matses nibëdquieicnuc cuidtsempanëdash. Dadpen cuidquin daëdpactsëc cuidabi icpanëdash,”

quequin dada uapampic Isayasën.

Isadaidbo bëdamboen istiapimbo icte chiaid

³⁰ Aden Isadaidbo dadpenshun abi tantienquio icsho Nuquin Papan bëdamboen istiapimbo iquec. Padnuen matses utsibo: —Mabi Nuquin Papan bëdamboen isnu. Ambi chiacpadec bëdamboec tabadnu —quesabobi: —Ëbi

cuidmenquo icnuec abided cuidadec unèsaid Esus bédamboshë iquec —quesho Nuquin Papan bédamboen isec icsaisabimboecnuc.

³¹ Isadaidboen: —Moisesën chiampiduidi ëmbembi nasho Nuquin Papan bédamboen isebe —queboedombi nainquo icsho Nuquin Papan bédamboen istiapimbo iquec.

³² ¿Atotsieshun Nuquin Papan isadaidbo bédamboen istiapimbo icpec? —Ambi chiacpadomboenuidi ëmbembi naquin Nuquin Papa bédamboen ismembi —queboedombi adotiapimbo icquin Nuquin Papa bédamboen ismequidquo Esus chieshë nec. Adsho Nuquin Papan bédamboen istiapimbo iquec.

³³ Esus tishabi icnuc isadaidbon Esus chieshënte chuiquin Nuquin Papan con tsusedpa naden dada uamepampic.

“Buintad bédambo icquid istuidash: ‘Nèidquo shubu uanun nitsinembi,’ quiacbimboen

Edusaden yacno ëbi bédamboen ismequidquo isadaidbobëd tabadmendambi.

Adec tabadsho anocquidon chieshëndac.

Aid chieshëntid nadquo iquendac. ‘Cuëte mabud iquec,’ quequin tantienquo yec nidec focoshquetanec uebudac bimboec

ëbi bédamboen ismequid tantienquo yec unèsash icsano nidendac.

Aid tantiaquido: ‘Nèid tantiasho Nuquin Papan abi yacno nuqui tabadmendac,’ quequid unèsacsho ëbi yacno tabadmendambi,”

quequin Nuquin Papan ambi chiaid dada uamepampic.

10

¹ Con matses isadaidbo tantiac unèsquo icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bédamboen ista, Papa —quequin Nuquin Papa chianiombi.

² Esus tantiabi ëmbi chuidenecpadomboen chiec: —Nuquin Papan chiacpadomboenuidi naquin Nuquin Papa bédamboen ismembi —quetsëcboedombi con matsesën Nuquin Papa bédamboen ismete tantienquo iquec.

³ —Abided cuidadaid Esus tantiasho Nuquin Papan bédamboen isebe —quetiadquidi icsamboen tantiec. —Nuquin Papan: “Bédamboec tabadta,” quequin chiaid Moisesën dada uactedi naquin Nuquin Papa bédamboen ismembi —quequin icsamboen tantiaquin Nuquin Papan tantiacpadomboen nainquo icquin Esus tantienquo iquec.

⁴ Esusuidtsëqui Nuquin Papan: —Bédamboec tabadta —quequin chiaid Moisesën dada uactedi naquidquo nec. Adec icsaisa yec matses icsaid bedshunec abided cuidadec unèsac caondash. Nèbi Esus tantiasho Nuquin Papan matses bédamboen isec icsaisabimboecnuc.

⁵ Nuquin Papan chiaid dada uaqin Moisesën chuipampic naden. “Ambi chiacpadomboenuidi naquid Nuquin Papan bédamboen isquin abëdi tabadmetsiash,” quequin Nuquin Papan chiaid Moisesën dada uapampic.

⁶ Aden ambi chiacpadomboenuidi natiadquidombi natiapimbo icsho Nuquin Papan matses bédamboen istiapimbo icpanëdash. Nèbi abided cuidadaid Esus tantiasho nuqui bédamboen isec. Adoac Esus tantiaquido nadenquo iquec. —Nuquin Papa yacno nidshun ¿tsuntsin Nuquin Papa nuqui bédamboen ismepatsiashba? —quenquo nuqui iquec. —Esusquo Nuquin Papa bédamboen ismequidquo nec —quequin nuqui tantiec.

⁷ Aden tantiec: —¿Tsuntsin Nuquin Papa bédamboen ismequidquo uincuemepatsiashba? —quenquo nuqui iquec. —Abided cuidadec unèsacsho Esus uincuemiac caondash —quequintsen nuqui tantiec.

⁸ Aid tantiasho Nuquin Papan nuqui bēdamboen isec. Ambi bēdamboen iste chuiquin Nuquin Papan naden dada uamepampic. “Nuquin Papan chiaid chuisho tantiash: ‘Abimbo chiec. Aid tantiembi,’ qesho Nuquin Papan matses bēdamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiasho Nuquin Papan nuqui bēdamboen isec. Aden nuqui bēdamboen ismequid Esus chuibenequid nebi.

⁹ —Nuquin Papan uincuemiaid Esus abitedishun Icho neque. Con Icho Esus canu —quequin chuisho Nuquin Papan nuqui bēdamboen isquin cuidenquo iquendac.

¹⁰ —Ēbi cuidmenquo icnuec abided cuidadaid Esus tantiembi —quequin otacquo tantiaquidēn: —Esus tantiaquid nebi —quequin utsibo abimbo chuisho bēdamboen isquin Nuquin Papan cuidenquo iquendac.

¹¹ Ambi chiaid Nuquin Papan dada uamiacpaden: “Aid tantiec: ‘Nēid tantiasho Nuquin Papan abi yacno nuqui tabadmendac,’ quequid unēsacscho ēbi yacno tabadmendambi.”

¹² Isadaidbo yec matses utsibo yec quequido Esus tantiaquidtedi adoendac. Aden abitedishun Icho icquin abi tantiaquidtedi Esusēn bēdambo icmendac.

¹³ Aden Esusēn nate chuiquin con tsusedpan Nuquin Papan chiaid dada uapampic. “‘Abitedishun Icbombo icsho mibi tantiaquid nebique. Ēbi bēdamboen ista, Icho,’ qesho bēdamboen isquin cuidenquo iquendac,” quequin dada uapampic.

¹⁴ ¿Mitsipaden matsesēn Esus tantiabempec? ¿Esusēn naid chiabi yacta matsesēn tantiapec? Padenquo. Esusēn naidquo chuibanancien tantiadac. ¿Esusēn naid chuisho tantiash: —Mua —quequidta Esus tantiaquid nepadic? Padenquo. —Abimbo caic —qeshun: —Min Mado Esus tantiembique. Ēbi bēdamboen ista, Papa —quequidien Esus tantiaquid nec.

¹⁵ ¿Mitsipadoaidēn Esusēn naid chuibampec? ¿—Chuita —cacmaidēnda chuibampec? Padenquo. Nuquin Papan: —Con Mado chuibeneta —caidien Esusēn naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bēdamboen iste chuibanquid chosho isash: ‘Bēdambo iquec,’ quec matses cuishonquendac,” quequin dada uamepampic.

Isadaidbo dadpenshun Esus tantienquo yaid

¹⁶ Adquidēn Esusēn naid chuibanac isadaidbo dadpenshun Esus tantienquo iquec. Daēdpactsēcshun tantiec. Abi tishabi icnu aden abi tantiesabo Esusēn chuite Nuquin Papan con tsusedpa Isayas caid dada uamepampic naden. “Mimbi chiaidquo ēmbi chuibansho ¿tsuntsin tantiapec, Papa? Daēdpactsēcshun: ‘Abimbo mimbi chiec. Mibi tantiaquin mimbi chiacpadomben naimbi,’ ēbi caindac, Papa,” quequin Esusēn aton Papa chuite Isayasēn dada uapampic.

¹⁷ Aden Esusēn naid chuibansho tantiashun: —Abimbo caic —qeshun utsibon Esus tantiec.

¹⁸ ¿Esusēn naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidēn naid chuibanquidēn chuibanendac.” Aden chuibansho ma con matsesēn tantiaboc.

¹⁹ Aden Nuquin Papan chiaid chuisho tantiash: —Tantiadenquo yec onquec —¿quepecta icnēdash con matses? Padenquo. Tantiashi abi bēdamboen tantiate bunenquo icsho isun matses utsibo bēdamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidbouidi ěmbi bědamboen iste mimbi danubi ěmbi con matses cacmaid-
obi matses utsibo bědamboen isbenendambi.

Ěmbi matses utsibo bědamboen iso isash: ‘¿Atotsieshun Nuquin Papan matses
utsibo bědamboen ispec?

Icsambo iquec,’ quec mibi chushquendac.

Matses utsibobi ěbi tantiabi icquido ěbi tantiamendambi.

Aido bědamboen isquin mibi něishěmendambi,”

quequin Nuquin Papan Moises dada uamepampic.

²⁰ Adembidi dacuědenquo icquin Isayasěn Nuquin Papan matses utsibo
bědamboen iste dada uapampic.

“ ‘Nuquin Papa tantiatiadquo iquebi,’ quenquo icquidombi ěbi tan-
tiabenosh.

‘¿Mitsipadembimi Nuquin Papa bědamboen ismepeba?’ quesabobi ěmbi
bědamboen iste tantiamiombi,”

quequin Isayasěn Nuquin Papan chiaid dada uapampic.

²¹ Isadaidbotsen chuiquin Nuquin Papan chiaidquiobidi Isayasěn naden
dada uapampic. “ ‘Mibi tantiac uněsquo iqueque. Ěbi bědamboen tantiata,’
cadeniaqui: ‘Padi, mibi tantiatiapimbo iquebi,’ quequin ěnenquo icquin ěmbi
chiaid mimbi niac-niacpec,” quequin Nuquin Papan chiaid Isayasěn dada
uapampic.

11

Ambi chiactedi isadaidbo Nuquin Papan bědamboen isaid

¹ ¿Ambi chiaid niac-niacsho isadaidbotedida Nuquin Papan chieshěmpec?
—Con matses catiapimbo iquebi —¿quecta iquec? Padenquo. Isadaidbombo
nebi. Ěndenquimboshě con tsusedpa Abadauan campiděn baban tishmiaid
Benaminěn tsyuecquidon tsyuecquid yec isadaidbombo nebi. Adquid icsho
Nuquin Papan chieshěnenquo iquebi.

² Ěndenquimboshě nidaid uabi icquimbi Nuquin Papan: —Con matses
caindambi —quequin con matses isadaidbo tantiapampic. Adshun abitedi
chieshěnenquo iquec. ¿Ediasěn chiampid tantienquoda ique? Aton matses
isadaidbo něishěnshun Nuquin Papa naden chuiampic.

³ “Mimbi con matses caidotedi icsamboshě icquec, Papa. Mimbi chiaid
chuiبانquidobi cuesun secac. Papa quequin mibi menequin ismete cuěnote
nacnenaid uesquin chic-chicpac, Papa. Icsamboshě iquec. Ěbiuidtsěqui
bědambo iquec. Mimbi chiaid chuibansho tantiaishun ěbi cuesunetiadquo
iquec, Papa,” quequin Ediasěn Nuquin Papa chuiampic.

⁴ Adoac ¿mitsipadomboen Nuquin Papan chuiampic? “Ěbi tantiaquido
abi iquec. Ěmbi namiacpadomboen isadaidbo dadpenshun 7000tedishun
ěbi tantiec. Ěbi tantiesabon papa quequin nacnenaid Bad caid tantienquo
icquin ěbi tantiec,” quequin Nuquin Papan Edias chuiampic.

⁵ Adembidi něbi con matses isadaidbon ambi tantiactedishun Esus tanti-
asho Nuquin Papan bědamboen isec.

⁶ ¿Ambembida con matsesěn Nuquin Papa bědamboen ismepec? Padenquo.
—Ěmbi chiacpadomboenuidi nasho matses bědamboen isembi —¿quecta icpec
Nuquin Papa? Padenquo. Aden naquid nibědsho bědamboen istiapimbo
ichěoděmbi ambi tantiactedishun icsaboedon Esus tantiasho Nuquin Papan
bědamboen isendac.

⁷ Isadaidbon ambi tantiactedishun Esus tantiasho Nuquin Papan
bědamboen isec. Isadaidbo utsiboen bědamboen istiapimbo iquec. Aido:
—Nuquin Papa bědamboen ismete bunquin ambi chiacpadomboenuidi

ëmbimbo nanu —queboedombi nainquo icsho Nuquin Papan bëdamboen istiapimbo iquec. Abi bëdamboen ismequidquo Esus chieshënsho Nuquin Papan pacuënëdabimboecnuc isadaidbo icmepanëdash.

⁸ Aden ambi isadaidbo pacuënëdabimboecnuc icmete chuiquin Nuquin Papan dada uamepampic naden.

“Nuquin Papan pacuënëdabimboecnuc icmiac Nuquin Papan chiaid chiaqui tantiatiapimbo iquec,”

quequin dada uamepampic.

⁹ Adembidi ambi isadaidbo pacuënëdabimboecnuc icmete chuiquin Nuquin Papan con tsusedpa Dabid naden dada uamepampic ëndenquimboshë.

“‘Ëbi bunaiduidi naic ëbibi bëdambo iquebi,’ quequidëmbi Nuquin Papa bëdamboen tantienquo iquec.

Adsho Nuquin Papan cuidpashun.

Cuidadnushi abimbo chiaid danec: ‘Ëmbembi naic bëdambo iquebi,’ quendac. Adec abi tantienquo yec icsasho Nuquin Papan cuidpashun.

¹⁰ Pacuënëdabimboecnuc icmequin Nuquin Papan abimbo tantiamenquo icpashun.

Natiamequin shubimepashun,”

quequin Nuquin Papan chiaid Dabidën dada uapampic.

Nuquin Papan matses utsibo bëdamboen isbenaid

¹¹ ¿Aden pacuënëdabimboecnuc icmiac Esus tantiatiapimbo icsho isadaidbo padpiden bëdamboen tantiametiapimboda Nuquin Papa icpec? Ambi tantiacpadomboen bëdamboen tantiamendac. Nëbi isadaidbo dadpen bëdamboen istiapimbo icquimbi matses bëdamboen iste bunquin Nuquin Papan matses utsibo Esus tantiamequin bëdamboen isbenec. —Ëmbi adosho isash isadaidbotsen ma nadnu. “Nuquin Papa bëdamboen ismete bunquiebi que. Ëmbitsen Esus tantianu,” ma quenu —queshun Nuquin Papan aden matses utsibo ambi bëdamboen iste tantiamiac.

¹² Ambi chomiaid Esus tantienquo icsho isadaidbo dadpen bëdamboen istiapimbo icquimbi matses utsibon Esus tantiasho ambi con matses caido isadaidbobimboecnuc Nuquin Papan bëdamboen isbenec. Ambi tantiacpadën ambi tantiamiacpadomboen isadaidbo dadpeshun Esus tantiaben-sho Nuquin Papan bëdamboen isendac. Adshumbic matses utsibobëda isadaidbo Nuquin Papan bëdamboeshë icmendac.

¹³ Tanta, matses utsibo. Mibitsen chuinu. Nuquin Papan icmiacpadomboen matses utsibo Esusën naid chuibenequidquo nebi. Ëmbi chuibeneboed con matses isadaidbo chuibanombi naden. —Esusën naid ëmbi chuibeniac matses utsibon Esus tantiabenosh. Adsho Nuquin Papan aido bëdamboen isbenosh —quequin con matses chiombi.

¹⁴ —Aden Nuquin Papan matses utsibo bëdamboen isaid ëmbi chuisho tantiash Nuquin Papa bëdamboen ismete bunquin Esus tantiatsiash. Adsho Nuquin Papan bëdamboen istsiash —queshun con matses aden chiombi.

¹⁵ Aden isadaidbon Esus chieshënsho isun Nuquin Papan matses utsibo Esus tantiamequin bëdamboen isbenac. Ambi tantiacpadëmbi isadaidbontsen Esus tantiasho Nuquin Papan bëdamboen isbenendac. Isadaidbontsen Esus tantiatededsho isumbic Nuquin Papan matses unësaidotedi uincuemendac.

¹⁶ Con tsusedpa Abadauan abi tantiaquidquo icsho Nuquin Papan bëdamboen isquin: —Con matses mibi caimbi. Adembidi min tsyuecquidot-sen ëmbi chiacledi con matses caindambi —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuëte caniacsho: —Tapunuidtsëqui con na nec. Dada con napenquo nec —¿capenda

ichon iquec? Padenquo. —Abichobi con na nec —caquid. Adembidi Nuquin Papan isadaidbotedí con matses caic. Caniec taëquid cuëte tapumbimboecquid abia con matses caid Abadauan nec. Cuëte cuidibimboecquido Nuquin Papan con matses caidobidi Abadauanën tsyuecquido isadaidbo nec.

17 Aden ambi con matses caidombi ambi chomiaid chieshënsho cuëte cuidi utsi pobinun pateshuniacimboen Nuquin Papan isadaidbo dadpen bédamboen istiapimbo iquec. Matses utsibo Esus tantiamequin cuëte dada utsi pobiacimboen aton matses icmequin ëbipadquid isadaidbo ambia Esus tantiaquidobëdta Nuquin Papan mibi bédamboen isec.

18 Adoac icsamboec onquenda. —Isadaidbo dadpen bédamboen isenquo icquin Nuquin Papan ëbien bédamboen isec. Isadaidbo icsambo iquec. Èbien bédambo iquec —quequin icsamboen chienda. Aden icsamboen chuitiadquid icquimbi nëid chaidtsen tantiata. Cuëte tapunabi icnuc dada yec podò yec quec cuëte ictiapimbo ictsiandac. Adechidi isadaidbo tsusedpa Abadauan abia tishabi icnuc aton tsyuecquido isadaidbo nibëdtsempampic. Isadaidbo nibëdnuc isadaidbon chidon Esus tishenquo ictsempañédash. Èmbi aden chiac isadaidbo chiec icsamboec onquenda.

19 ¿Èbi adsho tantiashta mibi nadpe? —Ambi con matses caido chieshëmënsho isun cuëte cuidi pateshuniacimboen nëbi isadaidbo dadpen Nuquin Papan bédamboen isenquo iquec. Èbipadquid matses utsiboen bédamboen isbenac —¿quecta iquec?

20 Abimbo mimbi caic. ¿Atotsieshun Nuquin Papan isadaidbo bédamboen istiapimbo icpec? Ambi chomiaid Esus tantienquo icsho Nuquin Papan aido bédamboen istiapimbo iquec. Padnuen Esus tantiashto mibi bédamboen isec. Adoac: —Èbi bédambo icnubi isadaidbo icsambo iquec —quenda. — Esus tantienquo icsho isadaidbo cuidacpadomboen ëbitsen Nuquin Papan cuidpanundac —quequin Nuquin Papa Esusbëdta tantiaquiota.

21 Ambi con matses caidon Esus tantienquo icsho Nuquin Papan bédamboen istiapimbo iqueque. Adembidi matses utsibon Esus tantienquo icsho Nuquin Papan miñi bédamboen istiapimbo iqueque. Esus tantiaquiota.

22 Aden Esus tantiasht nadec onqueta. —Esus tantiashto bédamboen isquid yec Esus tantienquo icsho isun cuidquid Nuquin Papa nec —cata. Esus tantienquo icsho cuëte cuidi pateshuniacimboen cuidquin isadaidbo bédamboen isenquo iqueque. —Esus tantienquo yansho adembidi ëbitsen cuidpanundac —qeshun chieshtoenuquo icquin Esus tantianuna.

23 —Padi, aid tantiatiapimbo iquebi —queboedombi isadaidbon Esus tantiabensho abëdi tabadmenuen Nuquin Papan bédamboen isendac. Ambi cuëte cuidi pateshuneboedi abibidi pobioacimboen padpiden bédamboen isendac.

24 Min matses abitedi Nuquin Papa tantiesabo icnédash. Nëbien cuëte icsan cuidi pateshuniacimboen Esus tantiamequin Nuquin Papan mibi bédamboen isec. Adoac Esusbëdta Nuquin Papa mimbi bëdiactsc tantiatsec. Con matses isadaidbo tsusedpabo Nuquin Papa tantiaquido dadpenquo icpampic. Nuquin Papan tantiamiac Esus chote chuiquin ënden dada uapampic. Ambi tantiacpadën ambi cuëte bëda cuidi peteshuniacimboen abibidi pobioacimboembí Esus tantiamequin Nuquin Papan con matses isadaidbo bédamboen isendac. Adoac cuëshëd—uidboedombi Nuquin Papabëdta Esus bédamboen tantiaquiendac.

Ambi chiacpadën Nuquin Papan isadaidbotsen bédamboen isoaid

25 Tanta. —“Isadaidbo icsambo iquec,” quequin chuinushe —qeshun mimbi tantiacmaid Nuquin Papan chiaid mibi chuinu. Nuquin Papan pacuënëdacimboecnuc icmiac con matses dadpen Esus tantiate bunenquo

iquec. Daëdpactsëcshun Esus tantiec. Nuquin Papan tantiactedishun matses utsibo dadpeshumba Esus tantiambic

²⁶ paposhquiacbimboen con matses isadaidbo dadpeshun Esus tantien-dac. Aden tantiasho Nuquin Papan con matses bëdamboen isendac. Aden ambi isadaidbo bëdamboen iste chuiquin Nuquin Papan naden dada uamepampic.

“Icsambo icquidobi cuidmenquo icnuec Nuquin Papa yacnuësh choquid isadaidbon chidon tishaid iquendac.

Aidëmbi isadaidbo Nuquin Papa tantiaquid padpiden icmendac.

²⁷ ‘Aden ëmbi chiacpadomboen ëmbi chomiaid tantiasho abi iccaid bëpiscudquin isadaidbo bëdamboen isendambi,’ quependac Nuquin Papa,”

quequin ambi chiaid Nuquin Papan dada uamepampic.

²⁸ Nëbi Esus chieshënsho isadaidbo bëdamboen istiapimbo icquin Nuquin Papan matses utsibo mibi Esus tantiamiac. Ambi nëbi bëdamboen istiapimbo yaido isadaidbo unësquo icnuc Nuquin Papan tantiaquiec. —Ëmbi aton tsusedpabo chiampicpaden aido con matses caimbi —quëshun adoec.

²⁹ Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic.

³⁰ Min matsesën isadaidpombon Nuquin Papa tantienquo yacbimboen nëbi isadaidbon Nuquin Papa tantiaquid Esus tantienquo iquec. Aden Esus tantiatiapimbo icsho isun Nuquin Papan Esus tantiaquid matses utsibo bëdamboen isbenac.

³¹ Con matsesëmbien abided cuidadaid Esus chieshënquin Nuquin Papan chiaid niac-niacpec. Adobedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bëdamboen isendac.

³² Aden matses abitedishun ambi chiaid niac-niacsho isun: —Abitedimbo icsaquiec —quequin matses bëdamboen istiapimbo ichoedëmbi nëbi Esus tantiasho Nuquin Papan bëdamboen isendac isadaidbo yec matses utsibo abitedi yec quenuc.

³³ Aden Nuquin Papan bëdamboen iste chuisho tantiash nadnuna. Nuquin Papa bëdamboshë iquec. Abipadquid utsi nibëdec. Matsesën naidtedi tantiaquidquo nec. Abitedimbo tantiaquid icquin ambi natiapimbo ictequid nibëdnuc bëdamboen naquidquo nec. ¿Ada adquid icsho Nuquin Papan naidtedi matsesën tantiapadic? Padenquo. Ambi naidtedi matsesën tantienquo iquec.

³⁴ “¿Nuquin Papan otacquo tantiaidtedida matsesën tantiapadic? Padenquo. ‘¿Mimbi tantienquo iquec. Ëmbi chiacpadomboen nata,’ quequinda matsesën Nuquin Papa chuipadic? Padenquo. Ambi tantiacpadomboem-bien Nuquin Papan naindac.”

³⁵ “¿Ada matsesën Nuquin Papa menepadic? Padenquo. ‘Në. Con na bedquin mitsana ëbi cuidquin mene, Papa’ ¿quequinda Nuquin Papa chuipadic? Padenquo. Matsesën: ‘Con na nec,’ caidtedi Nuquin Papan na nendac.”

³⁶ Abitedimbo uaquidquo yec abitedishun Icbombo Nuquin Papa nec. —Uesadec nibëdanushë —quequin abitedimbo isquidquo nec. Aton na abitedi nec. Adec abitedishun Icbombo icsho: —Nuquin Papa bëdamboshë iquec —canuna ënenquo icquin.

12

¹ Con utsibobimboecquido mibi neque. Tantia. Mibi chuinu. Nuqui cuidmenquo icnuec abided cuidadaid Esus tantiasho Nuquin Papan nuqui bēdamboen isequē. Nuquin Papa bēdamboen tantiatiadquo icquin nadonona. —Ēbi bunaid nainquo yec mibi bēdambo icmenuec mimbi chiacpadec bēdamboec tabadtiadquo iquebique. Min yuambo ēbi icme, Papa —quequin Nuquin Papa chuinuna.

² Esus tantiesabon nacpadomboen nainquo icquin Nuquin Papan Mayanēn pausunacpadomboen Esus tantiaquin nuqui icsate bunaid ēnuna. Aden nuqui icsate bunaid ēnquin Nuquin Papa bunacpadec bēdamboec tabadquin nuqui tantiendac. Aden naic nuqui bēdambo iquendac.

³ Tantia. Nuquin Papan tantiamiacpadomboen mibi chuinu. Nadenda. —Ēbiuidtsēqui bēdambo iquebi. Utsibo abitedi icsambo iquec —quenda. Nuquin Papan Mayanēn tantiamiacpadec mibibi datantiadec: —Adquid nebi —quequin abimbo chuita.

⁴ Nuquin Papan Mayanēn tantiamiacpadomboen naquid Esus tantiaquidēn. Adquid yec ¿ada Esus tantiaquido abitedi chuiquid dapa yampatiash? Padenquo. ¿Mitsipadquo min dada icpec? ¿Abichobida bedantequid icpec? Padenquo. Mēdanteuidtsēquien bedantequid iquec. ¿Abichobida istequid icpec? Padenquo. Ēshēuidtsēquien istequid iquec. ¿Abichobida shēdtequid icpec? Padenquo. Dēbiateuidtsēquien shēdtequid iquec.

⁵ Min dada yacimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bēdamboec tantiananquin nashunanquido yanec.

⁶ —Ma utsibo nashunu —queshun Nuquin Papan Mayanēn namiaid nec Esus tantiaquido. ¿Atotsi naquid Nuquin Papan Mayanēn mibi icmiac? Nuquin Papan ambi tantiaidquo oncamiaid iquendac. Adquid icquin Nuquin Papan Mayanēn tantiamiaiduidi chuibanta.

⁷ Utsibic: —Utsibo nashunquid icta —caid iquendac. Adquid icquin bēdamboen nashumbanta. Utsibic Nuquin Papan: —Ēmbi chiaid bēdamboen tantiashun chuibanta —caid iquendac. Adquid icquin Nuquin Papan chiaid tantiatsecquido bēdamboen tantiameta.

⁸ Utsibic: —Chieshtoenquo icquin Esus tantiec bēdamboec tabadnuna —quequin bēdamboec tabadquin ismequid iquendac. Adquid Nuquin Papan icmiaid icquin Esus tantiaquido bēdamboec tabadte tantiameta. Utsibic aton na nibēdquido aton na menequid Nuquin Papan icmiaid iquendac. Adquid icquin cudasenquo icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusēn namiacpadomboen Esus tantiaquido bēdamboen nameta chieshenquo icquin. Utsibic dada icsaido yec isedanquido yec aton shubu nibēdquido yec aton pete nibēdquido yec macho yec tsusioctsec yec quesho bēdamboen nashunquid iquendac. Adquid icquin Esusēn chiacpadomboen chieshtoenquo icquin nashumbanta.

Esus tantiaquidon nadoquid, quiaid

⁹ —Mibi tantiac unēsquo iquec —quequin utsibo chuiquin abimbo chuinuna. Muainquo icquin utsibo tantiaquionona. Chieshēmēnenquo yec bēdamboec tabadnuna. Utsibon: —Icsanuna —caqui: —Padi —quiash icsainquo yec bēdamboec tabadnuna.

¹⁰ —Ēbēdtan Esus tantiaquido con utsibobimboecquido nec —quiash bēdamboec tantianuna. —Nēid con buchibimboecquid bēdambo iquec. Aidēn chuisho bēdamboen tantianuna —canuna nuquibēdtan Esus tantiaquido chuiquin.

11 Nuquin Papan chiacpadomboen naic chieshtoenda. Nuquin Papan Mayanën tantiamiacpadec Esus tantiec chieshtoenquo yec bédamboec tabadnuna.

12 —Unēsacsho abi yacno Nuquin Papan ēbi tabadmendac —quec cuis-honquenuna. Esus tantiaquido icsho utsibon chieshēnaqui chieshtoenquo icquin Esus tantianuna. ¿Atotsi natiamiante utsi icpec? Adquid tantiec shubiquimbi chieshtoenquo icquin Esus tantianuna. Baded-badedquien Nuquin Papa chian-chianuna.

13 Nuquibēdtan Esus tantiaquido aton na nibēdsho isun nuquin nabi menenuna. Isedanquido bédamboen isnuna. Pemequinc nuquin shubun ushmequinc canuna.

14 Esus tantiaquido yec nuqui chieshēnquidobēdi chieshēnanenquo icnuna. Chieshēnanenquo icquin Nuquin Papa naden chuinuna. —Ēbi chieshēnquido bédamboen tantiameta. Chiesh bédameta, Papa —quequin Nuquin Papa chuinuna.

15 Utsi bédambo yec cuishonquesho isash aidbēdi cuishonquenuna. Utsi unēsquo icnu shubisho isash aidbēdi shubinuna.

16 Cuesnanenquo yec chieshēmēnenquo yec bédamboec tabadnuna. —Con nauidsēqui naimbi —quenquo icquin utsibobēdtan bédamboen nanuna. —Ēbiuidtsēqui bédambo iquebi. Ēmbi tantiacpadomboenuidi naimbi. Utsibon chiaid natiapimbo iquebi —quenquo yec bédamboec tabadnuna. —Chuiquid dapabēduidsēqui onquequid nebi —quenquo yec matses abitedibēd onquec bédamboec tabadnuna.

17 Chieshēnaqui cuidnanenda. —Ma utsibo: “Bédamboec tabadquido nec,” quenu —quiash bédamboecuidi tabadnuna.

18 Uimanēmēnquido icsasho isun aid chuiquin: —Bédamboequien tabadtiad —canuna. Adquidobēd chieshēnanenda.

19 Ēmbi tantiaido mibi neque. Tanta. Chuinu. Nuqui chieshēnquidobēdi cuidnanenquo icnuna Nuquin Papan naden chiaid tantiash. “Matses cuidnanac icsambo iquec. Ēbentsēcquiobini icsaido cuidquid nec,” quequin Nuquin Papan chiaid dada uapampic.

20 Nuqui chieshēnquidobēdi cuidnanenquo icquin bédamboen isnuna. “Pete bunsho pemequinc acte bunsho acmequinc canuna. Nuqui chieshēnquido: ‘Bédambo icquidi chieshēnec icsachitobi,’ quiash ma nēish bēdanu,” quiash

21 adec cuidnanenquo icquin nuqui chieshēnquido bédamboen isnuna.

13

Chuiquid dapan chiacpadomboen Esus tantiaquidēn naquid

1 Aton matses chuiquid dapan chiacpadomboen Esus tantiaquidēn naquid. Adembidi aton nidaid pais caidēn tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibēdtsiash. Nuquin Papan chuiquid dapa icmiaidien aido nec —queshun aidon chiacpadomboen naquid Esus tantiaquidēn.

2 Nuquin Papan chuiquid dapa icmiaidēn chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid.

3 Bédamboec tabadquidon chuiquid dapan cuidte dacuēdēntiapimbo iquec. Adquido cuidenquo icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bédamboec tabadta. Adsho isun: —Mibi bédamboec tabadec —catsiash chuiquid dapabon.

4 —Ma matses bédamboec tabadnu —quequin Nuquin Papan chuiquid dapa icmiaidēn mibi bédamboen tabadmetiadquid iquec. Nuquin Papan icmiac

icsambo icquido cuidquid nec. Adquid icnuc: —Icsasho chuiquid dapan ëbi cuidpanundac —quiash icsaquid dacuëndendac.

⁵ Ëbi adsho tantiashun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin Papan chiacpadomboen natiadquio iquebi —qeshun adonona.

⁶ Bëdamboen tabadmenuen Nuquin Papan chuiquid dapa icmiaidon: —Ëmbi chiacpadomboen nata —cac naquid Esus tantiaquidën.

⁷ Aden chuiquid dapan chiacpadomboen nanuna. Aid bëdamboen isnuna. Aidën: —Nata —cac nanuna chieshenquo icquin.

Utsibo tantiaquionona, quiaid

⁸ —Ëmbi nashumbocpadomboen ëbi cuidquin nashunenquo iquec —camenda. Abi nashunquidobëd cuidnanquid Esus tantiaquid. Esus antiquidbidi bëdamboec tantiananquid. Adec bëdamboec tantiananquin Nuquin Papan Moises chiampicpadomboen nuqui bëdamboen natsiac.

⁹ “Ambi naiduidtsëqui nainquo yec abibi datantiadacimboec ma matses bëdamboec isnanu,” quequin Nuquin Papan Moises naden dada uamepampic. “Min chidopenquo chudenda. Adembidi min bënëpenquo chudmenda chidon. Cuesunenda. Ampenda. Utsin na isash: ‘Adquid con na nibëdosh,’ quec chieshëmë nec tabadenda,” quequin Nuquin Papan con tsusedpa Moises dada uamepampic. Aidën chiacpadomboen natiadquio icquin nuquibi datantiadacimboen utsibotsen tantiaquionona.

¹⁰ Utsibo bëdamboen isquin aido icsa uatiapimbo nuqui ictsiac. Aden utsibo bëdamboen tantiasho Nuquin Papan: —Aden naic ëmbi Moises chiacpadec bëdamboec tabadec —caindac.

¹¹ —Nëbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushacimboen nainquo icboedi nëbi ushash isucunacimboec dayacquio yec chieshtoenquo icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi:

¹² —Nëbien Esus chochitec —quedonetsëcquiec bëdamboec tabadnuna. —Satanasën yuanushe —qeshun Esus tantiaquin nuqui icsaid ënshun bëdamboen nanuna.

¹³ Icsainquo yec: —Bëdambo iquebique. Ma isnu —quiash bëdamboec tabadnuna. Tantiadenuen actequid paëmbo icquid aquenquo icquinc utsin chido chudenquo icquinc utsin utsin bënë chudmenquo icquinc chido utsi mëismenquo icquinc canuna. Adecbidi utsin na isash: —Con na adquid nibëdec —quiash chieshëmë nec tabadenquo icnuna. Adembidi utsin mibi bunaid nasho isash: —Aden ëbi namenquo icpec —quec chieshëmënenquo icnuna. Icsainquo yec bëdamboec tabadnuna.

¹⁴ —Icsate bunchitebi. ¿Mitsipaden nainquini icsape? —quenquo yec Esus tantiaquiec abi tabadacpadquiec bëdamboec tabadnuna. Nuqui icsate bunaid ënquionona.

14

Esus tantiaquido utsibo bëdamboen isaid

¹ Nuquibëdtan Esus tantiatsëcquidon nuqui nacpadomboen nainquo icsho bëdamboen isnuna. Ambi chiaidquio chuiquin Esus tantiaquidon natetedi Nuquin Papan uesquin chiabi iquec. —Naden nac bëdambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chiec nuquibëdtan Esus tantiatsëcquido: —Ëmbi natemaid nec —qeshobi: —Icsamboen chiec —cainquo icnuna.

² Esus tantiaquidquo: —Pete abitedi pambidbēdta pesho Nuquin Papan nēishēnenquo iquec —quenubien Esus tantiatsēcquid: —Padi. Pambid pesho isun Nuquin Papan nēishēnushe. Esus tantiaquidēn nitsinaid pequid. Pambid isuidquid —quepec.

³ Pambid pequidobēdтан pambid isuidquidombi Esus tantiasho Nuquin Papan aid daēdi bēdamboen isec. Padnuen pambidbēdta pete utsi abitedi pequidēn pambid isuidquid mamēnshunac icsambo ictsiash. Adembidi pambid isuidquidēn: —Pambid pequid icsambo iquec —cac icsambo ictsiash.

⁴ ¿Icbonpenquioda: —Yua icsambo iquec —capadic? Icbombien adoquid. Adembidi: —Mibi bēdambo iquec —caquid icbon. Nuquibēdтан Esus tantiaquid Nuquin Icbon yua icsho: —Ēmbi nacpadomboen nainquo yec mibi icsambo iquec —cainquo icnuna. —Nēid icsambo iquec. Nēid bēdambo iquec —quequin Nuquin Icho Esusēn ambentsēqui abi tantiaquido chiendac. Aidēn namiacpadomboen abi tantiaquidon bēdamboen naindac.

⁵ Esus tantiaquido utsi-utsiec: —Aid badiadquidēnuidtsēqui Esus tantiec cuēdēnac bēdambo ictsiash —quenubien utsibo: —Badiadquidēn badiadquidēnquiec Nuquin Papa Esusbēdta tantiec cuēdēnebi —quecuēdedpec. Adquid daēd icsho Nuquin Papan nēishēnenquo iquec. Esus tantiaquid ambi tantiacpadēnquiobi cuēdēnac bēdambo ictsiash.

⁶ Aden Esus tantiaquin nac bēdambo ictsiash. Adembidi Esus tantiaquin: —Mimbi pete uaid bēdambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bēdambo iqueque. Aid penu —queshun utsi pequimbi pambid isuidquid iquendac.

⁷ ¿Esus tantiaquid ambi naid-uidi naquidta nedic? Padenquo. ¿Ambi tantiacpadēn unēsquidta nedic? Padenquo.

⁸ Nuquin Icho Esusēn chiacpadomboen natiadquo yec nuqui tabadec. Ambi tantiacpadēn nuqui unēsendac. Unēsabi yec tabadec Esusēn yuambo icboedi unēsash adecbidi aton yuambo nuqui iquendac.

⁹ Adec Nuquin Icho icnuec abided ciudadec unēsash Esus uincuempānēdash. Unēsabi yec nuqui tabadnuc Nuquin Icbombo icboedi nuqui unēsan adecbidi Nuquin Icbombo iquendac.

¹⁰ —Adquid Nuquin Icho iquec —quesho ¿tantiashunda nuquibēdтан Esus tantiaquid mamēnshuntiad? Padenquo. ¿Nuquin Papan chiacmaid chiec: —Ēmbi nacpadomboenuidi nainquo yec icsambo iquec —quequinda chushcatiad? Padenquo. Nuquin Icho Esusbēdтан Nuquin Papanuidtsēqui matsesēn naidtedi chiendac. —Nēid bēdambo iquec. Utsi icsambo iquec —quequin chiendac matses abitedishun tantianubi.

¹¹ Adote chuiquin Nuquin Papan ambi chiaid naden dada uamepampic. “Tantia. Abimbo caimbique.

Naden matses abitedishun ēbi chiendac.

‘Abitedishun Icbombo mibi nec.

Bēdamboshē icquidquo mibi nec.

Abitedishun naid tantiaquid icquin mimbiuidtsēqui: Nēid icsambo iquec.

Nēidien bēdambo iquec, quequin abimbo chiendac,’ quequin matses abitedishun ēbi chiendac.”

quequin Nuquin Papan dada uamepampic.

¹² Aden ambi cuidte ushēn Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

Utsibo icsamenquo icnuna, quiaid

¹³ Ēbi adsho tantiashun Nuquin Papan: —Adoenda —quequin chiacmaid nuqui tantiaid chienquo icnuna. —Ēmbimbo natemaid naic aido icsambo

iquec —nuquibëdtan Esus tantiaquido cainquio icnuna. Adenquio icquin naddonona. —Ëmbi ambi natemaid nasho isash chieshtoshon Esus tantienquiu yanushe. Ambi natemaid naquin ismenquio iquembi —qeshun Esus tantiaquidtedi bëdamboen isnuna.

14 Nuquin Icho Esuquidistu tantiaquidquio icquin ëmbien naden tantiec. —Nëbi Nuquin Papan: “Petemaid nec,” caid nibëdec —quequin tantiembi. Ëbi adnubi utsibo: —Petemaidquio nec. Aid pec icsamane. Aid petiapimbo iquebi —qeshumbi adquid pec: —Icsachitobi —quetsiash.

15 Adsho tantiashun aido bëdamboen tantiaquin ambi petemaid nuqui pemenuo ictsiac. Ambi petemaid pemequin mimbi aido tantienquio iquec. —Ëmbi petemaid piash icsachitobi —quequin Esus tantienquio yanushe. Ambi petemaid pemenda. —Nëid petemaid nec —quequido aidotsen tantiaquin cuidmenquio icnuec abided cuidadec Esus unësaque. Aido tantiata.

16 —Nuquin Papan chiaid niaquenquio icquin Esus tantiaquido utsibon: “Aden naic icsatsiash,” caid naimbi. Ëmbi tantiacpadomboen naimbi —qeshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ëmbi natemaid naique —camenda.

17 ¿—Nadquid petemaid nec. Nadquid actemaid nec —quequin petebëdta acteuiddi tantiecta Nuquin Papan chiacpadec Esus tantiaquido bëdamboec tabadpatsiash? Padenquio. Aton Mayan nuquibëdi tabadmiac chieshëmënenquio yec cuishonquec Esus tantiaquido bëdamboec tabadendac.

18 Adec Esuquidistun chiacpadec tabadsho isun Nuquin Papan: —Bëdambo iquec —caindac. Matsesëntsen: —Aido bëdambo iquec —caindac.

19 Ëmbi chiacpadec chieshëmënenquio yec bëdamboec isananuna. —Esus tantiec chieshtoenquio yec bëdamboec tabadnuna —quec chuinanuna.

20 —Nuquin Papan bëdamboen isaidon Nuquin Papa Esusbëdta tantienquio yanushe —qeshun utsibon petemaid pequin aido chieshtomenda. Nuquin Papan: —Matsesën petemaid nec —caid nëbi nibëdnubi Esus tantiatsëcquidën petemaid pequin aid chieshtomec mibi icsatsiac.

21 —Ëbëdtan Esus tantiaquido icsamemane —qeshun ambi petemaid pambid penquio icquinc ambi actemaid acte paëmbo icquid aquenquio icquinc ambi natemaid utsi nainquio icquinc cac bëdambo ictsiash.

22 Nuquin Papan: —Matsesën natemaid nec —cacmaid tantiaquin: —Ëmbimbo petequid nec. Ëmbimbo actequid nec. Ëmbimbo natequid nec. Aden nasho Nuquin Papan ëbi cuidenquio iquec —quequin mimbi tantiaid caic: —Natemaid nec —quequido naden chienda. —Ëmbi nacpadomboen nainquio yec mibi icsambo iquec —cainda. Adembidi aidon: —Ëmbi natemaid nec —caboed naquin ismenda. Chieshtonoshe.

23 Adquid ambi: —Aid pesho Nuquin Papan nëishënhchitembini ictsiash —caboed piash —Icsachitobi —quetsiash. Adsho Nuquin Papantsen: —Ai, adec icsaic —catsiash. —Aden naic icsachitequini ictsiac —nuqui caidtedi naic nuqui icsatsiac.

15

Nuqui bunaiduidi nainquio icnuna, quiaid

1 Esus tantiaquidënquio Esus tantiatsëcquid chieshënenquio icquid. —Natemaid nec —quequin Nuquin Papan chiabi icnubi Esus tantiatsëcquid: —Esus tantiaquin ëmbimbo natemaid nec —qesho tantiashun ambi natemaid naquin ismequin chieshtomenda. Aid tantiaquin ambi natemaid nainquio icquin nuqui bunaiduidi nainquio icnuna.

2—Esus tantiatsëchoedëmbi ma Esus bédamboen tantiabenquiono —quequin nuquibédtan Esus tantiatsëcquidën natemaid nainquio icnuna. —Aden naic mibi bédambo iquec —camenuen ambi natemaid nainquio icnuna.

3 Esuquidistun ambi naiduidi nainquio icquin Nuquin Papan chiacpadomboenuidi naic abi chieshëñquido yacnobi chöpanëdash. Esus tishabi icnuc Esusën chuite chuiquin Nuquin Papan con tsusedpa naden dada uamepampic. “Mibi chieshëñacpadomboen chieshëñquin ëbi icsamboen chuishunec, Papa,” quequin Esusën abi chuite Nuquin Papan dada uamepampic.

4 Aden con matses isadaidbobëdta matses utsibo abitedi bédamboen tantiamenuen Nuquin Papan ambi chiaid dada uamedenepampic. —Nëid isban-isbanquin ëbëdta Esus ënenquio icquin tantiec ma matses bédamboec tabadnu. Adec bédamboec tabadec: “Unësash Esusbëdi Nuquin Papa yacno tabadendabi,” ma matses quenu —queshun ambi chiaid dada uamepampic.

5 Aden matses chieshtoenuio icnuc bédamboen tabadmequid Nuquin Papa mibi chianemi. —Chieshtoenuio icquin Esus tantiaquid icmequin dayacquoio yacimboecnuc matses bédamboen tabadmequid mibi nec, Papa. Adquid icquin Doma yacnocquidon Esus tantiasho bédamboec isnanquid icmeta, Papa.

6 Mimbi adoac: “Nuquin Papa chuinuna,” cac aidon abitedishun: “Ai, adonona,” queshun mibi naden chuitsiash, Papa. “Con Icho Esuquidistun Papa mibi nec. Mibi bédamboshë iquec,” quequin mibi chuitsiash, Papa —quequin Nuquin Papa mibi chianemi.

Nuquin Papan matses utsibo Esus tantiamiaid

7 Tantia. Padpiden mibi chuinu. —Nuquin Papa bédambo iquec —nuqui camenuen Esuquidistun nuqui bédamboen isequë. Bédamboec isnanuna. Isadaidbo yec isadaidpembo yec quec bédamboec isnanuna.

8 Esuquidistu matses abitedi bédambo icmenuec matsesbëd tabadpanëdash. Esus chote chuiquin Nuquin Papan dada uamepampicpadec isadaidbobëdi tabadquin Esusën aido nashumpanëdash. —Nuquin Papan abimbo chuipampic —quequin tantiamenuen adopanëdash.

9—“Icsaboedombi Esus tantiasho Nuquin Papan bédamboen isquin cuidenquio iquec. Nuquin Papa bédambo iquec,” ma isadaidpembo matses utsibo quenu —quecbidi Esus matsespanëdash. Aidën abi chuite chuiquin Nuquin Papan naden dada uamepampic.

“Isadaidpembo matses utsibobëdta mibi naden chiendambi.

“Nuquin Papa bédambo iquec,” caindambi mibi.

Adecbidi mibi bédamboen tantiec cuëdënenabi,”

quequin Esusën abi chuite Nuquin Papan dada uamepampic.

10 Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobëdi cuishonqueta.

“Nuquin Papa bédambo iquec,” quec cuishonqueta,”

quequin Nuquin Papan chiaid dada uapampic.

11 Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

“Nuquin Papa bédambo iquec,” cata.

“Nuquin Papa bédambo iquec,” quec cuëdëncuededec tabadta,”

quequin dada uapampic.

12 Adembidi isadaidpembon matses utsibon Nuquin Papabëdta Esus tantiabente chuiquin Nuquin Papan con tsusedpa Isayas naden dada uamepampic.

“Dabidën papa Isai caid ënden unësampidën tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bēdamboen namendac.

Aid caic: ‘Nēidēn nuqui cuidmenquo iquendac,’ quependac isadaidpembo matses utsibo,”
quequin dada uapampic.

¹³ Aden chiampid mibi nec. Nuquin Papa Esusbēdta tantiaquido icsho mibi Nuquin Papa chianembi. —Mibēdi matses tabadmequidquo mibi neque. Mibi tantiamequin Doma yacnocquido cuishoncameta, Papa. Adembidi dacuēdenquo icnuc bēdambo icmeta. Aden min Mayan aidobēdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

Matses utsibo Esus chuibanquid nebi, quiaid

¹⁴ Con utsibo mibi caimbigue. Tantia. Mibi chuinu. —Nuquin Papan Mayanēn tantiamiacpadec bēdamboec isanec bēdamboec tabadtiadquo icquidien nec. Aidēn tantiamiacpadomboen Nuquin Papan chiaid bēdamboen tantiec: “Nuquin Papan chiacpadec bēdamboec tabadnuna,” quec chuinanquidien nec —quequin mibi tantiombi.

¹⁵ Aden tantiaish: —Nēishēnushe —quenquo icquin: —Bēdamboec tabadta —quequin chuiquin nēid dada uaimbi. Nuquin Papan: —Esus chuibeneta —caid icquin mimbī ēnden tantiaidbidi Esusēn naidquo bēdamboen mibi tantiamenuen dada uaimbi.

¹⁶ Nuquin Papan icmiacpadquid Esusēn naid chuibenequidquo nebi. Adquid icquin isadaidpembo matses utsibo Esus tantiaquido Nuquin Papan bēdamboen iste chuibeniombi. Adoac matses utsibon Esus tantiabensho isun aton Mayanēn bēdamboen tabadmesho: —Bēdambo iquec —caindac Nuquin Papan.

¹⁷ Aden: —Esuquidistu bēdamboshē iquec —quequin matses utsibo dadpen Esusēn naid chuibeniombi.

¹⁸⁻¹⁹ Esuquidistun ēbi namiaiduidtsēqui mibi chiec nendabi. Aidēmbi namiac matses utsibo Esusbēdta Nuquin Papan naid chuibenequimbi Nuquin Papan Mayanēn tantiamiacpadomboen comapenen tantiaquin nacenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquo yanosh. Shubu dadpen icquid Edusaden yacnuēsh ēnapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi.

²⁰ Esusēn naid chiacmanouidquo Esusēn naid chuibenetiadquo iquebi. Utsibon Esusēn naid chuibanacno nidtiapimbo iquebi. Esusēn naid chuisho tantiacmaido Esus chuite bunquiebi.

²¹ Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidēn naid chuisho tantiacmaidon tantiabenendac. Adshun paposhquiacbimboen bēdamboen tantiendac,”

quequin dada uamepampic.

²² —Aden Esusēn naid chiamo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusēn naid tantiaish —quiaish mibi yacno nidabi iccobi. Nēbi mibi yacno nidtiadquo iquebi.

Mibi yacno nidtiadquo iquebi, quiaid

²³ —Nēbi Ididico yacno Esusēn naid uesquin chuibeniac —quiaish mibi yacnosen nidtiadquo iquebi. Ēdenquimbo taēc mibi yacno nidte bunondaiddi seta dadpen matamiashic adi nēbi mibi iste bunquiebi.

²⁴ Nidaid utsi Espania caid yacno nidquimbi mibi isbidanendambi. Doma yacno nidash mibēdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibēdi nidendac —ēbi caindac mimbi. Aden tantiec mibi yacno isbidantiadquio iquebi.

²⁵ Nēbini Edusaden yacnoba nidendac. Anocquido Esus tantiaquido utsi-bon meniaid menenuc nidendabi.

²⁶ —Edusaden yacnocquido Esus tantiaquido utsi-utsiec aton piucquid nibēdeque. Nuquin nabi ma buanshunu. Menenuna —queshun Esus tantiaquido icquin Acaya yacnocquidobēdtambi Masedonia yacnocquidon: —Con na buanshun meneta —caposhi.

²⁷ Aden ambi tantiacpaden nasho: —Bēdambo iquec —caombi. Edusaden yacnoshon Esusēn chiac isadaidbomba Esus tantiapanēdash. Adshumbic aidon chuibeniact matses utsibontsen Esus tantiapanēdash. Aden abi nashunquin chuiquido Edusaden yacnocquido caic: —“Piucquid nibēdec,” quiac caoshe. Menenuna —quesho: —Bēdambo iquec —caombi.

²⁸ Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibēdquido menebanash nidaid utsi Espania yacno nidquin mibi isbidanendambi.

²⁹ Mibēdi tabadquin ēmbi Esus tantiamequin chuisho Esusēn nuqui bēdambo icmendac.

³⁰ Ēmbi tantiaidombo mibi neque. Tantia. Chuinu. Nuquin Icho Esuquidistun aton Mayambēdtan tantiamiacpadec nuqui bēdamboec tantiananec. Ēbi tantiaquin Nuquin Papa chianeta. —Ēnenquo icquin Esus tantiamequin mimbi chiacpadomboen Pabado name, Papa.

³¹ Udeya yacno nidsho Esus chieshēnquidon Pabado cuesnushe. Bedmenda, Papa. Piucquid buanacsho Edusaden yacnocquido Esus tantiaquido bēdamboen bedmeta, Papa. “Matses utsibon isadaidpembon meniaid bētemaid nec,” quequin bedenquo icnushe. Bēdamboen bedmeta, Papa —quequin Nuquin Papa chianeta.

³² Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bēdamboec tabadendac Esus tantiamenanec.

³³ Aden mibi tantiaquin: —Nuqui dacuēdenquo icnuc bēdambo icmequid Nuquin Papa mibēd icpashun —cāmbi.

16

Mibi unēsquo iquec, quequin chiaid

¹ Nuquibēdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bēdamboen ista. Shubu dadpen icquid Senquedeya caid yacnoshon utsibo bēdamboen nashunquidquio nioshe.

² Pebe bēdamboen ista. Utsibobēdta ēbitsen bēdamboen nashunoshe. —Nuquibēdtan Esus tantiaquid nec —queshun bēdamboen isquin aidēn: —Ēbi nashunta —cacadomboen aid nashunta.

³ Aquida caidbēdta aton chido Pidisida caid chuiquin: —Mibi caic: “Unēsquo iquec,” quiosh Pabado —cata. Aidon ebēdtan Esusēn naid chuibeniendashe.

4 Aden Esusën naid chuibenesho: —Cueschitomane. Aden chienda — Esus chieshënquidon caqui aidon adembidi ëbëdtan Esusën naid chuibeniondash. Adsho isun: —Mimbi bëdamboen naoc —caondambi. Adembidi aidon chiondaidon isadaidpembon chiondash.

5 Aquidon shubuno Esus tantiec cuëdë nec cho-choquidotsen chuita. —Mibi caic: “Unësquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabenonaid ëmbi tantiaidquio Epeneto caidtsen adembidi chuita.

6 Nëidtedi chuiquin: —“Mibi unësquio iquec,” quiosh Pabado —cabanta. Nëidic Madia caid mibi nashunquidquio.

7 Nëidic con matses isadaidbo Andedonico caid. Nëidic con matses Unias caid. Aidon ëbëdtambi Esusën naid chuibenesho chieshëmënquidon bedshun quënën nauedondash. Aidombien ambia Esus tantiabempac caondash ëmbi padabi icnubi. Adsho aidoba Esusën: —Ëbi chuibeneta —cac chieshtoenquio icquin Esus chuibenequido nec.

8 Nëidteditsen chuiquin: —“Mibi unësquio iquec,” quiosh —cata. Nëidic Esus tantiaquid utsi Ampídias caid ëmbi tantiaidquio.

9 Nëidic Esusën naid chuiquid utsi Udbano caid. Nëidic ëmbi tantiaidquio utsi Estaquis caid.

10 Nëidic Apedes caidtsen. Utsibon chieshënaqui chieshtoenquio icquin Esus tantiaquidquio nec. Nëidic Adistobudo caidën shubun icquidotedi. Aidtedi: —Mibi caic: “Unësquio iquec,” quiosh Pabado —cabanta.

11 Nëidotsen adembidi chuita. Nëidic con matses utsi Edodion caid. Nëidic Nadsiso caidën shubun icquido Esus tantiaquidtedi.

12 Nëidic chido Tidipena chedo Tidiposa caidbëdi. Aido Esus tantiec dayacquio icquin ambi chiacpadomboen nabanquido nec. Nëidic chido utsi Pedsida caid con chu icbobimboecquidquio. Aidtsen Esus tantiec dayacquio icquin ambi chiacpadomboen naquidquio nec.

13 Nëidic Dupo caid Nuquin Papan Esus tantiamiaidquio. Nëidic aton tita con tabimboecquidquio.

14 Nëidic Asinquidito caid. Nëidic Pedeconte caid. Nëidic Edmes caid. Nëidic Patëdobas caid. Nëidic Edmas caid. Nëidic abëd icquido Esus tantiaquido.

15 Nëidic Pidodoco caid aton chido Udiabëdi. Nëidic Nedeyo caid aton chuchubëdi. Nëidic Odimpas caid. Nëidic abëd icquido Esus tantiaquido. Aidtedi chuiquin: —Mibi caic: “Unësquio iquec,” quiosh Pabado —cabanta.

16 Esus tantiaquido yec bëdamboec isnanta. —Mibi tantiembi —cananta. Nëmbo icquido Esus tantiaquidtedi mibi caic: —Unësquio iquec —quiosh.

17 Ëmbi tantiaido mibi neque. Tantia. Mibi chuinu. ¿Ada mibëdtan Esus tantiaquido chieshëmequin cuëshëdmequido icpec? ¿Ada Nuquin Papan chiaid mimbi tantiaid chienquio yec mibi icsamenuec muaquido icpec? Adquidobëd onquec tabadenda.

18 Nuquin Icbo Esuquidistun chiacpadomboen nainquio icquin ambi petequid-uidtsëqui aidon chieque. Aidon: —Mibi bëdambo iqueque. Ëmbi chiaid tantiata —quequin ambi chiacpadomboen namequin Esus tantiatsëcquid icsamec.

19 —Doma yacnocquido abi tantiec Esusën chiacpadec bëdamboec tabadosh —quequin mimbi naid chuibenesho dadpenshun tantiac caosh. Adsho tantiash bëdambo iquebi. Adecbidi Nuquin Papan chiaid tantiec bëdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quaiash aibbëdi icsainquio icta.

20 Nuqui bëdamboen tabadmequid Nuquin Papa nec. Aidëmbi matses icsamequidquio Satanas chedo compenen cuidendac. Nëbi Satanasën mibi

icsametiadquio icsho tantiashun: —Satanas yuamenquio icnuen Nuquin Icho Esusën abibi tantiamequiopashun —mibi caimbi.

²¹ Nëmbo icquidtedishun mibi tantiec. Mibi caic: —Unësquio iquec —quiosh Timoteyo ëbëdtan Esusën naid chuibenequidquio. Adembidi con matsesën chiosh. Dusio caid yec Ason caid yec Sosipated caid yec quec adosh.

²² Pabadon —Naden na —cac nëid dada uaquidquio Tesio caid nebi. Esus tantiaquid icquin ëmbitsen mibi tantiembi. Padi. Aidedtedsëqui ëmbimbo tantiaquin chuishun Pabadon chiaidbidi dada uaoaimbi.

²³ Nëidteditsen mibi caic: —Unësquio iquec —quiosh. Nëidic Cayo caid. Aidën shubun ushobi. Adnuc Esus tantiaquido iccuedednuec aton shubun pudued-puduedosh. Nëidic Edasto caid. Aid nëmboquidon bedtequid bedbeneshun dayun uaquid nec. Nëidic nuquin utsibimboecquid Cuadto caid. Aideddishun mibi aden tantiosh.

²⁴ Doma yacnocquido mibi tantiaquin: —Nuquin Icho Esuquidistun bëdamboen isquin mibi bëdamboen tabadmepashun —caimbi.

²⁵ —Nuquin Papa bëdambo iquec —canuna. Esuquidistu chuibanquin ëmbi: —Aid tantiasho Nuquin Papan mibi bëdambo icmendac —quequin chiacpadomboen Esus tantiamequin Nuquin Papan mibi bëdamboen tabadmetiadquio iquec. Ëndenquimboshë Esus tishabi icnuc matsesën Esus chote bëdamboen tantiambo icpampic.

²⁶ Adnubien Nuquin Papan unësesambo icquin con tsusedpabo utsi-utsien Esus chote chuiquin dada uamepampic. Nëbi: —Esusën naid chuisho tantiaquin ma nidaid utsi-utsiec yacno tabadquidon Esusën chiacpadomboen nanu —qeshun Nuquin Papan Esusën naid chuibenequido icmiac.

²⁷ Aden namec Nuquin Papa bëdambo iquec. Abipadquid utsi nibëdec. Ambi natiapimbo ictequid nibëdec. Abitedimbo tantiaquid nec. Nuqui cuidmenquio icnuec abided cuidadaid Esuquidistu tantiasho Nuquin Papan nuqui bëdamboen isequë. —Nuquin Papa bëdambo iquec —canuna ënenquio icquin. Padi. Aidedi chuiquin dada uaombi.

CODINTO YACNOCQUIDON ISTE 1

Pabadon Codinto yacnocquidon iste dada uaid

¹ Pabado nebi. Nuquin Papa bunacpadomboen Esuquidistun ëbi chuibenequid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec.

² Aïdbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caïdo mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

³ Matses icsaquid icsho cuidnushe quiash abided cuidadec Esuquidistu unëspanëdash, quequin abimbo tantiasho isun Nuquin Papan bëdamboen isaïdquio nuqui nec. Adquido yec utsibobëd bëdamboec ma tabadpanuna.

Mibi tantiaquin Nuquin Papa chuided-chuidedaïd

⁴ Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided cuidadec Esuquidistu unësaid chuïbanac abi tantiaquido Codinto yacnocquido yanacsho bëdamboquidbimboecnuc mimbi isec, quec bëdambo iquebi, Papa, quequin chuided-chuidedembi.

⁵ Aden Nuquin Papan bëdamboen isaïdo icquin ambi bëdamboen tantiami-aidobidi mibitedi nec. Matses icsaquid icsho cuidnushe quiash abided cuidadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuïbanoaic.

⁶ Esuquidistu tantiesabo iccondaidi ëmbi Esuquidistun naid chuïbanac tantiaquid mibitedi yanondac. Adquido yanash bëdamboec tabadquin ismequido mibitedi nec.

⁷ Adquido yec Esuquidistu choate caimbudec Nuquin Papan abi bëdamboec tabadaïd tantiamiabi iccoshi quetiapimbo mibitedi iquec.

⁸ Aden abi bëdamboec tabadaïd tantiamequin Nuquin Papan mibitedi chieshenquo icmec ma Esuquidistupadquid icnu quequin mimbi caimbu-dacpadquio icpanuna aid padpidec choanuc.

⁹ Adquid mibitedi icmequin ambi Esuquidistubëd icquido icta caïdo ambi cuëmbanaido Nuquin Papan mibitedi icmiac. Adoshon mibi badedquio Esuquidistupadquid yanenquiocsho isun chieshebi, quesa Nuquin Papa icquin abi mibitedi bëdamboquid icmebanec.

Esuquidistu tantiaquid cuëshëdacbimboec chushcananquido

¹⁰ Adembidi chuïnu. Tantiata. Esuquidistu tantiaquid nebi quec Nuquin Papan bëdambo icmiac ënacbimboec tabadenda. Adec tabadec Esuquidistu tantiaquid utsitedi tantiananec ma cuëshëdacbimboec chushcananesa yampanuna.

¹¹ Esuquidistu tantiaquido Codinto yacnocquido chushcananec quec. Chido, Quëdoen shubunoësh choquido nëmbo ëbi isec choshon aden chieç.

¹² Mibi onquaiad chuïnu. Tantiata. Pabadon tantiamiaid nebi, quec chushquiabimboec utsi-utsiec tabadnubien; Apodosën tantiamiaid nebi, quec chushquiabimboec utsi-utsiec tabadnubien; Petedon tantiamiaid nebi, quec chushquiabimboec utsi-utsiec tabadnubien; Esuquidistun tantiamiaid nebi, quec chushquiabimboec utsi-utsiec tabadec.

13 ¿Esuquidistu tantiaquido cuëshédmenuenda ëbipadquidon chuibandiondash? Padenquo. Naden chuinu. Tantia. ¿Matses icsaquid icscho cuidnushe quiash ëbida cuidadec unëspanëda? Padenquo. Adembidi ¿Esuquidistu tantiaquid nebi quequin ëbi mimbi chuishodambi mibitedi acten mentobandionda? Padenquo.

14 Esuquidistu tantiaquid icscho Quidispobëdta Cayo aid daëdtsëqui naondambi quec tantiec tsadebi.

15 Utsi padenquo iccondambi ma Pabadon ëbi acten mentondacsho aid tantiaquid nebi, quetiapimbo ma mibitedi icpanuna.

16 Ai, Estepanësën shubun icquidobidi acten mentondambi. ¿Utsidambi acten mentoponda? Padenquo iccondambi.

17 Èbi tantiaquido acten mentoban, Esuquidistun cainquo yaqui Matses icsaid bedshunec abided cuidadec Esuquidistu cuesten dectanac unëspanëdash quequin chuibeneta, Nuquin Papan cac aden chuibenec nebi. Èmbibi tantiaid chienquiocquin ma matses icsaquid icscho cuidnushe quiash abided cuidadec Esuquidistu cuesten dectanac unëspanëdash quequin ma utsi-bontsen tantiapanu qeshun chuibenec nebi.

Esuquidistu abitedi tantiaquidquo nadatiambocquin nabanquidquibidi

18 Nuquin Papabëd icquido icmenuec matses icsaquid icscho cuidnushe quiash abided cuidadec Esuquidistu unëspanëdash quequin chiac, ¿Adpecta iquec? quequin tantiesa yec Nuquin Papa yacno puduedtiapimbo iquec. Adec adquido onquenubi nuquien Nuquin Papa yacno puduedtequido yec Nuquin Papan nadatiambocquin nac matses icsaquid icscho cuidnushe quiash abided cuidadec Esuquidistu unëspanëdash quequin tantiec.

19 Abi yacno puduedtemaido chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi ëmendambi.

Adquidon tantiatiapimbo yacpadembi natiamequin nabanendambi,” quequin Nuquin Papan dada uamiampid aidëmbi nëbi naid nec.

20 Esuquidistu tantiesa ambibi tantiaidtedi naimëdan ¿mitsimbo adquido tabadpec? ¿Nidaid abubëd aidën icquidtedimbo mitsipadquidquido icpec? quequin isbanquin, Nadquo icpec, quequin comapenen adquidën tantiec. Aden tantiashic ambi tantiaid Nuquin Papan ëmiac ¿mitsimbo adquido tabadpec? ¿Midaquidën bëdamboen tantieque? Adquidën tantiaid tantianu, quec onquecuededquid ¿mitsimbo tabadpec Nuquin Papan aidon tantiaid ëmiac? Adquidon dadpen tantiaquimbi matses icsaquid icscho cuidnushe quiash abided cuidadec Esuquidistu unëspanëdash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadic? Padenquo iquec.

21 Nuquin Papan nadatiambocquin nac matses icsaquid cuidnushe quiash abided cuidadec Esuquidistu unëspanëdash quequin chuisho ambibi dadpen tantiaquidon tantiauidec. Èmbi tantiaidpenquo tantiatiapibi quequin tantiatiapimbo iquec. Adquido tantiatiapimbo icnubi ëbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac.

22 Adquidon aden tantianubi Nuquin Papan nadatiambocquin naban-tequid iste bunquin isadaidbon tantiauidec. Quidieco matsesëmbien, Èbi ënden tantiec papuduedaid daëd uanu queboedëmbi Nuquin Papan chiaid tantiauidoaic.

23 Adec tabadnubi matses icsaquid icsho cuidnushe quiash abided cuidadec Esuquidistu cuesten dectanac unëspanëdash, quequin ëbi yacpadquidon chuibanoaic. Adoaquien, Nuquin Papan chomiaid nec, quequin isadaidbon cuesten dectanenquioctsenëdash, quequin tantienquoio yec tabadec. Isadaidpembo, Esuquidistu mimbi chuiboed ëmbi tantiacpadpenquoio iquec. Adoac mimbi Esus chuibanaid ëmbi ënden tantiaidbëdta daëd uatiapimbo iquebi quec tabadec.

24 Adquidon tantiauidnubi isadaidbo utsi-utsiec adecbidi isadaidpembo utsi-utsiec Nuquin Papan cuëmbanaido icquin naden tantiec: Nuquin Papan tantiampicpadquequi matses icsaquid icsho cuidnushe quiash abided cuidadec Esuquidistu cuesten dectanac unëspanëdash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin nuqui tantiec.

25 Abitedi tantiaquidquoio icquin ambi abentsëc tantiatsaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

26 Utsibo, ¿mitsipadquidquoio mibi icponda? Nadquid mibi icpondaque. Chuinu. Tantia. Daëdpactsëc tantiatsëcquido mibi icpondac. Namequidpenquoio mibi icpondac. Chuiquid dapan bacuëpenquoio mibi dadpen icpondac. Adquid icsho Nuquin Papan mibitedi tantiaquin, Con bacuë caid nec, quequin mibi cuëmbanondash.

27 Ai, daëdpactsëc tantiatsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesa icsho Nuquin Papan cuëmbantemaid nebi quequin tantiec natiaic ma shubiquiopanuna.

28 Adembidi utsibon tantiauidtsaido Nuquin Papan cuëmbanaido neoaic. Adecbidi, ¿Ada matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc

29 ëmbi comapenen tantiaquin nabansho Nuquin Papan cuënoshi quequin matsesën chuiiapimbo iquec.

30 Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bëdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unësaid isun Nuquin Papan cuidtiapimbo nuqui iquec. Icsaisa icsho Nuquin Papan aid bëdamboen isquin adomboembidi nuquitsen isoaic. Adecbidi, aidi abi yacno bëyucanec puduedash tsadacpadec adecbidi nuquitsen tabadoaindac.

31 Aden nuqui tantiaquin Nuquin Papan dada uamiampicpaden, Èbibi bëdambo ictiapimbocquid icsho mimbi bëdambo icmiaid nebi, Icbo, quequin ëmbi naid chienquiocquin Esusën naidquoio chuibanuna nuquitedi.

2

1 Adembidi chuinu. Tantia. Mibi yacno nidshun dadpen tantiambi quenquiocquin daëdpactsëqui cuembo chuibanondambi.

2 Esuquidistubëdta abi cuesten dectanaid chuinu quequin aiduidi mibitedi chuibanondambi.

3 Codinto yacnocquido dacuëdampambo iquec quequin uëdëequimbi mibi chuibanondambi.

4 Èmbibi dadpen tantiacpadomboen chuibanenquioccombi. Nuquin Papan Mayanën tantiamiacpadomboen ëmbi chuibanubi aidëmbi nadatiambocquin mibitedi tantiamiondash

⁵ ma Pabadon tantiamiacpadomboen tantiamioshi, quetiapimbo mibitedi icpanuna.

Nuquin Papan Mayanën tantiamiaid

⁶ Nuquin Papan tantiamiac comapenen tantiaquin ëbi yacpadquidon chuibanoaic. Aden chuibeniac Nuquin Papan chiaid tantiabene papuduedquidon bédamboen tantiec. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanesanbo nuqui nec. Adembidi matses chuiquid dapabon comapenen tantiacpaden chuibanesanbo ëbi yacpadquido nec. Matsesën dadpen tantiaid uesadendac.

⁷ Adnubien Nuquin Papan comapenen tantiaquin, Esuquidistu chuibeneta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. Ushë uabi tabadquin matses bédambo icmequid con mado nendac, quequin Nuquin Papan tantiapampic.

⁸ Esuquidistu nuqui bédambo icmetequad Nuquin Papan chomiacsho adquid nec quequin chuiquid dapabon tantienquiopanëdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanengquo ictsenëdash.

⁹ Aidpadquid chuiquin Nuquin Papan ëndenquimboshë dada uamiampid nad iquec:

“Nuquin Papan abi tantiaquido ambi cuëmbanaido abi yacno tabadmenun nacnenaaid bēda tantiesan istiapimbo iquec.

Adecbidi Nuquin Papa yacno nadquio ictsiash, quetiapimbo matses iquec.”

¹⁰ Adnubien Nuquin Papan Mayanën Nuquin Papan abi yacnoshon bédamboec tabadte nacnenaaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamieoaic.

¹¹ Matsesën ambi tantiacpaden chiabi yac utsin tantienquio iquec. Adem-bidi Nuquin Papan ambi tantiacpaden chiambocon matsesën tantiatipimbo iquec. Abipadquid aton Mayanënuidquio tantiec.

¹² Con mayan ëbipadquidquo menenu quetiapimbo matses iquec. Nuquin Papambien abipadquid aton Mayan nuqui menec ma aidënuquio abi yacno bédamboec tabadaid nuqui tantiamepanuna.

¹³ Aden aidënuquio tantiamiac adomboembidi ëbi yacpadquidon chuibanoaic. Ëmbibi tantiacpadpenquiocquin Nuquin Papan Mayanën tantiamiacpadomboen chuibanembi. Adomboembidi ëbi yacpadquidon chuibanoaic. Aden Nuquin Papan chiaid chuibanac Nuquin Papan aton Mayan meniaidon tantiaquiec.

¹⁴ Nuquin Papan abipadquid meniacmaidon aidën chiaid tantiatipimbo iquec. Aden Nuquin Papan Mayanën chiaid tantiatipimbo icquin Nuquin Papan matses bédambo icmenu qeshun Esuquidistu chomiac matses icsaquid icsho cuidnushe quiash abided cuidadec cuesten dectanac unëspanëdash quequin aidon tantiatipimbo icoaic. Ëmbi tantiacpadomboen Nuquin Papan chienquio iquec, quendac Nuquin Papan abipadquid meniacmaido.

¹⁵ Nuquin Papan Mayanën tantiamiaidombien naden utsibo tabadaid tantiec. Matses bédamboec tabadsho isun, Nuquin Papan Mayanën tantiamiacpadec tabadquidquio nec, quequin nuqui tantiec. Adembidi utsi icsamboec tabadsho isun, Nuquin Papan Mayanën tantiamiacmaid nec, quequin nuqui tantiec. Nuquin Papan Mayanën Nuquin Papan chiaid tantiamiacmaidon nuqui naic tabadaid isash Nuquin Papan chiacpadquiec tabadquid nec quetiapimbo iquec adquid. Adecbidi Nuquin Papan chiacpadpenquio

yec tabadquid nec quetiapimbo Nuquin Papan Mayanën tantiamiacmaido iquec.

¹⁶ Nuquin Papan chuimiampid nad iquec:
 “Nuquin Papa Abia Yampid yec abitedi tantiaquidquio nec.
 ¿Adquid Nuquin Papa icsho abi chuiquin
 ismequid mitsicquid icpec? Adquid nibëdec.”
 Nuquin Papan tantiacpadomboen aton Mayanën tantiamiaido icquin Es-
 quidistun tantiacpadomboen nuqui tantiananec.

3

¿Esuquidistu tantiaquid utsi icsambo iquec, quecta ique?

¹ Adembidi chuinu. Adembi tantiaata. Mibi yacno tabadquin Nuquin Papan chiaid tantiabenebicquid mibitedi icsho daëdpactsëc chuibanondambi. Codinto yacnocquido bacuë uidënabi yac bimboecquido nec queshun Nuquin Papan chiaid daëdpactsëc mibitedi chuibanondambi.

² ¿Nëbi tishaidënda pambid pepec? Padenquio. Mibitedi adquidbimboecsho tantienquio icnushe queshun Nuquin Papan chiaid daëdpactsëc chuibanondambi. Ënden iccondacpadquiobi mibitedi adquiobidi icoapec.

³ Esuquidistu tantiesa yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanën tantiamiacmaidpadquid yec nëishec chushcananec mibi.

⁴ Pabadon tantiamiaid nebi, quec utsi-utsiec chushquenubien; Apodosën tantiamiaid nebi, quec chushqueoaic utsi. Adec chushquec Nuquin Papan Mayanën tantiamiaibi yac bimboecquido mibitedi nec.

⁵ ¿Mitsipadosho mimbi ëbi isponda? Adembidi, ¿Mitsipadosho mimbi Apodos isoaponda? ¿Ëmbembidambi mibi chuibamponda? ¿Ambembida Apodosënsen chuibampanëdash? Padenquio. Tanta. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ëmbi adobanubi Nuquin Papan Esuquidistu mibitedi tantiamiondash.

⁶ Tiedën caniquid ëshë siabi yac dëyuctiapimbo yac bimboecquid icquin Codinto yacnocquido Nuquin Papan chiaid dadpen tantiatiapimbo iquec, queshun matses icsaquid icsho cuidnushe quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodostes mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yac bimboecquido Codinto yacnocquido icnushe queshun Apodosën chuibanoapanëdash.

⁷ Tied nitsinshun taneshcain tiedën caniquid canimesa icbo nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec.

⁸ Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic.

⁹ Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tied bimboecquid mibitedi nec. Nuquin Papan shububimboecquidbidi mibitedi nec.

¹⁰ Nuquin Papa tabadte shubu uashunun buintad teshun abia tabëcacimboen Esuquidistuba chuibanondambi ma matsesën tantianueshun. Buintad tabëcacimboen Esuquidistu ëmbi chuibanan utsibon adomboembidi aibdidi chuibeneoaic. Bëdamboen chuibenenuquin

¿Nuquin Papan tantiacpadomboendambi chuibanegue? Tantaranu, qeshun Nuquin Papan chiaid isted-istedtiad ambi chuibeneta caidon.

11 Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesu nec. Adquiecbidi Nuquin Papa tabadte uashunu qeshun buintad tabëcachimboen Esuquidistu ëmbi chuibanan adquid nec, quequin utsi chuibantiapimbo utsibon iquec.

12 Buintad tabëcaid tabadacchimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic.

13 Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac.

14 Aden nëdëncaquin tanac Nuquin Papan chiaid bëdamboen chuquidion chuibanac Esuquidistu tantiaquidombo yec buintad taidacmaid nidacchimboec abi nidendac. Adsho isun abi bëdamboen chuibanquido Nuquin Papan menetequid nendac.

15 Adomboembidi utsibon abipenquio icnuc chuibanac Esuquidistu tantiatipimbocquido taidaid bescashun secacchimboen secatequid nendac. Adnubi abipenquio icnuc chuibanquido taidtsenacchimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaido nendac.

16 Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatipimboda mibitedi icpe?

17 Ai, Nuquin Papa tabadtequidbidi mibitedi nec. Adquid icsho mibi icsabadmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmebanaidobidi nec. Esuquidistu tantiaquido Nuquin Papa tabadtequid nec caindac.

18 Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuc Esuquidistu tantiesan tantiacpadec tabadënguioquin Nuquin Papan tantiacpadomboen tantiaquiota.

19 Esuquidistu tantiesan tantiacpadquiec tsadquidën ëbi yacno tabadte tantiatipimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icbo unësendac.”

20 Adecbidi: “Adquidën tantiaidbidi ënëdtequid nec,” quequin Nuquin Papan tantiec.

21 Ad icnuc, Pabardon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec.

22 Aidën bacuëbo icquin mibitedishun con utsi ëbi caic. Adembidi Apodosten mimbi adoaic. Adembidi Petedotsen mimbi con utsi caoaic. Nidaid abubëdta uashumbic aidënguioquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec.

23 Mibitedishun icbo Esuquidistu nec. Esuquidistun icbo, Edoen, aton Papa nec.

1 Icho Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiata. Ēnden Abia Yampidēn Nuquin Papan Esuquidistu chuibeneta, quenquiocpampidēmbi nēbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiata.

2 Nuquin Papan, Esuquidistu chuibeneta, cacpadomboen niaquenquiocquin ēbipadquidon chuibenetiad.

3 Nuquin Ichon, Ēbi chuibeneta, caid ēbi icnuc ¿Pabadon bēdamboenda chuipēc? quequin tantianuna, ¿mimbi cactabi dacuēdpe? Padenquo. Adem-bidi, Nuquin Papan chiacpadomboen chiombi, quetiapimbo iquebi.

4 Ambi chiacpaden niaquenquo iccombi, quetiapimboconobi abitedi isquidquo abitedi tantiaquidquo Nuquin Icho icquin ēbi chuibanec bēdamboec tabadsho isun aidēn chiendac. Adembidi ēbi chuibanec icsamboec tabadsho isun chiendac.

5 Icsamboen natsiash, quec tsadenda. Nuquin Icho choashun icsambocquid cuidendac, quequin cainta. Aidēmbi choashun matses icsamboen ismec tabadaid abi ompoec tabadaidbēdta chuibanshun cuidendac. Adem-bidi, matsesēn ēquēducshun tantiad chuibanquin cuidendac. Adembidi, utsibo bēdamboec tabadaid chuibanquin chuioaindac, Bēdamboen mimbi naoc, quequin.

6 Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanec, Pabadopadquid utsi nibēdec, quesa ma icpanuna. Adecbidi, Apodospadquid utsi nibēdec, quesa ma utsibotsen icpanuna. Nuquin Icbopadquid utsi nibēdec, quequin tantiec tabad. Adecbidi, Codinto yacnoquidopadquid utsi nibēdec, quenda.

7 ¿Mitsicquidēn adquid mibi icmebampashba? ¿Abembida mibi adquid icpeba? Nuquin Ichon tantiamiac nabanash, ¿atotsi quiash, ēmbi tantiac-paden naombi, quepe mibi?

8 Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nēbi mibitedishun tantiauidpec. ¿Adpecta Nuquin Papan bēdambo icmiaido tabadpadic? Nuquin Papa yacno ēnden puduedachimboec yash chuiquid dapa nebi, quiacbimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibēd ēbi yacpadquido ēbi chedo ēnden chuiquid dapa yacpadquido icmiondac, Cuishon, quetsiabi.

9 Adecbidi, Bēdambo iquebi, quec mibi tabadnubi naden tantiec tsadebique. Tanta. Chuinu. Ēmbi chuibeneta caido unēseque. Is, Nuquin Papa quiacbimboecnuc ambi abi yacnoshon uaido mayan bēdadobēdētan matses-tedishun isbededachimboecquid nebi, quequin ēmbibi tantiec tsadebi aden isbededec aidō tabadenquiocnobi.

10 Esuquidistu chuibenequidon chuibansho tantiauidash, Pabiate icsachitashien nec, quequin mamēnshumbededashic Codinto yacnoquidon ambibi tantiaquin chuibansho tantiaquidquo nec, quepec Esus tantiesabo. Adecbidi, utsibo dacuēdampambo iquec, quiash uēdēequin Esuquidistu chuibenequidon Nuquin Papan chiaid chuibanubi cuesambo yacbimboen mibitedishun chuibanpec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec.

11 Esuquidistu chuibenequid yequi pistsec petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsēcquid dasiuidquid nebi. Adquiecbidi Esuquidistu chuibenequid utsibo iquec. Utsin mēyanded-mēyandedaid nebi. Quenenash iquenquo icquin capu-cuenequin Esuquidistu chuibenec nebi.

¹² Con pete bednuequin shubumpi nacnenquidquo iquec chonoadsho isquin utsibon mamēnshunaid nebi. Aden mamēnshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bēdamboen ista, Papa, quequin aido chiemi. Utsin mēyanaqui dayacquo yec cacuidanesa nebi. Adquidbidi Esuquidistu chuibenquid utsibo nec.

¹³ Adembidi, utsin ēbi mua uaquin chiaqui cuidnanenquiocquin bēdamboen chiemi. Adembidi ěmbi Esuquidistu chuibeniaqui icsactsēcquid nec, quequin ambi secanu caidbimboecnuc ēbi ispec.

¹⁴ Adecbidi, Bēdambo iquebi, quec mibitedi tabadnubi mēyamboc tsadebi. Adec ēbi tabadaid ěmbi chiac Codinto yacnocquido unēsquo yampec, quenquiocquin ēbi tabadaid mibitedi tantiamenuen dada uaombi. Pabadon chiaid abimbo iqueque. Bēdamboec tabadnuna mibi camenuen dada uaombi, con bacuēbo. Mibi tantiac unēsquo iquec.

¹⁵ Mibi chuibanquid utsi dadpen nēbi icnubi Esuquidistu ěmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ěbia yanshun Esuquidistu chuibanac mibitedi Esuquidistu tantiaquido yampondac. ěmbi chuibanacpaden chiaid tantiaquido con bacuēbo ěmbi caidtedi nec. Adquid mibitedi icnuc papa nabique.

¹⁶ ěmbi nacpadomboen naic tabadta quequin mibitedi chiemi.

¹⁷ Mibi ěmbi nacpadquiec tabadte tantiamenuen Timoteyo mibi yacno nidmembi. Aidi ěmbi chuibanac Esuquidistu tantiaquid icpondash. Adquid iccondacsho ěmbi con mado caid aidi nec. Aidi Esuquidistu tantiaquidquo icquin utsi-utsiec yacnoshon ěmbi chuibeniacpadomboen chuibanquo Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aibidi nec.

¹⁸ Mibi utsi-utsiec Pabado choainquo iquec quequin abimbo tantiacimboen chuibanec.

¹⁹ Aden adquidon chuinubi Nuquin Papa bunuc badedquo mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi.

²⁰ Nuquin Papa tantiaquido ambibi tantiacpadec onquesa nec. Nuquin Papan Mayanēn tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec.

²¹ ¿Mibi yacno puduedshun atotsimbi adquid napeque? Chui. ¿Cuesnu quiacimboendambi adquid comapenen chushcaquin tantiamepe? ¿Adenquocquidambi ěbēd icquid nec quequin chuibanquin adquid tantiamepe?

5

Esuquidistu tantiaquid ambi chudtemaid chudquid cacumeta caid

¹ Mibēd Esuquidistu tantiec iccuededquid abentsēc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpemo nec. Aton papa icbon chido, anin dauid, bedshun chudesa aido nec. Mibēd icquid abentsēc adquid iquec quec.

² Adquid mibēdi icnuc, Bēdambo icmiaido nebi, quenquioctiadquidi mibitedi nec. Adquid icsaquid mibēd icsho isash unēsquo icquimbi aidi cacumepatecnēdan.

³ Mibēd ictiapimbo yequi mibēd yacimboecquin dada uaquin icsaquid cacumetiadquidi mibi nenēdac quequin chuibanombi.

⁴ Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabadon naden natsiash quequin

5 icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

6 Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisac bimboec mibitedi adquiobidi icsiac.

7 Ënden mibitedi Esuquidistu tantiesabo yec icsaquin ismec maisaccondacpadeç maismane qeshun icsaquid nidmeta. Ëbi cuidmenquiocnoec abided cuidadec Esuquidistu unëspanëdash, quiash aid icsaisa yacpadquieç tabadta.

8 Aden ambi naid tantieç icsaondacpadpenquo yec ma tabadpanuna. Aidquio tantiembi, queç abimbo tantiadonec ma tabadtenapanuna.

9 Ambi chudtemaid chudquidbëd iccuededenda, quequin ënden dada uaondambi.

10 Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesadadpen iqueç. Adeçbidi, utsin na bunquin mua uain bedquid dadpen iqueç. Adeçbidi, matsesën Nuquin Papan uaidbimboecnuc nacnenaid tantiaquid Esuquidistu tantiesadadpen iqueç. ¿Adquido ismane quiash mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquo yec mibi tabadendac.

11 Esuquidistu tantiaquid nebi, quequid icsadenecho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adeçbidi, muaquin bedbanquidbëd iccuededenda. Adeçbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaid tantiaquid ënesabëd iccuededenda. Adeçbidi, Esuquidistu tantiaquid nebi, qeshun ambi tantiacpadpenquiocquidën chuiho mamëns humënquin ënesabëd iccuededenda. Adeçbidi, Esuquidistu tantiaquid nebi, qeshun cuesanquin ampequin ënesabëd iccuededenda. Adeçbidi, Esuquidistu tantiaquid nebi, quiash ëmbi chuibocpadquid icsaquidbëd iccuededenda. Adem bidi aidobëdtan penda.

12 ¿Esuquidistu tantiesadadpen icsaid chuiquin cacumeta, quequindambi chuipe? Padenquo. Esuquidistu tantiaquid mibëd icquid icsadenequin ënenquiocsho isun Nuquin Papan chiaid comapenen tantiaquin mibi icsaid ënta, quequin chui.

13 Nuquin Papambien Esuquidistu tantiesadadpen icsaid chuiquin cuidendac. Mimbi Esuquidistu tantiaquid icsadenequid cacumeta.

6

Ëbi chushcananaid tantiashun mimbi tantiacpaden chui caid

1 Esuquidistu tantiaquid daëd nëishash chushcananec, queoac. Adquid chuinu. Tanta. Nëishash chushcananash Esuquidistu tantiesadadpen yacno nidshun, Ëbi chushquiaid chuiho tantiashun ¿midapaden mimbi chieque? Ëbi chui, quequin mimbi chuipec. ¿Atotsi quiash Esuquidistu tantiaquid yacno nidtiadquidi Esuquidistu tantiesadadpen yacno nidshun mimbi adquid chui, cape?

2 Yuecshun, ¿Midapaden mimbi Esuquidistu tantiesadadpen naid chieque? Tantanu. Chui, abi tantiaquid Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yuecshun tantiesadadpen naid chiembi, qeshun ¿Atotsieshun Esuquidistu tantiaquidbëd chushcananash tantiesadadpen yacno nidshun mimbi chuibampe?

³ Yuecshun, ¿Ēmbi uaido mayanēn naid midapaden mimbi chieque? Tantiānu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe?

⁴ Adquidon naid Ēmbi chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daēd nēishash chushcanansho tantiahsun, Esuquidistu tantiesa yacno nidshun, Ēbi chushquiaid chiacsho mimbi tantiacpaden Ēbi chui, mimbi capec?

⁵ ¿Esuquidistu tantiaquid utsibo nibēdpecta ictic? ¿Esuquidistu tantiaquidēn icsamboen chuinushe queshunda Esuquidistu tantiesa yacno nidshun, Ēbi chushquiaid chiacsho mimbi tantiacpaden chui, mimbi capec? ¿Bēdamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape?

⁶ Mibipadquid Esuquidistu tantiaquid utsibo yacno nidenquio yec mibipadquidpenquio Esuquidistu tantiesa yacno nidshun utsibēd chushcananaid mimbi chieque. Adenda.

⁷ Ēbi chushcananaid Ēbi daēdshun chiacsho tantiahsun mimbi tantiacpaden chui. Tantiānu, quequid mibēd icnuc Nuquin Papan bēdamboquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nēishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nēishash chushcanampe?

⁸ Cuidnante bunec mibi adpec. Naden natiad. Ēbēd chushcananquid Esuquidistu tantiaquid nec, quec abi cuidte bunenquio yec abi yacno nidshun abi icsaboed tantiamequin Nuquin Papan chiaid chuiban.

⁹ ¿Icsadenequin Ēnesa Nuquin Papa yacno pudedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin Ēnesa Nuquin Papa yacno yuedtemaid nendac. Adembidi, Nuquin Papan uaidbimboecnuc nacnenaid tantiaquin Ēnesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bēnēpen chudmequin Ēnesa, adecbidi dada daēd chichudnanquin Ēnesa, adecbidi chido daēd dachudnanquin Ēnesa Nuquin Papa yacno yuedtemaido nendac.

¹⁰ Adembidi, ampequin Ēnesa Nuquin Papa yacno yuedtemaid nendac. Adembidi, muaquin utsin na bedquin Ēnesa, adembidi, ambi tantiacpadpenquiocquidēn chuisho mamēnshunquin Ēnesa, adembidi, cuesuniaquin ampequin Ēnesa. Adquido Nuquin Papan ambi abucshun nacnenaidēn tabadtemaido nendac.

¹¹ Ēnden mibi adquio iccondaidi nēbi utsi-utsiec padenquio icsho isash Nuquin Papa mibi cuidenquio yec mibi icsaid bēpiscudac. Adembidi, Nuquin Papan mibitedi bēdambo icmēbanuequin abipadquid aton Mayan mibitedi meniāc. Aidi meneshun Esuquidistu icsapenquiocquid isacpaden Nuquin Papan mibitedi isoāc.

Ēmbi chudtemaid chudmane queshun adquid isuidteneta quiaid

¹² Ēmbi natemaid naden nata caid nibēdec queshun naic bēdamboquid ictipimbo iquebi, quiash padenquio yec tsadebi. Aden nabanquin Ēntiapimbo icmane quiash padenquio iquec tsadebi.

¹³ Matsesēn chebudaid pucu yacno budash dada bēdambo icmianquid nec. Yuecsh matsesēn dada chodquetequid nendac. Padnuen, Ēbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbēd Nuquin Papa iquec. Ad icnuc mimbi chudtemaid chudquid icta, quenquio Nuquin Papa icpampic. Ambi

chudtemaid chudquid Nuquin Papa tabadte ictiapimbo iquec. Aden naquid chian anēdēnquequid nēsecatequid nendac.

¹⁴ Nadatiamboequin Esuquidistu Nuquin Icbo Nuquin Papan uincue-mepanēdash. Aidēmbi nuquitsen abi tantiaquid icsho uincuemendac.

¹⁵ ¿Abi tantiaquid icquin, Esuquidistubēd daēdash tabadquid nebi, quequin tantienquioda mimbi icpe? Ai, aidbēdi daēdtequid nuqui nec. ¿Adquidbēd daēdashabi icsaquidbēd daēdoape? Padenquio iquebi.

¹⁶ ¿Dadpen chudmequid chudash daēdacimboecquid nec, quequin mibite-dishun tantienquioda icpe? Aid daēdi dada abentsēc yacimboecquid nec, quequin Nuquin Papan dada uamiampid nec.

¹⁷ Nuquin Icbobēd daēdaidien Icbon tantiacpadquieci tabadquid nec.

¹⁸ Ēmbi inacmaid chudmane geshun chido utsi isuidteneta. Padenquio yec icsaquidbēd daēdquid mibi iquendac. Ambi chudtemaid chudquid aton namibēd ēquēducuēsh daēdaid nec. Nami umanucuēsh icsaid namibēd daēdtiapimbo iquec.

¹⁹ Nuquin Papan Mayan tabadtequid Esuquidistu tantiaquido nec. ¿Nuquin Papan ebēd tabadmiaid abipadquid nec, quequin tantienquioda mibite-dishun icpe? Ēbibi nuquin icbo nec, quetiapimbo matses iquec. Adecbidi, Con icbo nibēdec. Ēmbi tantiacpaden naimbi, quetiapimbo mibi iquec.

²⁰ Nuquin Icbo cuesten dectanac matses icsaquid icsho cuidnushe quiash abided cuidadec unēsquid Nuquin Papan icmiac abi tantiaquid yec aidēn na mibitedi nec. Adoaidi ambi chiacpaden ismec bēdamboec tabadteneta.

7

Dada chidobēdi daēdaid

¹ Nēbi mimbi dada uaboed isombi. Aid isun ēmbi tantiacpaden chiembique. Tantiata. Chido inquid dadatedida ictiad quequin mimbi tantiapec. Padnuen, Chido bedenquio iquemi, qesho chido inta cainda caimbi mibi.

² Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsēc inquid dada ictiad. Adecbidi dada abentsēcshun inaid chido ictiad.

³ Con chido ēmbi inaid nec, quequin aiduidi chudquid icta. Adecbidi con bēnē ēbi inquid nec, quequin aiduidi chudmequid chido nec.

⁴ Chidon dada daēdash aton bēnēn dadabidi nec. Adecbidi dadan dada chidon dadabidi nec.

⁵ Aid daēdi daēdabi yacimboec, Padi, quenda. Adboedi, Nuquin Papa chuinuec nēidtedi ushquin padenquio nuqui iquec, qeshun ēnta. Aidtedec ushquin padenquiocshon, Ēmbi yuen ēntiapimbocsho isun Satanasēn icsamenushe qeshun padpiden nata.

⁶ Ēnta quenquio iquebi. Nēidtedi ushquin padenquio iquemi quiash mibi daēdi aidtedecuidi ushec ēnēdta caimbi.

⁷ Padnuen, chido inesa ēbi yacpadec dadatedi icpashun. Dada utsi-utsiec Nuquin Papan icmiacpaden chido inquid icnubi utsi-utsiec chido inesa iquec.

⁸ Chido inesa ēbi tabadacpadec dada utsitedi tabadec bēdambo ictsiash. Adecbidi dadan inaidpen bēdambo ictsiash chido. Dada bēnua adecbidi bēdambo ictsiash.

⁹ Adquid icquin isuidtiapimbo yec comapenec chudte bunquin chido inta. Adecbidi chido bēnua dada isuidtiapimbo iquec dadan inaid icta.

¹⁰ Daēdash niamēnenda. Ēmbibi chienquiocquin Nuquin Icbon aden chuinedacpadembi chiembique. Tantia.

11 Min bënë nianash utsin inaid iquenda. Dadan inaid icnu quec mimbi niamboedën inaid icoata. Adembidi chido inquid min chido bunenquiocquin abi icsaid dada uashun ismequin nidmenda.

12 Nēbi Nuquin Icbon naden chuiban cainquiocnobi ěmbia Esuquidistu tantiaquid icquin Esuquidistu tantiaquid utsibo ěmbi chuibocpadembi mibitedi chuioaimbique. Tántia. Dada aton chidobēdi Esuquidistu tantiesa icboedi aton bënë Esuquidistu tantiaquid yanuc aton chido padenquio yec, Con bënë nianu, quenquio ictsash. Adquid icsho isash. Con chido icsambocquid nec, quenquio yec abēdi tabadquid bënë.

13 Adecbidi chido utsi aton bënëbēd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantias, Con bënë icsambocquid nec, quenquio yec bënë nianec nidesa chido.

14 Esuquidistu tantiabi yec daēdacpadec aton chido Esuquidistu tantiaquid yanash aihbēd abentsēc yachimboec tabadec bënë. Adece bēdamboec tabadsho isun Nuquin Papan chido bēdamboen tabadmequin bēnētsen bēdambo icmebampec. Chido Esuquidistu tantiaquid icquin aton bënë padenquiocnobi aton bacuēbo tantiec, Icsambocquidën bacuēbo nec, utsibo quenushē quish bēnēbēd abentsēc yachimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuēbo tantiec aton chido Esuquidistu tantiesabēd tabadquid dada. Adece abentsēc yachimboec tabadsho isun, Bēdamboquidën bacuēbo nec, quequin utsibon ispec.

15 Utsimbic ambi bedboedën aton chidon Esuquidistu tantiasho isun aton chido nidta catsiash. Adoaquien, Mibēd tabadte bunebique. Ěbi nidmenda, quetsiash chido bënë caic. Adoaqui, Nidec nid, cac cacuidenquio yec nidquid chido. Chido utsibic aton bënë Esuquidistu tantiaquid yansho isash, Mibi nianu, quetsiash. Adoaquien, Mibi unēsquo iquec, quetsiash bënë.

16 Adnubien dadan nidta caid aton chido Esuquidistu tantiaquid yec bēdamboquid icsho isash Esuquidistu tantiaquidtsen yantsiash bënë. ¿Adquid yantsiash, quequin tantienquioda mimbi icpe? Adecbidi, chidon nianu caid aton bënë bēdamboquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

17 Mibi Esuquidistu tantiaquid yanash Nuquin Papan tantiacpadec tabadnu quish adequi tabadta. Adomboembidi Esuquidistu tantiec iccuedquid utsibo chuibanombi.

18 Esuquidistu tantiesa shui dēbid dēteshunaid yec Esuquidistu tantiaquid yanash ěbi shui dēbid dēteshunacmaidbimboecnuc nacnemenū quenquio yec tabadta. Adecbidi, Esuquidistu tantiesa shui dēbid dēteshunacmaid yec Esuquidistu tantiaquid yanash shui dēbid dētemenu quenda.

19 Shui dēbid dēteshunaidta nec, quenquio yec Nuquin Papa tsadec. Adecbidi, Shui dēbid dēteshunacmaidta nec, quenquio yec Nuquin Papa tsadec. Adquid nec quenquio yec, Ěmbi chiacpadomboen nadenequidta nec, quec Nuquin Papa tantiec tsadec.

20-21 Adece Nuquin Papa tantiec tsadnuc yua Esuquidistu tantiaquid yanash yuapen icnu quenquio yec tabad. Adecbidi, utsin yuapenquio yec utsin yua icnu quenquio yec tabadoa.

22 Yua Esuquidistu tantiesa icboedi Esuquidistu tantiaquid yansho isun, Yua nec, cainquio icquin Nuquin Icbon cuēndac. Adembidi, utsin yuapenquio Esuquidistu tantiesa icboedi Esuquidistu tantiaquid yanash Nuquin Icbon namiaidquio nendac.

²³ Matses icsaquid icsho cuidnushe quiash abided cuidadec unèsquid Esuquidistu Nuquin Papan icmiac aid tantiaquid iquec, Con icbo nec, quiash utsin yuaid iquenda.

²⁴ Adembidi chuinu. Tantiata. Nuquin Papan mibi cuènucc matses yec Esuquidistu tantiaquid yanash, Èbèd tabadquid con Icbo nec, quec matses yec bédamboec tabadta.

²⁵ Chido inesa bédta dadan inacmaid chuita quequin mimbi dada uaid isun aidotsen chiemi. Aido tantiaquin naden chuita Nuquin Icbon cainquio yaqui Nuquin Icbon èbi chuibeneta caid icquin naden mibitedi chiembique. Tantia.

²⁶ Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido.

²⁷ Chido inquit yec chido inesa icnu quenda. Adecbidi, chido inesa yec chido inu quenda.

²⁸ Chido inesa icboedi chido inquit yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobédta con bacuèbo bédambo icmepeba? quec chido inquit tabadec. Chido inesa in aden tantienquio yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiemi ma natiamianquiecc quenquio yec ma mibi tabadnueshun.

²⁹ Èmbi chuiboed mibi bédamboen tantiamembique. Tantia. Nidaidèn yuec tabadnu, quetiapimbo nuqui iquec. Nuquin Papa chieshènte ushè chonoc abi tantiaquid dadpen mèyansho isash Esuquidistu chote anoentsèqui yaneque. Abi yacno utsibo puduedtiapimbo icnushe queshun min chido icnubi Nuquin Papa bunacpadomboen nabanec tabadta.

³⁰ Adecbidi, unèsquio yec shubiquimbi Nuquin Papa bunacpadomboen nabanec tabadta. Adecbidi, bédambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquio yec Nuquin Papa bunacpadomboen nabanec tabadta.

³¹ Yuecshun èmbi nidaidènshun bedaid Nuquin Papan èmendac, quequin tantiaquin ambi chiacpadomboen nabanec tabadta.

³² Natiatequid nibèdpashun, queshumbic natiamiantequid iquendac, quequin tantiemi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu queshun aden nabanec tabadpec.

³³ Chido inquidien, Nuquin Papan tantiacpadenuidi nanu quiash, ¿mitsipadentsimbi con chidobédta con bacuèbo bédambo iquebi camepeba? quec tabadec.

³⁴ Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bènèn bédamboen istsiashi, quec tabadec.

³⁵ Èmbi mibi chuibanquimbi chido inesa chido bednu quesho, Chèn, caisa nebi. Nuquin Papan chiacpadomboen nabamboedèmbi utsi uain tantianushe queshun èmbi tantiaid chuibanec nebi. Nuquin Papan tantiacpadomboen bédamboen tabadmenuequin aden tantiaquin chuibanec nebi.

³⁶ Ademebidi, Min champi bednu queboed chudte bunec mèmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuè tishtiapimbo yantsiash, quiash, Con champi inec cho, quiash icsatiapimbo adquid icoaic.

³⁷ Adecbidi, min champi inu queboedi, Bedenquoio iquembi, qesho tantiashun menenda. Aden bedmenquoio yec mibi bēdambo icpec.

³⁸ Con champi bedec cho, qeshun bedmiash, Bēdambo iquebi, quenubi, Con champi dadan inacmaid iquec quec bēdamboshē utsi icpec.

³⁹ Dadan inaid icquin min bēnē nianenda. Min bēnē unēsān utsin inaid icnu quiash adta. Esuquidistu tantiesan inaid iquenda.

⁴⁰ Bēnuā utsin inacmaid icnu quiash bēdamboshē iquec aid. Ēmbi tantiacpaden ēmbi chuiboed Nuquin Papan Mayanēn tantiamiacpaden chiaid nec.

8

Nuquin Papan uaidbimboecnuc nacnenaid tantiaquin pambid dasanaid

¹ Nēbi Nuquin Papan uaidbimboecnuc nacnenaid tantiaquin pambid dasanaid chuīnun naden chiembique. Tantiata. ¿Matsesēn nacnenaidda nuqui tantiaid ictic? Padenquoio. Aden tantiaquin ēmbi tantiacpadpenquoio icquid utsibo nec quequin mamēnshumpec. Aden tantiaquin mamēnshunquin utsi tantienquoio iquec. Utsien, Naden nabanquindambi utsibo bēdamboen tabadmepeba, quequin tantiaquidquo nec.

² Ēmbibi tantiembi quequid tantiabenabictsēcquid nec.

³ Nuquin Papa tantiaquidien Nuquin Papan tantiaidquoio nendac.

⁴ Aden chuīshun ¿Nuquin Papan uaidbimboecnuc matsesēn nacnenaid tantiaquin pambid dasanaidtambi pepe? quequin mimbi chuīquin dada uaboed isun chuīnu. Tantiata. Nuquin Papan uaidbimboecnuc matsesēn nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibēdquiec.

⁵ Nidaidēn samēdquid papa cain utsin cuēnaid dadpen iquec. Adembidi abuc samēdquid Papa cain utsin cuēnaid dadpen iquec.

⁶ Papa cain nuquin cuēnaidien Abia Yampidquoio nec. Adquid utsi Nuquin Papa cainquoio nuqui iquec. Aidi abitedimbo uabampampidquoio nec. Aidquoio tantiec nuqui tabadec. Adembidi Nuquin Icbo cain cuēnaidquoio Esuquidistu nec. Aidēmbi aton Papabēdān abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuēmbanaido yec ambi tantiaido nuqui nec.

⁷ Adembidi aid abentsēqui nuqui tantiaidquoio icnubi Nuquin Papan uaidbimboecnuc matsesēn nacnenaid utsibon tantiaid iquec. Aden nacnenaid tantiaquin pambid dasanaid aidon pepec. Aden peboedēmbi Esuquidistu tantiaquid yanshun nacnenaid tantiaquin pambid dasanaid ēmbi pesho isun, Icsaosh, Nuquin Papan canushe, qeshun adquid petiapimbo yanebi.

⁸ Nuqui piāid Nuquin Papa tantiamianesa nec. Ad icnuc Nuquin Papan uaidbimboecnuc matsesēn nacnenaid tantiaquin pambid dasanaid penquiocsho isash, Aid bēdambocquid nec, quenquoio Nuquin Papa iquec. Adecbidi, nacnenaid tantiaquidēn dasanaid pesho isash, Aid bēdambocquid nec, quenquoio icoaic Nuquin Papa.

⁹ Padnuen Nuquin Papan uaidbimboecnuc matsesēn nacnenaid tantiaquin pambid dasanaid ēmbi bedshun pesho isash, Esuquidistu comapēn tantiaquidēn tantiaid nacnenaid nec, Esuquidistu tantiabenabictsēcquid quenushē qeshun padenquoio iquembi.

¹⁰ Aid pesho isash, Nacnenaid papa cain cuēnaid nepec, qeshun, Aid tantiaquin ēmbitsen pambid dasanaid penu, quetsiash Esuquidistu tantiabenabictsēcquid.

¹¹ Padnuen ēmbi piāid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi penubi Esuquidistu tantiabenabictsēcquidēn

Nuquin Papa tantiamantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidēn dasanaid ēbi icsainquio ictequid nec quequin pequin Esuquidistu tantiabenabictšēcquido mimbi icsameyoc. Mimbi icsamiaido tantiec Esuquidistu unēspanēdash.

¹² Ad icnuc Esuquidistu tantiabenabictšēcquid mimbi icsamequin Nuquin Icbon chiacpadomboen niacquid mibi neyoc.

¹³ Padnuen Esuquidistu tantiaquid utsibon icsamboen tantiaquin penushe qeshun padpiden penquio iquembi ma icsainquio icpanu qeshun.

9

Esuquidistu tantiaquidon natequid

¹ Esuquidistu chuibeneta cacmaid Pabado nec quequidotsen chuinu. Tántia. ¿Matsesēn nata caidtabi nedi? Padenquio. Esuquidistun ēbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen ēmbi chuibanac mibitedi abi tantiaquido yanenquioda ictionda?

² Ai, ēmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ēmbi chuibanacmaid icnubi, Ēmbi chuibanaido mibitedi nec, quequin tantiembi. Ēmbi chuibanac Esuquidistu tantiaquid mibitedi yanshun, Esuquidistun ēbi chuibeneta caidquio nebi, quequin Pabadon chiaid abimbo iquec, quequin bēdamboen tantiaquidquio mibi nepec tantesa uainquioqucin.

³ Aden ēmbi Esuquidistu chuibanac abi tantiaquid mibitedi icquimbi utsinsinquien ēbi icsamboen chiec. Naden ēbi chieque. Tántia. Pabadon Bednabebēdtan chuibanasho pemenquioctiad, quequin chiec. Aden chiec onquequid ēmbibi tantiaquin naden aido chiembique. Tántia.

⁴ ¿Esuquidistu chuibanec bundoenquiodabi icpe?

⁵ Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bēdambo iquec, mibi quec. Adembidi utsibon aton chido buanubi Petedon aton chido buansho isash bēdambo iquec quiashic Esuquidistu chuibanec ēbēd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ēbēd capuequi aton chido buante bunenquioda Bednabe icpadic?

⁶ Adembidi, ¿Mibi pemembique. Penuequin nabanenda, capenda Esuquidistu chuibenequid utsibo mimbi ique? Bednabebēdta ēbi chiec, ¿Penun daēdshun shubumpi nacnentiad, quepecta mibi ique?

⁷ Ad yenquio utsibo iqueque. Tántia. Chuinu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icbo abi nashunquid aton tiedēn caniquid pemedasa nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid.

⁸ ¿Aden chuiquin ēmbibi tantiaidtambi chuipo? Padenquio. Nuquin Papan Moises dada uamiampid ēmbi chiaid nec.

⁹ Nad iqueque. Tántia. Chuinu: “Min tiedēn caniquid ēshē chicnueshun min baca tsuc-tsucmequin dēpuquenda ma penu,” quequin Nuquin Papan chiaidquio nec. ¿Bacanuidi ma penu quequin Nuquin Papan chiaidta nepadic? Padenquio.

¹⁰ Matsesbēdtambi ma penu quequin Nuquin Papan chiaidquio nec. Adembidi ambi piaid tantiaquin nabanquido icbo nec. Penuequin tiedēn caniquid icbon taneshcaic. Adembidi, penuequin ēshēacsho bedquid icbo nec.

11 Adembidi, ¿Nuquin Papan chiaid mibi paquiacquid yec pete bec cho quenquiotiadquidtabi nedí?

12 Mibi chuibanquid utsibo menebanquimbi ëbia mibi chuiquidquo icsho menetiadquidi menianenquo mibi icpoc. Aden ëbi menenquo yaqui ëmbi chiaid tantienquo icnushe quiaish, Bec cho, quetiapimbo iquebi mibi caic. Aden chuibanec bundoquiec capuecuenec nebi.

13 Nuquin Papa tabadte shubu uashunaid yacnoshon nashunquidën ashunquo peshun aquec. Adembidi ashunquo nashunquid utsibon mat-sesën Nuquin Papa menenun bëaid tauishun pambid tëshë bedshun peshun aquec. ¿Aden peshun apcec, quequin tantienquioda mimbi icpe?

14 Adomboembidi Esuquidistu chuibancho abi tantiaquidon yuedec, quequin Nuquin Papan chiaid nec.

15 Ëbi yuedtiadquidi nec, quequin tantiequi ¿adabi pemenu yuedpec? quesa nebi. Adembidi, Ëmbi dada uaid buamiacsho isun ëbi yuedtsiash, quequin dada uainquo iccombi. Bunquiec unësbudec mibi caic, Bec cho, quenquo iquendabi.

16 Ëbibi Esuquidistu chuibenenu quenquioccobi. Ambi ëbi chuibeneta cac Esuquidistu chuibenec nebi. Abi chiesa yanash unësequio ictsiabi.

17 Ëmbibi, Esuquidistu chuibenu, quiaish, Bec cho, quetsiandabi. Esuquidistu ëbi chuibeneta caid yec ambi namiaidquo nebi.

18 Esuquidistu chuidenesho isash, ¿atotsi Pabadon bedpash, quepecta mibi ique? Naden Esuquidistu chuibenec nebique. Tántia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bédambo iquebi.

19 Bec cho, quesa yec utsin yuacmaid nebi. Adquid yequi utsibo chuinec nidanec shubu utsin puduedcuenequin aidon namiaidbimboecquin aibdëd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna.

20 Adecbidi, isadaidbo Esuquidistu chuibanec aidobëd tabadquin mimbi natemaide ëmbi natemaidepenquo nec, quenquiocquin ambi natemaide nainquo iquembi. Adquiec tabadquin ëmbi chuibanac ma isadaidbotsen Esuquidistu tantiaquido yampanuna.

21 Adecbidi, isadaidpembo chuibanec aido tabadacpadec abëdi tabadquin Esuquidistu chiacpadec niaquenquo yec tabadec nebi. Ëmbi adoac isadaidpembotsen ma Esuquidistu tantiaquido yampanuna.

22 Adecbidi, Esuquidistu tantiabenabictsëcquido chuibanec ëmbi tantiabenabi iccondacpaden bëyuc tauain chiaidquo tantiamenuen chuibanec nebi. Ëmbi adoac ma aidotsen Esuquidistu tantiabenquidquo yampanuna. Adequi tabadquin Esuquidistu chuibanec nebi. Ëmbi adoac utsibo ma Esuquidistu tantiaquidquo yampanuna.

23 Adec tabadequi ma ëmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

24 Titinguecuedquido icnuc bëyuc abia titinguec choquid iquendac. Adquid icsho isun, Mibi badedquido titinguoc, quequin titingueta quequidën titinguec abia choquid menendac. Adembidi, Nuquin Papan menete bëda iquec. Aid bednu, qeshun Icbon chiacpadomben nabanta, caimbi mibi.

25 Badedquido titinguenequid bedte bunaid chodquetequid icnuc, Aid bednu, qeshun abi bëdiactsëc titincamete pete icsa atequid icsabëda isuidec titinguenequid iquec. Nuquien chodquetequid bednuenequin icsaidec.

²⁶ Utsien, Bednu, quenquoio yec titinguec. Adembidi, Bednu, quenquoio yec utsibéd mēdanten senanu quequin nibédacnoshombi mēdanten seded-sededec. Aden tantiaquin naisa nebi.

²⁷ Utsibon ma tantianu qeshun Esuquidistu chuibeniasch unēsacsho Nuquin Papan menete bēda bedtiapimbo icmane quiash icsaid mēmunc tsadebi.

10

Isadaidbon chieshampicpadec tabadenda quiaid

¹⁻² Abi yacno abi tantiesa chosho puduedmenquoio icchitoshe quiash Nuquin Papan chiaid chieshēnenquoio yec bēdamboec tabad, quequin tantiamēnuen, Nadec nuquin tsusedpabo tabadpampic, quequin chiembique. Tantiata. Equipito yacnoshon ambi mēnchicaidobéd Moises puduanec Nuquin Papan bēyucamiaid abu ushu tēdion nidanequin tsusedpabon Acte Piu potepampic.

³ Adec nidaniash yuecash aitedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic.

⁴ Adembidi acte bundoacsho isun cuēnote cuesquin acte chomiaid acash, Ēbi bēdambo icmequin Nuquin Papan ambi yuecshun chometequid Quidistubēdan nadatiambocquin naid nec, quequin tsusedpabon utsin-utsinquin tantiabempampic.

⁵ Aden tantiabenubien abéd icquid utsibon padenquoio icpampic. Aden tantiesa Nuquin Papan nidaid Canan caid menenu caid yacno niduidequi unēsbudnepampic adquidtedi.

⁶ Tsusedpabo chieshampicpadquid icnushe qeshun Nuquin Papan aido chuiquin dada uamepampic.

⁷ Ad icnuc tsusedpabon Nuquin Papan uaidbimboecnuc nacnenshun papa cain tantiampicpaden tantienda. Naden Nuquin Papan aido chuiampic. Bacabimboecnuc ambibi nacnenaid tantiaquin peshun acash baidacuededpampicpaden tantiaquin nainda.

⁸ Adembidi, tsusedpa utsibon ambi chudtemaid chudampicpaden chudenda. Aden nasho abi ushēmbi tsusedpabo dadpen 23,000ted Nuquin Papan cuesunemepampic.

⁹ Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unēsbudnepampic.

¹⁰ Adecbidi, Equipito yacnoshon mēnchicaido abi mēnchicquid chieshec nadpampic. Equipito yacno iquec bēdambo iccondaiddi nēmbi choash bunec capuebi. Anobidī tabadec nidebi, queded-quededsho ambi abi yacnoshon uaid mayan bēdabo Nuquin Papan budmiaidēn aitedi cuesunepampic.

¹¹ Abi tsibanquido tantiamenuquin tsusedpabo tabadnēdaid icsa Nuquin Papan chuiquin dada uamepampid ēmbi chuiboed nec.

¹² Tsusedpabo Nuquin Papa chieshēnec icsapampicpadec icsamane quequin mibi tabadte tantiata.

¹³ Ēnden tsusedpabo chieshēmete icpampid abi iquec. Adaid natiatequid icnuc chieshēnushe qeshun Nuquin Papan mibi tantiaquin uidēn uac mibi icsainquoio yec chieshtoenquoio yec dayacquoio iquendac.

Nuquin Icho Esuquidistu unēsaid tantiaquin acshumbic mayan icsa tantiaquin mimbi actiapimbo iquec quiaid

¹⁴ Nuquin Papan chiaid niacmane quiash, Nuquin Papan uaidbimboecnuc matsēsēn nacnenaid tantianu, quenda. Dacuēdec cuenachimboec aid nanacno nidenda.

15 Tantiabenquid icsho mibi chiec nebi. Pabadon chiaid abimbo iquec quequin tantiec aid nanacno nidenquoio yec Esuquidistu chuibansho tantiec iccuededteneta.

16 ¿Iccuededquin sicaid acnun Nuquin Papa chiec onqeshun acted-actedquin matses icsaquid icsho cuidnushe quiaish abided cuidadec Esuquidistun intac chididiquiaid tantien icquinda nuqui acti? ¿Adembidi, pete cuësh-cuëshun Nuquin Papa chiec onqeshun aton dada méyanaid tantien icquinda nuqui pedi?

17 Esuquidistubéd abentsëc yachimboecquido nebi, quequin tantiaquin pete cuësh-cuëshun meniac abentsëcshun piachimboen abi tantiec iccuededquidon pebededec.

18 Aden nuqui pebededacimboen isadaidbo icsaid cuidnuen nidaidën capuquiddes cuesuniaid pambid tauiquin Nuquin Papan shëdtequid pambid bedshun cuesunequidbëdta nidaidën capuquid icbon pepanëdash.

19 Aden ëmbi chiac ¿atotsi Pabado ëbi tantiamete bumpec, quepecta mibi ique? Mibi naden tantiamembique. Tantia. ¿Nuquin Papan uaidbimboecnuc matsesën nacnenaid tibopecta iquec? Padenquoio.

20 Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesën nacnenaid yacnoshon pambid dasanec. Aden aid pambid penu, qeshun mayan icsabéd yachimboecquid nebi, quequin pec. Adquidbëdta penda.

21 Nuquin Icho Esuquidistu unësaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unësaid tantiaquin pete peshun mayan icsa tantiaquin pambid petiapimbo iquec.

22 ¿Aid tantiaquin acshun pequin Nuquin Papa nëishmenquioda mimbi icti? Ai, abitedi tantiaquidquo icquin abitedi isquidquo icquin Nuquin Papan mibi cuidendac.

Ëmbi natemaid naden nata caid nibëdec, quiaish nanueboedi Esuquidistu tantiaquid utsi icsamemane quiaish nainquiocte chiaid

23 Nëid mishtemaid nec. Nëid petemaid nec. Nëid actemaid nec, quequin ëmbi chuitequid nibëdec, quiaish Esuquidistu tantiaquid utsi icsamemane quiaish nainquio yec tsadebi. Matsesën ambi nacnenaid tantiaquin pambid dasanaid ëmbi tantiacmaid nec, quiaish pambid dasanaid petiadquo iquequi Esuquidistu tantiabenabictscquidën, Nëid nacnenaid nuquin papa caid nec, quequin penushe quiaish penquoio yec tsadebi.

24 Utsi tantienguioquin nacnenaid pambid dasanaid piash bëdambo iquebi, quenda. Naden natiad. Matsesën nacnenaid pambid dasanaid ëmbi pesho isun utsibon icsamboen tantiatsiash, quequin penda.

25 Aton na sambededacno nidshun pambid bednuequin, ¿Nuquin Papan uaidbimboecnuc matsesën nacnenaid pambid dasanaid bedaidta nec? quenquioquin bedta.

26 Abu nidaidbëdta uashun aidënquoio icquidtedi Nuquin Papan uampidquoio nec. Aidtedimbo aton na nec. Nacnenaid yacnoshon pambid sambededaid aton na nec. Aidën bacuëbo iquec aid pambid pequido mibi nec.

27 Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesën nacnenaid tantiaquin pambid dasanaid bedaidta nec, quenda.

28 Adnubien mibi puduedacno isedquid utsi Esuquidistu tantiabenabictscquid tsadquin, Matsesën nacnenaid papa cain cuënaid tantiaquin dasanaid nëid pambid nec, cac aid pambid penda.

²⁹ Ĕmbi papa cain cuēnaid nec, quequin utsin tantianushe qeshun aid pambid penda. Matsesēn nacnenaid con pa nec, quequin cuēnaid tantiesa icquin ¿atotsieshumbimbi matsesēn nacnenaid tantiaquin pambid dasanaid penquo iqueque? Chuinu. Tantia.

³⁰ Nuquin Papa Ĕmbi tantiaidquio icnuc penun aidi chuisho isash ¿atotsieshun matsesēn nacnenaid papa cain tantiaquin pepec utsibo quepec?

³¹ Edoen utsibo tantiamenuen bēdamboen nabanec tabadteneta.

³² Aden naic, Esuquidistu tantiaquid isadaidbo isadaidpembobēdta Esuquidistu bēdamboen tantiabemequiono, quec bēdamboec tabadta.

³³ Naden naic Ĕbibi bēdambo iquebi, quenda. Naden Ĕmbi nabanuc Ĕbēdi utsi bēdambo ictsiash, quequin tantiata ma Nuquin Papa yacno puduedtequid utsibo yanu qeshun.

11

¹ Ambia tantiaquidēn Esuquidistun icmiacpadquiec tabadec nebi. Adecbidi Ĕmbi chuiquin ismiacpadquiec tabadteneta mibitedi.

Nuquin Papa tantiaquin iccuededquin naid

² Mimbia tantianēdaidquio mibi nec, quequin mimbi chiaid tantiaquin nabanec nebi, quequin mimbi dada uashun bēmiaid isash bēdambo iquebi. Adembidi, Esuquidistu tantiabēnēdaidon chuibanaid mimbi chiacpadomboen tabadec, quequin mimbi dada uaid bēmiaidon chuibansho tantiaish bēdambo iquebi.

³ Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec.

⁴ Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinuen mauec tabadquin, Ĕbi chuiquidpenquo Esuquidistu nec, quiacimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec.

⁵ Chidoen, Ĕbi chuiquid Esus nec, quequin ismec mapucudash tsadec. Adec mapucudenquio yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquio ictiad.

⁶ Ĕbi chuiquid nibēdec, quiacimboec tabadsho matasmetiad. Matasmiash ma mapucudpanu chido.

⁷ Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ĕbi chuiquid Abia Yampid nec, quequin ismenuec aid chiec onquec mauete mauesa dada nec.

⁸⁻⁹ Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic.

¹⁰ Adquid icmiac dada Ĕbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnenquio yec Icbon chiacpadquiec tabadec.

¹¹ Nēid chido nec. Nēid utsi dada nec, quenubi nashunanquid abi daēdi nec.

¹² Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec.

¹³ ¿Nuquin Papa chuinuec Ĕbi chuiquid nibēdeque. Matasadnu quiash chido bēdamboda icpadic?

¹⁴ Chido isadacpadec isadnu quec icsambo dada ictsiash.

15 Chido isadacpadec dada icsho isash, Chido nec, quetsiash. Dada isadacpadec chido isadenquoio iquec.

16 Ĕmbi chuiboed tantiash, Icsamboen chiosh, quetsiash. Adquid naden chuinu. Tantiata. Ĕmbentsĕquidambi aden chie? Padenquoio. Ĕbipadquiocquin chuibenequidon adomboembidi chuibanec. Adembidi Esuquidistu tantiec iccuededquid utsibon tantiabededec.

Nuquin Icho unĕsash uincuenaid tantiaded-tantiadedta quiaid

17 Adecbidi, Mimi naidtedi bĕdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquoio yec mibi iccuededec.

18 Abentsĕc yacbimboec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi.

19 Nĕidtedi ĕmbi bĕdamboen isaïdo nec. Utsitedi ĕmbi icsamboen isaïdo nec, quiaash cuĕshĕdacobimboec mibi tabadcuededec. ĔAdec tabadshoda Nuquin Papan mibi bĕdamboen ispec? Padenquoio.

20 Adec tabadquid Esuquidistu unĕste tantienquiocquin utsin-utsinquien peshun acted-actedec.

21 Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paĕmbocquid nua acash tantienquoio yec tabadec.

22 ĔMin nuntan pete nibĕdpecta iquec? Mitsana iquec. Adec mitsana min shubuno icnuc ĔEsuquidistu unĕste tantiec utsibobĕd iccuedednu, quenquiocquinda mibia choshon pebededpe? ĔNatiastianquiec pete nibĕdchitec pete nibĕdquid camenuenda mimbia pebedede? Aden pebededquido Ĕatotsimbi chuipe? ĔBĕdamboen mimbis nabanec quepectabi ique? Padenquoio. Aden naquin Esuquidistu unĕsaid tantienquiocquin mimbis pec.

23 Nuquin Icbon chiacpadomboen mibitedi chuibanondambique. Tantiata. Chuinu. Nĕid inchĕshĕmbi ĕbi chieshĕnquido ĕbĕd icquidĕn ĕbi bedmendac, quequin Esuquidistun abi unĕste tantiaquin nadopanĕdash. Pete bedshun

24 Nuquin Papa chuishun cuĕsh-cuĕshun naden abĕd icquido chuipanĕdash: "Pete cuĕshaid bedash matses icsaquid icsho cuidnushe quiaash ĕbided cuidadec unĕste tantiaquin pebededta," quepanĕdash Esuquidistu.

25 Aden chuishumbic aid pebededsho isun pete utsi pebededquin nainshun ademibidi dĕshote bedshun sananquin naden Esuquidistun chuipanĕdash: "Esuquidistu unĕsquin ĕbi chian anĕdĕnquiacno nĕsecatequid icsho mĕnchictequid Esuquidistu iquec, quequin tantiaquin sicaid acbededta. Sicaid acquin ĕbi mĕnchictequid iquec quequin tantiaquin acban."

26 Aden Esuquidistun ismenĕdaccpadomboen pete cuĕshĕmpi pebededshumbic sicaid acbededta. Nuquin Icho unĕsaid tantiaded-tantiadedquin aid padpidec choabicnuc adobanta.

27 Abi unĕste tantienquiocquin pete cuĕshun peshun acquin Esuquidistun chiaid niaquid nec.

28 ĔPete cuĕshĕmpi penun Esuquidistubĕd tabadacpadquiectabi tabadpe? quequin mibi utsibĕd tabadte tantiata.

29 Esuquidistu unĕsaid tantienquiocquin peshun acquid Nuquin Papan cuidendac.

30 Aden adquidon peshun acac utsi-utsiec padishec; utsi-utiec daicsambo yanec; utsi dadpen ĕnden unĕsac.

31 ĔAdabi Nuquin Papan chiaid niaquenquoio yec tsadpe? quequin tantiec tsad. Aden tantiec tsadshumbic, Icsaobi, Papa, queshun mibi icsaid chuiban. Aden chuishun Esuquidistu unĕsaid tantiaquin pete peshun sicaid acta.

Aden mibi icsaid chuishun pesho isun Nuquin Papan mibi natiac camenquo iquendac.

³² Adesa icsho Nuquin Papan natiac camiaid mibi iquendac. Abi tantiesabēda chian anēdēnquequid nēsecadenquo mibi icmenue Nuquin Papan mibi natiac camec ma ěmbi chiacpadomboen nabameneuquin.

³³ Adembidi Esuquidistu unēsaid tantianuec iccuededquin utsibo choabi iquec quequin aido cainta.

³⁴ Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unēsaid tantianuequin naden nata quequin chiombi. Mibi yacno nidash puduedshun ěmbi chuiboed daēd uain chiendambi.

12

Nuquin Papan Mayanēn tantiamiaid

¹ Nuquin Papan Mayanēn tantiametequid chuinu. Tantiata.

² Ēnden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesēn ismec, Nēid papa cain cūēnaid nec, qesho tantiquido mibitedi iccondac.

³ Adquid iccondaidi Esuquidistu tantiaquid mibi yanacsho naden chiembique. Tantia. Nuquin Papan Mayanēn tantiamiaido: Esus Nuquin Icbopenquo, Nuquin Papan Chomiacmaid nec, quetiapimbo adquido iquec. Adecbidi, Nuquin Papan Mayanēn tantiamiacmaido: Esuquidistu con Icho nec, quetiapimbo icoaic.

⁴ Nuquin Papan Mayanēn, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsēcquiobi tantiamianquid Nuquin Papan Mayanēn.

⁵ Adecbidi, utsi nashunquido Esuquidistu tantiaquido icnubi utsi nashunquidon Icho abentsēcquiobi Esuquidistu nec.

⁶ Adecbidi, nadatiambocquin nabanquid utsi-utsiec icnubi Nadatiambocquin namianequid abentsēcquiobi Nuquin Papa iquec.

⁷ Esuquidistu tantiaquid utsibēd tantiananquin namenu, quequin aton Mayan Nuquin Papan nuqui menec.

⁸ Nuquin Papan Mayanēn tantiamiac ambia comapenen tantiaquidquido icquin chuibanquid utsi-utsiec iquec. Nuquin Papan Mayanēn tantiamiac ambi tantiaid chuibanquid utsi-utsiec iquec.

⁹ Nuquin Papan Mayanēn tantiamiacpaden ěmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanēn tantiamiac bēdamequid utsi-utsiec iquec.

¹⁰ Nuquin Papan Mayanēn tantiamiac nadatiambocquin nabanquid utsi-utsiec iquec. Nuquin Papan Mayanēn tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanēn tantiamiac matses bēdamboec tabadsho isash, Nuquin Papan Mayanēn tantiamiaid nec, quequin tantiaquidquido utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanēn tantiamiac nidaidēn icquid onquiacmāidēn onquequid utsi-utsiec iquec. Adembidi Nuquin Papan Mayanēn tantiamiac nidaidēn icquid onquiacmāidēn onquesho tantiaquidēn tantienquiocsho isun aidon onqueten chuibanquid utsi-utsiec iquec.

¹¹ Aden Nuquin Papan Mayanēn tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanēn aden tantimec.

Dada abentsēc yacpadquiec Esuquidistu tantiaquidtedi iquec

12 Uidënaid dadpen icnubi matsesën dada abentsëc iquec. Adquiobidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec.

13 Ad icnuc isadaidbo yec isadaidpembe yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniäido nuqui nec.

14 Matsesën dada abentsëqui icnubi uidënaid dadpen iquec.

15 ¿Mëdantepadquidpenquo yec matsesën dada uidënacmaidta taë icpec? Padenquo. Dada uidënaid taë iquec.

16 Adecbidi, ¿ëshëpadquidpenquo yec matsesën dada dëccuësquiaacmaidta dëbiate icpec? Padenquo. Dëbiate dëccuësquequid iquec.

17 Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash?

18 Nuquin Papan tantiampicpadquiequi matsesën dada uidënaid nec.

19 Dëccuësquequid abentsëc icnuc dada nec quetiapimbo iquec.

20 Uidënaid dadpembëd dëccuësquequid dadpen icnuc matsesën nami abentsëqui iquec.

21 Matsesën dada ad icnuc, ¿Mëdante bëdambo icnubi ëshë padenquo iquec, quepecta mibi ique? Padenquo.

22 ¿Isadesa uidënaid uquëducquid nibëdnuc matsesën dada bëdamboda icpatsiash?

23 Uidënaid uquëducquid ismenquiocquin ompoaidquo utsi nec.

24 Nami isaidquo ompodesa nec. Nuquin Papan tantiampicpadquiequi ompoaid nibëdnuc matses cuëdenquo yec unësec.

25 Ad icnuc, Icsambo icmianegue. Tësnu, quetiapimbo icbo iquec. Ompoaid ompodesa aibbëdi iquec bëdambo yec nashunanquid aitedi nec.

26 Abentsëc paëmbo iquec matsesën dada bëdambo iquenquo iquec. Adquitedi bëdambo iquec matsesën dada abichobi paëpenquo iquec. Adecbidi, Esuquidistu tantiaquido abentsëc yacimboec iquec abentsëc icsacsho isash abitedi unësqüo iquec. Abentsëc, Bëdambo iquebi, quenuc aibbëd abitedi bëdambo iquec.

27 Adquitedi matsesën dada abentsëc yacpadquiec Esuquidistu tantiaquitedi aidën dada abentsëc yacimboecquid nuqui nec. Abi tabadtequid iquec.

28 Abi tabadtequid nadquid iqueque. Chuinu. Tandia. Ambi chiacpaden ambi ëbi chuibeneta caidöba iquec. Nuquin Papan chuiampid comapenen tantiaquin chuibanquid utsi iquec. Esuquidistu tantiaquid icsho isun nadec tabad quequin chuibanquin ismequid utsi iquec. Nadatiambocquin nabanquid utsi iquec. Bëdamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquitedi nuqui iquec abentsëc yacimboec nuqui tabadec.

29 ¿Esuquidistu tantiaquitedidida ambi ëbi chuibeneta caid icpadic? Padenquo. ¿Esuquidistu tantiaquitedidida Nuquin Papan chiampid comapenen tantiaquin chuibanquid icpadic? Padenquo. ¿Esuquidistu tantiaquitedidida, Nadec tabad, quequin ismequid icpadic? Padenquo.

30 Adecbidi, ¿Esuquidistu tantiaquitedidida bëdamequid icpadic? Padenquo. ¿Esuquidistu tantiaquitedidida abi onquiacmaidën onquequid icpadic? Padenquo. ¿Utsi onquiacmaidën onquesho tantiaquidën tantienquiocsho isun aidon onqueten onquequin chuibanquitedidida icpadic? Padenquo.

³¹ Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenequin ěmbi abia chuibambocpadquid icte bunquiota.

Utsi tantiaquidquio

Ěmbi chuiboedtedi Esuquidistu tantiaquido Nuquin Papan Mayanën tantiamete bědambo iquec. Padnuen ambi tantiamequin bědamboshě icmetequid iqueque. Aid tantiauidquidba chuiboshombic aid tantiaquidquio chuinu. Tantiata.

13

¹ Matses utsi-utsiecquid onquiapadquiec anquiadquid, adecbidi Nuquin Papan abi yacnoshon uaid, mayan běda onquiapadquiec onquequid icquimbi utsi tantiesa icquin chuibansho abipenquio chuisho utsibon tantien-dac.

² Utsibic, Nuquin Papan Mayanën tantiamiac chuibanquid adembidi Nuquin Papan chienquio icampid Nuquin Papan Mayanën tantiamiac tantiaquid aidi niosh. Aiděmbidi Nuquin Papa nadatiambocquin naquidquio nec, quequin tantiaquin, Mananuc macuěsh dapa icboedi acte nantan něnitsinoa, Papa, cacpadomboen něnitsinoac nidquid isquid icquimbi utsi tantiesa icsho, Bědamboquid mibi nec, Nuquin Papan catiapimbo iquec.

³ Utsibic, aton na nibědsho menequidquio niosh. Adembidi, Esuquidistu tantiesa nebi cata, cac padenquiocsho měyanaid niosh. Adquid icquimbi utsi tantiesa icsho, Bědamboen mimbi naoc, Nuquin Papan catiapimbo iquec.

⁴ Padnuen Nuquin Papan Mayanën bědamboshě ictequid tantiamiaid nadquio iqueque. Chuinu. Tantiata. Utsi tantiaquidquio utsi tantiamequionuec chushcanesa nec. Utsi tantiaquidquio nashundenequid nec. Utsi tantiaquidquio utsin na isash adquidquio con na běpashun quesa nec. Utsi tantiaquidquio děniacanquidquio yec děniacanquidquio nebi abibi quesa nec. Utsi tantiaquidquio ěbentsěqui tantiaquidquio nebi quiacbimboen nabanesa nec.

⁵ Utsi tantiaquidquio utsi icsamboen tantiaquin nabanesa nec. Utsi tantiaquidquio, Ěmbentsěqui tantiacpadomboenuidi utsitedishun nabantiad, quesa nec. Utsi tantiaquidquio badedquio něishesa nec. Utsi tantiaquidquio abi icsamboen nasho cuidesa nec.

⁶ Utsi tantiaquidquio utsi icsambocsho isash, Uněsquo iquebi, quec tsadquid nec. Adecbidi, utsi bědamboesho isash, Bědambo iquebi quec tsadquid neoaic.

⁷ Utsi tantiaquidquio utsi icsaid chienquio yec tabadquid nec. Utsi tantiaquidquio ambi nanaid nibědsho isash ampiash badedquio quenquio yec ¿mitsimboemi nampoba? quec onquequid nec. Utsi tantiaquiděnquio utsi icsadenesho isun, Tantiamiac Nuquin Papan chiapadomboen natsiash, quequin chuibanendac. Aden chuishun bědamboen nasho isnuen cainquid nec. Měyanaqui chieshenquio yec dayacquio yec tabatenequid utsi tantiaquidquio nec.

⁸ Utsi bědamboen tantiaid ěnědtiapimboctequid nec. Nuquin Papan chi-aid chuibantsaidien ěnědendac. Adecbidi, matses onquaidtedi ěnědendac. Adecbidi Nuquin Papan ambi uaidtedi ěmiac matsesěn isquin tantiaid ěnědoaic.

⁹ Nabanaidtedi tantiabenabictsěcquidquio nuqui nec. Adecbidi Nuquin Papan chiampidtedi tantiabenabictsěcquidquio nuqui neoaic.

¹⁰ Nidaiděn tabadquin aidtedi tantiabenabictsěcquidquio nuqui icboedi Nuquin Papa yacno puduedash abitedi tantiaquidquio nuqui iquendac.

11 Bacuë yec bacuëmpi onquiapadec onquepadenebi. Adembidi, bacuëmpin tantiabenabi yacpaden tantiapadenembi. Adquid icquin caniaidën tantiapadpenquiocquin tantiapadenembi. Adquid icboedi caniaish bacuëmpin tantiapadpenquiocquin tantiabenondambi.

12 Nēbi isnanten bēisadquin Nuquin Papabimboecquid nuqui isec. Yuecshun abi yacno puduedshun aidquiobi Edoen Nuquin Papa nuqui bēistuidendac. Nēbi Nuquin Papa isenquiocquimbi ambi chiaid tantiatsembi. Ambi tantiapaden yuecshun bēisquin nuqui tantiabenendac aid.

13 Nidaid enēdnuc nēidtedi enēdtemaid iqueque. Chuinu. Tantia. Ambi chipadpen nabanquidquo Nuquin Papa nec, quequin tantiaid enēdtemaid nec. Adecbidi Nuquin Papa yacnoēsh abipadquid bēdamboecquidquo iquendabi, quequin cainquin tantiaid enēdtemaidquo nendac. Adecbidi, utsi tantiaid enēdtemaidquo neoaindac. Aidtedi enēdtemaid icnuc nidaidën tabadquid, Utsi tantiambi, quequin ismiac utsi dadpen Esuquidistu tantiaquid yanash mibēdi Nuquin Papa yacno tabadendac. Adquid bēdamboshēcquid nec.

14

Mimbi chiaid chuibanquid ēbi icme, Papa, quaid

1 Utsi tantiaquid icta. Nuquin Papan Mayanën adquid icmioshi, quequin ambi tantiamete utsi bunquiebique. Adec bunsho mimbi chiaid comapenen bēdamboen chuibanquid ēbi icme, Papa, quequin chuiban.

2 Aden tantiamiac tantiamenu qeshun tantianuequidën onqueten chuiban. Aton onqueten onquenquiocsho aidon tantienquo iquec. Padnuen onquaidtedimbo Nuquin Papan tantieque. Aden nidaidën icquid onquiacmaidënquo Nuquin Papan Mayanën tantiamiacpadec onquequin Nuquin Papa chieo queta.

3 Ma Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bēdamboec tabadnu qeshun chuibanec.

4 Nuquin Papan Mayanën tantiamiac nidaidën icquid onquiacmaidën onquequin onquequiduidtsēqui tantiabenquid yanec. Padnuen Nuquin Papan chiaid Nuquin Papan Mayanën tantiamiac Esuquidistu tantiaquido ma Nuquin Papan chiaid tantiabenu qeshun chuibanec.

5 Nuquin Papan Mayanën tantiamiac nidaidën icquid onquiacmaidën Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidën icquid onquiacmaidën chuibanac tantianuequidën tantienquo iquendac. Aden tantienquiocsho isun abi daēdi onquaid tantiaquin chuibanquid nibēdnuc nidaidën icquid onquiacmaidën chuibanenda caimbi.

6 Adembidi chuinu. Utsibon tantia. ¿Mibi yacno choash puduedshun nidaidën icquid onquiapadec onquenquiocquin embi chuibancho tantienquo yec, Bēdambo iquebi, queta mibi tabadpe? Padenquo. Nuquin Papan chiaid dada uamiampid min onqueten embi chuibancho mimbi tantiabampēc. Min onqueten chuibanenquo yec ēbibi onquiacbimboecsho mimbi tantienquo ictsiandac.

7 Shoncatempi abibi shoncadtiapimbo iquec. Adembidi, aid shoncaisan shoncasho tantiatipimbo utsin iquec. Adembidi aid cuēdēmesan tentencate cuēdēmesho tantiash, Adomboen cuēdēmenquo iccosh, quec.

8 Adembidi, utsibo yacno ma cuesnanu qeshun chomenuequin sondadon tantiabocpadpenquiocnoc shoncac choenquo iquec.

9 Adecbidi, utsi onquiacmaidën onquequin chuisho ¿mitsipaden tantiatpatshash? Utsibon tantienquo iquec. Aden chuibanec nibëdacno onquiacbimboec onquepec.

10 Onquete utsi-utsiec dadpen iquec. Aton onqueten onquequin chuibansho matsesën tantiec.

11 Utsin onqueten chiac tantiatpimbo yec, Onquequin chuibanquid con matsespenquo nec, quequin tantiec.

12 Ad icnuc, Nuquin Papan Mayanën ëbi tantiameppec, qeshun, Esuquidistu tantiaquido ma tantiabenguido yampanu qeshun mimi chiaid chuibanquidquío ëbi icme, Papa, quequin Nuquin Papa chuita.

13 Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquidon onquetenquo ëmbi chui-boed chuioaquid icme, Papa, ma tantiapanu, quequin Nuquin Papa chuita.

14 Nuquin Papa chiec ëbi onquiacmaidën onqesho utsibon tantienquo iquendac.

15 Aden abi onquiacmaidën onquequin utsibon tantienquo icsho ¿mitsipadentsimbi tantiamepe? Naden naimbi. Iccuededquido onquiacmaidën onquequin Nuquin Papa chuishumbic tantiamenun iccuededquidon onqueten onquequin chuibanonuna. Adecbidi, iccuededquid onquiacmaidën Nuquin Papan naid chiec cuëdëdashic tantiamenuec iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanotiapimbo icquin abi onquiacmaidën onquequin chuibanenquo iquembi. Adecbidi abi onquiacmaidën cuëdënenquo iquebi.

16 Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibancho tantias, Mibi bëdambo iquec, Papa, quequin chiendac.

17 Abi onquiacmaidën onquequin Nuquin Papan naboed chuibanac Esuquidistu tantiadonequidquío mibëd iccuededquido yantiapimbo iquec.

18 Èbibi utsin-utsinquiec onqueten onquequidquío icnubi mibitedi adesa nec. Padnueni adec onquec bëdambo iquec, Papa, quequin chuidedchuidembi.

19 Padnuen chuinec Esuquidistu tantiaquido iccuededacno puduedash ma tantianu quiash aton onquete daëdpactsëc tantias anquiadquid icquin aitedictsëqui chiendambi aido onquiacmaidën onquenquíoquimbi.

20 Adembidi chuinu. Utsibon tantia. Bacuëbo tantiabenshun ismiacpaden bëdamboec tabadquin ismeta.

21 Nuquin Papan chiampid nad iqueque. Tantia: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin ëmbi chiacpadomboen nate bunenquo icoaposh,” quequin Nuquin Papan dada uamiampid nec.

22 Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenguid Esuquidistu tantiaquid icmetiapimbo iquec. Padnuen adec onquequin chuibancho tantias, Nuquin Papan naid nec, quequin Esuquidistu tantiesa icboedi abi tantiaquid yantsias.

23 Padnuen Esuquidistu tantiaquido iccuededacno Esuquidistu tantiesa puduedashun abi onquiacmaidën abitedi onquecuededsho tantias, Aidon tantiate icsabudpash, quepec.

24 Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsēcshun-abentsēcshunquien Nuquin Papan chiaid chuibancho tantias, Icsaobi.

25 Nēbi ēbi bēdambo icmequid Esuquidistu tantiate bunebi, qeshun abi ic-said ambi chienquicoeboed Nuquin Papa chiashic, Nēmbo iccuededquidobēd mibi iquec, Papa, quequin chuibampec Esuquidistu tantiaquid yanshun.

Abentsēcshun-abentsēcshunquien chuiban, quequin chiaid

26 Adembidi chuinu. Adembi tantiaata. Esuquidistu tantiaquid iccuededec cuēdēnu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidēnu onquequin chuinu, utsi quenubien; mibi onquiacmaidēn chuisho tantiomistique. Min onqueten chuinu, utsi quetsias.

27 Aided, Chuinu, qesho ¿mitsicquid chuita nuqui cape? qeshun naden chiac bēdambo ictsiash. Chuinu. Tantia. Mibi onquiacmaidēn onquequin chuinuequid daēd icnuc bēdambo ictsiash. Abentsēc chotsēcncuc adecbidi bēdambo ictsiash. Aided icquin abentsēcshun-abentsēcshunquien onquequin chuiban, cata. Aden abentsēcshun onquequin chuisho abi onquiaid tantiaquidēn iccuededquidon onqueten chuibanta, cata.

28 Padnuen abi onquiaid tantiaquin chuibanuequid nibēdnuc, Tsadquin Nuquin Papanuidi otacquiocquin chuita, cata.

29 Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daēd icnuc bēdambo ictsiash. Abentsēc chotsēcncuc adecbidi bēdambo ictsiash. Aided icquin abentsēcshun chuibanubi, ¿Nuquin Papan Mayanēn tantiamiacpadomboenda chuibanueque? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon.

30 Abentsēcshun chuibanubi Nuquin Papan Mayanēn tantiamiac utsi: Ēmbitsen chuibanu, qesho tantiasun ma aidēn chuibanu quiash ambia chuibanquid ēnēd.

31 Adquidēn iccuededquidtedi tantiamenuequin abentsēcshun-abentsēcshunquien chuibanta. Aden chuibansho tantias ma chieshenquoio yec bēdambo icpanu.

32 Nuquin Papan Mayanēn tantiamiaid utsibēd bēdamboec tabadquid nec.

33 Nuquin Papan tantiamiacpadequi utsi onquenubi onquenquoio utsibo tabadec. Onquenu, utsi quenuc, Aī, onqueta, qeshun onquenquiocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adecbidi tabadquidō nec.

34 Esuquidistu tantiaquido iccuededacno otacquoio tabadquid chido. Chuibanacnoēsh onquenu, quenda chido. Nuquin Papan chiacpadece ēbi chuiquid dada nec, quec chido.

35 Anoshon chiaid tantienquoio yec tsadquin cainec shubuno nidash, Tantienuquo iccombique. Nuqui tantiaaboed ēbi chui, qesho tantiasun chiec aton bēnēn. Tantienuquiocquin cainenquoio iquec chido icsambo iquec.

36 ¿Mimbia Nuquin Papan chiaid chuibanquidoda ne? Padenquoio. ¿Chuibanac Esuquidistu tantiaquido mibitedictséquida yanondac? Padenquoio.

37 Nuquin Papan chiaid chuibanquidquoio nebi, mibi quenuc, Nuquin Papan tantiamiacpaden Pabadon chuibanquin dada uaid nec, mibitedi quepec.

38 Aden mimbi tantianubi, Pabadon dada uaosh, quenquoio utsibo icpec. Aido Nuquin Papan tantiamiacmaido iquec. Adquid icsho isun, Pabadon dada uaid nec, quequin tantiamenu, quenda.

³⁹ Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidēn onquequin chuinessho, Ai, cata.

⁴⁰ Adecbidi, Nuquin Papan Mayanēn tantiamiac chuibanuequid dadpen icnuc utsibo bēdamboen tantiamenuequin abentsēcshun-abentsēcshunquien chuibanta.

15

Esuquidistu uincuenaid

¹ Adembidi chiembique. Tantia. Matses icsaquid icsho cuidnushe quiash abided cuidadec Esuquidistu unēsaid ēmbi chuibansho tantias, Ai, abimbo iquēc. Aid tantiembi, mibi quiampondac. Aden tantiadonec chieshenquio yec mibitedi tabadec.

² Aden, Aid tantiabenu, quesho Nuquin Papan mibitedi bēdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bēdambo icmebanacmaid nec. Adecbidi, ambi yuednu cacmaidquio adquid nec.

³ Utsin ēbi tantiamiacpaden mibi chuibanondambi. Adembidi chuinu. Tantia. Nuquin Papan chiacpadomboen matses icsaquid icsho cuidnushe quiash abided cuidadec Esuquidistu unēsapanēdash.

⁴ Unēsacsho shēcuē nacnenaidēn nauedshun bētashacsho daēdec ushtanquin ambi chiampicpaden Nuquin Papan uincuen uapanēdash.

⁵ Aden uincuemiāc choquin, Uincuenobi, quequin Petedo Esuquidistun ismepanēdash. Adshumbic adembidi abēd 12ted icquido ismeoapanēdash.

⁶ Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanēdash. Aid uincuenacsho isquido dadpen abi tabadnubi utsi-utsiec padenquio iquēc.

⁷ Aden aidtedi ismeshumbic aton utsi Santiacotsen Esuquidistun ismeoapanēdash. Adshumbic, ambi ēbi chuibeneta caidtedi ismeoapanēdash.

⁸ Aden aid ismequin nainshun yuecshun ēbitsen ismeoapondashi. Icsactsēcquiocquid nec, quenquiocquin ismebenondashi tsyuecquio.

⁹ Abi tantiaquid mēyanquin cuesunemequidquio icboedi abi tantiaquid yanacsho Esuquidistun, Ēbi chuibeneta, cainquioctiadquidēmbi adquid icta caid nebi.

¹⁰ Esuquidistu tantiaquid yansho isun ēbi chieshaid cuidenquio yac Nuquin Papa bunacpadomboen Esuquidistu chuibenequid nebi. Adquid Nuquin Papan icmīoshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenquiocnobi. ¿Ēmbentsēquidambi chuibenedio? Aton Mayan Nuquin Papan meniac aidbēd icquin chuibeniombi.

¹¹ Adembidi, ēbi yacpadquidon Esuquidistu chuibanac utsitsen abi tantiaquido yampondash.

Matses unēsash uincuenaid

¹² Adec Esuquidistu unēsash uincuenondash, quequin chuinubi ¿mitsipaden tantiec uincuenta nibēdec quec utsi-utsiec onquepec?

¹³ Uincuenta nibēdnuc Esuquidistu uincuenenquio ictsempanēdash.

¹⁴ Esuquidistu uincuentequid icmiambocnoc abi chuibanquid muambo ictsiandac. Esuquidistu tantiaquid nebi, quaidbidi muambo ictsiandac.

¹⁵ Nuquin Papan naid chuibanquidtedi muaquidquio icoatsiandac. Aden tantienquiocquin ēbi yacpadquidon chuibanendac. Unēsash uincuentequid

nibēdnuc ēbitedishun Nuquin Papan Esuquidistu uincuen uapanēdash quequin chiaid abipenquoio ictsiandac. Unēsash uincuenta nibēdnuc Nuquin Papan uincuemaiid nibēdtsiandac.

16 Unēsash uincuenta nibēdnuc Esuquidistu uincuentiapimbo ictsempanēdash.

17 Aid uincuenambo icnuc matses icsaquid icsho cuidnushe quiash abided cuidadquid Esuquidistu nec, cainquoio mimbi ictsiandac. Matses icsaquid icsho cuidnushe quiash cuidadquid nibēdtsiandac.

18 Aid uincuenambo noc abia tantiaquido tsusedpabo Nuquin Papa yacno puduedtiapimbo ictsempanēdash.

19 Nidaidēnuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquoio ictsiandac.

20 Ēmbi chuiboedtedi adtiapimbo iquec. Esuquidistu Nuquin Papan uincuen uapanēdash, quequin chiaid abimbo iquendac caimbi. Nuquin Papan ambi abia uincuemaiid abi yacno puduedmequin ambi uincuemetequid dadpen iquendac, quequin chiaid abimbo iquec.

21 Unēstequid bēyuc dada yanampicpadec matsestedi adecbidi iquec. Adecbidi, unēsash uincuentequid Esuquidistu yanacpadec abi tantiaquidtedi adquiobidi iquendac.

22 Bēyuc dada Adan caidēn tsyuecquidtedi adecbidi unēstequido nec. Esuquidistun bēdambo icmiaid uincuentequido neoaic.

23 Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac.

24 Aden bedoanquin abi tantiaquidtedi bēyucanec choquin Nuquin Papa Edoen caid ismequin, Nēidtedi min shubu abentsēquēn tabadquido nec, quequin chiendac abi chieshēnquidtedi chēn quetiapimbo noc. Aido ambi nebudac bimboecquido iquendac.

25 Abi chieshēnquido utsidebēd chuiquid icquin abi chieshēntiapimbo quid aido Esuquidistun icmebanendac.

26 Adoshombic ēnquimbi unēstequid nibēdquidquio Esuquidistun icmeoaindac.

27 Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquoio aton Papa iquec.

28 Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsēcquiobi nendac.

29 Unēsash uincuentequid nibēdnuc, ¿atotsieshun, Ēnden unēsaid uincuenendac, quequin tantiembi quequin utsibon acten ambibi mentomepec?

30 Adecbidi unēsash uincuentequid nibēdnuc ēbi unēs uate utsibo comapenec buncuededsho isun ¿atotsieshun, Uincuentequid iquec, quequin ēbi yacpadquidon chuibampec?

31 Unēsash uincuentequid iquec, quequin tantiembi. Aden tantiaquin Esuquidistu, Nuquin Icho, ēmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unēsmane quenquoioquin Esuquidistu unēsash uincuenta iquec, quequin chuibenec nebi. Aden badiadquidēn-badiadquidēnquien chuibanubi ēbi unēs uate utsibo bunec.

32 Uincuentequid nibēdnuc, ¿atotsi quenequini Epeso yacnoshon, Uincuenta iquec, quequin chuibanasho mēyanaqui chieshenquoio yec dayacquoio tsadpe? quetsiabi. Adecbidi uincuenta nibēdnuc: “Unēsash nibēdquieci quebi, quequin nua peshun aquembi,” quetsiabi.

33 Aden tantienquo iquemi. Adembidi tantienda. “Uincuenta nibēdec quequidbēd capuenda aidēn tantiapadec icmane quiash.”

34 Adquidpadquid icquin mimbi icsamboen tantiaid ēnquin Nuquin Papan chaidquid tantiata. Esuquidistu tantiem mibēd iccuedquid utsi-utsiec, Nuquin Papa nadatiambocquin uincuemianquidquo nec, quequin tantiesa nec. ¿Adquid mibēdi icnuc Nuquin Papan bēdambo icmiaido mibitedida icpe? Padenquo.

Uincuemequin dada chuca meniaid

35 ¿Mitsipadec unēsaid uincuempec? utsi quepec. Adecbidi, ¿mitsipadquid uincuentequidēn dada icpe? utsi queopec.

36 Adquidēn icsamboen tantieque. Chuinu. Tanta. Mimbi tiedēn chococaid taubēd ēshē chococatequid nāpi dēyuctequidpadpenquo iquec.

37 Mimbi tiedēn chococaid utsi-utsiec iquec. Adecbidi mimbi tiedēn siaid utsi-utsiec iquec. Mimbi chococaid mimbi siaidbidi dēyuctequid utsi-utsiec iquec.

38 Nuquin Papan tantiampicpadec aton dada yanec.

39 Abipadquidpenquo ambi uaidtedi iquec. Abipadquidquid nidaidēn capuquidtedi iquec. Abipadquidquid podochoquidtedi icoaic. Abipadquidquid acten icquidtedi icoaic.

40 Abuc tabēcaid icnubi nidaidēn icquid iquec. Abuc tabēcaid abipadquid chēnquesho isec nidaidēn icquid tabadec.

41 Badiadēn ushē comapenquiec chēnquenubi inchēshēn ushē daebudquid chēnquiec. Aid daēdi nua isadnubi uispa pistsec isadoaic. Uispa utsi-utsiec iquec. Abi bedquiec chēnquetequid utsi-utsiecbidi iquec.

42 Aidtedi ēnēdendac. Adecbidi tishac matses unēsacsho chococac nami chodquiec. Adec nami chodquian Nuquin Papan tantiapadec uincuentequidēn dada chuca chodquesa nendac.

43 Tishac icsaquid matses iquec. Adsho uincuemequin ambi icsaisa icmiaid nendac. Nidaidēnshun tishac chonoadec uimabudquid matses nec. Yucash unēsacsho uincuemiac uimabudenquiocquin nabanendac.

44 Nidaidēnshun tishac daicsambo yanash unēsacsho uincuemequin dada chuca icmetequid nendac. Nidaidēnshun tishac matsesēn tantiapadquid icboedi Nuquin Papan uincuemiac aidēn tantiapadquid iquendac.

Nidaidēnshun tishac matsesēn tantiapadquid icboedi abuc buanac anocquidēn tantiapadquid iquendac.

45 Adembidi Nuquin Papan chuiquin dada uamiampid nad iquec: “Bēyuc matses Adan caid nacnenshun Nuquin Papan bushcac taēc tiboquequid yampampic.” Nuquin Papan tsyuec chomiaid Esuquidistu nec. Aid tanti-aquid abipadquid Nuquin Papan menec.

46 Nuquin Papan matsesēn tantiapadquidba icmiac Esuquidistu tanti-aquid icsho isun abipadquid meniac icbon tantiapadquid yanec.

47 Bēyuc matses uanu, geshun nidaid putu bedshun nacnenaid nepampic. Bēyuc matses Adan caidēn tsyuecquid Nuquin Papan abi yacnoshon budmi-aid nepanēdash.

48 Nidaid putu bedshun bēyuc matses nacnenshun nidaidēn tabadquid icmepampic. Adquiecbidi abipadquid matsestedi yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aidō iquendac.

49 Adecbidi bēyuc matses isadacimboecquid nidaidēn tabadquidtedi nec. Nuquin Papan abucshun chomiaid isadacimboecquid abēd icquido iquendac.

⁵⁰ Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquequid chodquetemaid ictiapimbo iquec.

⁵¹ Nuquin Papan chienquiocpampid chuinu. Tantia. Abi tantiaquid unësabiquidbëdta ënden abi tantiaquid tsusedpabo dada chuca Nuquin Papan menendac.

⁵² Ambi namiaidën abucshun shoncanubi ëshë badedquo bëbedquiacimboecnuc badedquo unësesambo Nuquin Papan abi tantiaquido icmendac.

⁵³ Chodquetequid icboedi chodquesa yanendac. Unëstequid icboedi unësesa yanendac.

⁵⁴ “Adquid icmiac unëstequid nibëdquidendac.

⁵⁵ Ad icnuc ¿mitsishunquo unëstequid istuidpec? Adembidi, ¿mitsishunquo unësmetequid istuidpec?”

⁵⁶ Icaquid unëstequid nec. Nuquin Papan nadomboen nata quequin chiaid niacquid icash unëstequid matses yanac.

⁵⁷ Adquid nuqui icsho isun Nuquin Papan Nuquin Icho Esuquidistu chomeshun nuqui cuidenquiocquin aidi icsaisa cuidquin nuqui bëdambo icmebanec. Aðoac abi yacnoësh icsaisa unësesambo nuqui iquendac. Aden Nuquin Papan naindac, quequin, Bëdambocquid mibi nec, Papa, quequin nuqui chuided-chuidedendac.

⁵⁸ Adembidi chuinu. Tantiata. Adenuidi tantiaquin utsi uaquin utsin chuisho tantienquo yec tabad. Adec tabadquin Nuquin Papan chiãcpadomboen naban Esuquidistupadquid Nuquin Papan ëbi icmendac, quequin tantiaquin.

16

Utsibo menenun piucquid bedbanaid

¹ Nuquin Papan bëdambo icmebanaid utsibo menenun mimbi piucquid bedbanaid chuiquin dada uaimbique. Isec onquecuededta. Nidaid Cadaisia caid yacnocquido Esuquidistu tantiaquido ëmbi chuibanacpadomboen mimbisen nabanta. Naden Cadasia yacnocquido chiombi.

² Abentsëcshun-abentsëcshunquien mimbi bedaid musucbudcuenshun domingo ushën mimbi musucted dayun uata. Aton na daëdpactsëc icquidën daëdpactsëc dayun uanubi mitsana dadpen icquidën dadpen dayun uata. Aden musucbudcuenshun mimbi dayun uaid icnuc ëbi choacsho isash, ¿Tedsimbi menepeba? quenquo mibitedi iquendac.

³ Ëbi choshombic utsibo bëdamboen tantiaquin piucquid dayun uaidtedi mimbi menenun buantan caido isun, Ëmbi isaido neque. Yuedta, quequin dada uashun aido menembi ma buanueshun. Aden ëmbi meniac buanquin utsibo ismetuidpec.

⁴ Adecbidi ambo nidtiadquo iquebi, ëbi quenuc mimbi menenun buantan caido ëbëdi nidendac.

Utsi-utsien chuibanaid

⁵ Nidaid Masedonia caid yacno Esuquidistu tantiec iccuededquid utsi-utsiec yacno isedbëquimbi mibi isbëtsenembi.

⁶ Aden isedbëque mibi isedash tabadebi. Iquenoanquid chonobi mibëd tabadtsiabi. ¿Aid ënëdan nidnu, qesho, adabi utsi yacno mimbi nidmepatsia?

⁷ Nëbi mibëdi yuec tabadtiapimbo iquebi, quiash mibi yacno nidenquo iquebi. Yuecash mibëdi yuec tabadnuec mibi yacno nidebi. Nuquin Papa bunuc adendabi.

⁸ Nēbi padenquo iquebi. Epeso yacnocquidobēd iquebi. Nuquin Papan abipadquid aton Mayan matses meniaid ushē tantiante choan nēuēshquo nidebi.

⁹ Nēmo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibancho tantiauidash utsibo ēbi chieshēnquido nēmo iquec.

¹⁰ Mibi yacno ēbi nidenquo icnubi Timoteyo mibi yacno nideque. Aid bēdamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta.

¹¹ Nuquin Papan namiaidquiobidi Timoteyo icsho, Ēbēd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unēsquo iquebi, quequin nidme ma ēbi yacno choanu. Utsibobēd Timoteyo choaic quequin cainec tsadebi.

¹² Nēbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuedquido nuquin utsibobēd tan istanta, quequin Apodos comapenen chiombi. Adoac, Nēbi Codinto yacno nidte bunenquo iquebi, quiosh aid. Yuecash Codinto yacno nidec bēdambo ictsiash, quish yuecash aid mibi yacno nidendac.

¹³ Icsamane quequin chieshenquiocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiatquid icnuc chieshtoenquo yec dayacquo yec tabadteneta.

¹⁴ Adec tabadquin utsi bēdamboen tantiaquin nabanta.

¹⁵ Adembidi chuinu. Tantia. Nidaid Acaya caid yacno Estepanasēn shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, qeshun adobanec.

¹⁶ Aidon namiaido icta. Adembidi, comapenen nashumbanquidtedishun namiaido icta.

¹⁷ Codinto yacno Esuquidistu tantiec iccuedquidtedi ēbēdi ictiapimbocnobi mibi yacnoēsh nēdtedi chosh. Estepanas yec Podtunato yec Acaico yec quec choash puduedsho isash bēdambo iquebi.

¹⁸ Mibitedi chuibanquin aidon unēsquiocquidi bēdambo icmioshi. Mibi yacno padpidec nidash puduedshun chuibanquin adembidi mibitedi bēdambo icmendac aidon. Aido mibi yacno choacsho isun, Pabado chuibanquin mimbi bēdambo icmiacpaden nabanec tabadta, quequin chuiban.

Esuquidistu tantiaquidon mibitedi tantiaquin chuibanaid

¹⁹ Codinto yacnocquid mibitedi tantiec tabadebi, quequin dada uaqin chuita, nidaid Asia caid yacno Esuquidistu tantiec iccuedquidon cac chiemi. Adembidi, Aquidan aton chido Pidisidabēd tan chui cac chuiioaimbi. Adembidi, aidon shubun Esuquidistu tantiec iccuedquidotedishun chui cac adembidi chuiioaimbi.

²⁰ Aden utsibon chiaid chuishumbic, Esuquidistu tantiaquid utsibotedibēd bēdamboec tabadta, caimbi.

²¹ Ēmbi chuibanac ēmbi chiaid utsin dada uashumboed nec. Nēshun bedanquin dēnainquin dada uaimbique. Tantia.

²² Nuquin Icho tantiesā nēbimbobi ma Nuquin Papan comapenen cuidquin ma nēsiatequid icpanuna. Adecbidi abi tantiaquido bednuec badedquo Esuquidistu chopashun, quec tsadebi.

²³ Ēbi icsaquid icsho cuidenquiocquin Nuquin Icho Esuquidistuded Nuquin Papan cuidpanēdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

²⁴ Esuquidistun shubun icquido nuquibi icsho ëmbi bëdamboen isaido mibitedi nec.

Padi aitted dada uaombique. Isec onquecuededta.

CODINTO YACNOCQUIDON ISTE 2

¹ Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ĕmbi dada uaid mibitedishun isbanshun utsibo meneta ma isnueshun.

² Matses icsaquid icsho cuidnushe quiash abided ciudadec Esuquidistu uněspanědash, quequin tantiaquisho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

Bědambo icmianquidquio Nuquin Papa

³ Nuquin Papa nad iqueque. Tantia. Chuinu. Ĕbi uněsquo icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna.

⁴ Natiamiaid icsho tantiaquin chieshtomenquiocquin aiděmbi nuqui dayacquo icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui.

⁵ Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquo icmiacpadomboen Esuquidistu tantiaquid utsi tantiaquin chieshtomenquiocquin dayacquo nuqui icmendac.

⁶ Adembidi ěbipadquidobědan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquo icmec, quec tabadta.

⁷ Utsin měyanaid icquimbi Esuquidistu tantesa uainquo iquec, quequin mibi tantiec tsadebi. Ĕbi měyanacpaden mibi měnyansho isun Nuquin Papan bědambo icmiaid mibi iquendac.

⁸ Nidaid Asia caid yacnoshon ěbi natiamboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocnoc natiamioŝi. Adoac, Uněsebi, quiobi.

⁹ Uněs uatiad, utsibo qesho tantiaŝ, Ĕbibi měnchiquidtiapimbocquimbi mat-ses uněsacsho uincuemeguiděn ěbi měnchictiŝ, quequin tantiec tsadobi.

¹⁰ Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi.

¹¹ Ĕbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiaŝhun mimbi Pabado měnchiccoc. Mibi bědamboquid nec, Papa, quequin ma dadpeshun ambi naid chuipana.

Něbi mibi yacno nidenquio iquebi, quiaid

¹² Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matsesěn tantiamiacpadpenquo yec tabadobi.

¹³ Ma tantiamenueshun abimbo chuiquin mibi dada uashunec nebi. Ĕmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun.

14 Ēbēd Pabado bēdamboec tabadosh, quequin tantiec bēdambo iquebi, quec utsi-utsiec. Adecbidi, Codinto yacnocquido utsi-utsiec bēdamboec tabadosh, quequin utsibon chuisho tantiash bēdambo iquebi. Esuquidistu choanuc adquiequi Codinto yacnocquido tabadpashun, quec tsadebi.

15 Aden ēbi bēdamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bēdambo iquebi, quepashun, caimbi mibi.

16 Mibi isbidanec nidaid Masedonia caid yacno nidashic padpiden mibi isbētsenec choaibi. Aden isbētsenembi, qesho tantiashun nidaid Udeya caid yacno mimbi ēbi nidmetsiac, quequin mibi chiombi.

17 ¿Uquēducshun, Nidenquo iquebi, quequin muaquindambi chuidio? Adenquocquin chiombi.

18 Ambi chiacpadomboen nabanquidquo Nuquin Papa nec. Aid chuinu. Tantia. Abimbo chuiquidquo yec utsi yantiapimbo iquec. Adquidquo icquin ambi, Esuquidistu chuibeneta, caidquo yec adomboen chuiquid nebi. Utsi uain chuinu, quesa nebi.

19 Ambi chiacpadomboen nabanquidquo Nuquin Papan Madombo, ėmbi chuibenaiid, Esuquidistu nec. Aidi Sidasēn chuibenaiidbidi nec. Aidi Timoteyon chuibenaiidbidi nec. Esuquidistu abimbo chuiquidquo yec utsi yantiapimbo iquec. Abi chuibenequidquo adquidbidi nec.

20 Con Madon naden naindac, quequin Nuquin Papan chiacpadomboen Esuquidistun ėnden nabanac. Aden abi nabanec. Ambi chiacpadomboen naquidquo Esuquidistu nec, quequin tantiaquin ambi naid ėbipadquidon chuibanec. Aden chuibanac abi tantiaquidquo yanash, Abimbo iquec. Esuquidistun ambi chiacpadomboen naindac, quec tantiec nuqui tabadec.

21 Nuquin Papan tantiamiac: Esuquidistu tantiaquid nebi, quish, Tantiesa nebi, quetiapimbo nuqui iquec. Adquid icmiac aton Madombo chuibanquid nuqui nendac.

22 Adembidi aton bacuē icmiaid nuqui nec. Adembidi aton Mayan Nuquin Papan menaiid nuqui nec. Ēbēd tabadquid aido nendac, quequin tantiamenuen Nuquin Papan aton Mayan meniac ma aidēmbi nuqui bēdambo icmepanueshun.

23 Nuquin Papan tantianubi mibi yacno nidnu quiobi. Adashic, chushca-chitomane quish mibi yacno nidenquo iccobi.

24 Ēmbi Esuquidistu chuibanac abi tantiaquid dadpen iquec. Aidon ichopenquo nebi. Aidon ichopenquibidi Esuquidistu chuibanquid utsibo nec. Esuquidistu tantiec bēdambo iquebi ma quenu, quequin chuibenequidquo nebi. Esuquidistu tantiaquid nebi, abimbo quequin aid tantesa uainquo mimbi iquendac.

2

1 Aden tantiaquin comapenen chuiquin unēsquo icmenushe quec mibi yacno nidenquo iquebi caombi.

2 Mibi unēsquo ėmbi icmiac ¿tsuntsin ēbi bēdambo icmepatsiash? ¿Ēmbi icsambo icmeboedēnda ēbi bēdambo icmepadic? Padenquo.

3 Aden tantiaquin mimbi iste dada uaombi ma ēbi bēdambo icmequid unēsquo icmetiapimbo iquebi, queshun. Bēdambo iquebi, quequin ēbi tantiec adquibidi mibi icoatsiac, quequin tantiombi.

4 Unēsquo yec shubiquimbi mibi dada uashun, Meneta, caondambi. Unēsquo icmenu, quenquiocquin mibi comapenen tantiaquin dada uaondambi.

Abi icsaboed bēpiscudnueshun yued quiaid

⁵ Anocquidën ëbi unësquoio icmedenequimbi adembidi comapenquieic unësquoio mibi icmeoaosh. Aidi mibi chiondambi.

⁶ Aidi mibi dadpenshun cacumiac abi icsaid ënosh quec.

⁷ Adoacsho abi icsaid bëpiscudshun aidi yuedoaquin bëdambo icme. Yuedenquoio yac natiamianquieic unëstiadquoio yantsiash.

⁸ Nuquibi iccuedednuna, quequin aid tantiaquin yued caimbi.

⁹ ¿Ëmbi chiacpadomboen nabanquidquoda neque? Isnu, quequin icsaquid cacumefa, quequin dada uaondambi.

¹⁰ Aden ëmbi dada uacpaden mimbi cacumiac abi icsaid ënsho isun abi icsaid nibëdacimboec bëpiscudshun yued. Adsho tantiahsun adomboembidi naimbi. Aidbëdi abentsëc yacimboecquido yanosh, quesho tantiahsun abi icsaid bëpiscudebi Esuquidistun tantianubi.

¹¹ Nuqui chieshënquidën Satanasën aidi icsamenushe queshun abi icsaid ëmboed yuedta. Yuedenda, Satanasën quequin tantiamiac onquesho tantienda.

Nuquin Papan con Mayan meniaid adquid ëbëdi tabadtequid nec, quiaid

¹² Esuquidistu chuibanec shubu dadpen icquid Todoas caid yacno ëbi chonoc, Tantianu, quec cho-choquid dadpen icpondash.

¹³ Adquid dadpen icnubi ëmbi con utsi caid, Tito, mibi yacnoësh choabi icnuc ambo yuec tabadtiapimbo iccobi. Adash, Bëquednu, quianec nidaid Masedonia caid yacno nidoapobi.

¹⁴ Bëdambocquid mibi nec, Papa. Mimbi Esuquidistu tantiaquid ëbi yacpadquido icneshun mimbi, Esuquidistu chuibeneta, caid ëbitedi nec. Ëmbi chuibanaid noadte bëdabimboecquid nec. Noadte bëda pushudec noadsho uano-uanoec tabadquidon shëdec. Adembidi, Esuquidistu ëbi yacpadquidon chuibenesho uano-uanoec tabadquidon tantiec.

¹⁵⁻¹⁶ Esuquidistu chuibanac noadte bëdan danoshquiaid shëdacimboen utsibon tantiec. Adembidi, Esuquidistun ëbi chuibeneta caido Icho isachimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ënëdenquoio yec abëd icquido aitedi iquendac. Aden nuqui isquin Esuquidistu tantiesa icsho Nuquin Papan nësiatequid iquendac. ¿Tsutsi Esuquidistupadquidquico icpec? Adquid nibëdec. Adesa icsho ambi, Ëbi chuibeneta, caidquico nebi. Adquid icquin chuibenenubi

¹⁷ piucquid bedte bunquin utsin-utsinquien Esuquidistu chuibanec. Adesa ëbipadquido iquec. Piucquid bednuequin ëbi yacpadquidon Esuquidistu chuibanenquoio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquico nebi.

3

¹ ¿Pabado bëdamboec tabadquin Esuquidistu chuibenequid nec, mibi camenuendambi aden mibi chuibandio? Padenquoio. Adembidi, ¿Utsi yacno nidnun bëdamboec tabadquin Esuquidistu Pabado chuibanosh, quequin dada uata, ëmbi cac mimbi dada uaidtambi buampe? Padenquoio.

² Mibëdi tabadquin chuibanac Esuquidistu tantiaquid yansho isun Codinto yacnocquido mimbi chuibanado nec, quequin chëshëten pinchuquën tansiacimboecnuc paucudtiapimboecnoc Nuquin Icbon tantiamioshi. Adembidi icsamboec tabadboedi nëbi bëdamboec tabadsho isun Pabado Esuquidistu chuibanado Codinto yacnocquido nec, quequin adomboembidi tantiabedec utsibon.

³ ¿Abi tantiaquid icsho isun bëdamboec tabadmenuequin ambi cuënote bedshun dada uampicpadquidta mibi meniondash? Padenquoio. Esuquidistu

tantiasho isun unēstiapimbocquid aton Mayan abipadquidquio mibitedi meniondash.

4 Nuquin Papan tantiacpadomboen Esuquidistun, Ēbi chuibeneta, cac chuibanac Esuquidistu tantiaquid mibitedi yanacsho tantiec ěmbi chuibanaido aidtedi nec, quequin tantiembi.

5 Ēmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiembi.

6 Ēmbibi Esuquidistu chuitiapimbo icsho Nuquin Papan Mayanēn tantiamiac Esuquidistu chuibenequidquio nebi. Ambi, Nadomboen nata, quequin dada uamiampicpadomboen chuibanta caidpenquio nebi. Ambi nadomboen nata, quequin dada uamiampitedi natiapimbo yec aibdēdi matses tabadtiapimbo iquec. Aton Mayan meniaidbēd tabadtequid nec.

Abi tantiaquido bēdambo icmetequid aton Mayan

7 Nuquin Papan nadomboen nata quequin chiaid cuēnoten dada uacpaden nainquio yec matses abi yacno tabadtiapimbo iquec, quequin dada uampid meniac abi chēnquiacpadec Moisesēn bētantiante comapenec bēchomauanquiech chēnqueboedi macuēsh budec bēdiambo chēnquesho isadaidbon bēstiapimbo icpampic.

8 Nēbi Esuquidistu tantiaquid bēdambo icmequid aton Mayan abipadquid meniaid ēnēdenquiocquidquio nec.

9 Ēmbi nadomboen nata quequin chiaid niacquid ěbēdi tabadtiapimbo iquec, quequin dada uaid Nuquin Papan meniac buanshun Moisesēn aton matses ēnēdenquiocnoc tabadmetiapimbo icambien matses icsaid bedshunash icsaisa abided cuidadec unēsash uincuenquidēn abi tantiaquido ēnēdtiapimbocnoc tabadmendac.

10 Nēbi Esuquidistu unēsaid tantiaquid ēnēdtiapimbocquid nec, quequin chiac ambi dada uaid meniampid ēnēdabimbocquid nendac.

11 Ai, nadomboen nata quequin chiaid Moisesēn bedshun meniaid ēnēdtequid icnubi bēdambo icmiantequid Nuquin Papan chomiaid icsaisa ēnēdtiapimbo iquec.

12 Aden tantiaquin, Esuquidistu nuqui tantiaid icsaisa yec ēnēdtiapimbocquid nec, quequin chuibenequid nebi.

13 Moises Nuquin Papabēd onquec bēchomauanquiechoedi auēshquio nidec ushma-ushmactsēcquio yanash matses ismenquiocnuec bēpucudpampic. Adesa icquin ompoenquocquin utsibon ma tantianu, quequin Esuquidistu chuibenequido nuqui nec.

14 Nuquin Papan dada uaid Moisesēn bēaid tantiate bunesa abēd icquido icpampic. Adquiobidi pamumēdabimboec isadaidbo abi tabadec. Nuquin Papan cuēnoten dada uacpadquid isec onquec nēbi adquiobidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac.

15 Nadomboen nata quequin dada uaid Moises menepampid isec onquec pamumēdabimboecquid isadaidbo utsi-utsiec iquec.

16 Esuquidistu tantiaquid icsho Nuquin Papan Mayanēn paucquin tantiamiaid nendac.

17 Nuquin Icbo icsaisa icquin ēnden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi.

18 Paucac, Ēbi icsaid bedshunash Esuquidistuded cuidadpanēdash, quequin nuqui tantiec. Aidēnquiobi icsaisa icquin abipadquid nuqui meniac aton Mayanēn adquid nuqui icmebanec.

4

Nuquin Papan nadatiambocquin nadenequin Esuquidistu chuibenemiaid

¹ Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec.

² Icsash ompodquid icboedi nēbi muesa icquin Nuquin Papan chiaid utsi uainquio yec nuqui bēdamboec tabadec. Nuquin Papan isec, quec adequi nuqui tabadec. Adec tabadec ēbipadquid utsi yansho isash Nuquin Papan chiaid tantiate utsibo bunquiopec.

³ Esuquidistu chuibansho utsin-utsinquien bēdamboen tantiatipimbo iquec. Adquid Nuquin Papabēd tabadiapimboquid nec.

⁴ Nuquin Papapadquid Esuquidistu tantiaquid icnushe queshun icsami-anuequidēn Satanasēn pamunacimboen utsi-utsien tantiamenquio iquec.

⁵ Ēmbibi naid chiesha nebi. Matsesēn Icho Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi.

⁶ Abitedi uanuna, queshun, “Inchēshquio icboedi uēshēmo yanquiota,” capampic Nuquin Papan. Adomboembidi Nuquin Papan chiaid pamumēdacimboen tantienquicoeboedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

⁷ Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenquid icmiondashi.

⁸ Aden chuibansho mēyanaqui abi chuibenec nebi. Padpiden-padpidemboen natiamiaqui, ¿Atotsimbi napeba? quesho Nuquin Papan dayacquo icmedenebi.

⁹ Ēbi chieshēnquid dadpen icnubi ēbi bēdambo icmequid aidi iquec. Comapenen cuestanec, Unēsec, queshun nianaqui abi Esuquidistu chuibenembi.

¹⁰ Esuquidistu mēyanquin unēs uacpaden mēyanquin unēs uatsen-unēs uatsenshobi dayacquo icmedenioshi. Adoacsho uincuenaidēn dayacquo icmedeniaid nec, quequin utsibon isbededebi.

¹¹ Adembi Esuquidistu chuibansho unēs uatsiashi, quequin chuibenec nebi. Aid chuibansho unēs uatsenaqui abipadquid unēsesa yanebi, quec bēdamboec tabadebi.

¹² Aden tantiaquin aid chuibanac abi tantiaquid yanash aidbēdi tabadec unēsesa mibitedi yanendac.

¹³ Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi.

¹⁴ Aden tantiaquin Nuquin Papan Esuquidistu uincuemiacpaden aidbēdi tabadmenuen mibitedibēdtabi ēbēd icquidtedi uincuemendac, quequin chiembi.

¹⁵ Aid tantiaquid ma mibi icpanueshun chuibansho mēyanaid nebi. Mēyanaqui utsi dadpen Esuquidistu tantiaquido ma yanu queshun chuibenec nebi. Aden chiac abi tantiaquid icsho isun, Mimbi naidtedi bēdambo iquec, Papa, quequin ma Nuquin Papa utsibon chuipanuna.

¹⁶ Aden tantiec dayactiapibi quenquio iquebi. Tsusio budquimbi badiadquidēn-badiadquidēnquien Esuquidistu tantiadonequidquio yanebi.

¹⁷ Natiamiantequid ēnēdendac. Natiamiaid yashic Nuquin Papa yacno tabadec bēdamboshē iquendabi. Esuquidistupadquid icsaisa yec unēsesa yanash ēnēdtiapimbo iquendabi.

¹⁸ Aden tantiec, Ēbi natiamiaid iquec, quiashic, Nuquin Papabēd tabadendabi, quequin comapenen tantiec tsadebi. Ēmbi isaidtedi ēnēdendac. Nuquin Papa yacnocquid ěmbi isacmaidtedibēd ēnēdtemaid iquendabi.

5

Nuquin Papabēd tabadte iquendac quiaid

¹ Con nami shēnibudash unēsash nibēdnuc Nuquin Papabēd tabadec nami chuca uaid iquendabi. Nami chuca uaid ēnēdtemaid matsesēn nacnenacmaid nec, quequin tantiembi.

² U abucquoio nidabi yec uēshquequid nebi. Adquiocsho nami chuca uaid ēnden meniōndac, Cuishon, quetsiabi.

³ Aden meniac ēbibimboec isadsho isendac, quec tsadebi.

⁴ Nami chodquequid icnuc uēshquec nuqui tabadec. Nami chuca uaid chodquesa menepashuni mabi unēsasa icpanu quec nuqui tabadec.

⁵ Con Mado Esuquidistu tantiaquid ēbēd abuc tabadmenuen ēbipadquid unēsasa icmenu, quequin Nuquin Papan aton Mayan menetequid nuqui nec.

⁶ Aton Mayan meniaid iquec nami chodquetequid abi iquequi chieshenquoio yec dayacquio yec nuqui tabadec. Adec tabadash abuc Nuquin Icbobēd tabadendabi, quequin nuqui tantiec.

⁷ Aton Mayan meniac nuqui isacmaid Esuquidistu cainec nuqui tabadec. Ēmbi isaid ěmbi caintemaid nec.

⁸ Aden aid cainsho nami chodquesa badedquoio menepashuni. Aden meniac Nuquin Icbobēd iquendabi, quequin nuqui tantiec.

⁹ Aden tantiec nidaidēn tabadequid Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiembi.

¹⁰ Adembidi abi tantiaquidtedishun naid ambi chuibante ushē chonoc Nuquin Icbon chuibanendac, quequin tantiembi. Utsi-utsien, Mimbi bēdamboen nabanoc, quequin chuibanendac abitedishun naid cuidquin.

Ma utsibotsen abi tantiaquid icpanu quequin chuibanaid

¹¹ Aden ambi tantiacpaden nabansho, Bēdamboen mimbi nabanoc, Nuquin Icbon ēbi caindac, quequin tantiaquin ma utsibotsen Esuquidistu tantianueshshun mibi chuibenec nebi. Aid tantiaquin nabanec bēdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi.

¹² Aden tantiaquin, Mibi bēdambo iquec, ēbi camenuen mibi dada uashunenquoio iquembi. Ēbi chienquiocquin, Bēdamboec tabadquin ismiac bimboecquidēn ēbi icsamboen chuisho aido chuita, quequin mibi dada uashunembi.

¹³ Aido, Pabadon tantiate icsabudosh quec. Adembidi, Nuquin Papan chiacpadomboen ěmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu qeshun aid chuibenec nebi utsibon chuibenenquiocnobi.

¹⁴ Chian anēdēnquequid icsambocquid nēsianushe quiash matses icsaid bedshunash abided ciudadec icsaisa Esuquidistu unēsapanēdash, quequin ma utsibon tantianueshshun chuibenec nebi.

¹⁵ Ma ěmbi naid chiac ēbi tantiaquido ma ēbēdi icpanu, quiash unēsash uincuempanēdash Esuquidistu.

¹⁶ Adec unēsash Esuquidistu uincuempanēdash, quequin matses unēsash uincuenta iquec, quequin abi tantiaquidon tantiec. Ēnden, matsesquio Esus

nec, quiondaidi nēbi, Nuquin Papan Chomiaid yec matses tantiec unēsash uincuēmpañēdash, quequin tantiēmbi.

¹⁷ Abi tantiaquid ambi tantiamiaid nec. Ēnden matsesēn tantiacpadquiec icboedi Esuquidistun tantiacpadquiec bēdamboec tabadec abi tantiaquidquo.

¹⁸⁻¹⁹ Nuquin Papan ēndenquimboshē tantiampicpaden Esuquidistun naid nec. Nuquin Papan chiaid niacquid nuqui icboedēmbi matses icsaid bedshunash abided cuidadec Esuquidistu unēspañēdash, quequin tantiaquin ma aidquo utsibon tantiapanu qeshun ambi naid nuqui chuibenec.

²⁰ Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ēbi icsaid bedshunash Esuquidistuded cuidadpañēdash, quequin abēd icnuequin aid tantiaquiota.

²¹ Ambi cuidtiadquid nuqui icnubi Esuquidistu icsaisaded Nuquin Papan cuidpañēdash ma Esuquidistu ambi cuidaidpadquid tantiaquidtedi icsaisa yampaneshun.

6

¹ Matses bēdambo icmenu, quequin Nuquin Papan chiaid bēpiscudmane qeshun ambi tantiamiacpaden nabanec tabadta.

² Nuquin Papan chiampid chuinu. Tantia.

“Mibi bēdambo icmete ushē chonoc cuēnsho tantiombi.

Tantiesa icboedi nēid ushēnquo mibi tantiamiombi.”

Aden Nuquin Papan chiampicpadomboen bēdamboen tantia. Nēbi Nuquin Papan bēdambo mibi icmenu cac, Ai, cata. Nēid ushēnquo ambi aton bacuē icmete ushē nendac.

Pabado natiamiaid

³ Icsamboec tabadquimbi Pabadon Esuquidistu chuibancho, Tantiati-pibi, utsibo quetiapiimbocnoc bēdamboec tabadec nebi.

⁴ Nuquin Papan chuimiaid yec nadec tabadebi: Chieshenquo yec dayacquiocquin ambi chiaid chuibenec bēdamboec tabadec nebi. Natiamiaid yec adequi tabadebi.

⁵ Utsin cuesaqui adequi bēdamboec tabadebi. Quēnēn nauedaqui adequi bēdamboec tabadebi. Nuquin Papan chiaid ēmbi chuibanac cuesnanubi padenquo yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunquiec bēdamboec tabadebi.

⁶ Icsainquo yec bēdamboec tabadebi. Nuquin Papan chiaid tantesa uainquo yec bēdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, qeshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquiocquin utsi abimbo tantiec adecbidi tabadebi.

⁷ Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibon abi icsaid ēmpañeshun.

⁸ Ēbi chiec: Pabado bēdambo iquec, quenubi adequi tabadebi. Utsin ēbi chuoiaic: Pabado icsambo iquec, quenubi adequi bēdamboec tabadebi. Ēbi icsamboen chuinubi adequi bēdamboec tabadebi. Ēbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi.

⁹ Ēbi isquidēmbi, Ēmbi isacmaid Pabado nec, caqui ėmbi chuibansho tantiaoboedo nec caimbi. Ēbi unēs uate bunubi abi chuibanec capucuenebi. Mēyanaqui unēsabi yec nidebi.

¹⁰ Unēsquo icniaqui Esuquidistu tantiec bēdambo iquebi. Con na nibēdsho isun adembidi Esuquidistu chuibanec nebi ma Esuquidistu tantiec utsibo bēdambo icpanueshun. Con na nibēdsho isash Nuquin Papan bacuē yec aton natedi con na nec, quequin tantiec tsadebi.

¹¹ Chuitiapibi, quenquiocquin ėbi natiaboedtedi mibi chuibanombi. Mibi comapenen tantiaquin ėmbi nabanaid mibi chuibanombi.

¹² Mibi tantiaquoquin chuibanquid ėbi icnubi ėbi tantiaquin chienquo mimbi iquec.

¹³ Pabadon con bacuēbo caido nebi, quequin mimbi naid mimbi tantiaidbēda ompoenquiocquin ėbi chuiban, caimbi mibi.

Esuquidistu tantiesabēdtambi icsain nainda quiaid

¹⁴ Esuquidistu tantiesabēdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, quesa aton papa. ¿Nuquin Papan bēdambo icmiaidēnda ambi chiaid niacquidbēdtan nabampadic? ¿Nuquin Papan Mayanēn tantiamiaidēnda Icho chieshēnquidbēdtambi chieshēmpadic?

¹⁵ ¿Esuquidistu Satanaspadquidta nedic? Padenquo. ¿Esuquidistu tantiaquid abi tantiesapadquidta nedic? Padenquo.

¹⁶ ¿Nuquin Papan ambi uaidbimboecnuc matsesēn nacnenaid tantiaquidta aton Mayan Nuquin Papan meniaid icpadic? Padenquo. Abi tantiaquid aton Mayan menec. Nuquin Papan dada uamiampid dāda uanu. Ista.

“Ēbēd icquidbēd iquendabi;

Aidbēdi capuebi;

Aton papa nebi;

Con matses adquido nec,

¹⁷ Con matses icquin ėbi tantiesan ėmbi chiaid niacacpadomboen nainda.

Adecbidi aid icsacpadec tabadenda.

Adecbidi icsainquo yec tabad.

Adquid ėbēd iquec cho caindambi.

¹⁸ Adquidon papa iquendabi;

Adquid ėmbi con madobēd con champi caid iquendac, quec Nuquin Papa.”

Abi tantiaquido nadatiambocquidēn aden chiec.

7

¹ Naden nanuna, quequin Nuquin Papan chiac nuqui naid icsatedibēdtabi nuqui tantiaid icsatedi ėnu, quequin Nuquin Papan chiacpadomboen nabanec tabadtenenuna.

Unēsquo ichoedi mimbi naid tantiaish bēdamboshē iquebi quiaid

² Adembidi, ėbēdtabi ėbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi.

³ Pabado tantienquo yec icsaobi mibi camenuen nēid chuiquin dada uainquo iccombi. Mibitedi tantiec tsadebi, quequin padpiden chiembi. Abimbo caimbi. Unēssequi mibi bēshuntiapimbo iquendabi.

⁴ Mimbi chiacpadpenquiochoedēmbi naosh, quequin choquidēn chioishi. Aden chuisho tantiaashun, Nuquin Papan chiacpaden nabanquidquo nec, quequin mibi chiec nebi. Unēsquo ichoedi mimbi naid tantiaish bēdamboshē iquebi. Utsin natiamiaid icshobi bēdambo iquebi, mimbi ėbi camioc.

⁵ Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedëmbi tantaesa uatsiash, quec quenenenquo iccobi.

⁶ Unësquo icsho ëbi tantiaquin Nuquin Papan Tito padpiden chomiosh ëbi bëdambo icmeoanuen.

⁷ Choashun mimbi aid tantiaquin nabanaid Titon chioshi. Adembidi, ëbi iste mibi bunaid chioshi. Mimbi dada uaid isash unësquo icquin, Codinto yacnocquidon mimbi chiapaden nabanosh, quequin Titon chioshi. Aden chiac bëdamboshë yanobi ad yenquo icboedi.

⁸ Mimbi dada uaid isash Codinto yacnocquido unësquo iccosh, qesho tantias, Icsambo icchitobi, quenquo iquebi. Aden dada uaic icsambo iccobi, quetiapimbo yequi mibi unësquo yacpadequi unësquo iccobi. Yuec mibi ad yenquo iccoc.

⁹ Adecbidi nëbi bëdambo iquebi. Ëmbi mibi unësquo icmiac mibi icsaid ënquin Nuquin Papan chiapaden nabanec, quec utsibo. Aden chuisho tantiaquin mibi unësquo icmequin mibi icsabudmiambo iccombi. Unësquo icmiaqui mibi bëdambo yanoc.

¹⁰ Unësquo icmiac, Nuquin Papan chiaid niacombi, quiash unësquo icquin mibi icsaid mimbi ënac. Adsho isun Nuquin Papan ënëdtiapimbo noc aidbëd mibi icmendac. Aden unësquo icmiaqui, Bëdambo iquebi, mibi quendac. Adecbidi mibi icsapadec icsainquo mibi icpendac. Padnuen Nuquin Papan chiapaden niacquin ënesa abi natiamiauidi tantiec Nuquin Papa yacno puduedtiapimbo iquendac.

¹¹ Padnuen mibi unësquo icmiac nëbi ambi chiaid comapenen tantiate bunec mibi. Aid padpiden tantiaquin, çatotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ënoc. Adembidi, Ëbi padpiden bëdamboen is, quequin Nuquin Papa mimbi chioc. Icsashun chienquoicboedëmbi nëbi cuembo bëdamboen chuinu, quequin mimbi chuibanoc. Aden mibi icsaid ënacsho isun mibitedi icsaquin ëntiapimbo icquidën nacpaden naisa nec, quequin tantiembi.

¹² Icsaquad ambi icsa uanaidbëdtabi chuinen mibitedi dada uainquo iccombi. Abentsëc icsash abitedi unësquo iquec. Adquiecbidi ëbi unësquo icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin

¹³ Ëmbi tantiacpaden naquin mimbi bëdambo iquebi camiaid nebi.

Adembidi Tito yuedquin mimbi bëdambo iquebi camiaidbidi niosh. Ëbi yuedenquoicsiash queboedi niosh. Yuedoshi, Tito qesho tantias bëdamboshë iquebi.

¹⁴ Mibi nidmembi, Tito, qeshun, Ëbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ëmbi chuibocpadomboen mimbi nashunac. Aden tantias, Abimbo chiombi, quepobi. Ëmbi mibi muainquiocquin chuibanacpadec adquibidi mibi nabanec tabadaid abimbo iccosh. Adomboembidi Titon mibi isbanosh.

¹⁵ Èbitedi chushcatsiash, quequin mibitedishun Tito yuedpanëdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito.

¹⁶ Adoaidi ambia tantiaquid icquin ëmbi chiac mibitedishun nabanendac, quequin tantiembi. Aden tantiec bëdambo yec tsadebi.

8

Aton na nibëdquid icsho aton na dadpen icquid menequid

¹ Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nēbi bēdamboen nabanec tabadaid chuīnu. Tantia.

² Natiamiaqui bēdambo iquebi quec aido tabadec. Adec tabadquin Esuquidistu tantiaquid utsibo tantiaquin menenuequin aton na daēdpactsēc musucshun dayun uaosh.

³ Ēmbi, Meneta, cainquiocnobi aton na bedtequid naimbudtsēcquien menenuequin bedbanosh.

⁴ Esuquidistu tantiaquid utsibo, nidaid Udeya caid yacnocquido, aton na nibēdec natiac, quequin chiac Masedonia caid yacnocquidon, Aido menenuna, quequin comapenen chuiposhi.

⁵ Mitsana daēdpactsēc icnuc utsibo mimbi menetiapimbo icpec, quequin chuīnu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi.

⁶ Adomboen menenun bedbamposh. Adosho isun Tito nadombi. Mimbi ēnden nidaid Udeya caid yacnocquidon natiac chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiactedta bedbanoshe? Isnu, qeshun istanta, quequin Tito chiombi.

⁷ Naden naquid Codinto yacnocquido nec, quequin mibi tantiembi. Nuquin Papan Mayanēn tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiac ambia tantiaquidquio Pabado nec, quequin tantiaquin, Naden nata, quequin ēmbi chiacpadomboen badedquio comapenen naquidquio mibi nec. Adembidi ēbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

⁸ Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi.

⁹ Nuquin Icho Esuquidistu abuc tabadec abitedishun Icho ichoedi nuquitsen abuc abēdi tabadmenuec matsesash nidaidēn tabadnuc aton na nibēdpadenec. Aidēn matses tantiaquin nabanacpaden utsibo tantiaquin nabanta.

¹⁰ Ēmbi tantiacpaden mibi adembi chuīnu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimbi tauapondac.

¹¹ ¿Aden nanuna, qeshun mimbi chiacted ēnquinda bedshun dayun uao? Padenquiocquin adota.

¹² Mitsana daēdpactsēc icnuc daēdpactsēc musucshun menesho isash, Dadpen meneta, quenquio Nuquin Papa iquec.

¹³ Aton na nibēdquid icsho, Natiacquin meneta, quenquio iquebi. Aton na nibēdquid icsho aton na dadpen icquidēn menec.

¹⁴ Mitsana dadpen icquid mimbi musucshun meniac aton na nibēdquid bēdambo iquebi, quepec. Aden meniac mibēdi aton na nibēdquid bēdambo iquendac.

¹⁵ Nuquin Papan dada uamiampid nad iquec. Chuīnu. Tantia. Petequidēmpi Nuquin Papan mana caid meniaid chuiquin: “Shubun tabadquid dadpenshun aiteded-aitedquien bedbanshun peshun napi uaid nibēdosh. Adecbidi, aton shubun daēdpactsēc tabadquidon aited bedbanshun peshun napi uaid nibēdosh.” Adec Nuquin Papan meniaidtedi bēdambo yampicpadec aton na dadpen icquidbēdi ambi meniaido bēdambo yampec.

Tito Codinto yacno nidte

¹⁶ Nēbi Tito mibi chuinu. Tantia. Ēbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bēdambo iquec, Papa, quec tsadebi.

¹⁷ ¿Codinto yacno tsutsi nidpatsiash? quequin ěmbi chiac, Ēbibi nidebi, quiosh Tito.

¹⁸ Tito mibi yacno nidnuesho tantiashun nuqui con utsi caid utsi Titobēdi nidta caombi. Aidi Esuquidistu chuibanquid nec, quequin utsibon chiec. Bēdamboquid nec.

¹⁹ Nidaid Masedonia caid yacnocquidon, Esuquidistu tantiec iccuededquidon ěmbi dayun uaid Pabadobēdan buanec nid caidbidi Titobēd nidquid nec.

²⁰ Aid daēd ěbēdi nidsho isash, Nuqui na buanquin ampetsiash, queti-apimbo utsibo iquec.

²¹ Nuquin Papan tantiamiacpaden aidobēdtambi bēdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobēdtambi buanshunembi.

²² Tsyuec nidebi, quequin utsibobēdta Tido mibi yacno nidmembali. Ēmbi nata cac bēdamboen nabanquid aidtedi nec. Mimbi chiapadomboen nashunquido Codinto yacnocquido nec, quec aido mibi yacno nidec.

²³ Mibi nashunquin ěbēdtambi Esuquidistu chuibanquid Tito nec. Aidbēdi Esuquidistu tantiaquid utsi nidec. Esuquidistu tantiec iccuededquidon nēuēshquo puduanec Codinto yacno nidta caboedi Titobēd nidec.

²⁴ Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Ēmbi chiapadomboen nashumbanta ma mimbi nashumbanacsho aido nidmequidon Masedonia yacnocquidon tantianpanuna.

9

¹ Ēnden Esuquidistu tantiaquid utsibo tantiaquin nashunta quequin ěmbi chiac,

² Adonona, qeshun mitsana bedbanquin mimbi tauaondac. Adsho isun nidaid Masedonia yacnoēsh Esuquidistu tantiec iccuededquido mimbi menuequid chuibocpadomboen chiombi. Abentsēcshun-abentsēcshunquien menebanquin dayun uanuna, quequin seta utsin mimbi chuibocpadomboen ěmbi chiac Masedonia yacnocquidotsen, Adomboembidi nabanembi, queaposh.

³ Aden aidon chuisho tantiashun nuqui con utsi caido mibi yacno nidmembali mimbi chiondacadpaden bedbanambo icnushe qeshun.

⁴ Nidaid Masedonia caid yacnoēsh Esuquidistu tantiec iccuededquido ěbēdien tsyuec mibi yacno nidchitec. Aidobēdi mibi yacno choshon ěmbi chiapaden mimbi bedbanambocsho isash, Abimbo chiacimboen chuichitombi, quec natiaic bēpiutsiabi. Adquiecbidi mibi icoaic.

⁵ Adquo icnushe qeshun utsiboba mibi yacno nidmembali. Aido mibi yacno choacsho mimbi chiondacted bedbanquin dayun uaid mimbi ismetiac, Abimbo chiombi, quequin. Aido chonoc mimbi chiated bedbanquin dayun uambochoedēmbi nēbi mimbi bedhampec. Aden mimbibi bedbanquin mibi menete bunacteduidtsēqui mimbi menec. Utsimbic, Menetiapibi, queboedēmbi utsin, Bec cho, cac aton piucquid tantiec unēshquo icquin menetsiash. Aden tantiaquin menenda.

Nuquin Papan na dadpen bedmiaidēn aton na nibēdquid menequid

⁶ Nuquin Papan chiaid chuinu. Adembi tantiata. Tied icbon daëdpactsëc nitsinac caniaash ëshëacsho aidtedtsëcbidi bedpec; dadpen ambi nitsinac caniaash ëshëacsho dadpen bedpec.

⁷ Adquibidi aton na icquid iqueue. Tantia. Chuinu. Nëitded menenuequin ambi chiacted menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëitded bec cho, cac menepëc. Aden utsin chiacted meniash, Bëdambo iquebi, quetiapimbocquin menec.

⁸ Mitsana menete bunquin mimbi chiacted menesho isun Nuquin Papan uesadmenquiocquin mimbi bedmec ma utsi-utsien menebampanueshun.

⁹ Nuquin Papan dada uamiampid adomboembidi chiaid nad iquec: "Nuquin Papan dadpen bedmiosi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboed Nuquin Papan chuibanendac."

¹⁰ Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneoapec.

¹¹ Aden mimbi meniac utsibotsen, Bëdambo iquebi, quec tabadec. Adeq tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

¹² Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembidi, Nuquin Papa bëdamboshë iquec, quequin aidon chuibanendac.

¹³ Meniacsho isash, Esuquidistu tantiaquid nebi, quequin abimbo chuiquidquio aid nec, quequin mimbi meniaidbëdtambi utsibon mibi chuibanendac.

¹⁴ Adquidquio nec, quequin utsibon mibi chiec. Mimbi tantiamiacpadomboen nabanquidquio Codinto yacnocquido nec. Aido bëdambo icmë, Papa, quequin mimbi meniaidon adomboembidi chiendac.

¹⁵ Aden aidon chuinubi naden nuqui Nuquin Papa chiec. Mimbi chomiaid Esuquidistu ëbi bëdambo icmenuec ëbi icsaid bedshunash abided cuidadec unëshash uincuempanëdash. Aidpadquid utsi nibëdec, Papa, quequin nuqui chiec.

10

Ëmbi dada uacpaden mibi yacno choshon adomboembidi nabanembi quiaid

¹ Comapenec chushquenquiocquin matses bëdamboen tabadmenuequin chuibanquid Esuquidistu icpanëdash. Mibi yacno choshon Esuquidistupadquid icnuequin ëbi chieshënquid bëdamboen tabadmenuequin chuibanendambi. Ëbi chieshënquido nadec onquequin ëbi naden chiec, quec. Nuquibëd tabadquin dacuëdacimbocquin comapenen Pabadon chushcainquio iquec. Utsi yacno nidshun dada uaqun comapenen chushcaic, quiosh. Mibi chiec adosh.

² Adsho tantiash mibi yacno choash tabadquin chushcante bunenquio icquimbi, Ambibi tantiacpaden nabanquid Pabado nec, quequido bëdamboen chuibanembi.

³ Esuquidistu tantiaquid yanshun icsaquidën tantiacpaden nabanesa nebi.

4 Mibi yacno choshon matsesën tantiapadpenquiocquin Nuquin Papan tantiampadaden ëbi chieshënquido Satanasën icsamboen tantiamaido Nuquin Papan chiaid chuibanendambi.

5 Satanasën tantiamaidon Nuquin Papan chiapadomboen niaquec. Utsibon Edoen Nuquin Papa caid nibëdec, qeshun ëmbibi tantiapaden naic bëdambo iquec, quequin tantiamaido nec. Aden tantiaquid icsho isun ambi icsamboen tantiec pamumëdacimbocoe yaid ëmenu quequin Nuquin Papan chiaid ëmbi chuibanubi abi pamumëdacimbocoe yaid padpidec pausudtiapim-bocnoc paucbanshun ambi tantiapaden Nuquin Papan pausunendac ma ambi chiapadomboen namenuequin.

6 Aden chuibanshun Nuquin Papan chiapadomboen utsin-utsinquien abi icsaid ënabicsho isun comapenen cuidendambi.

7 Ambi isaiduidi tantiec utsi-utsiec onquec. Aido onquiaid chuinu. Tanta. Esuquidistu tantiaquid nebi, quequi, Pabado icsactsëcquio isadtsec, quepec aido. Aden chuiquido, Esuquidistu tantiaquid nebi, ëbi qesho tantiash, Muec nec, quetiapimbo iquec.

8 Abi tantiaquid ëbi yansho, Esuquidistun, Èbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ëbi chieshënquido tantiamenuen chuibanubi aidon tantiaid icsa paucshun ambi tantiapaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ëmbi chiapaden naimbi mibi yacno choshon caimbi.

9 Adquid nebi, quequin, Dacuëdampambocquid Pabado nec camenuen dada uainquio iquembi.

10 Mibi aden dacuëdmenu, quenquio icnubi ëmbi dada uaondaïd bedshun isun naden utsin ëbi chiosh quec. Chuiquidën comapenen chushquequin chiapadomboen Pabado dada uaic. Nëmbo choshon ambi dada uaquin chiapaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istsëccombi. Tantiatiapimbochno chuibanondash, quequin aidon ëbi chieci.

11 Aden ëbi chieci onquequidën bëdamboen tantiata. Chuinu. Èmbi dada uacpaden mibi yacno choshon adomboembidi nabanembi caimbi.

12 ¿Esuquidistun, Èbi chuibeneta, caid nebi, quepecta ëbi chieshënquido iquec? ¿Adenda Esuquidistun, Èbi chuibeneta, caidënquio utsi icsamboen chuipec? ¿Esuquidistun, Èbi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquio iquebi. Esuquidistun, Èbi chuibeneta, caid nebi, quec muaid chuigin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiapaden nabanec abipadquid yanquidon.

13 Èbien Nuquin Papan tantiampadaden chuibanquid nec. Ambi tantiampadaden mibitedi chuibanquid nebi.

14 Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi.

15 Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquio iquebi. Mibëdi tabadquin ëmbi chuibanac aid tantiaquid mibitedi yanondac. Adsho isash Esusquidistu tantiadonequidquio yampashun, quec mibi tantiec tsadebi.

¹⁶ Esuquidistu ěmbi chuiban-chuibanac aid tantiadonequiec mibitedi tabadsho isash Esuquidistu utsin chuibanacmanombo chuibananoaic nidend-abi caombi.

¹⁷ Aden Esuquidistu chuibanac, Ěbibi bĕdambo ictiapimbocquid mimbi bĕdambo icmiaid nebi, Papa, quequin ma Nuquin Papa Esuquidistu tanti-aquidtedishun chuipanuna.

¹⁸ Bĕdamboen nabanombi, abibi qesho Nuquin Papan bĕdamboen isti-apimbo iquec. Ambi, Bĕdamboen mimbi naoc, caiduidi ambi bĕdamboen isaidquio nec.

11

Pabado muesa icnubi muaquido

¹ Nĕbi ěmbi dada uaid isash, tantiesa onquiachimboen mamĕmenuequin Pabado chiec, quenquicpashun caimbi mibi. Aden tantiatsiash, quequin abi dada uaimbi. Nĕid bedash ěmbi abia dada uaondaid isec mibi onquiapadec nĕbi nĕid mimbi iste dada uaid isec onqueta.

² Nuquin Papan tantiamiacpadec mibitedi cudasquidquio nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amĕn aton champi chiacimboen, Esuquidistun bednu caid yec icsamenuequidĕn, Bednu, cac, Bedadenda, caimbi. Esuquidistu ěmbi chuibanaido mibitedi bedec choeque.

³ Ěmbi chuibanac Esuquidistu tantiauidquimbi nisi bĕdambo isadachimboecquidĕn muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi.

⁴ Adec ěbi tsadnubi Codinto yacno choshon utsin Esuquidistu ěmbi chuiboed utsi uain chuisho badedquio tantiec aidon. Adembidi, Mayan utsi iquec, qesho tantiash, Ěbi mene, quec mibi. Adembidi, Mibi bĕdambo icmequid Esus utsi iqueque. Aid tantiata, quequin ěmbi chiaid utsi uain chuisho, Abimbo iquec, quequin tantiec mimbi. Aden utsibon ěmbi chuiboed utsi uain chuisho tantiec, qesho tantiash Esuquidistu tantesa uatsiash, quec tsadebi.

⁵ Esuquidistun ěbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bĕdamboenshĕ utsibon chuibanacpaden Pabado chuibanenubio iquec, qesho tantiash, Icsamboen chiombi, quetiapimbo iquebi.

⁶ Utsibon bĕdamboenshĕ chiapadec Pabado onquenquio iquec, mibi quenuc Esuquidistun, Ěbi chuibeneta, quequin ambia tantiaquidĕn tantiamiacpadomboen mibitedi chuibanombi bĕdamboen tantiaquin.

⁷ ¿Codinto yacnocquido ma Esuquidistun bĕdambo icmepanueshun chuibanequi, Bec cho, quenquio yectabi icsape?

⁸ Mibi Esuquidistu chuibanu quiash Esuquidistu tantiec iccuededquid utsibon na ampiachimboec tabadobi. Aidon aton na meniaqui aido nashunenubio yec mibi yacno nidash tabadquin mibi nashunquin Esuquidistu chuibanondambi.

⁹ Adec mibi yacno tabadquin Esuquidistu chuibanec bunec tsadec, Bec cho, quenquio iccondabi. Nidaid Masedonia caid yacnoĕsh choquidĕmbini meniondash. Aden ĕnden, Bec cho, mibi cainquio iccondacpadec nĕbi adquiebidi tsadebi.

¹⁰ Esuquidistun chuimiaidquio nebi. Adquid icquin adquid nebi quequin chiembi mibĕdi nidaid Acaya caid yacnocquid utsitedi, Padi. Aden chienda, quetiapimbocnoc.

11 ¿Atotsi quiashini, Bec cho, quenquo icpe? ¿Mibi tantienquiocquindambi mibi, Bec cho, cainquo icpe? Mibi tantiec tsadebi. Codinto yacnocquido Pabodon tantiaid nec, quequin Nuquin Papan tantiec.

12 Aden mibi tantiaquin, Bec cho, cainquiocquin Esuquidistu chuibenec nebi mimbi bēdamboenshē chuibanquid caid: Pabado nabanec tabadacpadec tabadebi, quetiapimbo icnubi.

13 Aido Esuquidistun ēbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec.

14 Aido tantiamequin ismequid Satanas nec. Nuquin Papan abi yacnoshon uaid mayan bēda aiddēdi tabadquido icsaisa yacpadquid nebi, quequin abipenquiocnoc chuiquin ismequin tantiamiac

15 adquiecbidi ambi namiaidtedi bēdamboequidbimboec capucuededec. Cuidte ushē chonoc aido icsaid Nuquin Papan comapenen cuidquin chien-dac.

Pabodon abi mēyanaid chuibanaid

16 Adembidi chuinu. Tántia. ¿Mamēmenuequin tantiesa onquiabimboen-dambi ēbi icaid chuibandio? ¿Utsin aden chuibansho tantianu, quepecta mibi ictsia? Aden chuibanenquiocquin ēbi icaid chuibanuna,

17 Chuita, Nuquin Icbon cainquiocnobi.

18 Abi icaid utsin-utsinquier chuibanec, quequin tantiaquin adomboem-bidi ēbi icaid chuibanuna.

19 Bēdamboen tantiaquidquo nebi, qeshun mamēmenuequin ambembi chiacbimboen chuisho tantiec mimbi.

20 Ambembi chiacbimboec, Yuanu, qesho tantiaish icsamboen tanti-aquidbimboec mibi yuadte bumpec. Ambembi chiacbimboec, Bec cho, qesho icsamboen tantiaquidēmbimboen menebanec mimbi. Muaquin chuiquin mitsana bedshunaqui cacuidenquo yec tabadec mibi. Aden mit-sana ambembi isash, Mibi chuiquid nebi, qesho tantiaish, ¿Tsuntsin mibi adquid icmiosh? quenquiocquin aidēn chiacpaden nabanec mimbi. Aton yuabimboecnuc mibi mēyanacqui, Min yuapenquo nebi, quenquo iquec mibi.

21 Nuquin Papan yua icta cac, Padi, quetsiash, quequin aden mibi chuiti-adquidēmbi chienquo iccondambi.

Mibi yuanuequidon ambembi abi icaid chuibanac. Adomboembidi Pabodon abi icaid chiec, Codinto yacnocquido quetsiash, quequin tanti-aquin ēbi icaid chuibanu. Tántia.

22 ¿Mimbi bēdamboen chuiquid nec caid, Isadaidbo nebi, quepecta iquec? Adembidi, Ēbi isadaidbo nebi, caimbi. ¿Abadauanēn tsyuecquid nebi, quepecta aido iquec? Adembidi, Ēbi Abadauanēn tsyuecquid nebi, caimbi.

23 ¿Esuquidistu chuibanquid nebi, quepecta aido iquec? Ēbibi Esuquidistun ēbi chuibeneta caidquo nebi. Esuquidistu chuibanquid ēbi yacpadquid utsi nibēdec. ¿Mibi mamēnshumenuequindambi aden chuipadi? Padenquo. ¿Ēbi yacpadquid utsida iqueque? Tántia. Chuibanu. Utsi bēdiactsc chonoadnuc comapenec chonoadobi. Adecbidi quēnēn nauedaaid utsi icnubi quēnēn nauedteniaid nebi. Adecbidi utsi bēdiactsc cuesaid icnuc yuen cuesto-cuestoid nebi. Mēyanac unēstsenobi, utsi quenubi aden mēyanac unēstsen-unēstsemboedi nebi.

24 Isadaidbon cueshcanten 39ted tambanquin cacuestoniondashi. Yuecshun aitedembidi. Yuecshun aitedembidi. Yuecshun aitedembidi. Yuecshun aitedembidi yuenquo cacuestonioshi.

25 Adembidi cuesten cuesoshi. Yuecshun padpiden. Yuecshun padpiden. Adembidi cuēnoten se-sioshi. Adecbidi cano dapa ēbi antsadnubi bincudec

cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi.

²⁶ Adecbidi quenenuquin yec capucuenequin Esuquidistu chuibeniombi. Adece utsi-utsiëc yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquoio yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiachimboen chuiquidën unës uachitoshe, quenquoio yec capucueniobi.

²⁷ Con na bednuec chonoadec uëshquiobi. Padpiden-padpidemboen ushenquoio icquin chuibanombi. Piasec acte bunquin adembi Esuquidistu chuibanombi. Iquenquimbi chuibanombi. Dashcute icsectsëcquid da-siuidquimbi chuibanombi. Yuedenquoio yaqui adembi chuibudombi.

²⁸ Ëmbi chuiboed Esuquidistu tantibenabicquido icpec, quequin capucuenequin chuibeniombi. Utsi yacno nidshun, Ëmbi chuiboedo bëpiscudnushe queshun mibitedi chuiquin dada uaombi.

²⁹ Esuquidistu tantiaquid chieshec dayactiapimbo icpec. Adquiobidi iccobi, quequin tantiec tsadebi. Esuquidistu tantiaquid icsaosh, quesho tantiaash unësquoio yec, Nëbimbobi icsamianquid comapenen cuidta, Papa, quec tsadebi.

³⁰ Aidted ëbi icaid icnuc chieshenquoio yec ëbi dayacquio yaid chuibanombi. Nëbi ëbi cuenondaid chuinu. Tantia.

³¹ Abia Yampidën, Nuquin Icbo Esuquidistun Papan nabanaid ënenquocquin chuitequidquio iquec. Aidën nabanaid chuibanec muesa Pabado nec, quequin ëbi cuenondaid Nuquin Papan tantiec.

³² Ëbi cuenondaid nad icpondashe. Chuinu. Tantiata. Damasco yacnocquido ancanquidën Adetas cuëmëdquidën Pabado Damasco yacnoësh pudüensho bedta quequin shubu dadpen daquënë uaid dapa shëcuëtedi sondado ëctabëdmepondash.

³³ Adece daquënë uaid shëcuë cuëmanquoio sondado tabadnubi bednushe queshun abuc daquënë uaid iste shëcuëshun tsitsan dapa antsadunshun daquënë uaid cachoc budmepondashi. Budmiac ancanquidën bedadiapimbo yec cuempondabi.

12

Nuquin Papan Pabado ismiaid

¹ Ëbi icaid chuibanquin ëmbi dada uaid isbanash, Esuquidistun ëbi chuibeneta caidquio Pabado nec, quequin Codinto yacnocquidon tantiatiashe, quequin adobamboedtedi chuibanquin dada uaombi. Ëbi icaid chuibanquin ëmbi dada uaid isash, Abi natiamiaid dadpen icpec, quetsiashe, quenquocquin dada uaombi. Adembi Nuquin Papan ëbentsëqui ismiöndaid chuinu. Tantia. Nad iccondashe.

² Endenquimbo seta 14ted matamequin Nuquin Papan bëdamboshë yacno indopondashi. Intacchobi abuc indopondashi, quetiapimbo iquebi. Tantienguoio iquembi. Adecbidi ëmbi tantiateuidi indoac, quetiapimbo icoaibi. Tsaudi, tantienquoio iquembi. Nuquin Papambien tantiec.

³ Abuc bëdamboshë yacno indopondashi, quequin abimbo chiembi.

⁴ Abucshun utsi chuitemaidquio tantiapondambi. Ëmbi tantiondaid chuitiapimbo icpebi. ¿Mitsipadentsimbi ëmbi abucshun tantiaboed con onqueten chuipatsiaba?

⁵ Bëdambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bëdambocquid nebi, quetiapimbo iquebi.

⁶ Abuc nidshun ëmbi isondaid chuibanquin dada uaid isash, Bëdambocquid Pabado nec, quequin tantianushe qeshun padenquo iquemi. Ëbi bëdamboec tabadsho isash, Pabado bëdamboec tabadec, qesho tantiash bëdambo ictsiabi. Adecbidi chuibansho tantiash, Abimbo chuiquidquo Pabado nec, qesho tantiash adecbidi bëdambo ictsiabi.

Satanasën natiamaid

⁷ Bëdambocquid yansho Nuquin Papan abuc indoshon ismiondashi, quequin Pabado chuinushe qeshun Satanasën chomiaidën ëbi natiameded-natiamededsho isash, Chën, quenquo Nuquin Papa iquec. Satanasën chomiaidën natiamic pinchuquën siadaid namin nidaëdaid chictiapimbo yacimboec con dada bëdanenquo iquec.

⁸ Adec con dada bëdantiapimbo icnubi, Ëbi natiamequid cueme, Icho, quequin chiondambi. Adshumbic, padpiden. Adshumbic padpiden adomboem-bidi chuided-chuidedondambi.

⁹ Adoaquien, Padi. Bëdambocquid icmenuequin naid nec. Mibi dayacquo icmequid con Mayan mibëdi iquec, quequin Nuquin Icbon chiondashi. Adoaqui, Bëdanambo icsho Nuquin Icbon ëbi dayacquo icmec quequin tantiec bëdambo iquebi, quec tsadebi.

¹⁰ Aden tantiec con dada icsambo icnubi Esuquidistu chuibenec capuebi. Ëbi icsamboen chuiquin mamënsunaqui adecbidi Esuquidistu chuibenec capuebi. Utsin natiamaiqui adquiecbidi Esuquidistu chuibenec capuebi. Utsin mëyanaqui adquiecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquo icmiac tsadiapimboc-quin chuibenec capuebi.

Esuquidistu tantiabemenue chuibanombi quiaid

¹¹ Ëbi yacpadquid utsi nibëdec, quequin chienquioctiadquidi niobi. Esuquidistu chuibanquid utsibon chiaid tantiatequidquo iquec, qeshun mibëd icquidon ëbi icsamboen chiosh qesho tantiashun Pabado Esuquidistu chuibenecquid nec, quenquo utsibo iccosh, qesho tantiashun ëbi icaid chuibanquin dada uaombi. Bëdamboen tantiachimboen chuibanquid dadpen iquec. Aidon icsactsëcquio isadtsec, quequin ëbi chiec onquenubi Esuquidistu chuibenecquidquo nebi.

¹² Natiamaiqui chieshenquiocquin Esuquidistu ëmbi chuibansho mibitedishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistun ëbi chuibeneta caidquo Pabado nec, quequin chuitiadquidëmbi padenquo mimbi icpondac.

¹³ ¿Esuquidistu tantiec iccuededquido utsi tantiaquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquo iccondabi. ¿Bec cho, qeshoda ëbi bëdamboen mimbi tantiatsemponda?

¹⁴ Ënden mibëdi tabadondabi. Yucash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquo iquendabi. Mitsana bunesa nebi. Esuquidistu tantiaquidquo ma icpanu quequin mibëdi tabadquin chuibanendambi. Aton bacuëbo tanti-quin amën anibëdtan ambia tantiaquid icquin tied uaic adembidi shubu uaic bacuëmpibon nabantiapimbo icnubi.

15 Adquibidi mibitedi tantiec Esuquidistubëd icquido yampec quec chonoadec tsusiobudquimbi chuibenendambi. ¿Ëmbi mibitedi comapenen tantiasho isunda mimbi ëbi tantienquoio yampe?

16 Bec, cho, quenquoio yec mibëdi tabadondabi. Adsho isash, ¿Piuquid bedenquoio icpecta Pabado tabadash? Muaquin chuiquin bedpash icnui, quec mibi.

17 ¿Mitsipadentsimbi bedpa? ¿Ëmbi mibi yacno nidmiaidonda muaquin chuiquin mitsana bedpash? Padenquoio.

18 Titobëdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquoio icboc. Aidbëdi abentsëc yacnimboen tantiaquidquoio nebi. Aduidequi tabadquid ëbi daëdi nebi.

19 ¿Pabado ampesa nec mibi camenuendambi dada uaquin chuibampo? Padenquoio. Esuquidistu tantiaquid icquin mibi aid tantiabemenuen chuibanombi. Ëmbi chuibanaid abimbo iquec, quequin Nuquin Papan tantiec.

20 Mibi yacno choash ëbëdi abentsëc yacnimboen tantienquoio icnushe qeshun dada uaimbi. Comapenec chushcanansho istuidmane qeshun adembi mimi iste dada uaimbi. Mitsana nibëdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembi dada uaimbi. Abipenquoio chuisho tantiamane qeshun adembi dada uaimbi. Bëdambo icquid ëbi icnubi utsi padenquoio iquec qesho tantiamane qeshun adembi dada uaimbi. Mimi tantiacpadpenquiocquid icsho isash comapenec cuëdcededsho tantiamane qeshun adembi dada uaimbi.

21 Ai, mibi yacno choashun adquid icsho isun, Ëmbi Esuquidistu chuibanaido nec, quequin Nuquin Papa chuitiapimbo yec natiaic bëpiuacnimboec tsadmene qeshun dada uaimbi. Icsadenequidën abi icsaid ënabi icsho isash aido unësacnimboecquid nec, quish unësquoio icmane qeshun dada uaimbi. Aidon naid utsin istemaidquoio nec. Ambibi ambi chudtemaid chudtedchudtedec icsambo yequi, Bëdamboquid nebi, quec muacuededec.

13

Icsaid ënesa chuiquin cuidendambi quiaid

1 Mibi yacno daëdec puduedashic padpidec puduedendabi. Choshon, Icsadenequid iquec, quequin daëdshun-daëdshunquien chuisho tantierendabi. Abentsëcshun: Icsaquid iquec, quequin chuisho tantiatiapimbo iqendabi.

2 Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ënta, cac padenquiosho padpidec puduedoashun Nuquin Papan tantiamiacpadomboen mibi adquid utsibobëdta comapenen chuiquin cuidembi, quequin chiondambi utsitedishun tantianubi.

3 Esuquidistun tantiamiacpaden Pabado dada uaid nec, quequin ¿mitsipadentsimbi tantiape? quequid comapenec onquequin chuibanembique. Tantiacquiota, caimbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi.

4 Aidi matsesash nadatiapenquoio icquidnimboecsho isun cuesten dectampanëdash. Adoacsho Nuquin Papan uincuemiac unësesa yanatiapanëdash. Aid tantiaquidquoio icquimbi ëmbi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

⁵ Esuquidistu tantiaquid nebi, queshun ¿mitsipadentsimbi aid tantiape? Adecbidi, ¿Ambi chiacpadectabi tabadpe? queshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, queshun Esuquidistu ebéd ictiapimbo iquec, quequin tantiata. Aid mibéd icnuc ambi chiaid niac-niaquenquo mimbi iquendac.

⁶ Adecbidi, Pabado Esuquidistun ebi chuibeneta caidta neque. Isnu, quequidén ebi nabanec tabadsho isun, Pabadon abimbo chiosh, capashuni mimbi.

⁷ Aden tantiaquin Codinto yacnocquido bédamboen tabadmeta, Papa, quequin chuided-chuidedembi. ¿Mibi bédamboec tabadsho isash, Pabadon chuibanaido nec, quequin mibi isquidon chuitsiash, quequindambi Nuquin Papa chuided-chuidedpadi? Padenquo. Esuquidistun ebi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquo Codinto yacnocquido nec, quequin utsibon chuisho tantiatiadquo iquebi.

⁸ Nuquin Papan chiaid abimbo iquec, quequin ambi chiaidquo chuibanquidquobidi nebi. Ambi chiaid utsi uain chiesha nebi.

⁹ Mibi bédamboec tabadsho isash bédambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi.

¹⁰ Aden mibi tantiec tsadquin mimbi iste dada uaimbi. Mibi yacno nid-abicquin dada uaimbi ma puduedshun icsaquid nibédsho isun comapenen chienquo icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi.

¹¹ Nēbi enquin dada uaimbi. Icsaisa icnu quec Nuquin Papan chiacpadec bédamboec tabadta. Embi dada uain chiaid isquin adobanta. Abentsēc yacimboen tantiaquin nabanec tabadteneta. Adec tabadsho isash tantianquidquo utsibéd bédamboec tabadquidquo Nuquin Papa mibédi iquendac. Aidénquo mibi adquidquobidi icmendac.

¹² Ebi isec cho cananta.

¹³ Mibi tantiec tabadebi, quec nēmo tabadquido Nuquin Papan bédambo icmebanaido.

¹⁴ Nuquin Icho Esuquidistun bédambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan ebéd iquec, quequin tantiaquiota.

Padi. Aidedi dada uaimbi.

CADASIA YACNOCQUIDON ISTE

Pabadon tauamboen chiaid

1 Pabado nebi. Esus chuibenquidquio nebi. Matsesën: —Adquid icta — ¿caidtabi nedi? Padenquio. Esuquidistun: —Ëbi chuibeneta —caidquio nebi. Aid uincumenëdaid Nuquin Papantsen: —Con mado Esus chuibeneta —caidquio nebi.

2 Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësqüio iquec. Adembidi tantiec nëmbo icquido Esus tantiaquidtedi: —Unësqüio iquec —quiosh.

3 Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi.

4 Matses bëdambo icmequid Esus nec. —Ëbi tantiesabo tabadac bimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquio icnuec abided cuidadec Esus unëspac caondash.

5 Aidën Papa tantiaquin: —Nuquin Papa bëdamboshë iquec —canuna ënenquio icquin.

Esusuidi tantienquio yanaid

6 —Esus tantienquio yanosh —quequin mimbi naid chuisho tantiash shubitiadquio iccobi. ¿Ëbi chonobida badedquio Esus tantienquio yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquio yano? Utsibon icsamboen chiaquien mimbi Esus tantienquio yanac.

7 ¿Aidon chiaidta bëdambo icpec? Aidon chiaid ma Nuquin Papan chiaidpenquio neyoc. Esusquio chienquio icquin muaquin chuisho tantiashun: —Abimboen cachitec —queshun mimbi Esus tantienquio yampac.

8 —Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquio icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiashun aidtsen: —Nuquin Papan cuidpashun —catsiambi. Utsibontsen muaquin chuisho tantiash aidtsen: —Cuidpashun —quiobi.

9 Tantia. Adembidi mibi chuinu. Ëmbi chuibanac mimbi Esus tantiabenondac. Mimbi tantiondaid Esusquio chienquio icsho: —Nuquin Papan cuidpashun —caimbi mibi muauaquin chuiquido.

10 —¿Matsesën: “Mibi bëdambo iquec,” mabi canu —quequindambi aden chuibampadi? Padenquio. Nuquin Papan chiacpadomboen mambi natiadquio yoc. —Bëdambo iquec —Nuquin Papa camenuen mambi chuibampaboc. Matsesën chiacpadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

Esusën chiaidquio chiec nebi, quiaid

11 Tantia, con utsibo. Mibitedi chuinu. —Esus tantiasho Nuquin Papan matses bëdamboen isbentsiash —quequin ëmbi chuiboed amben chiaidpenquio nec.

12 Matsesën chiabi Esuquidistun tantiamiac ambi chiaidquio chuibanombi.

¹³ Tantia. Aden Esusën ëbi tantiamiondaid mibi chuinu. Con matses isadaidbon chiacpadomboenuidi natiadquoio icquin Nuquin Papa tantiesabo danquin Esus tantiaquido comapenen chieshënquin cuesun secatiadquoio icpadenebi. Ëmbi adodened ëmbi chuisho mimbi tantiondac.

¹⁴ Nuquin Papa tantiatiaquido icquin con matsesën chiaid abitedimbo natiadquoio ictenebi. Ëbëdta tishaidon caniabon bëdiactsëc natiadquoio icnubi con tsusedpabon chiaiduidi natiadquoio ictenebi. Adquid icquin Esus tantiaquido comapenen chieshëndenembi.

¹⁵ Adshobini Nuquin Papan aton Mado Esus tantiamiondash. Ëbi tishabi icnubi ëbi caic: —Con Mado Esus tantiameshun bëdamboen isquin

¹⁶ Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusën chiaid ëbi chui —quequin matses chiambo iccondambi.

¹⁷ Shubu dadpen icquid Edusaden caid yacnocquido Esusbëd icnëdaido ambia Esus chuibanëdaido chuitanambo iccondambi. Utsibo chienquoio yec nidaid utsi Adabia caid yacno matses nibëdacno badedquoio nidtanondabi. Adashic yuec-yuecpambo ictanec auëshquoio choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsëc chotsecnuc matametanece Edu-saden yacno Petedo isec nidtanondabi. Adec nidash 15tedec ushec aibëd tabadondabi.

¹⁹ Ambobi Nuquin Icho Esusën utsi Acobo caid isondambi. Esusbëd icnëdaid utsi isambo iccondambi. Aid daëdtsëqui isondambi. Utsibo padambo.

²⁰ Abimbo chuiquin nëid dada uaic nebi. Ëmbi aden chuibansho tantiash: —Ai, abimbo caic —quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquoio nidshun nidaid utsi Sidisia caid yacno istanondambi.

²² Nidaid utsi Udeya caid yacno Esusbëd icnëdaido yacno yuec tabadambo iccondabi. Adsho anocquidon Esus tantiaquidon isabi iccondashi.

²³ Ëmbi naid chuishouidi tantiapac caondash. —Nuquipadquid Esus tantiaquido cuesun secatiadquoio icnëdaidëmbi Esus tantiabenshun Esusquoio chuibeniosh —quequin ëmbi naid chuishouidi tantiapac caondash.

²⁴ Aden ëmbi naid chuisho tantiash: —Nuquin Papan nac Pabado bëdambo iquec. Adomboen Pabado tantiamoc Nuquin Papa bëdamboshë iquec —quepac caondash Udeya yacnocquido.

2

Edusaden yacno nidoaid

¹ Yuecash seta 14ted matamiash Edusaden yacnobidi nidoapondabi. Ëbëdi Bednabe caid nidpondash. Titotsen buanondambi.

² Adec Nuquin Papan tantiamiacpadece ambo nidshun Esus tantiaquido chuiquid dapabo caidouditsëqui cho-chomeshun ëmbi naboed chuibanondambi. —Ëmbi chiabi yac aidon: “Muequi neque. Pabadon chuisho tantienda,” canushe —qeshun naden chiondambi. —Nuquin matsespenquoio isadaidpembo matses utsibo Esusquoio chuibeniombi. “Esusuidi tantiasho Nuquin Papan nuqui bëdamboen istsiash,” quequin chuibeniombi. ¿Adembidida mimbi tantiape? —capondambi Esus tantiaquido chuiquid dapabo chuiquin. Ëmbi adoac: —Ai, adembidi tantiembi —quepondash aido.

³ Ēbēd icquid Tito caid isadaidpembo icshobi: —Shui dēbid dēteshune —cainquio iccondash chuiquid dapabon abi utsibon: —Adotiad —canubi.

⁴ Adec: —Shui dēbidien dēteshunetiad —quequido Esus tantiaquid damianquie Esus tantiaquidombo tabadacno puduedpondash. —Esus tantiaquidon: “Esusuidtsēqui tantiasho Nuquin Papan nuqui bēdamboen isec,” quequin con tsusedpan chiaid niacsho tantianu —quiash ēbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesēn chiampidtedi nasho Nuquin Papan bēdamboen istsiash —quepondash.

⁵ Adec aido: —Nuquin tsusedpan chiampicpadomboenuidien nametiad —quesho: —Padi. Mimbi icsamboen chiec —quequin aidēn chiacpadomboen nainquio iccondambi. —Ma matses utsibon: “Esusēnuidtsēqui Nuquin Papa ēbi bēdamboen ismec,” quequin ma Esusquio tantianu —queshun nainquio iccondambi.

⁶ Aden Esus tantiaquido chuiquid dapa caidon Esus tantiaquidēn natequid utsi chienquio iccondashi. —Esus tantiabenacsho isun nuquin tsusedpan chiacpadomboentsen nameta —quequin chienquio iccondashi. ¿Esusbēd icnēdaidēn: —Moisesēn chiaidtsen nameta —cactambi nametsemponda? Padenquio ictsenondambi. ¿Atotsi Nuquin Papan aido capec? —Esusbēd iccondaidquio neque. Bēdamboen isnu —¿capenda iquec? Padenquio.

⁷ Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusēn naid chuibeniāc. Nuquin Papan chiacpadomboembidi Petedon nuquin matses isadaidbo Esusēn naid chuibeniōsh. Petedon nacpadomboen mimbi bēdamboen nac —capondashi.

⁸ —Nuquin Papan namiaid icquin Petedon nuquin matses isadaidbo dadpen Esus tantiamioš. Adembidi Nuquin Papan namiaid icquin mimbitsen matses utsibo dadpen Esus tantiamiac

⁹ —queshun bēdamboen ispondashi. —Adembidi nanuna. Mimbi isadaidpembo Esusēn naid chuibenenubi adembidi isadaidbombo chuibenen-dambi —quepondash. Adshumbic: —Esus tantiaquidquio mibi nec —queshun chuiquid dapabon Bednabebēda mēdimbampondashi. Nēidic Petedo. Nēidic Acobo. Nēidic Uan. Aaidtishun chuiquid dapabo icquin adondashi.

¹⁰ Nadentsen chuipondashi. —Aton na nibēdquido bēdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹ Adash yuectaniash ēbi iccondacno shubu dadpen icquid Antioquiya caid yacno Petedo chopondash. Auēshquio icsashobimbi bēisquiquin chushcapondac.

¹² Abēdtan Esus tantiaquido matses utsibon codocaid pec bēdamboec tabadboedi aton pete isuidanec aido bēd cuēshēdec Petedo icsapondash. Ambo choash Esus tantiaquido con matsesēmpenquio codocaid pec bēdamboec tabadondash. Adnubien Acobon: —Ambo istan —cac con matses Moisesēn chiampid tantiaquido cho-chopondash. Aido cho-chosho isash: —Moisesēn chiampid niacquin matses utsin codocaid pesho chushcanushe —quec dacuēdquin isadaidpembon pete meniaid isuidampondash Petedon. Adec abēdtan Esus tantiaquido matses utsibobēd cuēshēdec icsapondash.

¹³ Adsho isash anocquido isadaidbotsen abēdtan Esus tantiaquido matses utsibobēd tabadenuquio yec cuēshēdpondash. Adsho isash ēbēd icquid Bednabetsen adecbidi cuēshēdec icsapondash.

¹⁴ Adec icsaquin Esusēn chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi

bëdamboen naoque? Tantia. Chuinu. Isadaidbo tsusedpan chiaid matses ut-sibo mimbi namec. Isadaidbo icquimbi matses utsibon codocaid pec aidbëdi mibi bëdamboec tabadoc. Aidon piaid pec bëdamboec tabadboedi nëbi aidbëd mibi cuëshëdoc. Adsho isash mimbi nianaido: “Petedon matses isadaidbo tabadac bimboec tabadshoudien Nuquin Papan nuqui bëdamboen ischitot-siash,” quepec icsamboen chiec. Aden mimbi icsamboen tantiamëque. Tantia. ¿Atotsiequin mimbi naoque? –capondambi Petedo chushcain.

Nuquin Papan bëdamboen iste chiaid

¹⁵ Naden con matses Petedo chiondambi. —“Moisesën chiampicpadom-boen naisabo matses utsibo icsambo iquec,” quequin nuquin matses isadaidbon tantiec. Nuquin isadaidbon chidon tishacsho tsusion shui dëbid dëteshun secanëdaido nec.

¹⁶ Adquid icquin: “Moisesën chiaiduidi naquin Nuquin Papa bëdamboen ismembì,” quedenedi nëbi nuqui utsien chiec. “ ‘Abided cuidadaid Es-usënuidsëqui Nuquin Papa ëbi bëdamboen ismec,’ quequin Esus tantiasho Nuquin Papan nuqui bëdamboen isec,” quequin nuqui tantiec. Adshun matses utsibobëdtambi nuqui Esus tantiaquiec. “Moisesën chiaid niaquesa nibëdsho isun Nuquin Papan matses abitedi bëdamboen istiapimbo iquec,” quequin tantiashun nuqui bëdamboen ismequid Esus nuqui tantiabënëdac –quequin Petedo chiondambi.

¹⁷ Adashic Petedobidi chui-oaic: —“Esusuidi tantiasho Nuquin Papan nuqui bëdamboen istsiash,” qeshun Esus tantiabënëdacsho nuquin mat-sesën icsambo capondashi. “Nuquin tsusedpan chiapadomboen nainquio yec mibi icsambo iquec matses utsibobimboec,” capondashi nuquin mat-sesën. ¿Ada Esuquidistun matses icsambo icmepec? ¿Ambi chiapadomboen naicta nuqui icsape? Padenquio.

¹⁸ “Nuquin tsusedpan chiampicpadomboen nashoen Nuquin Papan nuqui bëdamboen isec,” quequin nuquin matsesën chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bëdamboen ismembì,” qeshun abi bëdamboen ismequidquio Esus tantienquio yequini icsambo icchitotsiac.

¹⁹ Con tsusedpa Moisesën chiaictedi natiadquio ictenebi. Adquid bëdamboen iste danquin abitedi natiadquio icquimbi abitedi nainquio iccondambi. Adshun: “Moisesën chiaictedi ambembi matsesën natiapimbo iquec,” qeshun ëmbimbo naid ënondambi. Nëbini Esus tantiec Nuquin Papan chiapadec tabadec.

²⁰ “Ambi con tsusedpa Moises chuimiactedi nashouidi Nuquin Papan nuqui bëdamboen istsiash,” quedenedi Esus tantiec adenquio yanondabi. Nëbi ëmbi tantiaidquio nainquio yec Esuquidistubëdi cuëshëdenquio yec bëdamboec tabadebi. “Ëbi tantiec ëbi cuidmenquio icnuec abided cuidadec unësac caondash,” quequin tantiashoeni Esusëmbi bëdamboec tabadquid icmec.

²¹ “Abided cuidadaid con Mado Esusuidi tantiasho matses bëdamboen isendambi,” quequin Nuquin Papan chuipanëdash. Aden Nuquin Papan chiaid niactiapimbo iquebi. Moisesën dada uapampid ambi chiaid niaquesa icsho Nuquin Papan bëdamboen istsenac. Ambi chiaid niaquesa nibëdec. Adquid Nuquin Papan chiaid niaquesa icnuc: “Matses cuidmenquio ic-nuec ëbided cuidadec unësnu,” queboedi Esus padenquio icsempanëdash –capondambi Petedo chuiquin.

3

Nuquin Papan aton Mayan tabadmiaid

1 Tantia. —Cadasia yacnocquido piushbimboecquin tantienquo yanosh —quequin chuisho tantiashun mibitedi chuinu. ¿Tsuntsin: —Tantienda —cac Esus tantienquo yano? —“Cuesten decetanac abided cuidadaid Esusënuidsëqui Nuquin Papa nuqui bëdamboen ismec,” quequin Esus tantiasho Nuquin Papan nuqui cuidenquo iquec —quequin mibi chuibanondambi. ¿Esus tantiatiapimboda ique?

2 Mimi tantiaid ëbi chui. Tiantanu. ¿Atotsi quiash Nuquin Papan Mayan mibëdi tabadanondash? ¿Nuquin Papan ambi chiaid Moises dada uamepampid mimi nabanuda mibëd tabadanondash? Padenquo. Ëmbi chiondaid Esusquo mimi tantiabensho isashien mibëd tabadanondash.

3 ¿Pabiate shëcuë choquidida mibi nendac? Tantia. ¿Atotsieshun tantienquo ique? Mibëdi tabadquin Nuquin Papan Mayanën mibi bëdamboec tabadquid icmec. ¿Nëbi Esus tantienquo yanecta mibi bëdamboec tabadpatsia? Mibëmbi bëdamboec tabadiapimboen mibi iquec.

4 ¿Aden Nuquin Papan aton Mayan mibëdi tabadmiad icquimbida Esus tantienquo yano?

5 Nuquin Papan aton Mayan mibëdi tabadmeguin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibëdi tabadmec? ¿Con tsusedpa Moisesën chiampid nashoda Nuquin Papan aton Mayan mibëdi tabadmec? Padenquo. Ëmbi chiondaidquo Esusquo tantiasho Nuquin Papan aton Mayan mibëdi tabadmec.

Nuquin Papa tantiaquidquo Abadauan chiaid

6 ¿Tsutsi Nuquin Papa tantiaquidquo icpampic? Abadauan nepampic. Nuquin Papan chiac Abadauan: —Abimbo mimi caic —quesho: —Adquid bëdamboen isembi —queshun Nuquin Papan bëdamboen isbempampic.

7 Adec Abadauan: —Nuquin Papan abimbo caic —quequin tantiapampicpadomboen nëbi matsesën Esus tantiasho Nuquin Papan bëdamboen isendac ambi Abadauan isampicpadomboen.

8 —Esus tantiaquido iquendac —quequin naden Nuquin Papan Abadauan chuipampic ëndenquimbo. “Abadauan, mibi unësan yuecquimbo ictaneshun min tsyuecquid abentsëc tantiaquidtedi bëdambo icmendambi. Nidaid utsi-utsiec yacno tabadquidon min tsyuecquid abentsëc tantiasho bëdambo icmendambi,” quequin Nuquin Papan chiaid con tsusedpan dada uapampic.

9 Abi tantiaquidquo icsho ambi Abadauan bëdamboen isampicpadomboen nëbi aton Mado Esus tantiasho Nuquin Papan nuquitsen bëdamboen isec.

10 Utsiboen Nuquin Papan cuidtequido nendac. —Moisesën chiampicpadomboenuidi nasho Nuquin Papan bëdamboen istsiashi —quequidëmbi abitedimbo nainquo icsho Nuquin Papan cuidendac. Aden ënden Nuquin Papan chiaid dada uapampic. “Ambi chiatedi nainquo icsho Nuquin Papan cuidendac,” quepampic.

11 —Ambëmbi Moisesën chiampicpadomboenuidi nasho matses bëdamboen isendambi —¿quecta icpanëdash Nuquin Papa? Padenquo. Ambi chiaid niacquidoidquo icsho bëdamboen istiapimbo icquin Nuquin Papan naden chuiquin dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquidien Nuquin Papan bëdamboen isec,” quequin dada uamepampic.

12 ¿Ëmbëmbi Moisesën chiatedimbo nanuequidta Nuquin Papambo tantiec tabadpec? Padenquo. “Moisesën chiatedi naquid Nuquin Papabëd tabadendac,” quequin chiampicpaden ambëmbi matsesën natiapimbo iquec. Natiapimbo icsho Nuquin Papan bëdamboen istiapimbo iquec.

13 Aden Nuquin Papan matses abitedimbo bēdamboen istiapimbo icnuc Esuquidistu: —Ēbided cuidshun ēbi tantiaquido ma con Pan cuidenquio icnū —quiash abided ciudadec unēspac caondash cuesten dectanac. Aidquio chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquio nec,” quequin Nuquin Papan chiaid dada uapampic.

14 Adec matses utsi-utsien abi tantiaquido cuidmenquio icnuec abided ciudadec Esus unēspac caondash. Ēndenquimbo con tsusedpa Abadauan chiec: —Yuecshun bēdambo icmendambi —quequin Nuquin Papan chuipampicpadomboen abi tantiaquido bēdambo icmequin aidobēdi aton Mayan tabadmenuec Esus unēspac caondash.

Abadauamba chuishun Moisessten Nuquin Papan chiaid

15 Tantia, con utsibo. Mibitedi chuinu. Min matsesēn nadoquid. —Naden naindambi —quequin dada uashun: —“Abimbo chiaidquio nec,” ma isquidon canu —qeshun abi cuēmēdquidtsen dada uaquid. Aid dada uaid dada uaquidbēdfambi utsintsen utsi uatiapimbo icquid: —Chuiquidēn cuidnushe —qeshun. Adembidi ambi chiaid utsi uatiapimbo icquid icquin

16 Nuquin Papan: —Nadomboen naindambi —quequin Abadauan chuipampic. —Mibi nibēdanan yuecquimbo ictaneshun min tsyuecquid abentsēcshun matses bēdambo icmendac —quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquio icpampic.

17 ¿Ada tantie? Ēndenquimboshē Nuquin Papan Abadauan chuiquin: —Min tsyuecquidēn matses bēdambo icmendac —capampic. Adshumbic yuecquio ictaneshun seta dadpenquio 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niacquidquio icquin Nuquin Papan ambi chiaid utsi Moises dada uamepampic. Muenquio icquin Abadauan chuipampic.

18 ¿—Ēmbi chiaid ēmbi Moises dada uamiacpadomboen nashouidi mibi bēdamboen isembi —qeshunda Nuquin Papan Abadauan bēdamboen isbempampic? Padenquio. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bēdamboen isbempampic. Adashic: —Yuecshun min tsyuecquidēn matses bēdambo icmendac —quepampic. Aden ambi ēndenquimboshē chiampicpadomboen nēbi matses bēdambo icmequin Esus tantiaquido Nuquin Papan bēdamboen isec.

19 ¿Atotsieshun Nuquin Papan ambi chiaid Moises dada uamepampic? —Ēmbi chiaid isash: “Icsamboequien nuqui tabadchitec,” quequin ma matsesēn tantianu —qeshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chuiuampampic. Adoac Moisesēn aton matses Nuquin Papan chiaid chuibampampic.

20 Nuquin Papanquio Abadauan chuipampic. Abadauan caic: —Chuitan —cainquio icquin Nuquin Papanquio Abadauan chuipampic.

Matses abi icsaid tantiamete chiaid

21 Aden Nuquin Papan Abadauamba chuishumbic Moisessten chuipampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niacquinda Nuquin Papan Moises chuipampic? Padenquio. ¿Matses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquio. —Matses bēdamboen isnu —qeshun ambi chiaid Moises dada uameshun

ambi chiaid niaquesa bēdamboen isun unēsascho abēdi tabadmetsiash. — Ēmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic.

²² —Ēmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yac bimboec abembi bēdambo ictiapimboen icchitec,” quequin ma matsesēn tantianu —queshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsēqui Nuquin Papan bēdamboen isec.

²³ Esus choabi icnuc nadquio matses icpanēdash. Moisesēn chiacpadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yac bimboec aidēn chiacpadec bēdamboec tabadtiapimbo icpanēdash. Nuquin Papan Esus tantiamiabi icnuc adquio matses icpanēdash.

²⁴ Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papa bēdamboen ismequidta nibēdpeba? —nuqui camenun ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiasho Nuquin Papan nuqui bēdamboen isec icsaisabimboecnuc —nuqui quendac.

²⁵ Aden tantiec: —Isadaidbo tsusedpan chiacdedi nashouidi Nuquin Papan matses bēdamboen istsiash —quenquio nuqui iquec. —Esus tantiasho Nuquin Papan nuqui bēdamboen isquin bēdamboen tabadmec —quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi nec. Con champi mibi nec —nuqui capec.

²⁷ Adec: —Esus tantiaquid nebi —quesho acten mentoaid yec Esuspadquio ictiadquio nuqui iquec.

²⁸ Aden Esus tantiasho Nuquin Papan nuqui bēdamboen isec. Isadaidbo yec isadaidpembo yec matses yuaido yec matses yuapenquio yec dada yec chido yec quequin Esus tantiasho nuqui bēdamboen isec. —Matses utsibo bēdamboen istiapimbo iquebi —quenquio icquin matses utsibombi aton Mado Esus tantiasho Nuquin Papan bēdamboen isec.

²⁹ Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquidobimboecquido nuqui nec.

4

Yuabimboecquid isadaidbo yaid

¹ Tania, con matses. Mibitsen chuinu. Aton na dadpen dayun uaquidēn nuquin matsesēn nadoquid. —Ēbi unēsan con madon con na abitedi bedendac. Bacuē icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidēn amēn aton mado aden chuiquid. Aton papa unēsan caniabi yec utsibon yuabimboec aton mado iquec.

² Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenquo yanendac.

³ Adquio yuabimboecquido con matses isadaidbo icpanēdash. Tsusedpabon yuabimboecquido icquin Nuquin Papan bēdamboen iste bēdamboen

tantienquo icpanēdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bēdamboec tabadtiapimbo icpanēdash.

⁴ Adnubien ambi ėndenquimbo tantiampicpadēn Nuquin Papan Esus chomepanēdash. Isadaidbon chidon tishaid icquin Nuquin Papan: —Naden nata —quequin chiaid naquidquo Esus nepanēdash.

⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanēdash. Adsho isash matses cuidmenquo icnuec abided icquid Esus unēsac caondash. Nēbi Esus tantiasho: —Con mado mibi nec. Con champi mibi nec —quequin Nuquin Papan nuqui bēdamboen isec.

⁶ Adec: —Con bacuēbo nec —qeshun Nuquin Papan nuquibēdi Esusēn Mayan tabadmec. Adoac bacuēn amē: —Ēbi, papa —cacbimboen Nuquin Papa nuqui chianec.

⁷ Esus tantiabi Moisesēn dada uapampiduidi namenuquido yuabimboecquido icboedi nēbi Esus tantiasho Nuquin Papan: —Con bacuēbo nec —nuqui capec. Aden nuqui bēdambo icmec ambi Abadauan chiampicpadomboembi.

¿Utsin yuameteda bumpe? quiaid

⁸ Tantia. Nēbi matses utsibo mibi chuioanu. Ēnden Nuquin Papambo tantiesa icquin matses uaquidpenquiobi utsi mimbi tantiapanēdac. Papa quequin mimbi tantianēdaidēn yuabo yec mētaniacimboecquido mibi icpanēdac.

⁹ Nēbi Nuquin Papa mimbi tantiabenondac. ¿Mimbembida adonda? Padenquo. Aidēmbi mibi tantiamapanēdash. Aidēn tantiamiaidombo icquin ¿atotsiequin aid tantienquo yanoai? ¿Moisesēn dada uapampiduidi namenuquido tanshoda Nuquin Papan mibi bēdamboen ispec? Padenquo. Adquid mētaniacimboecquid nec. ¿Mētaniacimboecquid icotiadiquioda ique?

¹⁰ Aden Nuquin Papa tantienquo icquin mimbi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidsēqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bēdamboen iste danquin mimbi icsamboen chiec.

¹¹ Mibi caic: —Adosh —qesho tantiash shubitiadquo iquebi. —¿Ēmbi chiondaidonda Esus tantienquo yampash? —quequin tantiac mibi unēsquo iquec.

¹² Con utsibobimboecquido mibi neque. Tantia. Mibitedi chuinu. Isadaidpembo yec mibi: —Moisesēn chiampiduidi nanu —quenquo yacimboec yanondabi. —Ēmbembi Moisesēn chiampid naquin Nuquin Papa bēdamboen ismembi —quedenedi ėnēdondabi. Nēbi Ēsusuidi tantiaquid nebi. Adembidi Esusuidi tantiata.

Ēbi adsho tantiash chieshenda. Tauamboen ėmbi Esus chuisho mimbi ėbi chieshēnenquo iccondac.

¹³ Mibi yacno tauamboec choshon daicsabudtsēcshumbi mibi Esusēn naid chuibanondambi.

¹⁴ Istiapicpambo yec daicsabudacshobi mimbi ėbi cacumenquo iccondac. Ēbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bēda choacimboecnuc mibi cuishonquiondac. Nuquin Icho Esuquidistu choacimboecnubidi mibi adondac.

¹⁵ —Min ėshē chicshun ėbi mene —ėmbi cac mimbi ėbi menetsenondac. Aden ėbi mimbi tantiaquiondac. Adondaiddi ¿atotsi quiash chieshcueno?

¹⁶ ¿Nēid abimbo chuiquindambi mibi chieshēmpē? Padenquo iquembi. ¿Aden chuisho mimbidabi chieshēmpē?

17 Ista. Esus chienquoio icquidon ambi chiacpadomboen mibi name-tiadquoio iqueque. ¿Mibi tantiaquoioquin bédamboen namenuenda mibi chuipec? Padenquoio. Èbi chieshèmenuembien ambi chiacpadomboen mibi nametiadquoio icchitec. Mibi abibi tantiamenuen naic.

18 Èmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbì èmbi chiaidquoio tantia-benondac. Èbèd icquimbi Esus bédamboen tantiaboedombi èbi nidtsècnubi mimbi badedi utsi tantiac.

19 Aden mimbi naid tantiac mibi unèsquoio iquec. Anin bacuè tantiacim-boen mibi tantiaquiemi. —Esusbimboec icpashun. Aid tantiec ambi chiacpadec bédamboec tabadpashun —quequin mibi tantiembi.

20 Mibèd icquin bèsiquioquin mibi chuitsiambi. Mibèd iquenquoio icquimbi mibi bèsiquioquin chiacimboen dada uaqin mibi naden chiemi. —¿Atotsieshun Esus tantienquoio yanoao? —caimbi.

Abadauanèn mado daèd chiaid

21 ¿—Moisesèn chiacpadomboenuidi naquin Nuquin Papa bédamboen ismembì —quequido icquinda mimbi Moisesèn chiampid bédamboen tantieque? Tántia. Mibi chuinu.

22 Naden chuiquin Moisesèn dada uapampic. Abadauanèn madombo daèd icpampic. Aton chidon yuaid chido bedshun tishmiaid abentsèc icnuc aton shanunquoio aton chidon tishaid abentsècbidi icpampic.

23 Abadauanèn chudac badedquoio bacuè usundoshon chido yuaidèn aton mado tishpampic. Abadauanèn chidombo naido icsho: —Mimbì bacuè tishendac —quequin ambi chiacpadomboen Nuquin Papan naidopenquoio icmiac aton mado tishpampic.

24-25 Aidi Sada nepampic. Chido yuaid Acad nepampic. Aidèn tishaid yec aton mado yuabidi nepampic. Icbon chiacpadomboenuidi napampic. Yuaidèn madobimboecquido Moisesèn dada uapampiduidi namenuèquido nec. Adquiobidi Edusaden yacnocquido iquec. Esus tantienquoio yec Moisesèn chiaiduidi tantiate bunquiec. Nidaid utsi Adabia caid yacno macuèsh dapá Sinai caidènsnun Nuquin Papan ambi chiaid Moises dada uamepampic. Aid macuèsh mates utsin Acad capec. Aden tantiaquin: —Chido yuaid Acad caidèn madobimboecquido Moisesèn dada uapampiduidi namenuèquido nec —caombi.

26 Edusaden caid utsi iquec. Nuquin Papa tabadacnombo Edusaden caoapec. Ambo Esus tantiaquido yec nuquibi tabadendac. Yuaidèn mado-bimboecquido Moisesèn dada uapampiduidi namenuèquidoen padenquoio iquendac.

27 Nuquin Papan ambi chiaid dada uamepampicpadec Esus tantiaquido dadpenquoio iquendac. Naden dada uamepampic.

“Tantia, chido. Naido icsho mibi chuinu.

Bacuè tishtiapimbo yequi bédambo icta.

Bacuè paèmbo icnuc tishacmaid yequi cuishonqueta.

Bènè choquidèn bacuè dadpen tishquidèn bacuèn tsyuecquido daèdpectsèc yanubi

Bacuè nibèdquidèn min matses dadpenquioshè yanendac,”
quequin ambi chiaid Nuquin Papan dada uamepampic.

28 Tantia, con utsibo. Mibi chuinu. ¿Ada Nuquin Papan Abadauan chi-ampid tantie? —Min chido naido iccondaidèn tishaid Isac cuèmèdquidèn tsyuecquid tantiaquido bédamboen isendambi —quequin Nuquin Papan Abadauan chuiampic. Abadauan chiacpadomboen aton Mado Esus tantia-asho Nuquin Papan: —Con mado nec. Con champi nec —nuqui caindac.

²⁹ Ĕnden Nuquin Papan naidopenquo icmiampidĕn mado chieshĕnquin chido yuaidĕn madon aton utsibi chieshĕmpampic. Adembidi Nuquin Papan Mayanĕn tantiamiaido Esus tantiaquido Moisesĕn dada uapampiduidi namenuquidon chieshĕnendac.

³⁰ Aden Abadauanĕn mado bĕyucquidĕn aton utsi chieshĕnsho isun ĵatotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobĕdtabi cueme. Min mado utsi Sadan madon tsyuecquido dadpenquo caidmequin bĕdamboen tabadmembĭ. Yuaidĕn madoembi padenquo iquendac,” quequin Nuquin Papan Abadauan chiaid dada uapampic Moisesĕn.

³¹ Sada caidĕn mado Isac caidpadquid yuapenquo nuqui nec. Esus tantiasho Nuquin Papan: –Con mado mibi nec. Con champi mibi nec –nuqui caic. –Esusĕnuidsĕqui Nuquin Papa ĕbi bĕdamboen ismec –quequin Esusquo tantiaquid yec: –Ĕmbembi Moisesĕn chiactedi naquin Nuquin Papa bĕdamboen ismembĭ –quenquo icnuna.

5

Esus tantiasho Nuquin Papan bĕdamboen iste chiaid

¹ Aden: –Esusĕnuidsĕqui Nuquin Papa ĕbi bĕdamboen ismec –matses camenuc abided ciudadec Esus unĕspac caondashe. Aidquo tantia. Muauquidĕn: –Moisesĕn chiampicpaden nasho Nuquin Papan nuqui bĕdamboen istiashe. Aidĕn chiaipaden nanuna –quequin chuisho tantienda. Aden muaquin chiaipaden naic isadaidbo tsusedpan yuabimboec mibi yantsiaque.

² Mimbĭ isondaĭd Pabado nebique. Tantia. Mibitedi chuinu. Moisesĕn chiactedi naquid Nuquin Papan bĕdamboen iste danquin Esus tantienquo yanec muauquidĕn chiaipadec shui dĕbid dĕteshuniadacsho isun Esusĕn Nuquin Papa mibi bĕdamboen ismetiapimbo ictiashe. Adenda.

³ Aden Moisesĕn chiaid abentsĕc natsĕcshun aidĕn chiaid utsitedi nainquo icsho Nuquin Papan mibi bĕdamboen istiapimbo ictiashe. Moisesĕn dada uapampiduidi namenuquido tanenda.

⁴ Aido Esus tantiesabo nec. Aden abi bĕdamboec ismianquid Esus tantienquo icsho Nuquin Papan aido bĕdamboen istiapimbo iquec.

⁵ Esus tantiaquidoen Nuquin Papan Mayanĕn tantiamiacpaden naden tantiec. –Esus tantiashoudi ambi chiaid niac-niacacmaidbimboecnuc bĕdamboen isquin Nuquin Papan: “Mibi bĕdambo iquec,” nuqui caindac –quequin nuqui tantiec.

⁶ Shui dĕbid dĕteshunaidĕn Esus tantiasho Nuquin Papan bĕdamboen isec. Adembidi shui dĕbid dĕtiacmaidontsen Esus tantiasho Nuquin Papan bĕdamboen isoaic. Aden Esus tantiabensh: –Ambi chiaipadomboen Nuquin Papan matses tantiaquid ĕbi icmendac –quequin aden utsibo tantiasho isun Nuquin Papan: –Ādquid con Mado tantiaquid nec –caindac.

⁷ –Bednu –quequin nadancacimboen aiduidtsĕqui tantiaquin mimbĭ Esusquo tantiondac. Ĵtsuntsin muaquin chiac Esus tantienquo mimbĭ yanoape? ĴAtotsiequin abimbo chiaid niacpe?

⁸ ĴNuquin Papan nacta Esus tantienquo yano? Padenquo. Ma aidĕmbĭ mibi Esus tantiametiadquo yoc.

⁹ Muauquido tantienda. Nadquo aid iquec. Toshō bedquid abentsĕcshun bedmebanac abitedi toshoquedec. Adembidi muauquid abentsĕcshun chiac matses dadpenshun abimbo tantienquo yantsiashe. Muaid tantienda.

10 —Nuquin Icho Esusën tantiamiac ëmbi chiacpadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

11 —“Con tsusedpan chiacpaden shui dëbid dëteshuniaiduidtsëqui Nuquin Papan bëdamboen istsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ëmbi chuisho adembidi chuiquidon chieshënenquoio ictsenoshi. Esus chienquoio icsho ëbi chieshënenquoio ictsenosh. Abi tantiaquid cuidmenquoio icnuec abided cuidadec unësaid Esusuidi chuisho mabi chieshëmpaboc.

12 Mibi muaquin chuiquido Moisesën dada uapampiduidi namenuequido caic: —Auëshquoio cuemepashun —caimbi.

Esus tantiaquido bëdamboec tabadte chiaid

13 —Ëbi cuidmenquoio icnuec abided cuidadec unësaid Esusquoio tantiasho Nuquin Papan ëbi bëdamboen isec —camenuen Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ëbi icsate bunaid nanu —quenda. Nëbi Esus tantiaquin mibi icsate bunaid ënquin mëmunta. Esus tantiaquido yec tantiananquieç nashunanta.

14 Adomboen Nuquin Papan Moises naden chuimiapadomboen mimbi natsiac. “Mibibi min dada datantiadacimboen utsibotsen bëdamboen tantiaquiota,” quequin Nuquin Papan ambi chiaid Moises dada uamepampic.

15 —Opa penantiadpambo yacimboec nëishnanash chushcananosh —quiosh mibi caic. Aden naic mibi icsacuededeque. Esus tantienquoio mimbi yaneque. Bëdamboec tabadta.

Nuquin Papan Mayanën bëdamboen tabadmete

16 Nuquin Papan Mayanën tantiamiacpadomboen naic bëdamboec tabadta. Aden mibi icsate bunaid mimbi nainquoio ictsiac.

17 Nuqui icsate bunaid naiqui Nuquin Papan Mayanën tantiamiacpadec bëdamboec tabadtiapimbo nuqui ictsiac. Nuquin Papan Mayanën tantiamiacpadomboen tantiaquin nuqui icsate bunaid ënquin nuqui mëmuntsiac.

18 Nuquin Papan Mayanën tantiamiacpadomboen tantiec: —Esusënuidtsëqui Nuquin Papa ëbi bëdamboen ismec —queshun: —Moisesën chiactedimbo naquin ëmbimbo Nuquin Papa bëdamboen ismembimbi —quequin tantienquoio nuqui iquec.

19 Nadquoio icsateuidi bunquid matses iqueque. Tantia. Chuinu. Nëdic aton chidopenquoio chudquido. Nëdic aton bënëpenquoio chudmequido. Nëdic dada daëd chichudnanquido. Nëdic opabimboec chudnante bunquin matses ismequin adoquido. Nëdic tsienbëdta shui chuibudquin icsamete bunquido.

20 Nëdic Nuquin Papan chiaid niac-niacquin ambi matsesbimboecnuc nacnenaidi papa caquido. Nëdic nënëchoquido. Nëdic dauë icsa bedash icsa uanquido. Nëdic chieshëmënuquido. Nëdic chieshëmëneç chushcananquido. Nëdic cudasquido. Nëdic nëishëmënuquido. Nëdic ambi naiduidi naquido. Nëdic abitedi cuësh-cuëshëdmianquido. Nëdic: —Utsin chiaid tantiatiapimbo iquebi. Ëmbentsëqui bëdamboen chiembi —quequido.

21 Nëdic utsin na natiambo bunec chieshëmënuquido. Nëdic tantiadenuen paëmbo icquid acquido. Inchëshën ushenquoio icquin adoquido. Adquidtedishun icsamboen naic. Adec abi icsaid ëntiapimbo yec unëshash Nuquin Papa yacno tabadtiapimbo iquec. Aden mibi chuibanondambi ënden.

22 Padnuen Nuquin Papan Mayanën namiaid yec nadquieç tabadquid. Nuquin Papabëdta matses tantiaquieç tabadquid. Esus tantiec cuishonqueç tabadquid. —Nuquin Papan ëbi bëdamboen isec —quec bëdambo yec

dacuēdenquoio yec tabadquid. Utsibon chieshēnaqui chieshēmēnenquoio yec tabadquid. Nēishēmēnenquoio yec tabadquid. Bēdamboen isquin utsibo nashunec tabadquid. Muainquoio yec tabadquid Nuquin Papan namiaid.

²³ —Con nauidi naimbi. Ēbiuidtsēqui bēdambo iquec —quenquoio icquin utsibo bēdamboen tantiec tabadquid. Abi icsate bunaid ēnquin mēmunc tabadquid. Adquoio yec Nuquin Papan Mayanēn namiaido Esus tantiaquido bēdamboec tabadtsiash. ¿Adec bēdamboec tabadsho isunda: —Adec tabadenda —quequin Nuquin Papan Moises dada uamepampic? Padenquoio. —Icsamboec tabadenda —quequin icsamboec tabadquid chuipampic. Nuquin Papan Mayanēn tantiamiacpadec tabadquin aden chuipampid nuqui ni- aquenquoio iquec.

²⁴ Adoenquoio icquin cuesten decnanac abided cuidadec unēsaid Esus tantiaquin nuqui icsate bunaid ēnquin nuqui mēmuntsiac.

²⁵ Aden icsamboen nainquoio yec bēdambo icnuna. Nuquin Papan Mayanēn Esus tantiamiaid icquin aidēn tantiamiacpadomboen nanuna.

²⁶ —Ēbiuidtsēqui bēdambo iquec —quenda. Adenquoio yec nuqui chuiquid dēniacte bunenquoio yec bēdamboec tabadnuna. —Ēbi bunacpaden ēbi namianenquien icchitec. Utsien namechitec —quec chieshēmēnec tabadenda. Nēishnanenquoio yec bēdamboec tabadnuna.

6

Esus tantiaquido bēdamboec isante chiaid

¹ ¿Nuquin Papan Mayanēn tantiamiacpadomboen bēdamboen tantiaquidta icpec? Adquidēn abēdan Esus tantiaquidēn icsamboen nasho isun: —Padi. Esus tantiaquid adesambo neque. Bēdamboec tabadta —caquid yendac. —Nēishec ēbitsen icsamane —qeshun nēishenquoio icquin aden chuiquid yendac. Abibi datantiadec: —Icsaquid nebi. Esus bēdamboen tantienquoio yec adecbidi icsatsiabi —quequin tantiec: —Bēdamboec tabadta —quequid yendac.

² Adec bēdamboec isanec: —Bēdamboec tabadnuna —quec chuinanquiota. Adecbidi nashunanquiota. Aden naquin Nuquin Icbo Esuquidistun chiacpadomboen mimbi natsiac.

³ Utsien: —Utsibēd onquetiapimbo iquebi. Ēbiuidtsēqui bēdambo iquebi —quec abibi muaadquid icsambo iquec.

⁴ Adenquoio yec mibibi datantiadta. —¿Nuquin Papan chiacpadectabi bēdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bēdambo icta. —Utsitedi icsambo icnubi ēbiuidtsēqui bēdambo iquebi —quenda.

⁵ ¿Mimbi utsibon naid chuibanshoda Nuquin Papan: —Mibi bēdambo iquec —capatsiash? Padenquoio. Mimbi bēdamboen naid isun: —Mibi bēdambo iquec —catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac.

⁷ Piacbo sequidbimboec matses iquec. Tantienuo icquidēn icbompin uestsaidi siac canienquoio ictsiash. Padnuen tantiaquidēn ēshē bēdaidquoio siac bēdamboec canitsiash. Tantienuo icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unēsash Nuquin Papan yacno nidtiapimbo iquec. Padnuen Esus tantiaquid ambi chiacpadomboen naic unēsash Nuquin Papan yacno nidendac. Ēbi adsho tantiash: —Icsaido Nuquin Papan cuidenquoio ictsiash —quec muaic tabadenda. Ambi chiacpadomboen mibi cuidendac.

⁸ Ambi chiaid niac-niaquec abi icsate bunaiduidi naquid cuidendac. Nuquin Papan Mayanèn tantiamiacpadomboen naquidien bēdamboec tabadec unēsash Nuquin Papa yacno tabadendac.

⁹ Ēmbi aden chuisho tantiash bēdamboec tabadta. Bēdamboec tabadec chieshtoenquo icscho isun ambi tantiacpadèn Nuquin Papan abēdi nuqui tabadmendac.

¹⁰ Adec bēdamboec tabadquin utsibo bēdamboen isquin nashununa. Aden utsibo bēdiactsēc tantiec Esus tantiaquido yec tantiananquieq nashunanquionona. —Shubu abentsēquēn tabadquidobimboec Esus tantiaquido iquec —queshun adonona.

Pabodon ēnquimbi chiaid

¹¹ Is. Nua-nua icnuc dada uaquin ěmbimbo ēnquimbi dada uanu.

¹² Muaquin chuiquidon mibi con tsusedpan chiacpadomboenuidi name-tiadquio iqueque. Aidon chuisho tantienda. Con matses isadaidbo: —Mibi bēdambo iquec —camenuen mibi adometiadquio iqueque. —Esusuidi chuisho con matsesēn chieshēnquin cuidnushe. Moisesēn chiacpadomboen namenu —quequin mibi shui dēbid dēteshunemetiadquio icchitec. Aido muasho tantienda.

¹³ Aden mibi: —Adota —caquidombi Moisesēn chiactedi nainquien icchitec. Adquid yec: —Is. Bēdambo iquebique. Ēmbi chiacpadomboen nēidon naosh —quenuembien mibi shui dēbid dēteshunemetiadquio icchitec. Aidon chiacpadomboen nainda.

¹⁴ Ēbien adtiapimbo iquec. Esus tantiesabimboec: —Ēbibi bēdambo iquebi —quetiapimbo iquebi. Esusuidtsēqui bēdambo iquec. Abi tantiaquid cuidmenquo icnuec abided cuidadec unēsac caondash cueten dectanac. —Aidquio tantiec bēdambo iquebi —caimbi. Aden Esus tantiec: —Ēmbimbo Moisesēn chiacdedi naquin Nuquin Papa bēdamboen ismembī —quec ēnēdondabi. Adecbidi Esus tantiec ēbi bunaid ēnash icsate bunenquo iquebi.

¹⁵ —Moisesēn chiacdedi naquiduidi Nuquin Papan bēdamboen istsiash —quetiapimbo iquebi. Shui dēbid dēteshunaidēmbi Esus tantienquo icscho Nuquin Papan cuidtsiash. Adembidi shui dēbid dētiacmaidēn Esus tantienquo icshobidi cuidtsiash. Nuquin Papan Mayanèn chuca uaidien Esus tantiaquid Nuquin Papan bēdamboen isquin bēdamboen tabadmec.

¹⁶ Ēmbi aden chuisho tantiash: —Ai, abimbo mimbi caique. Adonona —quesho: —Aido Nuquin Papan bēdamboen isquin bēdambo icmepashun —caimbi. Adquido Nuquin Papan: —Con matsesquio nec —caindac.

¹⁷ —Abimbo chienquien icchitec —ēbi cainda. Esusēn chiaidquio chiombi. Aidquio tantiaquin ambi chiacpadomboen nabanta. Ēmbi Esusēn chiacpadomboen nasho isun chieshēnquin cuesaniondashi. Cuesonaid bish abi iquec.

¹⁸ Tanta, con utsibo. Mibi Nuquin Papa chianembi naden. —Mimbi nabocpadomboen con Icho Esuquidistubēdtan Cadasia yacnocquido bēdamboen ista, Papa —quequin Nuquin Papa chianembi. Padī. Aidedi chuiquin dada uaombi.

EPESO YACNOCQUIDON ISTE

¹ Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Adquidquio icquin mibitedi Nuquin Papan bēdamboquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuedēta.

² Aden Nuquin Papan bēdamboquid icmenu caidombo icquin ma Nuquin Papan Nuquin Icho Esuquidistubēdan ēnenquioquin ēbi bēdamboen isec, quequin mibitedishun tantiapashun. Adembidi, Nuquin Papan bēdambo icmenu caido yec abēd iquebi, quequin tantiapashun mibitedishun.

Nuquin Papan abēd abuc bēdamboec tabadacpadquiocnoc icmiaid

³ Edoen, Nuquin Papa, Nuquin Icho Esuquidistun Papa bēdamboquid nec. Esuquidistu adquidquibidi neoaic. Aid tantiaquid icsho abēd abuc bēdamboec tabadacpadquidquio nuquitedi icmiac. Adoaid yec, Mibi bēdamboquid nec, Papa, quequin chiec nuquitedi onquedenec.

⁴ Nidaid abubēda uabicquin aidēnquiocquitedi uabicquin, Nēidtedquio Esuquidistu tantiaquido icsho ēmbi cuēmbanaido iquendac, quequin Nuquin Papan tantiapampic. Ambi tantiapicpaden ma nuqui icsaisa icmepanuna. Aden nuqui tantiaquin

⁵ abi bunacpadomboen Nuquin Papan, Esuquidistu tantiaquido con bacuēbo icmendambi, quiampicpadomboen nēbi adobanec.

⁶ Esuquidistu tantiaquid nuqui icsho abēd icquid nuqui icmenuen Nuquin Papan abi yacpadquidquio icmēbanec. Adoac, Bēdamboquid mibi nec, Papa, quequin Nuquin Papa nuqui chuidenec.

⁷ Matsēdēdi icsaid bedshunacsho Nuquin Papa cudasaidquio Esuquidistu icsambocquidbimboecnuc cuesten dectanquin unēs uapanēdash. Adosho isash, Nēbi Esuquidistu tantiaquid ēmbi bēdamboen isaidquio nec. Mibi cuidenquio yec mibi icsaid bēpiscudobi, quec Nuquin Papa.

⁸ Naden nanuna, quequin ambi tantiapicpadomboen aton bacuē icmēbanac abēd icquido nuqui nec.

⁹ Abi bunacpadomboen, Icsaquid cuidte bedshunash unēsquid con Mado Esuquidistu iquendac, quequin ambi matses tantiamenquio icpampid nēbi ambi cuēmbanaido Nuquin Papan tantiamēbanec.

¹⁰ Adoaid iquec con mado abun icquido nidaid yacnocquidobēd chuiquid abentsēqui iquendac, quequin Nuquin Papan tantiapicpadquibidi adquidquio icmenu caidquio Esuquidistu iquendac.

¹¹ Esuquidistu tantiaquid icsho isun ambi tantiapicpadomboen, Con bacuē icmiaido nec, quequin Nuquin Papan cuēmbanaido

¹² abia tantiaquido nuqui bēdamboec tabadsho isash, Nuquin Papa bēdambo iquec, quequin chiec ma utsibo cuēdēmpanuna.

¹³ Mibi icsaid bedshunash abided cuidadec Esuquidistu unēsapanēdash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec.

¹⁴ Aidēmbi mibi bēdambo icmiac Nuquin Papabēd tabadendac. Mibitedi bēdamboec tabadsho isash Nuquin Papa bēdambo iquec, quequin chiec ma utsibo cuēdēmpanuna.

Nuquin Papa chiec onquianiaid

¹⁵ ¿Bēdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen

yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abèd icte bunanec iccuededec, quequin chuisho tantiapombi.

¹⁶ Aden tantiashun mibitedi bēpiscudenquiocquin badiadquidēn-badiadquidēnquien naden Nuquin Papa chian-chianembi.

¹⁷ Esuquidistun Papa, icsaisambo, tantiaquidquio mibi cadoque. Mibi bēdamboen tantiaquid yacpadquiocnoc min bacuēbo Epeso yacnocquido min mayan icmeban, Papa. Adquido min Mayanēn icmiac mibi tantidonequidombo ma icpanuna.

¹⁸ Adecbidi, Abuc ebēdi mibi iquendac, quequin mimbi chiacpaden tantimequin pausunac mibēd icnuequin cainquidombo Epeso yacnocquido ma icpanuna, Papa. Aidēn tantiamiac, Mibi yacno Esuquidistu tantiaquid utsibobēd bēdamboec tabadendabi, quequin Epeso yacnocquidon ma tantia-panuna, Papa.

¹⁹ Aden tantiamiac Nuquin Papan nadatiambocquin nabanquin Esus unēsacsho uincuemenedacpaden ēbi uincuemendac. Adembidi nadatiambocquin nabanquin Esus tantiaquid ēbi icmiac. Adembidi ēbi bēdamboquid icmebanec, quequin ma Epeso yacnocquidon tantiaquiopanuna, Papa.

²⁰ Esuquidistu unēs uacsho uincuemeshun mibi yacno aidi indoshon min dayunquio mimbi tsadumpanēdac, quequin tantiec Nuquin Papan nadatiambocquin naidquio nec, quequin adomboembidi ēbi indoapēc, quequin tantiacpadomboen ma Epeso yacnocquidon tantiaipanuna, Papa.

²¹ Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibēdec, quequin Esuquidistu min dayunquio tsadunquin utsibo mimbi ismepanēdac, Adquid nebi, chuiquid utsi quetiapimboenoc. Nuquin Papan nadatiambocquin nac ēnenquiocquin abitedi chuiquidquio Esuquidistu iquendac, quequin Epeso yacnocquidon ma tantiaquiopanuna.

²² Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec.

²³ Ambi ēndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abēntēcquiobi Esuquidistu icquin abēd icquido nua pausunaido yec abi yacpadquio ictequid yec abentēc yacimboec abēdi nuqui tabadendac.

2

Nuquin Papan Esuquidistubēd icmiaido

¹ Mibi icsaquid yec Nuquin Papabēd ictiapimbo iccondac. Adboedi nēbi aidēmbi ēnenquiocquin abēd icquido mibitedi icmiac.

² Ēnden Nuquin Papa chieshēnquin mimbi tantiacpadomboen nabanondac. Adquid icsho Nuquin Papa chieshēnquid dapan Šatanasēn yuaido mibi iccondac. Aidēn Nuquin Papan chiaid niacacpadomboen mibitedishun niacbededpondac.

³ Adquidquidquio yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobēdta Nuquin Papan cuidnu caido nuquitedi icpondac.

⁴ Adec cuidnu queboedēmbi nuqui tantiec unēsquiocquin Nuquin Papan comapenen nuquitedi tantimepondash.

⁵ Ambi cuidnu caido icsaquido yec abēd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abēd icquido Nuquin Papan nuquitedi icmiac.

⁶ Esuquidistu nuqui icsaid bedshunacsho abided cuidquin unēs uapanēdash. Unēsacsho isun uincuemeshun abi yacno Nuquin Papan indopanēdash. Adshun abi tantiaquidtedi abuc Esuquidistubēda ambi indoachimboecquido icsho Nuquin Papan nuqui bēdamboen isec. Adecbidi abuc Esuquidistubēd icquid nendabi, quequin tantiec nuqui tabadec.

⁷ Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubēd icquido nuqui icmec. Ma adquid icsho isash utsibo, Nuquin Papan naid nec, ma quepanuna.

⁸ Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ēmbibi tantiemi, quetiapimbo nuqui icnubi, Mibi tantiamiombique. Ēbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abēd icquido nuqui nec.

⁹ Icsaquido icquin bēdamboen naic nuqui icsaid cuidadtiapimbo nuqui iquec. Bēdamboen naic cuidadpebi, quiash abi icsaquid yequi, Bēdamboquid nebi, quec tabadsho isun utsibon icsamboen tantianushe queshun Nuquin Papan icsaisa aton Madoded cuidpanēdash.

¹⁰ Nuquin Papan uaido nuqui nec. Aidēmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

Esuquidistubēd abentsēc yacimboecquido

¹¹ Nuquin Papan, Cuidnu, quenquiocquin comapenen tantiamiaidquio mibitedi icquin mibi ėnden tabadaid tantiata. Shui dēbid dētemesa isadaidpembo nec, quequin isadaidbon shui dēbid dētemequidon mibi cūēnondash. Nuquin Papan matsesquio nebi, quequin shui dēbid dētemequidquio isadaidbo nec.

¹² Adquidquio isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, Ēbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abēdi ėnēdenquio yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac.

¹³ Adec aid tantiesa yec icsaquid yec, Nuquin Papa yacno puduednu, quetiapimbochoedi, Matses icsaid bedshunash abided cuidadec Esuquidistu unēspanēdash, quequin tantiaquid icsho aidēnquio abi yacno yuedendac. Nēbi aid tantiaquid yec abi tantiaquid utsibobēd abēdi tabadacimboecsho Nuquin Papan nuqui bēdamboen isec.

¹⁴ Isadaidpembo isash isadaidbo, Ēbēd icquidpenquio nec, quequin tantiec datamēncuenepondash. Adecbidi isadaidbo isash adquiecbidi isadaidpembo datamēncuenepondash. Adquido icboedi ėbi icsaid bedshunash Esuquidistu unēspanēdash, quequin isadaidbo utsin-utsinquien tantiec. Adem-bidi isadaidpembo utsin-utsinquien aid tantiec. Adec aid tantiaquid yanash datamēncuenequio yec matses abentsēc yacimboecquido yanac.

¹⁵ Esuquidistu matsesash nidaidēn tabadquin isadaidbo icquin isadaidbon, Naden nata, quequin chiacpadomboen utsitedishun natiapimboconobi Esuquidistun uesquin nabampanēdash icsainquiocquin. Adec tabadquin naimbudsho icsaquidimboecnuc unēs uapanēdash. Aden unēsmesho isec Nuquin Papa, Padī. Chēn, quenquio icpanēdash. Ēbi yacno isadaidbo isadaidpemboēdtabi con madon yuedendac, quiash chēn quenquio icpanēdash. Datamēncueneboedi aido Esuquidistu tantiaquid yanash datamēnenquio yanac.

¹⁶ Naden nata, quequin chiaidtedi nuqui natiapimbocon nuqui icsaid bedshunash Esuquidistu unëspanëdash, quequin tantiaquido isadaidbobëdi isadaidpembo yanac. Ambi tantiaid Esuquidistu yanash datamëncueneboedi adec datamënu quetiapimbo yanec Esuquidistun shubun icquido yanoaic.

¹⁷ Matsestedì bëdamboen iste Nuquin Papa bunec quequin ambi chuibeni-acpadec abided matses icsaid bedshunash unësquin isadaidbo isadaidpem-bobëdta Nuquin Papan bëdamboen isaido icmëpanëdash.

¹⁸ Adoac nëid isadaidbo nec. Nëidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidën tantiamiac, Mimbi ëbi tantiec, quec Nuquin Papa chiec Esuquidistu tantiaquidombo onquedenec.

¹⁹ Aden chiec onquec ambi yuedtiapimbo icboedi nëbi Esuquidistu tantiaquido yanash Nuquin Papan shubun ënden icnëdaidobëd tabadtequid mibitëdi iquec.

²⁰ Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquio isadeque. Chuinu. Tantaia. Esuquidistu abia yampid abi yacno yuedanquidquio yec abia nitsinaid cüeste nidquid-bimboecquid nec. Nuquin Papan chiaid chuibampampidobëd Esuquidistun ëbi chuibeneta caido shubu nitsinaidbimboecquid neoaic.

²¹ Aided abia icquid icnuc isadaidbobëd isadaidpembo Esuquidistu tantiaquid dadpen yansho Icbon tabëcshun tanebanaidbimboecquido neoaic. Abi tabadte Icbopadquid icsaisa yampec.

²² Mibi Epeso yacnocquido Esuquidistu tantiaquid utsibobëd Nuquin Papan Mayan meniaid yec Nuquin Papa tabadtebidi mibi nendac.

3

Isadaidpembo Esuquidistu chuibenequid Pabado

¹ Isadaidpembobëdi ma Nuquin Papa tabadte icnu quequin Esuquidistu chuibenesho quënën nauedaid icquin aidën chiacpadomboen mibi chuibanquidquio nëbi.

² Isadaidpembo yacno nidshun Esuquidistu chuibeneta Nuquin Papan cac nëbi. Esuquidistu chuibenequid Pabado nec, quequin mimbi tantiec.

³ Èbi yacno yuedanquid Esuquidistu iquec, quequin Nuquin Papan tantiamiacpaden ënden dada uaquin mibi chiondambi.

⁴ Èmbi dada uaondaïd bëdamboen isec onquequin Nuquin Papan ëbia Esuquidistu tantiamiacpaden mimbi tantiapec.

⁵ Èndenquio Nuquin Papan Esuquidistu nidmëmbi, quequin chienquiocpampidëmbi nëbi ambi, Esuquidistu matses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidëmbi aton Mayanën tantiamiac.

⁶ Ambi nëbi tantiamiaid nad iqueque. Tantaia. Chuinu. Isadaidpembo Esuquidistu tantiaquido isadaidbo Esuquidistu tantiaquidobëd Nuquin Papan yacno ënëdenquio yec tabadtequido nendac.

⁷ Nuquin Papan, Cuidnu, quenquiocquin nadatiambocquin ëbi ismiaid yec ambi Esuquidistu chuibeneta caid ambi namiaid icsho ambi nadatiambocquin nabamiaidquio nëbi.

⁸ Esuquidistu tantiacquid utsi bëdiactsëc icsaquid icnubi comapenec icsaquidquio icsho Nuquin Papan Esuquidistu tantiaquid icmeshun Esus bëdambo yaidbëdtabi abëd tabadte bëdaïdquio tantiamëquiopondashi. Adem-bidi ambi, Esuquidistu chuibeneta, caidquio nëbi. Adquid icquimbi Esuquidistun matses bëdamboen tabadmenu, quequin tantiaid dadpen icnuc

aidtedi uesquin chuitiapimbo iquebi. Aidedi matsesën bédamboen tantiatiapimbo icoapec.

⁹ Èbédambi abitedi uampidquio Esuquidistu aid tantiaquido ëbi yacno yuedquid iquendac, quequin Nuquin Papan tantiamenquiochoedi nëbi matses tantiamenuen Esuquidistu chuibeneta caidquio nebi.

¹⁰ Aden ëbipadquidon Esuquidistu chuibeniac icsaquid icboedi Esuquidistu tantiaquid dadpen yanac. Adsho isun aidedi Nuquin Papan Esuquidistubéd abentsëc yachimboeccquid abipadquid ambi tantiampicpadomboen icmebanec. Aden icmebansho isun abi yacno tabadquin namequidon tantienquiochoedëmbi nëbi tantiendac. Nuquin Papan, Yuecsun naden nanuna, quequin ambi bédamboen tantiampicpadomboen nabanac nëbi abéd icquid dadpen iquec, quequin Nuquin Papan abi yacnoshon uaidon tantiec.

¹¹ Matses bédambo icmetequid Esuquidistu iquendac, quequin ambi tantiampicpadomboen Nuquin Papan Esuquidistu Nuquin Icho icmepanëdash.

¹² Aton mado Esuquidistu ëbi icsaid bedshunash unësash uincuenash Nuquin Papan dayunquio iquec, quequin tantiec dacuëdenquio yec Nuquin Papa chiec nuqui onquec.

¹³ Adecbidi, Esuquidistu chuibenesho bedshun Pabado quënën nauedac, quequin tantiec chieshenquiocquin Esuquidistu tantiatia, Epeso yacnocquido mibi caimbi. Èmbi chuibanac Esuquidistu tantiaquid yansho Nuquin Papan abëdi tabadmenuequin Nuquin Papan ambi, Bédambocquid icmenu, caid mibitedi neque. Chieshendä. Adembidi Pabadon chiac ëbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

Epeso yacnocquido tantiec Nuquin Papa chiec Pabado onquiaid

¹⁴⁻¹⁵ Nuquin Papan isadaidpembo Esuquidistu chuibeneta cac, chuibenesho quënën nauedaid icquin ëmbi chiac Esuquidistu tantiaquid isadaidbobëd isadaidpembo Nuquin Papan matses yanash aton shubun icquido nec. Nuquin Papan cuëmbanaido nec, quequin tantiec danëshën sebudash aid naden chiec onquebi.

¹⁶ Mibi icsaisa icquin mimbì tantiacpaden Epeso yacnocquido nua pausun, Papa, ma natiamiantequid icnuc Esuquidistu tantiesä yanenquiocpanuna.

¹⁷ Aden pausunac ma aido Esuquidistu tantiadonequidombo icpanuna. Aido mimbì tantiamiac ënëdenquio yec utsibéd tantiananec tabadquid ma Epeso yacnocquido icpanuna.

¹⁸ Aden pausunac, Èbi utsibobëdta comapenen tantiaquid Esuquidistu nec. Ambi bëyuc matses uaid tantiaquinc, aidën tsyuecquid ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aidedi icsaid bedshunacsho Nuquin Papan cuidpanëdash, quequin ma Epeso yacnocquidon tantiappanuna, Papa. Adembidi abuc bédamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquiopanuna, Papa.

¹⁹ Aden tantiaquidquio yec Esuquidistu unësnëdash, quequin tantiec papuedash Esuquidistun matses tantiacpadquidquio Nuquin Papan ma mibitedi icmebamppanuna.

²⁰ Nadquid Nuquin Papan ëbi icmetsiash, quequin nuqui tantiatiapimbo nobi nadatiamboquin nabanquin ambi tantiacpadomboen abi yacpadquidquio nuqui icmebanendac.

²¹ Adoac ma abi tantiaquidon ënenquiocquin Nuquin Papan Esuquidistubédtan naid chuibamppanuna. Ma aidon tsyuecquidontsen adembidi chuoapanuna. Ma nuquin tsyuecquidon tsyuecquidontsen adembidi

chuiopanuna. Ambi uaid utsitedi naimēdec, quenubi ma adomboembidi Nuquin Papan Esuquidistubēdtan naid matsesēn chuibanoapanuna. Ai, ma ēnenquiocquin adopanuna.

4

Abentsēc yacimboecquido Esuquidistu tantiaquido

¹ Nuquin Papan isadaidpembo Esuquidistu chuibeneta cac chuibenesho bedshun quēnēn nauedaid icquin naden mibi chiembique. Tantia. Esuquidistu tantiaquido aton shubun icquido yec icbo bēdamboec tabadacpadquiec tabadteneta.

² Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abēd onquequin abi icsaid ēmenuequin chuiban.

³ Nuquin Papan Mayanēn abi utsibēd bēdamboec tabadaid tantiamiacpadquiec Esuquidistu tantiaquid utsibobēd bēdamboec tabadteneta.

⁴ Esuquidistu tantiaquidtedi abentsēc yacimboecquid nec. Abentsēcquiobi mibitedi meniaid aton Mayan iquec. Adquiecbidi Nuquin Papa yacno nidash aidbēd tabadec abipadquid yec icsaisa iquendabi, quequin abuc indotequid mimbi caintequid abentsēcquiobi iquec.

⁵ Abentsēcquiobi mibitedishun con Icho caid iquec. Abentsēcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsēc yacimboecquid nec.

⁶ Abia yampid Nuquin Papa Esuquidistun Papambo abentsēcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bēdambo icmequid neoaic. Aidēmbi Esuquidistu tantiaquidobēd tabadnuequin abipadquid meniac nuquibēd aton Mayan iquendac.

⁷ Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac.

⁸ Ēndenquio chiampicpadembi nēbi pausumbanec. Naden ēnden chiampid neque. Tantia. Chuinu.

“Nuquin Papan abucquio indoac, Ēbi tantiaquidtedi ēbēdi tabadendac, quequin Esuquidistun bedbanshun buanācbimboecquido aido nec.

Nadquidquio iquendac, quequin ambi tantiacpadomboen pausumbanac,” quequin ēnden chiampid nec.

⁹ “Abucquio indoac,” quequin ħmitsipadomboen tantiampampiba? mibi quepec. Aidquio chuinu. Tantia. Esuquidistu abia yampid yec abucquio tabadboedi, Matses icsaid bedshunash ēbided cuidadnu, quianacsho nidaidēnshun chidon tishpanēdash.

¹⁰ Aid nidaidēnshun tishacsho unēs uacsho uincumequin Nuquin Papan aidquio abuc abi yacno indoshon abitedi chuiquidquio Esuquidistu icmepanēdash. Adquid icmiac ma ēbi tantiaquidobēd icpanueshun abipadquidquio aton Mayan aido menebanec.

¹¹ Aden aid menebanac aidēnquio Esuquidistu tantiaquido utsi-utsien nadquid icmēbanec: Esuquidistu chuibenequid utsi-utsien icmēbanquimbi, Nuquin Papan naden nanuna, quequin chiaid chuibanquid utsi-utsien icmēbanoaic. Adquid icmēbanquin utsi-utsien Esuquidistu chuibenequidon, Esuquidistu chuibanta, caidbidi aido icmēbanquin utsi-utsien abēd iccuededquido isbanquin chuiquin tantiamequid icmēbanoaic.

¹² Bēdamboec tabadtenequido ēbi tantiaquidtedi icmeta, cac aidēn tantiacpadomboen adquido icmēbanac

¹³ ma shubu dapan icquid dadpen yanec abentsëc yac bimboec abi tantiadonequido icpanuna. Aden Nuquin Papan mado tantiadonec ambi uesquin pausunaïdquio yec abipadquidquio iquec icsaisa iquendac.

¹⁴ Ambi pausunaïdquio icquin abimbo chiac bimboen utsibon chuisho tantiabanicquidën badedquio tantiacpaden tantienquio nuqui iquendac.

¹⁵ Tantiananec abimbo chuinanquido Esuquidistu tantiadonequido icmiac chuiquid Esuquidistupadquid yanash abëdi abentsëc yac bimboecquid nuqui yanendac.

¹⁶ Èbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abëdi abentsëc yac bimboecquid nuqui iquec. Esuquidistun pausunacpadomboen abentsëcshun-abentsëcshunquien nabanegui tantiananquiec abi tantiaquidtedi Esuquidistupadquidquio abëdi abentsëc yac bimboecquid yanendac.

Esuquidistun nua pausunacpadquiec tabadteniaïd

¹⁷ Esuquidistubëd abentsëc yac bimboecquid abi tantiaquidtedi iquendac, quiash, aidpadquid icnu, quec ënden icsamboec tabadnëdacadquiec tabadenda caimbi mibi. Esuquidistun ëbi chuibeneta caidquio icquin dada uaqun mibitedi aden chiembi. Esuquidistu tantiesan ambibi tantiacpadomboenuidi tantiec. Adecbidi ambibi tantiacpadomboen nabanec.

¹⁸ Pashuacimboen tantienquio iquec. Nuquin Papabëd tabadte iquec, utsibo qesho tantiesa yec, Tantiatiapibi, quepec aido.

¹⁹ Icsaquid nebi, quequin badedquio chienquio aidon iquec. Adquid icsamianquidën yuaïd yec, Icsanu, quiacpadec tabadec. Adeç icsasho utsin istemaïd nec.

²⁰ Adpenquio Esuquidistun tantiamequin pausunaïd iquec.

²¹ Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiahsun Esuquidistu chuibenequidon, Abëd icquid yec abipadquid yanebi quec adquiecbidi tabadteneta, quequin mibi chuipondash.

²² Adoac mimbi tantianëdacadec tabadoainda. Mibi ënden icsamboec tabadacadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac.

²³ Mibi icsate bunaid ënta.

²⁴ Adsho isun ma Esuquidistun tantiacpadomboen tantiapanu qeshun Nuquin Papan Mayanën mibi nua pausunendac. Adoac adomboembidi mimbi tantiapec. Adecbidi aid bunacadquiec bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac.

²⁵ Adquid icnuec Esuquidistun shubun icquido nebi, quec muainquio yec Esuquidistu tantiaquid utsibobëd abimbo chuinanquidombo icta.

²⁶ Nëishec icsaina. Nëishash abi ushëmbi bëdanta.

²⁷ Satanasën yuanushe quiash badedquio bëdanta.

²⁸ Ampequid ichoedi Esuquidistu tantiaquid yanshun ampenda. Adquid ichoedi chonoadquïn mitsana bedshun utsin na nibëdsho isun menequid icta.

²⁹ Icsaquid onquiac bimboec onquenda. Utsi tantiaquin bëdambocquid icmenuequin chieç onqueta ma Nuquin Papan aidtsen bëdambo icmepanu quiash.

³⁰ Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquio yampec. Aid unësquio icmenda.

³¹ Utsi icsamboen chuinu, quequin tantiaid ënta. Adecbidi comapenec nëishash bédanta. Utsi cuestiadquio yec nëishboedi adecbidi bédanta. Nëishash chushqueboedi adecbidi bédanta. Utsi icsamboen tantiaquin chuiboedi adecbidi bédanta. Utsi icsamboen tantiaid adembidi ënoata.

³² Adembidi bédambo icmenuequin utsi bédamboen tantiaquin nabanta. Adecbidi utsin chieshënquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacpadquiec utsi icsaid bëpiscudoata.

5

¹ Nuquin Papan bacuëbo yec

² tantiananec tabadteneta. Nuquin Papan chiampicpadquiec Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquio icsho isun Nuquin Papan bédamboen isaidquio Esuquidistu icpanëdash.

³ Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Èbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda.

⁴ Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bédamboec onquequid utsi uain chuiquin mamënshunesambo icta.

⁵ Chudtemaid chudnu, quequinuidi chudquid yec opabimboeuidi tabadquid Nuquin Papa yacno Esuquidistun shubun icquid ictiapimbo iquiec. Adecbidi, Bednu, quequinuidi bedquid yec Nuquin Papa yacno Esuquidistun shubun icquid ictiapimbo iquiec. Aden nabanquid Nuquin Papabëd Esuquidistu con icbo nec, quetiapimbo icoaic.

⁶ Ambembi chiec onquiaid tantiesa icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac.

⁷ Adquidbëd icsainda.

⁸ Ènden Esuquidistu tantiesa icquin inchëshquiocnoc isacimboen tantienquio icboedi nëbi Esuquidistu tantiaquid mibitedi yansho ambi tantiamebaniaido icquin badiadnuc isucunacimboen tantiaquiota. Aden tantiec Nuquin Papan bacuëbo yec Nuquin Papan tantiamiacpadquiec bédamboec tabadteneta.

⁹ Esuquidistun ambi tantiacpadomboen pausunac abi yacpadquiec nuqui bédamboec tabadtenendac. Adembidi aid yacpadomboen abimbo chuidenequid icta.

¹⁰ Nadec tabadshodabi Nuquin Papan bédamboen istsiashe? Tanu, quequin adomboen nabanec tabadteneta.

¹¹ Utsibëd icsainda. Utsi icsadenenubi mibi bédamboec tabadtenesho isun abi icsaid utsin ëmpec.

¹² Icsaquidën ompoquin naid chuitemaid nec.

¹³ Adquidën Esuquidistu tantiaquid bédamboec tabadtenesho isun, Icsambocquid nebi, qeshun Esuquidistu tantiabempec.

¹⁴ Bédamboec tabadquin ismedeniac icsambochoedëmbi bédamboen tantiabentsiash. Esuquidistu tantiaquido chuiquin dada uaid nad iqueque. Tántia. Chuinu.

“Unësaçimboen tantienquiocboedi isucunshun tantiabnacimboec bédamboec tabadta.

Adquid icsho Esuquidistun mibi nua pausunendac.”

15 Adec bēdamboec tabadnuec Esuquidistun tantiamiacmaid tabadacpader tabadenquo yec Esuquidistun tantiamiacpadquieci tabadteneta.

16 Icsaquid dadpen iqueque. Aidpadquid iquenda. Esuquidistun pausunaid mibitedi bēdamboec tabadtenesho isec ma Esuquidistu tantiesa icboedi abi tantiaquid yampanuna.

17 Mimbi icsamboen tantiacpaden nabanenda. ¿Atotsi mimbi ēbi namepat-sia? quequin Nuquin Papa chui. Aden abi chuisho Nuquin Papan mibi tantiamiacpaden adobanta.

18 Icsachitomane quequin nua paēmboquid aquenda. Aden aquec icsaindac. Icsate bunenquioquon Nuquin Papan Mayanēn tantiamiacpadomboen nua pausunaid icquin bēdamboen nabanta.

19 Adec icsate bunenquioquon Esuquidistu tantiaquid utsibobēdan Nuquin Papan chiaid chuiquinc, chuiquid dapa Dabidēn dada uampid sadmo caid utsi-utsien chuiquinc, cuēdēnte utsi chuiquinc cain chiec cuēdēnteneta. Adec cuēdēnquin Nuquin Icbon naid chuideneta.

20 Esuquidistu tantiaquid icsho Edoenēn Nuquin Papan bēdambo icmi-aidtedi yec aidēn naid chiec onquedeneta.

Utsi tantiaquin nashunta quiaid

21 Esuquidistu con icbo nec, quequin ambi chiaid niacmane queshun utsi tantiaquin nashunta.

22 Adembidi Esuquidistun chiapadomboen dadan inaidēn min bēnēn chiapadomboen nabanta.

23 Adembidi abi tantiaquidtedi chuiquidquo Esuquidistu nec. Abi yacno indoshon ēnēdenquo yec icsainquiocnoc tabadmendac. Adembidi aton chido chuiquidbidi aton bēnē nec.

24 Esuquidistun chiapadomboen abi tantiaquidon nabanacpadomboen aton bēnēn chiaid naquidquo aton chido neoai.

25 Esuquidistu abuc tabadboedi abi abuc bēdamboec tabadtequid tantienquo yec unēs uanushe quenquo yec matses tantiec nidaidēnshun tishaid yec matses icsaid bedshunash abided ciudadec unēsapanēdash. Abuc ēbēdi abentsēc yacimboecnuc tabadmenu, quec unēsapanēdash.

26 Adecbidi, Ēbi tantiaquido icsaisa icmenu, quiaish abided ciudadec unēsapanēdash.

27 Adecbidi, icsaid nibēdquid bēdaidquo abi tantiaquido icmeshun Nuquin Papa yacno yuedshun, Ēmbi yuedboed min shubun ictequid nendac, quequin ismembidi, quec Esus unēsapanēdash.

28 Adomboembidi chido inquidēn abibi tantiadacpadomboen ma con chido tantiaquin, Bēdamboquid icmenu, quequin nashundeniash ma aidbēdi bēdamboquid icsho Nuquin Papa yacno Esuquidistun yuedpanuna. Aton chido tantiaquid abibi tantiaquidbidi nec. Aidbēdi abentsēc yacimboecquid neoai.

29 Abibi chieshēmēdesa dada nec. Bunquioquin peshun aquec. Adembidi iquenquin cuēte cuēc. Esuquidistun abi tantiaquido abēd icquido icsho aido tantiaquin nabanacimbioen

30 dadan abēd icquid aton chido icsho aidi tantiaquin nashunquid. Dadaba uashun aidēn shictodobi chicshun chido uapampic. Adoshon dadan nami aton canitebēda chido uashun daēd uac abentsēc yacimboec aid daēdi yanac.

31 Nuquin Papan ēnden dada uampid nad iqueque. Tantia. Chuinu. “Aidbēd icnu, queshun bedash aton papa aton titabēda nianacimboec daēdash aton chidobēdi abentsēc yacimboec tabadtenec.”

³² Adec dada aton chidobēd daēdash abentsēc yacimboecnuc ambi icmi-ampicpadec Esuquidistu tantiaquido aton shubun icquido abentsēc yacimboec tabadendac, quequin chiec.

³³ Nēbi adomboebidi chido inquid ambi inaidbēdta chuioaimbique. Tantiata. Mibibi tantiadacpadomboen min chido bēdamboen tantiata dadan. Con bēnē ēbi chuiquid nec, quequin aidēn chiaid tantiata chidon.

6

Bacuēbobēdta bacuēchoquid tantiamequin chuibanaid

¹ Bacuēbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboebidi chieshenquiocquin nabanoata. Aidon, Nata, quequin chiaid cacuidenquiocquin nata.

² Nuquin Papan, Naden nata, quequin ambi chiaid cuēnoten dada uaid Moises meniampid abentsēc nad iqueque. Tantiata. Chuinu: “Ēbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboebidi nabanoata,” quequin Nuquin Papan chiampid nec. Aden naquid cuidte nad iquec, quepampic:

³ “Amēn anibēdtan chiacpadomboen naquid Nuquin Papan bēdambo iquebi camiaidquio iquendac. Adecbidi nidaidēn yuec tabadnuequin adobanta,” quepampic.

⁴ Amēn anibēdtan con bacuēbo chieshmemane queshun bēdamboen chuiquin tantiamequin isme. Adembidi, aido pemeshun acme. Adembidi, Ēmbi chiacpadomboen ma nabampanueshun Nuquin Icbon chiaid tantiamenu, quequin adobanta.

Utsin yuaido yuaquidobidi tantiamequin chuibanaid

⁵ Yuan mimbi Esuquidistun chiacpadomboen nabanacpadomboebidi mibi yuaquidēn chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidēn chiacpadomboen nabanta.

⁶ Min icbon chuishun isnuc ambi chiacpadomboen bēdamboen mimbi nabanacpadomboebidi min icbon isenquiocnoc nabanoata. Esuquidistu con Icho nec, quequin aidēn chiacpadomboen nanuna, quequin nidaidēnshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac.

⁷ Min Icho Esuquidistun aton Papan chiacpadomboen chieshenquiocquin nacpadomboen nidaidēnshun min icbon chiacpadomboen chieshenquiocquin nabanta.

⁸ Bēdamboen nabanquido yuacmaidbēdta yuabo Nuquin Papan bēdamboen cuidquin menendac, quequin tantiaquin bēdamboen nabanta.

⁹ Yuaquidon min yuabo chieshēnenquiocquin bēdamboen chuibanta. Mibi cuesnu, quenquiocquin ancata. Min Icho abucquio tabadquid min yuabon Icbobidi nec. Aidēn abidedi isec: Nēidic yua icsho daēdpactsēc pausunembi. Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

Satanas cuemetequid dasiuidaid

¹⁰ Nuquin Icho nadatiambocquin nabanquid iquec, quiash aidēnquio nua pausunaid icta.

¹¹ Satanacacumetequid dasiuiu, quiash, Nuquin Papa mibi nua pausunuesho, Ai, cata Satanasēn mua uaquin bedchitoshe queshun.

¹² Matses isadacpadpenquo nami intachëd isadesa Satanasbëd icquido nec. Aidtedi Nuquin Papan abi tabadaid tëdion tabadmec. Aido icsamianquido nec. Matses yuanuequid Satanas nec. Nuquin Papan uaid tantiaish bëdambo mibi iquendac, quequin muaquin aidon chiec.

¹³ Aden muaquin chuiquid aidtedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushë chonoc Satanas mibi icsamenuec choacsho bëcuniacimboen cacumec abi mibi nidtoash Esuquidistu tantiaquid yec nidendac.

¹⁴ Aid cacumec abi nidquid icnuec Nuquin Papan abimbo chiaidquio nacrëshëdachimboec tabadteneta. Adembidi, Nuquin Papan abi bëdamboec tabadtequid shictoncachimboec tabadteneoata. Adëc tabadec abi nidtoash mibi nidendac.

¹⁵ Adecbidi, Esuquidistu tantiaquid ëbëd icquid iquendac, quequin Nuquin Papan tantiamequin pausunaidën tapucudachimboen adomboembidi chuibenequin Satanas cacumec nidachimboec abi mibi nidendac.

¹⁶ Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidënquio dëcatëmënquiash abi mibi nidendac. Aden Nuquin Papan tantiamequin pausunaidënquio dëcatëmënquiash Satanasën abi tantiamenequin pian sedo-sedoachimboen pausuntemaid yec abi mibi nidendac.

¹⁷ Adecbidi, Esuquidistu tantiaquid ëmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiaachimboec tantiec tabadteneta. Aden pausunac tabadquin Satanas, Esuquidistu mibi bedec choenquo iquendac, qesho cacumiash abi nidquin mimbi ënenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimbocquid Nuquin Papan chiaid nec. Ambi chiaid aton Mayanën tantiamiaidquio icquin mimbi chuisho tantiaish Satanas cuenendac.

¹⁸ Adecbidi, Nuquin Papan chiaid aton Mayanën tantiamiaid icquin ut-sibo tantiaquin baded-badedquiec Nuquin Papa chiec onqueta. Safanasën icsamenushe quiaish Esuquidistu tantiaquid utsibo Nuquin Papa chiec onquedeneta.

¹⁹ Èbitsen tantiaquin Nuquin Papa chuioata. Dacuëdenquiocquin Nuquin Papan tantiamiacpadomboen Esuquidistu abi yacno yuedanquidquio nec, quequin Pabado chuime, Papa, quequin èbitsen chuioa.

²⁰ Esuquidistun chuibeneta caid icquin abi chuibenesho mëtaneshun quënëd nauedaid nebi. Adoaid ëbi icnuc mimbi tantiacpaden chuibanquid Pabado icme, Papa, quequin chuioata.

Ënquin chiaid

²¹ Nëbi ëbëd icquid chiembique. Tantia. Tiquico mibi yacno nidec. Aidbidi Esuquidistu tantiaquid icsho nuqui con utsi caid nec. Nuquin Icbon chuimiaidquio aidi nec.

²² Mibi yacno puduedshun ëmbi naidtedi ëbi tabadaidbëdta mibi chuibanendac. Èbi mimbi chuisho tantiaish, Bëdambo iquebi, quependac Epeso yacnocquido, quequin Tiquico mibi yacno nidmembi.

²³ Mibëd icquido Esuquidistu tantiaquid utsibobëd ma bëdamboec tabadpanuna caimbi mibitedi. Esuquidistun Nuquin Papabëdtan abi tantiamiantequidbëdta utsi tantiatequid pausunaid ma icpanuna caimbi mibitedi.

²⁴ Ènenquiocquin Nuquin Icho tantiaquidtedi ma abipadquid icpanuna.

PIDIPOS YACNOCQUIDON ISTE

Pabadon tauamboen chiaid

¹ Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi.

² —Con Icbo Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

Pabadon Nuquin Papa chianiaid

³ Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi.

⁴ Aden mibi tantiaquin Nuquin Papa chiec bëdambo yec cuishonquebi.

⁵ Ènden ëmbi chuibanac Esus tantiabənquin mimbi ëbi piucquid meniondac. —Esusën naid ma Pabadon matses utsibotsen chuibanu —queshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi.

⁶ Nuquin Papan tantiamiac mimbi Esus tantiabənondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmenuen Nuquin Papan adembidi mibi bëdamboen tabadmendac. Adembidi mibi tantiec cuishonquebi.

⁷ —Èbëd tantiananquidombo nec —quiash adebi. Esus chuibenesho quënën nauedondashí. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuideniondambi. Aden chiac puduemenquo icquin abi quënën tsadunebi. Adquid icsho chieshënenquo icquin mimbi ëbi bëdamboen tantiec. Nuquin Papan ëbi icmiacpadquid chieshtoenquo icquid icquin mimbi ëbi adoec. Adsho mibitsen tantiembi.

⁸ Esusën matses tantiacpadomboen mibi tantiac unësquo iquec. Mibi istiadquo iquebi. Èbi adsho tantiash Nuquin Papatsen: —Abimbo caic —quendac.

⁹ Aden mibi tantiaquin Nuquin Papa chianembi. —Aido bëdiactsëc tantianansho comapenen tantianamequo, Papa. Adembidi mibimbo tantiamequinc Esus tantiamequinc mimbi chiaid tantiamequinc cata.

¹⁰ Aden tantiamiac: “Nadec tabadec bëdambo ictsiabi. Adec tabadenquo yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenquo icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac.

¹¹ Adec con Icbo Esus tantiec bëdamboec tabadsho isun: “Bëdamboen tabadmec Nuquin Papa bëdambo iquec,” quetsiash utsibo, Papa —quequin Nuquin Papa chianembi mibi tantiaquin.

Utsibon Esus chuibeniaid

¹² Quënën nauedac ëmbi Esus chuibenetiapimbo icnubi utsibon chuibeniac utsin-utsinquien Esus tantiabənac caosh.

¹³ Nëshun shubu dadpen icquid Doma yacnoshon: —Quënën nauedaid cuenushe —quequin ëbi isquido sondadon: —Esusën naid chuibansho Pabado quënën nauedac —quequin tantiec. Aidon chiac nëmbo icquido utsitedishun adembidi tantiec.

14 Quēnēn nauedaqui dacuēdenquo iquebi. Ēbi adquo icnuc: —Pabadon nacpadomboen dacuēdenquo icquin Esusēn naid chuibanembi —quepac caosh Esus tantiaquido dadpen. Adshun dacuēdboedombi dacuēdenquo yanquin Nuquin Papan chiaidquo chuibeniac caosh.

15-16 Aidon ēbi bēdamboen tantiaquin Esusēn naid chuibenec. —Pabado tantiembi. Esusēn naid chuibenesho bedshun quēnēn nauedac aidēn natiapimbo icnuc ěmbiquien nanu —quequin ēbi bēdamboen tantiaquin Esusēn naid chuibeniac caosh. Utsibombien ēbi chieshēnquimbi Esusēn naid chuibeniac caosh. —Quēnēn tsadunac ma Pabado mēyadbudchitono.

17 Aidēn chuibantiapimbo icnuc ěmbiquien nanu. Aden ěmbentsēqui chuibanac dadpeshun tantiashun: “Mibi bēdambo iquec,” ēbi catsiash —quequin Esusquo tantienquo icquimbi Esusēn naid chuibenec.

18 —Ēbi chieshēnec —ĵquiashtabi nēishpe? Padenquo. —Ēbi chieshēnquidon ēbi bēdamboen tantiaquidobēdtambi Esusēn naid chuibanac matses utsibo utsi-utsiec Esus tantiaquido yanec —quiashtabi bēdambo yec cuishonquebi. Adecbidi cuishonquebi:

19 —Pidipos yacnocquidon Nuquin Papa ēbi chianiac caosh —quiashtabi. —Mēyadsho Pabado chieshtomenda, Papa. Abi quēnēn nauedquidon puduemequin nidmeta, Papa —quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenquo iquendabi. Adembidi aidēn nac quēnēn tsadenquo iquendabi.

20 Ēmbi naondacpadomboen dacuēdenquo icquin Esusēn naid chuibantiadquo iquebi. Chieshtotiapimbo iquebi. —Ma utsibon: “Esuquidistu bēdambo iquec,” canu —quiashtabi aduidequi iquebi unēsabi yec. Utsin: —Cuesunechitono —caqui adecbidi chieshtoenquo ictsiabi.

21 Unēsabi Esuquidistu tantiec bēdambo iquebi. Unēsash Esusbēd tabadequic bēdambošhē ictsiabi.

22 ĵMitsipadtebi bumpeba? ĵUnēstedabi bumpeba? ĵUnēsenuico yec tsadtedabi bumpe? Unēsabi icquin ěmbi Esusēn naid chuibanac utsibon Esus tantiabentsiash.

23 Nuquin Papa yacno nidash Esus isec bēdambošhē ictsiabi. Esus iste bunquebi.

24 Aden tantiequi: —Unēsabi yec Pidipos yacnocquido Esus tantiaquido Esus bēdamboen tantiamec ano nidtsiabi —quequin tantiec unēstiapimbo icoalbi.

25 Unēsabi yec mibi yacno nidoatsiabi. Aden tantiec: —Nuquin Papan nēbi ēbi unēs uamenquo iquec —queoalbi. Mibēd tabadquin Esusēn naid bēdamboen chuibantsiambi. Adoac bēdiactšec Esus tantiactšecboedombi Esus tantiaquiec mibi bēdambo ictsiac.

26 Ēbi choacsho isash: —Pabado padpidec chomequid Esus bēdambošhē iquec —mibi quetsiac. Adec mibi cuishonquetsiac.

Chieshtoenda, quequin Pabadon chiaid

27 Ēbi ano nidtiapimbo icnuc Esusēn chiacpadec chieshtoenquo yec bēdamboec tabadta. Quēnēn ēbi nauedboedēn puduemiac mibi yacno nidshun mibi bēdamboec tabadsho isash: —Pidipos yacnocquidon ěmbi chiacpaden naic —quetsiandabi. Nēbi mibi yacno nidtiapimbo iquebi. Adnuc mibi istanquidon: —Chieshtoenquo icquin Esus tantiec cuēshēdenquo yec Pidipos yacnocquido bēdamboec tabadosh.

28 Esus chieshēnquidon: “Esusēn naid chienda. Cueschitomane,” caqui dacuēdenquo icquin Esusēn naid adembi chuibanosh —quequin mimbi naid chuisho tantiash bēdambo ictsiabi. Adec cuesambo yec nuqui: —Nuquin Papan icmiacpadec dacuēdenquo iquebi. Ēbi dacuēdenquo icmequidēn ambi

chiacpadomboen ëbi chieshënquido unësacsho icsambo icquido cuidacno nidmendac. Ambi chiacpadec Esus tantiaquid yec unësashini Nuquin Papa yacno tabadendac —quequin nuqui tantiatsiac.

²⁹ —Con Mado Esus tantiasho utsibon chieshëntsiandac —quequin Nuquin Papan tantiacpadomboen utsibon mibi chieshëndac.

³⁰ Ëbi nacpadomboen mibi chieshënoaic. Mimbi isnuc ëbi chieshënondash. Adembidi ëbi chieshënoaic nëbi. Nëid dada uaid isquin: —Pabado padpiden chieshënoac —quequin mimbi tantiendac.

2

Utsi tantiec tabadta, quiaid

¹ Tantia, con utsibo. Mibitedi chuinu. ¿Mitsipadquio Esus tantiaquido icpec? Esuquidistu tantiaquiec dayacquo yacimboec iquiec. Adecbidi Esusën tantiaido yec bëdambo icquido nec. Adecbidi Nuquin Papan aton Mayan abëd icmequin bëdamboec tabadquid icmiaidobidi nendac. Adoaido matses tantiaquidombo nec.

² —Adquidbidi nebi —quec adquiecbidi bëdamboec tantianancuedeta. Ëbi cuishoncamenuc adta. Abitedi: —Esusën chiacpadomboen nanuna —quecuededec chieshënanenquo yec bëdamboec tabadta.

³ Nadec onquec tabadenda. —Ëbiuidtsëqui bëdamboshë iquiec. Con nauidtsëqui nanu. Con nauidtsëqui bednu —quec mibiuidtsëqui tantiadec tabadenda. —Ëbi bëdapabi icnuc utsibo bëdamboshë iquiec. Aido nashunti- adquio iquebi —quec bëdamboec tabadta.

⁴ Mimbi tantiacpadomboenuidi nainquo icquin utsin tantiacpadom- boentsen nata. Mitsanauidi tantienquo icquin utsibo nashuntetsen tanti- ata.

⁵ Esuquidistun nacpadomboen naic mibi bëdamboshë ictsiac. Aidën chiesh- toenquo icquin Nuquin Papan chiacpadomboenuidi napanëdash.

⁶ Aton Papa Nuquin Papapadquidquio yec Esus abitedishun Icbombo napanëdash.

Aton Papabëd yec bëdamboshë icboedi: —Padi icnuna. Nuquibi namec bëdambo iquebi —quenquo yec Nuquin Papan chiacpadomboen naic auëshquo chopanëdash.

⁷ Adec aton Papan yuabimboecquid yanash ambi chiacpadec matses- panëdash chidon tishac.

⁸ Adashic matses yec aton Papan chiacpadequi abided ciudadec unëspac caondash.

Matses icsamboshë icquido cuidacimboen cuesten dectanquin icsaisam- bobi Esus unës uapac caondash.

⁹ Aden ambi chiacpadomboenuidi Esusën nasho isun Nuquin Papan uin- cuemeshun abi yacno chomeoashun abëdi Esus tabadmepanëdash.

Aden abitedishun Icbombo icmeoapanëdash.

¹⁰⁻¹¹ —“Nuquin Icbombo Esuquidistu bëdamboshë iquiec,” ma abitedi quenu —qeshun aden Nuquin Papan abitedishun Icbombo Esus icmeoa- panëdash.

—Ëmbi ëbi yacnoshon uaido mayan bëdabo yec nidaidën tabadquido matses yec unësacsho uincuemiaido yec quequido: “Nuquin Icho Esuquidistu bëdamboshë iquiec. Abi abitedishun Icho icmeoaquid Nuquin Papatsen bëdamboshë iquiec,” ma quenu —qeshun adopanëdash.

Utsibo Esus tantiamete chiaid

12 Mibi tantiaquembique. Tantia, con utsibo. Mibitedi chuinu. Esusën nacpadomboen mimbitsen bēdamboen nata. Ēbi mibēd icnuc mimbi nade-niondacadomboen ēbi nibēdnuc adembidi bēdamboen nata. —Nuquin Papa dacuēdampambo icquidēn chiaid niacmane —quiash ambi chiacpadomboen naic aibēdi tabadnush bēdamboec tabadta.

13 —Ma bēdamboec tabadnu —quequin Nuquin Papan ambi chiacpadec tabadte bumequin nuqui bēdamboen tabadmeque. Bēdamboec tabadta.

14 Adec bēdamboec tabadec chushcananenda. Adecbidi: —Bēdamboen nana —cac chieshec tabadenda.

15 —Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bēdamboec tabad. Matses dadpenquo icsamboshē icnubi adequi bēdamboec tabad. Adec bēdamboec tabadquin icsambo icquido mimbi Esus bēdamboen tantiametsiac paposhquiacimboecnuc.

16 Mimbi adoac utsin: —Esus tantiasho Nuquin Papan ēbi bēdamboen isec. Nēbi bēdambo yanec unēsashini aibēd tabadendac —quequin tantiatsiash. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidēn padpidec chote ushēn bēdambo ictsiabi. —Ēmbi chuibanondaido Pidipos yacnocquido ambi Esus tantiamiaidobēd choeque. Is —quec bēdambo ictsiabi.

17 —“Bēdambo mibi iquec,” Nuquin Papan mabi canu —queshun Esus tantiaquin mimbi bēdamboen nac. Utsibo nashunquin Esusën naid chieshtoenquo icquin mimbi chuibanac. Mimbi adoaid chuisho tantiashun: —Mibi unēs uanu —caquini bēdambo ictsiac. —Aido bēdambo iquec —queshun mibi tantiec bēdambo yec cuishonquetsiabi.

18 Ēbi unēs uaid chuisho tantiash adecbidi bēdambo icta. —Esus tantiec chieshtotiapimbo icsho Pabado unēs uac —quiash bēdambo icta.

Pabadon Timoteyo chiaid

19 Con madobimboecquid ēbēd icquid Timoteyo mibi yacno nidmetsiambi. —¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bēdambo ictsiabi.

20 Timoteyopadquid utsi nibēdec. Aid abentsēcshumbi ēmbi nacpadomboen mibi tantiaquiec.

21 Utsibombien aton nauidsēqui tantiaquin Esuquidistun chiacpadomboen natiapimbo iquec.

22 —Timoteyon bēdamboen naondash —quequin mimbi tantiec. Mimbi tantianubi ēbēdtan Esusën naid chuibanondash con mado icbobimboecquin. Aid bēdambo iquec.

23 Adquid icsho mibi yacno: —Istan —catiadquio iquebi. Ēbi quēnēn nauedquido ēbi caic: —Unēs uanu —quesho tantiabono. Tantiashun: —Ēbi quēnēn nauedquidon chiaid Pidipos yacnocquido chuitan, Timoteyo —catsiandambi.

24 Ēbitsen nēbi mibi yacno nidtiadquio iquebi. Ēbi caic Nuquin Icbo: —Ma nidnu —quenuc anobi nidtsiabi.

Epapadodito chiaid

25 Epapadodito con buchibimboecquid mimbi: —Pabado nashuntan —cac Pidipos yacnuēsh chonēdaid nēmo iquec. Utsibon chieshēnubi dacuēdenquo icquin ēbēdtan Esusën naid chuibanondash. Adondaiddi nēbi: —Mibi iccondacno tabadec nid, buchi —caombi.

²⁶ Aid mibi tantiec unësquio yec tsadposh. —Ëbi unëstsemboed con matses chuinuec Pidipos yacno nidaccosh —quiash mibi ismete bunquieci shubiantiadtsëcquio tsadposh. Adsho isun: —Min shubuno nidec nid —caombi.

²⁷ Adec unëstsenquiondash. Adshobien Nuquin Papan bédamboen isquin bédamepondash. Èbitsen bédambo icmenuen Nuquin Papan adopondash. Epapadodito unësquio icnuc èbi shubieci tsadsho isash: —Aid unësan unësquio icnuc Pabado mëyadnushe —qeshun Nuquin Papan Epapadodito bédamepondash.

²⁸ Adoacsho mibi yacno aid badedquio nidmetiadquio iquebi. Aidbèd iquec mibi bédambo ictsiaci. Mibi yacno nidsho isash èbitsen bédambo ictsiabi.

²⁹ Epapadodito nidacsho bédamboen ista cuishonquequin. —Nuquin Icbon mibi bédamiaci. Aid bédambo iquec. Mibitsen bédambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bédamboen ista.

³⁰ Esuquidistun chiapadomboen naic èbèdi tabadec Epapadodito chondash. Chieshëmëncquido dadpen icnubi èbi nashunec tabadec daicsabudash unëstsenondash. Chotiapimbo icquin mimbi: —Pabado nashuntan —cac choash nibèdantsenondashe. Mibi yacno nidacsho bédamboen ista.

3

Esuidtsëqui tantiasho Nuquin Papan bédamboen isaid

¹ Nuquin Icho Esus tantiec cuishonquenuna. Aduidequi icac bédambo ictsiash. Tantia, con utsibo. —Tantienquio yanushe —quequin èmbi chiondaid dada uaquin padpiden mibi chuiouanu.

² Muaquidon chuisho tantienda. Aidon: —Shui dèbid dèteshun secaiduidi Nuquin Papan bédamboen istsiash —quequin chuisho tantienda. Aden chieci icsa uanquidombo neque. Uimanëmëncquidoen nechitec.

³ —Shui dèbid dèteshun secaid nec —qeshunda Nuquin Papan nuqui bédamboen ispec? Padenguio. Aidon Esus tantienquio icsho bédamboen isenguio icquin aton Mado Esus tantiaquidoen Nuquin Papan bédamboen isec. Aton Mayanën tantiamiaci: —Nuquin Icho Esuquidistu bédamboshë iquec. Abided cuidadec unësaid tantiasho Nuquin Papan nuqui bédamboen isec. Èmbembi naquin Nuquin Papa bédamboen ismetiapimbo iquebi —quequin nuqui tantiec.

⁴ Matsesën tsusedpan chiaiduidi tantiasho Nuquin Papan bédamboen iste icnuc nadtsiabi. —Tsusedpan chiaid utsibon daèdpactsëc nanuc èmbimbo naquin dadpenquio nabanombi. Aden èmbimbo dadpenquio nasho Nuquin Papan èbi bédamboen isec. Adembidi isadaidbombo icsho èbi bédamboen isoaci —quetsiabi. Nèbi adtiapimbo iquebi.

⁵ Isadaidbo nebi. Isadaidbon chidon tishacsho sietetedec ushun Moisesën chiampicpadomboen shui dèbid dèteshunenèdaidquio nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidën onqueten onquequid nebi. Moisesën chiampid namequidquio padiseyobo caid niondabi.

⁶ Adquid icquin icsambo icquido danquin Esus tantiaquido cuesun secatiadquio iccondabi. Nuquin Papan chiapadomboen natiadquio iquequi adondabi. Moisesën chiampiduidi nate bunquiondabi.

⁷ Adquid icquin Esus tantiabi: —Èmbimbo naic bédamboshë iquebi —quequin icsamboen tantiapondambi. Adondaiddi Esus tantiabenash: —Èmbimbo naiquini icsambo iccoc.

⁸ Nēbi con Icbombo Esuquidistu tantiec bēdambo iquebi —quequin tantiabonondambi. Aiduidtsēqui tantiatiadquio icquin icsa secacimboben ěmbimbo naid ěnonondambi.

⁹ Esus tantiate bunquiebi. Adquid yec: —Moisesēn chiampicpadomboen ěmbimbo naiquini bēdambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bēdamboen isquin ěbi bēdamboen tabadmec —quequin tantiabonondambi.

¹⁰ Aden tantiabenshun Esusuidtsēqui comapenen tantiatiadquio iquebi. —Comapenen tantiaquin Nuquin Papan uincuemiaid icquin Esusēn bēdamboen tabadmetsiashi —quec Esus tantiate bunquiebi. —Nuquin Papan chiacpadomboenuidi nasho mēyanac Esus unēsac caondash. Adembidi Nuquin Papan namiacpadomboen nasho mēyanac chieshtotiapimbo ictsiabi.

¹¹ Unēsambo icsho Esusēn bēdamboen tabadmetsiashi. Unēsacsho Nuquin Papan uincuemetsiashi —quec adec Esus tantiate bunquiebi.

Nuquin Papan chiacpadomboenuidi nate bunaid

¹² Tanta, con utsibo. Mibitedi chuinu. —Nuquin Papan chiaid ni-aquesambo nebi —¿quectabi ique? Padenquio. Adquio ictiadquidi adquio yenquiēni icchitec. —Bēdamboshē icmenuen Esuquidistun yuapondashi —quequin tantiec bēdamboshē icte bunquiebi.

¹³ Adec bēdambo yanabi yec: —Ěmbi naboed naic bēdamboshē iquebi —quenquio icquin Esusquio tantiaquin ambi chiacpadomboen natiadquio iquebi.

¹⁴ —Bednu —quequin bedteuidtsēqui tantiec titinquiacimboben Esusquio tantiaquieci ambi chiacpadquieci bēdambo ictiadquio iquebi. —Adec tabadec unēsacsho Nuquin Papan abi yacno ěbi tabadmec —quec bēdambo icte bunquiebi.

¹⁵ Nuquin Papan chiacpadomboen natiadquio icquin ěmbi chuibocpadomboen mimbi tantiatiasic. Utsien: —Padi. Pabadon chiaid abitedi nainquio icquin abentse-abentsen naindambi —quesho Nuquin Papan ambi tantiaid bēdamboen tantiametsiash.

¹⁶ Nēbi nuqui icbocpadquieci tantiananquieci bēdamboeci tabadnuna.

¹⁷ Ěbi yacpadquieci bēdamboeci tabadta. Ěmbi chiacpadomboen utsibon nasho isun adomboembidi bēdamboen nata.

¹⁸ Ěmbi chuideniondacadomboen mibi padpiden chiēmbi shubiquimbi. Mibi yacno utsi-utsiēc icsamboeci tabadpec. —Abided cuidadec cūstēn dec-tamēdaid Esus tantiaquid nebi —quetsēcboedi icsamboeci tabadec. Adquido Esus tantiaquidpenquio nec.

¹⁹ Peteuidtsēqui tantiec icsambo yequi: —Bēdambo iquebi —quec tabadec. Nuquin Papa tantienquio icquin nidaidēn icquiduidtsēqui tantiec. Unēsash Nuquin Papa yacno nidtiapimbo yec icsambo icquido cuidacno nidendac.

²⁰ Padnuen Nuquin Papan bēdamboen isaído yec aidbēd tabadtequido nuqui nec. Abi yacno buanuec abucūēsh Nuquin Icho Esuquidistu chosho isnuec nuqui tabadec.

²¹ Choshon aidēmbi nuquin dada chuca uaindac aton dada chuca uacpadomboen. Adoac unēstiapimbo icquiduidquio nuqui iquendac. Abitedishun Icbombo icquin ambi chiacpadomboen abitedi namequidquio icquin aden nuquin dada chuca uaindac.

1 Ĕmbi aden chuisho tantiash Nuquin Icbon chiaid niaquenquo yec bēdamboec tabadta. Mibi tantiacquin mibi istiadquo iquebi. Mibi caic: —Ĕmbi chuibanondaido Esus tantiabenash bēdambo ictiadquo iccondash —quec bēdambo iquebique. Adquieci chieshtoenquo icquin Esus tantiec bēdamboec tabadta.

2 Tantia. Nēbi chido daēd Ebodia caid Sintique caidbēdtatsen chuinu. Amicananenda. Esus tantiacquido yec: —Ai, Nuquin Icho Esusēn tantiacpadombombien natiad —quec tabadta.

3 Tantia, buchi. Ĕbēdtan Esus chuibanondaid icsho mibitsen chuinu. Aid chido daēd chuiquin: —Bēdamboec isnanta —cata. Utsibon chieshēnubi ēbēdtan aid daēdshun Esusēn naid chuibeniondashe. Adembidi Quedemente caidētsen ēbēdtan chuibanondash. Adembidi utsibontsen. Adquidotedi Nuquin Papan: —Esusbēdta ēbi tantiacquido mibi neque. Ĕbēd tabadec cho —caīndac.

4 —Nuquin Icho Esus tantiacquieci bēdambo yec cuishonquenuna —caimbi. Esus tantiacquieci cuishonquenuna.

5 —Ma utsibo: “Esus tantiacquido chieshēmēnenquo yec bēdambo iquec,” ma quenu —quiash bēdamboec tabadnuna. Nēbi Nuquin Icho Esus choeque.

6 Adecbidi chishpiqueci tabadenda. —Ātotsimbi napeba? Ātotsimbi pepeba? ĀNēbida cōn matses unēspeba? —quequin uesquin tantienda. Padenquo icquin nuqui dacuēdquin tantiaidtedi Nuquin Papa chuinuna. —Ĕbi nashunquin utsibotsen nashunta, Papa. Aden nashunec mibi bēdambo iquec, Papa —quequin Nuquin Papa chuinuna.

7 Aden nuqui chiac aidēmbi nuqui bēdambo icmec dacuēdenquo icnuc. Adoac bēdambo icnuc utsibo: —ĀMitsipadec dacuēdenquo yampash? —quetsiash. Nuquitsen: —ĀMitsipadequini bēdambo yampo? —quetsiac. Adec: —Nuquin Papan ēbi nashunquidquo nec —quequin Nuquin Papa chianequin Esus tantiacquieci nuqui dacuēdenquo yec bēdamboec tabadtsiac.

Bēdamboshē iquec, caiduidi tantiata, quiaid

8 Tantia, con utsibo. Nēidtsen chuinu. Ātotsi abimbo chiaid icpec? Adquid tantiata. Ātotsi bēdambo icpec? ĀTsutsi bēdamboec tabadquid icpec? Adquidtsen tantiata. Aden: —Bēdambo iquec —caidtedi tantiata.

9 Adembidi Ĕmbi chuisho mimbi tantiondac. Aden Ĕmbi chiondaid tantiacquin Ĕmbi naondacpadomben nata. Adsho isash mibi dacuēdenquo icmequid Nuquin Papa mibēd iquendac.

Pidipos yacnocquidon bēmiaid

10 Nēbi mimbi bēmiaid bedash bēdambo iquebi. Ĕnden mimbi aden menianiondashumbic yuectaneshun nēbi ēbi tantiacquin mimbi meneoaid bēacsho bedombi. —Nuquin Icbon tantiacpadomben padpiden Pidipos yacnocquidon ēbi ma menuequin piucquid bēmiac —quiash bēdambo iquebi. ĀĔbi tantienquioda mimbi ictionda? Ĕbi tantiacquin Ĕnden bēmetiadquidi tsundan bētiambo icnuc mibi nepanēdac.

11 —Con na nibēdeque, Beccho —Āquectabi ique? Padenquo. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi.

12 Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi.

13 ĀĔbenquiodabi adti? Padenquo. Esusēn namiaquini adquo iquec. Aidēmbi namiac ambi chiacpadomben naimbi.

¹⁴ Adnuc: —“Mëyadec,” quiosh —queshun mimbi ëbi ma menenuequin bëmiaid bëdambo iquec.

¹⁵ Min nidaid Masedonia caid yacnuësh nidsho Esus tantiaquido shubu utsinquidon uanocquidon menenquo iccondashi. Adnubi tauamboen menenquin mimbiuidtsëqui ëbi meniondac. Esus tantiabentsëcshun mimbi adondac.

¹⁶ Adoaquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibëdec,” quiosh —queshun mimbi piucquid bëmiacondac. Yuetaneshun adembidi. Adshumbic padpi-den.

¹⁷ —Mimbi bëmiaid bëdambo iqueque. Utsi beccho —¿quequindambi aden chuipe? Padenquo. —Pidipos yacnocquido Esus tantiaquido bëdambo iquec —Nuquin Papa camete bunquin: —Mimbi bëmiaid bëdambo iccosh —caimbi.

¹⁸ Utsi-utsien bedshumbeneshun mimbi bëmiaid Epapadoditon bëacsho bedondambi. Mimbi bëmiaidbëd daëdash ëbi bunaid dëniaquec con na dad-penquo yanac. —Mibi bëdambo iquec —Nuquin Papa camenuen mimbi bëmenëdac. Adsho isash Nuquin Papa: —Adquido bëdambo iquec —quependac.

¹⁹ Abitedishunquo Icho Nuquin Papa nec. Comapenen tantiaquin Esuquidistu tantiaquido bëdamboen isquin nashunquidquo nec. ¿Ada mitsana nibëdnuc mëyadac bimboec tabadpe? Adec mëyadsho isun Nuquin Papan mitsana icmendac. Unësquio icsho aidëmbi mibi bëdambo icmendac. Adecbidi: —Chieshtotiadquo icchitebi —quesho Nuquin Papan nac mibi chieshtoenquo iquendac. —Aid nibëdnuc unësebi —mimbi caid Nuquin Papan icmendac.

²⁰ Èbi adsho tantiashun: —Bëdamboshë mibi iquec, Papa —quequin Nuquin Papa chuinuna ënenquo icquin.

Pabadon ënquimbi chiaid

²¹ Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban.

²² Adembidi nëmbo Doma yacnoshon Esus tantiaquido abitedishun mibi tantiec. Chuiquid dapa Sesad caidën shubun icquido Esus tantiaquido icquin adembidi mibi tantiec.

²³ Mibi tantiaquin: —Con Icho Esuquidistubëdtañ Pidipos yacnocquido bëdamboen isquin bëdambo icmeta, Papa —quequin Nuquin Papa chianembi. Padi. Aidedi chuiquin dada uaombi.

CODOSAS YACNOCQUIDON ISTE

¹ Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec.

² Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdamboquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

Nuquin Papa chuidoniaid

³⁻⁴ Nuquin Papa, Nuquin Icbo Esuquidistun Papa chiec nadec onquebi. Bëdamboquid icquin mibipadquiocnoc Codosas yacnocquido Esuquidistu tantiaquido bëdamboquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquenebi.

⁵ Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec.

⁶ Ëbi icsaid cuidtiadtscëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinuien Esuquidistu tantiaquid yanshun abi bëdamboec tabadaid adem-bidi ismebanoaic. Adoac nidaid utsin-utsinquiec tabadquidon Esuquidistu tantiashun adomboembidi ismebanoaic.

⁷ Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec.

⁸ Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioshi.

⁹ Aden Epapadasën chiac mibi tantiec baded-badedquiec Nuquin Papa chiec onquian-onquianebi. Mimbi tantiacpadomboen min Mayanën pausunacsho Codosas yacnocquido bëdamboen tantieme, Papa, quequin chian-chianembi.

¹⁰ Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuec bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquio utsi iquendac. Adec tabadquido mibi tantiadonequido yanendac, Papa.

¹¹ Adembidi mimbi dayacquo icmenu caid Codosas yacnocquido iquec natiatequid icnuc aido chieshenquio yec abi tantiec mibi nidendac. Aden

chieshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa.

¹² Mimbi bëdambocquid icmebanac icsaquid nibëdacno mibi tantiaquid utsibobëd mibëdi tabadendabi, Papa, quequin tantiec, Bëdambo iquebi, quec ma Codosas yacnocquido mibi chiec onquepanuna, Papa.

¹³ Ënden adquidpenquo yec Satanasën yuaido yec, Nuquin Papa tianu, quesa nuqui iccondac. Aidën yuaido icsho Nuquin Papan nuqui mënchicpondash. Aden nuqui mënchicquin abi cudasaidquo aton Madombo Esuquidistu icsaisapadquid nuqui icmenuequin aidi Nuquin Papan nuqui tantiampondash.

¹⁴ Abipadquid icmenuec matses icsaid bedshunash abided cuidadec unëspanëdash. Adoacsho Esuquidistu tantiaquid icsho cuidenquo yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

Abia yampidquo iquec abitedishun icbombo Esuquidistu nec quiaid

¹⁵ Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabëdtsëqui Abia Yampid icquin utsi abitedi ambi uaid nec. Ambi uaidtedi aton na nec. Aidon icho Esuquidistu nec.

¹⁶ Nidaid abubëdtabi uashun aidënquicquidtedi uanu quequin ambi uaido nec. Matsesën isaidtedi matsesën isacmaidtedibëd Esuquidistun uampidquo nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icho nebi, quepec. Adechidi matses queoaindac. Aidotedi Esuquidistun uaido nec. Aidotedishun icho Esuquidistu nec.

¹⁷ Esuquidistu abia yampidquo iquec. Aidëmbi, Ëmbi uabanaido namebanu, quequin ambi chiacpadomboen namebanec.

¹⁸ Nidaid utsi-utsiec yacnocquido abi tantiec iccuededquidtedi chuiquidquo Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unëspanëdash. Adsho Nuquin Papan abia uincuemeshun abi tantiaquidtedi chuiquid abentsëcquiobi abipadquid icmepanëdash.

¹⁹ Utsi abipadquid ictiapimbo iquec. Aidën nabanacpaden natiapimbo utsi iquec. Ëbipadquidquo con mado nec, quiaish, Bëdambo iquebi, quec Nuquin Papa tsadec.

²⁰ Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ëbided cuidadec unëspebi, abi quiampicpaden matsesën cuesten dectanac unëspanëdash. Adoacsho isun ambi bëdamboen istiapimbochoedi Esuquidistu tantiaquid yansho isun aidtedi Nuquin Papan bëdamboen isec.

²¹ Ënden Nuquin Papan matsespenquo mibitedi iccondac. Icsamboen tantiec icsaquid yec Nuquin Papa chieshënquido mibitedi iccondac.

²² Adquid icboedi, Ëbi yacno yuednu queshun Esuquidistu tantiaquidotedi cuidenquo yec abi icsaid bëpiscudquin Esuquidistu icsaisapadquiocnoc aido isembi, quec Nuquin Papa tsadec.

²³ Ënenquicquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ënenquicquin tantia. Adomboen chuibenesho utsin-utsinquin tantiapondash. Esuquidistun, Aden chuibeneta, caid nebi.

Esuquidistu tantiaadoneta, quequin Pabadon chuibanaid

24 Ēbi tantiaquid Nuquin Papan bēdamboen isendac. Aden isac, Ēbēd icquido iquendac, quequin Esuquidistun ambia chuibansho matsesēn mēyampanēdash. Adomboembidi Esuquidistu chuibansho mēyamposhi. Adoqui, Cuishon, quebi. Ēnden abi tantiaquid yanacsho isun, Ēbi chuibeneta, quequin chuishumbic, Ēbi chuibansho mibi mēyante dadpen iquendac, quequin Esuquidistun chuiopondashi. Aden aidēn chiondacadpen mēyanaid nebi. Ma abi tantiaquid dadpen yanu quequin chuibenembi ambi tantiactedi mēyante yanuc.

25 Ai, Nuquin Papan, Esuquidistu ambi naidbēdta chuibeneta, caidquo nebi. Abi chuiquidquo nebi.

26 Nuquin Papan ambi tantiampicpaden chienquiochoed nēbi aid tantiamiac Esuquidistu tantiaquido yanec.

27 Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ēbi yacno ēbēdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

28 Aden ēbēdēn ēbipadquidon Esuquidistu chuibeniāc Esuquidistu tantiaquid yansho isash, Esuquidistu tantiec bēdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquo Nuquin Papan yuedpanu qeshun.

29 Badiadquidēn-badiadquidēnquien aton Mayanēn nadatiambocquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

2

1 Aden dayacquiocquin Nuquin Papa chuiquin mibitedi tantiembi. Adem-bidi chuibanquin Daudiseya yacnocquido tantiembi. Adem-bidi utsi-utsiec yacno iccuededquido ēbi isacmaidobi Nuquin Papa chuiquin tantiembi.

2-3 Esuquidistu tantiadonequido ma yampanueshun dayacquiocquin chuibenec nebi. Abentsēc yachimboec tantiananquidquo ma yampanueshun dayacquiocquin chuibenec nebi. Adquidquo yanshun utsin abimbo chuisho tantiash, Abimbo chuiquid nec, quequin ma bēdamboen tantiapanuna. Adem-bidi, abimbo chiacbimboen chuisho tantiashun, Icsamboen chiec, quequin ma tantiaquiopanuna. Nuquin Papan tantiamenquiochoed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi.

4 Comapenen tantiaquid icquin, Utsi tantiata, quequin Esuquidistupenquo chuisho ma tantienquo mibitedishun icpanu, quequin aden mibi tantiaquin chiec nebi.

5 Mibēd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ēnēdenquo yec iccuededquin aiduidtsēqui tantiadonec, quequin mibi yacnoēsh choquidon chuisho tantiash bēdambo iquebi.

Esuquidistu tantiaquid iquec utsin chiacpaden naic abuc nidendabi, quequin tantienda.

6 Adecbidi Esuquidistu tantiaquid yec abēd icquido iquec, Aidi con Icbo nec, quec ambi chiacpadquiec tabadteneta.

7 Adec tabadquin cuēte tapun uquēducquicquidēn cuēte uidēnash canidoacbimboen Esuquidistu tantiaquid icquin tantiadonequiota. Aden Esuquidistu chuiquin ēbipadquidon mibitedi chuipondash. Aid

tantiadonequid icquin, Mibi tantiaquieq bēdambo iquebi, quequin baded-badedquien Esuquidistu chuidoneta.

⁸ Adembidi aid tantiadonequid icquin aid tantiesan ēndenquio ambembi chieq onquiampicpaden nēbi icquidēn adomboembidi chuisho Nuquin Papan chiacpadamboen chiesha nec, quequin tantiaquiota.

⁹ Matsesash Nuquin Papapadquidquibidi Esuquidistu icpanēdash.

¹⁰ Esuquidistubēd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibēd icquid Esuquidistu nec.

¹¹ Aidēn, Ēbēd icquid nec, quequin mimbi tantiaid icsa cuēte cuidi pateshuniacbimboen mibi ēmebanec. Chēshten tiacbimboen nainquiocquin bēdamboen tantiamequin aton Mayanēn mibi icsaid ēmendac.

¹² Adembidi Esuquidistu unēsacsho chococacbimboecnuc abi tantiaquid paucnu quiacbimboen acten mibitēdi mentobanondash. Adembidi Nuquin Papan Esuquidistu uincuemēdacbimboecnuc icsaisa icmenu, quequin acten mentotanquin mibitēdi cadobampondash.

¹³ Ēnden Nuquin Papan matsespenquio icquin mimbi tantiaid icsa icnuc unēsacimbocēn icquin Nuquin Papan ēnden, Naden nata, quequin chiaid tantienquiocquin niacquido mibitēdi iccondac. Adquid icboedi Esuquidistu tantiaquid icsho isash, Con madobēd icquido nec, queq Nuquin Papa nuqui icsaidtēdi bēpiscudac.

¹⁴ Ēnden, Matses icsaid bēpiscudnu, quenquiocquin, ēmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanēdash. Adquid icshobi icsaquidbimbocēnuc matsesēn unēs uaquin cuēsten dectanac matses icsaidtēdi bedshunash abibi ciudadec unēsapanēdash. Aid unēsō isun, Matses icsaid cuidosh, quequin abi tantiaquidquio icsaid ambi naden nata quequin dada uamīaid ucacimbocēn tantieq bēpiscudtenec Nuquin Papa.

¹⁵ Esuquidistuidi Nuquin Papan naden nata quequin chiaid niaquesa yec matses icsaid bedshunash abided ciudadec unēsash uincuenquin Nuquin Papan chiaid niacquido mayan icsabo dēniaquec Esuquidistu abitēdi chuiquid yampanēdash. Aden dēniacshun, Nēidtedi ēbi tantiaquido chuiquid ictiapimbo iquec, quequin bedshun mētāneshun buanacimbocēn Nuquin Papa Esuquidistun ismepanēdash.

¹⁶ Aden chuiquid utsitēdi dēniacquid Esuquidistu nec, quequin tantiaq, Nadquid peshun nadquid utsi acsho Nuquin Papan ēbi bēdamboen isec, quenda. Adembidi, Nēid ushēmbi abi tantieq iccuededsho isun Nuquin Papan ēbi bēdamboen isec, quenda. Adembidi, ushē chuca choaid usudsho isec cuēdēsho Nuquin Papan ēbi bēdamboen isendac, quequin tantienda. Esuquidistuidi tantiaquidquio icsho Nuquin Papan ēbi bēdamboen isec, quequin tantiata.

¹⁷ Matses icsaquid yec ambi naidēnquio abembi bēdantiapimbo iquec, quequin tantiamenuequin Nuquin Papan ambi, Naden nata, quequin chiaid Moises menepampic. Ēmbi bēdamboen isaidquio matses bēdambo icmequid choendac, quequin tantiaquin ambi naden nata quequin chiaidba Moises menepampic.

¹⁸ Esuquidistun bēdambo icmiaid nebi, queshun utsi icsamboen chieq onquesho tantienda. Ambibi chieq onquesho tantiaqshun Esuquidistu tantesa uaindac. Adquidbēd Esuquidistu ictiapimbo iquendac. Adquidēn, Mibi chuiquidpenquio nebi, queshumbic ambia tantiaquidbimbocēnuc ambi tantiaid Nuquin Papan uaid mayan bēda mibi tantiamenuequin chuibansho tantienquiocquin nadota. ¿Tsuntsin mibi adquid icmepash? cata. Aden

chiaquien, Ushquin adquid isombique. Chuinu. Tantia, quequin ambembi chiec onqesho tantienda.

¹⁹ Adquidën Esuquidistu abi tantiaquidon icbombo nec, quequin tantienquio iquec. Adecbidi Nuquin Papan tantiacpadquiec Esuquidistu tantiaquid dadpen yanash aton utsibobêd tantiananec nashunanec aton icbopadquid yanec, quequin tantiesa adquid nendac.

²⁰ Tantanu. Ēbi chui. ¿Atotsi quiash Esuquidistu tantiaquid yanash ěbi icsaid cuidnuec Esuquidistuded unēsash uincuenac bimboec bēdamboec tabadebi, qeshumbic,

²¹ Nēid bedtemaid nec. Aid bedsho mayanën mibi cuidendac, quequin utsi chuisho mimbi tantiape? Adembidi ¿atotsieshun mimbi tantiaid icsa unēsascho chococabi yachimboen, Nēid petemaid nec. Aid pesho mibi cuidendac, qesho mimbi tantiape? Aden Esuquidistu tantienquio icquidēmbimboen, Nēid mishtemaid nec. Aid misho mibi cuidendac, qesho mimbi tantiapac.

²² Nadquid petemaid nec. Nadquid mishtemaid nec, quequin matsesën ambi chuiquin tantiamete nec. Ambi petemaidbēdi ambi mishtemaid ěnēdendac.

²³ Matsesën bēdamboen tantiacbimboen chiaid aidtedi nec. Nēid ěmbi tantiaid nec, qeshun aid bēdamboen ismenuen naden nanuna, quequin matsesën chiec. Aden ambibi tantiashun, Naden nata, quequin mibi chuitiapimbo iquebi, qeshumbic namenuquin comapenen adquidën chuibanec. Adecbidi, Damēyamēdsho ěmbi tantiaidën ěbi bēdamboen istsiash, quequin ambibi tantiash damēyamēdec. Adec damēyamēdashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

3

Bēdamboec tabadaid chiaid

¹ Esuquidistu tantiaquid yec abia uincumenēdac abuc nidash Nuquin Papa yacno icsate bunquid nibēdacno tabadacpadquiec tabadteneta. Adec tabadec, Nuquin Papan dayunquio Esuquidistu tsadec bēdambo iquec, quequin abēd icte bunquin Esuquidistu tantiadonec tabadta.

² Abuc abēdi ěbi icnuc aton na con na iquendac, quequin tantiaquin nidaidēnshun bednu, quequinuidi tantienda.

³ Esuquidistu unēsaid tantiaquin aidbēdtabi mibi icsaid chococashu-nac bimboec icsatiapimbo yec nidaidën tabadta. Adecbidi Esuquidistu uincuenash abuc Nuquin Papa yacno nidash, Ēbi tantiaquidtedi bēdaidquio iquec. Aido ěbi cudasaidquio nec, quequin aidën dayun uaid nuqui nec.

⁴ Aidën padpidec choshon abi yacno buanac abipadquidquio bēdaidquio nuqui iquendac.

⁵ Adec abi yacnoēsh abēdi bēdaidquio iquendabi, quequin mibi icsaidtedi cuesun secac bimboen ěmbanta. Ēmbi inacmaid chudnu, quenquiocquin ěnta dadan. Adembidi, Ēbi inesa chudmenu, quenquiocquin ěnta chidon. Adembidi, Chudnu, quequinuidi tantiaid ěnta dadan. Adembidi, Chudmenu, quequinuidi tantiaid ěnta chidon. Adembidi mibi bunaid icsatedi ěnta. Adembidi aton na daēdpactsēc icquidēmba ma bednu, quenquiocquin, Ēmbia bednu, quequin tantiaid ěnta. Aden ěnshun, aton na daēdpactsēc icquidēmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaid bimboecnuc matsesën ambi nacenaid tantiac bimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatiapimbo iquec.

⁶ Abi bunaid icsabēdta ambi tantiaid icsa ēnesa icsho matsesēn naid chuibante ushē choan adquidtedi Nuquin Papan comapenen cuidendac.

⁷ Adquid icboedi

⁸ nēbi adenquiocquin ēnash bēdamboec tabadteneta. Adecbidi comapenec nēishboedi adenda. Adecbidi, cuesantiaidquo yec nēishboedi adenda. Adembidi, utsi icsambo icmeboedēmbi adoenda. Adecbidi, utsi icsamboen chuibodi adoenda. Adecbidi, tsienbēdta shui chedo chiec icsamboen tantiec onqueboedi adenda.

⁹ Adecbidi, mua uanamboedi ēnēdta. Adquid icboedēmbi icsactsēcquid niacimboen mibi icsaid ēnta.

¹⁰ Min tantiate chuca uacimboecnuc abi tantiadonequidquo icnuequin mibi tantiamequid tantiaded-tantiadedta.

¹¹ Adquid Nuquin Papan icmiac Esuquidistu tantiaquid utsibo naden mimbi tantienquo iquendac. Nēid isadaidbo nec. Nēidic isadaidpembro nec, quequin tantiesa mibi iquendac. Adecbidi, nēid shui dēbid dētemequid nec. Nēid shui dēbid dētemesa nec, quequin tantiesa mibi neoaic. Adecbidi, Nēid chotac nec. Nēidic mayu nec, quequin tantiesa mibi neoaic. Adecbidi, Nēid yua nec. Nēidic yuaquid nec, quequin tantiesa mibi neoaic. Adquid Esuquidistu tantiaquid icnuc abēd icquid aton matses nec. Abi tantiaquidtedi chuiquid dapa abentsēcquiobi Esuquidistu nec.

¹² Aden Nuquin Papan cuēnaido yec ambi bēdamboecquid icmebanaidobi abi cudasaido yec ambi tantiamiaid nebi, quish bēdamboecquid isadacimboec nadec tabadteneta. Utsibo natiamiaid icsho isun bēdambo icmenuequin nashumbanta. Adecbidi, Mimbia bedan bedembi, quequid icta. Adecbidi, Mibia nashunu, quequid icta. Utsi icsaid ēmenuec comapenec chushquenquiocquin bēdamboen chuiban. Tantesa uasho isun ismeded-ismededta.

¹³ Mimbi nacpadomboen utsibon natiapimbocsho isun, Padi, quenquiocquin abi tantiameban. Adecbidi utsin mibi icsamboen nasho isash cuidnanguo yec bēpiscudta. Nuquin Papa ēbi icsaid cuidenquo yec bēpiscudosh, quec adta.

¹⁴ Adec tabadtenec tantiananta. Adec tantiananec Esuquidistubēd abentsēc yacimboec icsaisa mibitedi yanendac.

¹⁵ Adec Esuquidistubēd abentsēc yacimboecnuc icmiaid nebi, quequin tantiec bēdamboec tabadtenenu, quec mibitedi tabadteneta. Adec tabadtenequin, Mibi bēdambo iquec, Papa, quequin chuideneta.

¹⁶ Nuquin Papan Esuquidistu tantiadonemiaido icta. Adquido yec abi tantiaquid utsibobēd Esuquidistu chuinanec, Bēdamboec tabadta, quec adquiecbidi tabadec ismenanta. Aden naic chuiquid dapa Dabidēn dada uampid sadmo caidbēdta cuēdēnte utsi Nuquin Papan mibi bēdambo icmi-aidbēdtabi ambi naid utsi chiec cuēdēncuededta.

¹⁷ Adec tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bēdambo iquebi, Papa, quequin Nuquin Papa chuideneta.

Aton shubun icquidbēd tabadaid

¹⁸ Bēdamboec tabadnu, qeshun nadota. Chidon min bēnēn chiacpadomboen nabanta. Esuquidistu tantiaquid icquin adobanta.

¹⁹ Chido inquidēn, Con bēnēd tabadec bēdambo iquebi, camenuen yuacimboecquin aid chuiquin min chido namenda. Mibibi tantiaquidinu min chido namenda.

²⁰ Bacuëbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bëdambo iquebi, quependac Nuquin Papa.

²¹ Anibëdtan min bacuëbo namenuc comapenen cuëdquin chieshmenda.

²² Yuan mibi yuaquidën chiacpadomboen nabanta. Aidën aden chuishun isnu adobanta. Aden chuishun min icbon isenquiocnoc adomboembidi nabanta. Aden nabansho mibi bëdamboen isendac. Nuquin Icbo, Esuquidistu tantiaquid nebi, qeshun adobanta.

²³ Con Icbo Esuquidistu nashunu, quiacimboen mibi yuaquidën chiacpadomboen chieshenquiocquin bëdamboen nabanta.

²⁴ Con Icbo Esuquidistun abi yacno ëbi nidacsho isun ëmbi bëdamboen nabanaid cuidquin ambi ismiambo yaid menendabi, quequin tantiaquin adobanta. Nidaidëshun abi nashunquid mibi neque. Adobanta.

²⁵ Min icbon chiacpadomboen nata. Abi chieshënquid icbon cuidendac. Adembidi Nuquin Papan Esuquidistu tantiaquid nebi, qesho abi chieshënesa menequin bëdamboen cuidendac. Abi chieshënquid menenquiocquin comapenen cuidendac. Adenuidi tantiaquin cuidendac.

4

¹ Yuanquidën, mimbi yuaido ambi nabanacpaden bëdamboen menebanta. Abuc con Icbombo iquec, quequin tantiaquin mimbi yuaido bëdamboen menebanta.

Chuibanaid utsi

² Esuquidistu tantiaquid utsibo natiatequidbëd abi icsaid iquec, quequin tantiec baded-badedquiec Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bëdambo iquebi, Papa, quequin Nuquin Papa chuideneta.

³ Adecbidi ëbipadquid utsibobëdta ëbi tantiec Nuquin Papa chiec onqueta. Mimbi chienquiocnëdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Èbi chuibeneta, cac aid chuibenesho bedshun mëtaniaid nebi.

⁴ Pabado utsin onqueten onqesho cuembo chuime, Papa, ma aidonsen tantiapanu, quequin Nuquin Papa chuideneta.

⁵ Esuquidistu tantiesan ëbi tabadaid istenec, quequin tantiec bëdamboec tabadteneta. Adec tabadquin Esuquidistu tantiesatsen tantiamenuequin Esuquidistu chuideneta.

⁶ ¿Mitsicquid mimbi tantiaid icpec? quetsiash tantiesa. Adsho tantiashun mibi onquiaidbëd sa batambo iquec daëdacimboecnuc Esuquidistu mimbi tantiaid utsibo chuita ma aidon tantiapanu qeshun.

Abëd icquid chuibanaid

⁷ Nëbi ëbëd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquico icsho ëmbi con utsi caid nec. Aidi Nuquin Icbo nashunquid neoaic.

⁸ Èbëd icquid utsibo naic tabadaid mibitedi tantiamenuequin aidi mibi yacno nidmembi. Adoac mibi yacno nidash puduedshun ëbi naic tabadaidbëdtabi Nuquin Papan chiaid chuibanac mibitedi ëbi tantiec unësquiocboedi cuishon queta.

⁹ Onesimobëd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquiocquin ëbi nashunquid nec. Aid daëdshun ëbëd icquidon nabamboed mibitedi chuibanendac.

¹⁰ Nēbi mibi yacno nidesa chuinu. Tantiata. Adistadico ēbēd icnuec abembi quēnēn nauedadondaid nec. Aidēmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosēn chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta.

¹¹ Esus cashumbic Ustus caidēn, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aيتدتسēqui isadaidbo nec. Aidon ēbēdtambi Esuquidistu chuibanquin ēbi bēdambo icmequido neoaic.

¹² Epapadas mibi yacnoshon tishaid Esuquidistu chuibanquidquido nec. Aidēmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenuequid icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidēn-badiadquidēnquiec Nuquin Papa chiec onquec Epapadas.

¹³ Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquo yec Esuquidistu tantiadonequidombo ma icpanu quiash mibitedi chiec onquedenec.

¹⁴ Adembidi Ducasēn dauēchoquidēn Demasbēdtan, Codosas yacnocquido tantiec tabadebi, quequin chiacpadomboen dada uaimbi.

¹⁵ Codosas yacnocquidon nēid ēmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuēmēdquidēn shubun Esuquidistu tantiec iccuededquido chuioata.

¹⁶ Adembidi, nēid ēmbi dada uaid isec onquequin mibēd iccuededquido tantiameshun Daudiseya yacno iccuededquido tsusiobo menequin, Nēid Pabado dada uaid isec onquequin mibēd iccuededquido tantiameoā, quequin chui. Adembidi ēmbi Daudiseya yacnocquido tantiaquin dada uaid bedshunshun isec onqueshun mibēd iccuededquido tantiameoā.

¹⁷ Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

¹⁸ Mibitedi tantiaquin ēmbibi nēid dada uaombique. Ēbi tantiec nidtiapimbo yec Pabado quēnēn tsadeque. Aid puduēmeta, Papa, quequin Nuquin Papa chiec onquedeneta. Nuquin Papan ma mibitedi bēdamboen ispanu, quec tsadebi.

Padi. Aitedi dada uaombi.

TESADONICA YACNOCQUIDON ISTE 1

Pabado tauamboen chiaid

¹ Pabado nebi. Shubu dadpen icquid Tesadonica caid yacnocquido Nuquin Papabēda Nuquin Icho Esus tantiaquido mibi chuiquin dada uaic nebi. — Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

² Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa.

³ “Aidon Esus tantiaquin ambi chiacpadomboen matses tantiaquin nashumbanosh. ‘Abi yacno abi tantiaquido buanuec Nuquin Icho Esuquidistu padpidec choec,’ quequin chieshtoenguio icquin Esusēn naid chuibanosh,” quetuidposh Timoteyo. Ma adembi aidon napanuna, Papa — quequin mibi Nuquin Papa chianembi.

⁴ Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden.

⁵ Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiacpadomboen: —Abimbo caic —qeshun mimbi Esus tantiabonodac. Ademibidi Esus tantiamenuec Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ēmbi chuisho tantiondac.

⁶ Aden Nuquin Papan Esus tantiamiaido yec ēbi Nuquin Icho yacpadec chieshtoenguio icsho isash mibitsen chieshtoenguio iccondac. Ēmbi Nuquin Papan chiaid chuibanac Nuquin Papan Mayanēn namiacpadec cuishonquequin mimbi Esus tantiondac utsibon: —Padi. Chēn —quequin comapenen chieshēnquionobi.

⁷ Adec mibi bēdamboec tabadaid chuisho tantiash min nidaidēn icquido Masedonia yacnocquido Esus tantiaquido mibi yacpadquiec tabadiadquio icpac caosh. Ademibidi tantiash nēid nidaid Acaya caid yacno tabadquidot-sen adtiadquio icpac caosh.

⁸ ¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenguio icquin Esusēn naid chuibanac nidaid utsi-utsiec yacno tabadquidon tantiac caosh. Adashic aidō mibi caic: — Nuquin Papa tantiaquidombo nec —quecuededac caosh. Aden mimbi naid chuisho tantiashun: —Tantiash —qeshun nēmbō icquido mimbi naid chienquo iccombi.

⁹ Mimbi naid naden chuisho tantiombi. —Pabado chedon Esus chuibansho tantiash: “Nuquin Papapadquid utsi nibēdec,” qeshun Nuquin Papabēda Esus tantiabēnac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiacpadomboen natiadquio yanac caosh —quequin chioshi.

¹⁰ Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquio iquec. “Ēbi cuidmenquo icnuec abided cuidadec unēsacsho Nuquin Papan uincuemaiid Esus choec,” qeshun aid istiadquio iquec —quequin mimbi naid chioshi.

2

Pabadon bēdamboen chuibanondaid

¹ Mibi yacnoshon tauamboen ěmbi chuibanac Esus tantiaquid yanshun mimbítsen utsibo Esus chuibanondac.

² Shubu dadpen icquid Pidipos caid yacnoshon quĕnĕn nauedac ěbi mĕyadec tsadboedi puduemeshun nidmiac mibi yacno nidshun Esusĕn naid mibi chuibanondambi. Utsibo dadpenshun chieshĕnubi Nuquin Papan namiacpadomboen cuesambo icquin mibi Esus chuibanondambi.

³ ĘĔmbi naidquio namenuendambi adodionda? Padenquio. ĘĔbi tantiamenuendambi chuibandionda? Mambi padenquio iccondac. ĘĔAmbembi chiaidtambi mibi chuibandionda?

⁴ Mambi mibi abimbo chuibampondac. Matsesĕn naidtedi tantiaquidĕnquio Nuquin Papan: —Aidĕn abimbo chuibantsiashe. Con Mado Esusĕn naid chuibenequid icmenu —caidquio nebi. Adquid yec matses: —Mibi bĕdambo iquec —cameteuidi bunenquio iquebi. Nuquin Papa: —Mibi bĕdambo iquec —camenuembimbi ambi chiacpadomboen naic.

⁵ Ĕmbi tantiacpadomboen mibi namenuc: —Mibi bĕdambo iquec —quenquio iccondabi. Min piucquid bednuen muaquin chiambo iccondambi. Nuquin Papan isnubi abimbo chiondambi.

⁶ Ę—Pabado bĕdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusĕn naid tantiamenuembimbi bĕdamboen chuibanondac.

⁷ —Ĕbi chuibeneta —Esuquidistun caidquio nebi. Adoaid icquin tsusio dapan chiacbimboen: —Nata —quequin Ęancabudquindambi mibi chuibandionda? Mambi padenquio iccondac. Anin bacuĕ nĕishmenquio icquin bĕdamboen namiacbimboembimbi nĕishmenquio icquin mibi chuibanondac.

⁸ Mibi tantiaquioquin chieshtoenuquio icquin Esusĕn naid chuibanec yuec mibĕd tabadondabi. Aden naic tabadec bĕdambo iccondabi.

⁹ ĘAda tantie, con utsibo? Aden Esusĕn naid chuibanquin nidaidĕn capuquid yua bitsibi tuscaquin shubumpi nacnendeniondambi. Mibi caic: —Ĕbi menianiac aton piucquid naimĕdnushe —quiash con piucquid bednuec chonoadteniondabi. Mimbi isnubi adondabi.

¹⁰ Mibĕd yec Nuquin Papan chiaid niaquenquio yec bĕdamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanĕdashi.

¹¹ Amĕn aton mado: —Naden na —quequin nĕishmenquio icquin chiacbimboen mibi abentse-abentsen bĕdamboen chuibanquin

¹² mibi bĕdambo icmepondambi. —Nuquin Papan: —“Icsatiapimbo icquid icmequin ěbĕdi tabadmendambi,” quequin Esus tantiamiaido mibi nec. Adquid Nuquin Papan chiacpadece bĕdamboec tabadquid neque. Ambi chiaid niaquenquio yec bĕdamboec tabadnuna —mibitedi cadeniondambi.

¹³ Aden Nuquin Papan chiaidquio chuibanac: —ĘAmbembida chuidiosh? Nuquin Papan chiaidquio ma Pabadon chuiboc —mibi quianondac. Aden Nuquin Papan chiaidquio tantiashe Esus tantiaquido yanash aidquiobidi chuisho tantiashe mibi bĕdambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bĕdamboen tabadmequid yec mibi bĕdamboshĕ iquec, Papa —quequin Nuquin Papa chianembi.

14 Nidaid Udeya caid yacnocquido yacpadquiec chieshtoenquo icquin mimbi Esus tantiec. Udeya yacnoshon Esus tantiaquido aton matses isadaid-bon cuestiadquio icquin chieshēnac chieshtoenquo iccondash. Adomboembidi aid matses mibi yacno tabadquin chieshēnac mibi chieshtoenquo iccondac.

15 Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unēs uapac caondash. Adomboembidi chieshēnquin mibi yacnoshon cuemepondashi. Aden Nuquin Papa chieshēnquinc matses abitedi chieshēnquinc caquin

16 isadaidbon matses utsi isadaidpembo ēbi chuimetiapimbo icpondash. —Esus tantiasho Nuquin Papan bēdamboen isquin mibi cuidenquo iquendac —quequin ėmbi chuisho: —Padi. Aid chienda. Cueschitomane —capondashi. Aden ambi chiaid ėnenquo icquin niac-niacsho Nuquin Papan aido cuidquiendac.

Pabado istante bunaid

17 ¿Mibi yacnoshon aden chieshēmēnquidon cuemiac mibi tantienquiodambi ictionda? Mibi unēsquo icnuc mibi istantiadquio iccondabi.

18 Adec: —Padpiden istanu —quesho Satanasēn nac padenquo iccondabi. Padpidec: —Nidnu —quesho adembidi. Padpidec: —Nidnu —quesho Satanasēn nacbidi padenquo iccondabi. Nēbi adecbidi mibi istantiadquio iquebi.

19 Nuquin Icho Esuquidistu choan aidbēd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ėmbi chuibanac Esus tantiabenondaído neque —capatsia? Mibibimbi caic.

20 —Esus tantiec bēdamboec tabadosh —quesho tantiasho mibi tantiec cuishonquebi. Adembidi mimbi naid isun: —Mimbi bēdamboen naondac. Mimbi chuibanac ēbi tantiabenondash —ēbi caindac Nuquin Icbon.

3

Istan, quequin Timoteyo chiaid

1 Aden mibi tantiec: —“¿Mitsipadec tabadpec?” quequinnuidtsēqui tantiec tsadiapiimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ėbēd icquid utsi Sidbano chuiquin: —Timoteyo nidan nuquiuuidtsēqui icnuna —caondambi.

2 Ėmbi: —Nid —caondaid Timoteyo Esus tantiaquid yec nuquin utsi nec. Ėbēdtan Esus chuibenequidquo nec. Adquid icsho nadopondambi. —Tesadonica yacno nidshun Esus bēdamboen chuibantan. Adembidi: “Esus tantiec chieshtoenquo yec nadquiec tabadquid nendac,” quequin bēdamboec tabadquin ismetan, Timoteyo.

3 Aton matsesēn comapenen chieshēnac chieshtoshon Esus tantienquo yanushe. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi.

4 Aden mibēd icquin chuideniondambi. Adsho ėmbi chiacpadomboen nuqui chieshēnondash.

5 —“Ėbi nidan chieshēnac ¿adecbidida Tesadonica yacnocquido chieshtoenquo icpatsiashba?” quequinnuidtsēqui tantiec tsadiapiimbo iquebique. Istan —caondambi Timoteyo chuiquin. —“Icsamequin tanu,” quequidēn Satanasēn namiac chieshtoshon Esus tantienquo yanushe. Istan. ¿Ada ėmbi Esus chuibanondaído bēdamboec tabadeque? —caondambi Timoteyo chuiquin.

Timoteyon chuituidaid

⁶ Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquio yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquio iquebi,” quiosh Tesadonica yacnocquido —queposh Timoteyo. Adembidi mibi istantiadquio iquebi.

⁷ Timoteyon chuiboed tantiaash bēdambo yanobi. Nēmbō icquidon chieshēnac shubiantiadtsēcquio iccobi. Adboedi mibi caic: —Chieshtoenquio icquin Esus tantiosh —quesho tantiaash bēdambo yanobi.

⁸ Mimbi aden naid tantiaash dayacquio yaczimboec iquebi.

⁹ Aden tantiaashun Nuquin Papa chianembi naden. —“Tesadonica yacnocquido bēdambo iccosh,” quesho tantiaash cuishonquebi, Papa. Mimbiuidtsēqui namiac chieshtoenquio iquec. Aden namec mibi bēdamboshē iquec, Papa.

¹⁰ Aido istiadquio iquebi. Mimbi chiaid bēdiactsēc tantiaasho aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

¹¹ —Nuquin Icho Esusbēdtan Nuquin Papan nēbimbobi ambo nidmepashuni —caimbi.

¹² Adec mibēd ictiadquio icquin Nuquin Papa mibi chianembi. —Ēmbi aido tantiaquiacpadomboen utsibobēd tantianameta, Papa. Bēdiactsēc tantianantsēchoedobi comapenec tantianamequiota, Papa. Adembidi utsibotsen bēdamboen ismeta.

¹³ Aden bēdamboec tabadquid icmeta, Papa. Mimbi adoac chieshtoenquio yec bēdamboec tabadtsiash. Adsho mimbi mibi yacnoshon uaido mayan bēdabobēd nidaidēn padpidec choshon con Icho Esusēn: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

4*Chidobēd bēdamboec tabadte chiaid*

¹ Tantia, con utsibo. Chiaid utsitsen mibi chuinu. —“Bēdambo mibi iquec,” Nuquin Papa camenuec bēdamboec tabadta —quequin ěmbi chiondacadquieq tabadta. Nuquin Icho Esus tantiaquieq adta. —Bēdamboec tabadosh —quesho tantiaashun: —Adquiequi tabadta —caimbi mibi.

² Nuquin Icho Esusēn namiac aidēn chiaidquio mibi chuibanondambique. Aid tantiaquieq bēdamboec tabadta.

³ Nuquin Papan tantiamiacpadquieq tabadquidēn nadoquid yendac. Utsin chido chudenquio icquin aton chidoidtsēqui chudquid yendac. Adembidi chidon dada utsi chudmenquio icquin aton bēnēuidtsēqui chudmequid yendac.

⁴ Adec Nuquin Papan chiaid niaquenquio yec abi bunaid mēmūnec dada ambi inaidquio aton chidoidtsēqui chudec aidbēd bēdamboec tabadsho: —Bēdambo iquec —catsiash Nuquin Papan.

⁵ Nuquin Papa tantiesabimboec tabadenda. Esus tantiesambien comapenec tsien bunquin aton chidopenquio chudendac. Adembidi Nuquin Papa tantiesa icquin chidon utsin shui bunquin aton bēnēpenquio chudmendac. Adec tabadenda.

⁶ Bēnē nidan aton chido abentsēqui uequid istuidshun chudenda. Adoquid Nuquin Papan cuidendac ěmbi chiondacadomboen.

7 —Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquio. —Ma bēdamboec tabadnu —quequimbien Esus tantiaquido nuqui icmiaque. Bēdamboec tabadnuna.

8 Aden chuiquin aton Mayan nuqui menequidēn Nuquin Papan chiaid chiec nebi. Aden ěmbi chuiboed niacquin Nuquin Papan chiaidquio mimi niactsiac.

Adecbidi tantiananquiota, quequin chiaid

9 —Bēdamboec tantiananta —quequin padpiden chienquio iquemi. Nuquin Papan tantiamiac Esus tantiaquido yec mibi tantiananec.

10 Min nidaid Masedonia caidēn tabadquido Esus tantiaquido utsibotedi mimi tantiec. Mibi yacpadquiecbidi tantiananquiokin utsibotsen tantiaquiota.

11 Ěmbi chiondacadquiech chieshēmēnenquio yec bēdamboec tabadta. Utsi icsaiduidi chienquio yec bēdamboec tabad. Chieshenquio yec dayacquio yec chonoadta.

12 Adash bunenquio mibi ictsiac. —Con na nacnenambo iccombique. Mitsana beccho —mibi quenquio ictsiac. Mibi adquio icscho isash Esus tantiesabo: —Esus tantiaquido bēdamboec tabadec —quetsiash.

Esusēn abi yacno abi tantiaquido buante chiaid

13 Tanta, con utsibo. —“Esusēn abi tantiaquido uincuemendac,” quequin chuisho mimi tantiabi icnushe —qeshun mibi bēdamboen chuinu. Esus tantiesabo: —Ěmbi tantiaidquio padpidec isadenquio iquec —quec yuecquio shubiabimboec shubienda. —Ěbipadquid Esus tantiaquid Nuquin Papa yacno istuidendambi —quec ma yuecquio shubianenquio icnueshun Esusēn uincuemete mibi chuinu.

14 —Unēs uaquī Esus uincuenacpadebidi nuquitsen uincuenendac. Esus tantiaquido unēsacsho uincuemeshun Nuquin Papan abi yacno aton Mado Esus buamendac —quequin nuqui tantiec.

15 Tanta. Nuquin Icho Esusēn chiaidquio mibi chuinu. Nuquin Icho Esus nidaidēn padpidec chonoc aid istuidec Esus tantiaquido unēsabi icquido abia nidenquio iquendac.

16 Padenquio icnubien Nuquin Papa yacnuēsh choec Nuquin Icho Esusba nua cuēdtuidendac. Adnubien Nuquin Papan abi yacnoshon uaido mayan bēdabo chuiquid dapatsen nua cuēdtuidoāindac. Adnubien Nuquin Papan chiacpadomboen utsin nua shoncatuidendac. Adnubien Esusēn abi tantiaquido unēsaidotedi abia aton dada chuca uaquin uincuemendac.

17 Adoaquien aidobēdi Esus tantiaquido unēsabi icquido tsidadash aidotedi abuctoendac Nuquin Papabēd tabadec nidec. Abitedi abuctoquimbi abi bēquedec Esus chosho istuidendac. Adash Esusbēd Nuquin Papa yacno nidash anobi nuqui quenendac.

18 Ěbi adsho tantiashun nadota. Aton matses unēsaid tantiec shubiquido bēdambo icmenuen ěmbi chuiboed chuita.

5

Esus chote chiaid

1 Tanta, con utsibo. Mibi chuinu. —Nēidtedec ushash Esus padpidec choec —quequin chuitiapimbo iquebi. Adembidi: —Nēidted seta matamiash choec —quequin dada uatiapimbo iquebi. Tantienquio iquemi. Naden mibi chiondambi.

2 —“Nëid inchëshëmbi ampequid choec,” quequin tantiatiapimbo yac bimboec: “Aid ushën Nuquin Icho choec,” quequin tantiatiapimbo icnuc Esus choaindac —quequin mibi chiondambi.

3 Esus tantienquo yequi matses dadpen: —Cuesnanenquo yec nuqui bédamboec tabadec —qeshobien ambi: —Ëbi cuidendac —cacmaidënquo padpidec choshon cuidquendac. ¿Mitsipadquo chido bacuë usunquid icpec? —Aid ushënquo tishëmbi —quequin tantiatiapimbo yequi badedquo nëncuenec. Adecbidi ambi: —Choec —cacmaid Esus badedquo chosho abi tantiesabon cuenëntiapimbo iquendac.

4 ¿Esus chonoda nuqui dacuëdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nëbien Esus chochitec —quec bédamboec nuqui tabadnubi Esus chonoc nuqui dacuëdenquo iquendac.

5 ¿Pacuënëdac bimboecquidoda nuqui nedi? Padenquo. Pabiate paposhquiabimboecnuc Esus bédamboen tantiamaido yec bédamboec tabadquid ma nuqui neyoc. Adecbidi bédamboec tabadnuna.

6 Ushquin pabiaten tantienquo yac bimboen utsibon Nuquin Icho Esus tantienquo iquec. Adec tabadenquo icnuna. —Esus tantienquo icmane —qeshun nuqui icsate bunaid nainquo icquin mëmununa. Nuquin Icho chosho istiadquo yec bédamboec tabadnuna.

7 Esus tantiesabon inchëshën ushquin tantienquo yac bimboec iquec. Adquiecbidi tantiadenuen acte paëmbo icquid acquido nec.

8 Adquidpenquo yec Esus tantiaquido yec bédamboec tabadnuna. Nuqui icsate bunaid nainquo icquin mëmununa. Sondado: —Shocosh tsasimbo icquid shictonquenu. Sicsenushe —quiac bimboec icnuna. Satanasën Esus tantiamenquo icnushe. Esus tantiaquiquin matsesten tantiaquionona. Adecbidi sondado: —Masenushe. Shocosh tsasimbo icquid maueté mauenu —quiac bimboecbidi icnuna. Satanasën icsamboen tantiamequin chieshtomenushe. —Esus tantiasho cuidenquo icquin Nuquin Papan abi yacno ëbi tabadmendac —quequin bédamboen tantianuna.

9 ¿Cuidnuenda Nuquin Papan nuqui Esus tantiamediac? Padenquo. Abëdi tabadmenuen Nuquin Icho Esuquidistu nuqui tantiamiac.

10 Aidi abi tantiaquid cuidmenquo icnuec abided cuidadec unësad caondash. Aidën padpidec choshon abi tantiaquidotedi buanshun abëdi tabadmendac. Unësaid uincuemiadobëdta unëسابi icquidotedi adoendac.

11 Ëbi adsho tantiashun mimbi nabocpadomboembidi Esus tantiec bédambo icnuec ëmbi chuiboed chuinanquiota. Adecbidi bédamboec tabadec: —Adequi tabadnuna —cananta.

Bédamboec tabadte Pabadon chiaid

12 Esus mibi chuibanquido bédamboen ista. —Nuquin Icbon chiacpadomboen chieshtoenquo icquin nuqui chuiquidën nuqui bédamboen chuibanec —quequin aido bédamboen tantiata. Mibi nashunquidombo neque. Aidon: —Nuquin Papan chiaid niaquenquo yec bédamboec tabadnuna —quequin chuisho bédamboen tantiata.

13 —Nuquin Papan chiaid bédamboen tantiaquidombo nec —quequin bédamboen ista. Adec chieshëmënenquo yec bédamboec tabadta.

14 Mibëd icquido naden chuiban. Chieshquid icsho: —Mibitsen chonoadta —cata. Dacuëdsho: —Dacuëndenda —cata. Esus bëdiactsëc tantiatsëcsho bédamboen chuiquin Esus tantiamequiota. Dada padishquo icsho nashunta. Aden nëshenquo icquin abitedi bédamboen ista.

15 Utsin chieshënac cuidnanenquo yec bédamboec tabadta. Mibëdtan Esus tantiaquidobëd bédamboec isanquin utsibotsen bédamboen ista.

16 Aden Esus tantiec ënëdenquo yec cuishonquianeta.

¹⁷ Adembidi Nuquin Papa chianequin: —Ĕmbi chiacpadomboen ěbi nashunquin utsibotsen nashunta, Papa, —quequin chianeta.

¹⁸ ĴMimbi chiacpadomboen Nuquin Papan nasho isunuidida mimbi: —Nuquin Papa bĕdambo iquec —cape? Nadoac bĕdambo ictsiash. Bĕdamboec tabadquin: —Mibi bĕdamboshĕ iquec, Papa, —cac bĕdambo ictsiash. Daic-sabudshumbic adembidi nac bĕdambo ictsiash. Paĕmbo icnubi adembidi. Mitsana icnuc adembidi. Mitsana nibĕdnubi adembidi. Utsibon chieshĕnaqui adembidi: —Mibi bĕdamboshĕ iquec, Papa —cac bĕdambo ictsiash. Aden Nuquin Papan: —Ma Esus tantiaquidon adono —quequin tantiacpaden mimbi natsiac.

¹⁹ Nuquin Papan Mayanĕn Nuquin Papan chiaid tantiamiac pamumĕdabimboec tabadenda.

²⁰ Aden Nuquin Papan Mayanĕn tantiamiac utsibontsen chuisho: —Mue nec —badedquo cainda. Chuishoba tantiata. —Nuquin Papan chiaidquo chuinu —qesho mamĕnshunenda.

²¹ Adenquo icquin: —ĴNuquin Papan chiaidquibida chuibanegue? Tantiabono —cata. Aden tantiashun Nuquin Papan chiaidquo isbanta. Aden isbanquin abimbo chuisho tantiashun: —Ai, Nuquin Papan chiaidquo chiec —qeshun aidĕn chuisho bĕdamboen tantiata.

²² Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquo chiec —qeshun aidĕn chuisho tantienda. Aidĕn chiacpadomboen naĭnda.

²³ Mibi Nuquin Papa chianembi. —Matses bĕdambo icmequid icquin mimbi chiacpadomboen aido name, Papa. Mimbi chiaidquo bĕdamboen tantiamequin bĕdamboen tabadme, Papa. Mimbi adoac bĕdamboec tabadnuc choashun con Icho Esusĕn: “Aido bĕdambo iquec,” catsiash, Papa —quequin Nuquin Papa chianembi mibi.

²⁴ Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquo iquendac.

²⁵ Nuquin Papa ěbi chianeta. —Abĕd icquidobĕdta Pabado bĕdamboen nameta, Papa —quequin Nuquin Papa chianeta.

²⁶ Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban.

²⁷ Nuquin Icbon tantiacpaden chuiquin dada uaombique. Ĕmbi dada uaboed nĕid isquin ambocquido Esus tantiaquidotedi chuiban.

²⁸ —Nuquin Icho Esuquidistun bĕdamboen ispashun —quequin mibi tantiembi. Padi. Aidtedi dada uaombi.

TESADONICA YACNOCQUIDON ISTE 2

Pabadon tauamboen chiaid

¹⁻² Pabado nebi. Tesadonica yacnocquido Nuquin Papabëdta Nuquin Icho Esus tantiaquido mibi chuioaquin dada uaimbi. —Nuquin Papan Esuquidistubëdtan bëdamboen isquin bëdambo icmepashun —caimbi mibi. Èbëd icquin Sidbanobëdtan Timoteyon: —Nuquin Papan adopashun —quequimbidi mibi tantiec.

Nuquin Papan Esusbëdtan matses cuidte chiaid

³ —Esus tantiaquidën: “Aden naic mibi bëdamboshë iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bëdiactsëc tantiatsëcboedombi nëbi Esus tantiabededosh,” quiosh, Papa. “Adecbidi bëdiactsëc tantianamboedi nëbi comapenec tantiananosh,” quiosh. Aden aido bëdambo icmec mibi bëdamboshë iquec, Papa —quequin chianembi mibi.

⁴ Mimbi aden bëdamboen naid Esus tantiaquido utsibo chuibeniombi. —Dadpenshun chieshënaqui chieshtoenquo icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

⁵ Adec chieshtoenquo icquid icquin nuqui naden tantiec. —Èbi chieshtomenquo icquid abitedishun naid tantiaquidquo nec. Adquid icquin icsambo icquido cuidquin bëdambo icquido Nuquin Papan bëdamboen isec —quequin nuqui tantiec. Adec chieshtoenquo icquin Esus tantiasho Nuquin Papan: —Adquido ëmbi namiacnombo chomeshun ëbëdi tabadmendambi —nuqui caindac.

⁶ Nuqui chieshënquidon naidtsen tantiaquid icquin Nuquin Papan aido cuidendac.

⁷ Aden nuqui chieshënquido cuidquin aidon nuqui natiamiaid nuqui bëpiscudmendac. Abi yacnuësh mayan bëdabo ambi comapenen tantiaquin namiaidobëd choshon Nuquin Icho Esusën adoendac.

⁸ —Icsaisambo yec matses cuidquid nebi —quequin tantiamenuec bëchamauanquiec choshon Nuquin Papa tantiesabo cuidendac. —“Nuquin Icho Esus tantiasho Nuquin Papan mibi bëdamboen istsiash,” quequin chuisho tantiatipimbo iquebi —quequin abi tantienquo icsho Esusën cuidendac.

⁹ Cacumiacimboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icho yec bëdamboshë isadsho isec tabadtiapimbo iquendac.

¹⁰ Aden ambi icsaido cuidte ushëmbi Esus chosho abi tantiaquido: —Èbi cuidmenquo icnuec abided cuidadaid Nuquin Icho bëdamboshë iquec —quequin aton Icho isec tabadendac. Èmbi Esus chuibanac aid tantibenondaico icquin mimbitsen Esus chosho isendac.

¹¹ —Aidbëdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bëdamboen tabadme, Papa. Aido: “Esus tantiaquin ambi chiapadomboen natiadquo iquebi,” qesho ambi chiapadomboen name, Papa. Comapenen tantiaquidquo mibi neque. Adota, Papa.

¹² Aden mimbi con Icho Esuquidistubëdtan bëdambo icmiac Esus tantiec bëdamboec tabadtsiash, Papa. Adec bëdamboec tabadsho isash utsibo mibi

caic: “Abi tantiaquid icsho Esusbëd̄tan Nuquin Papan aden bëdamboen tabad-mec. Aton Icbo Esuquidistubëd̄ Nuquin Papa bëdamboshë iquec,” quependac utsibo, Papa —quequin Nuquin Papa chianembi mibi tantiaquin.

2

Icsamboshë icquidba chote chiaid

¹ Tantia, con utsibo. Mibitedi chuinu. —Abi yacno tabadmenuen buanuec Nuquin Papa yacnuësh Nuquin Icbo Esus ënden choac —quesho tantiaash

² dacuëdtanenda. Mibi yacnoshon ¿tsuntsin adec muaquin chuiposh? Aidon: —Tantia. Nuquin Papan Mayanën tantiamiacpadomboen chuinu. Nuquin Icbo Esus ënden choac —quec muapash. Ambembi chiaidien chuichitash. —Naden Pabadon chiaid iquec —quequin ëmbi dada uaidbimboecquid isquimbien chuichitash.

³ Adec muaid tantiaash: —Abimboen cachitosh —quenda. ¿Nuquin Icbobada chopadic? Padenquo. Utsibain choendac. —Nuquin Papa caidën chiaid tantiatiapimbo iquebi —quec matses icsamboec tabadnubien Nuquin Papa chieshënquidquo icsamboshë icquidba choash matses dadpenquo chuiquid dapa iquendac. Aid Nuquin Papan cuidtequidquo nendac. Aidba chöabi icnuc Esus choenquo iquendac. Icsamboshë icquidbain choendac.

⁴ Aid chuiquid dapa yanashic Nuquin Papa dëniacte bunquiec Nuquin Papa tabadte shubu uashunaidën puduedshun: —“Comapenen tantiaquin ëbi nashunquidquo nec,” quequin mimbi Nuquin Papa caid nibëdeque. Èbiuidtsëqui tantiatia —caindac matses abitedi chuiquin.

⁵ Aden mibi chuideniondami. ¿Tantienquioda ique?

⁶ Nuquin Papan tantiacpadënquo chomenuen uidënuac icsamboshë icquid nëbi choenquo iquec. Nuquin Papan tantiacpadënquo choendac. Èmbi chiondacadquid abi chomenquo icquid mimbi tantieç.

⁷ Nëbi isadenquo icquidën Satanasën namiac matsesën Nuquin Papan chiaid niac-niacbededec. Padnuen icsamboshë icquid choabi iquec. Aid chomenquo icquid nidabi icnubi icsamboshë icquid chuiquid dapa yantiapimbo iquendac. Abi chomenquo icquid nidmiambien

⁸ icsamboshë icquid matses chuiquid dapa iquendac. Adnubien Nuquin Icbo Esusën: —Èbien matsesën Icbombo nec —quequin matses abitedi tantiamenuec choshon icsamboshë icquid: —Unësta —caquinuidtsëqui unës uashunendac.

⁹ Adec Esus choabi icnuc icsamboshë icquid chuiquid dapa yanendac. Adquid yanshumbic Satanasën tantiamiacpadomboen comapenen tantiaquin dadpenquo nabanquin ismendac. —Comapenen tantiaquidquo nëbique. Istac —quequin ambembi chiaid tantiamenuen aden nadatiambo icquin nabanquin ismendac.

¹⁰ Adec icsauidequi tabadquid yec comapenec muasho tantiaash: —Abimbo caic —quependac Èsus tantiesabo Nuquin Papan cuidtequido yec. Aidon Esus chuibenequidën Nuquin Papa yacno tabadte abimbo chuisho pamumëdacadbimboen tantiatiapimbo icquin ambembi chiaiduidtsëqui tantien-dac.

¹¹ Aden ambi chiaid niac-niacuidequi icsho Nuquin Papan: —Abi bunaidquo ambembi chiaidquo chuisho ma tantiapanuna —quequin namiac: —Mue nec —quequin tantienquo iquendac. Utsi muasho tantiaash badedi: —Abimbo chieç —quetsiash tantienquo yec.

¹² Aden ambi chiaidquo tantiatiapimbo icquin aid niac-niaquec icsateuidi bunsho Nuquin Papan cuidquendac.

Nuquin Papan tantiamiaid

¹³ Nuquin Icbon mibi tantiaquiec. Ĕndenquimboshē matses uabi Nuquin Papa nuqui caic: –Ĕbi yacno tabadmenuen Esus tantiamequin aido bēdambo icmendambi –quepampic. Adshumbic aidēn chiapadomboen aton Mayanēn namiac Nuquin Papan chiaidquio tantias̄h Esus tantiec mibi bēdamboec tabadcuendac. –Adquiobidi iccosh –quesho tantias̄hun Nuquin Papa chianembi naden. –Aden aido bēdamboen namequid yec mibi bēdamboshē iquiec, Papa –quequin chianembi mibi tantiaquin.

¹⁴ Nuquin Papan chiaidquio Ĕmbi chuibanac mimbi Esus tantiabenon-dac. Abi yacnoshon Nuquin Icho Esuquidistupadquio bēdamboshē icmenuen aden Nuquin Papan mibi Esus tantiamiac.

¹⁵ Ĕbi adsho tantias̄hun Ĕmbi chiondacadomboen chieshtoenquio icquin Esus tantiata. Ĕmbi mibi bēisquin chiondaibēdta Ĕmbi dada uaquin abimbo chiondaid bēpiscudenda.

¹⁶ Nuquin Icho Esuquidistubēdtan Nuquin Papan nuqui tantiaquin bēdamboen isec. Adembidi: –Nuquin Papa yacno Esusbēd iquendabi –quequin tantiamequin dayacquio yacimboecnuc nuqui icmec.

¹⁷ Adqid icsho chianembi naden. –Tesadonica yacnocquido chieshtomenquio icquin Esus tantiamequin bēdamboec tabadquid icme, Papa. Adembidi bēdamboec chuinanquid icmequin nashunanquid icme, Papa –quequin Nuquin Papa chianembi mibi tantiaquin.

3

Nuquin Papa Ĕbi chianeta, quiaid

¹ Tantia, con utsibo. Mibi chuinu. Nuquin Papa Ĕbi chianeta. –Nidaid utsi-utsiec yacno nidmeshun Pabado chedo matses dadpenquio Esusēn naid bēdamboen chuibame, Papa. Mimbi bēdamboen chuimiāc Ĕmbi Esus tantibenondacadomboen utsibon dadpeshun Esus tantiabentsias̄h, Papa.

² Aden Esus chuibansho isun Esus tantiesabo chieshēmēnquidon: “Pabado cueschitono,” casho cuesmenda, Papa –quequin Nuquin Papa Ĕbi chianeta.

³ Nuquin Icho bēdambo iquiec. Muesambo icquin ambi chiapadomboen nuqui bēdamboen dayun uaindac. –Ĕbi tantienquio yanushe –ques̄hun nuqui chieshtomenquio icquin Satanas nuqui yuametiapimbo iquendac.

⁴ –Aden Nuquin Icbon bēdambo icmiāc Ĕmbi chiapadomboen naboedi adembidi Tesadonica yacnocquidon naindac –quequin tantiombi.

⁵ Aden mibi tantiaquin naden Nuquin Papa chianembi: –Con Icho Esuquidistun tantiamiacpaden: “Nuquin Papan Ĕbi tantiaquiec,” quequin Tesadonica yacnocquido tantiameta, Papa. Esusēn chieshtoenquio icquin nacpadomboembidi aido chieshtoenquio icquid icmeta, Papa –quequin Nuquin Papa chianembi.

Esus tantiaquido uspuenquio icquid

⁶ Tantia, con utsibo. Nuquin Icho Esuquidistun: –Ĕbi chuibeneta –caidquio icquin mibi chuinu. Esus tantiaquido utsi-utsiec Ĕmbi mibi chiondaid niac-niaquec chieshuidequi icsho isash aibēd chieshec tabadna.

⁷ –Ĕbēd iquiec Pabado dayacquio iccondacpadquiec chieshenquio yequien tabadt̄iad,” quiosh –quiosh mibi caic. Abimbo mimbi cac. Mibēd yec dayacquio iccondabi. Chieshenquio yec chonoadteniondabi.

⁸ Mibi pete meniac ζcon piucquid mibi menenquiodambi ictionda? Bedquin mambi mibi menianepondac. —Ēbi meniac aton na naimēdnushe —quiash con piucquid bednuec chonoadteniondabi.

⁹ —Esus tantiaquidon abi chuibanquid menenquio icquid —ζquectabi ique? Padenquio. Esusēn naid chuibanquid ambi chuibanaidon meniaquien bēdambo ictsiash. —Chieshenquio icquin ěmbi nacnensho isun ma adembidi Tesadonica yacnocquidontsen nanu —quiashini chonoadteniondac.

¹⁰ Mibēd tabadquin naden chiondambi. —Aton na nacnenenquio yec chieshuidequi icsho pemenquio icquid —quequin chiondambi.

¹¹ Mibi caic: —Utsi-utsiec chieshuidequi tabadosh. Utsi icsaiduidquo chiec tabadosh —quetuidosh.

¹² Uspun tantia. Nuquin Icho Esuquidistun chiaid mibi chuinu. Chieshuid- equi tabadenda. Mitsanabi penuec chonoadta.

¹³ Nuquin Papan chiacpadomboen naic chieshtoenda. Chieshtoenquio icquin bēdamboen-uidi nata.

¹⁴ Nēid dada uaquin ěmbi chiaid niac-niacsho ista. Adec icsasho isash: —“Icsamboen naombi,” quequin ma tantiabenu —quiash abēduidi iquenda.

¹⁵ Aid chieshēnenquio yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bēdamboequien tabadtiad —quequin chuia.

Pabadon ěnquin chiaid

¹⁶ Mibi tantiaquin Nuquin Papa chianembi naden. —Bēdambo icmian- quidquio icquin Con Icbonguio ma aido dacuēdenquio icquid icmepanuna, Papa. Aidobēd ma Esus tēshēdenquio icpanuna, Papa —quequin Nuquin Papa chianembi.

¹⁷ —Ista. Ēmbimbo dada uaid nēid neque —quequin ěmbi nēidtedpactsēc dada uaid isun: —Pabadon chiaidquio nec —quequin mimbi tantiendac.

¹⁸ —Nuquin Icho Esuquidistun bēdamboen ispashun —caimbi mibi. Padi. Aidtedi dada uaombi.

TIMOTEYON ISTE 1

Tauamboen chiaid

¹ Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquio nebi.

² Ëmbi chiondac Esus tantiabenash con mado icbobimbocquid mibi neque. Mimbi iste nëid dada uanu. Mibi tantiec: —Nuquin Papan aton Mado Nuquin Icho Esuquidistubëdtan con mado bédamboen isquin bédambo icmepashun —quioibi.

Chiaid utsi chienda, quequin chiaid

³ Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibëdta nact-suaquin Nuquin Papan chiaid chienda —cata.

⁴ Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic naded cuëmëdpampic. Aidën tsyuecquiduidtsëqui bédambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquio bédamboen tantiemepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bédamboen chiec,” quec mibëdi chushcananeque. Nuquin Papan chiaidquien chuita —cata. Nuquin Papan chiaid bédamboen chienquio icquido aden chuita.

⁵ Adshumbic aidobidi naden chuita. —“Matses ma bédamboec tantiananu,” quequin Nuquin Papan chiaidquio chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado.

⁶ Mimbi aden chiacpadomboen nainquio icquidoen Nuquin Papan chiaid bédamboen tantienquio yec abembi onquec.

⁷ Adquidon: —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuec aid chuibanquid icte bunebi —queboedombi Nuquin Papan chiaid bédamboen tantienquio icquin icsamboen chiec.

⁸ —“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquio. Ma aidi bédambo iqueyoc. —Nëid tantiashun ma abi icsaid ënu —queshun aid abimbo chiac bédambo ictsiash.

⁹ ¿Bédambo icquid chuiquinda Nuquin Papan Moises dada uamepampic? Padenquio. Icsambo icquido chuiquimbien adopampic nadquido chuiquin. Nëidic Nuquin Papan chiaid niac-niacquido. Nëidic aton chuiquidën chiaid niac-niacquido. Nëidic Nuquin Papa tantiesabo. Nëidic Nuquin Papa mamënsunquido. Nëidic anibi cuesunequido. Nëidic amëbi cuesunequido. Nëidic cuesunianquido.

¹⁰ Nëidic aton chidopenquio chudquido. Nëidic aton bënëpenquio chudmequido chido. Nëidic aton chido bunenquio yec dada daëd chichudnanquido. Nëidic matses utsi bedshun yuaquido. Nëidic muaquido. Nëidic Nuquin

Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic.

¹¹ Adembidi Esus chuibenequidon: —Adquid icsambo iquec —quequin chiec. Bëdamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiemi.

Nuquin Icbon Pabado bëdamboen isbenaid

¹² Tantia, mado. Mibi chuinu. Nuquin Icho Esuquidistun: —Pabodon ëbi bëdamboen chuibantsiash —quequin tantiashun: —Ëbi chuibenequid icta, Pabado —qeshun ëbi bëdamboen namec. Adoaid icquin: —Ëbi namequid yec mibi bëdamboshë iquec, Icho —quequin Nuquin Icho Esus chianemi.

¹³ Ënden adenquio iccondabi. Nuquin Papan Madopenquio danquin Esus icsamboen chuishunondambi. Abi tantiaquido chieshënnquin cuesun secate bunondabi. —Aton Mado Esus tantiasho Nuquin Papan ëbi bëdamboen istsiash —quenquio icquin adopondambi. Adshobini: —Pabodon abimbo tantiabi iquec —qeshun Nuquin Icbon cuidenquio icpanëdash.

¹⁴ Adec icsambo icquid icsho Nuquin Icbon tantiamiac: —Abi tantiasho ëbi bëdamboen isbentsiash —quequin Esusquio tantiabenondambi. Esus tantiaquin matsesten tantiaquiemi.

¹⁵ Tantia, mado. Naden chiaid bëdambo iqueque. —Icsambo icboedën abi tantiasho cuidmenquio icnuec Esus matsesac caondash —quequin chiaid bëdambo iquec. Ëbibic icsamboshë icpondabi. Utsibon Nuquin Papan chiaid bëdiactsëc niac-niacnubi ëmbimbo comapenen niac-niaccondambi.

¹⁶ Adec ëbi yuec icsambo icsho Nuquin Icho Esusën baded cuidenquio icquin abibi tantiamequin bëdamboen isbempondashi. —Pabado bëdamboen isaid chiac utsibo: “Pabado icsambo icboedi Nuquin Papan bëdamboen isbenac. Adembidi Esus tantiasho Nuquin Papan ëbitsen bëdamboen isendac,” quequin ëbi tantiendac. Adquid unësascho ëbi yacno tabadmendambi —qeshun abi tantiamequin Esusën bëdamboen isbempondashi.

¹⁷ Aden tantiaquin nadoemi. —Nuquin Papa ambiuidtsëqui abitedi namequid yec abitedishun Icbombo nec. Unëstiapimbo icquid nec. Isadenquio icquid nec. Adquid abentsëcquiobi icnuc abipadquid utsi nibëdec. Adquid icsho abitedishun: “Mibi bëdamboshë iquec, Papa,” capashun ënenquio icquin —caimbi.

Matsesën mibi chiondapadombota, quiaid

¹⁸ Mibi con mado icbimbimboecquid neque. Ëmbi chiapadomboen Nuquin Papan chiaidquio chuibanta, mado. Ënden mibi Esus chuibanquid yanabi icnu Nuquin Papan oncamiac nuquibëdtan Esus tantiaquidën mibi chuibante chuipondash. —Esus bëdamboen chuibanquin Timoteyon Esus tantiaquido bëdamboen namendac —quequin mimbi chuibante chuipondash. Aidën chiapadomboen chieshtoenquio icquin Nuquin Papan chiaidquio chuibanta.

¹⁹ Aden Nuquin Papan chiaid niaquenquio icquin Esus tantiaquiec bëdamboec tabadta. Utsiboen adenquio iquec. Icsamboec tabadquin Nuquin Papan chiaidquio niac-niacquin Esus tantienquio yanosh.

²⁰ Adecandedo caidbëdtan Imeneyo caidën aden Esus tantienquio yanosh. Aid daëdshun Nuquin Papa muauaquin icsamboen chuisho nadopombi. —Adquid Satanasën natiambo icmepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

2

Nuquin Papa bēdamboen chianete chiaid

¹ Tantia. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbēda mibi bēdamboen tantiamequin bēdamboen ista, Papa. Matses nashunquidquo yec mibi bēdamboshē iquec, Papa —quequin Nuquin Papa chianenuna.

² Adembidi Nuquin Papa chuiquin: —Chuiquid dapambo pedesidente caidtedibēda chuiquid dapa utsibotedi bēdamboen tantiameta, Papa. Adoac aidon bēdamboen namiac cuesun secananenquo yec matses abitedi bēdamboec tabadtsiash. Adnubi abi chieshēnquido nibēdnuc Esus tantiaquido abi tantiec bēdambo ictsiash, Papa —quequin Nuquin Papa chianenuna.

³ —Con matses Esus tantiameta, Papa —quequin nuqui aden chianesho tantias: —Bēdamboen chiec. Ēbi bunaidquo chiec —quendac Nuquin Papa nuqui cuidenquo icquin abēd tabadmequid.

⁴ Matses abitedimbo cuidenquo icnuen matses bēdamboen iste bunquid yec: —Ma ěmbi chiaid tantiasun abided cuidadec unēsaid ma tantiapanu —quec Nuquin Papa.

⁵ Nuquin Papan chiaidquo tantiasun nuqui naden tantiec. —Nuquin Papa matses uaquid abentsēqui icnuc abipadquid utsi nibēdquiec. Abēd icboedi matsesun: “Nuquin Papapadquid icquin aid tantiamequid nebi,” quequin aton Madon matses chuipanēdash. Adecbidi aton Papa matses bēdamboen ismequid yampanēdash Esus. Aid abentsēqui Nuquin Papa bēdamboen ismequid nec.

⁶ Abi tantiaquid cuidmenquo icnuec abided cuidadec unēsac caondash —quequin chiaidquo nuqui tantiec. Nēbien Nuquin Papan tantiacpadomboen matsēsēn aden chiaidquo chuiben-chuibenec.

⁷ Adomboembidi Esus chuibenequidquo nebi. —Matses utsibo isadaid-pembo ěbi chuibeneta —Esusēn caondaaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

Esus tantiec cuēdēnacnoshon nate chiaid

⁸ Tantia. Dadatedi chuinu. Cuēdēnacno puduedshun Nuquin Papa chuinec bēdamboequien tabadtiad. Nēish bēdanash chieshēnanenquo icquimbien Nuquin Papa chuitiad.

⁹ Chidobotsen chuinu. Esus tantiec Esus tantiaquido cuēdēnacno nidnuec: —Mabi isnu —quequin tantienquo yec bēdamboec dasiuidta. Bēdamboec tabadquid dasiuidachimboec dasiuidta. Chido chishpidabimboec dasiuidenda. —Mabi isnu —quenquo yec Esusquo tantianuec Esus tantiaquido cuēdēnacno puduedta.

¹⁰ —Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bēdamboec tabadta.

¹¹ Esus tantiaquido cuēdēnacnoshon dadan Nuquin Papan chiaid chuiban-sho tantiaquid chidon. —Aidēn chiacpadomboen natiapimbo iquebi —quequin tantienquo yec bēdamboen tantiec otacquo tabadquid chido.

¹² Esus tantiaquido cuēdēnacno puduedshun dada chuibanesa chidon. Adembidi dada ancaisa chidon. —Otaquien tabadquid chido —caimbi.

¹³ Dada Adan caidba Nuquin Papan matses uapampic. Adshumbic aton chido Eba caidtsen.

¹⁴ Aden dadabēda chido nacnenacsho isumbien Satanasēn: —Icsamequin tanu —qeshun muauac icsaquin chidomba Nuquin Papan chiaid niac-pampic. Adan padabi. Aden tantiaquin: —Dadan chido chuibanquid —caimbi.

15 Adec abia icsasho isun Nuquin Papan cuidac paëmbo icnuc bacuë tishquid chido abitedi nec. Nëbi Esus tantiaquid yanash ambi tishaido bëdamboen namequid nendac. Esusën chiacpadomboen natiadquio icquin matses tantiaquid nendac. Nuquin Papan chiaid niaquenquio icquid nendac. Aton bënëuidtsëqui chudmequid yendac Esus tantiaquid chidon. Adquid Nuquin Papan bëdamboen isquin abëdi tabadmendac.

3

Esus chuibanquid chiaid

1 Tantia. Utsitsen mibi chuinu. —Esus chuibanquid ictiadquio iquebi —quesho: —Bëdamboen nate mibi bunec —cata.

2 —Nuquin Papan chiaid chuibanquid nadquien ictiad —quequin anocquido chuita. —Bëdamboec tabadquid nec —utsibon caidquio Nuquin Papan chiaid chuibanquid nendac. Adquid chido abentsëc inquid nendac. Abi bunaid ënshun mëmunquidquio nendac. —Bëdamboen tantiaquidquio nec —utsibon caidquio nendac. Isedanquido bëdamboen isquid Nuquin Papan chiaid chuibanquidën. Nuquin Papan chiaid bëdamboen tantiamequin chuibanquid nendac.

3 Tantiadenuen acte paëmbo icquid aquenquio icquid nendac. Badedquio nëishenquio icquid nendac. Uimanëmënenquio icquid nendac. Chushcananteuidi bunenquio icquid Nuquin Papan chiaid chuibanquid. Pucquid bedteuidi bunenquio icquid nendac.

4 Aidën chiacpadomboen aton chidon aton bacuëbobëdtan naquid. Chieshenquio icquin aton papan chiacpadomboen naquid aton bacuëbon.

5 ¿Ambi chiacpadomboen aton chidobëdta aton bacuëbo bëdamboen namenquio icquinda Esus tantiaquido bëdamboen namepatsiashe? Padenquio ictsiash.

6 Ènden Esus tantiabenondaid chuiquin: —Èbi chuibanquid icta. Èbi bëdamboen chuiquin ëbi bëdamboen nameta —Esus tantiaquidon cac bëdambo ictsiash. Nëbimbo Esus tantiabenquid aden chienda. Chuibanquid icmiac adquidën Nuquin Papan chiaid badedquio niactsiashe. Satanasbimboec: —Èbiuidtsëqui bëdamboshë iquebi —quetsiashe. Adquid: —Èbi chuibanquid icta —cainda.

7 Ènden Esus tantiabenondaid mibi chuibanquid icmenun Esus tantiesabon: —Bëdambo icquid nec —casha tantiatata. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mëmëshuntsiashe. Adquid Satanasën badedi yuatsiashe. —Icsambo icquid nec —caid: —Èbi chuibanquid icta —cainda.

Esus tantiaquido nashunquid chiaid

8 Tantia. Esus tantiaquido nashunquidtsen chuinu. —Nuqui chuibanquidën chiacpadomboen ëbitedi nashunquid icta —quequin nadquid chuita. Utsibon: —Bëdambo icquid nec —caidquio nendac. Muesambo nendac. Tantiadenuen acte paëmbo icquid aquenquio icquid Esus tantiaquido nashunquidën. Pucquid bunquin ampenquio icquid nendac.

9 Nuquin Papan chiaid bëdamboen tantiaquinc Esus tantiaquinc caic bëdamboec tabadquid Esus tantiaquido nashunquid. Adquid bëdambo ictsiash.

10 Esus tantiaquido nashunquid icmenun: —¿Bëdambo icquidida nëid nec? —quequin chuimiac utsibo: —Ai, bëdambo icquid nec —abitedi quesho tantiasun: —Esus tantiaquido nashunquid icta —cac bëdambo ictsiash.

¹¹ Adquidën chido: —Bëdambo icquid nec —utsibon caidquio nendac. Utsi icsaiduïdi chienquio yec bëdamboec tabadquid adquidën chido. Tantiadenuen acte paëmbo icquid aquenquio icquid aton chidon. Ampenquio yec bëdamboec tabadquid. Adquidquio Esus tantiaquido nashunquidën chido bëdambo ictsiash.

¹² Esus tantiaquido nashunquidën chido abentsëqui inquid. Ambi chiacpadomboen aton chidon naquid. Adembidi aton bacuëbon.

¹³ Abi nashunquidën Esus tantiaquido bëdamboen nashunsho isun utsibon bëdamboen isendac. Adoaidën dayacquio icquin abi utsibo nashumbanquin dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ënquin chiombi.

¹⁴ Tantia. Utsi mibi chuinu. Mibi yacno nëbi nidtiadquio iquebi. —Nidenquio icmane —qeshun nëid dada uaic nebi.

¹⁵ Èbi mibi yacno badedquio nidabi icnuc: —“Esus tantiaquidon nadoquid,” quequin Pabaton chiacpadomboen nanuna —cata. ¿Tsutsi tantiaquido nuqui nepe? Unëstiapimbo icquid Nuquin Papambo nec. Aid tantiaquido yec shubu abentsëquën tabadquidobimboec nuqui iquec. Adquid icquin Nuquin Papan chiaidquio tantiaquïn nuqui Esus chuibenec.

¹⁶ Èndenquio abi bëdamboen ismequid ambi tantiamiabi icnëdaïdi nëbi Nuquin Papan tantiamiaïd Esus bëdamboshë iquec.

Aid Nuquin Papan matsesmepanëdash.

Nuquin Papan Mayanën: “Nuquin Papapadquidquio icsaisambo Esus nec,” quequin tantiamec.

Matsesën unës uaqi uincuenaid yec Nuquin Papan abi yacnoshon uaido mayan bëdabon isaidquio Esus nec.

Abi chuibeneguidën nidaïd utsi-utsiec yacno nidshun chuibeniac utsin-utsinquën Esus tantiabenc caosh.

Aidquïobi Nuquin Papan abuc nidmeshun abëdi tabadmeoapanëdash.

4

Utsibon icsamboen chiaïd

¹ Tantia, mado. Nuquin Papan Mayanën tantiamiaïd mibi chuinu. —Esus chote nëbi icnuc abi tantiaquidon utsin-utsinquien Esus tantienquio yanendac. Satanasën yuabo podobitsi icsabon muaquin pausunac matsesën chuïsho tantiaïshun Esus tantienquio yanendac —quequin Nuquin Papan Mayanën abimbo tantiamïoshi.

² Aden muaquidon: —Abimbo caimbi —quequin bëdambo icquid damianquien aden muaquin chiendac. —Nuquin Papan cuidnushe —quequin tantienquio iquendac.

³ Adquidon naden chiendac. —Dadan chido bedenda. Chidon dada bedmenda. Padenquio yec tabadta —quequin icsamboen chiendac. Adembidi: —Aidquio petemaid neque. Penda —quequin pete abentse-abentsen chiendac aid pete bëdambo icnubi. ¿Atotsi quequin Nuquin Papan pete uapampic? —Èmbi chiaïdquio bëdamboen tantiaïshun Esus tantiaquidon: “Nuquin Papan pete uaid bëdambo iquec,” quequin ma penu —quequin Nuquin Papan pete uampic.

⁴⁻⁵ Aidën pete uaidtedi bëdamboshë iquec. —Èmbi pete uaid bëdambo iquec. Ma penu —qeshun Nuquin Papan pete icmiaïd ma petequid neyoc. —Mimbi pete uaid bëdambo iquec, Papa —qeshun pete isuidenquio icquin penuna.

Esus chuïbanquid icquin bëdamboen nata, quiaïd

6 Esus tantiaquido ěmbi chuibocpadomboen chuibanquin mimbi bĕdamboen natsiac, mado. Bacuĕctšĕsho min matsesĕn Nuquin Papan chiaidquio mibi chuibanĕdash. Aidĕn chiaid tantiaquid icquin Esusĕn chiacpadomboen nate bunquin ěmbi chiacpadomboen mimbi chuibantsiac.

7 Con tsusedpabon ambembi chiampidbĕdta nĕbi matsesĕn ademibidi ambembi chiaid tantienda. Nuquin Papan chiaidquio niactiapimbo yec bĕdambo icte bunquiota.

8 Aton dada uidĕnquo icmenuec titinquetanequid nuquin matses nec. Esus tantiaquido bĕdambo icnuec ĵmitsipadquio icpec? Nuquin Papa tantiaquiec ambi chiaid niaquenquio yec bĕdamboec tabadquid nec. Adquid unĕsh Nuquin Papa yacno nidash bĕdamboshĕ icquid iquendac.

9 Ĕbi adsho tantiash: –Abimboen caic –queta.

10 Adec: –Abi yacno abĕdi tabadendabi –quequin Nuquin Papan chiacpadomboen ĕnenquio icquin nanuna. –Esus tantiaquid unĕsacsho cuidenquio icquin unĕstiapimbo icquidĕn Nuquin Papan abĕdi tabadmendac –quec chieshtoenquio yec bĕdamboec tabadnuna.

11 Ĕmbi chuiboed chuibanta, mado. –Nuquin Papan chiacpadomboen nanuna –quequin chuibanta.

12 Mibi nĕbi caniaid neque. Bĕdamboec tabadta, mado. Ĕnden caniaidĕn: –Nĕbi caniaid icquin Nuquin Papan chiaid mimbi tantienquio iquec –canushe. Bĕdamboec tabadta. –Ĕsus tantiaquido utsibotsen ma ĕbi yacpadec bĕdamboec tabadnu –quiash adta. Bĕdamboen chuibanquinc matses tantiaquinc Esus tantiaquinc Nuquin Papan chiaid niaquenquio icquinc caic bĕdamboec tabadta.

13 Ĕbi ano nidabi icnuc Nuquin Papan chiaid adenuidi chuibanta. –Nuquin Papan chiacpadec bĕdamboec tabadnuna –quequin Nuquin Papan chiaid isbanquin matses chuibanta. Aden bĕdamboen tantiameta.

14 Ĕnden mibi mamishquin chiondaid ĵada tantie? Ĕnden Esus tantiaquido icquin tsusio dapabon mibi mamishbededondash. Adshobien Nuquin Papan aido mimbi chuibante chuimepondash. Adoac: –Nuquin Papan chiaid bĕdamboen chuibanquid Timoteyo iquendac –quequin chuipondash. Chieshtoenquio yec adquid icta, mado.

15 Ĕmbi dada uaquin chuiboedtedi isbanshun ĕnenquio icquin ěmbi chiacpadomboen bĕdamboen nabanta, mado. –Ĕmbi adsho isun ma ĕmbi chuibanaidon: “Nuquin Papan chiaid chuibanquidquio yanosh,” ma ĕbi canu –queshun bĕdamboen chuibanta, mado.

16 –Nuquin Papan chiaid niacmane –quec mibibi bĕdamboec tantiadta, mado. –ĵAdabi bĕdamboec tabadpeba? ĵAdambi Nuquin Papan chiaidquio muainquio icquin chuibampoba? –quec mibibi tantiadta. Bĕdamboec tabadquin Nuquin Papan chiaidquio ĕnenquio icquin chuibanta. Aden Nuquin Papan chiacpadomboen naic aidbĕd mibi tabadendac. Mimbi chuibanaidobidi adoaindac.

5

Esus chuibanquidĕn bĕdamboen chuite

1 Nuquin Papan chiaid chuibanquid icquin dada ĕnden caniaid chushcainda, mado. –Esus tantiaquidĕn nadoquid yendac –quequin bĕdamboen chui: –Con pabimboecquid nec –quequin. Nĕbi caniquid: –Con utsibimboecquid nec –quequin ademibidi bĕdamboen chuiban, mado.

2 –Con tabimboecquid nec –queshun macho bĕdamboen chuiban. Chido machobudabi icquidtedi chibibimboecnuc isquin: –Nĕid chudtiadquio ichitebi –quenquio icquin Nuquin Papan chiaidquio chuibanta, mado.

Chido niantembo chiaid

³ Tantia, mado. Esus tantiaquidon abēdtan Esus tantiaquid icsho niante nashunte chuinu. Niante aton matses nibēdquid: —¿Tsumsimbini nashumpatshashba? —quequid Esus tantiaquidon nashunquid.

⁴ ¿Ada nianten tishaido icpec? Aidēmbi ani nashuntsiash. ¿Ada aton baba icpec? Aidēmbi aton chichi nashuntsiash. Aidēmbidi aton shanua-chotsen nashuntsiash. —Ēbi nashundened neque. Nēid nashunu —qeshun nashuntsiash. Aden ambi chiacpadomboen nasho isash: —Bēdamboen naic —quetsiash Nuquin Papa.

⁵ Padnuc aton matses nibēdquidēnquo nianten Nuquin Papa chianequid: —Nuquin Papan ēbi nashuntsiash —qeshun. —Mimbi ēbi tantiaquieque. Ēbi nashunta, Papa —quequin Nuquin Papa chianequid niante icsho abēdtan Esus tantiaquidon nashunquid.

⁶ Niante utsimbien ambi tantiauidi naic. Petebēdta acteuidi tantiaquin abi bunaiduidi naic. Adquidēn unēsacimboecquin Nuquin Papa tantienquo iquec. Adquid Esus tantiaquidon nashunenquo icquid.

⁷ Ēmbi aden niante nashunte chuibod Esus tantiaquido utsibotsen chuita, mado. —Aton matses nibēdquid niante nashunenquo icsho: “Esus tantiaquido icsambo iquec,” utsibon canushe —qeshun chuita.

⁸ Aton shubun icquidotsen Esus tantiaquidon nashunquid. Abēd icquido menenquo yec pemenuquo yec quec nashumēnenquo icquid icsamboshē iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquo icquid icsamboshē iquec.

⁹ —Nēidtedi chido Esus tantiaquido nashunquidombo iquec —quequin abi cuēmēdquid abi cuēmēdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquo 60ted matamec machobudaidquo. Aton bēnēuidtsēqui chudmedenedquo.

¹⁰ —Matses nashunquid nec —utsibon caid. Bacuē bēdamboen caniuadened machon. Isedanquido bēdamboen isquid. Esus tantiaquido nashundenedquid. Matses daicsabudacsho nashunquid. Adec bēdamboec tabadquid: —Esus tantiaquido nashunquid icta —cata.

¹¹⁻¹² Utsi niante machobudabi icquid: —Adquid icta —cainda. —Esusuidtsēqui tantiaquin abi tantiaquido nashunembi —queboedēmbi dada bunquin ambi chuibodi niachidansho isun utsibon: —Icsambo icquid nec —catsiashe.

¹³ Adquid shubu utsin shubu utsinquien isedben-isedbenec uspumbo yanash onqueteuidtsēqui buntsiash. Utsibo icsaiduidi chuibenequidquo ictsiash.

¹⁴ —Adquid niante machobudabi icquid dadan bedac bēdambo ictsiash —caimbi. Adoac bacuē tishoatsiash. Adshun codocaquinc sicaquinc daēdcaquinc catsiash. Adec bēdamboec tabadsho: —Icsambo icquid nec —Esus tantiesabon catiapimbo ictsiash.

¹⁵ Adquid niante machobudabi icquidēn utsin-utsinquien Esus tantienquo yanshun Satanasēn tantiamiacpadomboen nac caosh.

¹⁶ Niantebēd icquid utsi ¿ada Esus tantiaquid chido icpec? Aidēmbi niante nashunac bēdambo ictsiash. —Ēmbi nēid nashumbanuc niante utsi aton matses nibēdquidquo Esus tantiaquido utsibon nashuntsiash —qeshun abēd icquidēn nashunac bēdambo ictsiash.

Esus tantiaquido chuibanquid chiaid

¹⁷ Tantia, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidēn bēdamboen naosh? Adquidēn Nuquin

Papan chiaid bēdamboen tantiamequinc Esus bēdamboen chuibanquinc casho ambi chuibanaidon bēdamboen isquin nashunquid. —Ma penu —queshun menequid.

¹⁸ Adembidi chuiquin Nuquin Papan ambi chiaid dada uamepampic. “ ‘Penushe,’ qeshun adosbitsecquid bitsi secamenuen manemiaid baca bēnē utsibon dēnēshquid. ‘Adec chōoadquidēn ma penu,’ qeshun isadaidbon dēnēshesa.” quequin Nuquin Papan dada uamepampic. Nadembidi Nuquin Papan chiaid dada uapampic. “ ‘Naic cho. Mibi bēdamboen cuidquin menenu,’ cac chonoadsho abi chonoa uaquidēn menequid,” quequin Nuquin Papan chuipampic. Adembidi Esus tantiaquidon abi chuibanquid nashunquid.

¹⁹ Padnuc Esus chuibanquid caic: —Nuquin Papan chiaid niac-niacsho isombi —quequin matses abentsēcshun chuisho: —Abimboen cachitec —cainda. Dāēdshun chuisho: —Abimboen cachitec —cata. Adembidi abentsē chotsecquin chuisho tantiata.

²⁰ Esus chuibanquidēn Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpēnshun tantianubi adota. —Aden chuisho tantiaish dacuēdec: “Ēbitsen adembidi chushcapanundac,” qeshun ma utsibon Nuquin Papan chiaid niaquēnquio icnu —queshun chushcata.

²¹ Esuquidistubēdtan Nuquin Papan nuqui isec. Adembidi Nuquin Papan abi yacnoshon uaido mayan bēdabon nuqui isequē. Ēmbi chuibocpadomboen nata. Min matsesēn mimbi tantiaidēnquibi Nuquin Papan chiaid niacacsho adembidi chushcata. Shubu utsinguidon Nuquin Papan chiaid niacacsho adembidi. —Con matses Ēmbi tantiaidquio neque. Chushcainquio iquēmbi —cainda.

²² Nuquin Papan chiaid chuibanquid icmenuen nuqui naondacpadomboen badedquio mamishenda. Ambi naid yuen isquioshon ambi chiaid yuen tantiaquioshon: —Bēdambo icquid nec —quequioshon nata. —Esus chuibanquid icta —mimbi badedquio caboedēn Nuquin Papan chiaid badedquio niacsho isash: —Ambi: “Adquid icta,” caidbēd Timoteyo icsamboshē iquec —utsibo quenushe. —Ēbēdtan chuibanquid icta —badedquio cainda.

²³ —Daicsabudteniaccosh. “Pucu paēmbō yan-yanebi,” quiosh —quiosh mibi caic, mado. Acteuidi acashien mibi niaque. Actequid utsi paēmbō icquid pistēc ac ma pucu bēdanuequin.

²⁴ Tantia. Mibi padpiden chuinu. —Ēbēdtan namembi —canuen matsesēn naid bēdamboen tantiata. Utsi aton matses ismec icsasho: —Icsambo icquid nec —badedi catsiash aton matsesēn. Utsibic ismenquio yec icsasho: —Icsambo icquid nec —quequin badedquio tantienquio icquin yuecshun istuidshumbi adotsiash.

²⁵ Utsien ismequin bēdamboen nasho: —Bēdambo icquid nec —badedi catsiash aton matsesēn. Utsimbic ismenquio icquin bēdamboen nabansho: —Bēdambo icquid nec —quequin badedquio tantienquio icquin yuecshun istuidshun adembidi tantiaish. Ēbi adsho tantiaishun: —Nuquin Papan chiaid chuibanquid icta —badedquio cainda.

6

Matses yuaido chiaid

¹ Matses yuabo Esus tantiaquido icsho naden chuita. —Min icbo Esus tantiesa icsho bēdamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiacpadomboen nata —quequin yuabo chuita.

² Utsibi chuiquin: —Min icbo Esus tantiaquidbidi icsho: “Ëbipadquidi nec. Ambi chiacpadomboen natiapimbo iquebi,” cainda. “Ëbipadquid icsho aid tantiaquin con icbon chiacpadomboen nanu,” quequin min icbo bēdamboen nashunta —quequin yuabo chuita. Ëmbi chuiboedtedi Esus tantiaquido chuiban. —Adota —quequin chuibanta, mado.

Piucquid bunquin utsibon ambembi chiaid

³ Mimbi: —Nuquin Papan chiaid niaquenquio yec bēdamboec tabadnuna —quequin Nuquin Icbon chiaidquio chuisho: —Aden chuisho tantiatiapimbo iquebi —quequin ambembi chiaid chuiquid icsambo iquec. Adquidēn chuisho tantienda, mado.

⁴ Aden icsamboen tantiaquidēn: —Ëmbi chiaiduidtsēqui bēdambo iquec —quequin icsamboen chuibanendac. —Mimbi icsamboen chuinuc ëmbimbo bēdamboen chiec —quec chushcanantiadquio iquendac. Abembi onque-teuidi bunendac. Adquid yuec onquesho tantiash: —Utsi onquetiapimbo icnuc abentsēqui onquebudec —quec utsibo nēishendac. Adquidbēd chushcananec muauananec icsamboec tantiashunanendac.

⁵ Pabiate shēcūē nibēdacbimboen Nuquin Papan chiaidquio bēdamboen tantienquio yec chushcananendac. Nuquin Papan chiaid chuibanquidēn piucquid dadpen bedte danec chuibanquidbidi ictiadquio iquendac.

⁶ Nuquien Nuquin Papa tantiaquiec bēdamboec tabadec nuquin na dadpen bedte bunenquio yec bēdambo ictsia.

⁷ Tishac chucactscnuc nuquin na nibēdpanēdash. Adembidi unēsquin nuquin na nuqui buantiapimbo iquec.

⁸ Nuquin pete dashcutebēd icnuc utsi bunenquio yec bēdambo nuqui ictsia.

⁹ Piucquid dadpen bedshun dadpen dayun uate bunquido Esus tanti-aidtsash badedi chieshtotsiash. Abi bunaiduidquio bednuen mēmunenquio icquin icsamboen nabantsiash. Aden Nuquin Papan chiaid niac-niacquin icsamboen naic quenenash adenuidi naic unēsash icsambo icquido cuidacno nidendac.

¹⁰ Adec piucquid natiambo bunquido aid bednuec baded-badedquiec icsadendac. Adquido: —Esus tantiembi —queboedobi padenquio yanash: —Esus tantienquio yanchitombi —quec natiaic tabadendac.

Bēdamboec tabad, quiaid

¹¹ Mibi Nuquin Papa tantiaquidquio neque. Piucquid bedteuidi bunenquio yec bēdamboec tabadte bunquiota, mado. Nuquin Papan chiaid niaquenquio yec chieshtoenquio icquin Esus tantiata. Matssetsen tantiec nēishēmēnenquio yec bēdamboec tabadta.

¹² Utsibon chieshēnaqui chieshtoenquio icquin Esus tantiaquiec bēdambo icta. Unēsash Nuquin Papabēd tabadnuec adta. —Con Mado Esus tantiaquiec unēsacsho ëbēdi tabadmendambi —queshun Nuquin Papan Esus tantiamiac mimbi Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimbi tantiamiondaque. Adembidi aid tantiaquiec bēdamboec tabadta.

¹³ Abitedi uampidēn Nuquin Papan nuqui isequē. —Adquid nebi —quequin ancanquid dapa Ponsio Pidato chiec dacuēdenquio icnēdaidēn Nuquin Icbo Esuquidistuntsen nuqui isequē.

¹⁴ Esus tantiaquin chieshtoenquio icquin aidēn naidquio chuibanta. Nuquin Icbo Esuquidistu choabi icnuc ëmbi chuiboed niaquenquio yec bēdamboec tabadta. —Esus tantiaquido icsambo iquec —utsibo quetiapimbo icnuc adta.

15 Nuquin Papan tantiacpadēnquio aid ushēmbi Esuquidistu nidaidēn padpidec choendac. ¿Esus chomequid mitsipadquio icpec? Icsaisambo yec bēdamboshē icquid nec. Aid abentsēcquiobi abitedishun Icbombo nec. Aidēmbi chuiquid utsibo abitedi namendac. Aidquio chuiquid utsin dēniactiapimbo iquendac.

16 Aid abentsēqui unēstiapimbo icquid nec. Bēchamauanquiescho istiapimbo yec utsibo tabadec. Aidi matsesēn istiapimbo icquid nec. Adquid icsho: —Mibiuidtsēqui abitedishun Icho yec mibi bēdamboshē iquec, Papa —quequin Nuquin Papa chianenuna ēnenquio icquin.

Aton na dadpen dayun uaquido chiaid

17 Aton na dadpen dayun uaquido naden chuita, mado. —“Con na dadpenquioshē icnuc ēbiuidtsēqui bēdambo iquebi,” quenda. Nibēdantiapimbo icquid danquin mimbi dayun uaiduidtsēqui tantienda. Nuquin Papambo tantiaquiota. Aidēmbi matses bēdambo icmenuen aton na bedmec —cata.

18 Adquidobidi chuiquin: —Bēdamboec tabadquin utsibo nashumbanquiota. Adembidi cudasenquio icquin mitsana utsibo menianeta.

19 “Mimbi bēdamboen naoque. Ēbēdi tabadmequin mibi bēdambo icmendambi,” Nuquin Papa camenuen adota. Adash unēsacsho Nuquin Papan abēdi mibi tabadmendac padpidec unēstiapimbo icnuc —quequin aton na dadpen dayun uaquido chuita.

Pabadon ēnquin chiaid

20 Ēmbi chuiboedquiobidi adembidi bēdamboen chuibanta, mado. Nuquin Papan chiaid chienquio yec abembi onquesho tantienda. —Bēdamboen tantiaquin abimbo caimbi —quequidobi muasho tantienda. Adquidobēd chushcananenda.

21 Aden icsamboen chuisho tantiashun: —Abimbo caic —quequin utsin utsinquien Esus tantienguio yanondashe. Adquido tantienda. Chieshtoenquio icquin Esusquio chuibanta. —Nuquin Papan con mado bēdamboen ispashun —quequin mibi tantiembi. Padi. Aidtedi chuiquin dada uaombi.

TIMOTEYON ISTE 2

Tauamboen Timoteyo chiaid

¹ Pabado nebi. Nuquin Papan tantiacpadomboen Esuquidistun: — Ëbi chuibeneta —caidquo nebi. —Ambi chiampicpadomboen aton Mado Esuquidistu tantiaquid unēsacsho Nuquin Papan abēdi tabadmendac —quequin Esus chuibenequidquo nebi.

² Con mado icbobimboecquid mibi neque. Mibi chuiquin nēid dada uanu, Timoteyo. —Nuquin Papan aton Mado Nuquin Icho Esuquidistubēdtan bēdamboen isquin bēdambo icmepashun —quequin mibi tantiembi.

Chieshtoenuio icquin Esus chuiban, quiaid

³ Con tsusedpabon nacpadomboen Nuquin Papauidi tantiaquin ambi chiacpadomboen natiadquo iquebi. Adquid icquin Nuquin Papa mibi chianembi. —Mibi tantiaquid Timoteyo bēdambo iquec, Papa. Adquo icmec mibi bēdamboshē iquec. Adquiouidi icmeta, Papa —quequin Nuquin Papa chianembi.

⁴ —Ëbi nidnu —quesho tantiash mibi shubiondaid tantiec mibi iste bunqueibi, mado. Ambo nidash mibi isec cuishonquetsiabi.

⁵ Naden mibi tantiembi. —Aton chichi Doida caidēn ani Eunisebēdtan aid daēdshumba Esus tantiabenuiacpadomboen Timoteyontsen nēbi Esus tantiaquiec —quequin mibi tantiembi.

⁶ Adquid icsho mimbi tantiondaid padpiden mibi chuinu. —Min Mayan nēidbēd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibēd tabadmiac. Adoaid icquin dacuēdenquo icquin Esus chuibanta, mado.

⁷ ¿Nuquin Papan aton Mayan nuquibēd icmiacta nuqui natia dacuēdpe? Padenquo. Comapenen tantiaquid yec nuquibēd icquin nuqui cuesambo icmec. Adembidi Nuquin Papan Mayanēn tantiamiac nuqui matses bēdamboen tantiec. Adembidi nuqui icsate bunaid namenquo icquin mēmnuquidquo icnuc nuqui bēdambo icmec.

⁸ —Adoaid nebi —queshun dacuēdenquo icquin Nuquin Icho Esus chuibanta. Adembidi dacuēdenquo icquin: —Pabado tantiaquiembi —cata. —Quēnēn nauedtsaid Pabado tantiatiaipi —quenda. Utsibon cuestiadquo icquin chieshēnaqui Nuquin Papan namiacpadec chieshtoenuio icquin Esus chuibanuna.

⁹ Nuquin Papan: —Bēdamboec tabadquid icmequin con Mado Esus tantiamembi —caido icquin adonona. ¿Nuqui bēdamboecuidi tabadshoda Nuquin Papan nuqui bēdamboen isbempondash? Padenquo. Ëndenquimboshē nidaidbēdta matses uabi Nuquin Papan: —Ëmbi chiaid niac-niaquec icsambo ichoedēmbi con Mado Esus tantiasho cuidenquo iquendambi —quequin ambi chuipampicpadomboen nuqui Esus tantiamiac.

¹⁰ Aden ambi chuipampid tantiamiabi icshumbic nēbi Esuquidistu matseshun matses tantiamiac. Adoac: —Abi tantiaquid unēsacsho icsaido cuidacno nidmenquo icquin unēstiapimbo icquid icmequin Nuquin Papa yacno abēdi Esuquidistun tabadmendac —quequin nuqui tantiec.

¹¹ Aden tantiaquin Esus chuibenequidquo nebi. —Ëbi chuibeneta —Esusēn caondaic yec Nuquin Papabēdta Esus tantiamequidquo nebi.

¹² Aden chuibeneshobini chieshënquin quënën nauedondash. Adoqui chieshtotiapimbo icquin Esus tantiemi. —Ëmbi tantiaidquo comapenen tantiaquin nabanquidquo Esus nec. Adquid icquin: “Ëbi tantienquo yanushe,” qeshun abí tantiamequin ëbi chieshtomenquo iquendac. Nidaidën choabi icquin Esusën ëbi chieshtoenquo icquid icmendac —quec dacuëdenquo iquebi.

¹³ Tantia, mado. Mibi chuinu. Ëmbi abimbo chiondaidquo chuiban: —Nuquin Papan chiaidquo nec —qeshun. Esuquidistu tantiaquinc matses tantiaquinc caquin adenuidi chuibanta, mado.

¹⁴ Nuquin Papan Mayan nuquibëd iqueque. Aidën namiac ëmbi chiondacadomboen Nuquin Papan chiaidquo chuiquin Esus chuibanta, mado.

Onesipodo chiaid

¹⁵ Ëmbi: —Cho —cac choenquo icboed mimbi tantiac, mado. Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo.

¹⁶ Onesipodo caidën nëbi bëdamboen isposhi. Ëbi quënën nauedacsho dacuëdenquo icquin isuan-isuanquin bëdambo icmioshi. Adsho isun: —Aton shubun icquidobëdta aid bëdamboen ista, Papa —quequin Nuquin Papa chianembi.

¹⁷ Aidëmbi nëmbo shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibëmbenequin istuidpondashi.

¹⁸ Mimbi isnubi Epeso yacnoshon aidëmbidi baded-badedquien nashundeniondashi. Adsho tantiaishun: —Nidaidën padpidec choshon Nuquin Icbon Onesipodo bëdamboen ispushun —caimbi.

2

Chieshtoenquo icquin chuiban, quiaid

¹ Chieshtoenquo icquin Esus chuibanta, mado. —Esuquidistun ëbi bëdamboen isec. Aidën bëdambo icmiac dayacquo icquin naimbi —qeshun chieshtoenquo icquin Esus chuibanta.

² Matses dadpeshun tantianuc ëmbi chuibansho mimbi tantiondac. Ëmbi aden chiondaid utsibotsen chuiban. Adshun mimbi chuiboedo abentse-abentsen chuita. —Nëidën chieshtoenquo icquin Esus chuibantsiash —qeshun: —Mimbitsen chuiban —cata, mado.

³ Sondado bëdambo icquidën nacimboen chieshtoenquo icquin bëdamboen nabanuna. Matsesën chieshënubi Esuquidistun chiacpadomboenuidi nanuna chieshtoenquo icquin.

⁴ Sondadon: —Mibi bëdambo iguec —camenuen aton chuiquid dapan chiacpadomboenuidi naquid. Ambi tantiaid nainquo icquinc utsibon chiacpadomboen nainquo icquinc caquin aton chuiquid dapan chiacpadomboenuidi naquidquo sondado nec. Adomboembidi Nuquin Icbon chiacpadomboenuidi nanuna, mado.

⁵ Ma nuquin matses titinquequidquo. ¿Mitsipadquo icpec? Aton uidën tanec aton matsesën chiaction abia titinquec chosho: —Bëdamboec titinquiosh —qeshun mauete menequid. Ambi chiaction titinquibi icsho mauete menenquo icquid. Adembidi: —Mimbi bëdamboen naoc —Nuquin Ico camenuen ambi chiacpadomboen chieshtoenquo icquin nabanuna, mado.

⁶ Ma nuquin matses tied uaquidquo. ¿Mitsipadquo icpec? Chonoadquidênquo dayacquo icquin aton tied uashun ambi nitsinaid peguid. Adem-bidi Esus chuibanquid icquin dayacquo icquin Esus chuiban-chuibanuna ênenquo icquin. Adoac utsibon Esus tantiabentsiash.

⁷ Aden êmbi chuiboed tantiata. Adsho Nuquin Icbon mibi bédamboen tantiametsiash.

Esuquidistu tantiata, quiaid

⁸ Utsibon chieshênubi Esus tantiata, mado. Aidi matsesash isadaidbo tsusedpa Dabidên tsyuecquid nepanêdash. Nuquin Papan uincuemênêdaidquo yec abi iquec. Aidquo tantiaquiota. Aid chuibeneguidquo nebi.

⁹ Aden chuisho chieshênquin bedshun icsambo icquid uidên uacbimboen shocosh nacenaidên mêtaniac mëyadebi. ¿Ëbi aden uidên uacbimboenda Nuquin Papan chiaid uidên uapadic? Padenquo. Êmbi chuibenetiapimbo icnuc Nuquin Papan chiaid chuibanquido utsibon adembidi chuibenêdac.

¹⁰ Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unêsacsho cuidenquo icquin abêdi tabadmendac —quec chieshtoenquo iccobi quênên nauedondaid yequi.

¹¹ Naden abimbo chiaidquo tantiash chieshtoenquo iccobi. —Abi bunaid ênshun Nuquin Icbon chiacpadomboen naquid chieshêmênquidên unês uacsho Nuquin Icbon abi yacno abêdi tabadmendac.

¹² Utsibon chieshênacqui chieshtoenquo icquin Esus tantiec unêsash abi yacno nidenda. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Êmbi tantiacmaido neque. Nêid nuquibêdi tabadmenquien ictiad, Papa,” quequin Esusên Nuquin Papa chiendac.

¹³ Aden abi tantiesabon ambi chiaid niac-niacsho isun Nuquin Icho Esusên ambi chiacpadomboen naquidquo icquin icsaido cûdendac.

Adembidi ambi chiacpadomboen ambi tantiaquido bédambo icmendac —quequin chiaid tantiashun ambi chiacpadomboen naquin Esusên naid chuibanuna chieshtoenquo icquin.

Nuquin Papan chiaid isbanta, quiaid

¹⁴ Êmbi dada uaquin chuiboed mibêd icquido naden chuibanta, mado. —Nuquin Icbon nuqui isnubi Esusquo chienquo yec ambembi chiaid chiec mibi chushcananqueque. Adenda. Adec chushcanansho tantiash matses icsambo yanegue. Padi —cata, mado.

¹⁵ —Mibi bédambo iquec —Nuquin Papa camenuen bédamboen nata. —Dacuêdtiapimbo iquebique. Êmbi naid ma Nuquin Papan isnu —queshun adota. Ambi chiaid bédamboen isbanshun chieshtoenquo icquin Nuquin Papan chiaidquo chuibanta, mado.

¹⁶ Ambembi chiaid chuiquidobêd onquec tabadenda. Adec onquequido icsambo icboedi buêdanquec Nuquin Papan chiaid niac-niaquec icsamboshê yanegue.

¹⁷ Tosho bedacchimboec adquidên chiaid tantiaquido dadpen yanegue. Adquidên chuisho tantienda. Aden chuiquid Imeneyo caid nec. Adquidbidi Pidêto caid nec.

¹⁸ Aidon Nuquin Papan chiaidquo chienquo icquin muaquin chiec. —Esus tantiaquido unêsabi icquido nêbimbobi uincuenacchimboec icpec. Unêsacsho aton dada chuca uaquin uincuemênquo iquendac —quequin

muaquin chuisho tantiashun utsibon Nuquin Icbon chiaid tantienquo yanac.

¹⁹ Aidon Esus tantiabien icchitash. Nuquin Papan Esus tantiamiac ênenquo icquin Esus tantiatsempañêdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “ ‘Èbi tantiaquidombo nec,’ quequin Nuquin Icbon tantiec.” Adnuc Esus tantiaquidên: —Con Ico Esus nec —queshun ambi icsamboen naid ênendac.

²⁰ Esus tantiaquido nadquico iquec. Shubu dapan tsitsan tabêcaid tabadac bimboecquid nec. Tsitsan abentse-abentsec icsactsêcquico icnubi utsi-utsiec bêdambo iquec. Icsactsêcquidên icsa secanun sandoquid yendac. Bêdambo icquidên di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquico yec Esus tantiaquidquico icnubi utsi-utsiec abi icsaid ênabi: —Esus tantianu —quetsêcquid iquec.

²¹ Esus tantiaquidquico ictiadquico yec: —Muaid chuisho tantiatiapimbo icquin nêbi Nuquin Icbon chiacpadomboen natiadquico iquebi —quiash Nuquin Icbon yuambo yantsiash. Adsho Nuquin Icbon bêdamboen nametsiash.

²² Caniabon mêmunenquo icquin abi bunacpadomboen naquid tanenda, mado. Adenquo yec bêdamboec tabadte bunquiota. Nuquin Papan chiaid niacte bunenquo yec: —Nuquin Ico Esus nec —quequidobêdtan chieshtoenquo icquin Esus tantiata. Matsesten tantiec bêdamboec isnanec bêdamboec tabadta.

²³ Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidên chuisho tantiash matses chushcananondashê. Aidên chiac chienda.

²⁴ Nuquin Papan chiaid chuibanquid chushcananenkoico icquid nendac. Chieshêmênenkoico icquin aton matses bêdamboen isquid nendac. Adembidi nêishênenkoico icquin Nuquin Papan chiaid tantiamequid nendac. Utsibon chieshênacu chieshênanenquo icquid nendac.

²⁵ Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi nêishenkoico icquin Nuquin Papan chiaidquico chuibanendac. —Nuquin Papan ambi chiaidquico tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac.

²⁶ —Aden Nuquin Papan ambi chiaidquico tantiamiac Esus tantienquo ichoedêmbi Esus tantiabenshun abi yuaquidên Satanasên namiaid ênendac. Aden Nuquin Papan chiacpadomboen naindac —queshun chieshtoenquo icquin Nuquin Papan chiaidquico chuibanendac abi chuibanquidên.

3

Icsambo icquido iquendac, quiaid

¹ Tantia, mado. Mibi chuinu. Esus padpidec choabi icnuc matses dadpenquioshê icsamboshê iquendac.

² Nadquido iquendac. Nêidic utsi tantiatiapimbo yec abiuidsêqui datantiaquido. Nêidic piucquid bedte comapenec bunquidombo. Nêidic: —Is. Êmbimbo naiduidi bêdambo iqueque —quequido. Nêidic utsibo chieshê nec icsamboec onquequido. Nêidic âmên chiaid niac-niacquido. Nêidic anin chiaid niac-niacquido. Nêidic aton na nashunaqui nashumênenkoico icquido. Nêidic Nuquin Papan chiaid niac-niacquidombo.

³ Nêidic aton matses tantiesabo. Nêidic chiesh bêdanesabo. Nêidic muauanquido. Nêidic abi icsate bunaid ênenquo icquido. Nêidic cuesanquido. Nêidic bêdambo icquid chieshênquido.

4 Nēidic bēdambo icquid damianquiashic cuesunianquido. Nēidic bēdamboen tantienquio yec badedi icsa uanquido. Nēidic: —Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo.

5 Nēidic: —Nuquin Papa tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadendā —caimbi.

6 Adquidon mibi yacnoshon shubu utsin shubu utsinquien isben-isbenac caosh. Adash chidoidquio icnubi shubun puuedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquio tantiac caosh. Nuquin Papan chiaid niacash adecbidi icsate bunquieci tabadac caosh aid chidobo.

7 Aden icsambo icquidēn ambembi chuidenesho tantianeshun Nuquin Papan chiaidquio tantiapimbo icpac caosh aid chidobo.

8-9 Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi ufsi Mambades cuēmēdpampic. Isadaidbo tsusedpa Moisesēn Nuquin Papan chiaidquio chuisho tantiashun aidon: —Mue nec. Ēmbimbo comapenen tantiaquin ismenu —queboedombi bēdiactsēc tantiaquin nacnenuidpampic. Adsho isun: —Abimbo cainquio iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiashun matses dadpēnshun: —Muequi nec —capendac.

Nuquin Papan chiaid isbanec bēdamboec tabadte

10 Ēbien muaquidpenquio nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquio icquin matses tantiaquin Esusēn naid chuibeniondambi. Chieshēnaqui chieshtoenquio icquin adembi chuibeniondambi.

11 Ēmbi aden chuibanasho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casho Nuquin Icbon nac padenquio icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquio bedshun cuēnoten se-sequin unēs uatsempondash. Adsho Nuquin Icbon nac unēsēnquio iccondabi.

12 Ēbipadquido Esus tantiaquidotedi bēdamboec tabadtiadquio icsho adembidi utsitbon comapenen chieshēnendac.

13 Padnuen chieshēmēnquidobēd bēdambo icquid damianquieci muaquido bēdiactsēc icsambo icboedi muauananquieci buēdanquieci icsamboshē yanendac.

14 Mibi adquidpenquio nec, mado. —Ēmbi isondaidon bēdambo icquidon abimbo chuibanondashi —quec Nuquin Papan chiaid niaquenquio yec bēdamboec tabadta, mado.

15 Ēnden bacuēmpi icquin Nuquin Papan chiaidquio min matsesēn chuibanasho mimbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmendac —quequin mimbi tantiabēdac. Aden Nuquin Papan bēdamboen iste tantiametemo Nuquin Papan chiaid nendac.

16 Nuquin Papan chiaid aton Mayanēn tantiamiac matsesēn dada uapampic. Aidēn chiaid abitedimbo bēdamboshē iquec. Aid isec onquequin: —Nuquin Papan chiacpadec bēdamboec tabadnuna. Esus tantiaquido yec icsainquien ictiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboembien natiad —quequin chuibanec.

¹⁷ Nuquin Papan: —Ĕmbi chiaidquoio tantiashun Esus tantiaquinc matses nashunquinc caic Esus tantiaquido ma bēdamboec tabadnu —quequin ambi chiaidquoio dada uamepampic.

4

Nuquin Papan chiaid chuisho tantienquoio yaid

¹ Nuquin Papabēdtan Esuquidistun mibi iseque. Bēdamboen nata. Esusēn nidaidēn padpidec choshon abitedishun Icbombo icquin unēsaido uincuemi-aido unēsabi icquidobēdta chiendac. —Nēid ēbi tantiaquid ēbēdi tabadmembī. Nēid ēbi tantiesa cuidembī —quequin chiendac.

² Aidēn chiacpadomboen naquin Nuquin Papan chiaidquoio chuibanta, mado. Matsesēn tantiatiaquid icnuc adota. Tantiatiapimbo icnubi adembi chuibanta. Esus tantiaquido icsasho isun: —Esus tantiaquido adesambo neque. Bēdamboembien natiad —quequin nēishēmēnenquoio icquin chuita, mado. Utsibo bēdamboec tabadsho: —Mibi bēdamboec tabadoc. Aduidequi tabadta —quequin chieshtoenuquoio icquin chuita. Bēdiactšēc tantiatsēcquido: —Esus tantiaquidon nadoquid —quequin chuibanta, mado.

³ —Yuecshun Nuquin Papan chiaidquoio matses dadpenshun tantiatiapimbo iquendac —qeshun nata, mado. Aden tantiatiapimbo icquidēn Nuquin Papan chiaidpenquoio chuisho tantiash: —Mimbi ēbi bunaidquoio chuisho tantianu. Ĕbi chiec cho —quequin muaquid utsi-utsien abi yacno puduedmendac.

⁴ Pamumēdacimbocquin Nuquin Papan chiaid tantienquoio icquin tsusedpabon ambembi chiampiduidi tantiendac.

⁵ Aidēn nacpadomboen nainda, mado. Nuquin Papan chiaidquoio bēdamboen tantiaquid yec bēdamboec tabadta. Adsho utsibon chieshēnaqui chieshtoenuquoio icquin Esusquoio tantiata, mado. Adembidi Nuquin Papan bēdamboen iste Esus tantiesabo chuibanta. —Esus chuibanquidēn nadoquid —caidtedi nabanta, mado.

⁶ —Ĕbi unēs uan ēmbi nacpadomboen: “Adota,” mibi caquid nibēdtsiash —qeshun mibi aden chiec nebī. Nēbi Nuquin Papan tantiacpadēn chieshēmēnquidon ēbi unēs uaic.

⁷ Utsibon chieshēnubi ēnenquoio icquin Esusēn naid chuibeniombi. —Ĕbi bunaid bednu —quec comapenec titinquiacimboen dayacquoio icquin Nuquin Papan chiaidtedi naombi. Chieshtoenuquoio icquin Esus tantiaquidquoio nebī. Adshobini nēbi unēs uaic.

⁸ Unēs uacshobini matsesēn naid abitedimbo tantiaquidēn Nuquin Icbon: —Ĕbi tantiaquin ēmbi chiacpadomboenuidi naic mibi bēdambo iccoque. Nuquin Papa yacno ēbēdi tabadmeguin mibi bēdamboshē icmendambī —caindac. Abi chote ushēn choshon aden Nuquin Icbon ēbi chiendac. Adembidi abi chosho iste bunquidotedi abi tantiaquido Nuquin Icbon abēdi tabadmendac.

Timoteyo: Cho, caid

⁹ Nēbimbobi ēbi isec cho, mado.

¹⁰ Utsibo nidanebon ēbentsēqui tsadebique. Demas caid aton na bedteuidi bunec ēbi nianec shubu dadpen icquid Tesadonica caid yacno nidosh. Quedesante caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidtedi nidanebon

¹¹ Ducas abentsēqui ēbēd iquec. Madcos bedbētsenec cho, mado. Ĕbēdtan aidēmbi nēshunquoio Esus chuibantsiashe.

¹² Tiquico caid Epeso yacno mibi yacno nidmiombi.

¹³ Shubu dadpen icquid Todoas caid yacno Cadpo cuëmëdquidën shubun con na niamëdacondashe. Con dashcute ëmbi dada uaidbëdta bedbëtsenec cho, mado. —Abitedi buantiapimbo iquebi —qeshun nëish yua bitsi nacneaid dada uaiduidtsëqui bëta.

¹⁴ Shocosh nacenquidën Adecandedo caidën comapenen chieshë nondashi. Aid Nuquin Papan cuidendac, mado.

¹⁵ Nuquin Papan chiaid ëmbi chuisho tantiatiapimbo icquin icsamboen chuishunondashibique. Choquin aid isenda: —Ëbitsen icsamboen chuishunushe —qeshun.

¹⁶ Ènden tauamboen bedshun: —Quënën nauednu —cac cuidte chuiquid dada ëmbentsëqui chuibampondambi. —¿Mitsipadosho isun ëbi bedo? Icsamboen nambo iccombi —capondambi. —Ëbëd icboedon dadpen-shun: “Bëdambo icquid nec,” quequin ëmbi naid chuibanac ëbi quënën nauedquidon ëbi nidmetsiash —qeshun ëbëd icboedo: —Chiec cho —caqui choenquio iccondash. Aden ëbi cacuidondaido tantiaquin: —Nuquin Papan aido cuidenquio icpashun —caimbi.

¹⁷ Nuquin Icbombini nianenquio iccondash. —Isadaidpembo mases utsibo ma ëmbi naid chuibenenu —quequin cuesambo icmepondashi. Adondaid icshobini chieshëmënquidon: —Cuesnu —cabededpondash. Nuquin Icbon nac aid masesën unës uainquio icpondashi.

¹⁸ Padpiden chieshëmënquidon ëbi caic: —Ma mëyanac chieshtoshon Esus tantienquio yanu —casha Nuquin Icbon nac chieshtoenquio ictsiabi. —Nuquin Icbombidi abi yacno ambi mases dadpen namiacno abëdi ëbi tabadmendac —qeshun: —“Nuquin Icho bëdamboshë iquec,” canuna ënenquio icquin —caimbi.

¹⁹ Mibi yacnocquido: —Mibi caic: “Unësquio iquec,” quiosh Pabado —quequin chuiban, mado. Nëidic Aquida caid. Nëidic aton chido Pidisida caid. Nëidic Onesipodo caid chedo. Aidedi aden chuiban.

²⁰ Mimbi isondaaid Edasto caid shubu dadpen icquid Codinto yacno tëshëdondash ëbi chonoc. Utsibic Tëdopimo caid aton dada icsabudacsho shubu dadpen icquid Mideto caid yacno nianondambi.

²¹ Ue tsasi iquenuanquid taënushe. Baded cho, mado. Doma yacnocquido nëmbo icquidon: —“Timoteyo unësquio iquec,” quequin dada ua —caposhi. Nëidic Eyobudo caid. Nëidic Pudente caid. Nëidic Dino caid. Nëidic Quëdaudia caid. Nëidic Esus tantiaquido nëmbo icquido utsibotedi. Aidedi adosh.

²² —Nuquin Icho Esusën abëd icquin con mado bëdamboen ispashun —quequin mibi tantiembi. Padi. Aidedi chuiquin dada uaombi, mado.

TITON ISTE

¹ Pabado nebi. Nuquin Papan chiacpaden chuibeneguid nebi. Adembidi Esuquidistun, Èbi chuibeneta, caidbidi nebi. Aden chuibanac Nuquin Papan cuënaido Esuquidistu tantiadoneguidquo ma icpanuna. Adquid iquec ma bédamboec tabadpanuna.

² Muesa Nuquin Papa nec. Adquid icquin, Èmbi ènden chiampicpadom-boen ènenquiocquin Esuquidistu tantiaquido èbèdi tabadendac, quequin ma aidon tantiapanueshun adomboen chiaid chuiquidquo Esuquidistun icmiondashi.

³ Ambi tantiampicpadèn ambi chuipampid Esuquidistu tantiamenuequin aidèn chuibeneta caid nebi.

⁴ Èmbi chuibanac Esuquidistu tantiaquid mibi yampondac, Tito. Adquid yanshun Esuquidistubèd icquid nebi, quequin èmbi tantiacpaden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash èbi icsaid cuidenquo yec Nuquin Papa bèpiscudac, quequin ma ènenquiocquin mimbi tantiapanuna. Adecbidi Nuquin Papabèd tabadendabi, quequin tantiapanuna, Tito.

Quideta yacno nidshun Titon natequid

⁵ Èmbi nauidboed mimbi naimenu, quequin mibi Quideta yacno nianombi ma mimbi ambi tantiaid icsa chiac ma Quideta yacnocquidon èmpanuna. Adembidi, shubu dadpen icquid uano-uanoecquid yacno nidshun èmbi chiacpadomboen Esuquidistu tantiadoneguid istuidshun Esuquidistu tantiaquid utsibo isbanquin bédamboen tabadmenuequin chuiquid icta, quequin adquidquidquo chuita, Tito.

⁶ Mimbi Esuquidistu tantiaquid utsibo isbanquin bédamboen tabadmequin chuiquid icta caid nadquo ictiad, Tito. Bédamboec tabadquid ictiad. Adecbidi chido abentsèc inquid ictiad. Aton bacuèbotedi Esuquidistu tantiaquidobidi ictiad. Adquidèn bacuèbo icquin bédamboec tabadquin aton papan chiaidbèdta aton titan chiaid chieshenquiocquin nabantiad.

⁷ Aidi utsibèd bédamboec tabadquin, Nuquibi nanuna, qeshun utsibèd onquenquiocquin ambibi tantiacpadomboenuidi nabanesa ictiad. Adecbidi badedquo nèishesa ictiad. Adecbidi paèmbocquid nua aquesa ictiad. Adecbidi cunesante bunesa ictiad. Adecbidi yuedquid bedesa ictiad.

⁸ Adecbidi Esuquidistu tantiaquid utsibo yuedquid ictiad. Adecbidi utsibobèd bédamboec tabadte bunquid ictiad. Adecbidi utsi bédamboec tabadsho tantias, Cuishon, quec tabadquid ictiad. Adecbidi bédamboen tantiaquin, Naden naic icsatsiabi, qeshun naisa ictiad. Adecbidi, Naden naic bédambocquid yantsiabi, qeshun adomboen naquidquid ictiad. Adecbidi abimbo chuiquidquo ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bédamboen tabadmequin chuiquidquo icta, quequin chuita, Tito.

⁹ Aden utsibo isbanquin bédamboen tabadmenuequin chuiquid icta, cashun nèid aido chuita. Nuquin Papan chiaid chuca uainquiocquin bédamboen chuiban. Aden mimbi chuisho tantias ma utsibo bédamboec tabadpanuna. Adembidi Nuquin Papan chiaid chuca uaquidèn chuiban-sho Nuquin Papan chiacpadomboen abimbo chuiban. Aden mimbi chiac,

Icsamboen chiombi, quetsiash, quequin mimbi utsibo chuiquid icta caido chuiota, Tito.

¹⁰ Quidetabo nad iqueque. Chuinu. Tantia. Abi chuiquidēn chiacpaden naisa Quidetabo dadpen iquec. Abimbo chiosh, camenuēquin abimbo chiacbimboec aido onquec. Dadpenshun isadaidbon nacpadomboen nanuequin, Shui dēbid dētemeta, quequin Quidetabon chiec.

¹¹ Adquidon shubu utsin-utsinquec puduedshun ambi tantiaid icsa chuibanac utsin-utsinquien tantiaish cuēshēdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bēdamboen chuibanquin ambi muaquin chiaid ēmeta, Tito.

¹² Quidetabon matses ēnden icnēdaid abentsēcshun naden aton matses chuipanēdash. “Quidetabo muaic chuinanquidombo nec. Aben icquid yuatemaibimboec uimanēmēnquido nec. Chonoadenquiocquin nua peshun nua actenequido neoaic,” quequin Quidetabo ēnden icnēdaidēn chuipanēdash.

¹³ Abimbo chuiquidēnquio aden chuipanēdash. Aden chuipanēdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun.

¹⁴ Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuisho tantiesa ma icpanuna. Aden mimbi chuibanac abimbo chuiquidēn chiacbimboen niacquidon chuisho ma tantiesa icpanuna.

¹⁵ Nuquin Papan Esuquidistu tantiamiaidēn icbon chiaid bēdamboen isoaic. Adomboembidi ambi uabanaid isec. Adash abitedi bēdambo iquec, quec tsadec. Ambi tantiaid icsambocquid icnuc Esuquidistu tantienquiocquin, Nēid mishtemaid nec. Nēid utsi petemaid nec. Nēid utsi actemaid nec, quequin chuibanquidēn chiaid tantiec. Aden tantiec aton tantiate icsabudec, Icsaobi, quequin tantienquio iquec.

¹⁶ Nuquin Papa tantiembi, qeshumbic Nuquin Papan chiacpadomboen niacquin tantiesa nebi, quiacbimboec tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquio adquid neoaic. Naid bēda natiapimbo icquid neoaic, Tito.

2

Esuquidistu tantiec iccuededquido tantiametequid

¹ Icsateuidi bunquid icnubi mimbi Esuquidistu tantiaquido abi tantidonequidquio icmenuequin chuibanquin tantiamē.

² Mimbi paēmbocquid nua aquenquio icteniaccpadomboen Esuquidistu tantiaquid tsusiobo chuibanquin tantiamē. Adembidi, Mibi bēdamboquid nec, utsibo camenu, quec bēdamboec tabadtenequin tsusiobo ismequin tantiamēoa. Adembidi, Naden naic icsatsiabi, qeshun mimbi nainquio yapadomboen mimbi bēdamboen tantiaid aido chuibanquin tantiamēoa. Adembidi, Naden naic bēdamboquid yantsiabi, qeshun adomboembidi naquid nebi, quequin tsusiobo chuibanquin tantiamēoa. Adembidi mimbia Esuquidistu tantiadoniaccpadomboen pausunaid icquin ma adquibidi tsusiobotsen yampanueshun tantiamēquin chuibanta. Adembidi, Esuquidistu tantiec utsibobēd tantianec mibi tabadtentiaccpadomboen chuibanquin tantiamē. Adecbidi, natiatequid iquendac, quequin Esuquidistu tantesa uainquiocquin abi choate mimbi caimbudaccpadomboen chuiquin tantiamēoa, Tito.

³ Adembidi, Esuquidistu tantiaquid ēnden machoaido tantiamenuēquin chuiban. Nuquin Papan bēdamboquid icniaid nebi, quec bēdamboec mibi tabadtentiaccpadomboen tantiamēquin chuioa. Adembidi, utsi icsamboen

chuiquid iquenda, quequin chuibanquin tantiaméoa. Adembidi, mimbi paëmbocquid nua aquenquid yacpadomboen chuiquin tantiaméoa. Mimbi bédamboen nabanaid nēbi machocuenaido ismequin tantiamé, quequin ènden machoaido chui, Tito.

⁴ Aden chiac ènden machoaidon aton bënë aton bacuëbo chedobéd abi tabadaid tantiamenuéquin nēbi machocuenaido bédamboen ismepec.

⁵ Adembidi aidèn bédamboen tantiaquin, Naden naic icsatsiabi, qeshun nainquio iquec. Naden naic bédambo ictsiabi, quequin naquid, quequin ènden machoaidon nēbi machocuenaido chuibanquin tantiaméoapec. Adembidi, Mibi inesa chudmenquio yec tabadta, quequin ènden machoaidon nēbi machocuenaido chuiquin tantiaméoapec. Adembidi, aton shubun tabadquin ambi nabanacpadomboen ismequin aidon nēbi machocuenaido tantiaméoapec. Adembidi, utsibo bédamboen tantiaquin ambi nashunacpadomboen ismequin ènden machoaidon nēbi machocuenaido tantiaméoaic. Adembidi, aton bënë chiacpadomboen nabanquin nēbi machocuenaido ismequin tantiaméoaic. Aden ènden machoaidon abi ismiacpadomboen nēbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

⁶ Adembidi, caniabo chuibanquin tantiamé, Tito. Naden naic icsatsiabi, quequin nainquio iquembi, quequin mimbi bédamboen tantiacpadomboen caniabo tantiaméquin chuióa. Adembidi, Naden naic bédambo mibi icpec, quequin mimbi bédamboen tantiacpadomboen aido tantiaméquin chuióa.

⁷ Bédamboec tabadaid tantiaméquin ismenu, quec mibibi bédamboec tabadteneta. Mibibi icsainquiocquin ismequin tantiamé. Adembidi mamënenquiocquin bédamboen chuiquin tantiamé.

⁸ Adec mibibi bédamboec tabadtenequin ismequin Nuquin Papan chiaid abimbo mimbi chuibanac Esuquidistu tanties mibi chieshënquid mibi icsamboen chuitiapimbo yec tabadendac.

⁹ Adembidi yuabo chuiquin, Bédambo iquebi, min icbo camenuéquin ambi chiaidtedi chieshenquiocquin nabanta, quequin tantiaméta, Tito.

¹⁰ Adembidi, min icbon na ampenquiocquin bédamboen dayun uaqin nashunquin min icbo ismeta, quequin yuabo tantiamé. Aden Esuquidistu tanquin nabansho isun min icbo: Con yua Esuquidistu tantiaquid yec bédamboshë yanac. Con yua bédambo icmequidèn chiaid tantianu, quendac icbo.

¹¹ Nuquin Papan matses abéd icmenuequin matses icsaid bedshuntequid Esuquidistu icmenuequin chomepanédash.

¹² Aden chomiác nidaidèn tabadquin utsibo tantiaquin Nuquin Papan chiacpadomboen naquin ismiác adomboembidi naic bédamboec tabadquid. Nuquin Papan bédamboen tantiamiác bédamboen tantiasho, Aidèn bédambo icmiaid icquin naden naic bédambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiác padomboen naic nuqui tabadtenec. Adomboembidi Quidetabo Esuquidistu tantiaquido chuiquin tantiamé, Tito.

¹³ Nuquin Papapadquid con Icho Esuquidistu choaic, quequin caimbudec bédamboec tabadebi, quequin chuiquin tantiaméoa.

¹⁴ Nuqui cainaid: Èmbi con utsibo caid ëbipadquid iquendac, quiash nuqui icsaid bedshunash abided cuidadec unëspanédash. Adacsho aid tantiaquidquio yec bédamboec tabadquid nec, quequin chuiquin tantiamé, Tito.

¹⁵ Èmbi chuibodtedi chuibanquin tantiamé. Mimbia tantiaquid icquin, Èmbi chiacpadomboen nabanec tabadteneta, quequin Quidetabo chuióa. Mimbi chiacpadomboen nainquiosho isun cuembo chuióa. Adecbidi, utsibon mibi icsamboen chuitiapimbocon bédamboec tabadteneta.

3

Utsi tantiaquin nabantequid

¹ Esuquidistu tantiaquidtedi bēpiscudmenquiocnuequin naden chuibanta, Tito. Min tsusiobon bēdamboen chiaid naquimbi adembidi mibi chuiquid utsibo bēdamboen chiaid chieshenquiocquin naban. Adembidi, utsibo tantiaquin nashunta, quequin Quideta yacnocquido chui.

² Adembidi, Utsi muaquin chienda, quequin chuioata. Adecbidi, Utsibobēd tantiananec bēdamboec tabad, quequin chuioa. Adembidi, Mimbi naiduidi tantienquiocquin nabanta, quequin chuioa.

³ Ēnden Esuquidistu tantiesa nuqui icondac. Adquid icquin Nuquin Papan chiacpadomboen nainquo nuqui icondac. Adquid icquin nuqui bunacpaden nabanec nuqui icsaded-icsadedondac. Utsibobēd icsamboec nuqui cuidnampondac. Adembidi, utsin bēdamboen isaid icsho isash nuqui nēishpondac. Adecbidi utsibobēd nēishash nuqui chushcanampondac.

⁴ Adquid nuqui icnu matses tantiec abēd icquid icmenuec nuqui icsaid bedshunash abided cuidadec Esuquidistu chopanēdash.

⁵⁻⁶ Adec choash cuidadsho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniac. Adoac, Bēdamboen nasho abi yacno tabadmendac, quenquo yec nuqui tabadec. Aidēnquo nuqui icsate bunaid tantiamequioquin nuqui ēmec.

⁷ Adec aton Mayan nuquibēd icsho isun, Bēdambocquid nec. Aidedi ēbēdi tabadendac, quequin Nuquin Papan tantiec.

⁸ Ēmbi chuita, quequin chiaidtedi abimbo iquec, Tito. Aden tantiaquin Quideta yacnocquido chuiban Esuquidistu tantiaquid icquin ma adomboen nabanec bēdamboec tabadpanuna. Ēmbi chiacpadomboen Esuquidistu tantiaquidtedishun nadenec utsibobēd bēdamboec tabadquid nec, quequin chuita.

⁹ Adec tabadec min tsusedpabo chiec utsibēd nēishnanash icsamboec onquenda, quequin Quidetabo chuita, Tito. Adembidi, aton tsusedpabon naden nata quequin chuinedaid chuiquin chushcanu qesho adembidi adenda, cata. Aden chiaid Nuquin Papa yacno mibi puduedmetemaid nec, quequin chuita.

¹⁰ Adec onquequin Esuquidistu tantiaquido cuēshēdmenuequin chuibanquid icsho bēdamboen tantiamenuequin chuiban. Aden chiaqui niacbidanquin adomboembidi aidēn chuioasho tantiashun aidi comapenen chuibanquin tantiamēoa. Aden chiaqui padpiden niacbidanquin adomboembidi chuioasho tantiashun cacumeta, Tito.

¹¹ Adquid ambi icsamboen tantiacpadecuidi tabadquid neque. Adota. Mimbi chiaqui adecuidi tabadquid Nuquin Papa yacno nidtiapimbo yec abibi cuidadtequid nendac.

Utsibo chuiquin chiaid

¹² Nēbi utsibo chuinu. Tantia. Ademas Tiquico chedo ēbēdi iquec. Abentsēqui Quideta yacno nidmembi. Aid mibi yacno choambien mimbi tantiamedonequin chuibanquin naimbudnu quash Nicopodis yacno nidoata, Tito. Ue dapa sequenuc Nicopodis yacno tabadnu, quianec nidendabi.

¹³ Matses icsasho cuidte chuiquid, Senas mibi isbidanec Apodosbēd udi nidec. Aid daēdi mibi yacno chōsho yued. Nidnu, qesho aton na nibēdsho isun menequin bēdamboen nidme.

¹⁴ Peshun acnu, quequin Esuquidistu tantiaquidēn chonoadquin nabanquid. Utsi nashunquin adomboembidi nabanec tabadquid. Aden nabanec tabadsho isash utsibo Esuquidistu tantiaquidquibidi yanendac.

¹⁵ Mibi tantiec tabadebi, quequin Tito chuita, ëbëd icquidon cacpadom-boen dada uaimbi. Adembidi mibëd icquido Esuquidistu tantiaquido tantiec ëbëd icquido tabadoaic.

Esuquidistun, Bëdambo iquebi, camiaido ma mibitedi icpanuna. Padi. Aidedted chiombi, Tito.

PIDEMONËN ISTE

¹ Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon.

² Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon mates icsambocsho cacumiacimboen Esuquidistu tantiaquid icsamenequid cacumequid Adquipo nec. Aido min shubun Esuquidistu tantiec iccued-edquido iqueque. Ëmbi dada uaid bedash isec onquequin aido chuioata, Pidemon.

³ Esuquidistu tantiaquido icsho Nuquin Papan ëbi icsaid cuidenguioquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icpanuna.

Nuquin Papa chiec onquiaid

⁴⁻⁵ Pidemon Nuquin Icho tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantiaquid, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon.

⁶ Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

⁷ Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantiaquid bëdambo iquebi, Pidemon.

Onesimo tantiaquin chuidoniaid

⁸ Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquembi.

⁹ Tantaranquid nuquibi icquin aden chienquio iquembi. Tsusio budobi. Adquid icquin Esuquidistu chuibansho padpiden quënën nauedoshi.

¹⁰ Quënën nauedaid icquin ëmbi Esuquidistu chuibanac aid tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mimbi nashunondacpaden aidi bëdamboen tantiaquin nashunoatsia? Pidemon.

¹¹ Ënden min yua icquin mimbi chiacpadomboen mibi nashunquio iccondaidëmbi nëbi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

¹² Aidi mibi yacno nidmeoaimbi. Con dayunquio icquid nidmenu, quish aid tantiec unësquio tsadebi, Pidemon.

¹³ Esuquidistu chuibansho quënën nauedshun tataniac caputiapimbocsho mimbi ëbi nashuntiapimbo iquec. Adec mibi nashumëntiapimbocnobi

Onesimombini nashunosh, qeshun nidmetiapimbocquimbi mibi yacno nidmembali.

¹⁴ Onesimo ëbëdi tabadmenuequin chuita, mibi catiapimbo iquebi. Mimibi aden chiac bëdambo ictsiash.

¹⁵ Yuecash cuëshëdenquo yec Pidemombëd Onesimo tabadoaindac, quequin Nuquin Papan tantiondacadquieci mibi yacnoësh cuenëdaid mibi yacno nidash Onesimo tabadtsiash.

¹⁶ Onesimo min yua iccondaid Esuquidistu tantiaquid yansho mimbi con utsi caid aidi nendac. Èbëd icquin natiapimbocsho aidën nashunebi. Mibi yacno nidshun mimbi chuisho Esuquidistu tantiaquid icquin chieshenquiocquin bëdamboen mibi nashunendac.

¹⁷ Pabado ëbëd isedanquid nec, qeshun mimbi ëbi yuedondacpaden Onesimo yuedta, Pidemon.

¹⁸ Con na utsibëdtabi con na bedtequid Onesimon bedaccondash, quequin mimbi chiactedi mibi meneoaimbi.

¹⁹ Aidedi meneoaimbi, quequin ëmbibi dada uaimbique. Isec onquequin tantiaquiota. Èmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon.

²⁰ ¿Aden ëbi nashunuequinda mimbi Onesimo ëbibimboecsho bëdamboen tantiaquin nashumpatsia? Aden mimbi aid nashunuc bëdambo ictsiabi.

²¹ Èmbi chiactedi daëd uaquin mimbi natsiac, quequin tantiec tsadebi, Pidemon.

²² Nëidtsen chuinu. Tantia. Èmbi tantienquiocnoc Pabado chonoshe qeshun abi ushondaid nacnenueshun nacentata, Pidemon. Mibi ëbi tantiec Nuquin Papa chiec onquiacpadomboen badedquo Nuquin Papan mibëd icnepashuni.

Utsibo chuinu quiaid

²³ Esuquidistu tantiaquid utsibo ëbëdi iquec. Aidon chiaid chuinu. Tantia. Epapadas, abembi ëbëd icnuec quënën naedadondaidën: Mibëd icquidotedi tantiec tsadebi, quequin Pidemon chuita, cac adomboen dada uaimbi, Pidemon.

²⁴ Madcos yec Adistadico yec Demas yec Ducas yec quec ëbëd icquido iquec. Aidombidi: Mibëd icquido tantiec tabadebi, quequin Pidemon chuita, cac dada uaoaimbi. Aidedishun ëmbi Esuquidistu chuibanacpadomboen chuibanuquido nec.

²⁵ Nuquin Icho Esuquidistun mibitedi bëdambocquid icmebanacpadquieci ma tabadoapanuna, Pidemon.

Padi. Aided dada uaombique. Isec onqueta.

EBEDEYON ISADAIDBON ISTE

Abi yacnoshon ambi uaidon Icbombo Esuquidistu nendac

¹ Ēndenquimboshē Nuquin Papan ěmbi chiacpadomboen chuibanta cac adomboembidi abēd icquido tsusedpabon chuibanoapampic. Abentsēc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bēda budmiac aidēn chiacpadomboen tsusedpabon chuioapampic. Adembidi nada-tiambocquin uabanquin ismequin chiac adomboembidi chuioapampic.

² Nēbi tsyuecquio Nuquin Papan chiacpadomboen abipadquiocquidēmbi aton Madon chuibanec. Aidi Nuquin Papan ambi uaido con icbo cami-aidquo nec. Nidaid abubēdta uashun aidēnquiocquidtedi aton Papabēdtan uabanampidquo aton Madombo nec.

³ Aidi, aton Papa bēdaidquo yampidpadquidquibidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubēd aidēnquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash abided cuidadec unēsash, Ēmbi bēdambocquid icmebanaido matses nendac, quequin tantiashic abuc nidoash Nuquin Papabēd tabadoapanēdash aidquioibi.

⁴ Ad icnuc ambi abi yacnoshon uaido abipadquid nibēdec. Aidon con Icbombo caidquo nec.

⁵ ¿Ambi abi yacnoshon uaid mayan bēda isec:
“Con mado mibi nec.

Ēbi min papa nendac, quepecta Nuquin Papa iquec? Padenquo.
Adecbidi:

¿Nēidēn Papa nebi.

Adecbidi: Con mado nec, quepecta Nuquin Papa iquec aido caic? Paden-quo.”

⁶ Abēd Abiambo Yampidi nidaidēn tabadash choasho isun Nuquin Papan ismequin:

“Nēid con Madombo Abentsēqui nec. Aidquo tantiec con Icbo nec, quec cuishon quec, ambi naid chiec cuēdēn, cac aden ambi abi yacnoshon uaido mayan bēdabo chuibanec cuēdēncuededendac.”

⁷ Ambi abi yacnoshon uaido mayan bēdabo naden Nuquin Papan chiec:

“Ēmbi chiacpadequi cunquequid yanec.

Adecbidi, ěmbi chiacpadequi cuēte nēdēnquedote iquendac.”

⁸ Padnuen ambi uacmaid abipadquid aton Madombo utsi uatiapimbo iquec. Adquidquo icsho Nuquin Papan naden chiec:

“Ēnenquiocquin ěbēdtan Chuiquid Abentsēcquio mibi iquendac.

Adecbidi namequid bēdaidquo mibi iquendac.

⁹ Ēbipadquid iquec bēdamboec tabadquin nabante bunquidquo mibi nec.

Adquid yec icsamboec tabadquin nabante bunesambobidi mibi nec.

Adquid yec ěbi yacpadquidquo Icbo Abentsēcquioibi mibi nec. Mibēd icquido adquid nibēdec.

Mibi abentsēqui adquidquo iquec. Adquid iquec, Bēdambo iquebi, quec mibi cuishon quendac.”

¹⁰ Adembidi Nuquin Papan naden aton Mado chuioaic,

“Tauamboen nidaid abubēdta uashun aidēnquiocquidtedi mimbi uabampampic.

Aidtedishun icbombo mibi nec.

¹¹⁻¹² Aidtedi ēnēdendac.

Mibien nibēdantiapimbo yec abi tabadendac.

Aidtedi dashcute shēnibudaid niacimboen chuca uaindac.

Mibien Abiambo Yampid yec abi ēnēdesa mibi iquendac.

¹³ Nēbi cainec ēbēdquoio tabadec cho.

Mibi chieshēnquidtedi nibēdquoio icmenun nabono. Chiata,”

quequin Nuquin Papan chiampic. ¿Ambi abi yacnoshon uaido mayan bēda aden chuipampidta nepadic? Padenquoio. Esuquidistu aden chuipampic.

¹⁴ Ambi abi yacnoshon uaido mayan bēdabo Nuquin Papan, Ēbēd tabadtequidombo nashunta, caido nec.

2

Ambi chiaid tantiesa icchitomane, qeshun tantiadonequiota caid

¹ Adec abitedishun Icbombo aton Mado icnuc ambi chiaid chieshēnchitomane qeshun tantiadonequiec tabadnuna.

² Ēndenquimboshē ambi, Naden nata, quequin chiaid ambi abi yacnoshon uaido mayan bēdabo chuimiapadomboenuidi naisa icsho isun Nuquin Papan cuidpampic. ¿Aden ēndenquimboshē ambi chiaid chieshēnquid ambi cuidpampicpaden

³ nēbi icquidtsen ambi chiaid chieshēnsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanēdash. Adoac, Ēbi yacno Yuedanquid nebi, quequin aton Madonquoio Esusēmba chiambic adomboembidi abi tantiaquidontsen chuioapondashi. Aden Esusēn chiaid tantiaquidon chuibanubien,

⁴ Ēmbi chiaidquoio chuibanoopec, quequin ismenuequin aton Mayanēn Nuquin Papabēd icquidēn tantiamebanacpadomboen nadatiambocquin utsi-utsien bēdamebanquinc, mayan icsa dapudedmequinc, unēsaid uincuemequinc caquin adquidēn-adquidēnquien nabededpanēdash.

Matses icnu quiash Esuquidistu matsespanēdash

⁵ Adembidi chuinu. Tantiata. Abi yacno Esuquidistu tantiaquido choash tabadsho isun, Nēido ēbi yacnoshon ēmbi uaido mayan bēdabo mibi chuiquid nec, quenquoio Nuquin Papa iquendac.

⁶ Ēndenquimbo aden tantiaquin dada uaqin naden Nuquin Papa chiec Dabid pado onquepampic:

“Tantiaquiono. Ēbi chui, Papa. ¿Atotsieshun matses mimbi uaid pistsēcquoio icsho mimbi comapenen tantiatequid aido icpec? Papa.

Adembidi, ¿Atotsieshun Adanēn tsyuecquido mimbi nashumpe? Papa.

⁷ Nēbi chuitan mimbi cac mibi yacnoshon uaid mayan bēdan adomboembidi chuioac matsesēn nabanec.

Yuecquiocshon mibipadquid matses mimbi icmendac.

⁸ Adquid icmeshun mimbi uaidtedishun icbombobidi aid mimbi icmendac,” quequin abimbo chiampid nec. Nēbi abitedishun icho matses mimbi icniambo iquiec.

⁹ Utsien Nuquin Papapadquidquoio yequi matsesun Nuquin Papan tantiamicpaden ambi abi yacnoshon uaido mayan bēdabon chiac nabamboedi nēbi aton Papabēd tsadec abitedishun Icbombo yanac. Aidi Nuquin Papan chiacpadomboen nanuec nidaidēnshun tishac matsesash matses tantiec

matses icsaid bedshunash abided cuidadec unēsash abitedishun Icbombo yampanēdash.

¹⁰ Nuquin Papa abitedi uaquidquo icnuc ambi tantiacpadec iquec. Adquid icquin ambi, Matses icsaisa icmeshun con bacuē icmembali, quequin tantiacpaden ēbi yacno abi tantiaquid yuedquid con Madombo iquendac, quequin ambi chiampicpadqueiqui aton Madó matsespanēdash. Aidi matses yec natiamianqueiqui icsaisa yec unēsash uincuenash bëyucanec abi yacno decatonepanēdash ma Nuquin Papan, Matses con bacuē icmembali, quequin tantiaido ēbi tsibanec decatonepanu quiash.

¹¹ Matses bēdambo icmequid Esuquidistun Papa ambi bēdambo icmebantequidon Papabidi nendac. Aton Papa Abentsēqui icnuc Esuquidistu Nuquin Papa yacno choash, Con utsibo nec, quependac

¹² aton Papa chiec:

“Mibi chuiquin con utsibo tantiamenu, Papa.

Aidobēd tabadquimbi mibi chuinu. Tanta, Papa, quependac.”

¹³ Adembidi chuiuoic:

“Mibi tantiaquin mimbi chiampicpadomben nabanash choaobi, Papa.

Ēbi tsibantequid mimbi bēdaidquo icmiaidquo bëec choaobi, quequin mibi chiendambi, Papa,”

quequin matsesabi yec abuc tabadquin Esuquidistun chuipampic.

¹⁴ Matses namibēd intacchoquid yec unēstequid icsho mēnchicquid icnu quiash Esuquidistu matsesash unēstequid yampanēdash. Ma matses mayan icsan dacuēdmequin dēcatemēntiapimbo yampanu quiash matsesash unēstequid yampanēdash

¹⁵ ma mayan icsan ambi dacuēdmiaido ambi yuaido icboedi matses ěmbi mēnchictequid ma icpanuna.

¹⁶ Ēmbi uaido mayan bēdabo unēstequid icsho mēnchicnu, quenquo yec matsesash Esuquidistu unēsapanēdash. Abadauanēn tsyuecquido mēnchicnu, quiash matsesapanēdash.

¹⁷ Aden ambi chiapaden nanuec matsespadquid yampanēdash. Adec matsesash matses nēnacpadquiec nēmpañēdash. Abi bundoacpadquiec bundopanēdash. Abi natiacpadquiec natiatequid icpanēdash. Mayan icsan icsamenuquin tanaidbidi icpanēdash. Matses yanash icsaisa yec matses icsaid bedshunash abided cuidadec unēsapanēdash matses Nuquin Papan bēdamboen istequid icmenuec. Adecbidi, Matses icsaisa yanabi yec chuibanec Nuquin Papabēd onquetiapimbo iquec, quec matses chuibanec Nuquin Papabēd aidi onquec.

¹⁸ Matsesacsho mayan icsan: Nuquin Papan chiaid niacmenu, quequin tanac niaquesa Esus icpanēdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ēbi dayacquo icmec cho, cac badedquo choquin chieshesa nuqui icmendac.

3

Abi yacno yuedanquidquo icquin Moises dēniacquid Esuquidistu

¹ Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ēbēd onquequid dapa icota caid Esuquidistu nec, quequin aidquo tantiaquionona.

² Nuquin Papan chiapadomben chieshenquiocquin naquido Nuquin Papan shubun icquido abi tantiaquido iquendac, quequin Moisesēn chuidedchuidedampicpaden Esuquidistun adomboembidi chuibampanēdash.

³ Aidi Abiambo Yampid yec, Ĕbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic.

⁴ Nēidted con shubun ěbēdi tabadendac, quequid shubu icbo nec. Aden Nuquin Papan chiacpadomboen aton shubun icquido bēdamboquid icmequid Esuquidistu nec.

⁵ Nuquin Papan shubun icquid ambi namiaidquido Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic.

⁶ Esuquidistu Nuquin Papan Madombo yampidquido aton Papan shubun icquid icquin aton Papan Moises chuimiampicpaden aton shubun icquido icmepanēdash. Aidēn shubun icquid nebi, qeshun chieshenquiocquin cainquidquido aton shubun icquidquido nuqui nendac.

Chieshenda

⁷ Aton shubun tabadnuequid naden Nuquin Papan Mayanēn ambi chiaid mibi bēdamboen tantiamenuen chieque. Tantiata:

“Nēbimbobi Nuquin Papan chiaid chieshēnenquido yec tabadta.

⁸ Equipito yacnoēsh cuēte nibēdacno capuquin tsusedpabon,

¿Nuquibēdida Nuquin Papa iqueque? Tantiabono, qeshun ambi chiaid chieshēmpampicpaden chieshēnenda.

⁹ Cuēte nibēdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi

¿Ambi chiaid niacshoda Nuquin Papan ěbi cuidpeba?

Isbono, quiacpadquiec tsusedpabo icsamboec tabadpampic.

¹⁰ Adec tabadsho isash nēishpondabi.

Ĕmbi chiaid chieshēnec ambibi tantiacpadequi icsadenepampic.

¹¹ Adquid icsho isun chushcain: Ĕmbi abitedi uabanquin nainash

ěbi tabadacno aidtedi puduedmenquido iquembi, quequin chiacpadomboen naindambi. Abimbo caimbi,

quequin Nuquin Papan isadaidbo chiampid nec.

¹² Abiambo Yampid Nuquin Papa abi iquec, quequin tantiasch cuēshēdchitomane qeshun tantiadonequiota.

¹³ Nuquin Papan chiacpadquiec tabadnuna, quec badiadquidēn-badiadquidēnquiec chuinanec onqueta ma adoac icsamianquidēn chiac Nuquin Papan chiaid chieshēnenquiocpanuna.

¹⁴ Esusbēd icquid nebi, quiondacaden tantiadenequin caimbudec aton matses yec Esus yacno nidanetequidquido mibi nendac.

¹⁵ Nuquin Papan chiampid utsitsen chuinu. Tantia:

“Nēbimbobi Nuquin Papan chiaid tantesa uampicpaden tantesa uainda.”

¹⁶ ¿Tsuntsin Nuquin Papan chiaid tantiashun chieshēmpampic? ¿Equipito yacnoshon bēyucanquin Moisesēn buanaido Nuquin Papan chiaid tantiasch chieshquido yanenquioda icpampic?

¹⁷ ¿Tsutsibidi seta 40ted matamec chiesho isash Nuquin Papa aidted-bidi seta matamec nēishted-nēishtedpampic? Adoac ¿Cuēte nibēdacnoēsh icsaquidtedi unēsbudnenquioda icpampic?

¹⁸ ¿Abitedi uabanquin nainash ěbi tabadacno puduedmenquido iquembi, quequin tsutsi Nuquin Papan chuipampic? ¿Ambi chiaid chieshēnquid Nuquin Papan chienquioda icpampic?

¹⁹ Ai, tsusedpabon Nuquin Papan chiaid tantiasch, Bēdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshēnsho Nuquin Papan abi yacno puduedmetiapimbo icpampic.

4

Ēbi yacno puduedash ěběd tabadtequid quiaid

¹ Ēbi yacno puduedash ěběd tabadtequid iquendac, quequin Nuquin Papan chiampicpadomboen něbimbobi chuioaique. Abi yacno abědi ictiapimbo icchitomane quequin Esuquidistu tantiadonequionona.

² Ēbi yacno puduedash tabadtequid iquendac, quequin ěndenquimboshě Nuquin Papan nuquin tsusedpabo chiampicpadomboen něbi nuqui chuioaic. Aden ěndenquimbo chuisho tantiash, Nuquin Papan chiaid abimbo iquec, quiaish tantienuio yanash, Aid cainu, quetiapiimbo tsusedpabo utsi-utsiec yampampic.

³ Ambi chiaid tantiaquidomboen něbi aidbědi tabadec.

“Ĕnden yampidon tantienquiocsho isash, Abitedi uabanquin nainash ěbi tabadacno chotiapiimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadomboen abitedi uabanquin nainash Nuquin Papa quenenash tabadpampic.

⁴ Abi tabadaid chuiquin Nuquin Papan naden dada uamiampique. Tantia: “Seistedec ushqin abitedi uabanash badiid utsin ěnash tabadpobi.”

⁵ Ashumbi nadentsen dada uamiampic:

“Ĕbi ěnash tabadacno ěmbi chiaid chieshěnquido chotiapiimbo iquendac,” quequin chuipampic.

⁶ Aden chuimiac ěndenquimboshě ambi chiaid tantiesa icquin niacniacquec Nuquin Papaběd tabadtiapiimbo icpampid icnubi ambi chiacpadomboen naquin caimpampidoběd něbi nidaid utsi-utsiec icquido Nuquin Papaběd tabadtequid nendac.

⁷ Ambi tantiacpaděn Nuquin Papan chuimiacpaden Dabid padon:

“Icsachitomane qeshun Nuquin Papan chiaid tantiaquiota,” quequin dada uapampic.

⁸ Chuiquid dapa Dabid tishamboecnoc Equipito yacnoěsh nidaid Canan yacno abi chuiquid dapa Osueběd isadaidbo cho-chopampic. Capuec ěnědash nidaid Canan yacno cho-choash isadaidbo ěnědenquio yec tabadte icnuc, Ĕbi yacno ěnědenquio yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquio icse-nampic.

⁹ Aden Dabid pado chuimiac tantiaish abi tantiadonequidombo Nuquin Papaběd tabadquido nendac.

¹⁰ Aden uabanquin nainash Nuquin Papa tabadacpadec ambi bědambo icmenuequin tantiactedi nabanquin nainash aidbědi tabadendac.

¹¹ Nuquin Papaběd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane qeshun adonona.

¹² Nuquin Papan chiaid ambia chuipampidquio abi iquec. Nadati-ambocquin tantiamete ambi chiaid nec. Shocosh sianfe abiuc daědi cuěnumbocquiděn siaid uguěduc sěnquin nami icsaid isendac. Adomboembidi Nuquin Papan chiaid chiac papuduedquin matsěn tantiaidtedi uguěduc sěnaid isacimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matsěs tantiamequin naden: Mimi tantiaid icsa něid icnubi mimi tantiaid utsi bědambo iquec. Adecbidi, mibi bunaid icsa něid icnubi mibi bunaid utsi bědambo iquec, quequin tantiamebanshun mimi tantiaid icsa mibi bunaid icsabědtabi ěnta, quequin Nuquin Papan chiaiděnquio mibi tantiamendac.

¹³ Abitedi isquidquo Nuquin Papa nec. Adquid icquin matses ompodtiapimbo noc isendac. Adembidi, Ĕmbi chiacpadomboenda matsesĕn nabanoshe. Tantuanu, qeshun, abi yacno tabadnuequin cainquido bĕisquiquin ambi nabanaidtedi chuimendac.

Matses chuibanec Nuquin Papabĕd onquequid dapa Esuquidistu

¹⁴ Adec Nuquin Papa abitedi isquidquo icnubi icsambocquid icquin ambembi matsesĕn aid chuitiapimbocho isun abi tantiaquido chuibanec Nuquin Papabĕd onquequid dapa ĕnden abi yacno dectatonĕdaid Esuquidistu nec. Aidi Nuquin Papan Madombo nec, quequin tantiesa yanchitomane qeshun aidquo tantiaquionona.

¹⁵ Matses chuibanec Nuquin Papabĕd onquequid dapa matses yequi natiamaidbimboec tsadpondash, quetiapimbo nuqui iquec. Matsesacsho mayan icsan, Nuquin Papan chiaid niacmenu, cac niaquenquo Esuquidistun icpanĕdash.

¹⁶ Adquid nuqui chuibanec Nuquin Papabĕd onquequid dapa iquec, quequin tantiec dacuĕdenquo yĕc abi yacno ĕnden Esuquidistubĕd puduedquidĕmbimboen Nuquin Papa ĕmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidapanĕdash, quequin tantiec mibi icsaid bĕpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanĕn mibi chieshmenquioquin dayacquio icmendac.

5

¹ Ĕndenquimbo Nuquin Papan, Min matses chuibanec ĕbĕd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnu, qeshun nidaidĕn capuquid yua cuesunedenequin taudienepampic. Adembidi, Mibi bĕdambo iquec, Papa, quequin ismequin, Nĕid menenu, cac Nuquin Papan naden nata cain chiacpadomboen naquin aton matsesĕn bĕaido cuesuneshun taudienepampic.

² Aton matses chuibanec Nuquin Papabĕd onquequid dapan aton matses icsasho isun, Con matsesbĕdi icsaquid nebi, quequin

³ nidaidĕn capuquid yua utsi-utsien cuesunedenepampic.

⁴ Aidi, Con matses chuibanec Nuquin Papabĕd onquequid dapa icnu, quenquo icpampic. Nuquin Papambi, Min matses chuibanec ĕbĕd onquequid dapa icta, caid nepampic. Min matses chuibanec ĕbĕd onquequid dapa icta, Nuquin Papan abia caid Adon cuĕmĕdquid icpampic. Aidi unĕsan abi tsibanquid-abi tsibanquidquien Nuquin Papan, Min matses chuibanec ĕbĕd onquequid dapa icta, caid icpampic.

⁵ Adembidi Nuquin Papan, Matses chuibanec ĕbĕd onquequid dapa icta, caid Esuquidistu iquec. Ĕbibi adquid icnu, quenquo Esuquidistu icpanĕdash. Aton Papambien:

“Mibi con Madombo neque.

Con shubun icquido mimbi icmiaido chuibanec ĕbĕd onquequid dapa icta,” capampic aton Papan Esuquidistu chuiquin. Adembidi Esuquidistu chuioaquin aton Papan:

“Matsesash icsaisa yec min utsibo icsaid bedshunash ciudadec unĕsash uincuenash matses chuibanec ĕbĕd onquequid dapa icta,” capampic.

⁶ Ambi chiaid utsi nad icpampic:

“Matses chuibanec ĕbĕd onquequid dapa Medquisedec yampidpadquid mibi nendac.

Adquid yec ĕnĕdenquioctequidquo mibi nendac.”

⁷ Adec, Con Pan chiampicpadquid icnu, quiash matsesacsho unēs uaquin mēyante nendabi, quequin tantiec shubiec nadpanēdash. Matses icsaid bedshunash cuidadquid ēbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiācpadomboen natiadquio iquebi, Papa, quequin yuen chuidonepanēdash Esuquidistun. Aden abi chuisho aton Papan adquidquio icmepanēdash.

⁸ Nuquin Papan Madombo iquequi matsesacsho mēyanac Nuquin Papan chiācpadomboen tantiabempanēdash.

⁹ Aden tantiabenash matses icsaid bedshunash abided cuidadash Nuquin Papa yacno Yuedanquid yanquiopanēdash.

¹⁰ Adoacsho isun, Nēbi matses chuibanec ēbēd onquequid dapa Medquisedecpadquid icta, cain Nuquin Papan Esus chuipampic.

Nuquin Papan chiaid ėnden tantiaboedi tantiesa yanenda

¹¹ Ambia matses chuibanec Nuquin Papabēd onquequid dapa Medquisedec nepampic. Aid chuiquin tantiamete dadpen iquec. Aidedi chuiadquiocquin mibi eme uacsho ėmitsipadomboentsimbi chuibanquin mibi tantiamepe?

¹² Mibia utsin tantiamiaid icquin ėnden tantiabempatecnēdan mibite-dishun. Adembidi mimbi abia tantiaid utsibo tantiamepatecnēdan. Bacuēn shuma chishquin tantiacpaden tantiaquid icquin Nuquin Papan chiaid tantiatiapimbo mimbi icpec.

¹³ Shuma chishquid bacuēmpi, Bēdamboen nata, quequin chiaid tantiesa nec.

¹⁴ Pete pequidēmbien, Nadomboen nata, quequin ismiac adomboem-bidi isbanec mēquiaquidēn icsa uainquiocquin nabanec. Adomboembidi Nuquin Papan chiaid tantiamia tantiabenuquidquio yanshun adomboen nabandenec. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabī, queshun nainquio iquendac.

6

¹ Aden Esus chuiquin abia tantiamiaid bēdamboen tantiashun abipadquid icnuequin abi chuiquin tantiamiaid utsi tantiaquionona. Abia tantiamiaid nad iqueque. Tantiā. Chuinu. Esus tantiaquid icta. Adquid icquin icsaid ėnta. Adembidi, Nuquin Papan chiaid tantiaquidquio icta.

² Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menuequin mēdanten mamishaid icta. Adembidi, Abi tantiaquid unēsash uincuenta iquec, quequin tantiaquidquio icta. Adembidi, Abi tantiesa cuidtequid iquendac, quequin tantiec bēdamboec tabadteneta.

³ Aidedi mimbi tantioc. Aidedi tantiaquioshon, Adembidi ambi tantiamiaid utsidedi tantianuna, quequin tantiaquin nabanta.

⁴ Aden Esuquidistu tantiasho isun aton Mayan Nuquin Papan meniaid ichoedi

⁵ Nuquin Papan chiācpadomboen nadatiambocquin nabamboed,

⁶ Esus matsesquio yec icsamboquid nepanēdash, quiash, Esus cuesten dectan, quequidbimboecquid icsho Nuquin Papan aid isendac. Aidēn oncain Esus mamēnshunec. Aden Esus tantienquio yanacsho bēdamboen tantiamenuen chuiquin, Icsaobique. Ėbi icsaid ėnu, cametiapimbo Nuquin Papan iquendac.

⁷ Baded-badedquiec ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuibanac abi tantiaquiosho Icbon yuedaïdo iquendac.

⁸ Echobëd cana shëta chedo ëshë idash dadpen yanushe queshun nëdëncatequid nendac. Adecbidi icsamboen chiaïd tantiaquid uquë nësiatequid nendac.

⁹ Aden mibi chuiquimbi, Nuquin Papan nësiatemaïd mibi nec, quequin tantiembi. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi.

¹⁰ Adoac abi tantiaquid utsibo tantiaquin mimbi nashundeniaïd Nuquin Papan bëpiscudenquiocquin tantiec.

¹¹ Adecbidi utsibobëd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caindac.

¹² Aden nabanec chieshenquiocquin Nuquin Papan chiaïd tantiaquioquin tsusedpabomba caimbudëc unësash Nuquin Papa yacno puduedampicpadec Esuquidistu tantiaquioquin ënenquiocquin caimbudequi ma Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³ Ëndenquimboshë Abadauan bëdamboec tabadsho isun ambia tanti-
aïdquio abi yampidquibidi icquin, Ëmbibi tantiacpadomboen nanuna. Abimbo caimbi, quequin Nuquin Papan naden chuiampic:

¹⁴ "Mimbi tishmiaïdën tsyuecquido dadpen iquendac, queshun ëmbi chiacpadomboen nabanquin mibi, Bëdambo iquebi, camembi," quequin Nuquin Papan Abadauan chuiampic.

¹⁵ Aden chuïsho tantiaishun caimbudquin tishtiapimbocquidëmbi Abadauanën chidon aton mado tishpampic.

¹⁶ Abimbo caimbi, quequin abitedi tantiaquidënquio Nuquin Papan chiac utsi, Muenec, quetiapimbo iquendac.

¹⁷ Adembidi, Ëbi yacno tabadte iquendac, quequin ënden yampidën Nuquin Papan chiaïd chuca uatiapimbo iquebi, quequin Esuquidistu tanti-
aïdquido tantiamenuen abimbo caimbi, quequin chuiapanëdash.

¹⁸ Adec Nuquin Papa muatiapimbo icquin ambi chiacpadomboen naïdquio Nuquin Papa nec. Adembidi, Ëbi yacno tabadte iquec, quequin chiaïd chuca uatiapimbo iquec. Adquid Nuquin Papa icnuc abi yacno ëbi puduedmequid Esus iquec, quequin caimbudquid nuqui nendac.

¹⁹ Aden caimbudquin, Ënden Nuquin Papa yacno puduedshun ëbi yuedquid iquec, quequin nuqui tantiec.

²⁰ Nuqui caintequid Esuquidistu ënden Nuquin Papa yacno bëyucanec abi tantiaquido chuibanec Nuquin Papabëd onquenuc puduedash Medquisedecpadquid yampanëdash.

7

Medquisedec matses chuibanec Nuquin Papabëd onquequid dapa

¹ Medquisedec nad icpampic, Saden yacnocquido chuïquid dapa nepampic. Ambi Saden cain cuënaïdi yuecshun Edusaden cain cuënoapampic. Aidbidi Nuquin Papan, Matses chuibanec ëbëd onquequid dapa icta, caïd nepampic. Adquid icquin aton mado bedboedo tsibanshun cuesuniash Abadauan chosho bëquedshun, Nuquin Papan bëdamboen isaidquio mibi nec, quequin Medquisedequën Abadauan chuiampic.

² Adsho tantiash, Nuquin Papan con mado bedmiaid nebi, quequin ambi cunesuneboedën na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanën menepampic. Bëdamboen tabadmequid icsho Medquisedec cuëmpampic. Adembidi, Saden yacnocquido chuiquid dapa icquin bëdamboen tabadmequid icsho Medquisedec cuëmpampic.

³ Aidi aton papabëd aton tita nibëdquid nec. Nëid ushën tishaid nebi, quetiapimbo aid iquec. Abi unëste ushë adquiobidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabëd onquequid dapa yanash adquiduidquio iquec. Utsi yantiapimbo iquec.

⁴ Aidi ëbi chuibanec Nuquin Papabëd onquequid dapa nec, quequin ismequin ambi bedaid aton na musuctanquin Abadauanën Medquisedec menepampic.

⁵ Yuecquiocshon Nuquin Papan: Min matses chuibanec ëbëd onquequid dapa icta, caid mibi icquin min utsibon aton na musucaid bedshunta, quequin Debi chuipampic. Adoac adquid Debi icash unësan aton tsyuecquid abentsec-abentsec icpampic. Debi Abadauanën tsyuecquid yec aton utsibonquio aton na musucaid bedquid icpampic.

⁶ Medquisedequëmbien tsyuecquidpenquio icquimbi Debin tsusedpa Abadauanën na musucaid bedshun, Nuquin Papan bëdamboen isaidquio mibi nec, quequin Abadauan chuipampic.

⁷ Bëdambo mibi icmenu, quequin Nuquin Papan chiaid ambia chuiquid Medquisedec icpampic.

⁸ Yuecshun ambia chuibanec Nuquin Papabëd onquequid dapapadquiocquin aton matsesën na musucaid bedquid Debi unëspampic. Adecbidi aton tsyuecquido unëspampic. Padnuen Abadauanën na musucaid bedquid Medquisedec unësesa yampampic.

⁹ Adquid icsho Debin buchisio Abadauan caidën, Con tsyuecquid dadpen iquendac, quequin tantiaquin, Con na musucshun menenu, qeshun Medquisedec menepampic.

¹⁰ Aton tsyuecquid tishambocnobi Debin buchisio Abadauan caidën Medquisedec bëqueduidshun menepampic.

Medquisedec yampidpadquid Esuquidistu

¹¹ Abadauanën tsyuecquido Debipadquidon Nuquin Papan nadomboen nata quequin chiaid nadenequin aton matses bëdamboequid icmian Medquisedecpadquid choenquio ictsempampic.

¹² Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabëd onquequid dapa yampanëdash. Debipadquidën Nuquin Papan nadomboen nata cain ëdenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec.

¹³ Aidpadquid icquin Nuquin Papa nidaidën tabadte shubu uashunaidën puduedshun nambocpanëdash.

¹⁴ Aton tita Uda cuëmëdquidën tsyuecquid icnuc matsesash Udan tsyuecquid Nuquin Icho Esuquidistu nec. Adquid icquin Debipadquidën nadeniampicpaden natiapimbo Esuquidistu icpanëdash. Adembidi ambi tantiaiduidi chiec Moises, Udan tsyuecquid Debipadquid nec, quenquio icpampic.

¹⁵ Medquisedecpadquid matses chuibanec Nuquin Papabëd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec.

16 Aton matses chuibanec Nuquin Papabéd onquequid Debi unésan Debin tsyuecquid aton matses chuibanec Nuquin Papabéd onquequid icpampic. Adquidpenquo Esuquidistu yampanédash. Matsesash icsaisa yec unésash uincuempánédash. Adec uincuenquid yec unéstiapimbo iquec matses chuibanec Nuquin Papabéd onquequid dapa yanquiopanédash.

17 Aid chuiquin Nuquin Papan nadopampic:

“Ēenquiocquin matses chuibanec Nuquin Papabéd onquequid dapa Medquisedecpadquid mibi nendac,”
quequin chuiampic.

18 Aden chiambien matses chuibanec Nuquin Papabéd onquequid dapa Debipadquidon Nuquin Papa nidaidèn tabadte shubu uashunaidèn puduedshun ènden nadomboen nata cain chiacpadomboen nadenequin aton matses icsaisa icmetiapimbo icpampic.

19 Adoaid Nuquin Papa yacno puduedtemaid matses icpampic. Nèbien bëyucanec puduedash Nuquin Papa yacno abi tantiaquido chuibanec Nuquin Papabéd onquec tabadec, quequin abi yacno yuedte caimbudac nidaidèn Nuquin Papabéd tabadachimboec nuqui tabadec.

20 Abimbo caimbi. ¿Matses chuibanec Nuquin Papabéd onquenu quec puduedquid ènèdenquiocnoc mibi icmendambi, Mado, quenquioda Nuquin Papa icpampic? Ai, aden chuiampic. Aden Debi chienquiocquin aton madouidtsèqui chuiampic. Debi unésan aton tsyuecquid aton matses chuibanec Nuquin Papabéd onquequid dapa icpampic.

21 Nèbi Nuquin Papan aton Madombo caic:

“Icho icquin matses chuibanec èbi chiec puduedoata, mado, quequin abimbo chiembi.

Aden chuiquin chuca uainquo iquembi.

Èndenquo yampid yec èbi yacno utsi puduedmenush èbi chiec puduedash ènèdenquo yec tabadquid mibi nec, quequin abimbo chiembi,”
quequin chiampicpadec aton Madombo adquid yanquiopanédash.

22 Adquid yec matses icsaid bedshunash abided cuidadash abi tantiaquido yuedec bëyucanquid Esuquidistu nec. Debibéd aton tsyuecquid adecbidi adquid ictiapimbo iquec.

23 Debi adecbidi aton tsyuecquido unèstequidquo iquec yuen chuibanec Nuquin Papabéd onquequid dapa ictiapimbo iquec.

24 Esusien abi yacno chuibanec bëyucanec puduedash ènèdenquo yec Nuquin Papabéd onquequid dapa nendac. Adquid utsi nibèdendac.

25 Adec Nuquin Papa yacno ènèdenquo yec tabadquin abi tantiaquido chuibanec aton Papabéd onquedenenuc abi tantiaquido Nuquin Papa yacno abi yuedtequid iquec abipadquid icsaisa yec tabadendac.

26 Adec aidi abi yacno yuedanquid, icsa nibédquid, icsa utiapimbocquid, icsa nibédquieq yacno tabadquid yec abi tantiaquido chuibanec Nuquin Papabéd onquequid dapa yampanédash.

27 Debipadquidpenquo yec, Matses icsaquid neque. Nuquin Papan chiampicpaden baded-badedquien nidaidèn capuquid yua cuesunènu, quenquo icpanédash Esuquidistu. Matses icsaid bedshunash abided unésanédash padpidec unésenquo icnush.

28 Debibédi abipadquid icsaquid icsho, Min matses chuibanec Nuquin Papabéd onquequid dapa aid icmeta, Nuquin Papan cac Moisesèn Debi adquid icmepampic. Nèbi Medquisedecpadquiden Bèdamboquid icpampid èbéd onquec èbi yacno Puduedquid Abentsècquiobi mibi iquendac. Abimbo caimbi, quequin Nuquin Papan chiampidquid Esuquidistu nendac.

8

Matses chuibanec Nuquin Papabéd onquec abi yacno puduedquid

¹⁻² Adec Esuquidistu abi tantiaquido chuibanec Nuquin Papabéd onquequid dapa Nuquin Papa tabadacnombobi puduedoash aton Papa Abiambo Yampidbédquio onquec tabadec. Debipadquidoen aton matses chuibanec nidaidēnshun Nuquin Papa tabadte shubu uashunaidēn puduedash auēshquio Nuquin Papabéd onquepanēdash.

³ Con matsesbēdi icsaposh icmanendac, queshun aid shubun puduednu queshun umanucshun nidaidēn capuquid yua aidon cuesunepampic. Adembidi Nuquin Papa tantiaquin menenuequin aton matsesēn bē-bēaid bedshun nadenepampic. Esusien Nuquin Papa yacno puduedoanush, Ēbi icsaid ēbibi cuidadnu, quenquio yec matses icsaid bedshunash abided cuidadpanēdash.

⁴ Aidi unēsabi yec nidaidēn tabadnuc Moisesēn chiacpadec Debipadquid matses chuibanec Nuquin Papa chiec onquequid icpanēdash. Adquid icnuc nidaidēnuēsh matses chuibanec Nuquin Papabéd onquequid dapa ictipimbo Esuquidistu icpanēdash.

⁵ Nidaidēn tabadquin Nuquin Papa tabadte shubu uashunaidēn puduedshun Debipadquidēn nashumpampic. Ēndenquimbo Nuquin Papan shubu naden icchitec, quequin abi tabadte shubu uanu, quesho tantiashun: “Macuēsh yacnoshon chuibocpadomboen shubu uame,” Nuquin Papan cac Moisesēn chuoapampic. Aden chiac Nuquin Papa tabadte shubu uashumpampic.

⁶ Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabéd onquec puduedpanēdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabéd onquec abi yacnombo yuedanquid ictiapimbo icpampic. Esuquidistuen Nuquin Papabéd abia yampid bēyucanec abi yacnombo nidoash abi tantiaquido chuibanec Nuquin Papabéd onquequid yec yuedanquidquio nec.

⁷ Ēndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquio ictsempanēdash.

⁸ Nadomboen nata caqui ambi chiacpadomboen nadenequi matses icsaisa yantiapimbo icsho isash: “Yuecash ěmbi chiaid utsi iquendac. Aid isadaidbo chiendambi. Aidbidi Udan tsyuecquido chiendambi.

⁹ Aidēn tsusedpabo Equipito yacnoshon bēyucamequin ěmbi chiacpadpenquiocnoc chiaid utsi iquendac.

Ēmbi abia naden nata cain chiaid Isadaidbon chieshēnsho utsibon natiacquin mēyansho isun isadaidbo mēnchicamboccondambi.

¹⁰ Ēnden chiaid adquio icnuc:

Nēbi ěbēd tabadmetequid chiaid nendac, quequin isadaidbo chiemi.

Ēmbi nadomboen nata cain chiaid isadaidbo pausunendambi tantiatie bunquionoc.

Aden tantiamiash aton Papa iquendabi.

Adecbidi adquidquio con matses iquendac.

¹¹ Adoaid Nuquin Papa tantiaquid icta, quesa iquendac.

Abitedi ěbi tantiaquidquio iquendac.

Nēdtedishun ěbi tantiendac:

Nëidic, bacuëbo; nëidic, caniabo; nëidic, tsusiobo aitedshun.

¹² Aido icsaidtedi padpiden tantienquoio yec bëpiscudendabi,"
quequin Nuquin Papan chiaid utsi nendac.

¹³ Chiaid utsi nec, quequin ënden abia nadomboen nata cain chiaid
ënëndendac.

9

Nuquin Papa tabadte shubu uashunaidën puduedshun naid

¹ Nuquin Papan ambi, Èbi ismequin nadomboen nata cain chiaid dadpen
dada uameshùn isadaidbo menepampic. Nuquin Papan naden ëbi tabadte
shubu uashun cacpadomboen abi nidaidën tabadte shubu uashumpampic.

² Nuquin Papa tabadte shubu uashunaid nitsinaid anquënë uaid daëd
icpampic. Baded-badedquiec puduedte anquënë uaidën tabote dectantebëd
pan sante cuate nacnenaid icpampic. Icsaisa anquënë uaid nec caid niosh.

³ Aid nuntambidi bitsipambocquid daëdcashun dectanëdaid shëcuë
anquënë uaid dayun uequid Isaisa Bëdaidquio cain chianiaidquio niosh.

⁴ Aid nuntan bëdambo noadquid sandoshon tauite shocosh icpampic.
Ambobidi cuate dabitacaid shocosh icpampic. Aid cuesten sauedaid mana
caid isadaidbon piampid dayun uaid icpampic. Aid sauedaid utsi Adonën
cuate tiaid dëyucaid icoapampic. Aid sauedaid utsi cuënote pada uashun
Nuquin Papan nadomboen nata quequin dada uaid icpampic.

⁵ Aid sauedte matincash tabadquid ambi abi yacnoshon uaid mayan
bëdamocquidbimboecnuc nacnenaid daëd icpampic. Aid daëd Nuquin Papa
icsaisambo bëchomauanquiec nac-nacquio ismiantequid icpampic. Nidaidën
capuquid cuesunaidën intac daseccaid isun Nuquin Papan matses cuiden-
quioctsiash, quequin aidën podon dëcatequin dectanaid diadpampic. Aid
Icsaisa Bëdaidquio anquënë uaid sanaidtedi chiombi.

⁶ Aden shubu uashun aidën icquidtedi nambanash icsaisa anquënë uaidën
baded-badedquiec puduedquidon Nuquin Papan Moises chiacpadomboen
uesquin nabampampic.

⁷ Padnuen Isaisa Bëdaidquio anquënë uaidën setan-setanquiec matses
chuibanec Nuquin Papabëd onquequid dapa puduedpampic. Baded-
badedquiec puduedtemaid aid nec. Èmbi con matsesbëdtan Nuquin Papan
chiaid niacposh icmanendac, quequin nidaidën capuquid yua cuneseshun
intac bedshun buanec nuntan bitsipambocnoc daëdcashun dectanëdaid
shëcuë anquënë uaid dayun uequid Icsaisa Bëdaidquio caidën puduedquid
abentsëqui nepanëdash. Ünësaidën intac buanenquoio yec puduedtemaid aid
anquënë uaid nec.

⁸ Adec aid anquënë uaidën puduedquid isadaidbo abentsëqui icnubi
Nuquin Papa yacno aton matses puduedte nibëdec, quequin Nuquin Papan
Mayanën tantiamete nendac.

⁹ Adembidi, baded-badedquien nidaidën capuquid yua cunesedenec,
Èbibi bëdamocquid nec, quetiapimbo icpampic. Adembidi aton matses
icsaisa icmetiapimbo icoapampic.

¹⁰ Adechbidi, Nëidic petequid nec. Nëidic actequid nec. Nëid nanush
mëpamëdtequid nec, quequin chiacpadomboen nabanquin icsaisa icme-
taimaidbidi nendac. quequin Nuquin Papan Mayanën nuqui tantiamec.

Esuquidistu abided unësec intac chiuidaid

¹¹ Ambi chiaid utsi tantiamenuec ambi uacmaid yec abipadquid Es-
uquidistu Nuquin Papabëd tabadboedi nidaidën budash matsesash icsaisa
yec matses icsaid bedshunash abided cuidadec unësash Nuquin Papa yacno

matses chuibanec aton Papabéd onquequin chuiquid dapa iquec abi yacno Yuedanquid yampanédash.

¹² Nidaidèn capuquid yua cuesuneshun intac bedshun buanec Nuquin Papa yacno puduedenquio Esuquidistu icpanédash. Aidi abia yampidi icsaisa matses icsaid bedshunash abided cuidadec unèsacsho cudan siac aton intac chiuidash Nuquin Papa yacnombo puduedoapanédash.

¹³ Aidi matses icsaid bedshunash abided cuidadabicnuc nidaidènshun natemaïd nasho matses cuèshèdmepanédash. Adoac utsibéd ictiapimbochso isun nidaidèn capuquid yua cuesuneshun aidèn intacbéda sisapuc daéd uashun daseccac icsaisa icmiabi yequi aton shubun puduedoapanédash.

¹⁴ Abia abéd yampid unèsesa aton Mayambéd iquec Esuquidistu icsaisambo yec, Matses icsaid bedshunash èbided cuidadebi, Papa, quianec unèsacsho siac aton intac chiuidacsho isun uincuemiaidèn nuqui pauquec ma Nuquin Papan chiacpadomboen nate bunquidquio nuqui icpanueshun.

¹⁵ Adoaidi Nuquin Papan chiaid utsi chuiquin tantiaquid Esuquidistu icpanédash. Ènden matses yampid icsaidbèdtabi nèbi matses icsaid bedshunash abided cuidadec unèspanédash èbi tantiaquido èbèdi tabadmenu quiaish.

¹⁶ Adnubien abi unèste tantiec, Èbi unèsan èmbi chiacpadomboen con na abitedi menebanta, matses quepec. Aden chuiquid unèso isun ambi chiacpadomboen menebanec.

¹⁷ Aden chuiquid unèsabi icnuc ambi chiacpadomboen utsibon meneti-apimbo iquec. Icbon na abi iquec. Aid unèsan aidèn na icboedi utsin na yanec.

¹⁸ Adembidi ambi nadomboen nata cain chiaid Moises menequin, Èmbi chiaidtedi nadenesho isun èmbi chiacnombo mibi buanembi, quequin Nuquin Papan chuipampic. Aden menequin chiac Moisesèn nadopampic.

¹⁹ Nuquin Papan chuibocpaden chuishun nidaidèn capuquid yua cuesuneshun intac bedshun actebèda daéd uain cacushun cuète shubi madquènaïd podo mèsequiabicquid bedshun sedquid piu uaid potaneshun daéd uaboed nènanshun Nuquin Papan chiaid dada uaidbèda matses daseccabampmic:

²⁰ “Nèid Nuquin Papan chuibocpaden mimbi natequidquio nec,” quequin ismequin Moisesèmba abitedi daseccabampmic.

²¹ Adoshombic Nuquin Papa tabadte shubu uashunaidbèda aidèn tabècaïdtedi daseccabampmic.

²² Cuesunaidèn intac daseccatequid nec. Shubu chedo cuesunaidèn intaquèn daseccabicquid mishtemaïd nec. Adecbidi cuesunaidèn intac chiuidenquiocnoc matses icsaid Nuquin Papa bèpiscudenquio iquendac.

²³ Nuquin Papa yacnombo puduednush icsaisa unèsendac, quequin ismenuen matses chuibanec Nuquin Papabéd onquec nidaidèn capuquid yua cuesuneshun intac bedshun buanec Nuquin Papa nidaidèn tabadte shubu uashunaidèn puduedpampic.

²⁴ Esuquidistu matses icsaid bedshunash abided cuidadec unèsash nidaidènshun Nuquin Papa tabadtebimboecnuc shubu uashunaid yacno puduedenquio icpanédash. Abi tabadacnombo abi tantiaquido chuibanec aton Papabéd onquec puduedash abi tabadec.

²⁵ Ambo puduedash, Matses icsaid bedshunash èbided padpidec cuidadnu, quenquio yec tabadec. Nidaidènshun setan-setanquien Nuquin Papa tabadte shubu uashunaidèn puduedquid aton intacpenquio bedshun daseccadenecc.

²⁶ Matses icsaid bedshunash abided cuidadec unèsambo yec Nuquin Papa yacno puduedoash padpidec nidaid yacno choash unèsash abuc Esuquidistu

puuedoatsiandac. Adenquoio iquec matsesash abi unēste ushēnquiobi matses icsaid bedshunash abided cuidadpanēdash nēid nidaid naimēdbudte aonentsēqui icnuc.

²⁷ Nidaidēn icquid unēste ushē abentsēc iquec. Unēsacsho ambi naid Nuquin Papan chuitequid ushē choendac.

²⁸ Adecbidi matses icsaid bedshunash abided cuidadec Esus unēste ushē abentsēc icpanēdash. Matses icsaid bedshunash cuidadoanu, quenquoio yec aidquoio padpidemboec choendac. Abi cainquido abi yacno puuedmenuec choaindac.

10

Abided cuidadec unēste abentsēquēnquiobi

¹ Setan-setanquien nidaidēn capuquid yua cuesuneshun intac bedshun buanec puuedusho isun matses icsaid bedshunash abided unēsash abi tantiaquido chuinuec bēyucanec Nuquin Papa yacnoēsh yuedanquidquoio choec, quequin nuquin tsusedpabon tantiabempampic. Nidaidēn capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abēd onquetiapimbo icpanēdash.

² Aidēnquoio daseccaquin matses icsaisa icmiac nidaidēn capuquid yua padpiden cuesunquoio ictsempampic. Adecbidi, Icsambocquid nebi, quenquoio matses ictsiandac.

³ Aton matses isaisa icmetiapimbocquin setan-setanquien nidaidēn capuquid yuaded cuesunepanēdash.

⁴ Adshun yuan intac bedshun daseccaidēn matses icsaisa icmetiapimbo iquec.

⁵ Adoaquien Esuquidistu nidaidēnshun tishac caniash onquec: “Nidaidēn capuquid yua cuesunenubi ēmbi chiacpadomboen matsesēn natiapimbo iquec qeshun yua cuesunete bunenquoio mibi iquec, Papa. Matsesēn tishtequid mimbi icmiaidquoio nebi, Papa.

⁶ Adecbidi nidaidēn capuquid abichobi tauidieniac matses abi icsambo iquec, quiash, Padi. Adoenda, mibi quec, Papa.

⁷ Adsho isun mimbi chuiquin dada uamiampicpadomboen naimbi, Papa.”

⁸ Mimbi dada uamiampicpadomboen matses chuiquidēn nabanquimbi aton matsesbēd bēdamboec tabadenquiocsho isash, Padi. Aid nainquiocquin ēnta, quequin mimbi matses chuinuc

⁹ mimbi ēnden nadomboen nata cain chiaid naimbi, Papa, quiash matses icsaid bedshunash abided cuidadec unēsun Nuquin Papan ēnden chiaid ēmepanēdash. Aden ēmian nēbi Nuquin Papan chiaid utsi iquec.

¹⁰ Aden Nuquin Papa bunacpadomboen nash unēstiapimbo yanshun abi unēste ushēnquoio abi tantiaquid paucpanēdash.

¹¹ Aden matses icsaid paupec, quetiapimbo noc badiadquienbadiadquidēnquien nidaidēn capuquid yua cuesuneshun intac bedshun daseccaquin icbo icsaidbēdta utsibo icsaid pauctiapimbo iquendac.

¹² Esuquidistuen abided unēsash abi tantiaquid icsaid pauctequid abentsēquiobi iquec aton Papabēdi ēnēdtiapimbo yec abitedishun icombo iquec.

¹³ Ambobi tabadquimbi abi chieshēnquido ambi chiacpadomboen naquidquoio icmete ushē cainec.

¹⁴ Abided unēste ushēnquoio abi tantiaquid ambi icsaisa icmiaid abēd cuēshēdesambo yampanēdash.

¹⁵ Adembidi Nuquin Papan Mayanēn Nuquin Papan chiaid utsi naden chieci:

16 “Nēbi ēbēd tabadmenun chiaid utsi nendac, quequin chiendambi. Aidi aton pabiaten puduedmendambi paucudenquiocnoc. Adembidi ėmbi chiacpadomboen nate bunquidquio icmendambi, quec Icho.”

17 Adshumbic Nuquin Papan chiaid utsi abi chiec aton Mayan: “Abi icsaidtedi pādpiden tantianu quenquio yec bēpiscudendabi, queoaic Icho,”

quequin chuipanēdash aton Mayanēn.

18 Adec abi icsaid bēpiscudash nidaidēn capuquid yua cuesuneta quenquio Nuquin Papa iquec.

Nuquin Papa yacno puduedte cainta

19 Adoaidi Esuquidistu unēsacsho isun cudan siac aton intac chiuidan, Ambi paucaid nebi, quec dacuēdenquio yec Nuquin Papan shubu icsaisa caid yacnombo puduedte ushē nuqui cainendac.

20 Matesash abided cuidadec unēsash Nuquin Papa yacno puduedoash tabadquid Esuquidistu nec.

21 Ambo nidash Nuquin Papabēd onquequin aton shubun icquido nuqui Esuquidistun chuibanubi,

22 Ambi paucaid ambi dapanac bimboecquidbidi nebi, quequin tantiaquin abi yacno choac bimboen nidaidēnshun Nuquin Papa chiec onquec tabadnuna.

23 Nuquin Papa ambi chiacpadomboen naquidquio nec, quequin abi tantiaquid yec abi yacno puduedebi, quequin caimbūdunna.

24 Aden tantiaquin abi tantiaquid utsibobēd tantiananec bēdamboec tabadquin nashunna.

25 Aden nabanec abi tantiaquid utsibobēd iccuededtiapimbo iquebi, utsi-utsiec quiacpadece adenquio icnuna. Adec iccuededec, Nuquin Papan chiacpadquiec bēdamboec tabadnuna, quec chuinanta. Niacquid dadpen icsho isash, Matesēn naid chuibanquin cuidte ushē badedquio choec, quish baded-badedquiec chuinanta bēdamboec tabadte bunc.

26 Ēbi icsaid bedshunash abided cuidadec Esuquidistu unēsapanēdash, quequin tantiash icsaded-icsadedquid iquec, Adquidquio Esus nec, queti- apimbo iquec.

27 Aid cuidte ushē chonoc nēishun comapenen chushcaindac Nuquin Papan abi chieshēnquido nibēdamequin.

28 Nadomboen nata cain Moisesēn chiaid niacsho isun daēdshun chiac niacquid unēsmiampic.

29 Nuquin Papan abia naden nata cain chiaid niactenequid adomboen cuidnushe quiash ēbi icsaid bedshunash abided cuidadec Esuquidistu unēsapanēdash, queboedi, Ēmbi tantiaboed Nuquin Papan Madopenquio matesquio ēbipadquid icsacsho cuesuniac, quequin chieshēnsho ¿comapenen Nuquin Papan cuidenquioda icpadic? Adquid Nuquin Papan Mayanēn bēdamboequid icmenu quequin chiaid chieshēnquid nec.

30 Nuquin Papan: “Ēmbimbo ėmbi chiaid chieshēnquid cuidendambi,” quequin chiaid nec, quequin nuqui tantiec. Adembidi: “Abi tantiaquid ichoedēmbi tantienquio yansho cuīdquidquio Nuquin Icho iquendac.

31 Abi cuidantequid dacuēdampambo iquec,” quequin Nuquin Papan chiaid nec.

32 Esuquidistu tantiaquid yanash mibi bēdamboec tabadondacpaden tantiamec chuinandereta. Esuquidistu tantiabnacchuca icsho chieshēmēnquidon mēyanaqui, Esuquidistu tantiaquid nebi, quec dayacquio yec bēdamboec mibi tabadteniondac.

³³ Dadpen tabadnubi, ěmbi tantiaid Esus nec, quesho mibi utsibon mamĕnshunondash. Adembidi aidon natiambocquin mĕyanac. Adomboembidi Esuquidistu tantiaquid utsi mĕyansho isun, Aidbĕd icquid nebi, quequin ismequin mimbi nashundenepondac.

³⁴ Esuquidistu tantiaquid utsi quĕnĕn nauedaic icsho isash abĕdi tabadacimboec natiambianquieci unĕsquo yec mibi tabadpondac. Adecbidi mibi chieshĕnquidĕn mitsana bedacsho isash Nuquin Papan ĕbi menetequid ampetiapimbo iquec, quequin tantiec, Bĕdambo iquebi, quec mibi tabadpondac.

³⁵ Adoaidi Nuquin Papan bacuĕ yec bĕdambo iquebi, quiash dacuĕdenquo yec bĕdamboen nabanec mibi ĕnden dayacquo iccondacpadquieci adquiecbidi tabadteneta. Adquid Nuquin Papa yacno puduedquid nendac.

³⁶ Utsin mĕyanaqui Nuquin Papan chiaid chieshenquiocquin tantiaideneta. Adecc tabadquin Nuquin Papa bunacpadomboen nabanash abi yacno tabadendac.

³⁷ Nuquin Papan chiaid nadquo iquec:
“Chiata. Nĕbien mimbi cainaid mibi mĕnchictequid choendac.

³⁸ Adsho tantiec ambi pauctequid abi cainec tabadec nec.
Abi cainuidquido ambi puduedmetemaid nec.
Adquid, Cho, catiapimbo iquebi,”
quec Nuquin Papa.

³⁹ Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anĕdĕnquequid nĕsiatequid nendac. Nuquien abi cainquid yec Nuquin Papa yacno puduedtequid nec.

11

Nad iquendac, quequin tantiaquin cainquid

¹ Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abĕd icte ushĕ nuqui cainendac. Aden cainquin, Con icbo ĕmbi isacmaid nec, quequin aid isbenacimboen ĕmbi tantiaid nec, quec tabadquidquo nebi.

² Adembidi tantiec tsusedpabo tabadsho isun, Bĕdamboen mimbi tantiec, capampic Nuquin Papan aido chuiquin.

³ Adembidi Nuquin Papan: “Abubĕdi nidaid yanquiota,” cashumbic: “Aidĕnquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec ĕmbi nĕbi isaidtedi nibĕdnuc ĩmitsipadomboentsi aidtedi icmebampampiba? quengquo nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

⁴ Adembidi, Mibi tantiaquin mibi bunacpadomboen nidaidĕn capuquid con yua cuesuneshun tauinu, quequin chuishun Abedĕn naid Nuquin Papan bĕdamboen isaidquo icpampic. Aton utsin Cain caidĕn aden tantienquiocsho Nuquin Papan icsamboen isaid icpampic. Adoshho isun Cainĕn aton utsimbo cuesuniambien Abedĕn Nuquin Papa tantiaquin naid chianetequidquo abi iquec.

⁵ Adnubien adecbidi abi tantiaquidquo Enoc icsho isun Nuquin Papan buanac unĕsesa icpampic. Bĕdambocquid nec, quequin Nuquin Papan buanacsho nibĕnquin Enoc istuidambocpampic.

⁶ Abi tantiesa icsho isashien, Ĕmbi bĕdamboen isaidquo nec, quetiapimbo Nuquin Papa iquec, quequin tantiaid tantiaquid icsho, Abi yacno puduemetequid nebi, quequin tantiaquid ambi bĕdamboen isaidquo nec.

⁷ Adnubien adembidi Nuquin Papa tantiaquin Noe caidĕn, Nuquin Papan chiacpadomboen nanuna, queshun, Ĕbĕd icquid unĕs uanushe queshun,

Con utsibo Nuquin Papan chiaid tantiesa yec unēstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bēdamboen isaidquio aidquio icpampic.

⁸ Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic.

⁹ Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquio yec daēdcaid shubumpi buan-buanequi aid nidaidēn tabadpampic. Adecbidi aton mado Isactsen aid shububidi buanash tabadoapampic. Adecbidi Isaquēn mado Acobotsen tabadoapampic.

¹⁰ Nuquin Papa yacno ambi tantiampicpadomboen shubu uaidēn tabadendabi, quequin cainec quenenenquio yec nidaidēn Abadauan tabadtenepampic.

¹¹ Adembidi Abadauanēn Nuquin Papa tantiaquin aton chido Sada machobudash bacuē tishtiapimbocquid icnubi, Nuquin Papan chiacpadquiec con mado iquendac, quequin tantiacpadomboen Abadauanēn chidon machobudquioshon aton mado tishpampic.

¹² Adoac Abadauan tsusiobudaidēnquio tsyuecquid dadpen uispatedi yampampic. Masitedbidi yanoapampic.

¹³ Aden Nuquin Papan aid nidaid ēbi menendac, quequin tantiec chieshenquio yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquio yec nidequi unēspampic. Adomboembidi tantiequi aton madobo unēsbudnepampic. Adomboembidi tantiequi aton baba ado unēsbudnepampic. Adomboembidi tantiequi aidon tsyuecquido unēsbudnepampic.

¹⁴ Nuquin Papa tantiaquid yec Nuquin Papabēd tabadendabi, quiash nidaidēn quenenenquio yec aidtedi tabadpampic.

¹⁵ Ēbi tishondacnombo tantiec unēsquio iquebique. Ambo nidoaibi, quiash nidtsempampic.

¹⁶ Adenquio yec, Nuquin Papa yacno tabadendabi, qesho tantias, Con matses nec. Adecbidi aton Papa nebi, quequin chuishun abi yacno abēd tabadte shubu uapampic Nuquin Papan.

¹⁷⁻¹⁸ Mimbi tishmiadēn tsyuecquid dadpen iquendac, quequin Nuquin Papan chiaid abimbo iquec, quequin Abadauanēn tantiaquiopampic. Aden tantiasho isun, Ēmbi chiaid tantiaquidquoda Abadauan neque. Isnu, qeshun, Min mado abentsēc Isac caid cuesuneshun ēbi tantiaquin tauita, Nuquin Papan cac Nuquin Papan chiaid niacmane qeshun Abadauanēn tauinuequin aton mado setsempampic.

¹⁹ Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiad, obeca bēnēded seshun tauipampic aton mado uincuen uaidbimboecquid icnuc.

²⁰ Adnubien adembidi Nuquin Papan chiaid tantiaquin Isaquēn aton mado abi ushēmbi tishaid daēd Acobobēdta Esau Nuquin Papan ambi chiacpadomboen nanun bēdambo icmete chiaid chuioapampic.

²¹ Adnubien adembidi Nuquin Papa tantiaquin tsusio budash unēsbudquimbi aton cuate bedash shuebudshun, Nuquin Papa bēdambo iquec, quequin Nuquin Papan ambi chiacpadomboen nanun bēdambo icmete chiaid aton baba Osen bacuē daēd Acobon chuioapampic.

²² Adnubien adembidi Osen Equipito yacno tabadec unēsnnun, Nuquin Papan nidaid menenun nabono, quequin chiaid tantiequi unēsebique. Mib-itedi: Aid nidaid yacno nidnu, qeshun con canite buanta, quequin chuioapampic Osen.

²³ Adnubien adembidi Nuquin Papan bēdambo icmiaid con mado nec, quequin tantiaquin aton mado Moises tishun aton titan aton papabēdtambi ompopampic. Equipito yacnocquid ancanquidēn: Isadaidbon chidon dada bacuē tisho cuesuneta, quequin chiaid niacquin dacuēdenquiocquin aton mado adopampic.

²⁴ Adnubien adembidi Nuquin Papa tantiec Moises caniacsho, Ancanquidēn champin mado mihi nec, caqui chieshēnec, Aidēn madopenquio nebi, queoapampic.

²⁵ Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icsho aidobēdtabi ancanquidēn mēyanaid iquendabi, quianec Moises cuēshēdpampic.

²⁶ Yuecshun Nuquin Papa yacno yuedac bēdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiash tabadquin Moisesēn cainpampic.

²⁷ Adembidi tantiaquin, Equipito yacnoēsh ēbi nidsho isash nēishun ancanquidēn con matses nidmenquio icpec, quenquio yec Nuquin Papa isachimboec Moises tabadtenepampic.

²⁸ Yuecash Equipito yacno choashun adembidi tantiaquin, Bēyuec tishaid unēsmetequid ēmbi ēbi yacnoshon uaid mayan bēda ēmbi budmiaid min shubu datamenun ēmbi chiacpadomboen nabanta, Nuquin Papan cac ambi chiacpadomboen naquidquo Moisesba icpampic. Ambi chiacpadomboen nabanquin nidaidēn capuquid yua cuesuneshun shēcuē cūēmano abiuc daēdi abuchēda itaquēn ēcnoshcashun nami shuishun pan bidisquesabēda pepampic. Adoacsho isun Nuquin Papan budmiaidēn datampampic.

²⁹ Adnubien adembidi Nuquin Papa tantiec Equipito yacnoēsh puduanec nidquin Acte Piu potec nidquid podqued nibēdboedi tanunquiocquidēn uesadmiadēn isadaidbon potepampic. Aden isadaidbon potenubi abēdtambi potenuec abi chieshēnquido Equipito yacnocquido actē chomiaidēn mentoadbudnepampic.

³⁰ Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuēscaïn tambanec dacuenadtanec shubu dadpen daquēnē uain tsasi uaid sec uebudpampic.

³¹ Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ēmbi yuedac ēbēd icquido cuesunenquiocpec, qeshun dadpen chudmequidēn, Daba caidēn, isadaidbo aton shubun yuedquin ompopampic. Adoac nidoash aton matses utsibobēd abia choquido choash Dababēd icquido cuesunianenquiocpampic Nuquin Papa tantienquio yec chiesho Daban matses utsibo cuesunequimbi.

³² Adecbidi Nuquin Papa tantiaquid dadpen icpampic. Nēidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpenshun Nuquin Papan chiacpadomboen naïndac, quequin cainquido icpampic. Abitedi chuitiapimbo iquebi.

³³ Aido utsin-utsinquier: Abi ancaidobēdtabi ancanquid Nuquin Papa tantiesa nec, qeshun cuesunepampic. Adembidi, Mibi bēdambo icmenu, quequin Nuquin Papan chiaid tantiaquin cainec adquidquo icpampic. Adquid icsho isun, Pemenu, qeshun bēdi nibēdquid deon caid tabadacno buanshun nebudpampic. Adosho isun piantiapimboecnoc Nuquin Papan quiuēccac deonēn penquiocpampic.

³⁴ Utsin-utsinquier adembidi Nuquin Papa tantiaquid icsho, Nēdēncashun tauinu, cac taboadaidēn pichiquenquiocquid icpampic. Adembidi tantiec

utsi-utsiec chështen senuesho isun mënchicquin cuemepampic. Adembidi tantiegui dayacquiociapimbochoedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic.

³⁵ Adembidi utsin Nuquin Papa tantiaquin nianten bacuë unësboed uin-cuemetanquin ani menepampic. Adembidi tantiec tsadsho isun Nuquin Papa tantiesa nebi, camenuequin shoyombededtsëccquien cuesuniaqui, Nuquin Papan chiaid tantesa uainquoio yec Nuquin Papa yacno nidëbi, quiash unëspampic.

³⁶ Utsi-utsien shocosh bucun mëtaneshun quënën nauedacsho isun mamënshunquimbi cueshcanten cuesaqui Nuquin Papabëd tabadte tantiec dacuëdenquoio yec tsadpampic.

³⁷ Adembidi utsitsen cuënoten seshunepampic. Adembidi utsitsen sënten nacsënshunepampic. Adembidi utsitsen nidaidën capuquid bitsi nacnenaid dasiuidpampic. Aton na nibëdnubi mëyanaqui Nuquin Papa tantiaquidquoio yec aitedi tabadpampic.

³⁸ Nuquin Papa chieshënquid ëbëd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shëcuë uaidën utsi tabadpampic.

³⁹ Aidtedishun, Ëbi yacno mibi chuibanec ëbëd onquequid bëyucanec yuedanquid iguendac, quequin Nuquin Papan chiaid tantiaquin cainec aitedi unësbudnepampic.

⁴⁰ Aidtedi icnubi abi icsaid bedshunash abided ciudadec unësash uin-cuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

12

Aton bacuë Nuquin Papan dayacmenuequin namiaid

¹ Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaidbëdtabi nainquiocquin ënuna. Adembidi dayacquiocquin Nuquin Papan chiacpadomboen nabanec tabadnuna.

² Esuquidistu, abitedishun icbombo abia yampidquoio ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isacimboen adonona. Aidi, Ëbi yacno matses yuednu, quiash aton Papabëd tabadteneboedi matsesash icsambocquid-bimboecnuc cuesten dectanac chieshenquoio yec unësacsho uincuen uaid yanash aton Papabëdi Icbombo iquec. Aidquoio tantiec isacimboc nidaidën nuquibi tabadnuna.

³ Abi chieshënquidën natiacquin mëyanaqui chieshenquiocquid Esuquidistu icpanëdash, quequin aid tantiec ma chieshtoenquoio icpanuna.

⁴ Ëbi icsaid padpiden nainquoio icnu, qeshumbi natiatequid icnuc mimbi ënambo iccoc.

⁵ ¿Con bacuë cain Nuquin Papan mibi dayacquoio icmenuequin chiaid bëpiscudecta icco? Nad iqueque. Tantia:

“Abuido, min Icbon dayacquoio icmenuequin chiaid cacuidenda. Adecbidi ambi natiamianquiopec camiaid icash chieshenda.

⁶ Ambi matiamianquiopec camiaid dayacquoio icmenuequin nametequid con bacuëbo nec,”
quequin Nuquin Papan chiampid nec.

⁷ Natiatequid mibi dayacquoio icmetequid nendac. ¿Ëbi cudasaidquoio con mado dayacquoio icmenuequin namebanesa nebi, quecta aton papa icpadic?

Padenquoio. Ambi: Con bacuë nec, caid natiatiquid icnuc, Dayacquio icmenu, quequin ancaquin chono uaic.

⁸ Natiatiquid icnuc ambi dayacquio icmenu quequin namiaidpenquoio yec, ambi, Con bacuë nec, caidpenquoio mibi nec.

⁹ Ęnden dayacquio icmenu quequin mibi ancaquidën mibi tishmequidën chiacpadomboen natiatiquid icnuc naquidquoio mibi icpondac. Nëbi Nuquin Papan dayacquio icmenu quequin chiacpadomboen natiatiquid icnuc naquidquoio icnuna abëdi tabadnuen.

¹⁰ Abi tishmequidën ambibi tantiacpaden dayacquio icmenu quequin aton bacuë yuen nametiapimbo iquec unësendac. Padnuen Nuquin Papan abipadquid icsaisa icmenu quequin natiaquionoc nuqui namendac.

¹¹ Adoac nuqui natiaquieq tabadec. Adoaidi yuecash nuqui bëdamboec tabadendac. Adecbidi natiatiquid icnuc dacuëdënesa nuqui yanec. Adecbidi Nuquin Papabëd icquid nebi, quequin tantiaquidquoio yec natiatiquid dacuëdënesa nuqui yanec.

¹² Aden tantieq dayacquio ictiapimbochoedi: Abipadquid iquendabi, quiash dayacquio yec tabadta.

¹³ Adenuidi naic tabadquin utsibo isme ma dayacquio ictiapimbocquin niaquec cuëshëdte bumboedi bëdambo yampanuna.

¹⁴ Aden naic tabadec utsibobëd bëdamboec tabadnu, quiash adec tabadta. Adecbidi Nuquin Papa icsaisa yacpadquieq nuquibi icnuna, quiash aid tantieq tabadec isnanec chuinanec adquid yanta. Adoesa Ichobëd tabadi-apimbocquid nendac.

¹⁵ Nuquin Papan bëdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bëdamboec tabad, quequin chuiban.

¹⁶ ¿Ada aton chidopenquoio chudquid icpec? Adecbidi, ¿Ada adembidi aton bënëpenquoio chudmequid icpec? quequin isnuequin adquid istuidshun Nuquin Papan chiaid chuiquin bëdamboen tabadmeta. Adembidi, Esaupadquid icnushe qeshun ¿ada Nuquin Papan bëdamboen tantiaid chieshënquin isuidquid icpec? qeshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unësnun tsusio icquin con pan bëdamboen tantiaid chuisho mimbi tantiaata, quequin aton papan bëdambo icmenu quequin chiaid chieshquin Esaun tantienquiocpampic.

¹⁷ Yuecshun, Aton utsi Acobo aton papan chuibanosh, qesho tantiaish shubiquin, Mimbi bëdamboen tantiaid ëbitsen chui, papa, cac chuitiapimbocquidëmbi, Ęnden nibëdquiocnoc uesquin min utsi chiombi, quequin Esau chuipampic aton papan.

¹⁸ Adembidi, Nuquin Papan nadatiambocquin uabanaid tsusedpabon isampicpadomboen mimbi isabiccoc. Macuësh Sinai caid yacno choshon aidon isbenampid nëid iquec: natia nëdënquedote; utsibic, inchëshacimboec isadquid; utsibic, cunquequid dapabimboec isadquid;

¹⁹ utsibic, shocosh shoncaten shoncachimboec onquenuc pabiate paëmboshë icpampic. Adec onqesho tantiaishun, Papa, mibi onqesho tantiaic dacuëdampambo iqueque. Mibi chuitequid Moises icme, capampic.

²⁰ Adec macuësh yacnombo icquin: “Ęmbi nadatiambocquin uabanaid ismenubi macuësh yacno anoentsëqui choenda. Adecbidi matses adecbidi nidaidën capuquid. Anoentsëqui choquid cuënoten setequid nendac,” quequin chuipampic Nuquin Papan.

²¹ Aden Nuquin Papan nadatiambocquin uabansho isash: “Dacuëdampambo iquec, quiash, Dacuëdebi,” queoapampic Moisesetsen uëdëquec.

²² Mibien dacuēdenquoio yec Macuēsh Sion cashumbic Edusaden Chuca Bēdamboquid caid Nuquin Papa ēnēdesambo tabadacno choacimboec mibi tabadec caimbi. Aid nuntan Nuquin Papan abi yacnoshon ambi uaid mayan bēdabo tambantiapimbo yec dadpenquioshē tabadec. Aido, ěmbi nashunaidtedi, Esu tantiaquid chotequid iquec, quiash bēdambo iquebi, quec cuēdēdonec tabadendac.

²³ Abi tantiaquidtedi Nuquin Papan bacuē icho yacpadquiec aton shubu abentsēquēnuēshi Icbobēd onquec ěnden mibi taēpoc. Aidi mimbi naid cuidquid ambi chiacpadomboen nadenequid mibi unēsesa icsaisabidi icmequid Nuquin Papa nec. Aidbēd ěnden tabadacimboec abēdi onquec mibi taēpoc.

²⁴ Abēd icquin Nuquin Papan ambi ěnden chiaid ěmeshun ambi nēbi chuioaid, mibi chuibanec aton Papabēd onquec bēyucanec yuedanquid Esuquidistubēd ěnden mibi onquepoc. Mibi icsaid bedshunash abided cuidadec unēsō isun cudan siac intac chiuidnēdaid tantiec aidbēdi mibi onquepoc. Abedēn nidaidēn capuquid yua cuesuniampicpadquidēn intac chiuidec unēsaid tantiec Icbobēd mibi onquetiapimbo iquec.

²⁵ Nuquin Papan chiaid niacchitomane quequin isquiota. Macuēsh Sinai yacno choquid Nuquin Papan ěnden chiaid chuiquid tantiate bunesa cuidpampic. ¿Adembidi ambi nēbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic?

²⁶ ěnden Macuēsh Sinai yacno Nuquin Papan chiacnoshonquoio nidaid ishcumpampic. Nēbien: “Padpidemboen nidaidbēdta abu ěnēdmenuen ishunoaindambi,” quec Nuquin Papa.

²⁷ Aden chuiquin ambi uaidtedi ěnēdmenuen padpidemboen ishunoaindac abi yacno choaidtedi icsaisa icmiaido yec ěnēdtiapimbo iccuedednuc.

²⁸ Adoaidi Nuquin Papabēd abi tantiaquido ambi bēdambo icmiaido yec abēd tabadte ěntiapimboen Nuquin Papan nadatiambocquin nabanaid tantiec cuēdēdonec tabadta.

²⁹ Nadatiambocquid Icsaisabidi icquin aidēmbi, Esuquidistu tantiaata, quequin nēbi chiaid tantiesa chian anēdēnquequid nēsecaindac.

13

Nadomboen nata cain chiaid

¹ Esuquidistu tantiaquid yec aid tantiaquidtedi con utsibo nec, quiash tantiananec nashunanta.

² Adembidi Nuquin Papa yacnoēsh choquid abi tantiaquido nashuntequid ambi uaido mayan bēdabo chosho yuedampicpaden mimbi isacmaidquio Esu tantiaquid chosho yuedta.

³ Adembidi quēnēn nauedaaid iquec utsi iste buntsiabi, qeshun quēnēn nauedaaid istan-istanta. Adecbidi buntsiabi, qeshun menētan-menētanta. Adembidi utsin mēyanaid tantiec shubioata.

⁴ Adecc tabadec con chidopenquoio chudnu quesa iquec chido utsi isuidquid icta. Adesa icsho Nuquin Papan mibi cuidendac.

⁵ Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bēdambo iquebi, quec tabadta. Adecc tabadquid Nuquin Papan ěnden dada uamiampid naden chiecc:

“Mibēdi iquebi.

Nianenquiocquin mibi dayun uanuna.”

⁶ Adsho tantiaash:

“Con Icbombo ēbēdi iquendac.

Aidēmbi ēbi cudasquin dēcatiac chieshēmēnquid dacuēdēnenquoio iquembī,”

nuqui quendac.

⁷ Adembidi nidaidën icquid mibi chuiquid dapabo Nuquin Papan chiaid mibi tantiamenuequin chuiquido bëshunenda. Aido Esus tantesa uainquo yec bëdamboec tabadpanëdash. Aido tanec bëdamboec tabadoata.

⁸ Con Icbombo Esuquidistu nec. Abia Yampidquo yec nëbi adquiobidi iquec. Aidi ënëdtiapimbo yec abi tabadec.

⁹ Adquid Esus icnuc Nuquin Papa chieshënquidën chuisho tantiesa icta. Aidën naden chiec, Nëid pëtequid icnubi nëid utsi petemaid nec, quequin chiec. Mimbi piaidën mibi bëdambo icmetiapimbo iquec. Padnuen matses icsaid bedshunash abided cuidadquidën, Nuquin Papan madonquo paucaid iquebi, quequin tantiaquidquo icsho isun Icbobëd tabadmequin ambi bëdambo icmiaidquo nendac.

¹⁰ Matses icsaid bedshunash abided cuidadash uincuenash abi tanti- aquidbëd ënëdenquo yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidën capuquid yua cuesuneshun nibëdquiocnoc tauiaidënquo matses Nuquin Papabëd tabadmetiapimbo iquec. Adembidi aidënquo nuqui icsaisa icmetiapimbo iquec.

¹¹ Isadaidbo icsapash, qeshun nidaidën capuquid yua cuesuneshun aidën intac bedshun, Nëid intac Icsaisa Bëdaidquo anquënë uaid nuntan buanshun daseccacsho isun abi yacno puduedacimboecsho Nuquin Papan isadaidbo isec, qeshun nuntan buanshun daseccapampic. Adnubien matses nibëdacno nami buanshun uesquin tauipampic.

¹² Adembidi matses tabadenquo yacno Esus buanshun dectanac unëscasho siac aton intac chididiepanëdash nuqui icsaisa icmenuec.

¹³ Adoaidi abi tantiaquid yec abëd icquid nebi, quequin ënden chiampic- paden nainquiocsho isun isadaidbo Esuquidistu tantiesan cacumiaqui chieshenquo yec tabadta.

¹⁴ Adquid iquec nidaidën yuec tabadesa icquimbien Edusaden Chuca caid Nuquin Papa ënëdtiapimbocquidbëd tabadaid cainquidquo nuqui nendac.

¹⁵ Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bëdambo iquec, quequin Nuquin Papa chuidenenuna.

¹⁶ Adodenequin utsibobëd tantiananquin nashunquin aton na nibëdquid menequid icta. Adsho isash, Con mado yec con champi yec quec bëdamboec tabadquid nec, quiash bëdambo iquebi, quependac Nuquin Papa.

¹⁷ Ambia Esus tantiashun chuiquidon chiacpaden nabanta. Nuquin Papan, Ëbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiacpadomboen naquin ma aido bëdambo iquebi camepanuna. ¿Chieshecta mibi bëdambo icpe? Padenquo.

¹⁸ Chieshenquiocquin ëbëd icquid Nuquin Papa chui. Bëdamboen nabanec tabadteniobi. Adequi tabadebi utsibo: Icsambocquid nec, quetiapimboc- noc.

¹⁹ Adembidi ëbi tantiaquin Nuquin Papa chuidoneta. Mimbi adonoc badedquo mibëd iquendabi.

²⁰ Adembidi utsibëd bëdamboen tabadmequid Nuquin Papan aton Mado matsesacsho utsibon unës uashun siacsho isun uincuemiac bëyucanec abuc puduedoash abitedishun Icbombo nec. Abi tantiaquido chuinen yuedquid aidi Nuquin Papan icmepanëdash.

²¹ Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Ëbi puduedmenuen Nuquin Papan naid nec, quequin ënenquiocquin chuiquid ma icpanuna.

²² Mibi tantiamenuen ěmbi dada uaqun chiaid daědpacksěcquio icsho bědamboen isec onquequin tantiadoneta.

²³ Něbi utsi chiembique. Tantia. Timoteyo quěněn nauedboedi něbi puduemiatic aid badedquio němbo choan aidbědi mibi yacno nidendabi.

²⁴ Miběd icquid Esus tantiaquid utsibobědta mibi chuiquidtedi tantiec tsadebi quequin Pabadon dada uaosh, quequin chuita. Adecbidi ěbitsen tsadebi quequin chuiota, queoapēc něuěsh Itadia yacno tabadquido.

²⁵ Nuquin Papan bědambo icmiaid ma mibitedi icpanuna. Padi. Aitedi dada uaombi.

SANTIACON DADA UAID

1 Santiacono nebi. Nuquin Papan namiaidquoio, Nuquin Icho Esuquidistun namiaidquibidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

Natiametequid

2 Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata.

3 Adaid icnuc, ¿Èbi tantiaquidquioda neque? Isnu, quequin, Nuquin Papan èbi dayacquio icmec, quequin tantiec adecbidi tabadoata.

4 Aden tantiec tabadsho isun bēdamboec tabadte uesquin tantiabenquidquio mibi icmendac ma Esuquidistupadquid yampanueshun.

5 Mimi tantienquoio yaid Nuquin Papa chuita. Aden chiaquien, Ma tantianu, queshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec.

6 Èbi tantiane, queboedi, èbi tantiamenquiocpec quequin tantienda. Èbi tantiameppec queboedi padenquoio yanec cuëshēdec capuidequi yampec.

7 Adquid Nuquin Icho pausuntiapimbo icpec.

8 Adquid, Nuquin Papan èbi tantiamec, queboedi capuidequi icquidbimboec icpec.

9 Shubu abentsēquēn tabadacpadquiec tabadquid icta. Adec tabadec mitsana daēdpactsēc icquid yec, Con na daēdpactsēc iquec, quequin mitsanauidi tantienquiocquin naden tantiata. Nuquin Papan bacuē nebi. Abēdi cuëshēdenquoio yec tabadebi, quequin aiduidtsēqui tantiec tabadteneta.

10 Aton na dadpen icquidombien aton na bēdiactsec tantiaquin naden tantiendac: Con na nëidic chodquec; utsibic chiuidec. Adecbidi con nami shēnibudequi Nuquin Papan bacuē nebi. Abēdi cuëshēdenquoio yec tabadebi quequin tantiec tabadta.

11 Tanunquiocquidēn tiedēn caniquid unēsec podō tididiquec. Bēdambochoedi nibēdquiec. Adquiecbidi icho aton nabi bedbanequi aton nami shēnibudequi unēsec. Icho ichoedi icho ictiapimbo yanec. Adec icho ictiapimbo yanebi, quequin mitsana comapenen tantienda.

12 Adecbidi natiaic shubitequid icnuc Nuquin Papan chiaid niaquenquoio yec dayacquio yec tabadquid Nuquin Papan bēdambo icmiaid nendac. Adquiecbidi, Èmbi chiaid niaquenquoio yec mibi tabadsho isembi. Èbēd icquid mibi neque. Pudued. Nēuëshquoio mibi unēstiapimbo iquec, quendac Nuquin Papa.

13 Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec.

14 Nidaidēn tabadquidien icsate bunec abibi icsaic. Adecbidi ambibi tantiacpadec icsaoaic.

15 Icsamane quequin tantienquoio yec unēsacsho abi yacno puduedmenquiocquin Nuquin Papan uquē nēsacaindac adquid.

16 Utsibo, Nuquin Papan chiaid chieshēnesa nebi, quec mibibi mua uadenda.

17 Nuquin Papan pausunaid bēdambouidi iquec. Utsi uaquin namiantiapimbo iquec. Adenuidi namec. Adquiuuidi Nuquin Papa iquec.

18 Ĕmbi chiaid tantiaquidquo icsho con bacuë nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquo aton Mado Esus nidaidën budmepadenedec. Adec budash nidaidën capusho isash abëd icboedo abi tantiaquido nuquitedi nec. Adquid icsho ambi bëyuc bacuë icmiaido, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquo dadpen yampanuna.

Nuquin Papan chiaid tantiaquin nabanta quiaid

19 Nëid bëdamboen tantiata. Chuinu. Nuquin Papan chiaid bëdamboen tantiaquid icta. Ambi chiaid bëdamboen tantienquiocquin aid badedquo chienda. Adecbidi badedquo nëishenda.

20 Badedquo nëishquidën Nuquin Papan chiacpadquiec bëdamboec tabadaid ismesa nec. Adquid, Bëdamboen mimbi naoc, Nuquin Papan catiapimbo iquec.

21 Bëdamboec tabadesa icquin mimbi icsamboen tantiacpaden naid ënquiota. Aden ënu quiash, Icsaobique. Mimbi chiaid tantiaquiono. Ĕbi pausun, quequin Nuquin Papa chu. Aden chuisho Nuquin Papan mibi pausunec. Ambi pausunaid iquec aton Mado Esuspadoquo yec cuëshëdenquo yec abëdi mibi iquendac.

22 Nuquin Papan chiaid tantiashun nainquo yequi Nuquin Papan chiaid bëdambo iquec, quec mibibi mua uadenda. Nuquin Papan chiaid tantiabocpadamboen nabanta.

23 Nuquin Papan chiaid tantiashun naisa isnanten

24 bëisadash bëpiscudacimboec bëpiscudendac.

25 Padnuen Nuquin Papan nëbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuë caimbi, quequin Nuquin Icbon chiacpadamboen nabanec tantesa uainquiocquid adquid nendac. Aden tantiaquin nabanquid Nuquin Papan bëdambo icmendac.

26 Padnuen, Nuquin Papan chiaid tantiaquid nebi, queboedi ana bëdamboen oncamesa abibi onquequid nec. Adquid, Esus tantiaquid nebi, bëdambo ambibi tantiaquin icsamboen chuiquid nec. Abipenquo chuiquid nec. Adquidbidi bëdamboec tabadaid ismesa nec.

27 Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsëcquid chonoadsho isun nashuntiad. Natiac camiaid icsho isun adembidi nashunoatiad. Adembidi shiadimpi machoabictsëcquido tantiaquin nashunoatiad. Adembidi niante machobo utsin bedabi samëdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Ĕmbi chiaid tantiaquin naquidquo nec. Con Madopadquidquo icsaisa nec, quendac Nuquin Papa.

2

Nëid bëdambo iquec. Nëidien icsambo iquec, quesa icta quiaid

1 Utsibo, Nuquin Icho Esuquidistu Bëdaidquo nec. Aid tantiaquid mibi nec. Adquid icquin, Nëid bëdambo iquec. Nëidien icsambo iquec, quenquiocquin icsamboen nainquiocta.

2 Mibi iccuededacno Esus tantiaquid mimbi isacmaid choec. Abentsëc bëdaidquo dasuidash nac-nacquiocquid mësiuidquid puduednubien utsi ic-sactsëcquiocquid dasiuidtsash puduedec. Aid daëd chosho isun ¿mitsipadentsi mimbi tantiapatsia?

³ Bēdaidquio dasiuidquid isun naden mimbi tantiatsiac: Bēdamboquid nec. Aton na dadpen icquid nec, quiacimboen, Tsusion dayunquio tsadec cho, quequin mimbi aidi tsadumpec. Adshumbic, icsactsēcquioquid dasiuidquid isun, Aton nain nibēdchitec, quiacimboen uano tsad mimbi caoapec.

⁴ ¿Nēid icsamboquid nec. Nēidien bēdamboquid nec, quiacimboen Esus tantiaquid utsibo mimbi tsadunenquioda ictio? ¿Aton na tantiaquin adoenuquioda ictio? Aden naquin bēdamboen tantiaquin naisa mibi neyoc.

⁵ Nuquin Papan chiaid tantiesabimboequin mimbi naid nec. Mimbi, Icsamboquid nec, quequin tantiaquin uano tsad caid tsadbudash nadpec: Icsamboquid nec, quequin ēbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iquendac.

⁶ Aidi bacuēbimboecnuc mimbi uano tsadumpec. ¿Utsibic tsusio dapabimboecnuc mimbi dayunquio tsadumbocpadquidēn utsin-utsinquien chono uashun mibi daēdpactsēc menenquioda ictiosh? ¿Adquidon mua uain chuiquin mibi utsi-utsien quēnēn nauedmenquioda ictiosh?

⁷ ¿Adoanquidēn baded-badedquien Esus quec onquequin mamēnshunenquioda ictiosh?

⁸ Nuquin Papan chiaid nad iquec: “Utsin naden ēbi nashuntiadquio iquec quequin, mimbi tantiacpadomboen nashunta.” Nuquin Papan chiacpadomboen tantiaquin nashunquidquio iquec mibi bēdambo icpec.

⁹ Nēid bēdambo iquec. Nēidien icsambo iquec, quiacimboen naquid icnuc Nuquin Papan chiaid niacquid mibi iquec.

¹⁰ Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec.

¹¹ “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidoudi chudquid icquimbi utsi cuesunquid mibi iquec Nuquin Papan chiaid niacquid mibi nepec.

¹² Mibi tantiaquin mibi icsaid pauquec Esuquidistuded icsamboquid-bimboec yec unēspanēdash. Aid tantiaquid icsho Esusēn paucaid mibi nec. Adquid yec Ichon mibi tantiaquin nabanacpadomboen utsi tantiaquin nabanec bēdamboec tabadta.

¹³ Esuquidistu tantiaquid utsi icsamboquid nec quesa icta. Ēbi icsaid Esuquidistun paucac. Adomboembidi abi tantiaquid utsi icsaidbidi paucac quequin bēdamboen naban. Icsamboquid nec quiacimboen icsamboen nabansho isun Nuquin Papan adomboembidi mibi chuiquin cuidoaindac. Ēbēda Esuquidistun paucac nec quequin utsi tantiaquin nashumēnquid icquin icsamboquid nec quiacimboen icsamboen nashuntiapimbocquid mibi nec.

Esus tantiaquid nebi quequin ambi tantiacpadomboen nabanquin isme quiaid

¹⁴ Utsibo, Nuquin Papan bacuē nebi, queshun ¿Icbon chiaid nainquiocquinda utsi bēdambo mimbi icmepadi? Padenquio.

¹⁵ Esus tantiaquid abi dasiuidtebēd pete nibēdquid, Bec cho, quesho

¹⁶ menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bēdambo icpadic? Padenquio.

¹⁷ Adembidi, Nuquin Papan bacuē nebi, queshun Icbon chiacpadomboen naisa Icbon bēdambo icmiaidpenquio nec. Nuquin Papan bacuē nebi, queshun naisa Nuquin Papa yacno puduedtiapimbo icoaic.

18 Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquio iquec. ¿Mitsipaden aid daëdshun tantiacpadomboen mimbi tantieque? Chui. Tiantanu, quequin mimbi chuitsiac.

Adoauqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiemepe? quetsiabi adquid chiec. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusën chiacpadomboen naquin mibi ismemb, caimbi.

19 Nuquin Papa Abentsëcquiobi iquec, quequin mimbi tantiec. Aden tantiaid bëdambo iquec. Adembidi, Nuquin Papa Abentsëcquiobi iquec, quequin mayan icsatedishun tantiaoaic. Aden tantiaquin niacquido yec uëdequec.

20 Icsamboen mimbi tantieque. Tantia. Chuinu. Nuquin Papa Abentsëcquiobi iquec, qeshun Icbon chiacpadomboen naisa yec, Icho tantiaquid nebi, quetiapimbo iquec.

21 Nuquin Papa tantiembi, qeshun ambi chiacpadomboen naquidquio icpampid chuinu. Tantia. ¿Abadauan ëbi tantiaquidquioda neque? Tiantanu, qeshun, Min mado abentsëc mibi cudasaidquio ëbi tantiaquin cuesuneshun tauita, cac Abadauanën Nuquin Papan chiaid niacmane qeshun tauinuequin aton mado abentsëc setsempampic. Chështempi sanandosho isun, Padi. Chën. Ëmbi chiacpaden nanuesho mibi bëdambo iquec, quequin mibi bëdamboen isembi, ¿quequin chienquioda Nuquin Papan icpampic?

22 Abadauan Nuquin Papan chiaid cacuidenquio yec, Con Icho Nuquin Papa nec, quec abu onquiacpaden isempampic.

23 “Mimbi tishmiaidën tishmiaid dadpenquioshë iguendac,” quequin chiondashumbic Nuquin Papan yuecshun adembidi: “Min mado abentsëc cuesuneshun tauita,” quequin chuioaqui, Nuquin Papa abimbo chuiquidquio nec, qeshun ambi chiaid niacchitomane quequin, Abadauanën aton mado abentsëc setsempampic. Adosho isashien Nuquin Papa, “Ëbi tantiaquin naquidquio Abadauan nec. Adquid con matesquio aidi nec. Aden aidi tantiaquin ëmbi yuecquiocshon nanuequin tantiaid Abadauan chiembi,” quepampic Nuquin Papa.

24 Nuquin Papan bacuë nebi, qeshun ambi chiaid naquidquio Nuquin Papa tantiaquidquio nec. Nuquin Papan bacuë nebi, qeshun ambi chiaid naisa niacquid nec.

25 Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuëmëdquid, dada dadpen chudmequid icpampic. Isadaidbon Icho nadatiambocquid nec, qesho tantiashien, Adquid abu nidaidbëdta aidënquiocquid Icbobidi nec, quequin Daban tantiapampic. Aden tantiaquin Daban matses cuesunenuequido isadaidbo abia puduedquin isquid chosho, Nadatiambocquidën matses nec, qeshun abi yacnouidtsëqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbëd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedën chuibocpadquobi Dababëd icquido cuesunianenquio yec isadaidbobëd icquidobimboec isec tabadpampic.

26 Nuquin Papa tantiaquid Daba yanshun bëdamboen nasho isun mënchicaid Nuquin Papan con matses caidbëd tabadpampic. Padnuen, Esus tantiaquid nebi, qeshun Icbon chiacpadomboen naisa cuëshëdacbimboec tabadec.

3

Anan icsamboen chiec onquiaid icsa ėnta quiaid

1 Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac.

2 Chuibanquidtedishun chua-chuatsėquien chuibantsec. Nuquin Papan chiaid cuembo chuibanquid yec icsaisa yanec adquid. Bėdamboec tabadaid uesquin tantiaquin ismequidquio adquid nendac.

3 Cabayo anėshquin dėchėdėdcash uidėn uash tsadquin nidmec. Aden uidėn uaquin bidiacmec.

4 Adembidi uncaten cano dapa tsibidiacoaic. Cunquequidėn comapenen bėcunetiadquiocnobi adembidi icbon nidmec.

5 Cabayo canobidi nua icnuc abi bidiacmete aniactsėc iquec. Adecbidi icbo nua icnuc aton ana aniactsėc iquec. Aniactsėcquidi oncamequin icbon ambi naid dadpen comapenen chuibanec. Adembidi oncamequin onquiaid icsa chuibanec. Nėdėnquiaid dėtsisidash badedquio nidacimboec onquiaid icsa badedquio nidoaic.

6 Ana onquiaid icsa chuibanacpaden nabanec adecbidi icsabudquieic icbo. Adquid mayan icsan yua iquec adequi icsate bunec.

7 Nidaidėn capuquid podochuquidbidi matsesėn yuampicpaden abi yuaid iquec. Yua quenesh cuenquiocquid.

8 Ad yenquio ana iquec. Quenenenquio yec ana onquebudec. Onquiaid icsa adecbidi ėnėdtiapimbo iquec. Ana onquiaid icsa tantianbanec adėcbidi icsabudquieic tabadendac.

9 Nuquin Icho bėdambo iquec, queshumbic ana icbon, Nuquin Icbon uaid matses icsambo iquec, quequin chuibanoaic.

10 Ana shėcuėn utsi bėdamboen chuishumbic utsi icsamboen chuioaic. Aden nuqui chienquio ictiad.

11 ¿Acte batapenquiocquid choaidėnuėsh batambocquidta chopadic? Padenquio.

12 Adecbidi ¿cuėte bacuė batambocquidėn ėshė bėchi chopecta dėyuctic? Padenquio. Adecbidi, ¿Isitodo dataniadaidėn bacuė batambo yecta dėyucpadic? Padenquio. Aidi adesa yacpadquieic Esus tantiaquidėn ana shėcuėn utsi bėdamboen chuishun utsi icsamboen chiesa ictiad.

¿Tsutsi Nuquin Papan chiaid tantianbenquidquio icpec? quiaid

13 ¿Tsutsi Nuquin Papan chiaid tantianbenquidquio icpec? Adquid yec comapenen Esus tantiaquid nebi, quenquiocquimbi bėdamboec tabadquin ismequid utsi-utsien ma icmebampanuna.

14 Utsin tantiamenushe queshun ėmbia chiacpadomboen ma napanu ques a icta. Nuquin Papan chiacpadomboen nabanquin ismequid icta.

15 Adembidi, utsin dėniacnushe queshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec.

16 Aden aidėn icsamboen tantiacpadomboen abėd icquidon adomboembidi tantiec. Aden tantiec, Utsi dėniacnu, quiash utsi-utsiec dėniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquieic. Ad icnuc icsateuidi bunquid yampec.

17 Nuquin Papan tantiacpadomboen pausunaid ad yenquio iquec. Ambi tantiacpadomboen pausunaid yec utsibėd bėdamboec tabadquid iquendac. Adembidi utsi tantiaquin nashunquidquio icoaindac. Adembidi ėbėdtan nabanec cho cac nabanendac. Adembidi, Icsambocquid nec, quenquiocquin

bëdamboen nabanquin ismendac. Adembidi, Esus tantiaquid nebi, abi quiacpadomboen bëdamboen naic. Adecbidi utsibo chiec muaïsa nendac.

¹⁸ Ambia tantiaquid utsibëd bëdamboec tabadquin ismiac adecbidi utsibëd bëdamboec tabadquid dadpen yanendac.

4

Ëbi nua pausun, quequin chiash Nuquin Papan dayunquio tsadta quiaid

¹ ¿Atotsi quiaish Esus tantiaquido cuididianante buncuededpec? Mibi icsate bunacpadequi mibi cuididianante bunec. Aiduidquio tantiabudequi mibi chushcanancuedec.

² Nëid bunebi, queboedëmbi bedtiapimbo yanquin mimbi cuesunec. Adecbidi, Utsi dëniacnu, quiaish chushcananec. Mimbi naiduidi naquin Nuquin Papan tantiacpaden naisa mibi nec.

³ Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuïsho Nuquin Papan mibi menetiapimbo iquec.

⁴ Mimi inaiduidi chudenquio yacpadquiequi Nuquin Icbouidi tantienquio yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshëquid nec.

⁵ Adenquiocquin Esus tantiaho isun aton Mayan Nuquin Papan Esus tantiaquidtedi meniac bëdamboec tabadec. ¿Atotsieshun Esus tantiaquid aidi menepc quepecta mibi ique? Nad iqueque. Tantia. Chuïnu. Con bacuë nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec?

⁶ Aidëmbi abi chieshenquio yacpaden tantiamebanac icsamane quiaish chieshenquio yec bëdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ëmbibi bëdamboen tantiatiapimbo iquebique. Ëbi tantiamé, Papa, qesho Nuquin Papan nua pausunac aton icbo chieshënenquiocquid iquendac adquid.”

⁷ Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiash Nuquin Papan dayunquio tsadacimbocquin ambi chiaid tantiata. Nuquin Papa chieshëquid mayan icsan yuadenda. Adquidën yuatiapimbo iquebique. Nuquin Papan chiaidquio nabanu, qeshun nabanuc mayan icsa cuenendac.

⁸ Aton dayunquio tsadquidbimbocquidbëd tabadquidquio Nuquin Papa nec. Icsash uano tsadquid icboedi bëchishash acten dapanudacimbocquin mimbi tantiaid icsa ënta. Adash, Tantiad bëda pausumenu, quiaish Nuquin Papan dayunquio tsadacimbocquin chieshenquiocquin ambi chiaiduidi tantiaideneta.

⁹ Aden tantiec tsadboedi, Ëmbibi tantiembi, quec Nuquin Papa chieshëquidën dayunquio uano tsadashic, Con Icho tantiec unësquio iquebi, quiaish shubiec mamënenquio yec tsadta. Mibibi uano tsadquid yash unësacimboc icboedi choec isadcuenacimboc Nuquin Papan dayunquio tsadacimboc yec chieshenquio yec bëdamboec tsadoata.

¹⁰ Uano icboedi choash, Ëbibi icsaobi. Nëbi icsate bunenquio iquebi. Mimbi chiacpadiadquio iquebi, Papa, quequin chui. Aden mimbi chuïsho tantiaish, Pudedash nëmbo ëbëd tsadacimboc mibi yanoaic, quependac Nuquin Papa.

¹¹ Utsibo, Esus tantiaquidtedi min utsibimbocquid nec. Mibëd icquid icsamboec chuinanenquio yacpadquiec Esus tantiaquid utsibëd icsamboec

chuiquanenda. Esus tantiaquid icsamboec chuiquanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiacimbocquid nec.

¹² Nuquin Papa Chuiquid Dapa Abentsēcquiobi iquec. Ambi chiacpaden naquidquo nec. Nuquin Papa abitedi Isquidquo Abentsēcquiobi nec. Aden isquin: Nēid icsambocquid nec. Nēidien bēdamocquid nec, quequin Chuiquidquo abentsēcquiobi aidi neoaic. Adquid icquin ambi chiaid nabanquid abēdi tabadmec. Ambi chiaid niacquidien abēdi tabadmenquiocquin uquē nēsecaindac. Nuquin Papan ambi chiacpadomboen naquidbēdtabi ambi chiacpadomboen naisa isquidquo icquin ambi isacpaden cuidendac. ¿Adquidbidida mibi ne? Padenquo. Adquidpenquo icquin ¿atotsieshun, Icsambocquid nec, quequin mimbi chuipe?

Ma badiadshun nanun chiaid tantiesa neyoc, quequin chiaid

¹³ Tantaquidquo nebi, quiash, Piucquid bednuec seta abentsēc matamec chonoadec nidebi, quequid chuinu. Tantia.

¹⁴ Ma adquid badiadshun nanun chiaid tantiesa mibi neyoc. ¿Tedtsi seta matamec mibi tabadpe? Badiadbudnuc cuen-cuempanbo yash badedquo nidacimboc matses nidaidēn tabadash adecbidi mibi nibēdanendac.

¹⁵ Naden nanu quenquiocquin nadembien tantiatid: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcaimbi, quetiad.

¹⁶ Aden chienquiocquimbi mibi utsi dēniaquec onquiaid mimbi chiec. Aden chiec icsaic.

¹⁷ Nuquin Papan chiaid tantiembi, qeshun adomboen natiadquidi naisa iquec icsaic.

5

Na dadpen bedbanquin dayun uaquido chiaid

¹ Nēbi aton na dadpen bedbanquin dayun uaquido chiembique. Tantiata. Mibi unēsun mimbi bedbanquin daēd uaid mimbi tantiaidquo buantiapimbo mibi iquendac. Aden mimbi bedbanquin daēd uaiduidtsēqui icsho isun Nuquin Papan mibi cuidendac. Adquid nebi, quequin tantiash shubita.

² Unēsosh, quequin chiac mimbi dadpen dayun uaid nibēnquin isac ēnden chodquiaic. Adembidi mimbi bēdaidquo dectanaid capishton ēnden piac.

³ Min shocosh piucquid ēnden chiuidac. Adecbidi min piucquid utsi ēnden tiadac. Adenuidi tantiaquin bedbanquid unēsacsho abi yacno yuedquin, Bēdamboen mimbi naoc, quetiapimbo Nuquin Papa iquendac. Tanunēnquo shubu nēdēnquiash nibēdacpadquiec mimbi bedbanaid nibēdquendac. Adenuidi tantiaquin, Esus ēbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc.

⁴ Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquec. Aidi mimbi menenquo yaid Esuquidistu tantiaquido Nuquin Papan tantiaido nec. Adembidi, Con tiedēn caniquidtsen dayun uanu, quequin mimbi bedmiaido uēshquec bunec sidquesho Nuquin Papan, Nadatiambocquid Abentsēcshun tantiec.

⁵ Aido bunec sidquenubi chonoadenquiocquin nua pec mibi tsadec. Adeccsadquin min nami bunaiduidi tantiaquin mimbi bedbanoaic. Nua pec cubudacimboc mibi bunaiduidi bedbanquin dadpen dayun uaquido mibi nec. Aden nabanquin bēdamboec tabadaid ismesa mibi nec. Adecc tabadec unēsash abi yacno mibentsēqui chosho Esuquidistu tantiamibocquid nec,

quequin Nuquin Papan mibi isendac. Aden isquin mimbi chono uaido mimbi cuidacpadomboen aidëmbi mibi cuidendac.

⁶ Mimbi chiaid mimbi chono uaidon niaguenquiocquin nabanacshobi, Icsamboen mimbi naoc, quequin daëdpactsëc mimbi menebampoc. Aden nabanec mimbi cuesuniac bimboec bunquieç chonoadequio unësposh.

Ma Nuquin Icbo chono quiash chieshesa icta quiaid

⁷ Nëbi utsibon chono uaido chuinu. Tantiata. Nuquin Icbo choec quequin tantieç chieshenquio yec tabadta. Nitsinash ma caninu quianec pec nidash cainec icbo tabadec.

⁸ Adembidi, Nuquin Icbo ëbi bednuec choec, quec bëdamboec tabadquin caimbudta.

⁹ Adec tabadquin Esus choate cainec Esuquidistu tantiaquid utsibobëd chieshënanenda. Adec utsibobëd bëdamboec tabadsho isun abitedi tantiaquidëñquio Chuiquid Dapan mibi menequin bëdamboen cuidendac. Adesain menenquiocquin cuidendac. Adembidi, Nëidën bëdamboen naosh. Nëidëmbien icsamboen naosh, quequin ëbi Chuiquidëñquio chiendac, quec chieshenquio yec bëdamboec tabadta.

¹⁰ Utsibo, natiateguid icnuc Nuquin Papan chiaid ambi chuimiaido chieshenquiocpampic. Aidquio chuibanu. Tantiä.

¹¹ Natiäid icnuc chieshenquiocsho isun Nuquin Papan bëdambo icmendac, quequin nuqui tantiondaid nendac. Natiäic cametequid icnuc Nuquin Papa chieshënenquiocquid Obo icpampic. Aton na dadpen icboedi icsateguid utsi-utsiectsëcquieçquidën uesac nibëdquiocsho isash, Con nabëd con nabo nibëdnuc Nuquin Papa bëdambo iquec, quec chieshenquiocpampic Obo. Adquid icsho isun daëd uaquin Nuquin Papan meneoapampic. Matses tantiaquin naquidquio Nuquin Papa nec, quequin

¹² abimbo chuiquidquio icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquio, quiacpaden nabanoata. Mua uanec onquequid Nuquin Papan cuidendac.

Nëidic bëdampec quequin abimbo tantianuc quiaid

¹³ ¿Natiambo icsateguid icnuc dayactiapimbo icquidta icpec? Adquidëñquio Nuquin Papa chuitiä. ¿Bëdambo iquebi, quec tsadquidta icpec? Adquid Nuquin Papan naid chieç cuëdëntiä.

¹⁴⁻¹⁵ ¿Aton dada icsabudquidta icpec? Adquidën ambia Esus tantiaquido chuiquin, Nuquin Papa ëbi chieç cho, catiä. Adsho tantiaash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuëte bacuë ënë chinshun dashunquinqin, Mimbi utsibo bëdamenëdacpadomboen mimbi tantiacpaden nëidtsen bëdame, Icbo, quequin chuita. Aden Nuquin Papa chuinin mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaid chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucapaden ma aton dada bëdamëpanuna.

¹⁶ Abi icsaid uesquin Nuquin Papa chiash bëdamboec tabadendac. Adquidën chiac dada icsambocquid Nuquin Papan bëdamendac.

¹⁷ Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasën tantiapampic. Adquid icquin, Ue secamenda, Papa, cac adëcbidi seta 3ted matamiash seta utsi choabincnuc ue sequenquio icpampic.

¹⁸ Adembidi, aidëmbi yueçshun, Ue secame, Papa, cac ue sequenuc tiedën caniquid canipampic.

¹⁹ Esus tantiaquidën Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabëd yacbimboec icoaindac.

²⁰ Aden mimbi chiac chieshenquo yec tabadsho isun Nuquin Papan uquë nësiatiapimbo adquid iquendac. Adecbidi abi icsaid bëpiscudoaic Nuquin Papa.

Padi. Mibi tantiaquin aiteded dada uaombi.

PETEDON DADA UAID 1

Petedon tauamboen chiaid

¹ Petedo nebi. Abëd icquid icsho Esuquidistun: —Ëbi chuibeneta —caidquio nebi. Esus tantiaquidfedishun mimbi iste dada uanu. Isadaidbo icsho nuquin nidaidënsun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidtedi nidaid yacno tabadquidon iste nëid dada uaic nebi.

² Èndenquio Nuquin Papa: —Ëmbi tantiactedi matses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquio icnuec abided cuidadaid Esus tantiasho Nuquin Papan ëbi bëdamboen isec. Aidën chiacpadomboen natiadquio iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ènenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa —quequin Nuquin Papa mibi chianembi.

Esus tantiaquid Nuquin Papa yacno tabadte chiaid

³ —Nuquin Icho Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquio icquin utsiacbim-boecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unësascho uincuemeshun Nuquin Papan abi yacno nuqui tabadmendac padpidec unëstiapimbo icnuc.

⁴ Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac —quequin nuqui tantiec.

⁵ Aden Esus tantiaquid icsho isash: —Con Mado Esus tantienquio yanushe —quias nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec.

⁶ Ëmbi aden chuisho tantiashe mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. —Nuquin Papabëd tabadec quenenenendabi —quec yuec nuqui shubienquio iquendac.

⁷ Nuqui cudasquid yec çatotsi quiashe Nuquin Papa: —Padi. Chën. Esus tantiaquido natiameda —queboedi adenquio icted-ictedpec? Matsu nacnenguidën: —Ma tsasinu —quequin ambi nacnenaid tauiec. Adembidi Esus tantiaquid chieshtoenquio icquid icmete Nuquin Papa comapenec bunec. Matsu nacnenguidën: —¿Bëdambo icquidida neque? Isnu —quetanquin matsu tauiec. Adembidi: —¿Esus tantiaquidquibida neque? Isnu —quequin: —Natiameda —cainquio iquec Nuquin Papan. Aden natiamiaqui chieshtoenquio icquid icsho Esuquidistun padpidec choshon: —Mibi bëdambo iquec. Èbëdi tabadec cho —quequin utsibo tantiamequin chuishun abi yacno buanendac.

⁸ Aden mimbi isacmaidi Esus mimbi tantiaquiec. —Nëbi isadenquio icquidi Nuquin Papan Madombo Esus ëbi bednuec choendac —quec mibi cuishonquianec.

9 —Abi tantiasho icsano nidmenquo icquin Esusën abi yacno ëbi yuedendac —quec Esus tantiec mibi cuishonquianec.

Esus chote tsusedpabon chiampid

10 Ëndenquimboshë Nuquin Papan tantiamiac isadaidbo tsusedpabon Nuquin Papan chiaid chuiquidon Esusën matses cuidmenquo icte dada uapampic. Esusën nate abitedi tantienquo icquin daëdpactsëc tantiaquin: —¿Mitsipadquid Nuquin Papan chomepeba? —queded-quededquin chuipampic nuquin tsusedpabo isadaidbon.

11 Aidobëd icquin Esuquidistun Mayanën tantiamiac Esus chote abentseabentsen chuipampic. —Matsesën chieshënquin cuesten decnanac matses cuidmenquo icnuec abided cuidadec unësendac. Adec unësascho uincuemiapadpidec abitedishun Icho icoaindac —quequin Esus chote chuipampic. —¿Tsutsi chopec? ¿Tedectsi yash chopec? —quequin abitedi tantiatadquo icquimbi daëdpactsëc isadaidbo tsusedpabon tantiapampic.

12 Naden Nuquin Papan tantiamepampic. —Mibi nibëdanan ëmbi chuiboed ëmbi matsesmiacsho utsibon isendac —quequin tantiamiac Esusën nate chuipampic. Aden chiampicpadomboen Esusën naondash. Nuquin Papan Mayanën tantiacpadomboen aid chuibenquidon aidën naid mibi chiac caondash. Aden Esusën naid Nuquin Papan abi yacnoshon uaido mayan bëdabontsen tantiatadquo icquimbi abitedi tantienquo iquec.

Bëdamboec tabadte tantiamiaid

13 Ëmbi chuiboed Esus tantiaquido icquin paposhquiacbimboen Esusuidi tantianuna. Nuqui icsate bunacpadec icsainquo yec bëdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ënenquo icquin.

14 Ambi: —Con mado nec. Con champi nec —caido icquin Nuquin Papan chiacpadomboen nanuna. Ënden Nuquin Papan chiaid tantiabi mibi bunaid naic mibi icsanëdacpadec icsainda.

15 Mibi Esus tantiamequid icsaisambo Nuquin Papa neque. Ambi chiaid niaquenquo yec bëdamboec tabadnuna.

16 Nuquin Papan ambi chiaid naden dada uamepampic. “‘Nuquin Papa icsaisambo nec,’ quiaish icsaisa ictiadquo yec bëdamboec tabad,” quequin Nuquin Papan ambi chiaid dada uamepampicpadec bëdamboec tabadnuna.

17 Papa quequin nuqui chianeboed Nuquin Papa matsesën naidtedi chuiquid nendac. —Nëid ëbi tantiesa neque. Icsano nidmenu. Nëid ëbi tantiaquid neque. Ëbëdi tabadmenu —quequin matses abitedi chiendac. —Abëdi tabadmenquo icnushe —quiaish Nuquin Papabëd icte bunec bëdamboec tabadnuna.

18 Nuquin tsusedpabon chiaiduidi naquin Nuquin Papa tantienquo nuqui icpondac. Aden Satanasën yuaido icsho Nuquin Papan nuqui bëdamboen istiapimbo icpanëdash. Adshun Satanash nuqui bedshunuen ¿piucquidida Nuquin Papan menepanëdash? Padenquo. Adquid icsabudtequid menenquo icquin

19 aton Mado Esus icsaisambo icsho matsesmepanëdash. Aden matsesmiacsho chieshëmënkuidën cuesten decnanac Esus aton intac chididiqued abided cuidadec unëspandash. Nëbi aton Mado Esus tantiaquido bëdamboen isquin Nuquin Papan Satanash bedshunec. Aden Nuquin Papan bedshunaid yec bëdamboec tabadnuna.

20 Ëndenquimboshë abitedi uabi Nuquin Papa nadpampic. —Ëmbi tantiacpadën yuecash matsesash matses cuidmenquo icnuec mibided cuidadec unësta, Mado —quepampic. Aden ambi chiampicpadomboen badedquo namenquo icboedëmbi nëbi nameshun Esus tantiasho mibi bëdamboen isec.

²¹ Abi tantiasho Esusēmbi Nuquin Papatsen nuqui tantiamec. Adoac nuqui naden tantiec. —Esus unēsacsho uincuemeshun abēdi tabadmequin abite-dishun Icbombo Nuquin Papan icmeoapanēdash. Ambi chiacpadomboen naquidquo Nuquin Papa nec. Ēbi unēsacsho uincuemeshun abi yacno ēbi tabadmendac —quequin Nuquin Papatsen nuqui tantiec.

Esus tantiaquido tantiananquote chiaid

²² Nuquin Papan chiacpadomboen naic bēdambo yanshun mibēdtan Esus tantiaquido utsibo mimbi tantiec. Adecbidi muenquo yec tantianan-quionona.

²³ Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibēdantiapimbo icquid icnuc ambi chiaid bēnudtiapimbo iquec. Aidēn chiaid tantiashun mimbi Esus tantiabempanēdac.

²⁴ Ambi chiaid bēnudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unēsquid matses nec.

Cuēte bacuēec bēdamboshē isadboedi badedquo chodquequid nec. Adecbidi matses: ‘Con nabēdi bēdamboshē iquebi,’ queboedi badedquo unēsquid nec.

²⁵ Nuquin Papain nibēdantiapimbo icquid nec. Adnuc ambi chiaid bēnudtiapimbo iquec,”
quequin abimbo chuiampic. Aidēn chiaidquo mibi chiac caondash.

2

Nuquin Papan chiaid iste bunquionona, quiaid

¹ Aden Nuquin Papan chiaid tantiash chieshēmēnec tabadenda. Utsi muauaında. —Esus tantiaquid nebi —quiashi icsamboec tabadenda. Utsin na isash: —Adquid con na nibēdec —quec chieshēmēnec tabadenda. Utsibo chieshēmēnec icsamboec onquenda.

² Adenquo yec Nuquin Papan chiaid iste bunquionona. Tishac chu-cactsc̄ bacuēmpi shuma chishte bunquiachimboec Nuquin Papan chiaid iste bunquionona. —Bēdiactsc̄c tantiaboedi aid isban-isbanquin Nuquin Papan chiacpadomboen natiadquo yantsiabi —qeshun Nuquin Papan chiaid isbanuna.

³ —Esus tantiec bēdambo iquebi —qeshun Nuquin Papan chiaid isbanuna.

Buintadbimboecquid Esus nec, quiaid

⁴ Nuqui tantiaid nadquo iquec. Shubu uanun buintadquo nacnitsinuen istuidshun: —Nēid bēdambo iqueque. Nēidquo naimbi —quiacbimboen Nuquin Papan: —Ēmbi tantiaidquo yec mibi bēdambo iqueque. Ēmbi chiacpadomboen mibi namenu —capanēdash Esus. Adoaidi matses dadpen-shunquo Esus chieshēnondash. Padnuen nuqui: —Nuquin Papa yacno puduedmianquid bēdambo iquec —quequin nuqui Esus tantiabempondac.

⁵ Aden Esus tantiaquido icsho isun Nuquin Papan aton shubun icquido-bimboecnuc nuqui icmec. Adoac: —Con matsēs Esus tantiame, Papa —quequin Nuquin Papa chianequid nuqui yanec. —Nuquin Papa bēdamboshē iqueque. Ambi chiacpadomboenuidi natiadquo iquebi —quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic.

⁶ Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquio shubu uanun nitsinembi,’
quiabimboen

Edusaden yacno ēbi bēdamboen ismequidquio isadaidbobēd tabadmen-
dambi.

Aid caic: ‘Nēid tantiasho Nuquin Papan abi yacno nuqui tabadmendac,’
quequin abi tantiaquido unēsacsho ēbi yacno tabadmendambi,”

quequin Nuquin Papan ambi chiaid dada uamepampic.

⁷ Aid tantiec: —Bēdamboshē iquec —quependac Esus tantiaquido. Utsi-
bombien Esus chieshēnec. Ēndenquimbo Esus choabi icnuc aidēn nate
chuiquin Nuquin Papan dada uamepampic naden.

“Buintad bēdambo icquid istuidashi: ‘Nēidquio shubu uanun nitsinembi,’
quetiadquidi isuidacimboen Nuquin Papan namiaid chieshēnac.

Aden buintad isuidaaid utsin bedshun shubu uanun nitsinacimboen
Nuquin Papan tantiamiacpadomboen utsibon ambi namiaid tan-
tiosh,”

quequin Nuquin Papan dada uamepampic.

⁸ Adshumbic Esus chieshētetsen dada uamepampic naden chuiquin.

“Nuquin Papan abipadquidquio Edusaden yacno isadaidbobēd tabadmiac-
sho ambocquidon chieshēnendac.

Aid chieshēnquid nadquio iquendac. ‘Cuēte mabud iquec,’ quequin tantien-
quio yec nidec tocoshquetanec uebudacimboec

ēbi bēdamboen ismequid tantienquio yec unēsash icsano nidendac,”

quequin Nuquin Papan ambi chiaid dada uamepampic. Aden Nuquin Papan
chiaid tantiatipimbo icquin Esustsen tantiatipimbo iquec. —Adquid icsano
nidmendambi —quequin Nuquin Papan tantiacpadec Esus tantiesabo
yec unēsash icsano nidendac.

Nuquin Papan matses nuqui nec, quequin chiaid

⁹ Esus tantiesabo dadpen icnubi Nuquin Papan Esus tantiamiaido nuqui
nec. Icsambo iccondaiddi nuqui Esus tantiamepondash paposhquiabim-
boecnuc. Adoac: —Nuquin Papa bēdamboshē iquec. Ambi chiācpadom-
boenuidi natiadquio iquebi —quec bēdamboec tabadquid nuqui yanec.
Adebiddi: —Con matses Esus tantiameta, Papa —quequin Nuquin Papa
chianequid nuqui nendac. Adecbiddi: —Nuquin Papa bēdambo iquec —
quequin utsibo chuibanquid nuqui nendac.

¹⁰ Ēnden abi tantiesabo icsho Nuquin Papan mibi bēdamboen istiapimbo
icquin: —Con matses mibi nec —mibi catiapimbo icpanēdash. Nēbi Esus
tantiasho Nuquin Papan mibi bēdamboen isquin: —Con matses mibi nec —
mibi caindac.

Bēdamboec tabadte chiaid

¹¹ Ēmbi tantiaido mibi neque. Tantia. Mibi chuinu. —Nuquin Papa yacno
tabadendabi —quiash Esus tantiesa icsate bunacpadec icsainda. —Esus
tantienquio yamane —quiash bēdamboec tabadta.

¹² Esus tantiesabobēdi bēdamboec tabadnuna. —Ma aidontsen Esus
tantianu —quiash adnuna. Adec mibi bēdamboec tabadsho isun mibi
chieshēnquin icsamboen chuishumboedombi Esus tantiabenshun Nuquin
Papa naden chiendac. —Mimbi namiaido bēdamboec tabadsho isun Esus
tantiabonombi. Mibi bēdambo iquec, Papa —quendac.

¹³ Bēdamboec tabadnuna. —Con Icho Esus matsesēn chieshēnushe —
queshun matses chuiquid dapatedishun chiācpadomboen nanuna. Nuquin
nidaidēn tabadquido abitedi chuiquid dapa pedesidente caidēn chiāc-
padomboen nanuna.

14 Aidën: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidën chiacpadomboen nanuna.

15 Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquo icquin icsamboen chuiboedombi ambi ic-samboen chiaid ēntsiash.

16 Satanasën yuaido icsho Esusën bedshunaid yec nēbi icsambo icquidēn yuapenquo yec bēdamboec tabadnuna. Icsanuec: —Utsin yuapenquo yec ēbi bunaiduidi naimbi —quenda. Nuquin Papan yuambo yec bēdamboec tabadnuna.

17 Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidën chiacpadomboen nabanuna.

Yuabo chiaid

18 Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquo icnubi adembiti nata.

19 Adec Nuquin Papa tantiaquid yec bēdambo icsho cuesaqui chieshēmēnenquo icsho: —Aid yua bēdambo iquec —quequin Nuquin Papan mibi bēdamboen istsiash. Min icbon chiacpadomboen nata.

20 ¿Icsamboec tabadquid cuesac chieshēmēnenquo icquidta Nuquin Papan: —Aid yua bēdambo iquec —capatsiash? Padenquo. Nuquin Papan chiacpadquiec bēdamboec tabadquidi cuesaqui chieshtoenquo icsho: —Aid yua bēdambo iquec —Nuquin Papan catsiash. Bēdambo icta.

Chieshtoenquo yec Esus unēsaid

21 —Chieshēnaqui chieshtotiadquo iquebi —¿quec ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquo icnu —qeshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquo icnuec abided cuidadec mēyadec unēspondash.

22 Nuquin Papan dada uamepampicpadquo “muesambo yec icsaisambo icpondash.”

23 Adquid icsho abi chieshēnquidon mamēnshunaqui Esusën chushcainquo icpondash. Aidon matonbudnetanquin buanshun cuesten dectanac: —Mibitsen cuidendambi —cainquo icpondash. Adenquo yec nadpondash. —Nuquin Papan matsesën naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquo icpondash.

24 Adash: —Ēbi tantiaquid ma icsaid ucudacbimboec bēdamboec tabadnu —quiash nuqui icsaid bedshunec abided cuidadec unēspondash. Adec aton Madoded cuidadec unēsacsho isash nēish bēdamsun Nuquin Papan aton Mado tantiaquido bēdamboen isec.

25 Yuan icbo cuenēnacimboen Nuquin Icho nuqui tantienquo icpondac. Adoboedi nēbi: —Con Icbon ēbi bēdamboen dayun uaquin ēbi bēdamboen namendac —qeshun nuqui Esus tantieque. Bēdamboen nanuna.

3

Bēnēbēda chido chiaid

1-2 Tantia, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantiec ēbi bēdamboec

tabadsho isun Nuquin Papan chiaid tantienquo icboedëmbi con bënën Esus tantiabentsiash. “Mimbítsen Esus tantiabenta,” quequin ëmbi chiambobi Esus tantiabentsiash —qeshun min bënën chiacpadomboen nata.

³ Bëdamboec tabadquid ictiadquo icquin casëdu payuteuidi tantienda. Adembiti dashcute bëdambo icquid dasiuidteuidi tantienda. —“Bëdambo isadec. Mibi bëdambo iquec,” mabi canu —quiash nacnemëdteuidi tantienda.

⁴ —Bëdambo mibi iquec —camenuc bëdamboec tabadta. Nëishëmënenquo icquin bëdamboen nabanta. Chieshenquo icquin min bënën chiacpadomboen naquid icta. Mibi adquo icsho isash: —Mibi bëdambo iquec —quendac Nuquin Papa.

⁵ Èndenquimbo isadaidbo tsusedpan chido Nuquin Papa tantiaquid yec adquo icpampic. Aton bënën chiacpadomboen naic bëdambo icpampic.

⁶ —Con bënë con icbobimboec iquec —quequin aton bënë Abadauan caidën chiacpadomboen Sada caidën napampic. Esus tantiaquid icsho mamënsunaqui min bënë dacuëdënenquo icquin aidën chiacpadomboen naic bëdamboec tabadec Sadapadquo mibi ictsiac. Adquid bëdambo iquec.

⁷ Tantia. Bënëtsen chuinu. Abia uimabudquid icsho min chido bëdamboen ista. Mibëdtan Esus tantiaquid yec Nuquin Papa yacno mibëdi tabadtequid neque. Min chido bëdamboen ista. —Èbi bëdamboen ista, Papa —quequin mimbi chiaid Nuquin Papan tantienquo icnushe. Min chido bëdamboen ista.

Bëdamboec tabad, quequin chiaid

⁸ Nëbi Esus tantiaquido abitedi chuinu. Tantia. —Nuquin Papan chiacpadomboen nanuna —quiash bëdamboec isnanuna. Cuishonquequidbëd cuishonquec shubiquidbëd shubinuna. Adec tantiananquionona. —Èmbi naiduidi naimbi —quenquo icquin utsibon chiaidtsen nanuna.

⁹ Mibi chieshënaqui cuidnanenda. Mibi chieshënquin icsamboen chuishunaqui cuidnanec icsamboec chuishunanenda. Adenquo icquin Nuquin Papa chianeta. —Èbi chieshënquin bëdamboen isquin bëdamboen tabadme, Papa —quequin Nuquin Papa chianeta. —Èmbi bëdamboen isaidon ma aton matses utsibo bëdamboen isnu —qeshun Nuquin Papan nuqui Esus tantiaquido icmiaye. Bëdamboec tabadnuna.

¹⁰ Adec bëdamboec tabadte chuiquin Nuquin Papan dada uamepampic naden.

“Bëdamboec tabadte bunquidën nadoendac. Adonante bunenquo icquidëmbi utsibo muauainquo iquendac. Chieshënquin utsibo icsamboen chienquo iquendac.

¹¹ Icsamboec tabadboedi bëdamboec tabadendac. Utsibo chieshënansho isash: ‘Padi. Chieshënanenda,’ quendac.

¹² Adec bëdamboec tabadsho Nuquin Papan bëdamboen isendac.

Aden bëdamboen isaidon: ‘Èmbi chuisho tantia. Èbi bëdamboen ista, Papa,’ quequin abi chuisho Nuquin Papan tantiendac.

Icsamboec tabadshoen bëdamboen istiapimbo iquendac,” quequin Nuquin Papan dada uamepampic.

Cuesaqi dacuëdenda, quequin chiaid

¹³ ¿Bëdamboec tabadshoda bëdambo icquidën badedquo mibi cuespatsiash? Padenquo ictsiash.

¹⁴ Bëdamboec tabadsho isun icsambo icquidën cuesacsho mibi Nuquin Papan bëdamboen istsiash. Mibi chieshënquido dacuëdënenenda.

¹⁵ Dacuëdënenquo icquin: —Con Icho Esuquidistu nec —quequin ambi chiacpadomboen nanuna. Aden mimbi Esus tantianuc utsibo: —¿Atotsieshun

Esus tantie? —qesho: —“Abided ciudadec unēsaid Esus tantiasho Nuquin Papan ēbi bēdamboen isquin unēsacsho abi yacno ēbi tabadmendac,” qeshun Esus tantiambi —quequin Esus tantiesabo chuibanuna.

¹⁶ Aden nēshēmēnenuo icquin Esusēn naid chuibanuna. Aden bēdamboen chuinuec Esus tantiaquiec bēdamboec tabadnuna. —Ēbi bēdamboec tabadsho isash ēbi chieshēnquin muauaquid: “Bēdambo icquidi muauachitombi. Icsachitobi,” ma quenu —quiash bēdamboec tabadnuna.

¹⁷ —Ēbi tantiaquid utsibon chieshēnendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshēnendac. Bēdamboec tabadquid icsho utsibon chieshēnaqui nuqui chieshtoenuo icsho isash: —Mibi bēdambo iquec —quetsiash Nuquin Papa nuqui caic. Icsambo icsho quēnēn nauedaidi nēshenuo icsho: —Mibi bēdambo iquec —cainquio ictsiash Nuquin Papan.

Esus unēsaid tantia, quiaid

¹⁸ Chieshēnaqui Esusbimboec chieshtoenuo yec bēdamboec tabadnuna. Aid icsaisambo yequi nuqui icsaid bedshunec abided ciudadec unēspondash. Aden Nuquin Papa abi tantiaquido bēdamboen ismenuec abentsecquiobi unēspondash padpidec unēsenquio icnuec. Aton dada unēsambi aton tantiate unēsabi icpanēdash.

¹⁹ Adec aton dada unēsambi aton tantiate icnuc ēndenquimboshē Noe caidēn matses abi tantiesabo icsho Nuquin Papan cuidquin unēs uampido uidēn uashun quēnēn sauedampicno Esus nidpanēdash. Ambo nidshun Nuquin Papan cuidpampido Esusēn ambi naboed chuibampanēdash.

²⁰ Naden Nuquin Papan aido cuidquin unēs uapampic. Ēndenquimboshē aton matsesbēd tabadec Noe bēdambo icnubi aton matses icsamboshē icpampic. Adnubien Nuquin Papan: —Matses icsaquido abitedi uesquin unēs uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chuipampic. Adoac badedquio cano dapa nacnemēdenquio yacpadembi Nuquin Papan badedi cuidenquio icpampic: —Ma abi icsaid ēnshun ēbi tantianu —qeshun. Adnubien cano dapa nacentanec Noe chedo Stedpactsēc cano dapa antabēdtopampic. Adnubien aido antabēdtoaid cano dapa acten bedtoac nuadtopampic. Utsiboen acte mabudadmiaidēn mentoadbudnepampic. Noe abi tantiaquidquio icsho Nuquin Papan cuidenquio icpampic.

²¹ Adembidi Esus tantiasho nuqui cuidenquio iquec. —“Esus tantiaquid nebi,” quequin utsibo ismequin acten mentomembi —qeshun nuqui acten mentomec. ¿Bēchish ucquinda nuqui adodi? Padenquio. Nuquin Papa naden chuiquin: —Esus tantiaquin icsaid ucacimboben mimbi chiacpadomboen natiadquio iquebi, Papa —quequin nuqui adoec. Aden abi tantiasho Nuquin Papan uincuemēdaidēn Esuquidistun nuqui cuidmenquio iquec.

²² Aidi uincuenash Nuquin Papa yacno nidash aibdēdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bēdabo bēdamboen namequimbic Satan as aton yuabo mayan icsabobēda Esusēn cuidendac.

4

Bēdamboec tabadnuna, quiaid

¹ Nuquin Papan tantiacpadomboen nasho utsibon chieshēnquin mēyanaqui Esus chieshtoenuo icpondash. Adembidi chieshēmēnquidēn chieshēnaqui adechidi chieshtoenda. Abided ciudadec unēsaid Esus tantiaquin nuqui icsaid nuqui ēnendac.

² Aden nuqui tantiacpadomboen nainquio icquin Nuquin Papan chiacpadomboen natiadquio nuqui iquendac.

³ Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bënë chudmequinc tantiadenuen acte paëmbo icquid acquinc: —Nëid papa canu —quequin matsesbimboecnuc nacnenquinc mimbi capondac. Adec icsateuidi bunec mëmuntiapimbo mibi icpondac. Adquid iccondaidi nëbi bëdamboec tabadta.

⁴ Adec bëdamboec tabadsho isun mibëd icsaondaidën: —¿Atotsieshun nuqui naondacpadomboen nainquio ique? Mimbi Nuquin Papa caid nibëdec —quequin mibi icsamboen chuiquin mibi mamëshunendac.

⁵ Aden mibi mamëshunquid Nuquin Papan cuidendac. Cuidnumbi matsesën naidtedi tantiaquid icquin Nuquin Papan: —¿Mitsipaden nao? ¿Ada bëdamboec tabado? —cac ënden unësaidobëdtan unësabi icquidotedishun ambi naidtedi uesquin chiendac.

⁶ Aden abëdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unësquid icmiacpadec unësquid yec unësashic Nuquin Papabëd tabadendac padpidec unësenquio yec.

Utsibo nashununa, quiaid

⁷ Tantia. Mibitedi chuinu. Nuquin Papan cuidte nëbi iqueque. Esus tantiec nuqui icsate bunaid ënash mëmunec bëdamboec tabadnuna. —Ma ëmbi abi chiänesho Nuquin Papan bëdamboen tantianu —quiash adta.

⁸ —Tantiananquido chieshënanec cuidnante bunenquio iquec —quiash ënëdenquio yec tantiananquionona.

⁹ Nuquibëdtan Esus tantiaquido isedec chosho bëdamboen isnuna. Shubu utsinquido ënapenuësh chosho ademibidi chieshënenquio icquin min shubun yued.

¹⁰ Nuquin Papan tantiamiacpadomboen nuquibëdtan Esus tantiaquido nashuntiad. Esus tantiaquidquio icmenuen chieshenquio icquin nanuna.

¹¹ ¿Ada Nuquin Papan Esusën naid chuibanquid mibi icmiac? Adquid icquin Nuquin Papan chiaidquio chuibanquiota. ¿Ada Nuquin Papan mibëdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ëbi nashunquid bëdamboen namequid Nuquin Papa bëdamboshë iquec,” ma ëmbi nashunaido quenu —queshun utsibo nashununa. —Abitedishun icbombo yec Nuquin Papa bëdamboshë iquec —canuna ënenquio icquin.

Chieshënaqui chieshtoenquio icte chiaid

¹² Ëmbi tantiaido mibi neque. Tantia. —¿Atotsieshun matsesën ëbi chieshëmpeba? —¿quecta ique? ¿Mibentsëquida chieshëndic? Ma Esus tantiaquido dadpenquio chieshëmpayoc.

¹³ —Chieshënquin Esuquidistu comapenen mëyanacbimboen Esus tantiesabon ëbitsen mëyanosh. Esus tantiaquid icshoeni adochitosh —quiash Esus tantiec bëdambo icnuna. —Utsibon chieshënaidi abi tantiaquid ambi namiacno buanuec Nuquin Icho Esus choec —quiash abi chote ushën cuihonquenush adnuna.

¹⁴ —Abuquidistu tantiaquid nec —queshun chieshëmënenquidon natiamiaid mibi bëdambo iquendac. Nuquin Papan Mayan mibëd tabadquin Nuquin Papa yacno tabadte mibi tantiaquid mibi bëdambo icmendac.

¹⁵ Utsibo icsasho abi chuiquidën natiamequin cuidquid. Cuesunianquid yec ampequid yec chieshëmënquin icsamboen chuishunquid yec quec icsasho chuiquidën cuidsho isun: —Bëdambo iquec —catsiambi. Adec icsainda.

¹⁶ Esus tantiaquid icsho utsibon chieshënac dacuëndenda. Adec dacuëndenuio icquin: —Nuquin Papa bëdamboshë iquec. Aton Mado Esus tantiaquid icmiac bëdambo iquebi —quequin ënenquio icquin Esus tantianuna.

¹⁷ —Nuquin Papan cuidte ushë nëbi icnuc ambi con matses caido Esus tantiaquido chieshëmënquidon natiamendac —quiapaden nëbi tauaquin mibi natiamec. Adsho isun: —Chieshëmënquidën chieshënac ëmbi tantiacpadomboen abi icsaid ëntsiash —qeshun Nuquin Papan: —Natiamenda —cainquio iquec. Aden abi tantiaquido icsaid ëmete bunquin nashun ¿bëdiactsëcta abi tantiesabo cuidpec?

¹⁸ Naden chuiquin Nuquin Papan dada uamepampic. “Aden chieshëndeniac natiambo yan-yanequi unësash Nuquin Papabëd abi tantiaquido tabadendac. Nuqui adnuc ¿bëdiactsëcta ambi chiaid niacniacquido Nuquin Papan cuidpec? Padenquio. Comapenen cuidendac,” quequin dada uamepampic.

¹⁹ Nuquin Papan tantiacpadec mëyadec Esus tantiaquid ma nadpanuna. —Ëbi uaquidën Nuquin Papan ambi chiacpadomboen ëbi bëdamboen namec. Aid tantiec bëdambo iquebi —quiash ma bëdamboec tabadpanuna.

5

Esus tantiaquido chuibanquid Petedon chiaid

¹ Tanta. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paëmboshë icmequin Esuquidistu unës uasho isondambi. Aidën padpidec nidaidën choshon abi yacno buanuen nuqui beduaneque. Tanta.

² Icho yua cudasacimboec mibëd icquido Esus tantiaquido cudasta. —Esus tantienquio yanushe —qeshun: —Nuquin Papan chiaid niaquenquio yec bëdamboec tabad —quequin chuibanta. —Esus tantiaquido chuibanquid icta —cac: —“Padi,” queñiadquio icquimbi naimbi —quenquio icquin: —Aden Esus tantiaquido nashumbantsiambi —quec Esus tantiaquido chuibanquidquio icta. —Piucquid dadpen bednun nanu —quenquio icquin Nuquin Papan chiacpadomboen natiadquio yec Esus tantiaquido chuibanquid icta.

³ —Nëidtedi Esus tantiaquido bëdamboen name —caidtedi bëdamboen isequi chushcanenda. Adenquio yec: —Ëbi yacpadec ma tabadnu —quec bëdamboec tabad.

⁴ Aden Esus tantiaquido chuibanquidën bëdamboen namesho isun Nuquin Icbon nidaidën padpidec choshon utsibo ismequin: —Nëid bëdambo icquid nec —qeshun chuibanquid ambi namiaidobëdta abi yacno buanendac.

Esus tantiaquidon nate utsi chiaid

⁵ Tanta, caniabo. Mibitsen chuinu. Mibi chuiquid dapabon chiaid niaquenquio icquin aidën chiacpadomboen nata. Aidedtsëqui caniabo chuishumbic mibi yacnocquidotedi chuinu. —Ëbiuidtsëqui bëdambo iquebi. Ëmbimo naiduidi naimbi —quenquio icquin utsin nacpadomboents nata. Aden chuiquin Nuquin Papan ambi chiaid naden dada uamepampic.

“Nuquin Papa tantienquio icquin aton matses utsibo tantienquio icquin ambi naiduidtsëqui nasho: ‘Adquid icsambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bëdamboen isquin bëdambo icmec,”

quequin Nuquin Papan ambi chiaid dada uamepampic.

⁶ Aden Nuquin Papan chiacpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshēnaqui chieshtoenuo icnuna. Adec chieshtoenuo icsho ambi tantiacpadēn utsibo ismequin: —Ēbi tantiaquidquo mibi neque. Ēbēdi tabadec cho —nuqui caindac Nuquin Papan.

⁷ Aidēn nuqui tantieque. —¿Atotsimbi pepeba? ¿Ēbida cuespeba? ¿Con matsesta unēspeba? —quequin nuqui dacuēdaidtedi Nuquin Papa chuinuna.

⁸ Nuqui icsate bunacpadec icsainquo icquin Esusuidi tantianuna. Esus tantiaquido icsho Satanasēn nuqui chieshēnquiec. Esus bedshunuen nuqui icsametiadquo icquin bēdin nēish nibēnacimboen ambi icsametequid Satanasēn ēnenquo icquin nibēbeneque.

⁹ Ista. Icsamenda. Chieshtomenda. —Satanasēn icsamechitoshē —qeshun Nuquin Papan chiaid niac-niaquenuo icquin Esus tantiaquionona. —Ēbi chieshēnacpadomboen Esus tantiaquid utsibo nidaid utsi-utsiec yacno tabadquido utsibon chieshēnac caosh —qeshun chieshtoenuo icquin Esus tantianuna.

¹⁰ Aden utsibon chieshēnaido yec yuec-yuecpectsēc nuqui tabadec. Adshobien abi yacno buanquin nuqui bēdambo icmequidēn Nuquin Papan Satanas nuqui icsa uamenquo iquendac. Adembidī Nuquin Papan nuqui bēdamboen isquid icquin dayacquo yacimbocnuc chieshtoenuo icquid nuqui icmendac.

¹¹ Ēmbi aden chuisho tantiahsun: —Mibi bēdamboshē iquec, Papa. Mimbi tantiacpadomboen abitedi mimbi namendac. Abitedishun Icbombo mibi nec, Papa —Nuquin Papa canuna ēnenquo icquin.

Petedon ēnquimbi chiaid.

¹² Esus tantiaquidquo Sidas caid nēidtedtsēqui Ēmbi dada uaboed mibi yacno buamembi. —Esusquo isondambi. Aid tantiahsu Nuquin Papan matses bēdamboen isbenendac —quequin abimbo mibi chiombique. Chieshtoenuo icquin Esus tantianuna.

¹³ Nuquin Papan tantiamiac nuquibēdtan Esus tantiaquido Ēmbi Babidonia caid yacnocquidon: —Aido unēsquo iquec —mibi caosh. Babidonia caidbidi Doma caic. Con madobimboecquid Madcosēn —Aido unēsquo iquec —mibi caosh.

¹⁴ —Ēbēdtan Esus tantiaquido nec —quiash: —Mibi unēsquo iquec —cananuna. —Ma Nuquin Papan mibi Esus tantiaquidotedi bēdambo icmepanu —quequin Nuquin Papa chianembi. Padi. Aidtedi chuiquin dada uaombi.

PETEDON DADA UAID 2

Tauamboen chiaid

¹ Petedo Simon caid nebi. Abëd icquid yec aton yuambo icsho Esuquidistun: —Ëmbi naid chuibeneta —caidquio nebi. Ëbëdtan Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bëdamboen isaïdo nuqui nec.

² Ëbëdtan Esus tantiaquido icsho mibi tantiaquin Nuquin Papa chianembi naden. —Aïdon Esus tantiatsëcsho mibëdta Esus tantiamequin bëdambo icme, Papa. Aïdo bëdamboen isquïota, Papa —quequin Nuquin Papa chianembi.

Nuquin Papan bëdambo icmete chiaid

³ Comapenen tantiaquid icquin Nuquin Papan namiac aidën chiaid niacniacte bunenquio yec Esus tantiaquido bëdamboec tabadec unësash Nuquin Papa yacno tabadendac. Abipadquid utsi nibëdnuc bëdamboshë icquid icquin Nuquin Papan Esus tantiamiaïdo nuqui nec.

⁴ Abipadquidquio Esusën chiondacpadomboen abi tantiaquidobëdta Nuquin Papan aton Mayan tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

⁵ Aden Nuquin Papan Esus tantiamiaïdo yec dayacquio yacimboc ecnëdenquio yec bëdamboec tabadnuna. Adechidi Nuquin Papan chiaidquio tantiec tabadnuna.

⁶ Aden Nuquin Papan chiaidquio tantiec nuqui icsate bunacpadec ic-sainquio icquin mëmununa. Aden mëmunquid yec nuqui chieshëncquidbëdi chieshënanenquio yec chieshtoenuio icquin Esus tantianuna. Nuquin Papan-atsen tantiec bëdamboec tabadnuna.

⁷ Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna.

⁸ Ëmbi chuiboedtedi nabanquin chieshtoenuio icquin adenuidi nanuna. Aden naquin Esus bëdiactëc tantiatsëcboedëmbi chieshtoenuio icquin nuqui Esus tantiaquotsiac.

⁹ Ëmbi chuibocpadomboen naisa pamumëdacimboc iquec. Adquidon: —Aton Mado Esus tantiasho icsaïd ucuacimbocnuc Nuquin Papan nuqui bëdamboen isec —queboedombi bëpiscudquin tantienquio yanec.

¹⁰ Ëbëdtan Esus tantiaquido mibi neque. Tanta. Mibitedi chuïnu. Ëmbi aden chuïsho tantiash chieshtoenuio icquin Esus tantiec bëdamboec tabadnuna. Adec tabadquin naden nuqui tantiendac. —Ëndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan nëbi tantiamiac Esus tantiabenombi —quequin nuqui tantien-dac. Aden tantiec Esus tantienquio icquid nuqui yanenquio ictsiac.

¹¹ Adec bëdamboec tabadash unësacsho: —Ëbi tantiaquid mibi neque. Ëbëdi tabadec cho —queshun ambi namiacno abëdi tabadmequin Nuquin Icho Esuquidistun nuqui bëdambo icmendac padpidec unësenquio icnuc.

¹² Ëmbi aden chuiboedtedi mimbi tantiondac. Aden tantiabosh Esus tantiec mibi bëdamboec tabadcuenondac. Aden mimbi tantiondaïdi mibi chuided-chuidendambi.

¹³ —Nëbi unësendabi —queboedi ëbi unësabi yacpadembi mibi chuided-chuidendambi.

14 —Adënquoio mibi unësendac —quequin Nuquin Icho Esuquidistun chiacpadën nëbi unësebi.

15 —Ëbi unësan ëmbi chiondaid ma bëpiscudenquoio icnu —queshun mibi chuiquin dada uanu.

Nuquin Papan Esus chiaid

16 ¿Muaquindambi mibi Esus chuidionda? Padenquoio. —Nadatiambo icquin nabanquin Esusën ismedenepondash. Adquid yec abuc nidnush: “Padpidec nidaidën choaindabi,” quepondash Esus —¿quectabi muadionda? Padenquoio. Ëmbimbo isondaidquoio mambi mibi chiondac. —Nëid con Madombo nec —quequin Nuquin Papan ismiac Esus isondambi.

17-18 Nadquoio iccondash. Macuësh dapan dectatoash Esus bëchamauanquiecciccondash. Adnubien Nuquin Papan: —Con Madombo nec. Ëmbi tanti-aidquoio yec bëdamboishë iquec. Nëid isec bëdambo iquebi —quequin abucshun dacuëdampamboecnuc chuipondash.

19 ¿Ëmbentsëquidambi Esus chuibanquin nape? Padenquoio. Ëndenquimboshë Esus chote tantiamequin Nuquin Papan isadaidbo tsusedpabo dada uamepampic. Pacuënëdabimboen utsibon tantienquoio icnubi paposhquiacbimboecnuc Esus chote tantiamenuen dada uamepampic. Aden Nuquin Papan chiaid isec onquequin bëdamboen tantianuna: —Muaquidon chuisho tantiamane —queshun. —Abitedishun Icbombo nebi —quequin ismenuec padpidec Esus choabi yacpadembi Nuquin Papan chiaid bëdamboen tantianuna.

20 —Nuquin Papan nadoendac —quequin ¿ambembi chiaidta nuquin tsusedpabon dada uapampic? Padenquoio.

21 Ambembi chiaid dada uainquoio icquin Nuquin Papan chiaidquoio dada uapampic. Nuquin Papan Mayanën tantiamiac abimbo chuipampic.

2

Muaquido iquendac, quequin chiaid

1 Nuquin Papan chiaidquoio isadaidbo tsusedpabon chuinubien utsibo: —Nuquin Papan nadoendac —quec muapampic. Nëbi adquidbidi iquendac. Mibi yacno puduedash ambembi chiaid chiec muasho tantiahsun: —Mibi muequi nec —badedquoio cainquoio mimbi iquendac. —Abided cuidadec unësaid Esus tantiaquid nebi —queboedi: —Esusën chiacpadomboen natipimbo iquebi. Adshobi Nuquin Papan ëbi cuidenquoio ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac.

2 Aden muaquidën chuisho tantiahsun Esus tantiauidtsëcboedombi dadpeshun aidën chiaid tantiendac. Adashic Nuquin Papan chiaid niacniaquec muaquido tabadacbimboec padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon.

3 Muaquido tantienda. Aidon piucquid comapenec bunquin ambembi chiaidquoio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiahsun aido cuidendac. —Adquid icsano nidmequin cuidendambi —quequin ambi ëndenquimboshë tantiapampicpadomboen comapenen Nuquin Papan cuidendac.

4 Ambi chiaid niac-niacsho icsano nidmequin cuidquid Nuquin Papa nendac. Ëndenquimboshë nidaid uabi icnuc ambi abi yacnoshon uaido mayan

utsin-utsinquien: —Ëmbiquen abitedi namenu —quequin ambi chiaid niac-niacsho isun Nuquin Papan icsamboshë yacno nidmequin cuidpampic. —Chian anëdënquiacno nësecanumbi nabono —qeshun aden tauamboen Satanas chedo cuidpampic.

5 Adshumbic yuecquio ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unës uapampic. Noeuidtsëqui padambo icpampic. —Bëdamboec tabadnuna —quequin Nuquin Papan chiaid chuibanquid icsho Noe chedo 8tedpactsëc Nuquin Papan cuidenquio icpampic.

6 Adshumbic yuecquio ictanquin matses utsibon Nuquin Papan chiaid niac-niacsho cuidquin nëdëncapampic. Shubu dadpen icquid nëid daëd icpampic. Nëidic Sodoma caid. Nëidic Comoda caid. Ambo tabadquido aton shububëdi abucuësh taboadampamboec paëdquidën pichiquepampic matses nibëdquio yec. —Aden icsambo icquido cuidquid nebi —quequin Nuquin Papan adopampic.

7-8 Sodoma caid yacnocquid abentsëqui Dod caid pichiquenquio icnuc Nuquin Papan cuemepampic. Bëdambo icquid yec: —Nuquin Papan chiaid niac-niaquec nëmbo icquido icsamboecuidi tabadec —quec shubiec tsadsho cuemetsaidi pichiquiambo ictsampic.

9 Aden abi tantiaquido daëd Noebëdta Dod Nuquin Papan cuidambo icpampic. Adembidi nëbi abi tantiaquido cuidenquio icquid Nuquin Papa nendac. Utsibon chieshënaidi abi tantiaquido bëdambo icmequid nendac. Icsambo icquido cuidquid icquimbi matses cuidte ushë choabi icnuc nëbi tauaquin icsambo icquido Nuquin Papan cuidendac.

10 Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shëcuë nibëdacbimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsëqui bunebi —qeshun ambi naiduidtsëqui naic. Dacuëdtiadquidi dacuëdenquio icquin Esus tantiaquido chuiquid dapa caic: —¿Bëdamboen namequidta nedic? —quequin icsamboen chuishunec.

11 Padnuen Nuquin Papan abi yacnoshon uaido mayan bëdabon adec muaquido chuishuntiapimbo iquec. Muaquido bëdiactsëc tantiaquido icnubi comapenen tantiaquido icquin mayan bëdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsëqui tantiaquid Nuquin Papa nec —qeshun adoenuio iquec.

12 Padnuen ëmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bëdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

13 Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquieç inçhëshën icsash badi-adëntsen icsaic: —Bëdambo iquebi —quec adquido cuishonquec. Esus tantiaquid penuec mibi cho-choacno mibëd tabadec muaquidotsen chopac caosh. —Esus tantiaquidbidi nebi —quiash mibëd tabadec aid icsasho isash: —Esus tantiaquid abitedi icsaic —quependac utsibo.

14 Muaquido utsin chido mëismec tabadec. Nuquin Papan chiaid niac-niaquec icsaic ënëdenquio iquec. Adquid icquin Esus tantiatsëcquido ic-samec. Utsin chido chudquinc muaquin piucquid dadpen bedquinc caic abi bunaidquio naic icsaic.

15 Nuquin Papan chiaid niac-niaquec icsateuidi bunquieç. Ëndenquimboshë matses utsi Beyod caidën mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic.

16 Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquiu muaquido iquec. Piucquid comapenec bunec Nuquin Papan chiaid niactiadquio iquec.

17 —Mibi bēdambo icmete chuinu —quequin muaquidon chuisho tantiash: —Ai, mimbī chiapadte bunebi —queuidtsiash matses. Uispa dadpen icboedi badiadnuc abu chēshēn bētīnacsho isash: —Tanunquien badiadec —queuidacimboec: —Ambi chiapadquio bēdambo icnu —queuidtsiash matses. Adec muasho tantiash: —Adquid chian anēdēnquiacno nēsecaindami —quendac Nuquin Papa.

18 Adec muaquido abembi onqueuidequi onquec. Utsin chiaid tantienquio icquin ambi tantiaiduidi chiec naden. —Mibi bunacpaderc mibitsen icsata —cac Esus tantiatsēcquin Nuquin Papan chiaid nauidsēcquimbi abi icsaid ēnuidboedi padpidemboec icsaquiec.

19 Muaquidon: —Nuqui bunaiduidi nanuna. Adec nuqui bēdambo ictsiac —quequin chuibanec. Adboedi abi icsaid ambembi ēntiapimbo yec icsamboshē iquec. Adec icsamianquidēn chiapadomboen naic matses icsaquid nendac. Adecbidi ambi naiduidi naic icsaquid matses nendac.

20 Nuqui cuidmenquio icquid Esuquidistu tantiatsēcquin abi icsaid ēnuidboedi padpiden Nuquin Papan chiaid niac-niaquec icsamboshē muaquido yanec.

21 Ēnden Esus chiondac: —Ai, aid tantiembi —quetsēcondaidi aden Esus tantienquio yanec icsamboshē yansho isun: —“Esus tantiembi,” quenquio icpatecnēdan —caimbi.

22 Adquid chuipanēdash naden. —Ambi ucubaid opan chequid. Opa nesmiaqui nidaidēn nocoshquec padpidec bēchishoaquid —quepanēdash. Adecbidi Esus tantiauidtsēcquido icsaid ēnuidboedi muaquid padpidemboec icsadenechtequien iquec.

3

—Esus chote chiaid

1 Tantia. Ēmbi tantiaido mibi neque. —Pabiate cuembo icquin Nuquin Papan chiaid tantiaquiec bēdamboec tabad —quequin mibi chuiquin dada uaondambi. Adomboembidi mibi chuiquin nēid dada uanu.

2 Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquio icquidēn Nuquin Icho Esusēn chuibanondash. Aidēn chiondaid abēd ictened utsin mibi chuinēdash. Aden chiaid tantiata. Aidbidi chuinu.

3 Esus nidaidēn padpidec choabi icnuc Esus tantiesabon abi icsate bunaiduidi naquin Esus mamēnshunendac.

4 —“Utsi uanuec padpidec nidaidēn choaindabi,” ¿quenēdaidta chopec? Ma choenquio icpayoc. “Nēbi Esus choec,” quedenedi con mēdimbo abitedi unēsbudniac. Esus choambobi —quependac Esus tantiesabo. Nadembidi chiondac. —Taēc nidaid yanubi matses nidaidēn tabadpampic. Adecbidi aton tsyuecquido tabadpampic. Nēbi adecbidi matses nidaidēn tabadec. Ēbi nibēdnuc adiquendac. Utsi uanuec Esus choenquio iquec —quependac Esus tantiesabo.

5 ¿Abimboda capec? Aden chuiquin Nuquin Papan chiaid tantienquio iquec. Ēndenquimboshē ambi uaidtedi nibēdnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid nēnantan yampampic. Aden Nuquin Papan abitedi uapampic.

⁶ Aden abitedi uambic yuecquo ictaniash matses icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unēs uapampic.

⁷ Aden ambi chiacpadomboen Nuquin Papan naindac. Ambi icsambo icquido cuidte ushēn abu nidaidbēda nēdēncaindac. Adembididi matses Esus tantiesabo cuidendac.

⁸ Ĕmbi aden chiac: —¿Tedectsiash Esus chopeba? —¿quecta ique? Tantia. Mibi chuinu. Ambi tantiacpadēmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsēcimbocquid nec. Adecbididi seta abentsēqui icquidquo iquequi dadpen seta icquidbimbocquid nec —quequin Nuquin Papan tantiec.

⁹ —Ĕndenquo: “Padpidec choendabi,” quenēdaidi Nuquin Icho Esus choenquien icchitec —quenubien Nuquin Papan: —Chiata. Cuidte bunenquo iquebieque. Utsibontsen Esus tantiashun Ĕmbi chiaid niac-niacboedi ēnushe. Isbono. Ĕnacsho icsamboshē yacno nidmenquo ictsiambi —qeshun Nuquin Papan Esus chomiabi iquec.

¹⁰ Adnubien matses: —Nēbi choec —quenquo icnuc Esus badedquo choendac. —¿Nēid ushēmbi ampequidēn con na ampec —quequina tantiapec? Padenquo. Adembididi: —Nēbi choec —quequin tantienquo icnubi Esus choendac. Choshon acquimboen toncac abitedi nibēdanendac. Uispa yec inchēshēn ushē yec badiadēn ushē yec queboedi nibēdquiecnuc nēdēncaindac. Nidaid abichobimbo nēdēnquenc aidēn icquidtedi nēdēnquendac nibēdquo yec.

¹¹ —Nuquin Icbon nac adquidtedi nēdēnquendac —quiash Esus tantiec bēdamboequien tabadtiad.

¹²⁻¹³ Esus chobon Nuquin Papan cuidquin ambi uaidtedi nēdēncaindac. Abu yec uispa yec inchēshēn ushē yec badiadēn ushē yec queboedi nēdēncaindac nibēdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidēn bēdambo icquidoidquido nuqui tabadmendac. Ĕmbi aden chuisho tantiash: —Ma Nuquin Papan Esus chomenu —quequin utsibo tantiamequin Esusēn naid chuibanec bēdamboec tabadnuna.

¹⁴ Ĕmbi tantiaido mibi neque. Tantia. —Choshon abi yacno Esusēn nuqui tabadmendac —quec chieshtoenquo yec bēdamboec tabadnuna. Choshon Esusēn: —Mibi icsambo iquec —cainquo icnuc Nuquin Papan chiaid niaquequo yec bēdamboec tabadnuna.

¹⁵ Adec tabadquimbi Ĕmbi chuiboed tantiashun naden tantia. —“Utsitsen ma Esus tantiaquid yanu. Aden Esus tantiasho aid cuidenquo ictsiambi,” qeshun Nuquin Papan Nuquin Icho chomiabi iquec —quequin tantiec tabadta. Adembididi mibi chulquin nuquin buchibimbocquidēn Pabodon dada uapaccondash. Nuquin Papan tantiamiac bēdamboen chiacondash.

¹⁶ Ĕmbi chuiboedbidi chuiquin dada uadenepaccondash. —Pabodon dada uaid abentse-abentsec badedquo tantiadenquo iquec —qeshun utsibon aidēn chiacpadomboen chienquien icchitosh. Nuquin Papan chiaid niac-niaciadquo icquidon Pabodon chiaidquo tantienquo icquin icsamboen chiosh cashnad-cashnadacbitsēcquiecnuc. Nuquin Papan chiaidquo nuquin tsusedpabon dada uapampidtsen isbanshun adembididi tantienquo icquin icsamboen chiec. Adquido Nuquin Papan cuidendac.

¹⁷ Ĕmbi tantiaido mibi neque. Tantia. Chuinu. —Abimbo tantienquo icquin Nuquin Papan chiaid niac-niacquidon muauaic —ēbi qesho tantiashun: —Esus tantienquo yamane. Muasho tantiatiapimbo iquebi —quequin ēnenquo icquin Esus tantianuna.

18 —Abi tantiaquid cuidmenquio icnuec abided cuidadec Esus unēspondash. Aid tantiasho Nuquin Papan nuqui bēdamboen isec —quequin Esus bēdiactsēc tantiatsēcshun comapenen Esus tantiaquionona. Adshumbic: —Nuquin Icbo Esuquidistu bēdamboshē iquec —canuna ēnenquio icquin. Padi. Aidedi chuiquin dada uaombi.

UANËN DADA UAIÐËMPI 1

Nuquin Papabëd ënëdenquoio yec tabadte chianiaidquoio

¹ Abia Yampidënenquoio matsesun Esuquidistun chuibancho ëbëd icquidobëdtan tantiapadenembi. Aidi ëbëd icquidobëdtan ispadenembi. Aidi ëbëd icquidobëdtan mishpadenembi. Aidi Nuquin Papabëd ënëdenquoio yec tabadte chianiaidquoio nec. Aidquoio chuiquin dada uaid nëid nendac. Aidquoio tantiaquido icquin bëdamboen ista.

² Aid, abuc Nuquin Papabëd ënëdenquoio yec tabadboedi nidaidënuësh matses icnuec chopanëdash. Choshon abipadquoio yec Nuquin Papabëd ënëdenquoio yec tabadte ismequin chianiaidquoio ëbëd icquidobëdtan isteshun chuibanec nebi.

³ Aidi ëbëd icquidobëdtan ispadened adembidi ëbëd icquidobëdtan tantiapadened chuibanec nebi ma mibitedishun tantiash shubu abentsëquën tabadacimboec ma tabadpanu qeshun. Nuquin Papa tantiaquid icquin aton Madombo Esuquidistu tantiec Nuquin Icbobëd shubu abentsëquën tabadacpadec nuqui bëdamboec tabadendac.

⁴ Esuquidistu tantiaquidtedi shubu abentsëquën tabadacimboecquido nec, quequin chuiquin dada uaimbi ma aid tantiash, Cuishon. Bëdambo iquebi, quiacpadec ma mibitedi tabadpanueshun.

Nuquin Papa Bëdambocquid Abentsëcquiobi nec quiaid

⁵ Esuquidistun Nuquin Papa chuibancho nuqui tantiondacadomboen chuoaimbique. Tantiata. Nuquin Papa Bëdambocquid Abentsëcquiobi nec. Icsapenquiocquid aidi nec.

⁶ Adquid icnuc, Nuquin Papan shubun icquid nebi, queboedi ambi chiaid niaquin abipenquoio chuiquid nuqui nendac.

⁷ Nuquin Papan chiacpadomboen nabanquidquoio iquec abi tantiaquid utsibobëd shubu abentsëquën tabadacimboecquid nuqui nendac. Adquid nuqui icmenuec nuqui icsaid bedshunash abided cuidadec Nuquin Papan Mado Esuquidistu unëspondash. Aid unësnëdaidënenquoio nuqui icsaidtedi paubantequid nendac.

⁸ Icsaisa nebi, quequi mua uadquin abipenquoio chuiquid nendac.

⁹ Icsaobique. Èbi pauc, Papa, qesho tantiashun, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac.

¹⁰ “Matses icsaisa nibëdquiec”, quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiacimboec adquid onquepec. Aden chuiquid Nuquin Papan pausuntemaid nendac. Adquid Esuquidistu tantiesha nec.

2

¹ Ma icsainquoio icnu qeshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Èbi tantiaquid paucoata, quequin Nuquin Papan chiaid niaquesha icquin aton Madonquoio Esuquidistun nuqui icsasho aden chiendac.

² Aidi matsestedi icsaid bedshunash abided cuidadec unëspondash.

³ Ambi chiacpadomboen nabanquin Esuquidistu tantiaquid nebi, queshun nuqui tantiendac.

⁴ Esuquidistu tantiaquid nebi, queshun Icbon chiacpadomboen nainquiocquin abipenquo chiendac adquidën.

⁵ Ambi chiacpadomboen nabansho isun abi tantiamantequid Nuquin Papan nua pausunendac. Aden pausunaidën, Aidbëd icquid nebi, quequin nuqui tantiendac.

⁶ Aden pausunac Nuquin Papan Madonquo bëdamboec tabadquin nabanacpadomboen naimbi, quec nidaidën bëdamboec tabad.

⁷ Naden nata, quequin chiaid chuc chienquiocquin mimbi tauamboen tantiondaid mibi chuiquin dada uaimbi.

⁸ Mimbi tauamboen tantiondaid Esuquidistun, Naden nata, quequin chiaid chuc nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbisen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmënuquid icboedi aidën pausunac tantianquidquio yanec.

⁹ Esuquidistu tantiaquid nebi, queshun abi tantiaquid utsi chieshënec Nuquin Papan tantiacpadomboen pausunacmaid adquid nec.

¹⁰ Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquo yec bëdamboec tabadquin ismequid nendac.

¹¹ Esuquidistu tantiaquid utsi chieshënquid Nuquin Icbon pausunacmaid nec. Inchëshquio icnuc capuacimboecquid adquid nec. Mayan icsan yua icquin ambi natiadquio yaid tantiesa nec.

¹²⁻¹⁴ Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac canibobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

Icsate bunesa icta, quequin chiaid

¹⁵ Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec.

¹⁶ Abia Yampidquio Nuquin Papa nec. Adquidpenquo mayan icsa nec. Aid Nuquin Papa chieshënquid nec. Adquid icquin Nuquin Papan chiaid mua uaqin chuiquin chuc uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbisen nanu quequin adoata. Dadpen bednu quequin utsi dëniacneshun adota. Adec icsamane quenquiocnóc mayan icsan Nuquin Papan chiaid matses chieshëmec.

¹⁷ Mayan icsan tantiaid ënëdendac. Aidën tantiacpadomboen tantiaquid icbobëd Nuquin Papa yacno tabadiapimbo iquec. Nuquin Papan chiacpadomboen naquidien ënëdenquio yec Icbobëd tabadendac.

Esuquidistu chieshènquid dadpen choendac, quequin chiaid

¹⁸ Adembi chiembique. Èmbi con nabo caidon tantiata. Nèbi nèid nidaid naimbudec. Adecbidi Esuquidistu chieshènquid dadpen choendac, quequin chiondacadquieq ènden cho-choac. Dadpen cho-choacsho isun, Nèbi nèid nidaid naimbudendac, quequin nuqui tantiendac.

¹⁹ Esuquidistu chieshènquid nuquibèd iccuededboedi ènden nidanepac. Nuquin Papan shubu abentsèquèn tabadacpadpenquiocquid Esuquidistu chieshènquid iquec nidaniac. Nidaniacsho isun, Esuquidistu tantiesà iquec nuquibèd shubu abentsèquèn tabadacpadpenquio icquido niosh, quequin nuqui tantiendac.

²⁰ Esuquidistu chieshènesa mibi nendac. Nuquin Papan aton Mayan meniac abimbo chiaid tantiaquid mibi nendac.

²¹ Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesà mibi icsho chuiquin dada uainquio ictsiambi. Abimbo chuiquid muatiapimbocquid nec, quequin mimbi tantiendac.

²² ¿Tsutsi muaquid nepec? ¿quepecta mibi ique? Nuquin Papan Madombo nidaidènsun chidon tishac matsesash aton Papan chuimiaidquio nec, quesa muaquid nendac. Adquid Esuquidistu chieshènquid nendac. Abentsècquidquiobi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic.

²³ Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chieq Nuquin Papan tantiaid papuduedaid Nuquin Papa tantiaquid nendac.

²⁴ Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquio yec Nuquin Papan Mado Esuquidistubèd shubu abentsèquèn tabadacbimboecquido mibi iquendac.

²⁵ Èbèd shubu abentsèquèn nidaidèn tabadacbimboecquido èbèd abuc ènèdenquio yec tabadte iquendac, quequin Esuquidistun chiaid nendac.

²⁶ Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata.

²⁷ Nuquin Icho Esuquidistun tantiamiaid icquin utsi uain chuisho tantiesà icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio nebi. Esuquidistun abimbo chiaid tantiasash bèdambo iquebi, mibi quendac. Aden Esuquidistun tantiamiaidquio yec abèd cuèshèdesa icnuec adequid tabadta.

Nuquin Papan chiaid tantiaquid ambi bacuè icmiaid

²⁸ Adembi di con nabo quequin mibi chuioaimbique. Adembi tantia. Esuquidistun chiaid tantiadonequieq tabadteneta. Adeq tabadquin Esuquidistu choasho isash cuenenquio yec, Èbi, ambi paucaid, bednuec choec, quependac mibi. Abèdi nidebi, quequin caindonec tabadta.

²⁹ Nuquin Papa bèdambocquid nec, quequin tantiaquin nuqui Nuquin Papan chiacpadamboen naquin, Ambi con bacuè caidquio nebi, quequin nuqui tantiendac.

3

¹ Matses tantiaquin naquidquio Nuquin Papa nec. Ma èmbi unèsquiocquin comapenen tantiaido èbèdi tabadpanuèshun con bacuèbo caimbi, quequin Nuquin Papan icsaisanquio tantiapampic. Aden chiampid abimbo iquec. Ambi con bacuè caido nuqui nec. Ambi con bacuè caidpenquio Nuquin Papa

tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido.

² Nuquin Papan comapenen tantiaido mibi nec. Adquid icsho adembi mibi chinu. Tantiata. Nĕbi Nuquin Papan con bacuĕ caido nuqi nec. Aden ambi con bacuĕ caid icsho, Nadquidquo mibi icmendambi, ĵada Nuquin Papa capec? Padenquo. Esuquidistupadquiocquin nabanquid Nuquin Papan nuqi icmec, quequin nuqi tantiadonetequidquo nendac. Esuquidistu nuqi bedec chosho isash, Nĕbi aidpadquidquo Nuquin Papan nuqi icmendac, quequin tantiambi, nuqi quendac.

³ Aid choabicnuc, Abipadquid iquendabi, quequin caindonequido nĕbi Esuquidistu icsainquo yec tabadacpadquiec tabadte bunquid nuqi nendac.

⁴ Nuquin Papan naded bĕdamboec tabadta, quequin chiaid niacquid abibi icsaquid nendac.

⁵ Adnubien, Esuquidistu abuc tabadboedi nidaidĕnshun chidon tishac matsesun nuqi icsaid bedshunash abided cuidadec unĕspanĕdash, quequin nuqi tantiendac. Icsapenquiocquid Esuquidistu nec.

⁶ Icbopadquidquo icnu quiash Esuquidistubĕd tabadacimbocquid icsadenesa nec. Icsadenequid, Nuquin Papan Esuquidistu tantiamioshi, quetiapimbo iquiec. Esuquidistu tantiesa adquo iquĕc.

⁷ Con nabo, tantesa uamane queshun muaquin chuibanaid tantiesa icta. Esuquidistu bĕdamboec tabadacpadquiec tabadquid icsaisa nec.

⁸ Abia icsadenequid mayan icsa nec. Aidĕn yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquo iquĕc Esuquidistu nidaidĕn choash matses icsaid bedshunash abided cuidadec unĕspanĕdash ma abi tantiaquid yec mayan icsan yua icboedi aidĕn yuadtiapimbo yampanuna.

⁹ Nuquin Papan con bacuĕ caido icsadenesa nec. Ambi con bacuĕ caido Nuquin Papapadquidquo yec icsadenetiapimbocquid nendac.

¹⁰ Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuĕ nec. Icbon bacuĕ yec utsi tantiaquidquo nendac.

Esuquidistu tantiaquido tantiananaid

¹¹ Esuquidistu tantiaquid utsibo tantiaquiota, quequin chiaid nuqi abia tantiondaid nendac.

¹² Aton utsimbo chieshĕnquid Cain icpampidpadquid iquenda. Mayan icsan yua icquin aton utsi cuesunepampic. Aden cuesuniidĕn aton utsi Abedĕn abi tantiaquin nadenesho Nuquin Papan aid bĕdamboen isnubi Cainĕn ambibi tantiacpaden nadenesho Nuquin Papan bĕdamboen isti-apimbo icpampic. Aden isac Cainĕn aton utsimbo Abed chieshĕnquin cuesunepampic.

¹³ Cainĕn aton utsimbo chieshĕnacpadomboen Nuquin Papa tantiesan Nuquin Papan con bacuĕ caidtedi chieshĕnoaic. Nuquin Papa tantiesan mibi chieshĕnsho isash, ĵAdquidshenda mibi nepec? quenda. Nuquin Papan chiaid tantiesabimboc adenda.

¹⁴ Esuquidistu tantiaquid tantienquiocboedi Esuquidistu tantiaquid yanash abi tantiaquid utsibo tantiaquidquo nuqi nendac. Aden abi tantiaquid utsibo tantiaquid icquin, Nuquin Papabĕd tabadquidbimbocquid nebi, quequin nuqi tantiendac. Aton utsibo tantiesa cuĕshĕdadbimbocquid nec.

¹⁵ Aton utsibo chieshĕnquid, Con utsi cuesunenu, quiacimbocquid nec. Adquid Nuquin Papabĕd tabadtemaid nendac, quequin nuqi tantiendac.

16 Matses tantiaquin nashunquidquo Esuquidistu icpondash. Nuqui tantiec, ma ëbëd ënëdenquo yec tabadpanu quiash unësmane, quenquo yec nuqui icsaquido icsho cuidnushe quiash abided cuidadec unëspndash. Abi tantiaquid icquin abi tantiaquid utsibo tantiaquin nashunec unësmane quenquo yec nuqui tabadendac.

17 ¿Aton nachoquid icnuc Esuquidistu tantiaquid utsin na nibëdquiosho isec, Con utsi menenquo iquemi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec.

18 Ëmbi con nabo caid, Utsi tantiec bëdamboec tabadquidquo nebi, quec onquequinuidi tantiec tabadenda. Utsi tantiemi, quequin mimbi chiacpadomboen nabanquin ismeta.

19 Aden mimbi chiacpadomboen nabansho isun Nuquin Papan tantiamiac dacuëdenquo yec Nuquin Papa chuinu quiash abi yacno puduedquidbimboecquin nuqui chuided-chuidedec.

20 Utsien Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nëbique. Dacuëdenquiocquin ëbi chuita, quependac Nuquin Papa adquid caic.

21 Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënuquo Nuquin Papa bëisquidëmbimboen, Ëbi menepec, quequin dacuëdenquiocquin chianendac.

22 Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bëdamboen isquin menendac.

23 Naden tantiata, quequin Nuquin Papan chiaid nad iquec: Abëd Abia Yampidquo, Esuquidistu, nidaidëshun chidon tishac matsesaid Nuquin Papan chomiaid aton Madombo nec quequin nuqui tantiaidquo nendac. Adembidi Esuquidistun chiacpadec abi tantiaquid utsibobëd tantianendac.

24 Aden ambi chiacpadomboen naquidbëd Nuquin Papa iquec. Adquiduidquo Nuquin Papabëd ictequid nec. Abibimboecquid Nuquin Papan aton Mayan meniac ëbëd tabadquin tantiamiac, Nuquin Papabëd icquid nebi, quequin nuqui tantiendac.

4

¿Nuquin Papan chiaidquibida chuibanoshe? Isnu, qeshun Nuquin Papan chiaidquo isteneta quiaid

1 Utsibo, Nuquin Papa chieshënuquidën chuimiaindo dadpen iqueque. Aidën chuimiaindën chuisho tantiashun, ¿Nuquin Papan chiaidquibida chuibanoshe? Isnu qeshun Nuquin Papan chuiquin dada uamiaindquo isteneta. ¿Adquibida iqueque? Isnu, qeshun isteneta.

2 Nuquin Papan pausunaidën naden chiendac: Nidaidëshun chidon tishac matsesaid Nuquin Papan chomiaid aton Madombo nec, quequin chuibanendac.

3 Nuquin Papa chieshënuquidën chuimiaindën naden chiendac: Nuquin Papan chomiaicmaid Esus niøndash. Aid aton madopenquo nec, quequin chiendac. Aden chuiquid Esuquidistu chieshënuquid nec. “Ëmbi chomiaid chieshënuquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

⁴ Con nabo quequin Nuquin Papan aton Mayan meniac aidënquio tantiamiac Esuquidistu chieshënquidon chuisho, Tiantianu, quesa mibi nendac. Nuquin Papan meniaidën tantiamiac Nuquin Papan chiaid chiac dëniacpadquieq mibi chieshënquid cuenendac.

⁵ Esuquidistu chieshënquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec.

⁶ Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibansho Nuquin Papa tantiabənquid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibansho, Tiantianu, quesa iquendac. Adsho isun, Abipenquio chuiquidën yua nec, quequin nuqui tantiendac.

Nuquin Papan ismiac adecbidi tantiananquidquio ma nuquitedi icoapanuna quiaid

⁷ Utsibo, Nuquin Papa tantiaquido adembi mibi chiembique. Adembi tantiaata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquio Nuquin Papan bacuë nendac. Adquid Nuquin Papa tantiaquidquio nec.

⁸ Utsi tantiaquidquio Nuquin Papa nec. Adquid icnuc utsi tantiesa yec, Nuquin Papa tantiembi, quetiapimbo iquec.

⁹ Matses tantiaquin Nuquin Papan aton Mado Abentsëcquiobi Esuquidistu matsesmiac matses icsaid bedshunash abided cuidadec unëspondash. Adoac abi tantiaquido abëdi ënëdenquio yec tabadendac.

¹⁰ Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquid aton Mado Abentsëcquiobi nidaidën chomiac nuqui icsaquido icsho cuidmenquiocnoec abided cuidadec unëspondash.

¹¹ Nuquin Papa comapenen tantiaquidquio icquin Nuquin Icbopadquiocquin Esuquidistu tantiaquid utsi tantiaquiotiad.

¹² Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquiendac.

¹³ Aton Mayan meniac ambi tantiamiaidquio yec Nuquin Papa ëbëd iquec, nuqui quendac.

¹⁴ Nuquin Papan Madomboen nuqui isaidquio icpadenec. Aden isboshon uquë nësiatiadquido nuqui icsho mënchicquid Nuquin Papan chomiaid chosh, quequin nuqui chian-chianec.

¹⁵ Esuquidistu Nuquin Papan Madombo nec, quequin tantiaquidquio Nuquin Papan pausunquin aton Mayan meniaid nec.

¹⁶ Aden aid meniaid icquin, Ambi tantiaid nebi, quequin nuqui chuidonec. Nuquin Papan matses tantiacpadomboen utsi tantiaquid Icbobëd icquidquio nendac. Adecbidi Icho abëd icquidquio nendac.

¹⁷ Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquio yec Nuquin Papa tantiaquid aton Madopadquiocquid Nuquin Papa yacno puduedendac.

¹⁸ Nuquin Papan tantiaid dacuëdenquio iquendac. Ambi tantiamiaid dacuëdesa nec. Abi tantiesa, Ëbi icsaquid icsho cuidtsiash, quec dacuëdenquio. Aidi utsi tantiesa yec dacuëdec.

¹⁹ Nuquin Papa Ambia Tantaquid icquin ismiac tantiananquidombo nuqui nendac.

²⁰ Ĕmbi isacmaidquio Nuquin Papa icsho, Aid tantiaquid nebi, quequin Esuquidistu tantiaquid utsi ambi isteniaid chieshënquid iquec muaquid nendac. Ambi isteniaid chieshënquid iquec ambi isacmaidquio Nuquin Papa chieshënquid nendac.

²¹ Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

5

Nuquin Papan Madombo abimbo tantiaquid

¹ Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënquio Nuquin Papa tantiendac. Adembidi Nuquin Papan con bacuë caid utsibo nuqui tantiendac.

² Ambi con bacuë caidën Nuquin Papa tantiaquin ambi chiacpadomboen naquidquo icquin ambi con bacuë caido nuqui tantiendac.

³ Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamiantemaid nec.

⁴ Aden Nuquin Papan con bacuë caid icquin ambi chiacpadomboen nabanec tabadquin dëniacacimboen icsamenuequid nuqui cuemendac. Adembidi Abia Yampid nidaidënshun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuequid cuenendac.

⁵ Esuquidistu Nuquin Papan Madombo Yampid nec, quequin tanti-aquidënquio ismiac icsamenuequid cuenendac. Ai, icsamenuequidën yuadesa Esuquidistu tantiaquidquio nendac.

⁶ Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidënshun chidon tishac matsesash capusho acten mentoacsho: “Ĕmbi bëdamboen tanti-aidquo mibi nec. Mibi isash bëdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten decatanac diadec unësec aton Papa chiec: “Ĕbi yuedta, Papa,” quiaish Esuquidistu unësaçsho nacsac aton intac chididiquepondash. Adashic, Nuquin Papa abimbo chuiquidpadquidquio icquin aton Mayanën tantiamiac, Esuquidistu Nuquin Papan Madombo nec, quequin tantiaquin chiendac nuqui.

⁷ Nuquin Papa yec aton Mado yec aton Mayan yec quequin abucshun aitedishun abentsëc yacimboecquin Esuquidistu Nuquin Papan nidmiac chosho nidaidënshun tishac matsesaid nec, quequin chuided-chuidedec.

⁸ Adecbidi nidaidënuësh Esuquidistu matsesacsho isun, Nuquin Papan Madombo nec, quequin ismenuec aton Mayan abucësh budash aibëd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuiopondash. Adembidi yuecshun ambi chiacpadec unëso isun, Con madombo nec, quequin inchëshacimboecnuc icmequin Nuquin Papan nadatiambocquin ismebampondash.

⁹ Aden ismiac isondaidën naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unëso isombi, quequin isondaidën chiec. Aden chuinubi Nuquin Papanquio, Con madombo nec, quequin ambia Esuquidistu chuiquidquio icsho tantiadonetequidquio nuqui nendac.

¹⁰ Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuiopaec nuqui.

Esuquidistu Nuquin Papan madopenquoio nec, quequid, Nuquin Papa muaquid nec, quiacimboen chuiquid nendac.

¹¹ Con Madombo, Esuquidistu nec, quequin Nuquin Papan chiaid tantiacquidquoio abi yacno nidash abëdi ënëdenquoio yec tabadendac. Matses icsaid bédshunash abided cuidadec aton Mado unëspanëdash, quequin tantiaquid Nuquin Papa yacno tabadtequid nuqui nendac.

¹² Esuquidistu tantiaquid ënëdenquoio yec Nuquin Papa yacno tabadendac. Aid tantiesä aïdbëd tabadtiapimbo iquendac.

Ma tantiaquidquoio mibi icpanuequin chiaid

¹³ Nuquin Papan Madombo Esuquidistu nec, quequin tantiaquid, Icbobëd ënëdenquoio yec tabadtequid nendac, quequin ma tantiaquidquoio mibi icpanuequin mibi chuiquin dada uaimbi.

¹⁴ Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac.

¹⁵ Abitedi tantiaquidquoio icquin ambi tantiacpadomboen tantiamiac nuqui chuisho Nuquin Papan menendac.

¹⁶ Esuquidistu tantiaquid nebi, queboedi icsasho isun, Cuëshëdnushe queshun aid bëdamboen tabadme, Papa, quequin chiacpaden Nuquin Papan näindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuëshëdnushe queshun aid bëdamboen tabadme, Papa, cainda. Nuquin Papan chiaid tantiate bunesa aid nec.

¹⁷ Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoindac. Aid cuëshëdenquoio yec Nuquin Papabëd tabadendac.

¹⁸ Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiash icsaté bunesa nebi, quiacpaden nanuesho tantiamequin pausunendac. Adoac Nuquin Papa chieshënnquidën adquido yuadtiapimbo iquendac.

¹⁹ Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënnquidën yua nec, quequin nuqui tantiec.

²⁰ Nuquin Papan Madombo abuc abëd icboedëmbi nidaidënsnun Nuquin Papa chuibanquin tantiamiac. Aidën aton Mayan abi tantiaquid meniäc, Nuquin Papa Abentsëcquiobi iquec, quequin nuqui tantiendac. Aïdbëdquiocquid nuqui nendac. Aton Madombo aton Papabimboecquid nec. Aid tantiec aïdbëd ënëdenquoio yec nuqui tabadendac, quequin nuqui tantiendac.

²¹ Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacenaid ismequin, Nuquin Papa neque. Nëid tantiäquiota, cac tantienda. Esuquidistu nebi, quesho adembidi tantienda.

Nëbi padi. Aïdted chiombi.

UANËN DADA UAIÐËMPI 2

Nuquin Papan chiaid abimbo iquec, quequid tantiaid

¹ Ëmbia Esuquidistu tantiondaidquio Uan nebi. Nëid chido Esuquidistu tantiaquid nendac, quequin Nuquin Papan tantiacpadquieic icquin mibëd Nuquin Papan chiaid tantiec iccuededquidobëdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantiasash mibitedi tantiec tsadebi. ¿Ëbentsëquidabi mibitedi tantiec tsadpe? Padenquio. Aden chuisho tantiasash utsibotsen adechbidi mibi tantiec tabadoaic.

² Nuquin Papan chiaid abimbo iquec, quequin ënenquiocquin nuqui tantierendac.

³ Uquë nësiatiadquido nuqui icsho isash abëdi ënëdenquio yec nuqui tabadmenuec nuqui icsaid bedshunash abided cuidadec Esuquidistu unëspendash. Adembidi ambi chiaid tantiaquido utsibobëdta bëdamboen tabadmiaido nuqui nendac. Nuquin Papabëdta aton Mado Esuquidistun adquid icmiac, Ambi chiaid abimbo iquec, quequin tantiec utsibobëd tantiananquidquio nuqui nendac.

⁴ Mimbi chiac utsi-utsiec Nuquin Papan chiacpadomboen nabanec tabadsho isash bëdambo iquebi.

⁵ Naden nata, quequin chiaid utsipenquio nëid dada uaid nendac. Esuquidistu tantiaquidtedi nuquibi tantiananuna.

⁶ Esuquidistu tantiaquid utsibëd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquieic ma tabadpanuna.

Muaquin chuiquid

⁷ Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chiendac. Adquid muaquin chuibanec Esuquidistu chieshënquid nec.

⁸ Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bëdembi, qeshun Ichon chiacpadomboen nadeneta.

⁹ Esuquidistu Nuquin Papan Madombo nec, quequin tantiembi, queboëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papabëd tabadachimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobëd tabadachimboec tabadendac.

¹⁰ Esuquidistu Nuquin Papan Madombo nec, quequin chiesha chosho isun yuedenda. Adembidi, Bëdambo icta, quequin adquid chienda.

¹¹ Adquid yuedquid ambi yuedaidbëdta muaquin chuiquin ismequid nendac.

Ënquin chiaid

¹² Dadpen dada uatiadquio icquimbi mibi yacno nidtiadquio icquin daëdpactsëc dada uaombi. Mibi yacno nidash mibëdi onquebi.

¹³ Mibitedi tantiec tsadebi, quequin chuita quiosh ëbëd Nuquin Papan chiaid tantiec iccuededquido. Adembidi dada uaimbi.

Padi. Aidtedi dada uaombi.

UANËN DADA UAIÐËMPI 3

Cayon naid chuiquin utsibon chiaid

¹ Ëmbia Esuquidistu tantiondaidquio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

² Mimbi Nuquin Papan chiaid tantiacpadquiec min nami bëdambo icpashun. Adembidi Nuquin Papan chiacpadec tabadquin ismiac ma utsibobëd bëdamboec tabadpanuna.

³ Mibëd icquidon nëmbo choshon naden chioshi. Esuquidistun chiacpadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi.

⁴ Mimbi chuibanac Esuquidistu tantiaquin muainquiocquin utsibon chuiuoic, quequin chuisho tantiaquid bëdambo iquebi, quec tsadebi. Ëmbi con mado caidën bëdamboen naid chuisho tantiaquid bëdambo iquebi.

⁵ Mimbi yuedaidon naden chioshi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioshi.

⁶ Mimbi yuedshun nashunaid utsi-utsiec nëmbo choshon mimbi abi tantiaquin nashunaid nëmboquido Esuquidistu tantiec iccuededquidobëdta chuibanoshi. Bëdamboen mimbi naic. Adembidi nabanquin adquid mibëdi tabadash, Nidnu, qesho meneta ma buanueshun. Aido Nuquin Papan con bacuë caido ambi chuimiaidquio nec.

⁷ Aido isadaidpembo chuïnuec nidshun adquid yacno choshon Esuquidistu tantiesä nec quec ëbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quiash mibi yacno puduedendac.

⁸ Esuquidistun chiaid tantiaquid icquin Esuquidistu tantiaquid ambi chuimiaido yuedtiad. Adoquin aidobëdtambi Esuquidistun nacpadomboen ismendac.

Diotedepesën icsamboen naid

⁹ Mibëd iccuededquido aden chuiquin dada uaondambi. Aden ëmbi dada uaid bedash: “Ëmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec.

¹⁰ Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiaquid: “Padi. Yuedënda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

Demetedio caid bëdamboquid nec, quequin chiaid

¹¹ Aidën nacpadec icsainda, caimbi mibi. Nuquin Papan Icsaisanquio chiacpadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquio yec tabadquid nendac.

¹² Utsien Demetedio caid bëdamboquid nec, quequin utsibon chiec. Abimbo chiec. Aidi Nuquin Papan chiacpadomboen nabanec tabadquidquio nec, quequin ëbëd icquidobëdta chuiuoaimbi. Uanën chiaid abimbo iquec, quequin mibitedishun tantientdac.

Ënquin chiaid

¹³ Dadpen dada uatiadquiocquimbi daëdpactsëc dada uaombi.

¹⁴ Daëdec ushtanquin mimbi ispashuni. Mibi yacno nidash mibëdi onquendabi.

¹⁵ Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuibanoata.

Padi. Aideded dada uaombi.

UDASËN DADA UAID

Tauamboen chiaid

¹ Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Ëbi tantienquo yanushe —quiash Esus mibi cudasec.

² —Aido bëdamboen isquin bëdambo icme, Papa —quequin Nuquin Papa chianembi mibi tantiaquin.

Muaquido iquendac, quequin chiaid

³ Ëmbi tantiaido mibi neque. Tantia. Nuqui cuidmenquo icnuec Esus abided cuidadec unësaid tantiateuidi mibi chuitiadquo iccobi. Adnuc: —Esus tantiaquido iccuededacno muaquido puduedosh —quesho tantia-boshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquo mimbi chiec. Aid tantiatipimbo iquebi —cata. Nuquin Papan tantiacpadomboen Esusën abëd icquido chuibanëdaid nuqui tantiaid neque. Utsi tantienda.

⁴ Esus tantiaquido mimbi danubi mibi icsamenuc mibi yacno muaquido puduedac caosh. Ambi ëndenquo tantiacpadomboen Nuquin Papan icsano nidmeteuido aido neque. Muasho tantienda. —Nuquin Papan bëdamboen isaïdo icsaïdequi icsho nuqui cuidtiapimbo iquec. Chido chishpidambo yec dada cuididimbo yec quec icsashobi nuqui bëdamboen isec —quec companec muaique. Muasho tantienda. Esuquidistu Nuquin Icho abentsëcshun chiaid niac-niaquec icsaïque.

⁵ Adquid Nuquin Papan companen cuidendac. Tantia. Nuquin Papan cuidampid mimbi tantianëdaid mibi chuinu. Equipito yacnoshon unësmenuen ancanguidën icsamboen chonoa uasho isun ashunquo Nuquin Papan con matses isaïdaïbo tsusedpabo puduamepampic. Adoac yuectanquin puduamiaïdombi ambi chiaïd niac-niacsho isun Nuquin Papan uesquin unës uapampic.

⁶ Adembidi utsibotsen cuidpampic. Abëd icpampido ambi abi yacnoshon uaido mayan chedo abëdtan namequido icboedobi Nuquin Papan chiaïd niac-niace buncuenash Nuquin Papabëd icte bunenquo yampampic. Adec Satanas chedo abëd icte bunenquo icsho isun pduentiapimbo yacno icsamboshë yacno Nuquin Papan nidmepampic. —¿Ada mibi bëdambo icti? Mibi icsamboshë iqueque. Mibi cuidnu —quetequid ushën padpiden uesquin cuidnumbi adopampic.

⁷ Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquo chudnubi adembidi chidon aton bënëpenquo chudmepampic. Dada aton dada utsibëdi chichudnanquidquo icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nëdëncapampic nibëdquiecnuc. Aïdo cuidampid tantiaquin: —Adembidi icsamboec tabadquido abitedi cuidquin Nuquin Papan chian anëdënquiacno nësecaïndac —quequin nuqui tantiec.

Muaquido icsaïd

⁸ Cuidte tantienquo yec adecbidi muaquido icsamboecuidi tabadec. Aton dada utsibëdi chichudnanquido nec. Abi chuiquid dapabon chiaïd niac-niacquinc Nuquin Papan chiaïd niac-niacquinc caïndac. Adembidi Nuquin

Papan abi yacnoshon uaido mayan bēdabo caic: —¿Nadatiambo icquidta nedic? —quequin muauaic.

⁹ Mayan bēdabo chuiquid dapa Miqed caidēn adotiapimbo icpampic. Aidi Moises unēsacsho isash: —Chococanu —quesho podobitsi icsabon icbon Satanasēn: —Ēmbiquen bednu —catuidpampic. Adoac: —Icsano nidta —cainquio icpampic Miqedēn. Adenquio icquin: —Nuquin Papambien mibi cuidēc —capampic Miqed caidēn mayan bēdabo namequid dapa icquin.

¹⁰ Muaquidombien ambi tantienquio yaid icsamboen chuishunec. ¿Ada bēdi cuidnushe quepadic? Adembīdi abi cuidte tantienquio icquin ambi tantiaiduidi naic tabadsho Nuquin Papan cuidendac.

¹¹ Cain caidbimboecquid muaquido nec. Nuquin Papan chiaid niacniacquin abi bunaid naiqui icsaic. Badan caidēn piucquid bednuen Nuquin Papan chiaid niactiadquio yampampic. Adembīdi piucquid bednuen muaquidon ambenquiobi chiec. Code caidēn abi chuiquid dapan chiaid niac-niacpampic. Adembīdi abi chuiquid dapan chiaid muaquidon niacniacquec. Adsho Nuquin Papan comapenen cuidendac.

¹² Muaquido icsambo iquec. Mibi icsametiadquien icchitec. Esus tantiaquidon pebededacno puduedshun mibēdtambi muaquidon piac caosh. —Esus tantiaquidquio nebi —quiash puduedash dacuēdenquio yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquio. Ambi naiduidi naquin ambemi chiaid chiac matses nadquio iquec. Uispa dadpen icboedi badiadnuc abu chēshēn bētinascho isash: —Tanunquien badiadec —queuidachimboec matses iquec. Pete ambi nitsinaid unēsacsho istuidash: —Pete nitsinuidombi —quiachimboec muaquidon chuisho tantiaquido: —Bēdamboen chiaid tantianu —queuidendac.

¹³ Acte tēccuasquequidēn cuēmano nushan uaquin icsa uachimboen icsaquin muaquidon mibitsen icsamec. Abi capuaid tantienquio yequi: —Ēbi capuaid tantiaquidquio nebique. Isec cho —queboedi bēnudtaniacimboen: —Nuquin Papan chiaid tantiamequidquio nebi —queboedēmbi tantiamenquio iquec. Adec muasho cuidquin Nuquin Papan puduentiapimbo yacno icsamboshē yacno nidmendac.

¹⁴ Adquido con tsusedpa Enoc caidēn chuipampic. Abia matses uaid Adanēn madon baban tishmiaidēn baba Enoc nepampic. Naden chuipampic. “Nuquin Papan abi yacnoshon uaid mayan bēdabo dadpenquioshē Nuquin Icbobēd choendac.

¹⁵ ‘¿Ada mibi bēdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuen Nuquin Icho choendac. Nuquin Papa icsamboen chuishunquinc Nuquin Papan chiaid niacniacquincaquido cuidnuen choendac,” quepampic Enoc Esus matses cuidnuen chote chiec.

¹⁶ Aidēn cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshēmēnec tabadec. Abi bunacpadecuidi icsauiquec. —Ēmbentsēqui bēdamboen naic —queuidequi iquec. —Ēmbi tantiacpadomboen ma nanu —quiash matses chiec: —Ēmbi tantiaidquio mibi nec —quec muaic.

Esus tantiaquionona, quiaid

¹⁷ Ēmbi tantiaido mibi neque. Tantia. Esusbēd iccondaidon chiaid mibi chinu.

¹⁸ Nadpodash. “Esus padpidec choabi icnuc Nuquin Papan chiacpadec bēdamboec tabadsho Esus tantiesabon mamēnshunēndac. Nuquin Papan chiaid niac-niacquec abi bunacpadec icsaquiendac,” quepondash.

¹⁹ Adquio muaquido iquec. Aton padi yec icsaiqui chieshëmënquin mibi cuësh-cuëshëdmec. Nuquin Papan aton Mayan aidobëd tabadmenquio iquec.

²⁰ Adquid icsacpadeç icsainquio icquin Esus tantiatsëchoedëmbi Nuquin Papan chiaid isban-isbanquin ënenquio icquin Esusbëdta Nuquin Papa tantianuna. Nuquin Papan Mayanën tantiamicpadomboen Nuquin Papa chianenuna.

²¹ —Abi tantiasho bëdamboen isquin abi yacno Esusën nuqui tabadmendac —queshun Esus chosho isnuen cainquin aidbëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna.

²² Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantiash: —¿Abimbobida capeba? —quesho tantiashun nëishenquio icquin Nuquin Papan chiaidquio tantiamenuna.

²³ Bacuëmpi cuëten pichiquetsensho: —Baded bed. Taidnushe —quiachimboen —Icsano nidmequin Nuquin Papan cuidnushe —queshun utsibo Esus tantiamenuna. Icsaquidotsen bëdamboen isnuna. Esus tantiamenun aid bëdamboen isec: —Ëbitsen icsamane —quiash aid icsacpadeç icsainda.

²⁴ Nuquin Papa bëdamboshë iquec. Aid tantiasho nuqui icsamenquio iquendac. Adshumbic: —Icsambo mibi iquec —utsibo quetiapimbo icnuc bëdambo icmeshun bëdamboshë yacno abëdi nuqui tabadmendac. Adoac nuqui cuishonquendac.

²⁵ Aden tantiaquin nadonona. —Abipadquid utsi nibëdnuc abentsëcquiobi Nuquin Papa iquec. Nuquin Icho Esusded cuidshun abi tantiaquido cuidenquio icquid nec. Abitedishun Icbombo Nuquin Papa nec. Nadatiambo icquin nabanquidquio nec. Abitedi chuiquid dapambo yec abitedi namequidquio nec. Bëdamboshë iquec —canuna ënenquio icquin. Esus tantiaquido icquin adonona. Padi. Aidedi chuiquin dada uaombi.

ESUSËN UAN ISMIAID

Nëidba chuiquin Uanën dada uaid

¹ Nuquin Papan tantiamiac Esuquidistun ismeboedquo chuibanquin dada uaic nebi. Esusbëd ictenedquo aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi.

² Adoac Nuquin Papan chiaidbëdta Esuquidistun ismeboedquo chuibanquin dada uaic nebi. Abimbo caimbique. Tántia.

³ Nëid dada uaid tantiash chuibanquido ambi chiaidobëdi: —Ambi chi-
acpadomboen nëbi Esusën nanushe. Chieshtoenquo icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴ Nidaid utsi Asia caid yacno tabadquidon Esus tantiaquidon mimi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdta bëdamboen isquin bëdambo icmepashun. Adembëdi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec.

⁵ Aton Mado Esuquidistu Nuquin Papan bëdamboen iste tantiamequidquo nec. Abia aton dada unëstiapimbo icquid icmequin uincuemiaidquo nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquo nuqui tantiaquidquo yec nuqui icsaid bedshunec abided cuidadec unëspodash.

⁶ Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquo nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquo icquin.

⁷ Aidquo tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquo isendac. Con matses ambi unë uaondaidquo chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

⁸ Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquo nebi. Nidaid uabi yec ictenedi nebi. Nëbi adquid yec nibëdantiapimbo icquidquo nebi. Adquid yec abitedishun Icbombo nebi —queposh Nuquin Papa. Aidquo tantianuna.

Dacuëdampamboecnuc Esusën ismiaid

⁹ Esusbëd ictened Uan nebi. Mibëdta Esus tantiaquid yec min utsibomboecquid nebi. Mibi yacpadembidi Esus tantiasho Esus tantiesabon chieshëmpodashi. Adoac Esusën namiacpadec chieshtoenquo iquebi. Chieshtoesa yec Nuquin Papabëd tabadtequido nuqui nec. Esus tantiesabon

chieshënquin quënën nauedacimboben cuemenquo icnuen acte dapa nuacqid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi.

10 Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacbimboec comapenec onquesho tantiapombi. Ushenquo icquimbi ushquin isacbimboen tantiombi.

11 Naden chuiposhi. –Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidtedishun iste dada uashun buame –quequin comapenec onquequin chuiposhi.

12 Comapenec onquesho tantiatanec bidadquin isquien tabote manitsinaid 7tedi icposh. Shocosh piu nacnenaidquo neposh.

13 Aid nënantanquo Esusquo icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiaccosh. Abi shictonquete bëshpiu-bëshpiuctsëcquid nuacqid dapambo icposh.

14 –Icsaisambo nec –camenuc aton mapi aton manëdaidbëdi abu ushubimboec ushumboshë icposh. –Matsesën naidtedi tantiaquidquo nec –camenuc cuëte isquidbimboec aton ëshë isquid-isquidquo icposh.

15 –Utsin: “Ëmbiquen abitedi namenu,” catiapimbo icnuc abitedimbo namequid nec –camenuc shocosh piu nacnenaidbimboec nac-nacquo aton taë icposh. –Nuquin Papapadquidquo nec –camenuc acte chododoquiacbimboec comapenec onqueposh.

16 Abiuchshun uispa 7tedi sanamposh. Chështe cuënumbo icquid ana shëcuënuësh cueshqueposh. –Matses icsaid cuidquidquo nec –camenuc adposh. Aton bëtantete ushëbimboec bëchamauanquiecposh. –Bëdambo icquidquo nec –camenuc ad icposh.

17 Dacuëdampamboecsho istanequini Esusën dayumbi uebudpaccoc unësanaciabimboec padishec. Adshobini Esusën camishquin bëdameposh. –Dacuëdenda. Nuquin Papapadquidquo nebi. Nidaid uabi yec ictenedi nëbi adquid yec nibëdantiapimbo icquidquo nebi. Adquid yec abitedishun Icbombo nebi.

18 Adquid yequi matsesën unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac –queposh Esus.

19 Adashic abi onquec: –Naden chuiquin dada uata. “Nëbi nadquid iguec. Nadquid utsi iguendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta.

20 Tantia. Ëmbi uispa 7tedi icquid abiuchshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquo ëbibi iquebi –quequin aden ismeposhi Esusën.

2

Epeso yacnocquido Esusèn chiaid

¹ Aden Esusèn uispa 7tedi sananquin ismioshi. Tabote 7tedbidi manitsinaid tabëcacno aid nënantanquo abibi icquin ismioshi. —Èbi tantiaquido chuibanquidën Icbo yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu.

² Mimbi naidtedi tantiaquid nebi. Dayacquio icquin ëmbi chiacpadomboen mimbi dadpen nabanoc. Utsibo chieshtonobi chieshtoenquo icquin mimbi ëbi tantioc. Èbi tantiaquido icsamenuen chiec: ‘Esusèn namiaidquio yec mibi chuinuec chopobi,’ quequin muaquidon chuisho: ‘Mua. Nuquin Papan chiaidpenquo mimi chuibanoque. Utsibo chienda,’ quequin mimbi aidon chiaid tantienquo iccoc. Aden mimbi bëdamboen naoc.

³ Adembidi utsibon chieshënaqui chieshtoenquo icquin Nuquin Papan chiaidbëda ëmbi naid mimbi chuibanoc.

⁴ Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadenec. Aden ëbi tantiaquidquio icquin mimbi utsibotsen tantiaquiopadenec. Adodenedëmbi pacuënëdabimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi ic-sacuededec.

⁵ Èmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ queshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoenquo icshoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuec mibi pudued-puduedenquo ictsianac.

⁶ Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi.

⁷ Nëbi ëbi tantiaquido utsibo chuinu. Èmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën: ‘Icsamenu,’ caqui chieshtoenquo icquin ëbi tantiasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboeshë yacno tied nënantan icquid cuëte matses unëstiapimbo icquid icmete icnepampic. Aid cuëte bacuë meniabimboecnuc mibi padpidec unësenquo icnuc ëbëdi tabadmendambi,” quequin ëmbi chuiboed dada uata —quequin Esusèn chuiposhi.

Esmidina yacnocquido Esusèn chiaid

⁸ Adshumbic Esusèn padpiden chuioaposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Ìbombo icshobi chieshëmënuquidon unës uacsho chococaqui uincuempaccondash. Adondaid yec unësaid uincuemequidquio nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi chuinu.

⁹ Èbi tantiaquido icsho utsibon chieshënac mimbi dayun uaid nibëdquidnac. Nëbi mitsana nibëdquid yequi con Pa yacnuësh dadpen dayun uaquidbimboec mibi bëdamboeshë iguendac. Chieshëmënuquidon mibi icsamboen chuishumboedtsen tantiembi. Mibi yacnoshon Satanasën namiac: ‘Isadaidbo nebi,’ quequidon mibi icsamboen chuishunosh. Nuquin

Papan con matses caido yequi Nuquin Papan yuapenquio yec Satanasën yuaboen nec.

¹⁰ Aido tantiash: ‘Ashibi mëyampatsiash,’ quec dacuëndenda. Satanasën: ‘¿Ada Esus tantiaguído chieshtoenquio ictsiashé? Tanu,’ quequin nami-acpadomboen chieshëmënquidon mibi utsi-utsien quënën nauedbanendac. Adoac daëdpactsëc ushec mibi mëyadendac. Pудuenabi yec chieshtoenda. Chieshëmënquidon: ‘Esus tantiaguído icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi.

¹¹ Nëbi ëbi tantiaguído utsibotsen chuinu. Ëmbi Esmidina yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Chieshtoenquio icquin ëbi tantiasho isun icsaido cuidquiacno nësecainquio iquendambi,” quequin ëmbi chuiboed dada uata –quequin chuiposhi Esusën.

Pedcamo yacnocquido Esusën chiaid

¹² Adoshombic ana shëcuënuësh chështe cuënumboshë icquid cueshqueboedën Esusën naden chuioaposhi. –Pedcamo yacnocquidon ëbi tantiaguidon iste ëmbi naden chuiboed dada uata. “Tantia, Pedcamo yacnocquido. Mibitedi chuinu.

¹³ Mibi yacno Satanasën yuabo dadpen icnuc ëbi tantiec mibi chieshtoenquio iquec. Ënden Satanasën namiac mibi yacnoshon chieshëmënquidon con yua Antipas caid cuesunopondash. Aidën chieshtoenquio icquin ëmbi naid chuibansho cuesuniacsho isumbic adembidi chieshtoenquio icquin mimbi ëbi tantiaguiopondac. Aden mimbi bëdamboen naid tantiembi.

¹⁴ Adondaid tantaquin mibi icsaidtsen chuinu. Mibi cuëdüncuededacno Esus tantiaguído icsamequid utsi-utsiec puduedposh. Badan caidbimboecquido aido nec. Ëdenquimboshë matses utsibo chuiquid dapa Badac caidën: ‘Isadaidbo aquec cho,’ cac comapenen tantiaguïdën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquio tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi.

¹⁵ Adec nicadaitabo caido ëbi tantiate shubun puduedash mibëdi cuëdüncuededec icsamiantë bumpec.

¹⁶ Aidon chiaid tantienda. Ëmbi chiaid mibi niac-niacmenushe. Aidobëd tabadenda. Mibi cuëdüncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesachimboen mibi cuidtsiambique.

¹⁷ Nëbi ëbi tantiaguído utsibotsen chuinu. Ëmbi Pedcamo yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquio icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: ‘Ëmbi tantiaguído yec ëbi yacno puduedtequid nec,’ qeshun cuënote ushu menendambi. Abi cuëmëdquid icnubi utsi uain cuënquin aid cuënoten dada uatanquin menendambi. ‘Ëmbi meneboedënuïdtsëqui ma isnu,’ quequin adoendambi,” quequin ëmbi Pedcamo yacnocquido chuiboed dada uata –quequin chuiposhi Esusën.

Tiatida yacnocquido Esusën chiaid

18 Adoshombic aidëmbidi padpiden chuioaposhi. Cuète isquidbimboec aton èshë isquid-isquidquio yequi aton taè shocosh piubimboec nacnacpambo icposh. —Icsaisambo yec Nuquin Papan Madombo nec. Adquid yec abitedishun naid tantiaquidquio icquin matses cuidquidquio nec — camenuc adquio isadquidën naden chuiposhi. —Tiatida yacnocquidon ëbi tantiaquidon iste ëmbi naden chuiboed dada uata.

19 “Tantia, Tiatida yacnocquido. Mibitedi chuinu. Mimbi naid abitedi tantiembi. Èbi tantiaquin mimbi utsibotsen bëdamboen tantiec. ‘Aton Papabëdtan Esusèn bëdamboenshë natsiash,’ quequin chieshtoenquio icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Èbi tantiesabon: ‘Padi. Esus tantienda,’ caqui mimbi chieshtoenquio icquin ëbi tantiapec. Tauamboen ëbi tantiaquin daëdpactsëc naondaïdi nëbi ëbi tantiaquioshon ëmbi chiacpadomboen mimbi dadpen naic.

20 Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenquio yec mibitedi icsaic. Mimbi cacumiabi mibi iccuededacno isadaïdbo tsusedpan chido Esabed caïdbimboecquid chido icsamboshë icquid muanuec puduedposh. Puduedshumbic: ‘Nuquin Papan chiaïd chuiquid nebique. Tantia. Chuinu,’ quequin abi bunaiduidquio chuibanosh. Adoac ëbi bëdiactsëc tantiauidtsëcboedi aidën chiacpadec icsacuedposh. Nuquin Papapenquio utsibon papa caïd tantiabededacno puduedposh. Adshumbic aidon papa quequin dasamboed nësh pichicaïd pec tabadcuededquimbi aton chidopenquio chudbededposh.

21 Adsho isun aid chido: ‘Ma abi icsaid ënu,’ qeshun badedquio cuidenquio iccombi. Adoboqui abi icsaid ënte bunenquio iccosh.

22 Adec abi icsaid ëntiapimbo icsho isumbimbi nëbi cuidendac. Èmbi nac daicsabudash mëyadquiec aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naïd ënshoembi cuidenquio ictsiac.

23 Aid chido cuidquioquimbi aton bacuëbobimboecquido aidën chiacpadomboen naquin ëntiapimbo icquido adembidi cuidquiendambi. Èmbi adsho isun ëbi tantiaquidtedishun: ‘Matsesën otacquido tantiaïd tantiaquidquio Esus nec. Adquid icquin abi icsaid ënenquio icquido cuidquin abi tantiaquido bëdambo icmendac,’ quequin tantiatsiash.

24 Tantia. Ambocquido ëbi tantiaquidombotsen chuinu. Aden Satanasën chuimaidën chuisho: ‘Aden chuisho tantiatiapimbo iquebi,’ mimbi capoc. Aden bëdamboen nasho isun utsi chienquio iquembi.

25 Nëiduidtsëqui chuinu. Mimbi bëdamboen nabocpadomboen chieshtoenquio icquin ëbi tantia. Èbi choabi yacpadembi adota.

26 Choshombimbi chieshtoenquio icquin ëmbi chiacpadomboen naquidombo ëbëdtan chuiquid dapabo icmendac. Adoac ëbëdtan matses utsibo abitedi namendac.

27 Aden Nuquin Papan aïdo ëbëdta chuiquid dapa icmiacscho utsibon: ‘Dëniacquin ëmbiquen nanu,’ catiapimbo iquendac. Èbi chieshënquido: ‘Esus dëniacquin ëmbiquen matses namenu,’ qesho tantiashun matsu nacenquidën ambi nacenaid icsambo icsho isun pos-posacimboen cuidquiendambi.

28 Badiadte anoentsëc uispa dapa choded-chodedbocpadquiec ënëdenquio yec ëbi tantiaquidobëd iquendabi.

29 Èbi tantiaquido utsibotsen chuinu. Èmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabi-ate cuembo icquin tantia. Chieshtoenquio icquin ëbi tantiasho adem-

bidi bédambo icmendambi,” quequin ëmbi chuiboed dada uata —quequin chuiposhi Esusën.

3

Sadis yacnocquido Esusën chiaid

1 Adoshombic Nuquin Papan Mayan abi tantiaquidobéd tabadmequidquio icquin Esusën padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedën naden chuiposhi. —Sadis yacnocquidon ëbi tantiaquidon iste ëmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiemi. Bédamboec tabadquido danquin utsibon: ‘Bédambo icquido nec,’ mibi canubi ëmbien adotiapimbo iquec. Mibi bédapenquio iquec. Unésacimboen mimbi ëbi bédamboen tantienquio iquec.

2 Isucunacimboen ëbi padpiden tantiaquiota. Nuquin Papan chiacpadomboen mimbi naidtsëccoque. Mimbi ëbi tantienquio iqueque. ‘Nuquin Papan chiacpadquiec bédamboec tabadnuna. Esus tantiaquionona,’ cananta.

3 Mimbi ëbi tantiabenondacpadomboen ëbi tantiaquiota. Bëpiscudenda. Nëbi mibi icsaid ënshun ëmbi chiacpadomboen naoata. Isucunenuio yacimboen ëbi tantienquio icshoembi mibi cuidendac. ‘Ampequid chôec,’ quequin tantienquio yacimboen ëmbi cuidte tantienquio icsho mibi cuidtsiambique. Ëbi tantiaquiota.

4 Mibi yacno icsaquido dadpen tabadnubi utsi-utsiec daëdpactsëc ambi naid icsa ucudacimboec icsainquio yec bédamboec tabadec. Adec bëchish ucudacimboec abi icsaid ënash bédamboec tabadsho isun ëbëdi tabadmequin icsaisa icmendambi.

5 Ëbi tantiaquido utsibotsen chuinu. Ëmbi chuibocpadquidën chieshtoenquio icquin ëbi tantiasho adembidi bédamboen isun Nuquin Papa yacno ëbëdi tabadmequin icsaisa icmendambi. Aido cuëmédquid cuëmédquidquien Nuquin Papa chuibanendambi. ‘Aido ëbi tantiaquidotedi neque. Nuquibéd tabadmenuna,’ quequin adoendambi Nuquin Papan abi yacnoshon uaido mayan bédabontsen tantianuc. Aden dada uaid ucudenquio yacimboen bëshunenquio icquin ëbëdi tabadtequido abitedi tantiemi.

6 Ëmbi Sadis yacnocquido chuiboed Nuquin Papan Mayanën mibitsen tantiametsiashe. Pabiäte cuembo icquin bédamboen tantiata. Chieshtoenquio icquin ëbi tantiasho adembidi bédambo icmendambi,” quequin ëmbi chuiboed dada uata —quequin Esusën chuiposhi.

Pidadepia yacnocquido Esusën chiaid

7 Adoshombic icsaisambo icquin ambi chiacpadomboen naquidënquio Esusën padpiden chuiposhi. Con tsusedpa Dabid yampicpadquid mates namequidquio yec ambentsëqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnocquidon ëbi tantiaquidon iste ëmbi naden chuiboed dada uata.

8 “Tantia, Pidadepia yacnocquido. Mibitedi chuinu. Mimbi naid tantiemi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquio icpatsiaba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquio mibi iccoc. Adec chieshtoenquio icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin.

9 Aden isadaidbon mibi ëmetiadquio iquec. Aido: ‘Con mates isadaidboudtsëqui Nuquin Papan bédamboen isendac,’ quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac.

Adoac: ‘Ai, abimboen mimbi caoc. Nuquin Papan Madon Esusën tanti-aidombo mibi nec,’ aidon mibi caindac.

¹⁰ Ĕmbi chiacpadec chieshtoenquo icquin ěbi tantiasho isash mibi cud-asendabi. ‘¿Ada Esus tantiengquo yantsiashe? Tanu,’ qeshun nidaid utsi-utsec yacno tabadquido abifedi Satanasën natiambo icmendac. Adosho mibi chieshtoenquo icquid icmendambi.

¹¹ Tantia. Něbi choendabi. Utsibon chieshěnaqui mibi icbocpadquiec chieshtoenquo yec bědamboec tabadta. ‘Ĕbi adenquo icsho isun Esusën abi yacno puduedmenquo ictsiashi,’ quiaash bědamboec tabadta.

¹² Aden chieshtoenquo icquin ěbi tantiaquido utsibo abitedi Nuquin Papa yacno yuedendambi. Buinfad nitsinaid chiquidtiapimbo yachimboecnuc con shubun icquido mibi icmendambi auěshquo cuentiapimbo icnuc. ¿Mit-sipaden icbon: ‘Con na nec,’ quequin abi cuěmědquid dada uaqun ismepec? Adembidi abitedi ismequin: ‘Con Pabětan con matses nec,’ mibi caindami. ‘Nuquin Papa yacno ěbi tabadaid Edusaden chuca caid abucuěsh budtequid yacno tabadtequidombo nec,’ mibi caindami. Nuquin Papan abitedishun Icbombo icmiac ěbědtambi chuiquid mibi icmendambi.

¹³ Ĕmbi Pidadepia yacnocquido chuibocpadomboen Nuquin Papan Mayaněn mibitsen pausuntsiashe. Pabiate cuembo icquin bědamboen tantiaata. Chieshtoenquo icquin ěbi tantiasho adembidi bědambo icmendambi,” quequin ěmbi chuiboed dada uata –quequin Esusën chuiposhi.

Daudiseya yacnocquido Esusën chiaid

¹⁴ Adoshombic abitedishun naid tantiaquin abimbo chuiquiděnquo Esusën padpiden chuioaposhi. Nidaidbědta abitedi uaquiděnquo abitedishun Icbon chuiposhi naden. —Daudiseya yacnocquidon ěbi tantiaquidon iste naden ěmbi chuiboed dada uata. “Tantia, Daudiseya yacnocquido. Mibitedi chinu.

¹⁵ Mimbi naid tantiambi. Chieshtoenquo icquin ěbi tantiaquid ictiadquidi adquidpenquo mibi nec. ¿Ĕbi bědamboen tantiaquidon adopendactic? Padenquo. ‘Esus tantiaquid nebi,’ quiondaiděmbi mimbi naiduidi naquin mimbi ěbi bědiactěc tantiactěccoc. Adsho tantiashun: ‘Dayacquo yacimboen ěbi tantiaquiopashun,’ caimbi mibi.

¹⁶ Mibi adec chieshtonoc ěbitsen chieshtotiadquo iquebi. ‘Cacumiabimboen Nuquin Papa yacno ěbědi mibi tabadmenquo iquendambi,’ mibi catiadquo icchitebi.

¹⁷ ‘Nuquin Papan chiaid niac-niaquec icsapobi,’ quetiadquidi: ‘Ĕmbembi con na dadpen bedshun dayun uaic utsi bunenquo yec bědambo iquebi,’ mibi quepoc. ‘Esus tantiengquo yec Nuquin Papaběd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantiengquo icsho isun mibi shubiuatiadquo iquebi. Běchish ucabi yachimboen mibi icsaid ěnabi icsho mibi bědamboen istiapimbo iquebi. Pacuěnědabimboen ěbi tantienquo mimbi iquec.

¹⁸ Adboeděmbi Nuquin Papaběd tabadte bunquin ěbi tantiaquiota. Ĕbi tantiaquin běchish ucachimboen mibi icsaid ěnta. Adsho icsaisabimboecnuc mibi bědamboen isquin ěbědi tabadtequid icmetsiambique. Pacuěnědaid paposhquiachimboecnuc ěmbi naid mibi bědamboen tantiametsiambique. Ĕbi tantiaata.

¹⁹ Ĕmbi tantiaido bědamboen tantiamembi. Aton papan: ‘Padi, mibi icsambo iquec,’ quequin bacuě ěmiachimboen ěbi tantiaquido icsasho isun ambi naid ěmenuequin natiambo icmendambi. Ĕbi tantiaquin mimbi icsamboen naid ěnash bědamboec tabadta.

²⁰ Mibi tantiaquiembique. ‘Ëbi tantiata,’ ëmbi cac mibi: ‘Ai,’ quesho tantiash mibëd iquendabi. Pec tabadec bëisanquiacbimboec mibëd iquendabi.

²¹ Tantia. Ëbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aibëdi tabadquid nebi. Adquid yec aibëdi abitedishun Icbombo nebi. Adembi Ëbi con Pan chiaid nacpadec chieshtoenquo yec ëbi tantiec tabadsho ëbëdi tabadmequin ëbëdtan chuiquid icmendambi.

²² Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembi bëdambo icmendambi,” quequin ëmbi chuiboed dada uata –quequin chuiposhi Esusën.

4

Nuquin Papa Uanën isaid

¹ Asia yacnocquido Esusën ëmbudquin chuibon abuc ispombi. Adshun isquien shëcuë shëcniacimboc isadpec. Adnubien chuibocpadquiec shoncacbimboec compenec onqueoaposh. –Nëmbo cho. “Nadquid iquendac. Nadotsiandac,” quequin mibi dadpen ismenu –caposhi.

² Adoac Nuquin Papan Mayanën tantiamiac ambo nidacimboc ispombi. Ushquin isacimbocimbimbi caindac. Adshun isquien Nuquin Papambo chuiquid dapan tsadte dapanquo isadpec.

³ –Chuiquid dapa abentsëcquiobi nec. Bëdamboshë iquéc –camenuéc matses bunaidquio casëdubimboec nac-nacquio yec piumbo yec bëdamboshë isadposh. Abi tsadaid nënantanquo uenquebudpamboec uen podquedbipamboec umu-umupambo icposh. –Bëdamboshë icquidquio nec –camenuéc adquio icposh.

⁴ Nuquin Papa nënantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquio dasiuidcuededposh. Chuiquid dapan mauetombo shocosh nacenaidquio mauecuededposh.

⁵ Adnubien Nuquin Papa yacnuësh abubimboec bed-bedquetanenubien abu tesquianiabimboec cuëdtoposh. –Abitedishun Icbombo nec –camenuéc adec cuëdposh. Nuquin Papan bëntsiaucquo tabote taboaid 7tedi icnuc tabëcaid icposh. –Aton Mayan abentsëcshun Nuquin Papa bësqioquimbi abi tantiaquido chianequid yequi Esus tantiaquidobëdtsen icoaic –camenuen aden ismeposhi.

⁶ Bëntsiaucbidi actepenquo chian dapa acte-actetsëcquio isadposh.

Nuquin Papa tsadaid anoen daëdtsëcquio abi dacuenadec aben icquidbimboecquid 4tedi icposh. Dadano chedobi ëshë ictsëcquiec icposh. Utsi tanenquo. Abimboudquio istequidquio icposh. Cachoc icnubi tachiduc adquibidi icposh.

⁷ Abentsëc bëdi dapambo tëbucquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh.

⁸ Icho-icboec aton podo uicchunën podobimboec 6tedi icposh. Podonotsen adquibidi ëshëuidquio isadposh. Podo ananquo adquibidi icposh. Aidonquobi ënenquo icquin Nuquin Papa chuiposh nadec cuëdënquin. –Icsaisambo yec bëdamboshë icquidquio mibi nec. Abitedishun Icbombo mibi icnuc mibipadquid utsi nibëdec. Abitedimbo tantiaquidquio mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo
icquidquio nec
—quec badiadquidën badiadquidënquiecu cuëdënashic inchëshëntsen
cuëdëndeposh.

9 Aden dadanobi ëshëcquidon: —Mimbi nac bëdambo iquebi. Mibi
bëdamboshë iquec, Papa. Abitedishun adembidi: “Bëdambo iquec,” mibi cac
bëdambo ictsiash, Papa —Nuquin Papa cadonenubi

10 tsusiobo 24ted icquido ambo tabadquido danëshën tinquebudcuëded-
posh. Adtanquimbi maete chicbededtanguin Nuquin Papan tayun sambed-
dedposh: —Abitedishun Icbombo mibiuidtsëqui nec —quequin. Adotan-
quimbic aidontsen Nuquin Papa chuiposh nadec cuëdënquin.

11 —Mibi bëdamboshë iquec, Papa. Adembidi abitedishun mibi: “Bëdambo
iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquio mibi nec.

Comapenen tantiaquidquio icquin mimbi abitedimbo uapampic.

Mimbi tantiacpadomboen mimbiuidtsëcquiobi abitedi uapampic.

Adoac mimbi tantiacpadequi mimbi uaido nibëdanabi yec abi iquec.

—quec tsusiobo cuëdëncuededposh.

5

Nuquin Papan chiapadomboen namequid Esus isadaid

1 Adshun isquien Nuquin Papan abiucshun ambi chiaid dada uaid sanam-
pec. Abiuc daëdi dada uaid bidicabanquin: —Istemaidën isnushe —qeshun
7ted icnuc bitaccatempin bitaccabanaid neposh.

2 Adnubien Nuquin Papan abi yacnoshon uaid mayan bëda chuiquid
dapa comapenec onqueposh. —¿Tsuntsin nëid dada uaid bedshun bitaccaid
chicbanquin chuibampatsiash? —quedo-quedoposh. —¿Tsuntsin Nuquin
Papan chiaid bedshun isquin ambi chiapadomboen naquin naimepatsi-
ashba? —quequin tantiec adposh.

3 Adoquien ëchedanenquio icposh abitedimbo. Nëidic Nuquin Papabëd
tabadquidotedi. Nëidic nidaidën tabadquidotedi. Nëidic unësaidotedi. Aidtedi
dada uaid bedshun bitaccaid chicbanquin istequid nibëdposh.

4 Adsho isashini unësquio icnuc shubipoc: —Aid dada uaid bedshun
chicbanquin chuibanquid nibëdec —quiash.

5 Adshobini anocquid tsuson: —Otac. Shubienda. Ènëd. Is. Dada uaid bed-
shun chicbanquin chuibanquid abi iqueque. Nuquin Papan matsesmequin
chomiondaidquio neque. Aton tsusedpa Uda yampid icnuc aton tsusedpa
utsi Dabidbimboecquid chuiquid dapambo nec. Utsibon dëniacdtiapimbo
icquid nec. Aidëmbi chieshtoenquio icquin Nuquin Papan chiapadom-
boenuidi naquidquio icquin aid dada uaid bedshun namendac —caposhi.

6 Adoac isquien isadaidbon Nuquin Papa cuidmenquio icnuen abided
unës uaid obëca bacuëbimboecquid Nuquin Papabëd abi tsadacnombo isadt-
sec. —Matses icsaid bedshunuec abided cuidadec unësaid Esusquio nec —
camenuec adëc isadposh. Utsibo dacuenadec tabadnuc nënantanquio Nuquin
Papabëdquio icposh. Anoentsëqui dadanobi ëshëcquido dacuenadec tabadnuc
abi uquëctsc tsusiobouidquio dacuenadec tabadposh. Padnuc obëcabim-
boecquid yec aton pais 7tedi icnuc aton ëshëmbo aidtedquiobidi icposh.
—Abifedishun Icbombo yec utsin dëniacdtiapimbo icquid Esusquio nec —
camenuen aden pais ismeposhi. Adembidi: —Aton Mayambidi Nuquin
Papan Mayan yec nidaid utsi-utsiec yacno matses abitedi yacno nidmiaid

icnuc ompodëmëdtiapimbo icquid Esus nec –camenuen ëshë 7tedi ismeposhi ushqin isacimboecnuc.

⁷ Adshumbic obecabimboec isadboedën Esusën Nuquin Papan abiucshunquo sananaid dada uaid bedposh.

⁸ Bedsho istanequin dadanobi ëshëcquidobëd tsusiobo 24ted icquido Esus ismec danëshën tinquebudcuededposh. –Bëdamboshë icquidquio mibi nec –quiash adcuededposh. Tsusiobon icbo-icboen ten-tencate sananquimbi utsiucshun shooshëmpi bëdambo nuadnuc tauitempi sanamposh. –Ëmbi ten-tencamequin Nuquin Papa cuishoncamiacimboec Esus tantiaquido cuëdënaid iquec –quequin aden ten-tencate sananquin ismeposhi. Adem-bidi: –Nëshun tauiac nëid pushudquid Nuquin Papa yacno nidacimboec Esus tantiaquidon chianiaid iquec –quequin bëdambo nuadnuc tauitempi sananquin ismeposhi.

⁹ Adashic cuëdënte chucan Esus chiec cuëdëncuededposh tsusiobo.

–Mibi bëdamboshë iquec.

Nuquin Papan chiacpadec matses cuidmenquo icnuc mibided ciudadec unësondaidquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bëdamboen isendac.

¹⁰ Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadën nidaidënuësh mibëdtan chuiquid iquendac

–quec cuëdëncuededposh tsusiobo.

¹¹ Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquo icnuc anoentsëqui dadanobi ëshëcquidoudquio dacuenadec tabadposh. Abi uquëctscëc dacuenadec tsusiobouidquio tabadposh. Aid uquëctscëc dacuenadequic mayan bëdabouidquio tabadposh.

¹² Adec tabadec mayan bëdabo abitedimbo cuëdëncuededposh naden chiec.

–Isadaidbon obeca bacuëded cuidacimboec matses icsaid bedshunuec abided ciudadec Esus unëspodash.

Esusquio bëdamboshë icquidquio nec.

Adquid icsho: “Abitedishun Icbo icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bëdamboshë iquec. Mibi tantiaquiembi,” abitedishun capashun

–quec cuëdëncuededposh mayan bëdabo Esus tantiec.

¹³ Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemiaidotedi yec acten icquidotedi yec quec cuëdëncuededposh naden chiec.

–“Abitedishun Icbombo yec tsadte dapan tsadquidquio Nuquin Papa bédamboshè iquec.
 Obeca bacuëbimboecquid abided cuidadec unësaid Esustsen bédamboshè iquec,” canuna, ënenquio icquin.
 “Abiuidtsëqui Nuquin Icho nec. Utsi adquid ictiapimbo iquec.
 Aidën nac nuqui bédamboshè iquec.
 Abipadquid utsi nibëdec,” canuna ënenquio icquin
 –quec cuëdëncuededposh abitedimbo.
¹⁴ Adsho tantiash dadanobi ëshëcquido: –Ai, abimbo caic –quenubi tsu-
 siobo 24ted icquido: –Nuquin Icho bédamboshè iqueque. Ismenü –quetanec
 Nuquin Papabëdta Esus ismec danëshën tinquebudcuededposh.

6

Bitaccaid chicaid chiaid

¹ Adnubien Esusèn Nuquin Papan: –Nadoendambi –quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdäcbimboec comapenec cuëdquin: –Cho –caposh.

² Adoac cabayo ushumbo icquid catsadec dada canti sanampamboec chosho ispombi. Adec chosho isun: –Mibi chieshënkuido uesquin cuesun secaquidquio mibi nec –quetanquin chuiquid dapan mauetembo mauemeposh. Adoac adecbidi abi chieshënkuido cuesun secanuec nidposh.

³ Adnubien Esusèn dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: –Cho –cac

⁴ cabayo piumbo icquid catsadec dada choposh. –Matses cuesun secananenquio icsho Nuquin Papan tantiapadomboen aidën nac matses abitedimbo matses utsibobëd cuesun secananendac –queshun chëshhte dapa matses siante dapa meneposh. Adomboen Nuquin Papan matses cuidte tantiameposhi.

⁵ Adnubien Esusèn dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen: –Cho –cac cabayo chëshëmbo icquid catsadec dada choposh. –Pete daëdpactsëc icmete chiec –camenuen pete yuë tante sanamposh.

⁶ Adnubien dadanobi ëshëcquido dacuenadec tabadnuc nënantanshunquio Nuquin Papan cabayo chëshëmbo icquid catsadquid chuiposh. –Piucquid dadpenquio meniäc aton yuë daëdpactsëcnuc tambanshun pete utsi-utsien daëdpactsëc meniänquid iguendac –quequin pete utsi-utsiec nibëdte chuiposh. Adshumbic: –Pete utsi-utsien nibëdmetanquin tiedën icquid pete utsi-utsien nibëdmenquio icquin nata –quequin chuiposh. –Nuquin Papan cuidac adec pete nibëdnuc matses pete bunquiendac –quequin cuidte utsi aden ismeposhi.

⁷ Adnubien Esusèn dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen ënquimbi chuiquin: –Cho –cac

⁸ cabayo bëdiactsëc ushu-ushupactsëcquid catsadec dada choposh. –Aid matses unës uaquid nec –quequin cuënsno tantiombi. Abipadquid utsin chinumposh. –Aidombi Nuquin Papan tantiapadomboen matses cuidquin matses dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac –quequin Nuquin Papan cuidte utsi ismeposhi.

⁹ Adnubien Esusèn dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate

nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoengüo icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh.

¹⁰ Adoaido icquin comapenec cuëdquin Nuquin Papa chuidoneposh. — Abitedishun Icbombo icquin mimbi tantiacpadomboen namequidquio mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquidin cuesun secaboedo ¿tedecticsshun mimbi cuidpe? —caquin chuidoneposh.

¹¹ Adoaiquen: —Chiata. Yuec-yuecpactsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmëmbi —qeshun abitiombi dasiuidbudte ushumbo icquid dasiuibamposh.

¹² Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacximboec inchëshquio icposh. Inchëshën ushëbic intacximboec piumboshë isadposh.

¹³ Uispabic natiambo cunquenuc cuëte bacuë tididiquiacximboec nidaidën tididieposh.

¹⁴ Abubic dashcute bidiquiacximboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh.

¹⁵ Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquio. Nëidic aidobëdta chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh.

¹⁶ Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided cuidadec unësaüd Esusëntsen cuidnushe.

¹⁷ Aidon ambi tantiacpadënquibini nëbimbobi cuidchitec. Padtembo. ¿Tsutsi cuidenquio icpatsiashba? —queposh. —Nadomboen Nuquin Papan abi tantiaquido cuesun secaiduido cuidendac —quequin aden ismeposhi.

7

Isadaidbo Nuquin Papa tantiaquidombo bësiaid

¹ Aden Nuquin Papan cuidte ismëboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uaquin cuncamenquio icposh. —Nuquin Papa: “Ma cunquequidën icsa uabanü,” quiabi icnuc abëmbi cunquequidën nidaid yec acte yec cuëte yec quenuc icsa uanushe —qeshun adoposh.

² Adnubien mayan bëda utsi ushë choacmiuësh choposh. Nuquin Papa abi tantiaquido cudasëmënuen dada uaquin bësete sanamposh. Aidën cunquequid uidën uaquido comapenec onquequin chuituidposh.

³ —Chiata. “Nidaid yec acte yec cuëte yec quenuc icsa uanushe,” qeshun adëmbi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun

bësebambono —quetanquin Nuquin Papa tantiaquido bësebamposh ushë choacmiuësh choquidën.

⁴ Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidedi tabanac 144,000tedi icposh dadpenquioshë.

⁵ Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi.

⁶ Nëidic Acobon madobidi Ased caidën matses tsyuecquido aidedquibidi. Nëidic Acobon madobidi Netadi caidën matses tsyuecquido aidedquibidi. Nëidic Acobon madobidi Manases caidën matses tsyuecquido aidedquibidi.

⁷ Nëidic Acobon madobidi Simeyon caidën matses tsyuecquido aidedquibidi. Nëidic Acobon madobidi Debi caidën matses tsyuecquido aidedquibidi. Nëidic Acobon madobidi Isacad caidën matses tsyuecquido aidedquibidi.

⁸ Nëidic Acobon madobidi Sabadon caidën matses tsyuecquido aidedquibidi. Nëidic Acobon madobidi Ose caidën matses tsyuecquido aidedquibidi. Nëidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. —Adquido iquendac —quequin adoposhi.

Esus tantiaquido Nuquin Papa yacno tabadaid

⁹ Aden Nuquin Papa tantiaquido bëseboedo 144,000tedi tambanquin ismehombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iquec. Nëidic nidaid utsi-utsiec yacno tabadquido. Nëidic matses utsibo. Nëidic matesquio. Aidedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmido yec ushumbo icquid dasiuidcuededposh. Con matsesën chuiquid dapa ismiacbimboen: —Nuquin Papa bëdamboshë iqueque. Ismenu —quequin niste podobiecquid sananquin uic-uiccaposh.

¹⁰ Aido comapenec cuëdëncuededposh. —Abitedishun Icho icquin Nuquin Papan ambi tantiacpadomboen isadaidbon obeca bacuëded cuidacbimboen aton Mado Esused cuidpanëdash.

Adoac nuqui icsaidi bedshunec abided ciudadec unëspondash Esus. Aid tantiasho icsaido cuidacno nidmenquio icquin nuqui abëdi tabadmec. Aton Papabëd bëdamboshë iquec —quec cuëdëncuededposh.

¹¹ Adsho tantias ambo tabadquido mayan bëdabotedi danëshën tinquebudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënantanquio Nuquin Papabëd Esus tabadnuc abi uquëctšëc dacuenadec dadanobi ëshëcquido 4tedi icquidquidquio tabadposh. Abi uquëctšëc dacuenadec tsusiobo 24tedi icquidquidquio tabadnuc abi uquëctšëc dacuenadequic mayan bëdabouidquio tabadposh.

¹² Aid mayan bëdabotedi danëshën tinquebudcuededequi comapenec cuëdëncuededposh.

—Aden abi tantiaquido abëdi tabadmequid bëdamboshë iquec. Esusbëdi Nuquin Papa bëdamboshë iquec. Adembidi abitedishun: “Mibi bëdambo iquec, Papa,” quequin chuipashun. Esusbëdi Nuquin Papa bëdamboshë iquec.

Abipadquid utsi nibëdec.

Comapenen tantiaquidquio icnuc ambi tantiacmaid utsi nibëdec.

Aiduidtsëqui bëdamboen tantiaquidquio nec.

Aidën nashunac bëdamboshë iquebi.

Nadatiambo icquid nec. Abitedishun Icbombo nec.

“Esusbëd Nuquin Papa bëdamboshë iquec,” canuna

—quecuededposh mayan bëdabotedi.

¹³ Adshumbic ëmbi 24ted icquid isboed abentsëcshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiuëshquido aido chosh? —cac:

¹⁴ —Tsaudi, tsusio. Mimbibien tantiec —capombi. Adsho tantiash: —Tantia. Mibi chuinu. Satanasën: “¿Ada chieshtoenquio ictiashe? Tanu,” queshun natiamboshë icmiac Esus tantiec chieshtoenquio ictenedo nec. Adec chieshtoenquio icsho isun Satanasën tantiacpadomboen chieshëmënuquidon unës uapondash. Abided cuidadec unësaid Esus tantiaquido icsho icsaisa icmiado yec dashcute ushumbo icquid dasiuidcuededposh.

¹⁵ Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquio icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” queshun abëdi tabadmequin bëdamboen dayun uaic.

¹⁶⁻¹⁷ Isadaidbo matsesën nëish yua obeca dadpen dayun uacpaden abided cuidadec unësaidën Esusën abi tantiaquido bëdamboenshë dayun uaindac padpidec unëstiapimbo icnuc. Adoac pete bunenquio iquendac. Actetsen buendoenquio iquendac. Abi yacnuësh ushën pichiquenquio iquendac. Chun mëyadenquio iquendac. Nidaidënuësh shubidenedi Nuquin Papa yacnuësh shubitiapimbo iquendac. Natiamiante nibëdquiec iquendac. Unësquio icmiante nibëdquiec iquendac. Bacuë shubisho anin bëucquin bëdambo icmiac bimboen abi yacnoshon Nuquin Papan Esus tantiaquido bëdambouidquio icmendac —quequin chuibamposhi tsusion.

8

Dada uaid bitaccaid nainquin chicaid

¹ Nuquin Papa yacnoshon tsusion chuibombien obecabimboec isadquin Esusën nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. —Dacuëdampambo iquec —quec media oda yec yuec-yuecpactsëc otacquio tantiec tabadposh.

² Adnubien Nuquin Papan abi yacnoshon uaido mayan bëdabo sietetedi: —Nuquin Papan chiacpadomboen nanu —quec tabadposh. Adsho isun icboicboen shoncate sietetedi menebamposh.

³ Adnubien mayan bëda utsi ambobidi choposh. Choash bëdambo nuadquid tauinuequin shocosh nacnenaid tauitë dapa dayun nidtuidposh. Shocoshëmpin bëdamboshë nuadnuc tauitempi utsi sanamposh. Adsho isun bëdambo nuadquid nua meneposh. Adoac: —Nëid tauiac pushudquid Nuquin Papa yacno nidac bimboec Esus tantiaquidon chianiaid iquec —quequin bëdambo nuadquid sanshun tauite nacnenaid dapan tauiposh bëdambo nuadnuc.

⁴ Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantiashun Nuquin Papan abi tantiaquido chieshënuquido cuidendac —quequin aden ismeposhi.

⁵ Adshumbic aid mayan bëdan tauite dapan samëdquid cuëte dëtsisadaid isquidquio icquid bedshun shocoshëmpin sandoposh. Aden sandotanquimbic shocoshëmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquiainiacbimboec cuëdtoposh. Adnubien nidaid abichobi saca-sacaguemboec uëdëqueposh. –“Nuquin Papan ëbi chieshëncuïdo cuidpashun,” quequin Esus tantiaquidon chianesho tantiasun aden Nuquin Papan comapenen cuidendac –quequin aden ismeposhi.

Shoncate shoncaquin ismiaid

⁶ Matses tabadacno cuëte dëtsisadaid isquidquio icquid masiabudnubien shoncate bedboedon mayan bëdabon shoncanuen sanamposh.

⁷ Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsai yec cuëte dëtsisadaid isquidquio icquid yec intac yec quenuc chomeposh ue dapa choacbimboecnuc. Aden chomiadën nidaid nuamboshë taidposh. Cuëte dadpenquioshë taidposh. Uasin dadpenquioshë pichiqueposh.

⁸ Adnubien mayan bëda utsin shoncaposh 5tedishun shoncabi icnuc. Shoncanubien macuësh dpatembi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh.

⁹ Adec intac yanaidën acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

¹⁰ Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nëdën- nëdënquepamboec abucuësh budec acte nëpaëdposh. Aid acte nëpaëdloedën acte utsi-utsiec dadpenquioshë actiapimbo yamposh.

¹¹ Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

¹² Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoquien bëdambo chënqueboedi bëdiactscëcquio chënquantsëccosh.

¹³ –Aden Nuquin Papan matses cuidquiendac –quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. – Esus tantiesabo Nuquin Papan cuidtequido tantiac unësqioshë iquec. Shoncabi icboedon mayan bëda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac –quec cuëdcuemposh abuc cuenequi.

9

Mayan bëda utsin shoncanuc isaid

¹ Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictempi meneposh. Podobitsi icsabo uidën uacno nidaid shëcuë uquëducquio icquid bëtashte chichte neposh.

² Aid chictempin chicaquien uquëducuësh tied nëdënquedoacbipamboec pushudtoposh. Abuc inchëshquio pushudquid icnuc ushë isadenquio icposh.

³ Adsho isaquien pushudacnuëshquio tsectsebiecquid dadpenquioshë cho-choposh. Chichumbimboec sianquidquio niosh.

⁴ Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbêdta cuête podo penda. Uasintsen penda. Adembidi Nuquin Papan cudasquin bêsemiaido abi tantiaquido sebudnenda. Aido senquo icquin Esus tantiesabo bêsiadabi icquidoudiquio sebudneta —quequin chuiposh.

⁵ Adshumbic: —Unêsnuç seshun secainda. Inchêshên ushê 5tedi nidmequin chichunên siacbimboecnuc sebudneta —cac tsectsecbiecquidên sebudnequin ismeposhi.

⁶ Aid tsectsecbiecquidên siac natiamboshê yec matses unêste bunquien-dac. Unêste bunquidi badedi unêsenquo iquendac.

⁷ Aden tsectsecbiecquid ismeposhi. ¿Mitsipadquo nidaid cudasquid sondado catsadaid cabayo icpec? Adquo cabayobimboec tsectsecbiecquid isadposh. Shocosh mauetebimboecquid mauecuededposh. Matsesën bêtantetembobi bêisadposh.

⁸ Chidon têtucshumbimboec isadposh. Bêdin shêtabimboec aton shêta icposh.

⁹ Bêntsiac shicdiadquid cudaste shocosh nacnenaibimboec sictsasimbo icposh. Aid abi maisi cuensho tantiac tied nêdênquiacbimboec comapenec cuêdposh.

¹⁰ Aid tsectsecbiecquid chishpichoquid yec chichumbimboec sianquidquo neposh. Inchêshên ushê 5tedi nidmequin adquidên dadpenshun natiamboshê icnuc matses sebudneposh.

¹¹ Abi nidmequid aton icbo Satanasën yuaido uidên uacnuêsh choquidbidi niosh. —Unês uanquidquo nec —quequin isadaidbon onqueten abadon caposh. Quidieco matsesën onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daêd ismiabi icnuc.

Chiqui dapan chuiboed utsi

¹³ Adnubien shoncate sanamboedên mayan bêda utsin shoncaposh abentsêcshun shoncabi icnuc. Shoncanubien tauite dapa Nuquin Papan bêntsiac tsadunaid yacnuêshquo onquedosho tantiombi.

¹⁴ Adec onquequidên nêbi shoncaboed chuiposh. —Acte dapa Eupêdates caid yacnoshon matses cuidquido mayan bêdabo 4tedi uidên uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh.

¹⁵ Aden chuitanac aid mayan bêdabo 4tedishun matses dadpenquioshê cuesun secamenuen aton matses utsibo cuesun secate tantiamebeneposh. Nuquin Papan: —Adênquiobi adoendac —quequin tantiacpadomboen adoposh.

¹⁶ Adoquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaidtedi chuisho tantiombi. —Dadpenquioshê iquec cuête podotedi. 200,000,000tedi iquec —queposh.

¹⁷ Êmbi isboedquo nadquo icposh. Abi catsadaid cabayobêdi sondado chedo shicdiadquid cudaste shictonquecuededposh. Shicdiadquid cudaste isac pumbo yec umumbo yec bêshpiu-bêshpiu icquid yec queposh. Cabayon mapi bêdi dapan mapibimboec isadposh. Ana shêcuênuêsh nêdênquepamboec pushud-pushudpambo yec choposh. Cachinan bacuê pisenaid nuadacimboc asupede caid icsamboshê nuadposh.

¹⁸ Adshumbien ana shêcuênuêsh choaidên matses dadpenquioshê cuesun secabudneposh.

¹⁹ Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidëntsen matses dadpenquioshë unës uabudnequin ismeposhi.

²⁰ Adnubien aden Nuquin Papan cuidaidën unës uamiabi yaidon matsesën abi icsaid ëntiapimbo icposh. Ambi naiduidi nabamposh. Ëntiadquidi abi icsaquioposh. Nuquin Papa tantienquo icquin podobitsi icsabo tantiaquin ëntiapimbo icposh. Adembidi ambibi nacnenaid ambi papa caid ënenquo icquin tantiaposh. Utsibon shocosh nacnenaid tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaid anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquo icquin Esusquo tantiatiadquidi ambi nacnenaiduidi tantiaposh.

²¹ Cuesanquidon abi cuesun secaposh. Nënëchoquidombic abi unës uabudneposh. Cuëte podò dauë icsa chodcaquidombic adembidi matses dadpen unës uabudneposh. Aton chidopenquo chudquidombic adembi utsi chudshumbededposh. Adembidi aton bënëpenquo chudmequidën abi icsaid ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushe. Ëbi icsaid ënu —quetiadquidobi adenquo icposh.

10

Mayan bëdan dada uaidëmpi pemaiad

¹ Cabayo uinsadpambo icquid ismeboshombic utsitsen ismeposhi. Adoac mayan bëda chuiquid dapa utsi dacuëdampambo icquidquio Nuquin Papa yacnuëshquo budsho ispombi. Abu ushubimboec isadec abitiombi dasiuidbudpaccosh. Uen podqued uenquebudacpamboec mapino icposh. Ushëbimboec bëtantete bëchamauanquiecposh. Buintad nitsinaid nëdënquiacpamboec isquid-isquidpambo nidte icposh.

² Dada uaidëmpi bëcadotsaid sanamposh. Budash nidtuidposh. Tsiembudcuenshun taë abiuchshun chian dapa mad caid nëtincaquimbi taë opiocshon mananuc tincaposh. Ënapenquioshë icquid niosh.

³ Adashien bëdi noshquiacbimboec nuamboshë cuëdtoposh. Adec cuëdquin chiac abu 7tedec cuëdtonequin ëcbetoneposh Nuquin Papan chiaid chuiquin.

⁴ Aden abu cuëdquin ëcbetonesho tantiaashun: —Abu cuëdquin chiaid dada uanu —gueshobi: —Padi —caposhi Nuquin Papa yacnoshon chuiquin. —Abu cuëdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquo iccombi.

⁵ Adnubien mayan bëda tsiembudcuenshun chian dapa nëtincaquin utsiuchshun mananuc tincaboedën ambibi podò abiucquo cadoposh. —Nuquin Papan isnubi abimbo chuiquidquio nebi —quequin tantiamenuen aden ambibi podò abiucquo cadoposh.

⁶ Adotanquin chuiposhi. —Tantia. Mibi chuinu. ¿Tutsi nidaid uabi yec ëndenquimboshë icpampic? Aidi Nuquin Papa nëbi adquid yec nibëdantiapimbo iquendac. Adquid icquin abitedi uapampic. Abu uashun aidën icquidtedi uapampic. Nidaid uashun aidën icquidtedi uapampic. Acte uashun aidën icquidtedi uapampic. Aden abitedi uaquidën chiaidquio chuinu. Nëbi Nuquin Papan ambi tantiacpadomboen icsambo icquido cuidquimbi abi tantiaquidò abëdi tabadmendac.

⁷ Ëbi padquid mayan bëda utsin shoncate sanamboedën: “Nëbi nainquin shoncanu,” cacpadënquo Nuquin Papan ambi chiampicpadomboen adöendac —queposh mayan bëda chuiquid dapa dacuëdampambo icquid Nuquin Papan matses cuidquin naimpanüda.

⁸ Adnubini abucüësh cuëdquidën chuiposh. —Aid mayan bëdan sanamboed dada uaid bed —cac:

⁹ —Dada uaid beccho —capombi. Adoaquin: —Në bed. Bedshun che. Batambo icboedi min ana mucambo yanendac —caposhi. —Nëid bedshun chiacbimboen Nuquin Papan chiaid cuishonquequin isban-isbanash mucambo yanachimboec Nuquin Papan cuidte tantiaash shubitiadquo mibi yanendac —quequin tantiamenuen aden chuiposhi.

¹⁰ Adoac aid bedshun chiash adquo yanobi.

¹¹ Adquo yansho isun mayan bëdabo chuiquid dapan chuioposhi. —Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabantebëdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bëdabo chuiquid dapan.

11

Nuquin Papan namiaidon daëdshun naid

¹ —Nuquin Papan tantiacpadomboen mimbi chuibanendac —quequin chuishumbic mayan bëda chuiquid dapan piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bëdambo nuadnuc tauinuequin nacnenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta.

² Shubu nuntanquo tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” queshun aid shubu daquënë uaid tambanenda. Aden Edusaden icsa uaquin seta 3tedi matamendac —quequin chuiposhi. —“Muainquo icquin Esusbëdta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi.

³ Adnubini Nuquin Papan chuiposh. —Aden Edusaden icsa uanubi matses daëdquibi ëmbi chuiboedquo chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiapadomboen chuibanendac. Adquid yec: “Matses abitedi icsamboshë icsho isash shubitiadquo iquebi,” quequin icsambo icquid abi icsaid ëmenuec dashcute icsactëcquidquo dasiuidendac —quequin Nuquin Papan chuiposhi.

⁴ Adshobini mayan bëdan chuioposh. —Aido Nuquin Papan oncamaiaid daëd isadaidbo matses tsusedpan chuiampid nendac. “Nuquin Papan bëntsiauc cuëte odibos caid nitsinaid daëd bëdambo icquid iguendac. Ambo-bidi tabote daëd bëdambo icquid iguendac,” quequin chuiampid nendac. “Nuquin Papan Mayanën tantiamiaidquo icquin ambi chiaidquo chuibanendac,” camenuen aden chuiampic.

⁵ Aden abi chuibanasho abi chieshënquidën: “Mibi cuesunenu,” caqui cuesuniadenquo iguendac. Nuquin Papan dayun uaid icquin ana shëcuënuësh

choboedën nibëdquiecnuc pichicachimboen abi cuesunenuequivotedi unës uaindac. Nuquin Papan cuidte tantiamenuen adoendac.

6 Adembidi Nuquin Papan cuidte tantiamenuen Nuquin Papan Mayanën namiaidquio icquin comapenen tantiaquin ismebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte intäcuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

7 Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secaindac. Satanasën namiacpadomboen adoendac.

8 Edusaden yacnoshon cuesun secashun chococainquio iquendac. “Ma cuesun secaid ischitono,” queshun chococainquio icquin podqued ansanendac. Nuquin Icho Esus cuesten dectanacnoshonquio matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cuesun secaindac.

9-10 Aden cuesun secabosh: “Nuqui mëyanquid nëid daëd neque. Chococatiapimbo iquebi,” queshun chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quish cuishonquec abëd icquidobëd menencuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidtedi menencuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

11 Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiascho isash cuishonqueboedobi natia dacuëdec tabadendac.

12 Adnubi Nuquin Papan abucshun cuëquin: “Nëmbo cho,” cac abu ushu datanec cuesun secaboed daëd abuctoendac. Abi chieshënnquidon isnubi adendac.

13 Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatiad,” quecuededendac —quequin chuiposhi mayan bëdan.

14 Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

15 Nuquin Papan uincuemetequido daëd chuibombien mayan bëdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdëncuededposh naden chiec.

—Nuquin Papabëdi aton Mado Esuquidistu abided cuidadec unësaid bëdamboshë iquec.

Abi chieshënnquidon naid ëmeshun aid abentsëcshumbi matses abitedimbonamendac ënenquio icquin.

Abitedishun Icho nec

—quec cuëdëncuededposh.

16 Adashic Nuquin Papa yacnombo icbo-icboec tsadten tabadboedobi tsu-siobo 24tedi icquido: —Mibi bëdamboshë iquec —quequin ismec danëshën tinquebudcuededposh.

17 Adtanequi nadec cuëdëncuededposh.

—Nidaid uabi yec ëndenquimboshë mibi icpampic, Papa.

Nëbi adquid yec nibëdantiapimbo icquid mibi nec.

Abitedishun Icbombo mibi icnuc:

“Ëmbiquen dëniacquin namenu,” Satanasën catiapimbo mibi iquec.

Nadatiambo icquid icquin mimbentsëqui matses abitedimbo mimbi namen-
dac.

18 Nidaid utsi-utsiec yacno tabadquidon abi chuiquidobëdtan mibi
chieshëndenecc.

Mimbi uaidtedi icsa uadenec.

Adsho mimbi tantiacpadënquoio nëbi mimbi cuidendac.

Matses abitedi uincuemetanquin mimbi chiaid niac-niaquec icsaquido
mimbi cuidendac.

Adoshombic mimbi chiaid chuibanquidobëdta mibi tantiaquido abitedimbo
mibi yacno mibëdi mimbi tabadmendac.

Chuiquid dapambobëdta chuiquidpenquoio mibi tantiaquidotedi bëdambo
icmequin mimbi adoendac

—quequin tsusiobon Nuquin Papa chuisho tantiapombi ushquin isachim-
boen.

19 Adshun isquien Nuquin Papa yacnombo con matses isadaidbon Nuquin
Papa tabadte shubu uashunampid shëcniacchobi icposh. Aid shubu nuntan
isaquien Moisesën ambi nacnenaid Nuquin Papan chiaid sandoampid ic-
posh. —Ëndenquimboshë ambi chiampicpadomboen Nuquin Papan ambi tan-
tiaidtedi nainquin naindac —camenuen aden ismeposhi. Aden ëbi ismenu-
bien bed-bedquetanec abu teshquianiachimboec nua cuëdtoneposh. Nidaid
saca-sacaquemoec uëdëqueposh. Ue dapa nuamboshë choacchimboec ue
tsasi choposh. —Nuquin Papambo abitedishun Icbombo nec —camenuen
aden ismeposhi Nuquin Papa yacnoshon.

12

Chidobëdta nisibimboecquid dapa ismiaid

1 Adoshombic Nuquin Papa yacnoshombidi utsitsen
dacuëdampamboecquidbidi ismeoaposhi. Ædoac chido ushë dasiuidacchimboec
bëchamauanquiescho ispombi. Inchëshën ushë tincash tsadposh. Uispa 12tedi
nacnenaid mauete maueposh.

2 Bacuë nua usunec tishtiadtsëcquoio yec shubibud-shubibudposh. —
Isadaidbon chido Esus tishquid nec —camenuen aden ismeposhi.

3 Adnubien nisibimboecquid nuamboshë icquid choposh. Taëchopaidquoio
yec piumboshë icposh. Mapi 7tedi icposh. Pais 10tedi icposh. Aton mapitedi
chuiquid dapachimboec mauete mauëcuededposh. Satanas niosh.

4 Adshumbic nisibimboecquidën aton incuente ënapen icquid uic-
uiccaquin uispa dadpen bedshun nidaidën siabudposh. —Aden Nuquin
Papabëd icquin Satanasën abipadquido utsibo mayan bëdabo icboedo
utsi-utsien yuapampic. Aden yuash aton yuabobëdi nidaidën choshon
matsesetsen icsamete bunquiec —camenuen aden ismeposhi. Adshumbic
chidon tishacsho bacuë penuen aiduidi bëisquin cainuidposh.

5 Adnubien chidon dada bacuë tishposh. Bëdambo icquid matses abite-
dishun Icho ictequidëmpi niosh. Adshobien Nuquin Papan abi yacnombo
buamposh nisibimboecquidën petiapimbo icnuc. Buanshumbic abipadquid
abitedishun Icbombo icmiac. —Aden Satanasën Esus nibëdametiapimbo iquec
—quequin ismeposhi.

⁶ Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquoio seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

⁷ Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquiobi. Nëidic mayan bëdabo icboedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nëidic Nuquin Papabëd icquidombo mayan bëdabo dadpen. Nëidic aido chuiquid dapambo Miqued caid. Aidedi ispombi. Adnubien Satanas nadposh. —Aton yuabo mayan bëdabo cuemiash Nuquin Papa dëniaquec ëbimbo abitedishun icbo yantsiabi —quiash nicantiadquio icposh. Satanas chedo nidaidën nidmiabi icnuc neposh.

⁸ Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidënquoio icquido yec niadenquoio icposh. Adshumbic Miqued chedon nisibimboecquid Satanas chedo nicaposh. Aton yuabobëdta Nuquin Papa yacnoshon nicaposh.

⁹ Nicaquien matses tabadacno nidaidën choec Satanas chedo budbudposh. Eba caid icsamepampid Satanas niosh. Nëbi matses dadpenquioshë icsamequin yuate bunquieci.

¹⁰ Adnubien Nuquin Papa tabadacnoshon anocquidën comapenec onquequin chuibamposh naden chuiquin.

—Aden Nuquin Papan aton Mado Esusbëdtan abi dëniacnuequido dëniacmenquoio icposh.

Nuquin Papa chieshënquidquio icquin abi tantiaquido chieshënquin icsamboen chuishunquid nec.

“¿Esus tantiaquido bëdambo icquidoda nedic? Ëmbi natiamiac aido chieshtot-siash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided ciudadec unësaidbëdi dëniacadiapimbo yec abitedishun Icbombo nec

—queposh Nuquin Papa yacnuësh cuëdec.

¹¹ Adashic padpidec auëshbidi:

—Nëbi ëmbi isac Satanasën Esus tantiaquido chieshtometiapimbo icposh.

Satanasën: “Chieshtomenu,” caqui:

“Padi. Esusën yuambo nebi,” quec chieshtoenuio icposh.

Cuidmenquoio icnuec abided ciudadec unësaid Esus tantiec chieshtoenuio icposh.

Adsho abi chieshënquidon matsesën: “Padi. Esus tantienda. Cueschitomane,” caqui

chieshtoenuio icquin adenuidi Esus tantiasho cuesun secameposh Satanasën aton yua icmiambobi.

¹² Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Ëbitedi cuishonquenuc nidaidën tabadquido matses yec mibi cuishonqueti-apimbo iquec.

Nëshun cuemiac mibi yacno budash Nuquin Papa chieshënquieci Satanas chieshëmënquieci tabadec.

Mibi icsamete bunquieci. “Nëbi Nuquin Papan ëbi cuidquieque.

Abi tantiaquido yuashunchitono,” quec mibi icsamete bunquin mibi nati-ambo icmendac.

Adoac natiaic mibi tabadendac

—queposh Nuquin Papa yacnuësh cuëdec. Aden tantiameposhi.

¹³ Adshumbic ëmbi isadaidbon chido isboed padpiden ismeposhi. Adoac Esus tishquid isadaidbon chido unës uanuen nadancasho ispombi. —Nuquin Papa yacnoshon nicachitoshi —qeshun chieshënquin nisibimboecquid Satanasën aid chido nadancaposh.

¹⁴ Adnubien Nuquin Papan chiqi dapan podobiecquid meniac bedanec aid podombi cuenec matses nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh.

¹⁵ Adnubien nisibimboecquidën: —Aid chido unës uachitono —quequin ambibi ana shëcuënshun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo matses nibëdametiadquio iquec. Adembidi Esus tantiaquido nibëdametiadquio iquec.

¹⁶ Acte dapa chomiachso isun Nuquin Papan nidaid shëcuë uashun aid shëcuën acte nidmiosh chido yacno chiuidenquio icnuc.

¹⁷⁻¹⁸ Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquio icposh. Nuquin Papan chiacpadomboen chieshtoenquio icquin bëdamboen naquido Esus tantiaquido caimbi.

13

Bëdibimboecquid dapa ismiaid

¹ Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëdquiec. Èbiuidtsëqui abitedishun icombo icnu —quequin aton mapitedi bëdada uadaid neposh. Pais 10tedi icposh. Aid paistedi chuiquid dapan mauete paisën dectambampacchosh.

² Aton dada bëdin dadabimboec isadposh. Aton taë uinsadpambo icquid utsi oso caidën taëbimboec isadposh. Ana shëcuë bëdi utsi tëbuchoquidën ana shëcuëbimboec icposh. Adsho isun Satanasën ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasën matses icsamboshë icquid chuiquid dapa icmequin ismeposhi.

³ Adshumbic padpiden ismeposhi. Adoac aid bëdi dapabimboecquid acte uquëducuësh choboedën mapí abentsëc mëmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —qeshun matses abitedishun acte uquëducuësh choboedën chuiquid icsamboshë icquidën chiacpadomboenuidí nabededposh.

⁴ Adshumbic: —Èbi chuiquid dapa namequid mibi nec —quequin Satanas papa caquin matsesën tantiabededposh. —Aden Satanasën namiac ëbi chuiquid dapapadquid utsi nibëdec. Comapenen tantiaquidquio icnuc utsibon nuqui cuesun secatiapimbo iquec —qeshun abi chuiquid dapa acte uquëducuësh choboedtsen tantiaquioposh.

⁵ Aden matsesën tantiaid icquin Satanasën tantiamiacpadomboen Nuquin Papa chieshënquiec: —Nuquin Papa caid nibëdquiec. Èbiuidtsëqui namembi —quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin.

⁶ Aidën Nuquin Papa chieshënquin naden muauaposh. —Nuquin Papa caid nibëdquiec. Abi tabadaidtsen nibëdquiec. Abi yacno tabadquido abitedi nibëdquiec. Ambembi chiaid niosh —quec muaposh.

⁷ Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiapadomboen nameposh. —Matses icsamboshë icquid matses abitedi chuiquid dapa iquendac —quequin ushquin isachimboecnuc ismeposhi.

⁸ Aid caic matses abitedishun: —Nadatiambo icquid nec —quequin tantiaquidac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Ëbëdi tabadmendambi,” quequin chiacmaidombo nec —quequin aden ismeposhi.

⁹ Pabiate cuembo icquin bëdamboen tantia. Esus tantiaquido icsho mibi chuinu.

¹⁰ Nuquin Papan: —Ëbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantiaash mimbi nacpadequi chieshtoenquio icta. Chieshtoenquio icquin Esus tantiaquin ambi chiapadomboenuidi nabanta.

Nidaid shëcuënuësh choboedtsen ismiaid

¹¹ Adshumbic padpiden ismeposhi. Adoac aben icquidbimboecquid utsitsen nidaid shëcuënuësh puduensho ispombi. Obecan paisbimboec aton pais daëd icposh. Satanasën ancanquidquio icmiapadec dacuëdampamboec onqueposh. Bëdambo icquid damianquien muaquin chuibanquidquio niosh.

¹² Adsho isun Satanasën abia chuiquid dapa icmeboedën nidaid shëcuënuësh puduemboed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiapadomboen matses abitedi nameposh naden chuiquin. —Seshuniaid uincuemiondaidën nuqui chuiquid dapan chiaiduidtsëqui natiad —caposh.

¹³ Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpeshun isnubi abucshun abembi taboadaid budmequin ismeposh.

¹⁴ Aden Satanasën namiapadomboen comapenen tantiaquin ismiac matses dadpeshun: —Abimbo caic —quequin abi chuiquid dapa icsamboshë icquidën chiaid nabededposh Nuquin Papambo tantienquio icquin. Abi chuiquid tantimequid nidaid shëcuënuësh choboedën: —Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacnenta —cac matsesën nacnemposh.

¹⁵ Nacnenacsho isun Satanasën namiapadomboen nidaid shëcuënuësh choboedën abi chuiquid dapabimboecnuc nacnemboedi tibocameshun oncameposh. Adoquien nacnemboedquobi chuiquid dapa icsabimboec onquequin: —Ëbi tantiesabo neque. Cuesun secatan —cac yuabon abi chuiquid dapa tantiesabo cuesun secatamposh.

¹⁶ Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquin matses dadpenquio dada uaqin bësiadmeposh nëidtedi. Nëidic chuiquid dapabo. Nëidic chuiquidpenquio. Nëidic dadpen dayun uaquido. Nëidic aton na nibëdquido, Nëidic matses yuabotedi. Nëidic yuapenquio. Aidtedi matses dadpenquioshë dada uaqin bësiadmeposh. Utsi-utsien bëtanteteno bësiadmeposh. Utsi-utsien mëdante

abiucquoio mësiadmeposh. —Acte uquëducuësh choboedën ëbi chuiquid dapan yuabo nec —queshun nameposh.

¹⁷ Adshumbic nidaid shëcuënuësh choboedën chuiposh. —Adec ëmbi chiacpadec siadambo icquido piucquidbëdta mitsana utsi menenda. Ëmbi siadmiaiduidtsëqui mene —queposh. Utsi-utsiec abi chuiquid icsamboshë icquid cuëmëdquid dada uaquin bësiadmiaid neposh. Utsi-utsiec aid cuëmëdaidbimboecquid naden 666 dada uaquin bësiadmiaid neposh.

¹⁸ ¿Ada ëmbi chuiboed tantio? Bëdamboen tantiaquidën: —Abi cuëmëdquidquio chienquio icquin naden 666 chuiquin dada uapac —catsiash. —Adec matses icsamboshë icquidquio chuiquid dapa yansho isun bëdambo icquid danenda —quequin ushquin isacimbocnuc aden ismeposhi.

14

Nuquin Papan cudasënaido ismiaid

¹ Adoshombic padpiden ismiac abided cuidadec unësaid Esusquio macuësh dapa Sion caid mananënquio tabadsho ispombi. Abëdi abi tantiaquido dadpenquio 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaquin bësemiaido niosh. —Adec Esus tantiaquido abëdi tabadendac —quequin aden ismeposhi.

² Adnubien Nuquin Papa yacnuësh ¿midapadpamboec cuëdtoposh? Acte nua chododoquiabcipamboequien niacbiposh. Abu tesquianiabcipamboequien nechitosh. Ten-tencate dapa dadpen icbo-icboen sananquin tentencabcipamboec comapenec cuëdëncuededposh.

³ Adec Esusbëdi macuësh mananënquio tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdta dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunec abided cuidadec unësaid Esus tantiaquidon matsesënuidtsëqui aid cuëdënte chuca tantiec cuëdënosh.

⁴ Aido Nuquin Papa yacno nidabi yec nidaidën tabadnuc matses ut-sibo abitedimbo icsamboeschë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatipimbo icnubi aidombien tantiaquopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh.

⁵ Chieshtoenquio icquin Esus tantiec muesabo icpanëdash. —Adquido iquendac —quequin ushquin isacimbocnuc aden ismeposhi.

Mayan bëda utsi 3tedshun chiaid

⁶ Aido ismëboshombic utsitsen ismiac Nuquin Papan abi yacnoshon uaid mayan bëda uicchun cuenacimboc abuc cuensho ispombi. Bënuatipimbo icquid Nuquin Papan chiaidquio matses chuinnec niosh nëidtedi. Nëidic matsesquio. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinnec niosh.

⁷ Abuc cuenquimbi chuibemposh. —Nuquin Papauidtsëqui tantiata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquio iquec,” quequin tantiata. Nëbi ambi chiaid niac-niacquido cuidquieque. Aidquio tantiata —quequin chuibemposh abuc cuenquimbi.

⁸ Adnubien mayan bëda utsi abuc cuenoaposh. Cuenquimbi naden chuibenaposh. —Shubu dadpen icquid Babidonia caid yacnoquido icpampidobimboec icsamboshë icquidobidi icsho Babidonia yacnoquido caimbi. Aidon uisma uanten danoshcabcimboen matses utsibo abitedi

Nuquin Papa tantiamenquo icquin icsamequioposh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.

⁹ Adnubien mayan bëda utsitsen abuc cuenoaposh. Aidëntsen chuibenoa-posh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh chobero tantiaquin aidbimboecnuac nacnenaaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiapadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac.

¹⁰ Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided cuidadec unësaid Esusënquo mayan bëdabobëdtan isnubi adoendac.

¹¹ Ënenquo icquin adoendac. Aden Nuquin Papa chieshënquidquo tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquo icquin adembi cuidquiendac ënenquo icquin —quequin chuibem-posh mayan bëdan. Aden ismeposhi.

¹² Ëmbi chuiboed tantiaquin mimbi nabocpadomboembi chieshtoen-quo icquin Esus tantiaquin ambi chiapadomboenuidi nabanta. Utsibon chieshënquin: —Padi. Esus tantienda. Cueschitomane —caqui adenuidi ënenquo icquin Nuquin Papabëdta Esus tantiaquiota.

¹³ Adnubi Nuquin Papa yacnuësh comapenec onquequin chuioposhi. —Naden chuiquin dada uata. Chieshëmënuquidon: “Esus tantiec,” qeshun cuesun secaido Esus tantiaquido cuishonquendac —quequin chuiposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiaic tabadtenedobi unësash bëdamboshë iquendac shubitiapimbo yacno tabadec. Aden abi chiapadquiec bëdamboec tabadec unësacsho Nuquin Papan aden bëdamboshë icmendac —quequin chuiposhi.

Intac nua icnuc Nuquin Papan cuidtequid chiaid

¹⁴ Adoshombic padpiden ismiac abu ushunquo Esus tsadsho ispombi. —Abitedishun Icbombo nebi —quec chuiquid dapan mauetempo shocosh nacnenaaid maueshun chështebimboecquid sanamposh.

¹⁵ Adnubien mayan bëda utsin abi yacnuësh choquin comapenec onque-quin Nuquin Papan chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata

¹⁶ —caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

¹⁷ Adnubien mayan bëda utsi Nuquin Papa yacnuëshquiobidi choposh chështebimboecquid sanampamboec.

¹⁸ Adec chështebimboecquid sanampamboec choshobien mayan bëda utsin matses tabadacno cayete dëtsisadaid isquidquo icquid nidaid masiabud-boedën tauite dapa dayunuëshquo choshon comapenec cuëdquin chuiposh. —Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando

¹⁹⁻²⁰ —caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin

cuidnuen Nuquin Papan matses icsambo icquido cho-chomendac. Edu-saden yacno cho-chomeshun ashunquio Nuquin Papan cuidac matsesën intac nuamboshë chididiquëc nua mauanendac. Acte nua chëuëdacbipamboëc cabayon mapi yaction intac chëuëdsho isombi. Ënapenquio quidometedos 300ted cactiombi cuësquec nuamboshë matsesën intac chëuëdsho isombi ushquin isacbimboën. —Aden Nuquin Papan abi chieshënquido cuidendac —quequin ismeposhi.

15

Nuquin Papan cuidtequid 7tedbidi nabanaid

¹ Adshumbic Nuquin Papan cuidte tantiamenuen Nuquin Papa yacnoshon dacuëdampamboëcnic padpiden ismeposhi. Adoac matses natiamëquin cuidquido dacuëdampambo icquido 7tedi icsho isombi. Mayan bédabo niosh. —Aidon ambi chiacpadomboën ënquimbi matses icsaido cuidsho isash Nuquin Papa nëish bédanendac —quequin tantiaquin ispombi.

² Nuquin Papa yacnobidi chian dapa icposh. Actepenquio yec acteactesëcquio isadposh. —Nuquin Papa icsaquido cuidquidquio nec —camenuëc tied nëdënquiacbimboëc aid bëntse isadposh. Aid cuëmambi Esus tantiaquido tabadposh. Satanasën namiaidën acte uquëduësh choboedën chuiquid dapa icsamboshë icquidën: —Yuanu —cauidaido niosh. Chuiquid dapa icsamboshë icquidbimboëcnic nacnënaid tantiatiapimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaidbimboëcquid 666 dada uaquin siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuëdëmec cuëdëncuededposh.

³ Nuquin Papan namiaid Moises: —Nuquin Papan nac ëbi chieshënquidon ëbi cuesun secainquio icposh —quec cuëdëmpampicpadec cuëdëncuededposh. Nuquin Papa bédamboën ismenuëc abided cuidadec unësaidquio Esus aton Papabëdta tantiec cuëdëncuededposh naden chiech.

—Nadatiambo icquin nabanquidquio mibi nec, Papa.
Abitedimbo uaquidquio yec abitedishun Icbombo mibi nec, Papa.
Matsesën naid abitedi tantiaquidquio abimbo chuiquidquio mibi nec, Papa.
Mimbi naid bédambo icnuc dacuëdampambo mibi iquec, Papa.
Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

⁴ Matses abitedishun: “Nuquin Icho dacuëdampambo icquid neque. Ambi chiacpadomboën nanuna,” mibi capashun, Papa.
Mibiuidtsëqui icsaisambo nec, Papa.
Adquid icquin mimbi chiacpadomboën icsaquido cuidquimbi bédambo icquido mimbi bédamboën isendac.
Adsho isun nidaid utsi-utsiec yacno tabadquidon matses abitedishun: “Mibi bédambo iquec. Con Icbombo mibi nec,” caindac
—quec cuëdëncuededposh Esus tantiaquido.

⁵ Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadacnombo tantiamenuen aden ismeposhi.

⁶ Auëshquio Nuquin Papan chiacpadec ëmbi isboedo mayan bédabo 7tedi cho-choposh. Matses icsaquido cuidquido niosh aido. —Nuquin Papan yuabombo nec —camenuëc dashcute nac-nacquio icquid dasiuidcuededash dashcute bëshpiu-bëshpiumbo icquid shictonquecuededposh.

⁷ Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacnënaid icbo-icboën menëbamposh.

Unëstiapimbo icquidën Nuquin Papan nëishënquioshon cuidte cushtoaid maspanëmpi niosh.

⁸ Adnubien Nuquin Papa tabadaid nuntanuësh pushud-pushudpambo icposh. Adec dacuëdampamboecsho isash Nuquin Papa chuinuec puduedti-apimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin —camenuen aden ismeposhi.

16

Maspanëmpin cushtoaid

¹ Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

² Adoaquien abentsëcshun ambi bedboed maspanëmpin cushtoaid nidaidënsnun chiuimposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaidquio icsamboshë icquid tantiaquin abibimboecnuc nacnenaaid tantiaquido yec aton icbo cuëmëdquid dada uaquin siadmiaido icsho aden cuidposh.

³ Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intacbipamboecnuc intacuac. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoaid acte utsitedi nëchiuimbenepposh. Nëchiuimbeniac aidtsen intacposh.

⁵ Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

⁶ “Ëmbi chiaid chuibanquidobëdta ëbi tantiaquido nua intac icnuc chieshëmënsquidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

⁷ Aden acte dayun uaquidën chuisho tantiaash Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

⁸ Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadec matses badedbadedquieq ushën pichiebudneposh.

⁹ Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash

ambi chiacpadec bēdamboec tabadnuna —quetiadquidēmbi chieshēnquin abi cuidquidquio Nuquin Papanbo chushcabededposh.

¹⁰ Adnubien utsintsen ambi bedboed maspanēmpin cushtoaid chiuimbenequin acte uquēducuēsh choboed chuiquid dapa icsamboshē icquid ambi namiaidobēd tabadacno chiuimbenequid. Adoaquien inchēshpōsh inchēshquio yec. Badiadenquio icpōsh. Adshō isash matses abitedi natiambo dacuēdcuededpōsh.

¹¹ Adec dacuēdcuededec: —Ambi chiaid niac-niacsho Nuquin Papan nuqui cuideque. Nuqui icsaid ēnash ambi chiacpadec tabadnuna —quetiadquidēmbi: —Natiambo chiuēmianec Nuquin Papa icsambo iquec —qeshun Nuquin Papa chushcabededpōsh.

¹² Adnubien utsintsen ambi bedboed maspanēmpin cushtoaid acte dapa Eupēdates caid nēchiuimpōsh. Adoaquien Eupēdates caid acte nua icboedi nibēdquio yec uesadpōsh. Ma matses utsi-utsiec aton chuiquid dapabobēdi tsidadash Esus chedo cuesun secanuec ushē choacmiuēsh choquin ma potenuequin aden acte uesadmepōsh.

¹³ Adec aid matses cho-choabi icnuc ushē choacmishun chometequidēmpi naden ismepōshi. Coqueshbimboecquid podobitsi icsa 3tedi ana shēcuēnuēsh cho-choshō ispombi. Nēdic nisi dapabimboecquid Satanasēn ana shēcuēnuēsh choquid. Nēdic acte uquēducuēsh choboed chuiquid dapa icsamboshē icquidēn ana shēcuēnuēsh choquid. Nēdic nidaid shēcuēnuēsh choboedēn Satanasēn mauamequin oncameboedēn ana shēcuēnuēsh choquid. Aidtedi choshō isombi.

¹⁴ Satanasēn yuabo icquin comapenen tantiaquin nacnenquido niosh. Matses utsi-utsien abi chuiquid dapabobēdtabi namenuc niosh. —Aidon namiac chuiquid dapabo abitedi aton yuabobēdi tsidadash ushē choacmiuēshquio cho-choendac. Nuquin Papa chieshēnquin Esus chedo cuesun secanuec adec cho-choendac. Nuquin Papan tantiacpadēnquioabi adendac —camenuen mayan bēdan aden ismepōshi.

¹⁵ Adnubien Esusquio cuēdpōsh. —Tantia. Chuinu. Mimbī: “Nēbimbobi aid choec,” cacmaidquieni choendac. Ushenquio yacimboen ēbi ēnenquio icquin tantiec: “Nēbien Esus chochitec. Choshon nuqui icsaid abitedi chuiquin cuidnushe. Bēdamboec tabadnuna,” quec bēdamboec tabadta. “Nēbi nidnu. Nid,” cac: “Ai, con na ēnden nacnenombique. Baded nid,” quiacbimboec icta ēbi cainec —quepōsh Esus.

¹⁶ Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobēdi cho-choshō ispoc. Nidaid Isadaid caid yacno macuēsh icsho isadaidbon onqueten Admaquedon caid yacno cho-chopōsh Esus chedo cuesun secanuec.

¹⁷ Adnubien maspanēmpi bedboed utsintsen ambembi chiinquin Nuquin Papan cuidte ēnquimbi ismepōsh. Ambembi chiuinubien abi tabadacnuēshquio Nuquin Papa cuēdpōsh. —Padi. Nēbi ēmbi tantiacpadomboen ēnquimbi cuidec —quepōsh.

¹⁸ Adnubien abu bed-bedquetanepamboec abu tesquianenuc natiamboshē shēc-shēcquemboec nidaid uēdē-uēdēquiampōsh. Nuquin Papan tauamboen matses uambi adec nidaid uēdēquiambo. Bēdiactsec nidaid uēdēquedenedi acquimboec uēdēquiampōsh.

¹⁹ Adnubien matses dadpen yacno Babidonia caid yacnuēsh nidaid abichobi icboedi 3tedi yanec tiadbudnepōsh. Aden Nuquin Papan: —Anocquido icsamboshē icquido nec —quequin Babidonia caid yacnocquido uesquin cuidquipōsh. Adec nidaid uēdēquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudnepōsh.

20 Nidaid uedëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh.

21 Abucuëshquio ue dapa choacimboc ue tsasi nuacquid dapa quidos 50 icnuc yuë tanaid dadpenquio paëdbudnequimbi matses fish-tishbudneposh. Aden ue tsasi dapan mëyansho isun padenquio ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isacimbocnuc aden ismeposhi.

17

Chido chishpidabimboecquid ismiaid

1 Adshumbic maspanëmpin icquid chiuimboedën abentsëcshun chuiamposhi. —Isec cho. Mimbi isboed Babidonia caid yacnoquido cuidte mibi ismenu. “Babidonia caid yacnoquido matses utsibo dadpenquio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu.

2 Aido icsamboshë iquec. Matses utsi-utsien abi chuiquid dapabobëda uisma uanten danoshcachimboen Nuquin Papambo tantiamenquio icquin ambi chiaid niac-niacmequioposh. Aido cuidsho isec cho —queposh.

3 Adshumbic ushquin isacimbocnuc ismeposhi. Nuquin Papan Mayanën tantiamiac masiuidquio yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibëdquio iquec —quequin uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquio nec —quequin aden aben icquid ismeposhi.

4 Aid catsadquid chido dashcute piumbo icquidbëd umumbo icquid da-siuidposh. Shöcosh piu nacnenaïd chedo cuënotempi nac-nacquio icquid chedo payuec aidbidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquiduidquio icposh. —Chido chishpidabimboec Babidonia caid yacnoquido icsamboshë iquec. Uisma uanten danoshcachimboen: “Nuquin Papa caid nibëdquiec,” quequin tantiamenquid matses utsibo dadpenquio icsamequiendac —camenuen aden ismeposhi.

5 Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnoquido bëdambo icquid damianquidi icsamboen tabadmequido nec —quequin dada uaid icposh.

6 Aid chido paëmbo icquid acachimboec Esus tantiaquidon intac acash tantiadenuio yamposh. —Babidonia caid yacnoquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiopequini ique? —quebudquiobi.

7 Adbudquioshobini aid mayan bëdan: —“Tantiadenquio iquec,” ¿quecta ique? Tanta. Chido chishpidabëda abi catsadaïd aben icquid chuinu.

8 Mimbi isboed aben icquid icsamboshë icquid ictenedi nëbi nibëdec. Yuecshun Satanasën abi tabadacnoshon padpiden chomendac. Adoacsho yuecshun Nuquin Papan chian anëdënquiacno nësecaindac. Aden cuidabi Satanasën chomebocsho isun Nuquin Papa tantiesabon: “Comapenen tantiaquidien nechitec. Matses nibëdanëdaïdi uincuenashien choachitosh. Aidi tantianu,” caindac. Matses uabi icquin Nuquin Papan: “Èbi tantiaquido iquendac,” cacmaidonquio adoendac —queposh mayan bëda.

⁹ Adshumbic padpiden chuiposhi. —Tantia. Ëmbi chuiboed bēdamboen tantiamenuen chuinu. Naden tantiamenuen aben icquidēn mapi 7tedi icquid mibi ismiombi. “Babidonia caid yacno matses icsa uaquido tabadacno macuēsh dapa 7tedi iquec,” quequin tantiamenuen: “Chuiquid dapabo 7tedbidi iquendac,” camenuen aid mapi 7tedi mibi ismiombi.

¹⁰ Aid chuiquid dapabo 5tedi nibēdnubi utsi abi iquec. Nēbi aidēn aton matses namec. Utsitsen choendac. Choshon aton matses nametantsequi badedquio nibēdanendac.

¹¹ Nibēdanēdaidi choashic ëmbi ismeboed acte uquēducuēsh choeboed chuiguid dapa icsamboshē icquidquio iquendac. Aidēn ëmbi chuiboedo chuiquid dapabo 7tedishun namiachimboen aton matses icsamboenshē namendac. Adoacsho isun Nuquin Papan icsaido cuidquiacno nēsecaindac —queposh mayan bēda.

¹² Adashic abi onquec: —Naden tantiamenuen aben icquidēn pais 10tedi icquid mibi ismiombi. Chuiquid dapa utsibo 10tedi iquendac. Nēbi aton matses namiabi iquec. Padabi. Adquido yanendac. Satanasēn acte yacnuēsh choeboedbēda chuiquid dapabo icmiac matses icsamboenshē namiash yuec tabadabi badedquio nibēdanendac.

¹³ Nibēdanabi icquin aidon acte uquēducuēsh choeboed abi chuiquid dapambo icmendac. “Aidēn namiac abi tantiaquidobēda Esus nuquitedishun cuesun secatsiac nibēdquio icnuc,” queshun aden icsamboshē icquid abi chuiquid dapa icmendac.

¹⁴ Aden Esus chieshēnquidon: “Chieshtomenu,” cac Esusën yuaido abi tantiaquidotedi chieshtoenquio iquendac. Aton Icho Esusën abided ciudadec unēsaidēn namiac chieshtoenquio iquendac. Aden abi tantiaquidobēda chieshēnquin cuesun secanuec cho-chosho isun Esusēmbi cuesun secaindac. “Ëbien matsesën Icbombo nec,” quetanquin adoendac —queposh mayan bēda.

¹⁵ Adashic padpidec: —“Nidaid utsi-utsiec yacno tabadquido dadpenquio Babidonia caid yacnocquidon icsamendac,” quequin tantiamenuen chido chishpidabimboecquid acte dapa bēntse tsadsho mibi ismiombi.

¹⁶ Aden Babidonia caid yacnocquidon nasho isun mimbi isboed chuiquid dapa icsamboshē icquidēn abēdan chuiquid 10tedi icquidbēdan Babidonia caid yacnocquido chieshēnendac. Aden chieshēnquin cuesun secatanquin shububēdtabi nēdēncaindac nibēdquiecnuc.

¹⁷ “Ma Babidonia caid yacnocquido uesquin cuidnu,” quequin ambi tantiapadomboen Nuquin Papan aden acte uquēducuēsh choeboed chedo chuiquid dapabo icmendac.

¹⁸ “Matses utsi-utsien chuiquid dapabo aton matsesbēdtabi yuaquid abi iquec,” quequin mibi chido chishpidabimboecquid nēbi ismiombi —quequin mayan bēdan chuiposhi.

18

Nuquin Papan Babidonia caid yacnocquido cuidaid

¹ Aden Babidonia yacnocquido cuidte chuisho tantiaboshombic mayan bēda utsi Nuquin Papa yacnuēsh abucuēsh budsho ispombi. Nuquin Papan icmiacpadquid mayan bēdabo chuiquid dapa yec bēchamauanquiecposh.

² Choshombic nua cuēdqin chuiposh. —Babidonia caid yacnocquido Nuquin Papan uesquin cuidquendac. Aden cuidac matses nibēdquiecnuc abi tabadtenecombo podobitsuidpambo tabadendac. Ambobidi edesteuidquio tabadendac.

³ Babidonia caid yacnocquidon matses utsibo abitedimbo abi chuiquid dapabobêda Nuquin Papa tantiamenquo icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquo icposh. Adsho Nuquin Papan cuidquiendac –quequin mayan bédabon chuiposhi.

⁴ Adnubien Nuquin Papa abucueësh onqueposh. –Tantia, Esus tantiaquido. Mibitsen chuinu. Babidonia caid yacnocquidon naccpadomboen nainda. “Aidobêdi icsasho êbitsen cuidquionoshe,” qeshun aidon namiacpadomboen nainda. Auëshquio niqueta –quesho tantiombi.

⁵ Nuquin Papa yacnoshombidi utsin chuiposh. –Ënêdenquo yec icsauidequi icsho isun ambi tantiacpadomboen Nuquin Papan cuidquiendac.

⁶ Babidonia caid yacnocquidon matses utsibo dadpenquo icsamequiosh. Aden icsamequido icsho Nuquin Papan nêbi nêishquioshon uesquin cuidquiopashun –queposh mayan bêda.

⁷ Adashic abi onquec: –Babidonia caid yacnocquido cuidtequido nec. Ambi naiduidi naquin aton na dadpenquo bedash: “Aidtedi dayun uaic bédambo iquebi,” quepec Nuquin Papan cuidte tantienquo yequi. Adsho tantiaashun: “Natiambo icnuc comapenen cuidquiopashun,” caimbi. Otacquo tantiec: “Nuquin matses yuabo dadpen icnuc nuqui bédamboec tabadec. Chido niante bënë unêsaid mëyadacimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec.

⁸ Adsho ambi: “Nêbi êbi cuidec,” cacmaidênquo cuidendac. Nuquin Papanquo abitedishun Icbombo icquin comapenen tantiaquin nacnenguidquo icquin badedquo cuidquiendac. Aden dadpenquo unês uabudniacsho isash natiambo sedenquecuededendac. Aton pete nibêdquiecnuc natia bunendac. Aton shububêdi dadpenquo nêdênquendac –queposh mayan bêda.

⁹ Adashic abi onquec: –Adec Babidonia yacnuësh nêdênquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac.

¹⁰ “Tantia. Nuqui tantiaido sidquebudneque,” quec uinte paêdtampamboec dacuêdtanash uanoshon isec tabadendac. Adec tabadec: “Aido unêsquimboshê iquec. Aton matses aton yuabobêdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unêsquimboshê iquec. Badedquo uesquin cuidquiopac,” quec sedenquecuededendac Babidonia caid yacnocquido tantiec –queposh mayan bêda.

¹¹ Adashic abi onquec: –Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nêbi adquid nibêdquiec. ¿Tsuntsimbini êmbi meniaid cuidquin piucquid menepatsiashba?” quec sedenquecuededendac.

¹² Aidobidi: “Nadquid Babidonia caid yacnocquido menequin piucquid dadpen bedtenembi. Nêdic shocosh piu. Nêdic shocoshquo. Nêdic casêdubimboecquid cuênote bédambo icquid. Nêdic dashcute bédambo icquid. Nêdic dashcute piumbo icquid. Nêdic dashcute unumbo icquid. Nêdic sêntebimboecquid nacnenaïd. Nêdic aben icquid edepanten shêta nacnenaïd. Nêdic cuête utsi bêdaïdquo nacnenaïd. Nêdic shocosh utsi nacnenaïd. Nêdic cuênote nac-nacquo icquid nacnenaïd. Piucquid dadpen menequin adquidtedi Babidonia caid yacnocquidon bedpadenec.

¹³ Utsitsen dadpen bedpadenec. Nêdic batambo icquid sabimboecquid. Nêdic bédambo nuadte. Nêdic bédambo nuadec danoshquete. Nêdic acte

paëmbo icquid. Nèidic bëchi. Nèidic pan nacnenteguid. Nèidic nëish yua baca caid. Nèidic nëish yua utsi obeca caid. Nèidic nëish yua cabayo caid. Nèidic matses antsadsho cabayon nimbanquin buante. Nèidic ambi chonoo uatequido matses ambi ampequin bedaido dadpen. Babidonia caid yacnoquidon aidtedi dadpenquio bedtenesho aton piucquid dadpen bedpadenembi,” quependac nidaid utsi-utsiec yacno tabadquido –queposh mayan bëda.

14 Adashic abi onquec: –Abi piucquid menedenedèn dayun uaid nibèdanesho isash: “Aid matses bunaidquio ambi dayun uaid pete nibèdquiec. Ambì dayun uaid dashcute bédambo icquidbéd aton na utsi dadpen abitedi nibèdquiec,”

15 quiash natiambo dacuèdec uanoshon isec tabadec sedenquecuededendac abi piucquid menedenedo tantiec.

16 “Aid matses tantiac unèsquimboshë iquec. Matses dadpen yuaquin matses dadpen namepadenec. Aton matses dashcute bédambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casèdubimboecquid shocosh piu nacnenaid payudenec. Utsibic casèdubimboecquid utsi payuec mèsiuidtenec. Adec: ‘Con na dadpenquio icnuc bédamboec tabadebi,’ quepadenec Babidonia caid yacnoquido.

17 Adsho isun Nuquin Papan abi ushëmbi cuidquiac ambi dayun uaidbéd aid matses badedquio nibèdanac,” quec sedenquecuededendac abi piucquid menedenedo tantiec. Adechidi nidaid utsin icquidotsen sedenquecuededendac. Nèidic cano dapa dancha icbo. Nèidic dancha icbobéd nidquido aton yuabo. Nèidic icbo piucquid meniash dancha antabèdtoquido. Nèidic nuècquid bedshun piucquid bednuen menequido. Aidtedi uanoshon isec sedenquecuededendac.

18 Nèdènquec pushudtonesho uanoshon isash: “Adquido utsi nibèdec,”

19 quiash natiaquec sedenquecuededendac. Adec shubiec: “Èbipadquid dancha icbon bëaidtedi bedshun piucquid dadpen menedenedo tantiac unèsquimboshë iquec. Is. Cuidquiac badedquio nibèdanaque,” quec sedenquecuededendac –queposh mayan bëda.

20 Adashic mayan bédabidi: –Èbien cuishonquendac. “Nuquin Papa yacno tabadquidotsen èbèdi cuishonque,” quequin chiendambi. Esus tantiaquido chuiquinc Esusbéd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshènquin natiamicpadomboen mibi chieshènquido Nuquin Papan uesquin cuidquioshe,” quequin chiendambi –queposh mayan bëda.

21 Adnubien mayan bëda utsin uidènquio icquidènquio nidaid moco nuacquid dapa yuèmboshë icquid cadotanquin acquimboen acte nènebidaanquimbi chuiposh. –Èmbi acquimboen nènebocpadomboen Nuquin Papan Babidonia caid yacnoquido uesquin cuidquiendac nibèdquiecnuc.

22 Adoac aido ictenecnombo nadimbo iquendac. Ten-tencate tencainquio iquendac. Utsibobic cuèdènquio iquendac. Utsibombic shoncate shoncainquio iquendac. Cuète chëshun nacnenquio iquendac. Piacbo macuesenquio iquendac. Nadimboshë iquendac.

23 Tabote taboaid nibèdendac. Dada aton chido ambi nèbi bedaidbèdi mamènquio iquendac. Nibèdec. Nadimboshë iquendac. Adsho isash utsi: “Babidonia caid yacnoquidon aton piucquid bednuen comapen tantiaquin ambi naiduidi napadenec. Aden naquin ambi icsamboen tantiaid matses utsi abitedi adembidi tantiamequin icsamepadenec,” quen-dac.

²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac –queposh mayan bëda.

19

Chieshënquido cuidacsho isash cuishonquaid

¹ Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquio Esus tantiaquido dadpenquioshë comapenec cuëdëncuededposh.

–Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided cuidadec unësaid tantiasho matses bëdamboen isec.

² Muesambo icquin ambi chiacpadomboen naquidquio nec.

Abi tantiesabo ënëdenquio yec icsauidequi icsho cuidquidquio nec.

Adquid icquin: “Icsamboshë iquec,” quequin matses utsibo icsamequido Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh

–quec cuëdëncuededposh.

³ Adashic padpidemboec:

–Nuquin Papa bëdamboshë iquec.

Is. Pushud-pushudpambo icnuc nëdënaquin Babidonia caid yacnocquido uesquin cuidquioshe

–quec cuëdëncuededposh Esus tantiaquido dadpenquioshë.

⁴ Adsho tantiashe Nuquin Papa chuiquid dapan tsadten tsadnuc abi dacuenadec tabadquido: –Nuquin Papa Nuquin Icbo nec –quequin ismenuec danëshën tinqebudcuededposh. Adec tinqebudcuededequi: –Abimbo caic. Nuquin Papa bëdambo iquec –quecuededposh dadanobi ëshëcquido 4tedi icquido tsusitob 24tedi icquidobëdi.

⁵ Adashic auëshquibidi abentsëc cuëdposh.

–Nuquin Papa matses uaquidquio yec bëdamboshë iquec, canuna.

Nuquibi abi tantiaquidtedishun: “Nuquin Papa bëdamboshë iquec,” canuna. Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna

–queposh.

Esusën abi tantiaquido beduante chiaid

⁶ Adsho tantiashe abu tesquianiachimboec acte nua chododoquiachimboec Nuquin Papa yacnocquido dadpenquio cuëdëncuededposh.

–Abi chieshënquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

⁷ Nuquin Papa tantiec cuishonquenuna. Nuquin Papa bëdamboshë iquec.

Dadan aton chido buntacquio beduanacimboen abided cuidadec unësaid Esusën abi tantiaquido beduanashun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacenëmëdquiacimboec:

“Nëbien con Icbo chochitec,”

quish Esus tantiaquido bëdamboec tabadec.

⁸ Abi tantiashe Nuquin Papan bëdamboen isaïdo yec abi icsaid ënash:

“Nëen con Icbo chochitec,” quiash bëdamboec tabadec.

Aden abi tantiasho Esusën dashcute chuca ushumbo icquid dasiuinachimboen abitedi icsaisa icmendac
—quec comapenec cuëdëncuededposh.

⁹ Adnubi mayan bëdan chuioposhi. —Ëmbi chuibocpadomboen dada uata. “Isadaidbo aton chido bedquin aton matses cho-chomiash pemec bëdamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuishonquequiec tabadendac,” quequin dada uata. Abimbo caimbi. Nuquin Papan chiaidquio chiec nebi —queposh mayan bëda.

¹⁰ Adsho tantiashini Nuquin Icho danec ismenuec danëshën tinquebuduidpoc. Adshobini. —Ëbi aden ismenda. Nuquin Papauidtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobëd Esusën yua nebique. Ëbi aden ismenda —queposh mayan bëda.

Cabayo ushu catsadquid bëdamboshë icquid

¹¹ Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobëd cuëshëtiapimbo icquid yec ambi chiapadomboen naquidquio Esusquio nec —quequin tantiombi. Ambi chiapadomboen icsaido cuidquidquio icquin icsaido cuesun secanuec niosh.

¹² —Matsesën ompodëmëdiapimbo icquidquio nec —camenuc cuëte isquidquio icquidbimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bëdada uadaid tantiadenucno icposh. Utsibon tantiatiapimbo icnuc ambentsëqui tantiate niosh. —Nuquin Papabëdan Esusën naidtedimbo matsesën tantiatiapimbo iquec —camenuc adec bëdada uadaid ismeposhi.

¹³ Abi cuëmëdquid utsiembi tantiatsëccoc. —Nuquin Papapadquidquio yec abi tantiamianquid nec —quequin cuënaid niosh. Aton dashcute bëntse icquid cuidaidën intaquën punachimboec piumboshë isadposh. —Abi tantiesabo cuidquidquio nec —camenuc aden ismeposhi.

¹⁴ Esus bëyuc nidnuc abi tsibanec abi tantiaquidobëd mayan bëdabo cabayo ushucquidquidquio catsadcuededec cho-choposh. Icsaisa icmiaido yec dashcute ushumbo icquid bëchish nibëdquidquio dasiuidcuededposh.

¹⁵ Abi bëyucquid ana shëcuënuëshquio chështe cuënumbo icquid cueshqueposh. —Ambi chiapadomboen matses icsaido abitedi cuidquidquio Esus nec —camenuc aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiapadomboen naquin shancuinbimboecquid uba caid nua ëné icnuc tish-tishacbimboen nua intac icnuc cuesun secaindac.

¹⁶ Aton dashcute bëntse icquidën abi cuëmëdquid utsi dada uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bësusduidquid yacnombo adembidi dada uaccosh.

¹⁷ Adnubien ushë mëducquio tabadquin mayan bëda utsin edeste chedo abuc cuen-cuencho comapenec cuëdquin chuiposh. —Nuquin Papan cuidquin cuesun secaidon nami chec cho-cho.

¹⁸ Ëmbi chiapadec cho-choshon matsesën nami mimbi nua tëpuisquin chendac nëidtedi. Nëidic matses utsi-utsien chuiquid dapabo. Nëidic sondado chuiquid dapabo. Nëidic dada cuesabo. Nëidic cabayo chedo abi catsadquidobëdtabi. Nëidic matses utsibo abitedimbo. Nëidic matses yuabo. Nëidic matses yuapenquio. Nëidic bacuëbo. Nëidic caniaido abitedi.

Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

¹⁹ Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobëdta cuesun secanu —caqui

²⁰ cuesun secadenquio icposh. Adshobien Esusën acte uquëducuësh choboed chuiquid dapa icsamboshë icquid bedposh. Adotanquimbic aid tantiaquid nidaid shëcuënuësh choboed Satanasën oncamaidtsen bedposh. Aid comapenen tantiaquin ismequin muaquin abi chuiquid dapan icsamboshë icquidë chiapadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabëdta bedshun unës uabi chian dapa ënëdenquio yec anëdenquequid icsamboshë nuadquidquio nësecaposh.

²¹ Adshumbic Esusën ana shëcuënuësh chështe cuënumbo icquid cueshquequidën: —Ëbi chieshënkuidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshënkuido nibëdamendac —camenuen aden ismeposhi.

20

Satanas uidën uaid

¹ Adshumbic padpiden ismeoaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaaid dapa sanamposh.

² Adshumbic Eba icsamenuc nisipampid Satanasquio bedposh. Bedtanquimbic shocosh bucubimboecnuc nacnenaaidën ambi sanamboedën uidën uaposh.

³ Uidën uatanquimbic aton yuabo uidën uacno shëcuë aneposh. Adotanquimbic shëcuë bëtashquioposh puuentiapimbo icnuc. Seta dadpenquio 1000tedi matameshun bëtashte chicshun Satanas cuemenuen adoposh. —Aden seta 1000tedi matamiabi icquin abi uidën uactedembi matses muauaquin icsametiapimbo iquec —queshun chicten bidiacquin uidën uaquiposh. Aden ismeposhi.

⁴ Adshumbic utsitsen ismeoaposhi. Adoac chuiquidën tsadten icho-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choboed chuiquid dapabëdta abibimboecnuc nacnenaaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadiapimbo icquido niosh. Utsibic mësiadiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiac tabadposh.

⁵ Unësaidotedi uincuemiampo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh.

⁶ Adnubien tauaquin uincuemiampo bédambo yec cuishonqueposh: —Padpidec unëstiapimbo iquebi —quiaş. —Adquid icquin Nuquin Papan yuabo yec: “‘Esusbéd Nuquin Papa bédamboshë iquec,’ canuna,” quequin chianequid nendac. Aid seta 1000tedi matamequin Esusbédambi utsibo bédamboen namequid nendac —quequin aden ismeposhi.

Satanasquio chian anëdënquequid nëniaid

⁷ Adshumbic aidtediquio seta 1000tedi matameshun uidën uaid chicquin Satanas cuemendac.

⁸ Adoquien matses icsamenuec muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëte podotedi dadpenquioshë.

⁹ Aidtedi tsidadash cho-choaş Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac.

¹⁰ Adshumbic aid icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anëdënquequid Satanastsen nënendac. Adoac aid ënëdenquio yec natiamboshë iquendac. Aden ismeposhi.

Icsambo icquido cuidte chiaid

¹¹ Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matësën naidtedi chuibanquin Nuquin Papan icsambo icquido cuidendac —camenuec adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec.

¹² Nuquin Papa yacno unësaido uincuemiampo abitedimbo tabadposh. Adnubien bëshunenquio icquin dada uaten dada uabanachimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comape-nen cuidnun aden chuibamposh.

¹³ Unësaido abitedi icposh. Utsi-utsiec unëşacsho chian dapa mad caid nëniaid uincuemiampo niosh. Utsi-utsiec nidaidën chococaid uincuemiampo niosh. Adsho aidon naidtedi Nuquin Papan chuibamposh.

¹⁴⁻¹⁵ Adshumbic Esus tantiesabo icsho documento nibëdquidbimboecsho abi yacno tabadmenquio icquin chian dapa anëdënquequid uesquin nësecabamposh. Aden Esus tantiesabo nësecan unëştequido utsibo nibëdposh. Esus tantiesabo aton dada unëşan abi tantiate tabadacno utsibo tabadenquio icposh. Adnubien Esus tantiaquido Nuquin Papa yacno tabadec unëstiapimbo icquidoudiquio icposh. —Adquid iquendac —quequin aden ismeposhi.

21

Nuquin Papabëd tabadaidquio

¹ —Esus tantiesabo chian anëdënquequid nësecaindac —quequin ismeboshombic padpiden ismeoposhi. Adoac abu chucambo icsho ispombi.

Nidaidtsen chucambo icposh. Abubëdi nidaid shëni nibëdnuc utsi chucambo icquiduidquo icposh. Ënden iccondaid chian dapa mad caidtsen nibëdposh.

² Adnubien Esusbëdi Nuquin Papa tabadaidquo abichobi Edusaden chuca caid abucuësh budposh. Chido nëbi bedboedën aton bënë cuishoncamiacimboec cuishoncamianquid yec bëdamboshë icposh.

³ Adnubien Nuquin Papa tsadacnuëshquo comapenec cuëdposh naden chiec. —“Con matses nec,” quiash nëbi Nuquin Papa matsesbëdi tabadendac cuëshëdenquo yec. Adsho isun aton yuabo icquin matses abitedishun: “Nuquin Icbombo nuqui tantiaidquo nec,” caindac.

⁴ Ambo Nuquin Papan abitedi chuca uacnombo aibdëdi tabadec matses shubitiapimbo iquendac bëun uacimboc. Nidaid shënin tabadec abitedi unëstequiduidquo icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindambi bëdamboshë icnuc —queposh Nuquin Papa Esusbëdi. Adshumbic ëbi chuiquid. —Ëmbi aden chuiquid dada uata. Ëmbi muesambo icquin abimbo chiaid nec —queposh Nuquin Papa Esusbëdi.

⁶ Adashic Nuquin Papa padpidec onquec: —Ëmbi chuiquid nainquin naindambi utsibon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi naindambi. Adquid icquin acte bunacimboec ëbëd tabadte bunquidon con Mado Esus tantiasho ëbëdi tabadmendambi.

⁷ Satanasën: “Chieshtomenu,” cauidaido Esusbëdta ëbi chieshtoenquo icquin tantiaquido ëbëdi tabadmendambi bëdamboshë yacnombo. Ëbi papa casha: “Ai, con mado mibi nec. Con champi mibi nec,” caindambi.

⁸ Adshumbic utsibo chian dapa anëdënquequid icsamboshë nuadquid nësecaindambi. Nëidtedi icsamboshë icquido adoendambi. Nëidic ëbi bëdiactsc tantiauidtsëcboedobi chieshëmënuquidon: “Cuesnu,” cac chieshtosh tantiesanoaido. Nëidic Esus tantiesabo abitedi. Nëidic icsamianquido. Nëidic chieshëmëneccuesunianquido. Nëidic dada aton dada utsibëdi chichudnanquido. Nëidic aton chidopenquo chudquido. Nëidic aton bënëpenquo chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muuanquido. Aidedi chian dapa anëdënquequid nësecaindambi —queposh Nuquin Papa.

Abi tantiaquido Esusbëd icte chiaid

⁹ Adnubien mayan bëdan Nuquin Papan matses cuidte cushtoaid chuiquid abentsëc choshon chuiquid. —Isec cho. Chido nëbi bedboedën aton bënë cuishoncamiacimboen abided ciudadec unësaid Esus cuishoncamequido tabadaid mibi ismenu. Cho —caphoshi Esus tantiaquido ismenuen.

¹⁰ Adshumbic Nuquin Papan Mayanën tantiamiac ushquin isacimboen isombi. Mayan bëdan ëbi buanquin ispombi. Aden buanshun macuësh dapa mananënquo tsadumposhi. Adoac anoshon isquien abucuësh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caphosh.

¹¹ Aid tabadaidquo aid shubutedi Nuquin Papa tabadaid yec abi yacpadquo abichobi bëchamuanquiecposh. Casëdu bëdambo icquidimboc isquid-isquidquo isadposh.

12 Shubu abitedi nënantan icnuc abichobi daquënë uaid icposh. Abucquoio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bédabo 12tedbidi icposh. Aid shëcuë bétashte 12tedbidi icposh. Aid bétashten Acobon mado cuëmédquid 12tedbidi dada uabampaccosh naden. Bétashten Acobon mado Ose cuëmédquid dada uatanquin bétashte utsin Acobon mado utsi Uda cuëmédquid dada uatanquimbic adenuidi bétashten bétashtenquien Acobon mado cuëmédquid cuëmédquidquien dada uabampaccosh.

13 Aid daquënë uaid puduedte shëcuë ushë choauc 3tedi icposh. Ushë nibédauc nodte yauc aidtedbidi shëcuë icoaposh. Ushë nibédauchbidi sud yauc aidtedbidi shëcuë icposh. Ushë budauc aidtedbidi shëcuë icposh.

14 Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbéd icquido èbitedi cuëmédquid 12tedi aid cuënote dapan abentse-abentsen dada uabampaccosh naden. Cuënoten èbi cuëmédquid Uan dada uatanquin cuënote utsin Petedo cuëmédquid dada uapaccosh. Adenuidi cuënoten cuënotenquien Esusbéd icquido cuëmédquid cuëmédquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobèdi Esus tantiaquido Nuquin Papa yacno Esusbèdi tabadendac —quequin tantiamenuen Acobon mado cuëmédquidotedi dada uaidbèdta Esusbéd icquido cuëmédquid dada uaid aden ismeposhi.

15 Adshumbic èbi chuiboedën mayan bédan shocosh bédaidquio nacnenaid tambante sanamposh. —Nuquin Papa tabadacno tambanquin daquënë uaidbèdtabi puduedte shëcuëtedi tambanten tambanu —queposh.

16 Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ènapenquioshë. Aidtionuidi iccosh cuëma abitedi. Adoshombic abuc yacmi cuembentsen tanac aidtionquibidi icposh.

17 Nidaid cuënote nuamboshë icquid dapa tsindoquin daquënë uaid bit-sipambo icquidtsen tanac nuamboshë bitsi icposh. Matsesën nacnenaid tambanten fanac metedos 65ted cactiombi icposh nuamboshë bitsipambo.

18 Daquënë uaid abichobi isquid-isquidquio isadposh. Bédamboshë icposh. Padnuen shubu abitedi shocosh bëshpiu-bëshpiuctsëcquid nacnenaiduidquio yec nac-nacquio icposh.

19 Aid daquënë uaqin tauaquin sandoaid nidaid cuënote dapa casëdubimboecquid bédambo icquid matses comapenec bunaidquio utsi-utsien dabitaccabanaid niosh. Abentsëc aspe caid umu-umumboctsëcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi.

20 Utsibic onise caid piumbo icquid. Utsibic conadina caid piu-piupactsëcquid. Utsibic quidisodito caid bëshpiu-bëshpiupactsëcquid. Utsibic bedido caid umu-umupactsëcquid utsi. Utsibic topasio caid piu-piupactsëcquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidtedi dabitaccabanaccosh. —Nuquin Papa yacnombo bédamboshë iquendac —camenuen aden ismeposhi.

21 Daquënë uaid puduedte shëcuë 12tedi icposh. Aid bétashtetedi acte chiumbimboecquidën casëdu ushu uaid nuacquid dapano abichobi-abichobien nacnenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiuctsëcquid acte-

actectsëcquio icnuc mabiunaid icposh. —Esusbëd Nuquin Papa tabadac-nombo bëdambo icquiduidquio iquendac —camenuen aden ismeposhi.

²² Ambobi abi bëisec tabadacnombo Nuquin Papa tabadte shubu uashuaid nibëdposh. Ambo Nuquin Icho Esus abided cuidadec unësaidbëd Nuquin Papa icsho bëisquioquin tantiec anocquido tabadendac.

²³ Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaid bedshunu ec abided cuidadec unësaid Esusbëd Nuquin Papa bëchamauanquieccquid icquin ambo ushëmbouidi icmendac. Inchëshaid tantiadenquio iquendac. —Nuquin Papa icsaisambo icnuc abi yacno icsaido nibëdquio iquendac —camenuen aden ismeposhi.

²⁴ Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenenec tabadcuenash: —Esusbëd Nuquin Papa abitedishun Icbombo nec. Abipadquid utsi nibëdec —quendac.

²⁵ Nuquin Papa matsesbëdi tabadacnombo inchëshenquio icnuc: —Icsambo icquido puduednushë. Bëtashnu —quetiapimbo icsho isun daquënë uaid shëcuë bëtashenquio iquendac. Shëcniacchobi iquendac.

²⁶ Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen tantiaquidquio yec abitedishun Icbombo nec. Abipadquid utsi nibëdec —quendac abitedi.

²⁷ Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uacbimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquio bëdamboshëuidquio iquendac —quequin aden ismeposhi mayan bëdan.

22

Nuquin Papa yacno acte ismiaid

¹ Adshumbic aid mayan bëdan padpiden ismeoaposhi. Adoac Nuquin Papa abided cuidadec unësaid aton Madobëdquio tsadte dapan tabadacnuësh matses unëstiapimbo icmetequid acte bëdambo icquid nushan nibëdquidquio chëuëdsho ispombi.

² Nuquin Papa yacnuëshquio choec chëuëdec ambo tabadquido Esus tantiaquido tabadaid shubu nënantanquio chëuëdposh. Aid cuëmambi matses unëstiapimbo icmetequid cuëtetsen icposh. Baded-badedquiecbacuëquidquio niosh. Inchëshën ushë choan-choanquiecbadedquio bacuëquid niosh. Aid cuëte podo nidaid utsi-utsiec yacno tabadquido bëdambo icmetequid niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi.

³ Aden abitedi bëdambo icmiac cuidtequido nibëdquio iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquiecbacuëquid Esus tantiaquido tabadendac.

⁴ Adec: —Con bacuëbo nec —quequin Nuquin Papan abi cuëmëdquid dada uaquin bësiaidon Nuquin Papambo bëisquiecbacuëquid tabadendac. —Nidaidën tabadec

bëdamboec tabadquido Nuquin Papabëd tabadec abipadquio bëdamboshë yanendac —camenuen aden ismeposhi.

⁵ Ambo bëdambouidquio yec inchëshenquio iquendac. Nuquin Papa bëchamauanquiecidëmbi ushëmbouidquio iquendac inchëshaid tantiaquidquio yec. —Aden abi tantiaquido bëdamboen isquin ënenquio icquin bëdamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

⁶ Adshumbic mayan bëdan chuioposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

Esus chote chiaid

⁷ Adnubini Esusënquio naden chuiposh. —Chieshtoenquio icquin ëbi tantiatia. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

⁸ Uan nebi. Abimbo chuiquin nëid dada uaombi. Aden mayan bëdan chuibanquio ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuec.

⁹ Adshobini: —Padi. Aden ëbi ismenda. Mibipadquid Nuquin Papan yuabidi nebique. Èndenquimboshë Nuquin Papan tantiamiac min tsusedpabo isadaidbon ambi chiaidquido dada uapampic. Nëbi ëmbi ismeboed tantiaquin Nuquin Papan chiacpadamboen naquido aton yuabobidi nec. Adquidbidi nebi aton yuambo. Nuquin Papauidtsëqui tantiaquin aden ismeta —caposhi mayan bëdan.

¹⁰ Adashic padpidec: —Èmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushë. Chieshtoenquio icquin Esus tantiec ma tabadnu,” qeshun dada uata.

¹¹ Nëbimbobi Esus chonoc Esus tantiesabo badedquio bëdamboec tabadcuentiapimbo iquendac. Abi icsaid badedquio ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun —queposh mayan bëda.

¹² Adnubini Esusën chuioposh. —Chieshtoenquio icquin ëbi tantiatia. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi.

¹³ Nuquin Papapadquidquio nebi. Èmbi tantiacmaid nibëdnuc abitedi compenën tantiaquidquio nebi. Nidaid uabi yec ictenedi nëbi adquidquio yec nibëdantiapimbo icquid nebi. Adquid yec abitedishun Icbombo nebi.

¹⁴ Icsambo icboedon ëbi tantiasho icsaisabimboecnuc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiacbimboen.

¹⁵ Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquio chudquido. Nëidic aton bënëpenquio chudmequido. Nëidic cuesanquido. Nëidic papa quequin ambi nacnenaiddi tantiaquido. Nëidic abi bunaiduidquio naic muauanquido. Aidtedi Nuquin Papa yacno puduedtiapimbo iquendac.

¹⁶ Ëmbi chiacpadomboen mayan bēdan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuiampid nebi. Isadaidbon cainaidquo nebi. Utsin: “Dëniacnu,” cadiapimbo icquid nebi. Adquid icquin matses abitedimbo namendambi –quequin chuiposhi Esusën.

¹⁷ Adsho tantiasun Nuquin Papan Mayanën tantiamiacpadomboen chuiquin: –Nëbimbobi Esus chonoshe. Aidquo tantiabenta –caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: –Nëbimbobi chonoshe. Aidquo tantianuna –cac bēdambo ictsiashe. Adsho tantiashe Esus tantiesabo acte bunacbimboec Esus tantiate bunsho Nuquin Papan bēdamboen isendac. Nuquin Papa bēdamboen ismenuen menete nibēdnuc Esusuidi tantiashe Nuquin Papan bēdamboen isquin abēdi tabadmendac.

¹⁸ Tandia. Ëmbi chuiboed tantiaquido chuinu. Nuquin Papan: –Nadquid iquendac. Yucash utsi iquendac –quequin ëbi ismeboedtedi dada uaombi. Ëmbi dada uaboed tsitënuquin ambembi chiaid dada uainda. Ëmbi chuibocpadomboen Nuquin Papan mibi cuidtsiashe.

¹⁹ Adembidi ëmbi dada uaboed utsi uainquo icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquo ictsiashe. Adembidi bēdamboeshë yacno abēdi mibi tabadmenquo ictsiashe.

²⁰ –Ma aitedi tantianu –quequin Esusën chiacpadomboen mayan bēdan aitedi ismeposhi. Ëmbi chuibocpadomboen Esusën: –Nëbimbobini choendac –caposhi. Adsho tantiasun: –Ai, nëbimbobi chota –capombi.

²¹ Mibitedi Esus tantiaquidtedi tantiaquin: –Ambi nabocpadomboen Nuquin Icho Esusën bēdamboen isquin bēdambo icmepashun –caimbi. Padi. Aitedi chuiquin dada uaombi.